


Nuevo Testamento en
mixteco



New Testament in Mixtec, Atláhuca (MX:mib:Mixtec,
Atláhuca)

Nuevo Testamento en mixteco
New Testament in Mixtec, Atatláhuca (MX:mib:Mixtec, Atatláhuca)

copyright © 1973 Wycliffe Bible Translators, Inc.

Language: Mixtec, Atatláhuca

Translation by: Wycliffe Bible Translators, Inc.

Mixteco, Atatláhuca [mib], Mexico

Copyright Information

© 1973, Wycliffe Bible Translators, Inc.

This translation text is made available to you under the terms of the Creative Commons License: Attribution-Noncommercial-No Derivative Works. (<http://creativecommons.org/licenses/by-nc-nd/3.0/>) In addition, you have permission to port the text to different file formats, as long as you do not change any of the text or punctuation of the Bible.

You may share, copy, distribute, transmit, and extract portions or quotations from this work, provided that you include the above copyright information:

You must give Attribution to the work.

You do not sell this work for a profit.

You do not make any derivative works that change any of the actual words or punctuation of the Scriptures.

Permissions beyond the scope of this license may be available if you contact us with your request.

The New Testament

in Mixtec, Atatláhuca

© 1973, Wycliffe Bible Translators, Inc.

This translation is made available to you under the terms of the Creative Commons Attribution-Noncommercial-No Derivatives license 4.0.

You may share and redistribute this Bible translation or extracts from it in any format, provided that:

You include the above copyright and source information.

You do not sell this work for a profit.

You do not change any of the words or punctuation of the Scriptures.

Pictures included with Scriptures and other documents on this site are licensed just for use with those Scriptures and documents. For other uses, please contact the respective copyright owners.

2014-04-30

Contents

SAN MATEO	1
SAN MARCOS	49
SAN LUCAS	79
SAN JUAN	129
HECHOS	166
ROMANOS	214
1 CORINTIOS	235
2 CORINTIOS	254
GÁLATAS	267
EFESIOS	274
FILIPENSES	281
COLOSENSES	286
1 TESALONICENSES	291
2 TESALONICENSES	295
1 TIMOTEO	298
2 TIMOTEO	304
TITO	308
FILEMÓN	311
HEBREOS	313
SANTIAGO	328
1 PEDRO	333
2 PEDRO	339
1 JUAN	343
2 JUAN	348
3 JUAN	349
JUDAS	350
APOCALIPSIS	352

JNUHUN VAHA NI TEE SAN MATEO

Lista ñayuu yucūn jeē ní quiji Jesucristo (Lc. 3.23-38)

¹ Yāha cúu lista ñayuu yucūn jeē ní quiji Jesucristo. Te máá yá ni quiji nuū yucūn rey David, te David ni quiji nuū yucūn Abraham.

² Abraham ni cuu de tātá Isaac, te Isaac ni cuu de tātá Jacob, te Jacob ni cuu de tātá Judá jíin táca ñani i.

³ Te Judá ni cuu de tātá Fares jíin Zara, te náná ndindúú i ni cuu Tamar. Te Fares ni cuu de tātá Esrom, te Esrom ni cuu de tātá Aram.

⁴ Te Aram ni cuu de tātá Aminadab, te Aminadab ni cuu de tātá Naasón, te Naasón ni cuu de tātá Salmón.

⁵ Te Salmón ni cuu de tātá Booz, te náná i ni cuu Rahab. Te Booz ni cuu de tātá Obed, te náná i ni cuu Rut. Te Obed ni cuu de tātá Isaí.

⁶ Te Isaí ni cuu de tātá David, tēe ni cuu rey. Te rey David ni cuu de tātá Salomón, te náná i, xīhna gā ni cuu ña ñasihí Urías.

⁷ Te Salomón ni cuu de tātá Roboam, te Roboam ni cuu de tātá Abías, te Abías ni cuu de tātá Asa.

⁸ Te Asa ni cuu de tātá Josafat, te Josafat ni cuu de tātá Joram, te Joram ni cuu de tātá Uzías.

⁹ Te Uzías ni cuu de tātá Jotam, te Jotam ni cuu de tātá Acáz, te Acáz ni cuu de tātá Ezequías.

¹⁰ Te Ezequías ni cuu de tātá Manasés, te Manasés ni cuu de tātá Amón, te Amón ni cuu de tātá Josías.

¹¹ Te Josías ni cuu de tātá Jeconías jíin táca ñani i, máá tiempo jeē cuángoo ñayuu Israel preso nde ñuu Babilonia.

¹² Te náa cáyūcú i yūcuán, te Jeconías ni cuu de tātá Salatiel. Te Salatiel ni cuu de tātá Zorobabel.

¹³ Te Zorobabel ni cuu de tātá Abiud, te Abiud ni cuu de tātá Eliaquim, te Eliaquim ni cuu de tātá Azor.

¹⁴ Te Azor ni cuu de tātá Sadoc, te Sadoc ni cuu de tātá Aquim, te Aquim ni cuu de tātá Eliud.

¹⁵ Te Eliud ni cuu de tātá Eleazar, te Eleazar ni cuu de tātá Matán, te Matán ni cuu de tātá Jacob.

¹⁶ Te Jacob ni cuu de tātá José, tēe ni cuu yíi María. Te María ni cuu ña náná Jesús, Yaā naní Cristo.

¹⁷ Te nde Abraham te nde David ni iyo uxī cuūn yucūn. Te nde David te nde náa cuángoo ñayuu Israel preso ñuu Babilonia ni iyo inga uxī cuūn yucūn. Te nde ná ni jengoo i preso te nde ni cacu Cristo, suni ni iyo inga uxī cuūn yucūn.

Jeē ní cacu Jesucristo (Lc. 2.1-7)

¹⁸ Te jeē ní cacu Jesucristo, súcuan ni cuu: Náná yā María, je ni cundaā jeē quijnáhan ña jíin José. Te nde ná tu quijnáhan ña jíin de, te ni jecūhun séhe ña ni sáha Espiritu Santo.

¹⁹ Te José, tēe quijnáhan ña jíin, chi tēe ndaā cúu de. Te tu ní cúní de cuāha de jnūhun canu ña, chi sa cúní de jeē na jécuiñī sāhi jēe ma quijnáhan de jíin ña.

²⁰ Te níní súcuan nácani ni de, te jíin jéni ni quee-ni ñin ndajéhé maá Jítoho yō Yaā Dios nuū de, te ni cahān yā jíin de:

José, séhe yucūn David, ma yūhu ró cueca ró ñasihí ró María, chi séhe jeē scácu ña, vēji i nde nuū maá Espiritu Santo.

²¹ Te scácu ña ñin séhe yíi. Te snání ró i Jesús, chi máá i cúu Yaā jnama ñayuu nuū cuéchi i, áchí ndajéhé.

²² Súcuan ni cuu tācá jniñu yáha, návāha squícu jnūhun Jítoho yō Yaā Dios jeē ni cáhān tēe ni nacani jnūhun ya nde jenahán. Te suhva ni cahān de:

²³ Coó ñin sūchi síhí, te nihīn séhe i, te scácu i ñin séhe yíi,

te conaní sūchí un Emanuel.

Achí tutu. Te síhví yáha cúní cahān: Yaā Dios ndeé yá jíin yó.

²⁴ Te ni natahū ni José, te ni sáha de nájñūhun ni cahān ndajéhé Jítoho yō jíin de. Te ni jeca de María ni cuu ña ñasihí de.

²⁵ Te tu ní quíxí de jíin ña, chi nde ni scácu ña séhe yíi núú ña. Te ni snaní de i Jesús.

Jeē ní quijicoo tēe mago nuū yā

2

¹ Te ná ni cacu Jesús ini ñuu Belén ndañūū Judea, te tiempo un ndácu rey Herodes

jniñu. Yūcuán na te jecu tēe ndíchí jēe cascuáha siquī quími, ni quiijicoo de nde jicá, ichi nuū cáne niāndii, te ni jinūcoo de ñuu Jerusalén.

² Te ni cacajñuhún de ñayuu:

¿Ndé nuū íne sūchí jeē ní cacu jeē coo rey ñayuu hebreo? Chi ichi núu cáne niāndii ni cajito ná ñn quími cáhnu jeē cúu seña jeē ní cacu i. Te vējicoo ná chiñúhún ná i, áchí de.

³ Te rey Herodes, ná ni jini de jñuhun yáha, te ni cunéé ni de, nde jíin táca ñáyuu ñuu Jerusalén.

⁴ Te ni nastútú de táca sūtū cácujeñhu jíin tēe cástéén tutu ley Yaā Dios nuū ñáyuu. Te ni cajñuhún de tēe un ndé nuū cacu Cristo achí tutu.

⁵ Te ni cacachi nuū de:

Ini ñuu Belén ndañúu Judea. Chi suhva cáhán nuū tutu ni tee tēe ni nacani jñuhun ya nde jenahán:

⁶ Te róhó ñáyuu ñuu Belén ndañúu Judá, cújéñhu ga ñuu rō vēsú táca gá jeē cujéñhu ini Judá.

Chi suu ini ñuu rō quenda ñn Yaā ndacu jniñu,

te coto ya ñayuu maá rí Israel, achí Yaā Dios. Achí tutu.

⁷ Yūcuán na te Herodes ni cana sáhi de táca tēe ndíchí un jēe naní mago. Te ni cajñuhun yúcún de ndé quíví ní cane quími ún.

⁸ Te ni tají de tēe un quíngoo de ñuu Belén. Te ni cahán de:

Cuángoo ní te cajñuhun yúcún ní ndé nuū íne sūchi lúlí un. Te núu ni nanihín ní i, te quiijicoo ní castūhun ní nuū ná, návāha suni máá ná quichiñúhún ná i, áchí rey.

⁹ Te jeē ní cajini de jñuhun ni cahán rey, te cuángoo de. Te máá quími cáhnu jeē ní cajito de ichi núu cáne niāndii, yósnúu núu de cuahán nde ni jinū nuū íne sūchi lúlí un, te yūcuan ní jecuiñí.

¹⁰ Te ná ni cajito de jeē ní jecuiñí quími ún, te yōhyo ni cacusí ni de.

¹¹ Te ni jinūcoo de ni quívicoo de ini vehe, te ni cajito de nuū sūchi lúlí un jíin náná i María. Te ni cajecuiñí yití de nuū i, te ni cachiñúhún de i. Te ni canune de yejñú de, te ni casocō de oro jíin súje cūtú jíin súje uvuā nuū i.

¹² Yūcuán na te ni scóto jēni de, ni cachi nuū de jeē ma nuhún de nuū Herodes. Te inga ichi cuanuhun de ñuu de.

Jeē ní jinu José cuángoo de nación Egipto

¹³ Te náa cuánuhun táca tēe mago, te ni scóto jēni José jeē ñn ndajéhé maá Jítoho yō Yaā Dios ni cahán yā jíin de:

Ndocuiñí te cunu ró quíngoo ró jíin sūchi lúlí jíin náná i nde nación Egipto. Te yūcuán coyūcu ró nde castūhun rí nuū rō. Chi Herodes je yajni nanducú de sūchi lúlí jíin jeē cáhni de i. Achí yá.

¹⁴ Te ni natahū ni José. Te cuángoo de jíin sūchi lúlí jíin náná i, te ñuú ní cajica de cuángoo de nación Egipto.

¹⁵ Te ni coyúcú de yūcuan ndé ni jihí Herodes. Te súcuan ni cuu návāha squícu jñuhun Jítoho yō Yaā Dios jeē ni cahán tēe ni nacani jñuhun ya nde jenahán: Nde nación Egipto ni cana rí Sēhe rí vēji i, áchí Yaā Dios, achí tutu.

Jeē ní ndacu Herodes jniñu jeē na cúu táca sūchi yí lúlí

¹⁶ Yūcuán na te Herodes ni jini de jeē súcuan ni castáhú tēe mago un de, te yōhyo ni quítí ni de. Te ni tají de soldado cuángoo, te ni cajehni táca sūchi yí lúlí jēe uú cuiyā jíin jēe yíquín gá jeē cáyúcú ini ñuu Belén jíin táca ñuu yajni. Chi je ni cajñuhun yúcún de táca tēe mago un nasaa tiempo ni cuu jeē ní cacu Jesús.

¹⁷ Te súcuan ni squícu jñuhun ni cahán Jeremías, tēe ni nacani jñuhun Yaā Dios nde jenahán, chi ni cahán de:

¹⁸ Ini región Ramá ni jini sōho rí jeē cándahyū te cándahyū cohó.

Chi ñahan cácuu yucūn Raquel, cándahyū ña jehē séhe ña,

te tu cácuni ña ndusí ni ña, chi ni cajihí i. Achí tutu.

¹⁹ Yūcuán na te ni jihí Herodes. Te ni scóto jēni José jeē ñn ndajéhé Jítoho yō Yaā Dios ni cahán yā jíin de nuū ndeé de nación Egipto.

²⁰ Te ni cahán yā jíin de:

Ndocuiñí te nuhun rō ñuu rō Israel jíin sūchi lúlí jíin náná i. Chi je ni cajihí tēe cánducú cahni sūchi lúlí jíin nuú. Achí ndajéhé.

21 Yūcuán na te ni ndocuiñī de, te cuanuhun de nación Israel jín súchi lúli jín náná i.

22 Te ni nihīn de jnūhun jeē Arquelao ni nucuiñī de nuū tatá de Herodes, te máa de ndácu jniñu región Judea. Te ni yūhú de nuhun de yūcuán. Te ni scóto jēni de jeē na quíhín de región Galilea, te cuango de.

23 Te ni jinū de yūcuán, te ni coyūcú de ñuu naní Nazaret. Súcuan ni cuu návāha squícu jnūhun ni cacahān tēe ni canacani jnūhun Yaā Dios nde jenahán. Chi ni cacachi de jeē cahān ñayuu jeē tēe ñuu Nazaret cúu Jesús.

Jnūhun Juan tēe scuándute
(Mr. 1.1-8; Lc. 3.1-9, 15-17; Jn. 1.19-28)

3

1 Te ni yāha tiempo, te ni jinū Juan tēe scuándute nde nuū ñúhun téhé ndañúu Judea, nacani de jnūhun suhva:

2 Nacani ni rō jijnáhan rō jēe stóo rō cuéchi rō, chi je ni cuyajni Yaā ndeé andiví jēe ndacu ya jniñu nuū rō. Achí de.

3 Te Isaías, tēe ni nacani jnūhun Yaā Dios nde jenahán, suhva ni tee de jnūhun Juan nuū tútu:

Coo ñn tēe cana jee nde nuū ñúhun téhé:
Sátūhva rō máa rō jijnáhan rō, chi quee maá Jítóho yō.

Te sáha rō jniñu ndaā, chi vēji ya, achi de.
Achí Isaías.

4 Te sahma ñúhun Juan cúu ixí quiti nání camello, te núhni ñn cinturón ñi chīji de. Te jeē técu de cúu tíca ndicuéhyí jín ndúxi yocō.

5 Te ñayuu ñuu Jerusalén jín táca ñáyuu región Judea jín ñáyuu yúcu yajni yuyúte Jordán, ni quijicoo i nuū de.

6 Te ni canacani ndaā i cuéchi i nuū Yaā Dios, te ni scuándute de i ini yūte Jordán.

7 Te ná ni jito de jeē véjicoo cuehē tēe grupo fariseo jín tēe grupo saduceo nuū scuándute de, te ni cahān de jín:

Va sēhe coō cácuu rō, chi xeēn rō nájñūhun coō. ¿A cájeni ni rō jeē cuu cunu rō cácu rō núu castigo xeēn jeē quíji?

8 Núu súcuan te sáha rō jniñu váha, te súcuan stéén rō jeē ní canacani ndije ni rō jeē stóo rō cuéchi rō.

9 Te ma cáni ni rō cahān rō jeē cuu cácu rō síquī jeē cácuu rō yúcūn Abraham. Chi cahán rī jín rō jeē cuu sáha Yaā Dios jeē táca yúu yáha nduu sēhe Abraham jeē candíje váha, te núu cúní yā.

10 Te cácuu rō nájñūhun nundēhé jeē tu jéhe ndehē váha. Te vijna je íyó túhva Yaā Dios jeē cuáha ya castigo xeēn, nájñūhun je íyó túhva ñn cáa jeē cahnde nde yoho yujnu. Núu súcuan te sáha ya jín rō nájñūhun jín táca yujnu jeē tu cúun ndehē váha, jeē tahndé te cayū nuū ñuhún.

11 Te ruhū chi jín ndute scuándute ri rohó, te yūcuan cúu jeē steén rō jeē ní canacani ni rō jeē stóo rō cuéchi rō. Te Yaā jeē quíji, chi nájñūhun scuándute ya rohó cúu jeē cuáha ya Espíritu Santo condee ini anuá rō, te poder yā cúu nájñūhun ñuhún. Te Yaā quiji chi cújéhnu ndasí yá. Chi tú na vé jéhnu cuiti cúu ri nuū yā, ni jeē cuajniñu ri nuū yā vēsú ñn jniñu lúli gá nájñūhun jeē quénehen ri ndijēn yā.

12 Te sáha ya nájñūhun sáha tēe scánda trigo, chi sásñn ya ñayuu váha jín ñáyuu cunéé, nájñūhun cúndoo trigo jeē quénda sñn paja. Te nastútú yá trigo yā ndiví ini yacā yā. Te paja chi jnaa yā nuū ñuhún jeē ma ndahvá cuiti. Achí Juan.

Jeē ní jendute Jesús
(Mr. 1.9-11; Lc. 3.21-22)

13 Yūcuán na te ni quenda Jesús región Galilea, te ni quee yā yūte Jordán nuū íne Juan, návāha scuándute de ya.

14 Te tu ní cúní Juan scuándute de ya, chi ni cahān de jín yá:

Sa suhva cánuú jeē scuándute máa ní sãñá, ¿te ndese cúu jeē sa nuū ná vēji ní? áchí de.

15 Te ni cahān Jesús jín de:

Tuú chi sáha rō, chi súcuan cánuú squícu yó táca jniñu ndácu Yaā Dios, achí yá.

Yūcuán na te ni scuándute de ya.

16 Te ná ni cuu ni jendute Jesús, te ni quenda ya nuū ndúte. Te ni nune-ni andiví, te ni jito ya jeē cúun Espíritu Yaā Dios vēji, te cáa nájñūhun ñn paloma, te ni quee xiní yā.

17 Te ichi ándiví ni cahān ñn jnūhun:

Yāha cúu Sēhe ri jeē maní ndasí rí jín, te yōhyo cúsiñ ni rī jín, áchí.

*Jeē ní jito ndee jexeén Jesús
(Mr. 1.12-13; Lc. 4.1-13)*

4

¹ Yūcuán na te ni jinū Jesús nde nuū ñúhun téhé ní sáha Espíritu Santo. Te yūcuán coto ndee jexeén yā, chi cúní jeē sáha ya cuēchi.

² Te ni Iyo ndite ni yā uū xico nduú uū xico ñuú, sáa te jíi yā sōco.

³ Te ni quee maá jexeén jeē cóto ndee un yá, te ni cahān jíin yá:

Núu maá ró cúu Sēhe Yaā Dios, te cahān rō jeē yuū yúcu yáha na ndúu staā caji rō, achí.

⁴ Te ni cahān yā jíin:

Tuú chi yósó núu tútu i: Nasūu máni maá jíin stāā cátecu ñayuu, chi suni jíin táca jnúhun cáhán Yaā Dios, achí yá.

⁵ Yūcuán na te cuahān jexeén un jíin yá nde ñuu i Jerusalén. Te ni jeni ya xiní torre templo.

⁶ Te ni cahān jíin yá:

Te núu Sēhe Yaā Dios cúu ró, te sǎngava ró maá ró nde nuū ñúhun, chi jnama ya rohó.

Chi yósó núu tútu:

Tejníñu ya ndajéhé yā quijicoo coto rǎhó.

Te cunundee yā rohó jíináhan ya, návāha ma cáchihi ró jéhē rō nuū yuú.

Achí tutu. Achí jexeén.

⁷ Te ni cahān Jesús:

Tuú chi suni yósó núu tútu jeē ma cóto ndee ñayuu Jitoho i Yaā Dios, núu jnama ya i chí tuú, achí yá.

⁸ Te jexeén un ní jeca tucu ya cuahān jíin yá nde xiní ñn yucu súcún ndasí. Te ni steén táca nación ní cáhnu ñayívi núu yā, te yōhyo luu cáa ndíhi.

⁹ Te ni cahān jíin yá:

Táca ñuu yáha cuáha ri nuū rō, te núu cuiñi yítí ró chiñúhún ró ruhū, achí.

¹⁰ Yūcuán na te ni cahān Jesús nuū jexeén:

Satanás, cujiyo quihīn rō, chi yósó núu tútu jeē chiñúhún ñayuu maá Jitoho i Yaā Dios, te nuū maá-ni ya cuajníñu i. Achí yá.

¹¹ Yūcuán na te ni cujiyo-ni jexeén un cuahān. Te ni quecoo ndajéhé Yaā Dios ni cajejníñu nuū yā.

*Jeē ní quejéé Jesús nácani ya jnúhun región Galilea
(Mr. 1.14-15; Lc. 4.14-15)*

¹² Te ná ni nihīn Jesús jnúhun jeē íne Juan vecā, te cuanuhun yā región Galilea.

¹³ Te tu ní cóndee yā ñuu Nazaret, chi ni jehēn yā ni condee yā ñuu Capernaum. Te ñuu un íne yumar, maá región Zabulón jíin Neftalí.

¹⁴ Te súcuan ni squícu jnúhun ni tee Isaías, tēe ni nacani jnúhun Yaā Dios nde jenahán:

¹⁵ Región Zabulón jíin Neftalí,

ichi jeē yíhi yumar, lado yūte Jordán nuū cáne niāndii,

jíin región Galilea nuū cáyūcú ñayuu táca nación tu jíin jnúhun ya.

¹⁶ Ñayuu ún chi nájnūhun cáyūcú i nuū néé, te coto i nájnūhun ñn luz cáhnu.

Te ñayuu je yajni naa, nihīn i jnúhun váha ndasí,

suu jnúhun jeē jnama ya anuá i.

Achí Isaías.

¹⁷ Te nde quiví yúcuan ní quejéé Jesús nácani ya jnúhun, te ni cahān yā suhva:

Nacani ni rō jíináhan ró jéé stóo ró cuéchi ró, chi je ni cuyajni Yaā ndeé andiví jéé ndacu ya jniñu nuū rō, achí yá.

*Jeē ní cana ya cuūn tēe jnā chācá
(Mr. 1.16-20; Lc. 5.1-11)*

¹⁸ Te jica Jesús yumar Galilea cuahān yā. Te ni jito ya nuū uú jnáhan ñani. Te ñn de cúu Simón jeē suni nání Pedro, te ñnga de cúu Andrés. Te tēe cájni chācá cácuu de, te cáśinga de ñunu de ini mar.

¹⁹ Te ni cahān yā jíin de:

Condiquīn ruhū na quihín yō, te nasáha ri rohó tēe nihīn cuehē ñayuu candíje ruhū, nájnūhun cánihīn rō chācá, achí yá.

²⁰ Yūcuán na te ni castóo-ni de ñunu de, te ni candiquīn de ya.

²¹ Te ni jica ya jecu gā, te ni jito ya nuū ñnga uú jnáhan ñani. Te cácuu de Jacobo jíin Juan, sēhe Zebedeo. Te cáyūcú de ini barco jíin tátá de Zebedeo, cánachijnñi de ñunu de. Te suni ni cana ya de jeē cóndiquīn de ya.

²² Te ni castóo-ni de tátá de jíin barco, te ni candiquīn de ya cuango de.

*Jeē ni steén yā nuū cuehē ñayuu
(Lc. 6.17-19)*

²³ Te ni jica cuu Jesús ní región Galilea, ni steén yā jnúhun ini táca vehe i jeē cúu sinagoga. Te ni nacani ya jnúhun váha

ndese ndácu Yaā Dios jniñu. Te ni nasávāha ya ñayuu cácuñu táca-ni cuehyí.

²⁴ Te ni jitē núu jñūhun ya cuahān ñí región Siria. Te nuū yā ni caquindeca i tāca ñáyuu cácuñu, ñayuu cándoho tijñi nuū cuehyí, jíin jéē jetú, jíin jéē ñúhun tachī ini, jíin jéē jihí yāhí, jíin jéē ní íjin. Te ni nasávāha ya i jíjnáhan i.

²⁵ Te cuehē ñayuu región Galilea jíin Decápolis, jíin ñáyuu ñuu Jerusalén jíin región Judea, jíin táca ñuu ichi núu cáne niāndii yūte Jordán, ni cacondiquin i ya.

Jeē ní nacani ya jñūhun nde nuū yúcu

5

¹ Te ni jito Jesús nuū ñáyuu cuehē. Te ni caa ya yucu cuahān yā, te ni cucōo ya. Te tēe cáscuáha jíin yá, ni jinūcoo de nuū yā yūcuán.

² Te ni quejéé yá ni steén yā táca jñūhun yáha nuū de:

*Jñūhun yōhyo ndetū
(Lc. 6.20-23)*

³ Yōhyo ndetū ñayuu jeē cánacuni i jeē tu íyó váha ánuá i síquī cuéchi i, chi je ni quívicoo i ndaha Yaā andiví jéē ndácu ya jniñu nuū i.

⁴ Yōhyo ndetū ñayuu cácuñuhyá ni, chi ndusí ni i sáha Yaā Dios.

⁵ Yōhyo ndetū ñayuu cáhīyo vītá suchí ini, chi ni jejnūhun ya jeē cutahū i ñayiví.

⁶ Yōhyo ndetū ñayuu jeē nájnūhun jeē cájií i sōco cájichí i, súcuan jnāā i sáha i jniñu ndaā, chí máá yá chindéé ñáhán yá i jeē cuu sáha i.

⁷ Yōhyo ndetū ñayuu cácuñuhú ni jnāhan, chí suni cundáhú ni Yaā Dios i.

⁸ Yōhyo ndetū ñayuu cáhīyo ndoo ini anuá, chí coto i nuū Yaā Dios.

⁹ Yōhyo ndetū ñayuu cánasámaní jnāhan, chí cahān Yaā Dios jeē sēhe ya cácuu i.

¹⁰ Yōhyo ndetū ñayuu jeē cájito xeēn inga ñayuu i síquī jeē casáha i jniñu ndaā, chí je ni quívicoo i ndaha Yaā andiví jéē ndácu ya jniñu nuū i.

¹¹ Yōhyo ndetū maá ró jijnáhan ró núu cácahān neé i nuū rō jeē síquí ruhū, te coto xeēn i rōhó, te stáú yáhu i rōhó, vēsú tú cuēchi ró.

¹² Na cúsiñ ni rō jijnáhan ró núu súcuan, te sa víhyá gā cusíñ ni rō, chí cáhnu ndasí coo tahū rō nde andiví. Chí suni súcuan ni cajito xeēn i táca tēe ni canacani jñūhun Yaā Dios jeē ní quijicoo xīhna gā vēsú rohó.

*Jñūhun yátá síquī ñí jíin síquī luz
(Mr. 9.50; Lc. 14.34-35)*

¹³ 'Máá ró jijnáhan ró cájejniñu ró ini ñayiví nájnūhun jéjniñu ñí nuū cúñu návāha tú tehyū. Te núu ñí ún na náā jeē uhvuá, ¿te ndese nduu uhvuá tucu? Tuá cuajniñu cuiti gā, chí sa cate ñayuu te cueñū i síquī.

¹⁴ 'Máá ró cácuu nájnūhun luz jeē steén ini anuá ñayuu ñayiví. Te cácuu ró nájnūhun ñí ñuu íne xiní yúcu, jeē ma cúu quisáhi.

¹⁵ Te ni tu nástñ ñayuu ñí lámpara te chune i chíji cajón, chí sa suhva jéni i nuū sucún, návāha cundijin nuū táca jéē cáyūcú ini vehe.

¹⁶ Te suni súcuan na steén rō luz maá ró nuū táca ñáyuu, te suu cúu jeē cúni i jniñu váha casáha ró, te cahān i jeē yōhyo váha Yaā cúu Tátá rō jeē ndeé yá andiví.

Jeē ni steén yā síquī ley Yaā Dios

¹⁷ 'Ma cáni ni rō jijnáhan ró jéē véji ri snāā rī ley jeē ni jéhe Yaā Dios nuū Moisés, jíin jéē snāā rī táca jñūhun ni cacahān tēe ni canacani jñūhun ya jenahán. Tú véji ri jeē snāā rī, chí sa suhva jeē steén cají rí jñūhun ndíso.

¹⁸ Chí jendaá cahán rī jíin ró jeē núu níni íyó andiví jíin ñayiví, te ma náā cuiti ni ñí punto ni ñí letra nuū tútu ley yā, chí nde na squícu táca ndíhi jñūhun jeē cahán.

¹⁹ Núu súcuan te núu ñí ñayuu tu squícu i ñí jñūhun yáha jéē ndácu ley yā, vēsú ñí jñūhun lulí gá cúu, te núu steén i jeē suni súcuan sáha sava ga ñayuu, núu súcuan te cuu i ñayuu núu ga ichi andiví nuū ndácu Yaā Dios jniñu. Te núu ñí ñayuu squícu i te steén i jeē squícu ñayuu, yūcuán na te cujéhnu i ichi andiví nuū ndácu Yaā Dios jniñu.

²⁰ Chí cahán rī jíin ró jeē núu tú coo ndaā gā jniñu casáha ró vēsú jniñu casáha tēe cásteén tutu ley yā jíin tēe grupo fariseo, te ma quívicoo cuiti rō ndaha Yaā andiví jéē ndacu ya jniñu nuū rō.

41 Te núu ndé tée scáca de róhó jéē condiso ró ndajniñu de ñn kilómetro, te caca ró úu kilómetro jíin de.

42 Te na-ni ñayuu núu jícan i ndajniñu ró, te cuāha ró núu i. Te ñayuu jícan núu ndajniñu nuū rō, ma sasáhán ró cuāha ró núu i.

Jnūhun jeē cundáhú ni yō ñayuu cájito uhū yohó

(Lc. 6.27-28, 32-36)

43 Te suni ni cajini ró jnúhun jeē ni cáhān nde jenahán: Cundáhú ni rō ñayuu cáhīyo manī jíin ró, te coto uhū rō ñayuu cájito uhū rohó, áchí.

44 Te ruhū chi sa cáhān rī jíin ró: Cundáhú ni rō ñayuu cájito uhū rohó. Te cacān rō jeē váha coo ñayuu cácahān ndevāha síquī rō. Te sáha vāha ró jíin ñáyuu cáquitī ni nuū rō. Te cacān tahú rō jehē ñáyuu cácahān neé núu rō te cájito xeēn i róhó.

45 Te súcuan stéén rō jeē cácuu ró séhe máá Tátá rō, Yaā ndeé andiví, chi máá yá jéhe niāndii cūndijin nuū ñáyuu cunéé jíin ñáyuu váha. Te jéhe ya saū nuū ñáyuu casáha jniñu ndaā jíin núu ñáyuu casáha jniñu neé.

46 Chi núu íyó manī rō jíin máá-ni ñayuu jeē manī jíin ró, te tú na tahū nihīn rō nuū yā. Chi nde tēe cástútú xúhun renta jeē castáhú, suni súcuan cásáha de.

47 Te núu máni jnáhan ró cáhān yíñúhún ró jíin, ¿te na vé jeē váha ga sáha ró núu súcuan? Chi nde ñayuu tu cácañíje Yaā Dios, suni súcuan cásáha i.

48 Núu súcuan te ndaā na cóo ndihí jeē sáha ró, nájnūhun íyó ndaā ndihí jeē sáha Tátá rō, Yaā ndeé andiví.

Jeē ni stéén yā ndese sáha yó jniñu váha

6

1 Te jeē sáha ró táca jniñu váha nuū Yaā Dios, coto ró jéē ma sáha ró máá síquī jeē cúni ñayuu te cuajnúhún i róhó. Chi núu súcuan sáha ró, te tú na tahū rō cuāha máá Tátá rō, Yaā ndeé andiví.

2 Jeē yúcuan te jeē sáha ró caridad, te ma sáha ró jéē cúni táca ñáyuu, nájnūhun cásáha tēe stáhú-ni, cáhīn de nuū cúchitú ñayuu ini táca vehe ñi sinagoga jíin núu yáhu. Chi súcuan cásáha de návāha cuajnúhún ñayuu

de jeē váha cásáha de. Jendaá cahán rī jíin ró jeē tahū de cúu jeē jejnúhún ñayuu de.

3 Te róhó jíjnáhan ró, núu cásáha ró caridad, te sáha yuhu rō, návāha nde amigo vāha ró tú cuni jeē sáha ró.

4 Súcuan na sáha yuhu rō caridad. Te máá Tátá rō jeē jíto ya jeē sáha yuhu rō, ñn quiivī te cuāha ya tahū cuu ró.

Jeē ni stéén yā ndese cacān tahú yō

(Lc. 11.2-4)

5 Te jeē cájicān tahú rō, te ma sáha ró nájnūhun cásáha tēe stáhú-ni. Chi cánujnahan ni de cuiñi de cacān tahú de nuū iyó chitú ñayuu ini táca vehe ñi sinagoga jíin táca yíqui yáhu, návāha cuni ñayuu te cuajnúhún i de. Jendaá cahán rī jíin ró jeē maá yúcuan-ni cúu tahū jeē nihín de, suu jeē jejnúhún ñayuu de.

6 Te róhó jíjnáhan ró, núu cájicān tahú rō, te ndiví ró ini vehe ró te casi rō yehyí. Te cacān tahú rō nuū maá Tátá rō, Yaā ndeé yuhu jíin ró. Yūcuán na te máá Tátá rō jeē jíto ya jeē súcuan sáha yuhu rō, sáha ya jeē jícan rō.

7 Te jeē cájicān tahú rō, te ma cahán saá-ni ró jnúhun jeē tu cájecūhun ni rō, nájnūhun cásáha ñayuu tu cájini jnūhun Yaā Dios. Chi cájeni ni i jeē núu cuehē jnūhun súcuan cahān i, te sáa te cuni sōho ya, te tuú.

8 Núu súcuan te ma sáha ró nájnūhun cásáha máá i. Chi máá Tátá rō, je jíni yā na vé cájini ñúhún ró nde ná tu cacān rō nuū yā.

9 Núu súcuan te suhva cacān tahú rō: Tátá maá ná jíjnáhan ná jéē ndeé ní andiví, níni na cóo yíñúhún ná nuū ní, chi Yaā ñi cúu ní.

10 Te ñúhún ni na jéē yachī quiiji quiivī ndacu ní jniñu ní ñáyiví yáha.

Te na cóo táca jniñu nújnahan ni ní, nájnūhun íyó ini andiví, súcuan na cóo ini ñáyiví.

11 Staā jeē cátecu na táca quívī, cuāha ní núu ná vijna.

12 Te cone cahnu ni ni núu táca cuéchi cásáha ná núu ní,

nájnūhun cáhine cáhnu ni na núu ñáyuu casáha cuéchi nuū ná.

13 Te ma cuāha ni jnúhun jeē coto ndee jexeén sāñá,

chi sa suhva jnama ní sáña núu táca jéē neé.

Chi máá ní cúu Yaā ndácu jniñu, te jnái ní poder,
te yōhyo luu cújéhnú ní ní cáni. Súcuan na cóo. Amén.
Achi rō jijnáhan rō.

¹⁴ 'Chi núu cone cáhnu ni rō nuū ñáyuu casáha cuēchi nuū rō, te suni súcuan cone cáhnu ni maá Tátá rō andiví nuū cuéchi rō.

¹⁵ Te núu ma cóne cáhnu ni rō nuū ñáyuu casáha cuēchi nuū rō, te suni súcuan ma cóne cáhnu ni maá Tátá rō nuū cuéchi rō jijnáhan rō.

Jeē ni stéén yā siquī jnúhun condite ni

¹⁶ 'Te núu condite ni rō jeē chiñúhún rō Yaā Dios, te ma sáha rō nájnūhun casáha tē stáhú-ni. Chi casáha de jeē coto xií de, te súcuan stéén de nuū ñayuu jeē iyó ndite ni de, návāha cuajnúhún i de. Jendaá cahán rī jín rō jeē maá yúcuan-ni cúu tahū jeē nihín de, suu jeē jejnúhún ñayuu de.

¹⁷ Te máá rō jijnáhan rō, núu iyó ndite ni rō, te sa chuhun vāha rō xíní rō te nandahá núu rō,

¹⁸ návāha ma cúni ñayuu jeē iyó ndite ni rō. Chi máá-ni Tátá rō jeē ndeé yuhu yā jín rō, cuni yā, te ñn quiṽi te cuāha ya tahū cuu rō.

Ndese coo cúcá yó nde andiví

(Lc. 12.33-34)

¹⁹ 'Ma cóndihṽi ni rō caya rō ndajniñu cúcá ini ñayṽi yáha, chi quiṽi tiquíxin, te cáne xehyu, te tívi. Te suni quiṽicoo ñacuñhá te sácuihná.

²⁰ Chi sa suhva sáha rō táca jniñu vāha návāha cayā tahū rō nde andiví. Chi yúcuan má quiṽi tiquíxin ni ma cáne xehyu jeē tívi. Ni ma cúu quiṽi ñacuñhá sácuihná.

²¹ Chi nde nuū nihín rō tahū vāha rō, yúcuan cúu nuū cóndihṽi ni rō siquī.

Tinūu cúu lámpara yiqui cúñu

(Lc. 11.34-36)

²² 'Tinūu rō cúu nájnūhun lámpara nuū yiqui cúñu rō. Núu súcuan te núu tinūu rō iyó ndijin, te ní-ni yiqui cúñu rō cúndijin.

²³ Te núu tinūu rō tu iyó ndijin, te ní-ni yiqui cúñu rō iyó nee. Te suni súcuan cúu ánuá rō, chi núu máni jeē jéni nee ni rō, te nacā jeē nee gā iyó ini anuá rō núu súcuan.

Jeē ma cóndihṽi ni yō siquī xúhun
(Lc. 16.13)

²⁴ 'Ni ñn mozo ma cúu cuajniñu de nuū uū patrón. Chi quiṽi ni de nuū ñn te coo maní de jín inga, chí squícu vāha de nuū ñn te sájéē ni de nuū inga. Te suni súcuan ma cúu cuajniñu rō núu Yaā Dios te núu máni siquī xúhun ndihṽi ni rō.

Yaā Dios ndíto ya yohó

(Lc. 12.22-31)

²⁵ 'Núu súcuan te cáhán rī jín rō jijnáhan rō: Ma nácani ndasí ni rō siquī jeē cótecu rō, núu ndese caji rō coho rō, ni siquī sahma, núu ndese cuhun rō. Chi Yaā Dios ni sáha ya jeē técu rō jín yiqui cúñu rō, te nagā ni cuu jeē ma cuáha ya jeē cáji rō jín jéē cuhun rō.

²⁶ Condēhe rō ndese cátecu saa, chi tu cátaji tí, ni tu cánastútú tí jeē chúvāha tí, ni tú yacá tí. Te vēsú súcuan te máá Tátá rō andiví scáji yā tí. Te cánuú ndasí gá rō jijnáhan rō vēsú táca saa ún.

²⁷ ¿Te ndé ñn rō, á cuu scuéhnu rō máá rō sava metro gā, vēsú na nácani ndasí ni rō?

²⁸ ¿Te najehē cánacani ndasí ni rō jeē ma nihín rō sahma? Condēhe jijnáhan rō ndese jéē ita táca yúcū. Chi tu sájniñu, ni tu táu.

²⁹ Te cáhán rī jín rō jeē ni rey Salomón, quiṽi ní ñúhún de sahma vāha ndasí, tu ní ñúhún de sahma lúu súcuan nájnūhun ita ún.

³⁰ Te núu súcuan jéhe Yaā Dios sahma lúu ita un jéē jéē vijna te sajnē cayū nuū ñuhún, te nagā ni cuu rōhó jijnáhan rō jéē ma sáha ya jeē nihín rō sahma. ¿Te naun tu cá candíje nihín rō jéē ndíto ya rohó?

³¹ Núu súcuan te ma nácani ndasí ni rō siquī jeē cáji rō, jeē coho rō, jeē cuhun rō.

³² Chi táca ñáyuu ñayṽi jéē tu cá candíje cúu jeē máni siquī jeē yáha cándihṽi ni i. Te máá rō jijnáhan rō, chí iyó Tátá rō andiví, te jíní yā jeē cájini ñúhún rō táca jéē yáha.

³³ Te sa suhva cánuú gá jeē cóndihṽi ni rō siquī jniñu jeē ndácu Yaā Dios nuū rō, jín siquī jeē sáha rō jniñu ndaā jeē nújnahan ni yā. Yúcuán na te sáha ya jeē nihín rō táca jéē yáha.

³⁴ Núu súcuan te ma nácani ni rō siquī jeē cóo sajnē, chí vijna cúu vijna te sajnē cúu sajnē. Chi caní ni rō siquī jnúndóho jeē iyó ná ñn ná ñn-ni quiṽi.

Jeē ma cahán yō siquī cuéchi jnáhan yó
(Lc. 6.37-38, 41-42)

7

¹ 'Ma cahán rō siquī ñayuu ndese sáha i, návāha suni ma cahán Yaā Dios cuēchi siquī maá rō jeē casáha rō súcuan.

² Chi nájnūhun cácahān rō siquī cuēchi ñayuu, suni súcuan cahān yā siquī cuēchi rō. Te cūhva jeē cándihvī ni rō siquī i, suni cūhva yúcuan sáha ya jíin rō.

³ Chi cuēchi jnāhan rō cúu nájnūhun jeē íne ñn yāca lúli tinūú i. ¿Te naun cásáha rō cuenta jeē súcuan, te tu cásáha rō cuenta cuēchi máá rō jeē cúu nájnūhun jeē íne ñn nduhu tinūu máá rō?

⁴ ¿Te naun cácahān rō jíin jnāhan rō: Na táva rī yāca íne tinūu rō, te tu cánacani ni rō jeē íne ñn nduhu tinūu máá rō?

⁵ Tēe stáhú-ni cácuu rō núu súcuan. Xihna gā tinūu máá rō tava rō nduhu, te yūcuán na te cuu condēhe váha rō jēe táva rō yāca tinūu jnāhan rō.

⁶ 'Ma sáha fuerza rō ñayuu cunéé quívicoo i nuū jnúhun íi yā núu tu cúní i. Chi ndonda i siquī rō nájnūhun ina jeē cáyihí tí rohó. Te ma nácani rō jnúhun ya nuū ñayuu jeē tu cúní cuiti cuajnúhún. Chi cándaā i nájnūhun quini jeē jeñú tí siquī perla jeē ndeé yahu ga.

*Cacān yō nuū yā te nihīn yō
(Lc. 11.9-13; 6.31)*

⁷ 'Cacān rō nuū Yaā Dios, te cuāha ya nuū rō. Te nducú rō táca jēe váha íyó núu yā, te nihīn rō sáha ya. Te cacān tahú rō nde nihīn rō, nájnūhun sáha ñayuu cahán yehyí ndé nune quívi i.

⁸ Chi táca ñáyuu jicán, cuāha ya nuū i. Te ñayuu nducú, suni nihīn i. Te ñayuu cahán, nune ya ichi nihīn i jeē cuní i.

⁹ ¿Te ndé ñn rohó núu sēhe rō jicán i staā nuū rō, te á cuáha rō ñn yuū nuū i?

¹⁰ ¿Te núu jicán i ñn chācá, te á cuáha rō ñn coō nuū i? Tú cuiti súcuan.

¹¹ Núu súcuan te máá rō jijnāhan rō, vēsú ñayuu iyó cuēchi cácuu rō, te cájini rō cuāha rō jēe váha nuū sēhe rō. Te nagā ni cuu máá Tátá rō andiví jēe ma cuáha ya jeē váha nuū ñáyuu jicán nuū yā.

¹² 'Te nájnūhun cúní rō jeē sáha vāha ñayuu jíin rō, suni súcuan na sáha vāha rō jíin i. Chi tutu ley Moisés súcuan ndácu jniñu, jíin táca tutu tēe ni canacani jnūhun Yaā Dios.

*Siquī jeē quívi yó yéhyí túū
(Lc. 13.24)*

¹³ 'Condihvī ni rō quívicoo rō ndaha Yaā Dios. Chi cúu nájnūhun ñn yéhyí túū. Chi yéhyí jíin ichi jeē cuahán nuū jnahnú ndetū ñayuu, jíte te cáhnu, te cuehē i quívicoo yūcuán.

¹⁴ Te yéhyí jíin ichi jeē cuahán nuū nihín tahú i cotecu i, chi tuū yehyí te cuñi ichi, te jecu-ni i cánihīn i.

*Jíin jniñu cásáha ñayuu te nácuni yō ndese ñayuu cácuu i
(Lc. 6.43-44)*

¹⁵ 'Te ma cándije cuiti rō tēe stáhú jēe cácahān de jeē jnúhun Yaā Dios cánacani de. Chi nájnūhun lanchi, quiti tú xeēn, súcuan cásáha de vējicoo de nuū rō. Te ini anuá de chi cácuu de nájnūhun yihí, quiti xéen.

¹⁶ Jíin jniñu cásáha de te nacuni rō de ndese tēe cácuu de. Chi cúu nájnūhun jeē tu scóyo rō ndehē uva xiní íñu, ni tu scóyo rō higo xiní íñu yóquin.

¹⁷ Te tācá yujnu váha chi jēhe ndehē váha, te yujnu néé chi cúun ndehē néé.

¹⁸ ñn yujnu váha ma cúun ndehē néé, te ni ñn yujnu néé ma cuáha ndehē váha.

¹⁹ Te tācá yujnu jeē tu jēhe ndehē váha, chi tahndē te cayū nuū ñuhún.

²⁰ Te suni súcuan cácuu tēe ún, chi jíin jniñu cásáha de te nácuni rō ndese tēe cácuu de.

*Nasūú ndihí ñayuu quívicoo andiví
(Lc. 13.25-27)*

²¹ 'Nasūú ndihí ñayuu jeē cahán i Jitoho i ruhū cúu jeē quívicoo nuū ndácu Tátá rī jniñu nde andiví. Chi quívicoo máá nene ñayuu jeē squícu jniñu cúní Tátá rī andiví.

²² Te quívi jeē sándaā rī jniñu ñayuu, te cuehē i cahān jíin rí: Jitoho na jíjnāhan ná, ni canacani ná jnúhun jíin síhví ní, te ni caquenehen ná táchī jíin síhví ní, te ni casáha ná cuehē jniñu jéhnú jíin síhví ní jeē náā ni ñayuu sáha. Achí i.

²³ Yūcuán na te cahān rī jíin ñáyuu ún: Tu jíiní cuiti rī rohó. Cuiyo quingoo rō, chi ñayuu casáha jniñu néé cácuu rō, achí rī.

*Siquī uú vehe
(Lc. 6.47-49; Mr. 1.22)*

24 'Núu súcuan te tāca ñáyuu jeē cájini sōho jnūhun cáhán rī te squícu i, cácuu i nájñūhun ñn tēe ni nacani vāha ni, te ni jeni de vehe de siquī cáva.

25 Te ni cuun saū, te ni ndaa yūte, te ni quee tachī xeén, te ni cachundahá vehe ún. Te tu ní cótúú, chi siquī cáva ndéé.

26 Te tāca ñáyuu jeē cájini sōho jnūhun cáhán rī te tu squícu i, cácuu i nájñūhun ñn tēe cánéé jeē ní jeni de vehe de nuū ñíti.

27 Te ni cuun saū, te ni quiji ndute ñúhún cuéhē, te ni quee tachī xeén, te ni cachundahá vehe ún. Te ni cótúú-ni, te ni naa ñi-ni. Achí yá jíin i jíñáhan i.

28 Te ná ni jíinu ni cahān Jesús tāca jnúhun yáha, te ñáyuu cuéhē un ní canaa ni i ni cajini i jnūhun ni steén yā.

29 Chi ni steén vāha ya nuū i, chi máá yá cúu jeē ndíso jníñu siquī ndíhi. Te tēe cástéén tutu ley Yaā Dios, tu súcuan cástéén de.

Jeē ní nasávāha ya ñn tēe ndóho cuehyī stehyú

(Mr. 1.40-45; Lc. 5.12-16)

8

1 Te ni nanuu Jesús yucu ún, te cuéhē ñáyuu cándiquīn i ya.

2 Te ñn tēe ndóho cuehyī stehyú, ni quee de nuū yā. Te ni jecuiñi yití de nuū yā, te ni cahān de jíin yá:

Jíní na jéé cuu sáha ní jéé nduvāha ná, te núu cúní ni, áchí de.

3 Te Jesús ni soó yá ndaha ya siquī de, te ni cahān yā:

Cúní rī. Te na ndúvāha ró, áchí yá.

Te ná ni cahān yā súcuan, te ni nduvāha-ni tēe ndóho cuehyī stehyú un.

4 Yūcuán na te ni cahān Jesús jíin de:

Ma cáchi cuiñi rō nuū ní ñn. Chi quisteén rō maá ró nuū sutú, te condahá ró jeē socó rō nuū Yaā Dios, nájñūhun ni ndacu Moisés jniñu jenahán, návāha cuni ñáyuu jeē ní nduvāha ró. Achí yá.

Jeē ní nasávāha ya mozo capitán

(Lc. 7.1-10)

5 Te ni quiñi Jesús ñuu Capernaum. Te ñn tēe nación Roma jeē cúu capitán, ni quee de nuū yā, te ni cahān ndahú de jíin yá:

6 Mozo na catú i vehe ná, chi ni ñin i te ndóho xeén i, áchí de.

7 Te ni cahān Jesús:

Quihīn rī nasávāha ri i núu súcuan, áchí yá.

8 Te ni cahān capitán jíin yá:

Tu cújéñu ná jéé quihín ni quiñi ní vehe ná. Chi máá jéé cahān-ni ní, te na ndúvāha-ni mozo na.

9 Chi máá ná suni ndíso jniñu ná ní casáha tēe cácujeñu ga. Te cújéñu ná núu tācá soldado na. Te núu cáhán na jíin ñn de jeē na quihín de, te cuahān de. Te núu cáhán na jíin inga de jeē na quiñi de, te quiñi de. Te núu ndácu ná ñn jniñu nuū mozo na, te sáha i. Achí de.

10 Te jeē ní jini Jesús jnūhun yáha, te ni naa ni yā. Te ni cahān yā jíin ñáyuu cándiquīn yā ún:

Jendaá cahān rī jíin ró jeē ni nación yō Israel tu ní níhín rī ni ñn ñáyuu cándíje ñhin súcuan, nájñūhun cándíje tēe yáha, vésú tēe nación tu jíin jnūhun Yaā Dios cúu de.

11 Te cáhán rī jíin ró jeē quiñicoo cuéhē ñáyuu ichi núu cáne niāndii jíin ichi núu quée niāndii. Te cucōo i caji i staā jíin Abraham jíin Isaac jíin Jacob nuū ndácu Yaā Dios jniñu nde andiví.

12 Te sava ñáyuu nación Israel jeē maá i quiñicoo núu, te sa quenehen ya i quihīn i nuū néé, chi tu ní cácujeñu i. Te yūcuán ndáhyū i te nacayihí yuhu i jeē ndoho xeén i. Achí yá.

13 Yūcuán na te ni cahān yā jíin tēe cúu capitán:

Cuánuhun vehe ró, chi sáha ri nájñūhun cándíje ró jéé sáha ri.

Te mozo de un ní nduvāha-ni i máá hora un.

Jeē ní nasávāha ya naná chíso Pedro

(Mr. 1.29-31; Lc. 4.38-39)

14 Te ni jehēn Jesús vehe Pedro. Te ni jito ya naná chíso de jeē catú ña yihí quiñi ña.

15 Te ni jniñi ya ndaha ña, te ni quenda-ni quiñi ún ña. Te ni ndocuñi ña, te ni sáha ña jeē ní cayeji de jíin yá.

Jeē ní nasávāha ya cuéhē ñáyuu

(Mr. 1.32-34; Lc. 4.40-41)

16 Te jeē ní cuaa ni quecoo ñáyuu jíin cuéhē ñáyuu jeē ñúhun tachī ini i. Te ni

quenehen ya tachī un cuángoo jíin jnúhun cáhán-ni ya. Te suni ni nasávāha ya tāca ñāyuu cácuñū.

¹⁷ Te súcuān ni cuu návāha cundaā jnúhun ni cahān Isaías, tēe ni nacani jnúhun Yaā Dios jenahán: Máá yá ni tejiyo ndinuū cuehyī cándoho yó, áchí Isaías.

*Siquī ñayuu jeē cácuñi i condiquīn i ya
(Lc. 9.57-62)*

¹⁸ Te ni jito Jesús jeē ní ndicó ndúū cuehē ñayuu yā. Te ni cahān yā jíin tēe cáscuáha jíin yá jeē na yáha de jíin yá inga lado mar.

¹⁹ Te ñin tēe stéén tutu ley Yaā Dios, ni quee de nuū yā, te ni cahān de:

Maestro, condiquīn na níhín quíhín yó ndé-ni cúu-ni nuū quíhín ni, áchí de.

²⁰ Te ni cahān Jesús jíin de:

Tāca ñúcuui, íyó yāū cava cáñuhun ti. Te suni saa, iyó táca tī. Te ruhū, Yaā ní nduu tēe, tuú nuū cusú rī, achí yá.

²¹ Te inga tēe ni cahān de jíin yá, te tēe scuáha jíin yá cúu de:

Condetu ní ndé na quíchindūji ná tátá na xíhna gā. Yūcuán na te condiquīn na níhín, áchí de.

²² Te ni cahān Jesús jíin de:

Condiquīn ruhū na quíhín yó. Te stóo tāca ndíyī na chindūji jnáhan ndíyī, chi ndíyī cácuu ñayuu tu cácuñíje. Achí yá.

*Jeē ní jecuiñī tachī níhin jíin mar ni sáha ya
(Mr. 4.35-41; Lc. 8.22-25)*

²³ Yūcuán na te ni quívi Jesús ini barco, te tēe cáscuáha jíin yá ni quívicoo de cuahān de jíin yá.

²⁴ Te nuū mar ni jequíhi ñin tachī níhin, te ni stóna ndute mar, ni quívi ini barco un. Te Jesús chi quíxí yā.

²⁵ Te tēe cáscuáha jíin yá ni castóna de ya, te ni cacahān de:

Jnama ní yóhó, chi je quee yó chíji ndute, áchí de.

²⁶ Te ni cahān yā jíin de:

¿Naun cáyūhú ndasí ró? Te tu cácuñíje níhin ró jeē cácu ró sáha rī, achí yá.

Yūcuán na te ni ndocuñī yā, te ni cahān yā nuū tachí níhin un jíin núū mar. Te ni cuu nayúú í-ni.

²⁷ Te ni canaa ni de jíinahan de, te ni cacahān de:

¿Ndé ñin ga cúu tēe yáha, jeē ndé tachī níhin jíin mar cájetáhu jeē cahán de? áchí de.

*Tēe Gadara jeē cándoho tachī
(Mr. 5.1-20; Lc. 8.26-39)*

²⁸ Te ni jinū yā inga lado mar, máá región ñayuu Gadara. Te uū tēe ni quendacoo de nde nuū yíndūji ndíyī, ni quiñahan de ya. Te cáñuhun tachī ini de, te siquī jeē yóhoyo xeēn tachī ún, te ni ñin ñayuu tu cúu yāha i ichi yúcuān.

²⁹ Te ni cacana cóhó de ni casáha tachī:

¿Naun véji ní núū ná, Jesús Sēhe Yaā Dios? ¿A véji ní yáha jeē stóho ní sáña ndé ná tu quee maá quívi? áchí.

³⁰ Te nde jicá jecu cáhīn cuehē quíni cájitu ti.

³¹ Te tachī jeē cáñuhun ini tēe un ní cacahān ndahú jíin yá:

Núu quenehen ní sáña, te cuāha ni jnúhun na quívicoo ná ini quíni cáhīn yūcuán, áchí.

³² Te ni cahān yā jíin:

Cuángoo núu súcuān.

Te ni quendacoo tachī ún ini tēe ún, te ni quívicoo ini quíni. Te quíni un ní cajinu ti ni caningava ti ñin yucáva, te ni ndaquíhi ti ndute mar, ni cajihī tī.

³³ Te tēe cándito ti ni cajinu de cuango de jeē ní cayūhú de. Te ni najinūcoo de ñuu. Te ni cacastūhún de táca jniñu yúcuān, jíin ndese ni cuu jeē ní quendacoo tachī ini ndíndúú tēe ún.

³⁴ Yūcuán na te ndívi ñayuu ñuu un, ní quendacoo i cuacondéhé i Jesús. Te ná ni jinūcoo i nuū íne ya, te ni cacahān ndahú i jíin yá jeē na quénda ya región yúcuān quíhín yā.

*Jeē ní nasávāha ya ñin tēe ndóho cuehyī ni
íjin
(Mr. 2.1-12; Lc. 5.17-26)*

9

¹ Yūcuán na te ni ndívi Jesús ini barco. Te ni nayāha ya cuahān yā inga lado mar, te ni najinū yā ñuu maá yá.

² Te ni caquindeca ñayuu ñin tēe ndóho cuehyī ni íjin, cátú de nuū ñin camilla. Te ni jini Jesús jeē cácuñíje i jeē cúu nasávāha ya tēe ní íjin ún. Te ni cahān yā jíin de:

Na ndúndeyí ni rō séhē, chi je íne cáhnu ni rī nuū tāca cuéchi ró, áchí yá.

³ Yūcuán na te jecu tēe cástéén tutu ley Yaā Dios, ni cajeni ni de síquī yā: Jeē cahán tēe yáha súcuan, chi cáhán de jnūhun ndevāha jeē quití ni Yaā Dios.

⁴ Te ni jini Jesús jeē súcuan cájeni ni de, te ni cahān yā jíin de:

¿Naun cájeni ni rō jeē cahán ndevāha ri?

⁵ Jeē uú jnūhun yáha, ¿ndé ñn yí gá cáa? ¿A jéē cahán rī jíin tēe cúhú: Je íne cáhnu ni rī nuū tāca cuéchi ró? ¿Chí yí gá jeē cahān rī: Ndocuñī te caca ró, chi je ni nduvāha ró, achí rī?

⁶ Te vijna te na stéén rī jeē maá rí, Yaā ní nduu tēe, ndíso jníñu ri ini ñayīvi yáha jéē cóne cáhnu ni rī nuū cuéchi.

Yūcuán na te ni cahān yā jíin tēe ni íjin ún:

Ndocuñī te naquihin ró camilla rō te quinhun rō vehe ró, áchí yá jíin de.

⁷ Yūcuán na te ni ndocuñī-ni tēe ún, te cuanhun de vehe de.

⁸ Te ná ni cajito ñayuu un jéē súcuan ni sáha ya, te ni cayūhú í. Te ni cacahān i jeē yóhyo vāha Yaā cúu Yaā Dios jeē súcuan ni jēhe ya poder nuū ñn tēe jeē cúu nasávāha de ñayuu, achí i cájito i Jesús.

Jeē ní cana ya Mateo

(Mr. 2.13-17; Lc. 5.27-32)

⁹ Te ni quenda Jesús yūcuan cuáhān yā. Te ni jito ya nuū ñn tēe nání Mateo, néne de nuū cutútú xúhun renta. Te ni cahān yā jíin de:

Condiquīn ruhū na quíhín yō.

Te ni ndocuñī de, te cuahān de jíin yá.

¹⁰ Yūcuán na te ni jehēn yā ni yeji yā staā vehe de. Te cuehē tēe cástútú xúhun renta jíin inga tēe cásáha cuéchi, suni cáyūcú de cáyeji de staā jíin Jesús jíin tēe cáscuáha jíin yá.

¹¹ Te tēe grupo fariseo, ni cajito de, te ni cacahān de jíin tēe cáscuáha jíin yá:

¿Naun yéji maestro rō jíin tēe cástútú xúhun renta jíin inga tēe cásáha cuéchi? áchí de.

¹² Te ni jini Jesús, te ni cahān yatá yá jíin de:

Ñayuu cáhīyo vāha, tu jíni ñúhún i tēe tájna, chi ñayuu cácuñú cúu jeē jíni ñúhún.

¹³ Cuáhán jíināhan ró núu súcuan, te nacani ni rō na vé cúu jeē cahán jnūhun

yáha jéē yosó núu tútu i: Cúní rī jeē na cúndáhú ni rō jnāhan ró, nasūu jéē socó rō quití nuū rī, achí Yaā Dios nde jenahán. Te ruhū nasūu jéē véji ri cana ri ñayuu tú cuéchi, jeē cúu i nájnūhun ñayuu cáhīyo vāha, chi sa suhva véji ri cana ri ñayuu iyó cuéchi, jeē na nácani ni i te stóo i cuéchi i. Achí yá.

Jeē ní cacajñūhún de ya síquī jeē cóndite ní *(Mr. 2.18-22; Lc. 5.33-39)*

¹⁴ Yūcuán na te tēe cáscuáha jíin Juan tēe scuándute, ni quecoo de nuū Jesús. Te ni cacahān de jíin yá:

Saña jíin tēe grupo fariseo, tíjni jínu cáhīyo ndite ni na núu Yaā Dios. Te tēe cáscuáha jíin máá ní, ¿naun tu cásáha de súcuan?

¹⁵ Te ni cahān Jesús jíin de:

¿A cuu condite ni de níní jéē iyó rí jíin de? ¿A cuu cucuíhyá ni ñayuu cáhīin víco nándāha, te núu níní néne tēe nándāha? Te quee quivī jeē cújiyo tēe nándāha, te quivī ún chi condite ni i.

¹⁶ Te ni cahān yā uū jnūhun yatá síquī jeē tu quíjnāhan jnūhun jeē jéē steén yā jíin táca jnúhun jenahán. Achí yá:

Ni ñn tu náchuhun ñn pedazo sahma jéé núu ñn sahma túhú. Chi núu súcuan te ndiyí pedazo jeé un, te tahndē gā jeē tuhú un, te nducáhnu ga nuū catáhdé un.

¹⁷ Te suni tu cáchuhun vino jeé ini ññ túhú. Chi núu súcuan te ndatā ññ ún, te naa vino jíin ññ. Chi cánuú jéē chúhun í vino jeé ini ññ jéé, te súcuan te quéndōo vāha ndíndúú. Achí yá.

Jnūhun sēhe síhí Jairo jíin ñahan ní quehé yusáhma ya

(Mr. 5.21-43; Lc. 8.40-56)

¹⁸ Te níní cáhán Jesús táca jnúhun yáha, te ñn tēe cújéhnu nuū ñayuu hebreo, ni quee de nuū yā. Te ni jecuñī yití de nuū yā, te ni cahān de:

Sēhe síhí ná sá ní jihī i. Te núu na quíhín yō soó ní ndaha ní síquī i, te natecu i. Achí de.

¹⁹ Te ni ndocuñī Jesús, te cuahān yā jíin de, te suni cuango tēe cáscuáha jíin yá.

²⁰ Te mēhñu ñayuu cuango jíin yá ni quee ñn ñahan, te je ni cuu uxī uū cuiyā ndóho ña cuehyī ññ. Te ni quee ña ichi yatá yā, te ni quehé ña yusáhma ya.

21 Chi ni jeni ni ña: Vēsú maá sahma ya na nínín rī quehé rí, te nduvāha ri, jéni ni ña.

22 Te ni ndió cóto Jesús, te ni jito ya nuū ña, te ni cahān yā:

Na ndúndeyí ni rō, séhē. Ni candíje ró jēē cuu nasávāha ri rohó, te jeē yúcuan ní nduvāha ró, áchí yá.

Te ni nduvāha ña máá hora un.

23 Te ná ni jinū Jesús vehe tēe cújéhnun ún, te ni jito ya nuū tēe cácuu músico jeē quíchindūji de i, jíin núu ñáyuu cuehē, cásávaā i.

24 Te ni cahān yā jíin i:

Cujiyo jíjnāhan ró, chí sūchi síhí yáha, tu ní jíhí i chí quíxí-ni i, áchí yá.

Te ni cajecū catá i jeē ní cahān yā.

25 Te ni quenehen ya ñayuu cuehē ún, te ni quívi ya ini vehe. Te ni jñi ya ndaha sūchi síhí ní jíhí ún, te ni ndocuiñi-ni i.

26 Te ní región yúcuan ní jíitē núu jñūhun jñiñu jéhnun ní sáha ya ún.

Jeē ní nasávāha ya uū tēe cuáá

27 Te ni quenda Jesús yúcuan cuáhān yā. Te uū tēe cuáá cuángoo de yatā yā, cácana jee de:

Máá ní jeē cúu ní Sēhe yucūn David, cundáhú ní ní sáña víi, achí de.

28 Te ná ni jinū yā vehe, te ni jinūcoo tēe cuáá un núu yā. Te ni cahān yā jíin de:

¿A cácandíje ró jēē cúu nanune ri tñūu ró? achí yá.

Te ni cacahān de:

Cácandíje ná, áchí de.

29 Yūcuán na te ni tee ya ndaha ya tñūú de, te ni cahān yā:

Na sáha ri nájnūhun cácandíje ró, áchí yá.

30 Te ni cananune-ni tñūú de. Te Jesús ni cahān nīhin ya jíin de:

Ma cáchi cuítí rō nuū ní ñn, áchí yá.

31 Te máá de chí ní quendacoo de, te ni cajete-ni de jñūhun ní región yúcuan jéē súcuan ní sáha ya jíin de.

Jeē ní nasávāha ya ñn tēe ñíhín

32 Te nuū ní quendacoo tēe un cuángoo de, te ni quecoo ñayuu jíin ñn tēe ñíhín, jeē ñúhun tachí ini de.

33 Te ni quenehen ya tachí un cuáhān. Te tēe ñíhín un ní nacahān de. Te ni canaa ni ñayuu ní cajito i, te ni cacahān i:

Ná tu cuni cuítí yō ní ñn jñiñu súcuan ini ñuu Israel, achí i.

34 Te tēe grupo fariseo chí ní cacahān de: Tēe yáha chí quénehen de tachí jíin fuerza maá jexeén jeē cújéhnun nuū tachí, achí de.

Jeē cundáhú ní yā ñayuu cuehē

35 Te ni jica cuu Jesús táca ñuu jíin rancho, te ni steén yā jñūhun ini táca vehe íi sinagoga. Te ni nacani ya jñūhun vāha ndese ndácu Yaā Dios jñiñu. Te ni nasávāha ya ñayuu cácuu na-ni cuehyí cándoho i.

36 Te cundáhú ní yā jíto ya nuū ñáyuu cuehē ún. Chí cándoho i te cácuuhyá ní i, chí cácuu i nájnūhun lanchi jeē tú jítoho tī, chí tu ndíquín i Yaā cúu Jítoho i.

37 Yūcuán na te ni cahān yā jíin tēe cáscuáha jíin yá:

Ñayuu yáha cácuu i nájnūhun trigo jeē tahndé, te ndaā jeē cuehē cúu, te tēe cahnde chí jecu-ni de cúu.

38 Núu súcuan te cacān tahu rō nuū maá Jítoho rō Yaā Dios jeē na tájí yá cuehē tēe na quíngoo de cahnde de trigo, cúu jeē nacani de jñūhun ya nuū ñáyuu. Achí yá.

Jeē ní nacāji ya uxí uū tēe apóstol (Mr 3.13-19; Lc. 6.12-16)

10

1 Yūcuán na te ni cana ya uxí uū tēe jeē scuáha de jíin yá. Te ni jēhe ya poder nuū de jeē quenehen de tachí ini ñayuu, jíin jēē nasávāha de ñayuu cácuu táca ndínuu cuehyí.

2 Te yáha cúu síhví ndihúxí uū tēe apóstol un: Tēe ñn cúu Simón jeē suni nání Pedro, jíin ñani de Andrés. Te uū gā de cácuu sēhe Zebedeo, te nání de Jacobo jíin Juan.

3 Yūcuán na te Felipe, Bartolomé, Tomás, Mateo tēe ní stútú xúhun renta, Jacobo sēhe Alfeo, jíin Lebeo jeē suni nání Tadeo,

4 jíin Simón tēe grupo cananista, jíin Judas Iscariote, tēe jeē ní nastúu de ya.

Jeē ní tají yá ndihúxí uū de quinacani de jñūhun

(Mr. 6.7-13; Lc. 9.1-6)

5 Te ní tají Jesús ndihúxí uū tēe yáha jeē quíngoo de. Te ní ndacu ya jñiñu nuū de ndese sáha de:

Ma quíngoo ró núū ñáyuu jeē násūu ñáyuu hebreo cácuu i, ni ma quívicoo ró táca ñuu ñayuu Samaria.

⁶ Chi nuū maá-ni ñayuu nación yō Israel quíngoo ró, chi cácuu i nájnūhun lanchi jeē ní sana.

⁷ Te jeē quíngoo ró te suhva nacani ró jnúhun: Je ni cuyajni Yaā ndeé andiví jeē ndacu ya jniñu nuū rō, achi rō.

⁸ Te nasávāha ró ñáyuu cándoho cuehyī stehyú jíin ñáyuu cándoho táca gá cuehyī, te nastécu rō ndīyī te quenehen ró táchī ini ñayuu. Te súcuan-ni ni jēhe ri poder nuū rō jeē sáha ró, te suni súcuan-ni sáha ró jíin i.

⁹ Te ma cóndiso ró xūhun oro, ni xūhun plata, ni centavo cuechí.

¹⁰ Ni ma cóndiso ró ñunu stáa caji rō ichi, ni inga camisa, ni ndijēn, ni vara. Chi siquī jniñu jeē nácani ró jnúhun nuū ñáyuu, te cánuú coto i róhó.

¹¹ Te na-ni ñuu chí rancho núu ni jinūcoo ró, te yūcuán nducú ró ñin ñayuu vāha, te coyūcu ró vehe i nde quíngoo tucu ró.

¹² Te jeē quívi ró vehe ñayuu ún, te cahān rō jeē na quíji jnúhun ndeyí jnúhun sī ni nuū i.

¹³ Te núu ñayuu vāha cácuu i, te jnúhun ndeyí ní cahān rō quendōo siquī i. Te núu násūu ñáyuu vāha cácuu i, te jnúhun ndeyí ní cahān rō ma quendōo siquī i.

¹⁴ Te núu íyó ñáyuu jeē tu cájetáhú i róhó, ni tu cúní i cuni nahín i jnúhun cahān rō, yūcuán na te quendacoo ró vehe un chí ñuu ún, te scóyo ró tícachā jehē rō, te súcuan stéén rō jeē iyó cuéchi i jeē tu ní cájetáhú i.

¹⁵ Jendaá cahán rī jíin ró jeē quívi juicio te xeēn gā coo castigo siquī ñuu casáha súcuan vésú siquī ñuu Sodoma jíin ñuu Gomorra nuū ní casáha ndasí ñáyuu cuéchi.

Jeē coto xeēn ñayuu de jíjnáhan de

¹⁶ Cuni sōho ró, chi tájí rí rohó quíngoo ró nájnūhun lanchi mēhñu yíhī. Núu súcuan te coo listo rō nájnūhun coō, te coo vītá ni rō nájnūhun paloma.

¹⁷ Te condito ró máa ró nuū ñáyuu, chi quee quívi jeē quíndeca i róhó núu tohó, te caní i róhó ini táca vehe iī sinagoga.

¹⁸ Te suni nde nuū táca gobernador jíin rey quíndeca i róhó jéé siquí ruhū. Te súcuan te nune ichi jeē nacani ndaā rō

jnúhun ri nuū de jíin núu ñáyuu táca nación jeē tu jíin jnúhun Yaā Dios.

¹⁹ Te núu ni jendeca i róhó núu táca téé ún, ma nácani ndasí ni rō ndese cahān rō. Chi máa hora un te máa yá steén nuū rō ndese cahān rō.

²⁰ Chi násūu máa ró cúu jeē cahán, chi Espíritu maá Tátá rō cúu jeē cahán jíin yuhu ró.

²¹ Te sava ñayuu tu cácadíje, nastúu i ñani i jeē na cúu. Te tátá nastúu sēhe. Te sēhe ndonda siquī tatá jíin náná jeē na cúu.

²² Te ndihí ñayuu quíti ni i nuū rō jeē siquí ruhū. Te ñayuu jeē cuiñi ñihin nde jeē jíin jnúndóho, ñayuu ún chi cácu ánuá i.

²³ Te núu cájito xeēn i róhó ñin ñuu, te cunu ró quíhñ rō inga ñuu. Chi jendaá cahán rī jíin ró jeē ma ndécāva ró caca cuu ró ndihí nación yō Israel te ndiji-ni máa rí, Yaā ní nduu tēe.

²⁴ Ñin tēe scuáha, tu cújéhn de nuū maestro de. Ni tēe cúu mozo, tu cújéhn de nuū patrón de.

²⁵ Tēe scuáha chi nájnūhun ndóho maestro de suni súcuan ndoho nahín máa de, te tēe cúu mozo suni ndoho de nájnūhun ndóho patrón de. Núu súcuan te núu ruhū cácahān i jeē Satanás cúu ri, te nagā ni cuu jeē ma cahán i jeē rohó cácuu Satanás.

Jeē ní cachi yā ndé ñin cúu jeē yūhu yó (Lc. 12.2-9)

²⁶ Núu súcuan te ma yūhu ró coto ró ñáyuu. Chi táca jnúhun cácahān sáhi i ma quendōo sáhi cuiñi, chi ndihí natūu ndijin, te cuni ñayuu.

²⁷ Jnúhun ní cahán rī jíin ró jeē tu ní jíin ñayuu, na nácastūhun cájí ró nuū i. Te jnúhun ní nacani sáhi rí nuū rō, na nácani jee ró yátā táca vehe.

²⁸ Te ma yūhu ró coto ró ñáyuu cahni yiquí cúñu rō, chi ma cúu cahni i ánuá rō. Chi sa suhva yūhu ró jéé ma stíví ró núu Yaā Dios, chi cuu snáhnú ndetū yā rohó jéé quívi ánuá rō jíin yiquí cúñu rō infierno.

²⁹ Te táca saa chí tú yahu ndeé tī, chi nde uū tī jeē ñin centavo lulí. Te ni ñin tī tu ñinga nuū ñúhun te núu tu jéhe Tátá rō jnúhun, chí ndíto ya tī.

³⁰ Te nagā ni cuu róhó jíjnáhan ró, chi nde ndihí ixi xíní rō je ni cahu ya.

31 Núu súcuan te ma yūhu ró jijnáhan ró, chí cánuú ndasí gá rō nuū yā vēsú cuehē tācá saa.

Ñayuu jejnúhún Jesucristo nuū inga ñayuu (Lc. 12.8-9)

32 Te tāca ñáyuu jeē cuajnúhún rúhū nuū inga ñayuu, suni súcuan cuajnúhún rí i nuū Tatá rī, Yaā ndeé andiví.

33 Te tāca ñáyuu jeē ma cuajnúhún rúhū nuū inga ñayuu, suni súcuan ma cuajnúhún rí i nuū Tatá rī, Yaā ndeé andiví.

Jeē siquí Jesús te cusín ini ñayuu (Lc. 12.51-53; 14.26-27)

34 Ma cáni ni rō jijnáhan ró jéē véji ri jeē cóyūcu mánī ñayuu ñayiví. Tú véji ri jeē cóyūcu mánī ñayuu, chí sa suhva cuajnáhan i jeē siquí ruhū.

35 Chí jeē siquí ruhū te cusín ini sēhe yí jíin tátá, te sēhe síhí jíin náná, te sēhe jēnu jíin náná chíso.

36 Chí tāca ñáyuu candíje ruhū, chí jnáhan vehe i cúu jeē quií ni nuū i.

37 Te núu ndé ñín ñayuu manī gā i jíin tátá i chí jíin náná i vēsú jíin rúhū, nasūu ñáyuu vāha cúu i jeē cóndiquín i ruhū. Te núu ndé ñín ñayuu manī gā i jíin sēhe yí i chí jíin sēhe síhí i vēsú jíin rúhū, te suni nasūu ñáyuu vāha cúu i jeē cóndiquín i ruhū.

38 Te na-ni ñayuu núu tu jéhe i jnūhun ndoho i jnūndóho vēsú nde cuu i jeē siquí jeē cóndiquín i ruhū, nasūu ñáyuu vāha cúu i jeē cóndiquín i ruhū.

39 Te núu ndé ñáyuu cúní i cācu i nuū jnūndóho quií nuū i jeē siquí ruhū, núu súcuan te jnahnū ndetū i ní cáni. Te núu ndé ñín ñayuu vēsú na cúu i jeē siquí ruhū, te cotecu i ní cáni.

Jeē iyó táhū yō nuū Yaā Dios (Mr. 9.41)

40 Te ñayuu cuatáhú róhó jijnáhan ró, núu súcuan te ruhū cájetáhú i. Te ñayuu cájetáhú rúhū, cájetáhú i Yaā ní tají rúhū véji ri.

41 Núu na-ni ñayuu cuatáhú i ñín tēe nácani jnūhun Yaā Dios, siquí jeē jíca de jniñu Yaā Dios, núu súcuan te inuú-ni coo tahū de nuū Yaā Dios jíin tēe nácani jnūhun Yaā Dios. Te núu na-ni ñayuu cuatáhú i ñín tēe ndaā, siquí jeē tēe ndaā cúu de, núu súcuan te inuú-ni coo tahū de nuū Yaā Dios jíin tēe ndaā.

42 Te núu ndé ñáyuu cuāha i vēsú ñín ñajin ndute míjin coho ñín sūchi yáha, siquí jeē cúu i sūchi cándíje ruhū, ndaā ndije cúu jeē nihín i tahū i. Achí yá.

Jeē ní tají Juan uū tēe nuū yā (Lc. 7.18-35)

11

1 Te ná ni jínu ni ndacu Jesús jniñu nuū ndihúxí uū tēe cáscuáha jíin yá, te ni quenda ya yūcuan cuáhān yā jeē steén yā te nacani ya jnūhun tācá ñuu región yūcuán.

2 Te íne Juan vecāa. Te ni nihín de jnūhun tācá jniñu sáha Cristo. Te ni tají de uū tēe cáscuáha jíin de,

3 cuacajnúhún de ya:

¿A máa ní cúu Cristo jeē achí tutu jeē quií, chí condetu yó inga tēe quií? áchí de.

4 Te ni cahān yā jíin de:

Cuángoo te castūhun ró nuū Juan tācá jniñu cájito ró jíin jnūhun cájini ró.

5 Te cachi rō nuū de jeē ñáyuu cuaa cánanune tinūú i, te ñayuu yacuá cánacaca i, te ñayuu ndóho cuehyí stehyú cánduvāha i, te ñayuu sohó cánanune sōho i, te ñayuu jihí nátecu i sáha ri. Te suni nácani ri jnūhun nuū ñáyuu ndahú jéē jnama Yaā Dios i.

6 Te yōhyo ndetū tēe jeē ma nácani yátá ni de jeē ruhū cúu Cristo. Súcuan cachi rō nuū Juan. Achí yá jíin de.

7 Te náa cuanuhun ndindúú tēe ún, te ni quejéé Jesús cahān yā jnūhun Juan jíin ñáyuu:

¿Na vé ni jécondēhe ró jijnáhan ró nde nuū ñūhun téhé? ¿A ñín tēe jéni ñín jéni uū ni, nájñūhun ite jeē cánda sáha tachí?

8 Te núu tuú, ¿te na vé ni jécondēhe ró núu súcuan? ¿A ñín tēe cúní cujéhnu jeē ñūhun sahma lúu? Tuú chí cájini rō jeē tēe cáñuhun sahma lúu, máni ini vehe rey cáyūcú de.

9 ¿Te na vé ni jécondēhe ró núu súcuan? ¿A ñín tēe nácani jnūhun Yaā Dios? Cahān rī jíin ró jeē suu ni jecondēhe ró, te cujéhnu ga Juan yáha vēsú tāca gá tēe ni canacani jnūhun Yaā Dios.

10 Chí jnūhun Juan cúu jeē ni cahān Yaā Dios jeē yosó núu tútu í:

Tají rí tēe nacani jnūhun ri cosnūú de ichi núu Cristo, návāha coo tūhva ñayuu jeē jinú yā.

Achí Yaā Dios, achí tutu.

¹¹ Te jendaá cahán rī jín ró jeē ini ñayiví yáha cújéhu ga Juan tēe scuándute vēsú tāca gá tēe jeē ni íyo ini ñayiví. Te vēsú súcuan te tāca tēe núu ga ini ñuu nuū ndácu Yaā andiví jniñu, cújéhu ga de vēsú Juan.

¹² Te nde quiví ní quee Juan tēe scuándute, te nde vijna, chí cánducú ndéyí ñáyuu quivícoo i ndaha Yaā andiví jéē ndácu ya jniñu nuū i. Te nde ñayuu xeēn cánducú ndéyí i siquí.

¹³ Chí nde ná tu quiji Juan, te ni íyo máá ley Moisés, te suni ni íyo tāca tēe ni canacani jnūhun Yaā Dios. Te ni cacastūhún de ndese coo jeē ndacu Yaā Dios jniñu.

¹⁴ Te ni cacahān de jeē ndíji Elías. Te núu cáncuni rō cuatáhú ró jnūhun, te jíní rō jeē maá Juan cúu tēe jeē ní cachí tutu jeē quíji, chí cúu de nájnūhun Elías.

¹⁵ Tāca rōhó jéē jíní sōho, na chúsóhó ró.

¹⁶ Yāhá cachí rī ñn jnūhun yátá návāha na cúni rō ndese cúu ñayuu tiempo vijna. Cúu i nájnūhun sūchi lúlí cáhīn nuū yáhu cácasíquí i. Te cácana ndee i xiní jnāhan i:

¹⁷ Ni cativí rī scuilí, te tu ní cájita jéhé ró. Te ni cajita ri yaa jeē cuihyá jíta, te tu ní cándahyū rō, achí i. Te nájnūhun cándāa sūchi lúlí un jéē tu ní nújnahan ni i ni ñn, súcuan cándāa ró.

¹⁸ Chí ni quiji Juan te cuehē jínu ni íyo ndite ni de, tu ní yéji de ni tu ní jíhi de. Te tu ní cánujnahan ni rō, chí ni cacahān rō jeē ñūhun tachí ini de.

¹⁹ Yūcuán na te ni quee maá rí, Yaā ní nduu tēe, te yéji rī jíhi rí, te tu cánujnahan ni rō, te chísóó jnúhun ró cácahān rō jeē máni máá jéē yéji rī jíhi ri vino. Te quíjnahan ri jín tēe cástútú xúhun renta jín táca gá tēe cása ha cuēchi, achí ró. Te núu cúndichí ñn tēe jín jnúhun Yaā Dios, te jín jniñu sáha de te nátūu jeē tēe ndíchí cúu de. Achí yá.

*Jeē ní cuxeēn yā nuū sava ñuu ññni ni
(Lc. 10.13-15)*

²⁰ Yūcuán na te ni quejéé yá cúxeēn yā nuū tācá ñuu nuū ni sáha ya cuehē jniñu jéhu, chí tu ní cáncani ni i jeē stóo i cuēchi i. Te ni cahān yā:

²¹ Nacā jeē xeēn ndoho ró, ñáyuu ñuu Corazín. Te nacā jeē xeēn ndoho ró, ñáyuu ñuu Betsaida. Chí núu ini ñuu Tiro jín ñuu

Sidón ni sáha ri jniñu jéhu jeē ni sáha ri ini ñuu maá ró, te yachí nacani ni ñayuu ñuu un jéē stóo i cuēchi i núu. Te sáha i seña jeē steén jeē nácani ni i siquí cuēchi i, chí cuhun i sahma jnúu te chuhun i yaā xiní i núu.

²² Núu súcuan te cáhán rī jín ró jeē quiví coo juicio te xeēn gā coo castigo siquí rō jijnahan ró vēsú jeē ni íyo siquí ñuu Tiro jín ñuu Sidón.

²³ Te rōhó ñáyuu ñuu Capernaum, ¿á cájeni ni rō jeē cújéhu ró nájnūhun ñn jeē cáca cuahān ichi andiví? Tuú chí sa nanuu ró ndé lugar nuū cáyūcu ánuá ndíyí. Chí núu ini ñuu Sodoma ni sáha ri jniñu jéhu jeē ni sáha ri nuū maá ró, te coo ñuu yúcuan ndé vijna núu.

²⁴ Núu súcuan te cáhán rī jín ró jeē quiví coo juicio te xeēn gā coo castigo siquí rō vēsú jeē ni íyo siquí ñáyuu ñuu Sodoma. Achí yá.

*Nehen nuū rī ndetātu ró, achí yá
(Lc. 10.21-22)*

²⁵ Te suni quiví un ní cahān Jesús:

Na cútahū na núu ni Tátā, Jitoho andiví jín ñayiví. Chí ni jesí ní táca jnúhun ndíchí ní, jeē ma cúni ñayuu ndichí jín ñáyuu tūhva cuenta ñayiví yáha. Te ni steén ni núu ñáyuu cácuu nájnūhun sūchi lúlí.

²⁶ Chí súcuan ni nujnahan ni ni Tátā, achí yá.

²⁷ Te ni cahān gā yā:

Ndivii ni jēhe Tátá rī nuū rī. Te tu cájini ñayuu ndé ñn cúu ruhū, Sēhe Yaā Dios, chí máá-ni Tátá rī cúu jeē jiní yā ruhū. Ni tu cájini ñayuu ndese Yaā cúu máá Tátá, chí máá-ni Sēhe cúu jeē jiní. Te íyó ñáyuu jeē cuní máá Sēhe steén yā nuū i ndese Yaā cúu Tátá yā, te máá i suni cuni i.

²⁸ Tāca ró jéē ni cuíta ró jín táca jniñu jín ley jeē yí sáha jín ró, nehen quivícoo ró ndaha ri, te ndetātu ró sáha ri.

²⁹ Quiví ró núu jniñu ndácu máá rí, te scuáha ró coo ró nájnūhun íyó máá rí. Chí vitá ni rī te suchí ni rī. Te súcuan te ndetātu ró jín ánuá rō sáha ri.

³⁰ Chí tú yí jéē cuandetū rō nuū rī, ni tú yí jéē squícu ró jniñu ndácu ri. Achí yá.

*Jeē ní cataxín de yoco trigo quiví ndetātu
(Mr. 2.23-28; Lc. 6.1-5)*

12

¹ Te ñin quivĩ ndétātu ní yāha Jesús cuahān yā nuū cáa trigo. Te tēe cáscuáha jíin yá, cáji de sōco. Te ni quejé de cátaxín de yoco trigo cáyeji de.

² Te ni cajito tēe grupo fariseo, te ni cacahān de jíin yá:

Condēhé, chi tēe cáscuáha jíin ró casáha de jniñu jeē tu iyó váha sáha yó quivĩ ndétátú, áchí ley Moisés.

³ Te ni cahān maá yá jíin de:

¿A tu ní cácahu ró tutu ndese ni sáha David, ñin quivĩ jeē ni jíi de sōco jíin tēe cáhīn jíin de?

⁴ Te ni quivĩ de ini vehe Yaā Dios. Te ni yeji de pan ñi jeē yosó ndijin nuū Yaā Dios. Te tú na ley jeē cáji de, ni tēe cáhīn jíin de, chi máa-ni sutū cuu caji. Te vēsú súcuan te tú na cuēchi ní iyó siquĩ de.

⁵ ¿Te á tu ní cácahu ró tutu ley Moisés, ndese cásjniñu sutū ini templo, vēsú quivĩ ndétātu cúu? Te tú na cuēchi iyó siquĩ de, vēsú quivĩ ndétātu cásjniñu de jniñu jeē cácuu de sutū.

⁶ Te cáhān rī jíin ró jeē maá rí jeē iyó yáha, cújēhnu ga rī vēsú templo.

⁷ Te tu cájecūhun ni rō jijnáhan ró jnūhun yáha jeē yosó núu tútu ñi jeē ni cáhān Yaā Dios: Jeē cuní gā rī cúu jeē cundáhú ni rō jnáhan ró, vēsú jeē socó rō quití nuū rī, achí yá. Te núu jeē ní cajecūhun ni rō jnūhun yáha, te ma cahān rō súcuan siquĩ tēe jeē tú na cuēchi núu.

⁸ Chi ruhū, Yaā ní nduu tēe, máa rí cúu jeē ndácu jniñu siquĩ ndese sáha ñayuu quivĩ ndétátú, áchí yá.

*Jeē ní nduvāha tēe ni ichī ndaha
(Mr. 3.1-6; Lc. 6.6-11)*

⁹ Yūcuán na te cuahān Jesús, te ni quivĩ ya ini vehe ñi sinagoga.

¹⁰ Te yūcuan íne ñin tēe ni ichī ñin ndaha de. Te cácu ni tēe grupo fariseo jeē nihīn de cuēchi siquĩ yā, te ni cacajnūhún de ya:

¿A iyó ley jeē cuu nasávāha yó ñayuu cuhú quivĩ ndétátú? áchí de.

¹¹ Te ni cahān yā jíin de:

¿Ndé ñin róhó, núu névāha ró ñin lanchi, te núu nínga tí ini ñin yaū quivĩ ndétátú, te á tu jéhén rō natava rō tí, chí naún?

¹² ¿Te á tu cánuú ndasí gá ñin tēe vēsú ñin lanchi? Núu súcuan te vetū-ni sáha yó jniñu váha quivĩ ndétátú, áchí yá.

¹³ Yūcuán na te ni cahān yā jíin tēe ni ichī ndaha ún:

Scáá ndaha ró.

Te ni scaá de, te ni nduvāha-ni nájnūhun iyó inga.

¹⁴ Yūcuán na te ni quendacoo tēe grupo fariseo, te ni candajnūhún de siquĩ Jesús, ndese cahni de ya.

Jnūhun Jesús jeē ni cáhān Isaías nde jenahán

¹⁵ Te ni jini Jesús jeē súcuan cájeni ni de, te ni quenda ya yūcuan cuáhān yā. Te cuehē ñayuu cándiquín i ya. Te ni nasávāha ya ndihí ñayuu cuhú.

¹⁶ Te ni ndacu ya jniñu nuū i jeē ma stéén i ya.

¹⁷ Te súcuan ni cuu návāha squícu jnūhun ni cahān Yaā Dios siquĩ Jesús, te ni nacani Isaías jnūhun ya un ndé jenahán:

¹⁸ Yāha cúu mozo rī jeē ní nacāji rī, te manī rī jíin yá, te cúsi ni rī jíin yá.

Te cuāha rī Espíritu rī coo jíin yá.

Te máa yá sándaā jniñu ñayuu tācá nación.

¹⁹ Ma tejnáhan ya, ni ma cána jee ya,

te ni ma cahān jee ya ichi jeē cúni ñayuu.

²⁰ Ma sáha xeēn yā jíin ñayuu ni cunihin jnūndóho siquĩ,

ni ma snāā yā ñayuu jeē maá lulí-ni cácañdije.

Chi cújēhnu ya siquĩ ndihí, te ndaā ndacu ya jniñu.

²¹ Te ñayuu tācá nación cocuhun ni i jeē jnáma ya i.

Achí Yaā Dios, achí Isaías nde jenahán.

Jeē ní cacahān de jeē jejniñu ya fuerza Satanás

(Mr. 3.19-30; Lc. 11.14-23; 12.10)

²² Yūcuán na te ni caquindeca i nuū yā ñin tēe cuáá ñhín, chi ñúhun tachí ini de. Te ni nasávāha ya de. Te ni ndundijin tinūú de te ni nacahān de.

²³ Te ndihí ñayuu cuehē un ní canaa ni i cájito i, te ni cacahān i:

¿A tēe yáha cúu jeē ni cáhān Yaā Dios jeē cacu nuū yucūn David? áchí i.

²⁴ Te tēe grupo fariseo, ni cajini de jeē súcuan cácahān i. Te ni cacahān de:

Tēe yáha ma cúu quenehen de tachī núu jeē tu sáha de jíin fuerza Satanás jeē cujéhu nuū tachí, áchí de.

²⁵ Te Jesús ni jini yā jeē súcuan cájeni ni de, te ni cahān yā jíin de:

Tācá nación jeē casásin máa te cájejnáhan máa, núu súcuan te snāa jeē iyó váha máa. Te núu in nūu chí in vehe casásin máa te cájejnáhan máa, te ma cúu ga coyūcu cáhnu.

²⁶ Te suni súcuan Satanás núu quénehen jnáhan tachī, núu súcuan te sásin máa. ¿Te ndese cuiñi nihin Satanás jeē ndácu jniñu núu súcuan?

²⁷ Chi cácahān rō jeē jíin fuerza Satanás quénehen ri tachī. Te núu súcuan cúu núu, te ñayuu cascuáha jíin máa ró jijnáhan ró, ¿na jíin fuerza cáquenehen máa i tachī, cájeni ni rō? Núu súcuan te máa i jijnáhan i cachi jeē ní castívi ndasí suhva ró ni cacahān rō jeē cáquenehen ri tachī jíin fuerza Satanás.

²⁸ Te tuú chi sa jíin Espiritu Yaā Dios cúu jeē quénehen ri tachī. Núu súcuan te je ndéé Yaā Dios mēhñu ró jeē ndácu ya jniñu.

²⁹ ¿Chi ndese cuu quívi in tēe ini vehe tēe ndacuī jeē quenehen de ndajniñu de? Chi cánuú jeē xíhna gā cuhni de tēe ndacuī ún, te yūcuán na te cuu quenehen de ndajniñu ún. Te suni súcuan cúu jeē jíhni rī Satanás te quénehen ri tachī.

³⁰ Te ñayuu tu iyó mání jíin rí, núu súcuan te jíto uhū i ruhū. Te ñayuu tu nástútú jíin rí, núu súcuan te sa jéte núu i ñayuu vējicoo nuū rī.

³¹ Jeē yúcuán cáhān rī jíin ró: Iyó modo coo jnūhun cáhnu ni nuū tāca cuéchi cása ha ñayuu, jíin núu tāca jnūhun néé cácahān i. Te núu cahān ndevāha i síquī Espiritu Santo, te ma cóne cáhnu ni Yaā Dios nuū i.

³² Te núu na-ni ñayuu cahān i síquī ruhū, Yaā ní nduu tēe, cuu cone cáhnu ni Yaā Dios nuū i. Te núu na-ni ñayuu cahān ndevāha i síquī Espiritu Santo, ma cóne cáhnu ni Yaā Dios nuū i, ni jeē iyó i ñayívi yáha, ni ní tiempo quíji.

*Jnūhun yujnu váha jíin yujnu néé
(Lc. 6.43-45)*

³³ Núu yujnu váha, te váha ndehē, te núu yujnu néé, te cánéé ndehē. Chi jíin ndéhē te jíni yō ndese yujnu cúu. Te suni súcuan ñayuu.

³⁴ Va sēhe coo cácuu ró, chi xeēn rō nájnūhun coo. ¿Ndese cuu cahān rō jnūhun váha, chi ñayuu cása ha néé cácuu ró? Chi jniñu jeē jéni ni anuá ñayuu, máni yūcuán cáhān i.

³⁵ Tēe váha cáhān de jnūhun váha, chi iyó ndáa anuá de. Te tēe sáha néé cáhān de jnūhun néé, chi cánéé ánuá de.

³⁶ Te cáhān rī jíin ró jeē tācá na-ni jnūhun cácahān ñayuu, nacuāha i cuenta jnūhun un quívi coo juicio.

³⁷ Chi jíin jnūhun ni cahān rō sándaā yā síquī rō, núu jeē quéndōo ndáa rō chí jéé cóndee cuēchi síquī rō. Achí yá.

Jeē ní cajicān ñayuu tu cácañdije in jniñu jéhu

(Mr. 8.12; Lc. 11.29-32)

³⁸ Yūcuán na te jecu tēe grupo fariseo jíin tēe cástéén tutu ley Yaā Dios, ni cacahān de jíin yá:

Maestro, cácuñi na jéé sáha ní in jniñu jéhu jeē steén núu máa ní cúu Yaā ní tají Yaā Dios, achí de.

³⁹ Te ni cahān yā jíin de:

Ñayuu yáha jeē casáha jniñu néé, tu cájetáhú cuíti i Yaā Dios. Te cájicān i in jniñu jéhu jeē steén núu Yaā ní tají Yaā Dios cúu ri. Te tuá na inga jniñu jéhu stéén rī nuū i, chí máa-ni jniñu jéhu nájnūhun ni cuu jíin Jonás, tēe ni nacani jnūhun Yaā Dios.

⁴⁰ Chi nájnūhun ni ine Jonás chíji chācá cáhnu unī nduú unī ñuú, suni súcuan ruhū, Yaā ní nduu tēe, cuu rī te cone ri chíji ñuhun unī nduú unī ñuú, te sáa te natecu rī.

⁴¹ Te tāca ñáyuu ñuu Nínive nuū ní nacani Jonás jnūhun, natecu i jíin ñáyuu tiempo yáha, quívi juicio jeē sándaā yā cuēchi, te cahān i cuēchi síquī ñáyuu yáha. Chi máa i ni canacani ni i ni castóo i cuēchi i quívi ní nacani Jonás jnūhun nuū i. Te vijna chí cújéhu ga ruhū Yaā íne yáhá vēsú Jonás, te tu cácañdije ró rúhū.

⁴² Te reina jeē ní cujéhu nación ichi sur, natecu ña jíin ñáyuu tiempo yáha, quívi juicio jeē sándaā yā cuēchi, te cahān ña cuēchi síquī i. Chi nde jicá téyí ní quíji ña ni jini nahín ña jnūhun ndíchí ní cahān rey Salomón. Te vijna chí cújéhu ga ruhū, Yaā íne yáhá vēsú Salomón, te tu cácañdije ró rúhū.

*Tachī jeē nastútú jnáhan ndívi ini ñayuu
(Lc. 11.24-26)*

⁴³ 'Núu ni quenda ñn tachī ini ñn tēe tu cándíje, te jíca cuu nuū ñúhun téhé, ndúcú nuū ndétátú, te tu níhín, yūcuán na te jéni ni maá:

⁴⁴ Na quínuhun rī vehe nuū ní quenda ri. Te núu ni ndee tucu, te jíto jeē tēe tu cándíje ún, cúu de nájñuhun ñn vehe íyú te ni ndundoo.

⁴⁵ Yūcuán na te jéquihin uxā gā tachī neé gá vésú maá. Te quívicoo ini tēe un jéé cóyūcu yúcuan. Núu súcuan te xeēn gā ndoho tēe un jéé sándíhí vésú jeē xíhna ñúhún. Te suni súcuan ndoho ñayuu tiempo yáha jeē casáha neé. Achí yá.

*Náná yā jíin ñani yā
(Mr. 3.31-35; Lc. 8.19-21)*

⁴⁶ Te níni súcuan cáhán yā jíin ñáyuu ún, te ni quee naná yā jíin táca ñani yā, ín ña nuū quéhe, te cúní ña cahān ña jíin yá.

⁴⁷ Te ni cachi ñn tēe nuū yā:

Náná ni jíin táca ñani ni cáhín nuū quéhe, te cácu ni cahān jíin ní, achí de.

⁴⁸ Te ni cahān yā jíin tēe ni cahān súcuan jíin yá:

¿Ndé ñn cúu náná rī, te ndé ñn cácuu ñani rī? Achí yá.

⁴⁹ Te ni steén ndaha yá nde nuū cáyūcu tēe cáscuáha jíin yá. Te ni cahān yā:

Suni náná rī jíin ñani rī cácuu táca jéé yáha.

⁵⁰ Chi táca ñáyuu casquícú jniñu cúní maá Tátá rī, Yaā ndeé andíví, suu cácuu ñani rī, cuāha ri, náná rī. Achí yá.

*Jñuhun yátá síquī tēe jéte trigo
(Mr. 4.1-9; Lc. 8.4-8)*

13

¹ Te quívī un ní quenda Jesús vehe cuahān yā, te ni jinū yā ni cucōo ya yumar.

² Te ni cutútú cuéhē ndasí ñayuu nuū yā. Te ni quívī ya ini ñn barco, ni cucōo ya. Te táca ñáyuu un cáyūcú i yumar.

³ Te jíin jñuhun yátá ni cahān yā cuehē jñuhun nuū i, te súcuan ni cahān yā:

Ñn tēe cate trigo, ni quenda de jeē cate de.

⁴ Te ná ni quejéé de jéte de, te jecu trigo ni jité yuhíchi. Te ni quecoo saa, ni cayejí tī.

⁵ Te jecu gā trigo ni jité nuū ñúhun yuū, nuū tú cuehē ñuhun. Te yachī-ni ni cane, chí tu cóquin ñuhun.

⁶ Te nuū ní cane niāndii, te ni ichī-ni, te ni casun, chí tu ní níhín nuū quihín yoho.

⁷ Te jecu gā trigo ni jité nuū náne iñu. Te ni jehnu iñu ún, te ni jesi nuū.

⁸ Te jecu ni jité nuū ñúhun váha, te ni jēhe cuehē nunī. Sava ni jēhe ciento jeē ñn ñn, te sava ni jēhe unī xico, te sava ga ni jēhe ocō uxī.

⁹ Tāca rōhó jéé jíni sōho, na chúsóhó ró. Achí yá.

*Najehē cahán yā máni jñuhun yátá
(Mr. 4.10-12; Lc. 8.9-10)*

¹⁰ Yūcuán na te tēe cáscuáha jíin yá un ní quecoo de nde nuū yā, te ni cacajñuhún de ya:

¿Najehē cúu jeē máni jñuhun yátá cáhán ni jíin ñáyuu? achí de.

¹¹ Te ni cahān yā jíin de:

Róhó jíjnáhan ró chí sáha ya jeē cájecūhun ni rō jñuhun ni yisāhi yáha, ndese quívicoo ñayuu ndaha Yaā andíví jeē ndacu ya jniñu nuū i. Te ñayuu yáha jéé tu cácuandíje, chí ma jécūhun ni i.

¹² Chi ñayuu je jécūhun ni, chí stéén gā yā nuū i, te víhyá gā cuni i. Te ñayuu tu cándíje, sa suhva naa jecu jeē je jíni i ún.

¹³ Jeé yúcuan cáhán rī jñuhun yátá jíin i. Chí vésú cájito i, te quendōo i nájñuhun jeé tú na vé ni cájito i. Te vésú cájini sōho i, te ma jécūhun ni i, te quendōo i nájñuhun jeé tú na vé ni cájini i.

¹⁴ Ñayuu yāhá chí squícú síquī i jñuhun ni cahān Yaā Dios jeé ní nacani Isaías, tēe ni nacani jñuhun nde jenahán:

Vésú cuni nahín ró, te ma jécūhun ni rō, te vésú coto ró, te ma nácuni rō.

¹⁵ Chí ñayuu yáha yōhyo ni nduníhni ni i,

te yōhyo uhū chusóhó i,

te nájñuhun cájesi i tinūú i,

návāha coo nájñuhun jeé tu cájito i,

ni tu cájini nahín i,

te ni ma jécūhun ni i,

ni ma násāma ini i quívicoo i nuū rī

jeé nasávāha ri anuá i nuū cuéchi i.

Achí Yaā Dios, achí tutu.

16 'Te máá ró jijnáhan ró, yōhyo ndetū rō, chi cájito ró jíin tñūu ró, te cájini nahín ró jíin sóho ró.

17 Chi jendaá cahán rī jíin ró jeē cuehē tēe ni canacani jñūhun Yaā Dios jíin cuéhē tēe ndaā, ni cacuni de coto de jeē cájito máá ró, te tu ní cájito de. Te suni ni cacuni de cuni sóho de jeē cájini sóho máá ró, te tu ní cájini de. Achí yá.

Jeē ní castūhun cájí yá jñūhun yátá tēe jéte trigo

(Mr. 4.13-20; Lc. 8.11-15)

18 'Núu súcuan te cuni nahín jíijnáhan ró na vé cuni cahán jñūhun yátá tēe jéte trigo: Trigo un cúu jñūhun Yaā Dios.

19 Te ñayuu cájini sóho jñūhun ndese ndácu Yaā andiví jniñu, núu tu cájecūhun ni i te cácuu i nájnūhun trigo jeē ni jítē yuhíchi. Yūcuán na te quíji jexeén te quénde-ni jñūhun ini anuá i.

20 Te trigo jeē ni jítē nuū ñūhun yuū cúu nájnūhun ñayuu cájini sóho jñūhun, te yachī-ni cájetáhú i te cácusñi ni i jíin.

21 Te tu cúcutú jñūhun ún ini anuá i, te jecu-ni quiví cájetáhú i. Te núu ni quejéé jnúndóho, chí jító xeēn ñayuu i síquī jñūhun ún, te quejéé nácani yátá ni i.

22 Te jeē ni jítē nuū náne iñu cúu ñayuu cájini nahín jñūhun, te cándihvī ni i síquī jeē iyó ini ñayiví yáha, te cúní i cucúcá i, te stáhú un i cujnéñu i jíin. Te ndihí jeē yáha jési nuū jñūhun ya, te tu íje i jíin jñūhun ya.

23 Te trigo jeē ni jítē nuū ñūhun váha cúu nájnūhun ñayuu cájini nahín jñūhun, te cájecūhun ni i, te cáhije i jíin jñūhun ya. Te sava i cúu nájnūhun nunī jeē jéhe ciento jeē ññ, te sava ga i jéhe unī xico, te sava ga i jéhe ocō uxī. Achí yá.

Jñūhun yátá síquī ite lasú

24 Te ni cahán yā inga jñūhun yátá jíin de:

Jeē ndácu Yaā andiví jniñu cúu nájnūhun ññ tēe jeē ní jete de trigo váha nuū ñūhun de.

25 Te íyó ññ tēe jító uhū de tēe chíí trigo. Te náa cáquixí tēe chíí trigo jíin táca jñáhan de, te ni jehēn ni jete ndiquin lású nuū trigo de, te cuahán.

26 Te nuū ní cane trigo ún, te ni cane yoco i, te suni súcuan ni jehnu ite lasú un.

27 Yūcuán na te ni jengoo mozo ni cacahán i jíin patrón i: ¿A násūu trigo váha ní jéte ní núu ñūhun ní? ¿Te ndese cúu jeē ní canecoo ite lasú nuū?

28 Te ni cahán de jíin i: ññ tēe jító uhū ruhū ni sáha jeē yáha. Te ni cacahán mozo un jíin de: ¿Núu súcuan te á cúní ni jéē na quíngoo ná te jñūhun ná? áchí i.

29 Te ni cahán de: Tuú, chi núu jñūhun ró lású un te sanaa te jñūhun ró ndé jíin trigo.

30 Váha ga na cuéhnu máá ndé quiví tahndé. Te quiví un cahán rī jíin tēe cahnde jeē xihna gā ite lasú cahnde de, te chucú tútú de náváha cahmu yó. Yūcuán na te trigo chí cahnde de ndiví ini yacā rī, achí de. Achí yá.

Jñūhun yátá síquī ndiquin mostaza

(Mr. 4.30-32; Lc. 13.18-19)

31 Te suni ni cahán yā inga jñūhun yátá jéē steén yā ndese ndúcuehē ñayuu ndácu Yaā andiví jniñu nuū:

Ndúcuehē i nájnūhun jéhnu ññ ndiquin mostaza jeē ní jequin ññ tēe nuū ñūhun de.

32 Te jendaá jeē ññ ndiquin lúli gá cúu vésú táca gá ndiquin. Te núu ni jehnu, te cúu cáhnu ga vésú táca gá yucū, chí ndúu nájnūhun ññ yujnu. Te quíjicoo saa, te cásáha ti tacā tí chíji ndaha ún. Achí yá.

Jñūhun yátá síquī levadura

(Lc. 13.20-21)

33 Te inga jñūhun yátá ní cahán yā jíin de: Jeē ndácu Yaā andiví jniñu nuū ñayuu cúu nájnūhun levadura jeē ní quihin ññ ñahan. Te ni saca ña jíin únī kilo harina, nde ni ndaa ndihí ñujen ni sáha. Achí yá.

Jeē máni jñūhun yátá cahán yā jíin i

(Mr. 4.33-34)

34 Táca jñūhun yáha ní cahán Jesús jíin ñayuu cuehē ún. Te táca jéē ni steén yā, máni jñūhun yátá ní cahán yā jíin i.

35 Súcuan ni sáha ya náváha squícu jñūhun ni cahán tēe ni nacani jñūhun Yaā Dios nde jenahán:

Cahán rī táca jñūhun yátá jíin ñayuu, te cachi rī táca jñūhun yísahí ndé quiví ní jecōo ñayiví.

Achí tutu, achí yá.

Jeē ní castūhun cájí yá jñūhun ite lasú

36 Yūcuán na te ni nacuatáhú Jesús nuū ñayuu. Te ni ndiví ya ini vehe. Te tēe

cáscuáha un ní jinūcoo de nuū yā, te ni cacahān de jíin yá:

Nacani cájí ní jnūhun yátá ite lasú nuū ná, áchí de.

³⁷ Te ni cahān yā jíin de:

Jeē jéte trigo vāha un cúu máá rí, Yaā ní nduu tēe.

³⁸ Te ñuhun un cúu ñayīví. Te trigo vāha un cúu ñayuu cáyihí ndaha Yaā Dios jeē ndácu ya jniñu nuū i. Te ite lasú un cúu ñayuu cáyihí ndaha jexeén.

³⁹ Te tēe jíto uhū jeē ní jete lasú un cúu máá jexeén. Te quivī tahndé cúu quivī jínu ñayīví. Te tēe cahnde un cácuu ndajéhé Yaā Dios.

⁴⁰ Te nájnūhun tahndē ite lasú te cayū nuū ñuhún, súcuan coo quivī jínu ñayīví.

⁴¹ Chi máá rí, Yaā ní nduu tēe, tají rí ndajéhé rī quingoo. Te nastútú yá tāca ñayuu casquívī jnáhan nuū cuéchi, jíin ñayuu casáha jniñu néé, quenehen ya i mēhñu ñayuu ndácu ri jniñu nuū.

⁴² Te jnaa ya i cayū i nuū ñuhún. Te yūcuan ndáhyū i te nacayihí yuhu i jeē ndoho xeēn i.

⁴³ Yūcuán na te ñayuu squícu nuū yā chi ndindéé i nájnūhun niāndii, te coyūcú i nuū ndácu máá Tátá i jniñu. Tāca róhó jēé jíni sōho, na chúsóhó ró.

Jnūhun yátá síquī yejnū xūhún jeē yísāhí

⁴⁴ "Te jeē ndácu Yaā andiví jniñu nuū ñayuu, suni cúu nájnūhun ñn yejnū xūhún jeē yísāhí chíji ñn ñuhun. Te ni nanihín ñn tēe, te ni nacasi tucu de síquī. Te jeē cúsi ni de jíin, te ni jehēn de ni xícó ndihí de jeē névāha de, te ni jeen de ñuhun ún.

Jnūhun yátá síquī perla jeē ndeé yahu

⁴⁵ "Te jeē ndácu Yaā andiví jniñu nuū ñayuu, suni cúu nájnūhun ñn tēe jéen xícó, te ndúcu de perla váha.

⁴⁶ Te ni jini de ñn perla jeē yáhu ndasí, te ni jehēn de ni xícó ndihí de jeē névāha de, te ni jeen de perla un.

Jnūhun yátá síquī ñunu jnī chācá

⁴⁷ "Te jeē ndácu Yaā andiví jniñu nuū ñayuu, suni cúu nájnūhun ñn ñunu jeē cásíngava de ini mar, te quívicoo ndinuū chācá.

⁴⁸ Te núu ni chitú ñunu ún, te cánatava de yundúte. Te cácucoo de cánacāji de chācá.

Te chācá váha cájnaa de ini jíca, te chācá tú vāha cáscáne de.

⁴⁹ Te suni súcuan coo quivī jínu ñayīví. Chi quijicoo ndajéhé yā, te sásín ya ñayuu casáha jniñu néé méhñu ñayuu casáha jniñu váha.

⁵⁰ Te ñayuu cunéé chi jnaa ya i cayū i nuū ñuhún. Te yūcuan ndáhyū i te nacayihí yuhu i jeē ndoho xeēn i. Achí yá.

Jnūhun yátá síquī ndajniñu ndeé yahu

⁵¹ Te ni cajnūhun yá de jíjnáhan de:

¿A ní cajecūhun ni rō tāca jnúhun yáha, chí tuú? áchí yá.

Te ni cacahān de jíin yá:

Ni cajecūhun ni ná, áchí de.

⁵² Te ni cahān yā jíin de:

Iyó váha núu súcuan. Te ñn tēe stéén tutu ley Yaā Dios, núu je ni cutūhva de ndese ndácu Yaā andiví jniñu, te cuu stéén de tāca jnúhun síquī ún. Chi cúu de nájnūhun ñn tēe chíí vehe. Te ini yejnū de táva de ndajniñu ndeé yahu, sava jeé jeé jíin sava jeé je ni cunahán iyó. Achí yá.

Jeē cuánuhun yā ñuu Nazaret

(Mr. 6.1-6; Lc. 4.16-30)

⁵³ Te ná ni ndihí ni cahān Jesús tāca jnúhun yátá yáha, te ni quenda ya yūcuan cuáhān yā.

⁵⁴ Te ni najinū yā ñuu yā Nazaret. Te ni steén yā jnūhun ini vehe ñn sinagoga yūcuán. Te ni canaa ni ñayuu cájini nahín i, te ni cacahān i:

¿Ndeé nuū ní cutūhva tēe yáha tāca jnúhun ndíhí? ¿Te ndese cúu sáha de tācá jniñu jéhnu yāhá?

⁵⁵ Chi sēhe carpintero cúu tēe yáha, te náná de cúu María, te ñani de cácuu Jacobo, José, Simón, jíin Judas.

⁵⁶ Te suni cáyūcu cuáha de jíin yó yāhá. ¿Te ndese jíin de tāca jnúhun yáha núu súcuan? Achí ñayuu.

⁵⁷ Te súcuan ni cacujéé ni i nuū Jesús. Te ni cahān yā jíin i:

Tāca tēe nacani jnūhun Yaā Dios, iyó yíñuhún ñayuu jíin de, te máni ñayuu ñuu maá de jíin ñayuu vehe máá de cúu jeé tu iyó yíñuhún jíin de. Achí yá.

⁵⁸ Te tu ní sáha ya cuehē jniñu jéhnu yūcuán, chí tu cácuandje i ya.

*Jeē ni jīhī Juan tēe scuándute
(Mr. 6.14-29; Lc. 9.7-9)*

14

¹ Te tiempo yúcuan te Herodes, tēe ndácu jniñu región Galilea, ni jini jnūhun de jnūhun Jesús.

² Te ni cahān de jín ñáyuu cáhīn jín de:

Tēe yúcuan cúu Juan tēe ni scuándute, te ni natecu de. Jeē yúcuan íyó poder de sáha de jniñu jéhu. Achí de.

³ Chi Herodes, je ni ndacu de jniñu jeē na quívi Juan vecāa, jín jéē na cónuhni de jín cadena. Súcuán ni sáha de jeē siquí Herodías, ñasihi ñani de Felipe.

⁴ Chi Juan ni cahān de nuū Herodes:

Tu íyó ley condeca ró ña, áchí de.

⁵ Te jeē yúcuan ní cuni Herodes cahni de Juan. Te yúhú de jeē quívi ni ñayuu, chi ndihi i jéni ndije ni i jeē ñn tēe nácani jnūhun Yaā Díos cúu Juan.

⁶ Te ñn quívi ni sáha Herodes ñn vico quívi ní cacu de. Te sēhe síhi Herodías ni quívi i ni jita jéhe i nuū ñáyuu ní cana de ún. Te ni cusí ni Herodes ni sáha i.

⁷ Te ni jejnūhun téyí de jeē cuáha de núu na vé cacān i nuū de.

⁸ Te ni jehēn i ni cajnūhún i náná i na vé cacān i. Te ni ndívi i nuū Herodes, te ni cahān i:

Cuāha ní xínī Juan tēe scuándute, cone nuū ñn cohō, achí i.

⁹ Yūcuán na te rey Herodes ni cucuíhyá ni de. Te siquí jeē ni jejnūhun téyí de, jín jéē ní cajini sōho tēe cáyeji staā jín de, jeē yúcuan ní ndacu de jniñu jeē na cuáha nuū i.

¹⁰ Te ni tají de soldado jeē na quícahnde xínī Juan ini vecāa.

¹¹ Te ni quee soldado un jín xínī Juan, íne nuū ñn cohō, te ni jēhe nuū súchi síhi un. Te máá i ni jendeca i nuū naná i.

¹² Yūcuán na te ni jengoo tēe cáscuáha jín Juan, te ni candonehen de yiquí cúñu Juan, te ni cachindūji de. Yūcuán na te ni jengoo de ni cacastūhún de nuū Jesús.

*Jeē ni scáji yā uhūn mil tēe
(Mr. 6.30-44; Lc. 9.10-17; Jn. 6.1-14)*

¹³ Te ná ni jini Jesús jnūhun, te ni cujiyo ya yūcuán cuāhān yā jín barco, jeē cóne sñn ya ñn lugar nuū tú ñayuu. Te ni cajini ñayuu

jeē cuahán yā. Te tēcá ñuu ni quendacoo i cájica jéhe i, cuajnahan i ya.

¹⁴ Te nuū ní quenda Jesús ini barco, te ni jito ya ñayuu cuehē ún. Te ni cundáhú ni yā i, te ni nasávāha ya tāca ñáyuu cácuñu jeē véjicoo i jín.

¹⁵ Te nuū ní ini, te tēe cáscuáha jín yá, ni quecoo de nuū yā, te ni cacahān de:

Je ni ini, te yāhá chi tú na ñayuu yūcu. Núu súcuán te tají ní ñayuu na quíngoo i tēcá ñuu, te cuaan i jeē cáji i.

¹⁶ Te ni cahān Jesús jín de:

Tu jini ñúhún quíngoo i, chi cuāha máá ró jeē cáji i, áchí yá.

¹⁷ Te ni cacahān de jín yá:

Tú na vé cánevāha ná yāha, chi uhūn-ni staā jín úu-ni chācá, áchí de.

¹⁸ Te ni cahān yā jín de:

Cuāha na quíji, áchí yá.

¹⁹ Te ni cahān yā jín ñáyuu un jéē na cúcoo i nuū íte. Te ní quihin ya ndihúhún staā jín úu chācá un. Te ni ndacoto ya ichi ándiví, te ni nacuatáhú yá. Te ni tahú cuéchí yá staā ún, te ni jēhe ya nuū tēe cáscuáha jín yá. Te máá de ní casaja de nuū ñáyuu cuehē ún.

²⁰ Te ndívi i ni cayeji, te ni candutú chíji i. Te ni canastútú de pedazo jeē ní quendōo, te ni chitú úxī uū jica.

²¹ Te tēe ni cayeji un cúu nájñūhun uhūn mil, te sñn ga cúu ñahan jín súchi lúlí.

*Jeē ní jica jéhe yá nuū mar
(Mr. 6.45-52; Jn. 6.16-21)*

²² Yūcuán na te ni cahān-ni Jesús jín tēe cáscuáha jín yá jeē na quívicoo de barco, te cosnúu de quíngoo de nde inga lado mar, níni jéē nátají yá ñayuu un quíngoo i.

²³ Te nuū ní cuu ni nacuatáhú yá nuū i, te máñúhún-ni ya ni caa ya yucu, cuacacān tahú yā. Te ni cuaa, te íne máñúhún yá yūcuán.

²⁴ Te barco un, je ni cuu sava nuū mar cuahān. Te ndute mar un nátundahá níhin barco, chi vēji tachí ichi núu de.

²⁵ Te jeē yínee gā ni quee Jesús nuū de, jica jéhe yá nuū mar.

²⁶ Te tēe cáscuáha ún, ni cajito de ya jeē jica ya nuū mar. Te ni candondava de, te ni cacana cóhó de jeē cáyūhú de.

Jíhná cúu, áchí de.

27 Te ni cahān-ni Jesús jín de:
Ndeyí coo ni rō, te ma yūhu ró, chi máá rí cúu, áchí yá.

28 Yūcuán na te ni cahān Pedro jín yá:
Núu máá ní cúu, te cahān ni jín ná jéē na cáca jéhé ná nuū mar te jeē na núu ní, áchí de.

29 Te ni cahān yā:
Nehen núu súcuan, áchí yá.
Te ni quenda Pedro ini barco, te ni jica de nuū ndúte cuahān de nuū Jesús.

30 Te nuū ní jini de jeē níhin yáhi tachī, te ni yūhú de. Te ni quejéé de quee de chíji ndute. Te ni cana cóhó de:

Jnama ní sáña, áchí de.
31 Te Jesús ni jni-ni ya ndaha de. Te ni cahān yā jín de:

Tēe tu cándíje níhin cúu ró. ¿Naun ni nayūhu ró? Achí yá.

32 Te ni quívi ya ini barco un jín de, te ni jecuiñi-ni tachī.

33 Yūcuán na te tēe cáhīin ini barco un, ni cajecuiñi yití de nuū yā. Te ni cacahān de:
Jendaá ndije jeē Sēhe Yaā Dios cúu ní, áchí de.

Jeē ní nasávāha ya ñayuu cácuñi región Genesaret
(Mr. 6.53-56)

34 Te ni quenda jíyo ya jín de nuū mar un, ní jinū yā región Genesaret.

35 Te ñayuu yūcuan ní canacuni i ya. Te ni cascáca i jnūhun tācá ndañū yūcuan jéē ni jínū yā. Te ñayuu ni caquindeca i ñayuu cácuñi nuū yā.

36 Te ni cacahān ndahú i jín yá jeē na quéhé i vésú yusáhma ya. Te tāca ñáyuu jeē ní caquehé sahma ya, ni canduvāha i.

Siquí ndese cújnehén ñáyuu
(Mr. 7.1-23)

15

1 Yūcuán na te jecu tēe grupo fariseo jín tēe cástéén tutu ley Yaā Dios, ni quendacoo de ñuu Jerusalén, te ni quecoo de nuū yā. Te ni cacahān de jín yá:

2 Tēe cácuáha jín ró, ¿naun cástívi de costumbre jeē ní cajequin ñayuu jenahán? Chi tu ní cáscuicu de costumbre jeē nándahá de nuū yā te caji de staā. Achí de.

3 Te Jesús ni cajnūhun yá de:

Te máá ró jijnáhan ró, ¿suni naun cástívi ró jniñu ní ndacu Yaā Dios nuū rō? Chi sa costumbre máá ró cúu jeē casquicu ró.

4 Chi ni cahān Yaā Dios: Coo yíñuhún ró jín tátá rō jín náná rō. Te núu ndé ñn cahān siquí tátá chí siquí naná, na cúu nahín, áchí Yaā Dios.

5 Te máá ró chi cácahān rō jeē cuu cahān ñn tēe jín tátá de jín náná de: Ma cúu chindéé ñáhán ná níhín cuáha na jéē cáji ni jéē cúhun ní, chi ndihi jeē névāha ná, je ni socō na núu Yaā Dios.

6 Te tēe cahān súcuan, tuá cánuú chindéé ñáhán de tátá de náná de, áchí ró jijnáhan ró. Te súcuan cástívi ró jniñu ní ndacu Yaā Dios, jeē siquí costumbre ni cajequin máá ró.

7 Tēe stáhú-ni cácuu ró. Ndaā ni nacani Isaías jnūhun siquí rō nde jenahán, yósó núu tútu iñ jeē ni cáhān Yaā Dios:

8 Ñayuu yáha chi máá yuhu-ni i cájetáhú i ruhū,
te nasūu ndé jín ini jín ánuá i.

9 Te cáchiñuhún sáa-ni i ruhū,
chi jnūhun cástéén i cúu jniñu ní candacu tēe,

te nasūu jéē ní ndacu máá rí cúu.
Achí Yaā Dios. Achí yá.

10 Te ni cana ya ñayuu cuehē ún, te ni cahān yā jín i:

Cuni sōho vāha jijnáhan ró, te chuhun ni rō:

11 Nasūu jéē quívi ini yuhu ñayuu cujnehén i sáha. Chi jnūhun jeē quenda yuhu i, yūcuan cúu jeē cujnehén i sáha, áchí yá.

12 Yūcuán na te tēe cácuáha jín yá, ni quecoo de nuū yā, te ni cacahān de:

¿A jíní ni jéē ní caquití ni tēe fariseo jeē ní cajini sōho de jnūhun ni cahān ní? áchí de.

13 Te ni cahān máá yá:

Cácuu de nájnūhun yujnu jeē tu ní náchuhun Tátá rī, Yaā ndeé andiví, te ñn quívi te jnūhun ya quihīn.

14 Na quíngoo máá de. Chi cácuu de nájnūhun tēe cuáá cástéén ichi nuū inga tēe cuáá. Chi núu ñn tēe cuáá stéén de ichi nuū inga tēe cuáá, te ndindúú de ñinga de xehvā. Achí yá.

15 Te ni cahān Pedro jín yá:

Castūhun cájí ní jnūhun yátá yáha nuū na jijnáhan ná, áchí de.

16 Te ni cahān Jesús:

¿Te á suni máá ró ná tu jecūhun ni rō chí naún?

¹⁷ ¿A tu cájecūhun ni rō jeē tāca jéē yéji ñayuu, chí quívi chíji i, te quénda-ni cuahān?

¹⁸ Te jnūhun jeē quénda yuhu ñayuu, chí nde ini anuá i vēji, te yūcuan cúu jeē cu-jnéhén i sáha.

¹⁹ Chi nde ini anuá ñayuu quénda jeē jéni néé ni, jeē jéni ndīyi, jeē casíquí ndéē jnáhan, jeē jica jnéni, jeē sacuíhná, jeē cahán jnūhun stáhú, jeē cahán yāa síquī jnáhan.

²⁰ Tāca jéē yáha cúu jeē cujnéhén ñayuu sáha. Te núu tu squícu i costumbre jeē nándahá i te caji i staā, tu cúnéhén i sáha. Achí yá.

*Ñahan inga nación jeē ní candíje nihin
(Mr. 7.24-30)*

²¹ Te ni quenda Jesús yūcuan cuahān yā región Tiro jíin Sidón.

²² Te in ñahan ñuu Canaán, néne ña región Tiro jíin Sidón, te ni quee ña nuū Jesús. Te ni cana jee ña:

Tátā, Sēhe yucūn David, cundáhú ni ni sáña víi. Chí sēhe síhí ná, ñūhun tachī ini i, te yōhyo xeēn ndóho i, achí ña jíin yá.

²³ Te tu ní cáhán cuíti yā jeē ní cáhán ña. Yūcuán na te ni quecoo tēe cáscuáha jíin yá, te ni cacahān de:

Cahān ni jíin ña na quíhín ña, chí cána jee ña vēji ña yatā yō, achí de.

²⁴ Te ni cahān yā jíin ña:

Nuū maá-ni ñayuu nación Israel ni tají Yaā Dios sáña véji ná, chí cácuu i nájnūhun lanchi, quíti ní sana.

²⁵ Te ñahan ún chí ni quee ña, te ni jecuíñi yíti ña nuū yā, te ni cahān ña:

Tátā, chindéé ñáhán ní sáña víi, achí ña.

²⁶ Te ni cahān yatá yá jíin ña:

Tu íyó váha jeē quénde yō staā sēhe, te cuāha yó núu ina, achí yá.

²⁷ Te ni cahān ña:

Jendaá cahán ni Tátā, te chindéé ñáhán ní sáña vésú cúu ná nájnūhun ina. Chí suni máá tí cánihin nahín tí pedazo staā cuechí jéē cóyo chíji mesa jitoho tí cáyeji tí, achí ña jíin yá.

²⁸ Yūcuán na te ni cahān Jesús:

Yōhyo váha jeē cándíje nihin ní súcuan, nánā. Te na sáha ná jéē cuní ni, achí yá.

Te máá hora un ní nduvāha-ni sēhe síhí ña.

Jeē ní nasávāha ya cuehē ñayuu cácuñū

²⁹ Te ni quenda Jesús cuahān yā yūcuán, te ni yāha ya yumar Galilea. Te ni caa ya in yucu, te yūcuan ní cucōo ya.

³⁰ Te cuehē ñayuu ni quecoo i nuū yā, te cándeca i tāca jéē cájica chácuá, jeē cuaá, jeē ñihín, jeē cacúhndú, jíin cuehē gā ñayuu cácuñū. Te ni cajequin i nuū jehé Jesús. Te ni nasávāha ya i jíin náhan i.

³¹ Te ni canaa ni ñayuu un cájito i jeē nácahān ñayuu ñihín, ndúvāha ñayuu cuhndú, náccaca váha ñayuu chacuá, nánune tinū ñayuu cuaá. Te ni cacahān i jeē yóhyo váha Yaā cúu Yaā Dios ñuu i Israel.

*Jeē ní scáji yā cuñ mil tēe
(Mr. 8.1-10)*

³² Yūcuán na te ni cana Jesús tēe cáscuáha jíin yá, te ni cahān yā jíin de:

Cúndáhú ni rī ñayuu cuehē yāhá, chí je ni cuu unī quívi cáyūcú i jíin rí, te tuá na vé caji i. Te tu cúní rī natají rí i nuhun ndite i, chí núu súcuan te sava ichi te cuíta íi i. Achí yá.

³³ Te ni cacahān tēe cáscuáha jíin yá:

¿Te ndé nuū nihín yō staā caji ñayuu cuehē yāhá? Chí yāhá tú na ñayuu yūcu, achí de.

³⁴ Te ni cajnūhun yá de:

¿Nasaa staā cánevāha ró?

Te ni cacahān de:

Uxā-ni, jíin jecu chācá lúli, achí de.

³⁵ Yūcuán na te ni cahān yā jíin ñayuu cuehē un jéē na cúcōo i.

³⁶ Te ni quihin ya ndihúxá staā jíin cháca ún, te ni nacuatáhú yá nuū Yaā Dios. Te ni tahu cuechí yá, te ni jēhe ya nuū tēe cáscuáha jíin yá, te máá de ni casaja nuū ñayuu.

³⁷ Te ndihi i ni cayeji, te ni candutú chíji i. Yūcuán na te ni canastútú de pedazo jeē ní quendōo, te ni chítú úxá jíca.

³⁸ Te tēe ni cayeji ún, nde cuñ mil de cúu, te sín ga cúu ñahan jíin súchi lúli.

³⁹ Yūcuán na te ni nacuatáhú yá nuū ñayuu ún, te cuanungoo i. Te ni ndívi ya ini barco, te cuahān yā región Magdala.

*Jeē cájicān de in jniñu jéhnu nuū yā
(Mr. 8.11-13; Lc. 12.54-56)*

16

¹ Te ni quecoo tēe grupo fariseo jíin tēe grupo saduceo nuū yā. Chi cácumí de coto ndee de ya, te ni cajicān de jeē na sáha ya ñn jniñu jéhnú jeē coo ñn seña ichi ándiví.

² Te máá yá ni cahān yā jíin de:

Núu ni ini, te cácahān rō: Nandii, chi ni nasácuéhé i andiví, áchí ró.

³ Te jenéhen chi cácahān rō: Vijna te cuun saū, chi ni nasácuéhé i andiví, áchí ró. Tēe stáhú-ni cácuu ró. Chi cájecūhun ni rō ndese stéén seña andiví, te tu cájecūhun ni rō ndese stéén tācá jniñu jéhnú sáha ri tiempo yáha.

⁴ Ñayuu yáha jeē casáha jniñu néé, tu cájetáhú cuítí i Yaā Dios. Te cájicān i jeē sáha ri ñn jniñu jéhnú jeē coo ñn seña andiví. Te tuá na inga jniñu jéhnú stéén rī nuū i, chi máá-ni jniñu jéhnú nájnūhun ni cuu jíin Jonás, tēe ni nacani jnūhun Yaā Dios nde jenahán. Achí yá.

Te ni stóo ya de jíjnáhan de, te cuahān yā.

*Jnūhun levadura tēe fariseo
(Mr. 8.14-21)*

⁵ Te tēe cáscuáha jíin yá ni canaa ni de condiso de staā náa cuangoo de jíin barco inga lado mar.

⁶ Te ni cahān Jesús jíin de:

Coto má candíje ró levadura tēe grupo fariseo jíin tēe grupo saduceo, achí yá.

⁷ Te tēe cáscuáha un ní cacahān máá de:

Va síquī jeē tú na staā ndíso yó, jeē yúcuān cáhān yā súcuān, áchí de.

⁸ Te ni jini Jesús, te ni cahān yā:

¿Najehē cácahān rō jeē ni cáhān rī súcuān síquī jeē tú na staā cándiso ró? Tēe tu cándíje ññin cácuu ró.

⁹ ¿A ná tu jecūhun ni rō jeē tu ní cáhān rī súcuān síquī jeē tu ndíso ró stáā? ¿A tu cánucūhun ni rō jeē ní tahú cuéchí rí uhūn staā ni cayejí uhūn mil tēe, te nasaa jíca ni canastútú ró jeē ni quéndōo?

¹⁰ ¿Te á tu cánucūhun ni rō jeē ní tahú cuéchí rí uxā staā ni cayejí cuūn mil tēe, te nasaa jíca ni canastútú tucu ró?

¹¹ ¿Te najehē tu cájecūhun ni rō jeē násūu síquī staā ni cahān rī jíin ró jeē ni cáhān rī jeē coto má candíje ró levadura tēe fariseo jíin tēe saduceo? Achí yá jíin de.

¹² Yūcuān na te ni cajecūhun ni de jeē tu ní cáhān yā jeē coto de jeē ma cáji de pan jeē yññi levadura, chi sa suhva ni cahān yatá yá jeē ma cándíje de jnūhun stáhú cástéén tēe fariseo jíin tēe saduceo.

*Jeē ni cáhān Pedro jeē Jesús cúu Cristo
(Mr. 8.27-30; Lc. 9.18-21)*

¹³ Te nuū ni jíin Jesús región Cesarea Filipino jíin tēe cáscuáha jíin yá, te ni cajnūhun yá de:

Ruhū, Yaā ní nduu tēe, ¿ndé ñn cúu ri cácahān ñayuu?

¹⁴ Te ni cacahān de:

Sava i cácahān jeē cúu ní Juan tēe ni scuándute. Te sava ga i cácahān jeē cúu ní Elías, tēe ni nacani jnūhun Yaā Dios nde jenahán. Te sava ga i cácahān jeē Jeremías chí inga tēe ni nacani jnūhun Yaā Dios cúu ní. Achí de.

¹⁵ Te ni cahān yā jíin de:

Te máá ró, ¿ndé ñn cúu ri cácahān rō? achí yá.

¹⁶ Te ni cahān Simón Pedro:

Máá ní cúu Cristo, Yaā ní tají Yaā Dios. Te cúu ní Sēhe Yaā Dios, Yaā técu ní cáni, áchí de.

¹⁷ Te ni cahān Jesús:

Yōhyo ndetū rō, Simón sēhe Jonás, chi nasūú ñn ñayuu ni steén jnūhun yáha nuū rō, chi sa suhva máá Tátá rī, Yaā ndeé andiví, ní steén yā nuū rō.

¹⁸ Te ruhū suni cáhān rī jíin ró jeē máá ró cúu Pedro, jeē cuní cahān: yuū. Te jnūhun ndaā jeē ni cáhān rō jeē máá rí cúu Cristo, suu cúu nájnūhun ñn yuū cáhnu. Te síquī yuū cáhnu yáha sáha ri jeē quítuu vehe, te vehe un cúu ñayuu cácañíje ruhū. Te tu ndé vé cundeyí cuítí síquī i, ni jnūhun xeēn jeē cájihí i, tuá na vé cúu sáha jíin ánuá i.

¹⁹ Te máá ró condiso jniñu ró sáha ró jéé quívicoo ñayuu ndaha Yaā andiví jeē ndacu ya jniñu nuū i. Te tāca jéé cási rō jeē ma sáha ñayuu ini ñayiví yáha, suni casi jeē cáyūcú nde andiví. Te tāca jéé cuáha ró jnūhun sáha i ini ñayiví yáha, suni jeē cáyūcú nde andiví cuáha jnūhun. Achí yá.

²⁰ Yūcuān na te ni ndacu ya jniñu nuū tēe cáscuáha jíin yá, jeē ma cáchi de nuū ní ñn ñayuu jeē cúu ya Cristo.

*Jeē ní castūhún Jesús jeē cúū yā
(Mr. 8.31-9.1; Lc. 9.22-27)*

²¹ Te nde saá ní quejéé Jesús cástūhun cájí yá nuū téē cáscuáha jíin yá jeē jíni ñúhún quihín yā ñuu Jerusalén. Te tāca téē jéhu jíin sūtū cácujuhnu jíin téē cástéén tutu ley, stóho ndasí de ya. Te cahni de ya, te nuū uní quiví te natecu yā, achí yá.

²² Yūcuán na te Pedro, ni cana máñuhún de ya, te ni quejéé de cáhán de nuū yā:

¿Naun cáhán ni súcuan? Chi tu cúní Yaā Dios jeē cuu súcuan. Tu jíni ñúhún cuiti ndoho ní jnūndóho yáha, achí de.

²³ Te ni ndió cóto ya nuū Pedro, te ni cahán yā jíin de:

Cujiyo quihín rō, chi cáhán rō ná cáhán Satanás. Chi téē ndúcú stívi rúhū cúu ró. Te tu jéni ni rō nájnūhun jéni ni Yaā Dios, chi sa suhva jéni ni rō nájnūhun cájeni ni ñayuu. Achí yá.

²⁴ Yūcuán na te ni cahán yā jíin téē cáscuáha jíin yá:

Na-ni ñayuu núu cúní i condiquín i ruhū, na cási i jeē cuní maá i, te na cóndiquín i ruhū te cuáha i jnūhun ndoho i jnūndóho jeē siquí rī, vésú na cúū i.

²⁵ Chi núu ndé ñayuu cuní i cācu i nuū jnūndóho quiiji nuū i jeē siquí ruhū, núu súcuan te jnahnū ndetū i ní cáni. Te núu ndé ñayuu, vésú na cúū i jeē siquí ruhū, te cotecu i ní cáni.

²⁶ ¿Chi ndé cuajniñu vésú na cūndeyí ñayuu nihín i ní ñáyiví, te núu quiví i nuū jnahnú ndetū i? Chi tú na jíin cuiti chunaa ñayuu jeē cácu ánuá i.

²⁷ Chi ruhū, Yaā ní nduu téē, ndiji ri jíin táca ndajéhé rī, te yōhyo luu cujéhu ri nájnūhun cújéhu Tátá rī. Yūcuán na te cuáha ri tahū nuū ñn ñn ñayuu núu ndese jniñu ni casáha i.

²⁸ Te jendaá cahán rī jíin ró jeē sava téē cáhín yáha, ma cúū de chi nde cuní de jeē maá rí, Yaā ní nduu téē, ndácu ri jniñu jíin poder rī.

*Jeē tucu ni nduu ya
(Mr. 9.2-13; Lc. 9.28-36)*

17

¹ Yūcuán na te nuū iñú quiví te Jesús ni jeca ya Pedro jíin Jacobo jíin Juan ñani Jacobo, cuahán sín ya jíin de ñn yucu súcún.

² Te yūcuán, tucu ni nduu ya nuū de. Chi ni ndindēe núu yā nájnūhun niāndii. Te sahna ya ni nducuíjin quiyí ndasí, nájnūhun nduva luz.

³ Te ni cajito-ni de jeē Moisés jíin Elías, téē ni cahīyo jenahán, cándajnūhún de jíin yá.

⁴ Te ni cahán Pedro jíin yá:

Nacā jeē váha jeē cáhín ná yáha. Te núu cúní ni te na sáha ná úní vehe ramada, ñn cuu máá ní, inga cuu Moisés, te inga cuu Elías, achí de.

⁵ Te níni cáhán gā de, te ni quiiji vicō nūhun jéē yaa ndasí, ni jesi-ni nuū de. Te nuū vicó un ní cahán ñn jnūhun:

Yáha cúu Sēhe ri jeē maní ndasí rí jíin, te cúsí ni rī jíin. Na cúní nahín ró jnūhun cáhán yā. Achí.

⁶ Te jeē súcuan ni cajini sōho téē cáscuáha ún, te ni cajecava ndeyí de, chi yōhyo ni cayūhú de.

⁷ Yūcuán na te ni quee Jesús, te ni soó yá ndaha ya siquí de. Te ni cahán yā:

Ndocuñí, te ma yūhu ró jijnáhan ró, achí yá.

⁸ Te ni candacoto de, te tuá téē un ní cájito de, chi máá ñn na Jesús.

⁹ Te ni cananuu de jíin yá yucu ún. Te ni ndacu ya jniñu nuū de:

Ma cáchi rō nuū ní ñn jeē súcuan ni cajito ró, chi nde na nátecu maá rí, Yaā ní nduu téē, achí yá.

¹⁰ Yūcuán na te téē cáscuáha jíin yá, ni cacajnūhún de ya:

Núu súcuan te téē cástéén tutu ley Yaā Dios, ¿najehē cácahán de jeē cánuú ndiji Elías xíhna gā, te sáá te quiiji Yaā cúu Cristo? achí de.

¹¹ Te ni cahán Jesús jíin de:

Jendaá cúu jeē xíhna gā quiiji ñn téē cuu nájnūhun Elías, te sātūhva de ndihí, achí tuú.

¹² Te cáhán rī jíin ró jeē jé ni quiiji téē ni cuu nájnūhun Elías, te tu ní jíni ñayuu jeē suu de cúu. Te ni casáha ndeváha ñayuu jíin de ndihí jeē ní cacuu ni maá i. Te suni súcuan stóho i ruhū, Yaā ní nduu téē. Achí yá.

¹³ Yūcuán na te téē cáscuáha un, ní cajecūhun ni de jeē cahán yā jeē Juan téē scuándute, ni cuu de nájnūhun Elías.

Jeē ní nasávāha ya #n sūchi jíhí yíhí
(Mr. 9.14-29; Lc. 9.37-43)

¹⁴ Te ni najinū yā jíin de nuū ñáyuu cuehē ún. Te ni quee #n tēe, ni jecuiñi yití de nuū yā, te ni cahān de:

¹⁵ Cundáhú ni ni séhe yí ná, chi yōhyo xeēn ndóho i cuehyí jíhí yíhí. Te je ni cuu cuehē jínu cótúú i nuū ñuhún jíin núu ndúte.

¹⁶ Te ni quindeca ná i nuū tēe cáscuáha jíin ní, te tu ní cúu sávāha de i, áchí de.

¹⁷ Te ni cahān Jesús:

Ñayuu yōhyo nīhni ni cácuu ró chi tu cáccandíje ró jēe cuu nduvāha i. ¿Nasaa ga quiví condee rī jíin ró? ¿Te nasaa ga quiví cuandeyí ni rī jíin ró? Cuáquihin sūchí un na quíji i, áchí yá.

¹⁸ Te ni cahān yā nuū tachí, te ni quenda-ni ini sūchí un. Te ni nduvāha-ni i máá hora un.

¹⁹ Yūcuán na te tēe cáscuáha un, ní cacajñūhun sín de ya:

¿Najehē tu ní cúu quenehen ná tachí un jíjnāhan ná? achí de.

²⁰ Te ni cahān yā:

Siquí jeē tu cáccandíje nīhin ró jēe cuu sáha ró. Chi jendaá cahán rī jíin ró, jeē núu candíje ró vésú #n tíhli-ni, cūhva nájnūhun #n ndiquin mostaza, te cuu sáha ró táca-ni jniñu yí. Chi cuu cahān rō jeē na cújiyo yucu yáha quihīn inga lado, te cujiyo-ni. Te táca-ni jniñu chi cuu sáha ró, te núu candíje nīhin ró jēe cúu.

²¹ Te #n tachí súcuan chi ma quénda cuiti quihīn, te núu tu cacān tahu rō te coo ndite ni rō. Achí yá.

Jeē ni cahān tucu ya jeē cúu yā
(Mr. 9.30-32; Lc. 9.43-45)

²² Te jíca cuu Jesús jíin de jíjnāhan de región Galilea, te ni cahān yā jíin de:

Máá rí, Yaā ní nduu tēe, nastúu i ruhū nuū táca tēe xeēn.

²³ Te cahni de ruhū, te nuū uní quiví te natecu rī, achí yá.

Te ni canducuíhyá ndasí ni de jeē ni cahān yā jñūhun yáha.

Siquí xūhun cuajniñu ini templo

²⁴ Te ni jinū yā ñuu Capernaum jíin tēe cáscuáha jíin yá. Te tēe cástútú xūhun templo ni quecoo de, te ni cacajñūhún de Pedro:

Te maestro maá ró jíjnāhan ró, ¿á tú cuāha de xūhún cuajniñu ini templo, chí naún? áchí de.

²⁵ Te ni cahān Pedro:

Cuu, áchí de.

Te ná ni quiví de ini vehe, te xīhna gā Jesús ni cahān yā jíin de:

¿Ndese jéni ni rō, Simón? Tāca tēe cácuu rey ini ñayiví yáha, ¿ndé núu cájicān de xūhun renta jíin xūhun cuajniñu ñuu? ¿A núu séhe de chí núu ñáyuu sín vehe? áchí yá.

²⁶ Te ni cahān Pedro:

Nuū ñáyuu sín vehe, áchí de.

Te ni cahān Jesús:

Núu súcuan te tú na inga cujéhnu nuū séhe rey jeē cacán xūhún un núu i.

Súcuan ni cahān yā jeē cujéhnu ya cúu ya Sēhe Yaā Dios. Te ni cahān yā:

²⁷ Te na chúnaa yō, návāha tu squítí ni yō de. Núu súcuan te cuáhán ndé yumar, te scáne ró gancho jeē jní chācá, te tava rō chācá jēe jní xīhna gā. Te ndica rō yuhu ti, te yūcuan nīhīn rō #n xūhun jēe cánda chunaa rō jeē cájicān de. Te quindeca ró núu de jeē cúu ruhū jíin rōhó. Achí yá.

Ndé ñáyuu cúu jeē cujéhnu ga
(Mr. 9.33-37; Lc. 9.46-48)

18

¹ Te suni quiví un ní quecoo tēe cáscuáha un núu yā, te ni cacajñūhún de ya:

¿Ndé #n cújéhnu ga nuū ñáyuu jeē ndácu Yaā andiví jniñu nuū? achí de.

² Te ni cana ya #n sūchi lúli, te ni jeni ya i mēhñú de.

³ Te ni cahān yā:

Jendaá cahán rī jíin ró, núu tú nandió cóo ni rō te cani ni rō nájnūhun #n sūchi lúli, ma quiví cuiti rō ndaha Yaā andiví jēe ndacu ya jniñu nuū rō.

⁴ Núu súcuan te ñayuu jeē jéni ni i jeē tu cújéhnu i, nájnūhun jéni ni sūchi lúli yáha, suu i cújéhnu ga nuū ñáyuu jeē ndácu Yaā andiví jniñu nuū.

⁵ Te na-ni ñayuu núu jeē siquí ruhū jetáhú i #n sūchi lúli nájnūhun sūchi yáha, te ruhū jetáhú i. Achí yá.

Xeēn coo siquí ñáyuu quiví nuū cuéchi
(Mr. 9.42-48; Lc. 17.1-2)

6 'Te núu ñin sūchi lúli yáha cándíje i ruhū, te núu quívi i cuēchi sáha na-ni ñayuu, te vāha ga núu ni conuhnī ñin yōso cáhnu sucūn ñayuu ún, te quee i chíji ndute mar nuú.

7 Nacā xeēn cúu jíin ñáyuu ñayívi, chi máni iyó jéē nducú squívi ñayuu nuú cuéchi. Te máni súcuan coo ini ñayívi. Te nacā xeēn ndoho ñayuu jeē squívi jnáhan nuú cuéchi.

8 'Núu súcuan te núu ndaha ró chí jéhē rō sáha jeē quívi ró cuéchi, vāha ga cahnde rō te scāne ró na quíhín, návāha tuá sáha ró cuéchi. Chi vāha ga jeē coo chácua ró chí coo tícúhndu ró te quívi ró núu cotecu rō ñí cáni, vēsú jeē cóndee ndindúú ndaha ró jéhē rō te quívi ró núu ñuhún jeē cayú ñí cáni.

9 Te núu tinūu ró sáha jeē quívi ró cuéchi, vāha ga tava rō te scāne ró na quíhín, návāha tuá sáha ró cuéchi. Chi vāha ga jeē coo ñin-ni tinūu ró te quívi ró núu cotecu rō ñí cáni, vēsú jeē cóndee ndindúú tinūu ró te quívi ró núu ñuhún infierno.

*Jnūhun yátá síquī lanchi jeē ní sana
(Lc. 15.3-7)*

10 'Coto ma sájéē ni rō nuú ní ñin sūchi lúli yáha. Chi cáhan rī jíin ró jeē tācá ndajéhé andívi jéē ndíto ya i, níni cáhín ya nuú maá Tátá rī andívi.

11 Chi ruhū, Yaā ní nduu tēe, vēji rī jeē jnáma rī ñayuu jeē ní sana i nuú Yaā Dios.

12 '¿Te ndese cájeni ni rō? Núu ñin tēe ndéca de ñin ciento lanchi, te núu sana ñin ti, ¿á tu stóo de cuūn xico xahūn cuūn gā tī yucu, te ndicó de quinanducú de quíti ní sana ún?

13 Te núu ni nanihín de ti, te ndaā jeē yóhoyo ga cúsi ni de jíin quíti ún vēsú jíin cúūn xico xahūn cuūn gā quíti jeē tu ní sana.

14 Te suni súcuan maá Tátá rō, Yaā ndeé andívi, tu cúní yā jeē jnahnú ndetū ni ñin sūchi lúli yáha.

*Síquī jeē cóne cáhnu ni yō nuú jnáhan yó
(Lc. 17.3)*

15 'Te núu jnáhan ró ní sáha de cuēchi síquī rō, núu súcuan te castūhun ró nuú mañúhún-ni de jeē ni sáha de cuēchi síquī rō. Te núu ni jetáhú de jnūhun ni cahān rō jíin de, núu súcuan te je ni ndumanī de jíin ró ni sáha ró.

16 Te núu tu ní jetáhú de jnūhun cáhan rō, te quicāna ró ñin chí úu gā ñayuu quíhín rō

jíin núu de, cuu i testigo jíin ró, te cundaā cuēchi de te ndumanī de jíin ró.

17 Te núu tu ní jetáhú tucu de jnūhun cácahān tēe ún, yūcuán na te castūhun ró nuú ñáyuu cácaandíje. Te núu tu ní jetáhú tucu de jnūhun cahān ñayuu cácaandíje ún, te siáá rō de na cóo de nájñūhun ñin tēe tu cándíje nuú Yaā Dios chí tēe stútú xūhun rentā.

18 'Jendaá cahán rī jíin ró jéē tāca jéē cási rō jeē ma sáha ñayuu ini ñayívi yáha, suni cási jeē cáyūcú nde andívi. Te tāca jéē cuáha ró jnūhun sáha i ini ñayívi yáha, suni jeē cáyūcú nde andívi cuáha jnūhun.

19 'Te suni cáhan rī jíin ró, núu uū jnáhan ró ini ñayívi yáha, inuú caní ni rō síquī ñin jeē cacán tahu rō, núu súcuan te maá Tátá rī andívi cuáha ya jeē cájicān rō.

20 Chi núu ndé mí ndútútú úu chí úní ñayuu jeē cáchiñúhún i ruhū, te yūcuán íne rī jíin i, áchí yá.

21 Yūcuán na te ni quee Pedro nuú yā, te ni cajñúhún de ya:

¿Nasaa jínu cone cáhnu ni na núu jnáhan ná jéē sáha de cuēchi síquī ná? ¿A ndé uxā jínu chí naún? áchí de.

22 Te ni cahān Jesús:

Tu cáhan rī jíin ró jeē maá úxā jínu, chi nde uxā jínu jeē uní xico uxí.

Jnūhun yátá síquī mozo jeē tu ní íne cáhnu ni

23 'Núu súcuan te Yaā ndeé andívi, suhva cúu jeē íne cáhnu ni yā nuú ñáyuu ndácu ya jniñu nuú: Cúu nájñūhun ñin rey jeē cuní de sándaā de jíin mozo de jeē cátaū nuú de.

24 Te ni quejéé de sándaā de jíin i. Te ni caquindeca i ñin mozo jeē taú tijni millón peso nuú de.

25 Te tú na vé névāha mozo un chunaa nuú de. Te ni ndacu de jniñu jeē na cúyāhu mozo un jíin ñasíhí jíin séhe jíin táca nda-jniñu, te nucūnaa xūhun táu.

26 Yūcuán na te ni jecuiñí yití mozo un, te ni cahān ndahú de jíin patrón de ún: Condetu ní, te na chúnaa ndíhí ná xūhun ní, áchí de.

27 Te maá patrón ni cundáhú ni de mozo de. Te ni íne cáhnu ni de jeē taú mozo de ún, te ni siaá de jeē ma chúnaa gā.

28 Te ni quenda mozo un cuáhān de, te ni najnáhan-ni de jíin ñin jnáhan mozo de jeē

taú jecu peso nuū de. Te ni jñi de tēe ún, te ni quitu de sucūn, te ni cahān de: Chunaa jeē taú rō nuū rī, achí de.

²⁹ Te jnáhan mozo de un ní jecuiñi yití nuū de, te ni cahān ndahú jíin de: Condetu te na chúnnaa ndihi ri xūhun ró, achí.

³⁰ Te máa de tu ní cúní de, chi ni chune de tēe un vécāa nde quivī nachunaa jeē taú nuū de.

³¹ Te tāca jnáhan mozo de ni cajito jeē súcuan ni sáha de, te ni cajnahuhū ndasí ni de. Te cuango de nuū patrón de, te ni cacachi de ndihi ndese ni cuu.

³² Yūcuán na te patrón un ní nacana de mozo un, te ni cahān de jíin: Mozo ndevāha cúu ró. Chi ni ine cáhnu ni rī ndihi jeē taú rō nuū rī, chi ni cahān ndahú ró jíin rí.

³³ Te nájnūhun ni cundáhú ni rī rohó, suni súcuan ni jini ñúhún cundáhú ni rō jnáhan mozo rō nuú, achí de.

³⁴ Te ni quití ndasí ni patrón, te ni ndacu de jniñu jeē na quivī vecāa nde nachunaa ndihi jeē taú nuū de.

³⁵ Te ni jinu ni cahān yā, te achí yá:

Nájnūhun ni sáha rey un jíin mozo de, suni súcuan sáha máa Tátá rī andiví jíin táca rohó núu tu cone cáhnu ni rō nuū jnáhan ró nde jíin ini jíin ánuá rō, núu na-ni cuēchi sáha i nuū rō. Achí yá jíin de jíin de.

*Siquī jeē ma stóo jnáhan tēe jíin ñahan
(Mr. 10.1-12; Lc. 16.18)*

19

¹ Te nuū ní ndihi ni cahān Jesús tāca jnúhun yáha, te ni quenda ya Galilea cuahān yā. Te ni jinū yā región Judea, inga lado yūte Jordán, ichi núu cáne niāndii.

² Te cuehē ñayuu ni candiquīn i ya, te yūcuan ní nasávāha ya ñayuu cácuñū.

³ Yūcuán na te ni quecoo jecu tēe grupo fariseo nuū yā, chi cácuñi de coto ndee de ya núu ndese cahān yā. Te ni cacajñuhún de ya:

¿A íyó ley jeē cuu ndusñin ñin tēe jíin ñasihí de núu na-ni siquī cúu, chí naún? achí de.

⁴ Te ni cahān yā:

¿A tu ní cácahu ró tutu i ndese ni sáha Yaā Dios ñayuu nde xihna ñúhún? Chi tēe jíin ñahan ni sáha ya, achí.

⁵ Te suni ni cahān Yaā Dios: Jeē yūcuan cúu jeē stóo tēe tátá de náná de, te quijnáhan

de jíin ñasihí de, te ñin na cuu ndindúu de, achí Yaā Dios, achí tutu.

⁶ Núu súcuan te tuá cúu uū jnáhan de, chi ñin na cúu. Jeē yūcuan tu íyó váha jeē stóo jnáhan, chi jeē ni squijnáhan Yaā Dios cúu, achí yá.

⁷ Te ni cacajñuhún de ya:

Núu súcuan ¿te naun ni ndacu Moisés jniñu jenahán jeē núu stóo ñin tēe ñasihí de, te na cúvāha acta jeē ndusñin de jíin ña? achí de.

⁸ Te ni cahān yā jíin de:

Siquī jeē níhni ni rō jijnáhan ró, jeē yūcuan ní jēhe Moisés jnūhun jeē stóo ró ñasihí ró. Te nde xihna ñúhún chi nasūu súcuan ní cuu.

⁹ Te ruhū chi cáhán rī jíin ró, núu ñin tēe stóo de ñasihí de, te núu nasūu jēe tijní ni ña, te quijnáhan de jíin inga ñahan, núu súcuan te cásiquí ndeē de ña. Te núu ñin tēe condeca de ñahan ní ndusñin, suni cásiquí ndeē de ña, achí yá.

¹⁰ Yūcuán na te ni cacahān tēe cáscuáha jíin yá:

Te núu ma cúu stóo tēe ñasihí de, núu súcuan te vāha ga ma cóndeca de ñahan, achí de.

¹¹ Te ni cahān yā jíin de:

Jnūhun ni cahān rō yāhá, tu níhín jniñu nuū ndihi tēe, chi máa nene tēe jeē ni sáha Yaā Dios jeē níhín jniñu nuū.

¹² Chi íyó tijní siquī jeē jési jeē ma cóndeca tēe ñahan. Chi sava tēe ni cacacu de jeē ma cúu condeca de ñahan. Te sava ga tēe ni sáha ñayuu jeē ma cúu condeca de ñahan. Te sava ga tēe ni cajeni ni maá de jeē ma cóndeca de ñahan siquī jeē ndihví ni de jíin jniñu jeē ndácu Yaā andiví nuū de. Tēe jeē cúu cuatáhú jnúhun jeē ma cóndeca de ñahan, na cuatáhú de núu súcuan. Achí yá.

Jeē ni jicān tahu Jesús jehē sūchi lúlí

(Mr. 10.13-16; Lc. 18.15-17)

¹³ Yūcuán na te ni quecoo ñayuu jíin sūchi lúlí, jēe na sóo yá ndaha ya xiní i te cacān tahu yā jehē i. Te tēe cáscuáha jíin yá, ni cacahān de nuū ñayuu vējicoo jíin i.

¹⁴ Te ni cahān Jesús:

Cuāha jnūhun na quíjicoo sūchi lúlí jíin nuū rī, te ma cási rō jeē quíjicoo i. Chi ñayuu jeē ndió cóo ni i caní ni i nájnūhun sūchi yáha, suu i quiví ndaha Yaā andiví jēe ndacu ya jniñu nuū i, achí yá.

15 Te ni soó yá ndaha ya xinī i jíjnáhan i. Te ni quenda ya yūcuan cuáhān yā.

Jnūhun tēe cúcá

(Mr. 10.17-31; Lc. 18.18-30)

16 Te ñn tēe suchí ní quee de nuū Jesús, te ni cajnúhún de ya:

Tēe vāha cúu ní Maestro. Te cachi ní, ¿na jniñu vāha sáha ná te nihīn tahu na cotecu na ní cáni andiví? áchí de.

17 Te ni cahān yā jíin de:

¿Naun cáhān rō jeē tēe vāha cúu ri? Tú ni ñn tēe vāha íyó, chí máá ñn-ni Yaā Dios. Te núu cúni rō cotecu rō ní cáni, te squícu rō jniñu ní ndacu ya. Achí yá.

18 Te ni cahān de:

¿Ndé-ni jniñu cúu núu súcuan?

Te ni cahān yā:

Ma cáhni rō ndīyí. Ma cosíquí ndéé jnāhan rō. Ma sacuíhná rō. Ma sajnūhún rō.

19 Cuatáhú rō nuū tatá rō nuū naná rō. Te cundáhú ni rō jnāhan rō nájnūhun cundáhú ni rō máá rō, achí yá.

20 Te ni cahān tēe suchí un:

Tācá jniñu yáha je ni squícu ná ndé ná lulí ná. ¿Te na vé cúmanī gā sáha ná núu súcuan?

21 Te ni cahān Jesús:

Núu cúni rō squícu ndihí rō, cuáhān te xīco rō ndihí jeē névāha rō, te cuāha rō núu ñáyuu ndahú. Te nde andiví cuāha ya jeē ndetū ndasí coo rō. Yūcuán na te quiiji rō condiquīn rō ruhū quihīn yō, achí yá.

22 Te tēe suchí un, ná ni jini sōho de jnūhun yáha, te ni cucuíhyá ni de te cuahān de, chí cúcá ndasí de.

23 Yūcuán na te ni cahān Jesús jíin tēe cáscuáha jíin yá:

Jendaá cahán rī jíin rō, tēe cúcá chí yōhyo yí quívicoo de ndaha Yaā andiví jeē ndacu ya jniñu nuū de.

24 Te cáhān tucu ri jíin rō jeē yachī gā yāha ñn camello yaū yutícuí, vēsú jeē quíví ñn ñayuu cucá ndaha Yaā Dios jeē ndacu ya jniñu nuū i, achí yá.

25 Te tēe cáscuáha jíin yá, yōhyo ni canaa ni de jeē ní cajini de jnūhun yáha, te ni cacajnúhun jnāhan de:

¿Ndé ñáyuu cúu jeē cácu núu súcuan?

26 Te ni ndacoto Jesús nuū de, te ni cahān yā:

Ñayuu chí ma cúu squíví i máá i ndaha Yaā Dios, te máá yá chí ndihí-ni cuu sáha ya, achí yá.

27 Yūcuán na te ni cahān Pedro:

Sāña jíjnáhan ná ní castóo ná ndihí jeē cánevāha ná, te cándiquīn na nihín. ¿Te na vé nihín na núu súcuan? áchí de.

28 Te ni cahān Jesús jíin de:

Ruhū, Yaā ní nduu tēe, jendaá cahán rī jíin rō jíjnáhan rō jeē ñn quiví conene rī mesa ndacu ri jniñu, te yōhyo luu kujéhu ri ini ñayíví jeé. Te quiví ún te máá rō jeē ní cacondiquīn rō ruhū, suni coyūcu rō nuū uxí uū mesa ndacu rō jniñu. Te sándaā rō jniñu ndihúxí uū yucūn ñayuu Israel.

29 Te tāca ñáyuu jeē ni stóo vehe, chí ñani, chí cuāha, chí tátá, chí náná, chí ñasíhí, chí séhe, chí ñuhun, siquí jeē cóndiquīn i ruhū, te nanihīn i ñn ciento gā jeē súcuan. Te suni nihīn tahu i cotecu i ní cáni.

30 Te cuehē ñayuu jeē vijna cácuu i nuū, nduu i sandíhí. Te ñayuu jeē vijna cácuu i sandíhí, nduu i nuū. Achí yá.

Jnūhun yátá síquī tēe cáscájniñu

20

1 Te suhva cúu jeē ndácu Yaā andiví jniñu nuū ñáyuu: Cúu nájnūhun ñn tēe chíí ñuhun. Te ñn nehen ni quenda de, ndúcú de tijni mozo jeē taxín ndéhē uva de.

2 Te ni sándaā de jíin mozo un jeē chúnaa de ñn denario jeē quíví. Te ni tají de tēe un cuángoo jeē taxín uva de.

3 Yūcuán na te ni quenda tucu de nájnūhun cahñn. Te ni jito de nuū sava ga tēe cáyūcu sáá-ni de nuū yáhu.

4 Te ni cahān de jíin: Róhó jíjnáhan rō, cuángoo taxín rō uva rī, te chunaa vāha ri yāhu rō, achí de. Te tēe un cuángoo de.

5 Te ni quenda tucu de jeē cuácuu cahuxí uū jíin jeē cuácuu cahunī, te suni súcuan ni nihīn tucu de mozo.

6 Te jeē cuácuu cahuhūn ni quenda tucu de. Te ni nihīn tucu de jecu gā tēe cáyūcu sáá-ni nuū yáhu. Te ni cahān de jíin: ¿Najehē cáhīn sáá-ni rō yáha ní ndiáca? áchí de.

7 Te ni cacahān tēe ún: Siquí jeē tú ni ñn ní cána sāña jeē sájniñu ná. Te ni cahān de jíin tēe ún: Núu súcuan te suni máá rō quingoo rō taxín rō ndehē uva rī, chí chunaa vāha ri yāhu rō, achí de.

⁸ Te nuū ní ini, te tēe chíí ñuhun ni cahān de jíin tēe cújéhnū nuū mozo de: Cana xinī tēe cásájniñu te chunaa rō yāhu de, te xīhna gā tēe ni quívicoo sandihí, te sáa te tēe ni quívicoo xīhna ñúhún, áchí de.

⁹ Te ni quecoo tēe jeē ni quívicoo cahuhūn. Te ñin denario ni caquihin ñin ñin de.

¹⁰ Yūcuán na te ni quecoo tēe jeē ni quívicoo xīhna ñúhún. Te cájeni ni de jeē cuehē gā quiyāhu de. Te ñin-ni denario ni caquihin ñin ñin de.

¹¹ Te nuū ní caquihin de, te ni caquejé de cácahān sōo de siquī tēe chíí ñuhun, áchí de:

¹² Máa ná jijnáhan ná, ndiáca ni casájniñu ná, te ni candoho ná jéē jihní. Te tēe yáha jéē ni quívicoo sandihí, chí máa ñin hora-ni ni casájniñu de. Te inuú-ni ni chiyāhu ní sáña jíin de, áchí de.

¹³ Te tēe chíí ñuhun ni cahān jíin ñin de: Amigo, nasūu jéē tú vāha sáha ri jíin ró. ¿A tu ní sándaā yō jeē ñin denario quiyāhu ró, chí naún?

¹⁴ Núu súcuan te quihin yāhu ró te quinhun rō. Chí cúní rī jeē tēe ni quívicoo sandihí yáha, inuú quiyāhu de jíin máa ró.

¹⁵ ¿Te á tu cuu sáha ri ndese cúní rī jíin xúhun máa rí? ¿Te chí cúcuésún ni rō jeē ní chiyāhu vāha ri de jijnáhan de siquī jeē vāha ni rī? áchí de.

¹⁶ Te nájnūhun ni sáha tēe chíí ñuhun, suni súcuan sáha Yaā Dios. Chí ñayuu cácuu sandihí, nduu i nuū. Te ñayuu cácuu nuū, nduu i sandihí. Chí cuehē ñayuu cána ya jeē candíje i ya. Te jecu-ni i cándíje, te nácāji ya maá i jeē ndúu i sēhe ya. Achí yá.

Jeē ni cáhān tucu Jesús jeē cúu yā
(Mr. 10.32-34; Lc. 18.31-34)

¹⁷ Yūcuán na te ná ni quihin Jesús ichi cuahān yā ñuu Jerusalén, te ni cana sñn ya ndihúxí uū tēe cáscuáha jíin yá. Te ni cahān yā jíin de:

¹⁸ Cuni sōho ró, chí je cuángoo yó ñuu Jerusalén vijna, te yūcuán nastúu ñayuu ruhū, Yaā ní nduu tēe, nuū sutú cácujehnū jíin núu tēe cástéén tutu ley. Te ndonda de siquī rī jeē cúu rī.

¹⁹ Te squívi de ruhū nuū tēe nación Roma jeē cáyūcú Jerusalén cándacu jniñu. Te tāca tēe un sácata de nuū rī. Te cani de ruhū, te

sáa te cahni de ruhū jicā cruz. Te nuū uní quívi te natecu rī. Achí yá.

Jeē ni jícān naná Jacobo jíin Juan ñin favor nuū yā

(Mr. 10.35-45)

²⁰ Yūcuán na te ni quee ñasihí Zebedeo nuū yā jíin séhe ña Jacobo jíin Juan. Te ni jecuññi yití ña nuū yā, jícān ña ñin favor nuū yā.

²¹ Te ni cajnūhun yá ña:

¿Na vé cuní rō?

Te ni cahān ña:

Cuāha ní jnūhun jeē quívi ndácu ní jniñu te conēne ndindúu séhe ná yáha xiin ní, ñin i lado vāha ní, te inga i lado jecó ní, achí ña.

²² Yūcuán na te ni cahān Jesús jíin Jacobo jíin Juan:

Tu cájini rō na vé cúu jeē cájicān rō. ¿A cuu ndoho ró jnúndóho nájnūhun jeē quíji siquī rī? ¿Te á canda ró ndoho xeēn rō nájnūhun ndoho ri? Achí yá.

Te ni cacahān de:

Cuu sáha ná.

²³ Te ni cahān yā jíin de:

Jendaá jeē ndoho ró jnúndóho nájnūhun jeē quíji siquī rī, te ndoho xeēn rō nájnūhun ndoho ri. Te jeē cónēne ró lado vāha ri jíin lado jecó rí, nasūu rúhū cúu jeē cuáha jnūhun. Chí je iyó túhva cuu tāca tēe jeē ní nacāji Tátá rī, te tēe un níhín. Achí yá.

²⁴ Te uxī gā tēe cáscuáha jíin yá ní cajini de jnūhun yáha. Te ni caquítī ni de nuū uú ñani ún.

²⁵ Te Jesús ni cana ya de, te ni cahān yā jíin de:

Cájini rō ndese cásáha tēe cácujehnū nuū ñayuu tāca nación. Chí cándacu níhín de jniñu nuū i, te máa de cáchí ndese coo.

²⁶ Te máa ró jijnáhan ró, chí ma sáha ró súcuan. Chí núu ndé ñin ró cúní cujéhnū, sa suhva cuajniñu ró núu jnáhan ró.

²⁷ Te núu ndé ñin ró cúní cuu nuū, sa suhva sáha ró máa ró mozo nuū jnáhan ró.

²⁸ Chí suni súcuan sáha ruhū, Yaā ní nduu tēe, chí nasūu jéē véji ri jeē cuajniñu ñayuu nuū rī, chí sa suhva véji ri jeē cuajniñu ri nuū ñayuu. Te cuāha ri maá rí cuu rī návāha jnama ri cuehē ñayuu, achí yá.

Jeē ní nasávāha ya uū tēe cuáá
(Mr. 10.46-52; Lc. 18.35-43)

²⁹ Yūcuán na te ni quenda ya jíin de ñuu Jericó. Te cuehē ndasí ñáyuu ni candiquín i ya.

³⁰ Te yuhíchi un cáyūcu úū tēe cuáá. Te ni cajini de jnūhun jeē yáha Jesús cuahān yā, te ni cacana jee de:

Máá ní jeē cúu ní Séhe yucūn David, cundáhú ni ni sáña, áchí de.

³¹ Te ñayuu un ní cacahān i nuū de jeē na cási de yuhu de. Te víhyá gā ni cacana jee de:

Máá ní jeē cúu ní Séhe yucūn David, cundáhú ni ni sáña víi, achí de.

³² Te ni jecuiñi Jesús, te ni cana ya ndindúú tēe cuáá un, te ni cajnūhun yá de:

¿Na vé sáha ri jíin ró cáconi rō?

³³ Te ni cacahān de jíin yá:

Jeē na ndúndijin tinūu ná cáconi ná, áchí de.

³⁴ Te ni cundáhú ni yā de. Te ni tee ya ndaha ya tinūú de. Te ni candundijin-ni tinūú de. Te ni candiquín de ya cuango de jíin yá.

*Jeē ni quívi Jesús ñuu Jerusalén
(Mr. 11.1-11; Lc. 19.28-40; Jn. 12.12-19)*

21

¹ Te nuū cuácuyajni ya ñuu Jerusalén, te ni jinū yā jíin tēe cáscuáha jíin yá ñuu Betfagé, jeē íne jehē yucu Olivos. Te ni tají yá uū tēe cáscuáha jíin yá jeē quíngoo de.

² Te áchí yá jíin de:

Cuáhán ñuu lúlí íne ichi núú. Te yūcuan níhīn rō ñn burra, núhni tī jíin ñn burro lúlí. Te ndají ró tī, quiijicoo ró jíin tī nuū rī.

³ Te núu ndé ñn cahān jíin ró, te cachi rō nuū: Máá Jítóho yō jíni ñúhún yá tī, achi rō. Yūcuán na te siáá-ni i tī, quiji ró jíin tī, achí yá.

⁴ Te súcuan ni cuu tãcá jniñu yáha návāha squícu jnūhun ni cahān tēe ni nacani jnūhun Yaā Dios nde jenahán, yósó núu tútu:

⁵ Cachi rō nuū ñáyuu ñuu Jerusalén jeē naní ñuu Sión:

Yāhá condēhe ró jeē véji Rey rō.

Tu sájéhnu ya maá yá, chi maá burra-ni yósó yá,

jíin burrito, sēhe quiiti ndíso.

Achí tutu.

⁶ Yūcuán na te tēe cáscuáha un cuángoo de, te ni casáha de nájnūhun ni ndacu Jesús jniñu nuū de.

⁷ Te ndéca de burra jíin séhe tī, ni ndecoo de nuū yā. Te ni casoó de sahma de siquī tī, te ni jecosō yā tī.

⁸ Te cáhīn cuehē ñayuu, te ni cascáa i sahma i ini ichi. Te sava ga i ni cajehnde ndaha ñúú, te ni cachucun i ini ichi.

⁹ Te ñayuu cuango ichi núú jíin ñáyuu cuango ichi yátá, cácana jee i:

Yōhyo cújéhnu Yaā cúu Séhe yucūn rey David. Yōhyo vāha Yaā cúu Yaā jeē véji jíin jniñu máá Jítóho yō Yaā Dios. Te yōhyo cújéhnu máá Yaā Dios. Achí i.

¹⁰ Te nuū ni quívi ya ñuu Jerusalén, te ndihi ñayuu ñuu un ní cacuvaā i, te cuehē i cájnūhun jnāhan:

¿Ndé tēe cúu tēe yáha? áchí i.

¹¹ Te ni cacahān ñayuu vējicoo jíin yá:

Yāha cúu Jesús jeē nácani jnūhun Yaā Dios, jeē véji nde ñuu Nazaret ndañúu Galilea. Achí i.

*Jeē ní quenehen ya ñayuu ini templo
(Mr. 11.15-19; Lc. 19.45-48; Jn. 2.13-22)*

¹² Yūcuán na te ni quívi Jesús ini templo cáhnu Yaā Dios. Te ni quenehen ya tãca ñáyuu cájeen quiiti te cánaxīco núú ñáyuu jeē socō i. Te ni scotúú ndeyi ya tãca mesa tēe cástáyī xūhún, jíin silla tēe cáxīcō paloma.

¹³ Te áchí yá jíin i:

Yósó núu tútu ñi jeē cahán Yaā Dios: Vehe ri chi vehe nuū cájicān tahu cúu, áchí Yaā Dios. Te máá ró jijnāhan ró, chi nájnūhun yaū cava ñacuīhná ni canasáha ró. Achí yá.

¹⁴ Yūcuán na te sava ñayuu cuaá jíin ñáyuu chacuá ni quecoo i nuū yā ini templo un. Te ni nasávāha ya i.

¹⁵ Te sutū cácujeñnu jíin tēe cástéén tutu ley Yaā Dios, ni cajito de tãcá jniñu jéñnu sáha ya, te ni cajini de jeē cácana jee sūchi lúlí ini templo: Yōhyo cújéhnu Yaā cúu Séhe yucūn rey David, achí i. Te ni caquiiti ni de.

¹⁶ Te ni cacahān de jíin yá:

¿A tu jíni ró jéē súcuan cácahān sūchi yáha? áchí de.

Te ni cahān Jesús jíin de:

Jíni ri. ¿Te á ná tu cahu ró jéē yosó núu tútu ñi jeē suhva cáhán ñn tēe jíin Yaā Dios? Sáha ní jéē tãca súchi lúlí jíin súchi cájexin,

vāha ndasí cáhán i jeē Yaā cujéhnú cúu Cristo.

Achí.

¹⁷ Te ni stóo ya de. Te ni quenda ya ñuu Jerusalén, cuahān yā nde ñuu Betania. Te yūcuan ní ndōo ya jecuāā ún.

Jeē ni cáhān yā nuū yújnu higo
(Mr. 11.12-14, 20-26)

¹⁸ Te jenéhen inga quívi cuanuhun yā ñuu Jerusalén, te jíi yā sōco.

¹⁹ Te ni jito ya ñn nundēhe higo, ín yuhíchi. Te ni jehēn yā jehē. Te tú na ndehē ni níhín yā, chí máá ndaha-ni ín. Te ni cahān yā jíin:

Vijna te ma cúun cuíti gā ndehē xinī rō, achí yá.

Te ni ichī-ni yujnu higo ún.

²⁰ Te tēe cáscuáha jíin yá, ni canaa ni de cájito de. Te ni cacajñūhún de ya:

¿Ndese ni sáha ní jēe yachí-ni ni ichī yujnu higo? achí de.

²¹ Te ni cahān yā jíin de:

Jendaá cahán rī jíin ró, núu candíje ró te tú caní síquī ní rō, te cuu sáha ró jniñu jéhnú nájñūhun ni sáha ri jíin yujnu higo. Te nde jniñu jéhnú ga cuu sáha ró, chí nde cuu cahān rō jeē cújiyo yucu yáha, quihín nuū mar, te sáha nájñūhun cahān rō.

²² Te tāca jēe cacán tahu rō jijnáhan ró, te núu candíje ró jēe nihín rō, te nihín rō. Achí yá.

Síquī jeē ndíso jniñu Jesús
(Mr. 11.27-33; Lc. 20.1-8)

²³ Te ni quívi tucu ya ini templo cáhnu. Te níni stéén yā jñūhun, te sutū cácujehnú jíin táca tēe jéhnú jeē cándacu jniñu nuū ñáyuu hebreo, ni quecoo de nuū yā. Te ni cacajñūhún de ya:

¿Ndé ní nihín jniñu ró jēe sáha ró jniñu yáha? ¿Te ndé ñn ni tee jniñu síquī rō jeē sáha ró súcuan? Achí de.

²⁴ Te ni cahān Jesús:

Suni ruhū, cajñūhun rí rohó ñn jñūhun jijnáhan ró, te núu cuu stío cuíñí rō, yūcuán na te cachi rī nuū rō ndé ní nihín jniñu ri jeē sáha ri jniñu yáha.

²⁵ ¿Ndé ñn ni tee jniñu síquī Juan jeē ni scuándute de? ¿A Yaā Dios chí táca tēe? achí yá jíin de.

Yūcuán na te ni candajñūhun máá de:

Núu cahān yō jeē Yaā Dios ni tee ya jniñu un síquī Juan, te cahān de jíin yó: Núu súcuan ¿te najehē tu ní cácandíje ró de?

²⁶ Te núu cahān yō jeē ñáyuu ni catee jniñu un síquī de, te cáyūhu yó ñáyuu, chí ndívi i cácandíje i jeē tēe ni nacani jñūhun Yaā Dios ni cuu ndíje Juan. Achí de cácahān maá de.

²⁷ Te ni cacahān de jíin Jesús:

Tu cájini rī, achí de.

Yūcuán na te ni cahān yā jíin de:

Ni ruhū, suni ma cáchi rī nuū rō ndé ñn ni tee jniñu síquī rī sáha ri jniñu yáha, achí yá.

Jñūhun yátá síquī uú sēhe yí

²⁸ Te ni cahān gā yā jíin de:

Cuni nahín ró jñūhun yátá yáha: ñn tēe ni iyo uú sēhe yí de. Te ni cahān de jíin ñn i: Séhē, quihín rō taxín ró ndehē uva rī vijna, achí de.

²⁹ Te ni cahān i: Ma quihín na, achí i. Te ni cunúu, te ni nacani ni i, te cuahān i nuū jniñu ún.

³⁰ Te tēe un ní jehēn de nuū inga sēhe de, te suni súcuan ni cahān de jíin i. Te ni cahān i: Cuu núu súcuan, te quihín na, achí i. Te tu ní jéhén i.

³¹ ¿Te ndese cájeni ni rō? Jeē ndíndúú i, ¿ndé ñn i ni síquī jniñu cúní tatá i? achí yá.

Te ni cacahān de:

Sūchi jēe ni cáhān de jíin xíhna gā, achí de.

Te ni cahān Jesús jíin de:

Súcuan cúu, te jendaá cahán rī jíin ró jeē tēe cástútú xúhun renta jíin ñahan cájica jnéni, yachí cánacani ni i jeē stóo i cuēchi i te quívicoo i ndaha Yaā Dios jeē ndacu ya jniñu nuū i, te máá ró jijnáhan ró chí ma quívi ró.

³² Chí ni quiji Juan, ni steén de ndese condiquín rō jñūhun ndaā, te tu ní cácandíje ró jñūhun ni cahān de. Te sa suhva tēe cástútú xúhun renta jíin ñahan cájica jnéni, ni cacandíje i jñūhun ni cahān de. Te máá ró, vésú ni cajito ró jēe ní cacandíje i, te tu ní cánacani cuíti ni rō jeē candíje ró. Achí yá.

Jñūhun yátá síquī tēe née cásjniñu nuū uva

(Mr. 12.1-12; Lc. 20.9-19)

³³ Cuni sōho inga jñūhun yátá jijnáhan ró: Ni iyo ñn tēe chí ñūhun. Te ni nachuhun de

cuehē ndehē uva. Te ni jesi de corral, te ni sáha de ñn nuū cúhun ndehē un táxīn. Te ni jeni de ñn vehe súcún návāha cuu coto de ñí cáhnu.

Te ni stóo de nuū sava tēe sájniñu nuū, te cuu sava de ndehē jíin. Te ni tee de ichi cuahān jicá de.

³⁴ Te máá tiempo ndutútú uva, te ni tají de jecu mozo cuanuquihin sava uva nuū tēe cásájniñu ún.

³⁵ Te tēe un ní cajniñi de mozo un. Te ñn i ni cacani de, te inga i ni cajehni de, te inga i ni cajēhe de yuū xinī.

³⁶ Te tēe chíi uva ni tají tucu de jecu gā mozo cuango, cuehē gā vēsú jeē xíhna ñúhún. Te suni súcuan ni casáha tēe un jíin ndihí mozo un.

³⁷ Te jeē sándihí na te ni tají de sēhe de cuahān. Te jéni ni de: Tēe ún chí cuatáhú de jíjnáhan de nuū séhe ri.

³⁸ Te tēe cásájniñu ún, núu ní cajito de nuū séhe tēe chíi uva, te ni cacahān maá: Tēe chíi táhū cúu jeē yáha. Na cáhni yō de, te ndōo tahū de cuu yó, áchí.

³⁹ Te ni cajniñi de i, te ni caquenehen de i inga lado, te ni cajehni de i. Achí yá.

⁴⁰ Yūcuán na te ni cajnūhun yá de:

Núu súcuan te núu na quíji tēe chíi uva un, ¿te ndese sáha de jíin tēe cásájniñu ún? áchí yá.

⁴¹ Te ni cacahān de jíin yá:

Ma cundáhú cuiti ni de tāca tēe cásáha jniñu néé un, chí cahni de. Te cuāha de ñuhun cáa uva un núu inga sava tēe sájniñu nuū, cuu sava de ndehē jíin. Te quivī ndutútú ndehē, te tēe ún nacuāha de sava ndehē nuū tēe chíi uva. Achí de.

⁴² Te ni cahān Jesús jíin de:

¿Te á ná tu cahu ró jnūhun yáha jeē yosó núu tútu iī, jeē ruhū cúu nájñūhun ñn yuū? Chí áchí tutu:

Yuū jeē ní casquéhichī tēe cájeni vehe,

yuū yáha nduu jeē quítuu vehe.

Máá Jítoho yō Yaā Dios ni sáha ya súcuan,

te cánaa ni yō jíto yó jniñu yáha.

Achí tutu.

⁴³ Núu súcuan te cáhán rī jíin ró jeē cujiyo-ni jeē ndácu Yaā Dios jniñu nuū rō jíjnáhan ró, te nacuāha ya jniñu un núu inga ñayuu jeē squícu váha i jniñu ndácu ya nájñūhun cúní yā.

⁴⁴ Te ñayuu tu cándíje, ndoho i nájñūhun ndóho ñayuu jeē cotúú siquī yuū te jnánú i. Te quivī sándā Yaā Dios cuēchi, te ñayuu tu cándíje, ndoho i nájñūhun ndóho ñayuu jeē nánga yuū siquī i te cundihī i sáha. Achí yá.

⁴⁵ Te sutū cájjeñu jíin tēe grupo fariseo ni cajini sōho de tāca jnūhun yátá ní cahān yā. Te ni cajecūhun ni de jeē siquī maá de cúu jnūhun yátá ní cahān yā siquī tēe cásájniñu nuū uva jíin tēe cájeni vehe.

⁴⁶ Te ni canducú de modo jniñi de ya. Te cáyūhú de jeē quiti ni ñayuu, chí cájeni ni i jeē tēe nácani jnūhun Yaā Dios cúu ya.

Jnūhun yátá síquī vico nándāha

22

¹ Yūcuán na te ni cahān tucu Jesús inga jnūhun yátá jíin de jíjnáhan de:

² Súcuan cúu jeē ndácu Yaā andiví jniñu nuū ñayuu: Cúu nájñūhun ñn rey jeē sáha de ñn vico jeē nándāha sēhe yí de.

³ Te ni tají de tāca mozo de cuacana ñayuu jeē ni cáhán de jíin jéé quíjicoo. Te ñayuu ún tu ní cájuni i quíjicoo i.

⁴ Te ni tají tucu de jecu gā mozo quingoo, te áchí de jíin: Cahān jíin ñayuu ní cana ri un jéé iyó túhva ndeyu. Chí je ni jehni rī stiquī rī jíin táca gá quiti ní nduu, te ndihí je iyó túhva. Nehen jíjnáhan ró vico nándāha. Achí rō jíin i. Achí de.

⁵ Te ñayuu ní cana de ún tu ní cásáha i cuenta. Chí ñn i cuahān nuū itu i, te inga i cuahān nuū jniñu sáha i.

⁶ Te sava ga i ni cajniñi i tāca mozo rey, te ni casátā i nuū, te ni cajehni i.

⁷ Yūcuán na te yōhyo ni quiti ni rey. Te ni tají de soldado de ni jengoo, ni cajehni de ñayuu ní cajehni ndīyi ún, te ni cajehmu de ñuu i.

⁸ Yūcuán na te ni cahān de jíin sava ga mozo de: Ndihi je iyó túhva jeē cóo vico nándāha. Te ñayuu ní cana ri ún, tu iyó váha jeē quíjicoo i chí nasūu ñayuu váha cájuu i.

⁹ Núu súcuan te cuahán jíjnáhan ró táca núu náquijnáhan calle. Te cana ró núu nasaa ñayuu nihīn rō, na quíjicoo i vico nándāha. Achí de.

¹⁰ Te ni quendacoo mozo un cuángoo tācá ichi. Te ni castútú de ndihí ñayuu ní canihīn

de, cúu ñayuu cunéé, cúu ñayuu váha. Te súcuan te ni chitú ñáyuu ini vehe nuū iyó vico nándāha.

¹¹ Te ni quiví rey ini vehe jeē cahán de jíin ñáyuu ni cutútú. Te ni jito de nuū ñn tēe jeē tu ñúhun sahma jeē ni jéhe de cuhun ñayuu quijicoo vico nándāha.

¹² Te ni cahán de jíin tēe ún: Amigo, ¿ndese ni quiví ró yáha jéē tu ñúhun ró sahma vico nándāha? áchí de. Te máá tēe ún tu ní cáhán cuiiti de.

¹³ Yūcuán na te ni cahán rey jíin tēe cájeni cohō: Jñi de te cuhni rō ndaha de jehē de, te quenehen ró de na quihín de nuū quéhe nuū néē. Te yūcuán ndáhyū de te nacayihí yuhu de jeē ndóho xeēn de. Achí rey.

¹⁴ Chi cána Yaā Dios cuehē ñayuu jeē na cándije i. Te jecu-ni i candíje, te máá i nácāji ya jeē ndúu i sēhe ya. Achí Jesús.

Siquí xúhun renta

(Mr. 12.13-17; Lc. 20.20-26)

¹⁵ Yūcuán na te cuango tēe grupo fariseo. Te ni candajnūhún de núu ndese sáha de návāha cahán yā ñn jnūhun jeē nihín de cuēchi siquí yā.

¹⁶ Te ni catají de jecu tēe cáscuáha jíin máá de jíin tēe grupo Herodes cuango de. Te ni cacahán de jíin yá:

Maestro, cájini na jéē tēe cáhán ndaā cúu ní, te stéén ndaā ní ndese squícu ñayuu nuū Yaā Dios. Te tu yúhú ní jeē cahán ni ñn ñayuu siquí ní, chí tu sáha ní cuenta ndese cúu ñn ñn i, chí ñnuú-ni sáha ní jíin i.

¹⁷ Núu súcuan te cahán ní ndese jéni ni ní: ¿A iyó váha jeē chúnaa yō renta nuū rey nación Roma jeē jñi nación yō, chí tuú? áchí de.

¹⁸ Te ni jini Jesús jeē cájito ndee de ya. Te ni cahán yā jíin de:

Tēe stáhú-ni cácuu ró. ¿Najehē cájito ndee rō ruhū?

¹⁹ Stéén xūhun jéē jéconaā renta na cóto ri, achí yá.

Te ni castéén de ñn denario nuū yā.

²⁰ Te ni jito ya, te ni cajnūhun yá de:

¿Nde ñn nuū cúu jeē ndeé nuū xúhun yáha, te ndé síhví cúu jeē ndeé yāhá?

²¹ Te ni cacahán de jíin yá:

Nuū jíin síhví rey un cúu, áchí de.

Yūcuán na te ni cahán yā jíin de:

Núu súcuan te nacuāha ró núu rey un jéē yíhi cuenta nuū de, te nacuāha ró núu Yaā Dios táca jéē yíhi cuenta nuū maá yá, achí yá.

²² Te nuū ní cajini de jeē ndichí ní cahán yā jnūhun yáha, te ni canaa ni de, te ni castóo de ya, te cuango de.

Jeē ní cacajnūhún de siquí jeē nátecu ndíyi

(Mr. 12.18-27; Lc. 20.27-40)

²³ Te suni quiví un ní quecoo jecu tēe grupo saduceo nuū yā. Te tēe un cácahán jeē tu nátecu cuiiti ndíyi. Te ni cacahán de jíin yá siquí ñn jnūhun, áchí de:

²⁴ Maestro, Moisés ni cahán de jeē núu ñn tēe cuu de, te ndōo ñasihí de, te núu tú sēhe de ní iyó jíin ña, núu súcuan te cánuú jeē ñani de naquihin ñasihí de, te sēhe de jeē cácu jíin ña nucuiñi nuū ndíyi ñani de. Achí Moisés.

²⁵ Te ñuu na ní iyó uxā ñani. Te tēe núu ní quijnáhan de jíin ñahan. Te ni jihí de. Te jeē tú sēhe de ní iyó, te ni ndōo ñasihí de nuū ñani de.

²⁶ Te tēe ún suni ni jihí de, te tú na sēhe de ní iyó tucu. Te suni súcuan tēe uní, nde jíin ndihúxá de.

²⁷ Te nuū ní ndíhi de ni cajihí, te suni ni jihí ñahan ún.

²⁸ Núu súcuan te quiví nátecu ndíyi, ¿ndé ñn de cuu ña ñasihí de? Chi ndihúxá de ni condeca de ña. Achí de jíin yá.

²⁹ Yūcuán na te ni cahán yā jíin de:

Yōhyo cástíví ró jnūhun siquí jeē tu cájecūhun ni rō jeē cahán tutu ñi, ni tu cájini rō jeē iyó poder Yaā Dios jeē nastécu yā ndíyi.

³⁰ Chi quiví nátecu ndíyi, te tuá na jnūhun quijnáhan tēe jíin ñahan coo. Chi coo i nájnūhun ndajéhé Yaā Dios andíví.

³¹ Te siquí jeē nátecu ndíyi, ¿á tu ní cácahu ró tutu jnūhun jeē cahán Yaā Dios jíin ró?

³² Máá rí cúu Yaā Dios Abraham jíin Isaac jíin Jacob, achí Yaā Dios. Chi vésú je ni cajihí de, te cátecu de nuū iyó máá yá, chí cúu ya Yaā sáha jeē técu ñayuu ní cáni. Achí yá jíin de.

³³ Te ñayuu un ní canaa ni i cájini nahín i jnūhun stéén yā.

Jniñu cánuú ndasí gá jeē ní ndacu Yaā Dios

(Mr. 12.28-34)

³⁴ Yūcuán na te tē grupo fariseo ni cajini de jeē ní cajesi tē saduceo yuhu de ni sáha ya. Te ni candutútú de nuū yā.

³⁵ Te ñn de jeē cúu tē stéén tutu ley Yaā Dios, ni cajnūhún de ya, chi coto ndee de ya cuní de:

³⁶ Maestro, ¿ndé ñn cúu jnūhun ndácu jniñu cánuú ndasí gá nuū tútu ley? achí de.

³⁷ Te ni cahān Jesús jíin de:

Coo manī ndasí ró jíin máá Jítóho rō Yaā Dios, nde jnāā ndasí ró sáha ró ndihi jeē cúsi ni yā, nde jíin ini jíin ánuá rō, jíin ní jēé níjnūnī rō, achí tutu.

³⁸ Yāha cúu jniñu ndácu ya jeē kujénu ga te cánuú ndasí gá.

³⁹ Te jniñu uū jeē ní ndacu ya, suni súcuan cáhān: Cundáhú ni rō jnáhan ró nájñūhun cundáhú ni rō maá ró.

⁴⁰ Te chíji ndindúú jnúhun yáha ní quenda ndihi ley jeē ní tee Moisés, jíin ndihi jeē ní castéén tē ni canacani jnūhun Yaā Dios, achí yá.

*Siquē jeē cúu Cristo sēhe yucūn David
(Mr. 12.35-37; Lc. 20.41-44)*

⁴¹ Te níni cáyūcu tútú gá tē fariseo un, te Jesús ni cajñūhun yá de:

⁴² ¿Ndese cájeni ni rō siquē Cristo? ¿Sēhe ndé yúcūn cúu ya?

Te ni cacahān de:

Sēhe yucūn David, achí de.

⁴³ Te ni cahān yā jíin de:

Núu súcuan ¿te ndese cúu jeē David ni cahān de Jítóho de ya, ni sáha Espíritu Santo nde jenhán? Chi ni cahān de:

⁴⁴ Máá Jítóho yō Yaā Dios ni cahān yā jíin Jítóho rī, Yaā quiji:

Cucōo ró lado váha ri nuū kujénu ró, te na sáha ri jeē quende rō poder tāca jéé cájito uhū rohó.

Achí Yaā Dios. Achí David.

⁴⁵ Te núu sēhe yucūn David cúu Cristo, ¿te ndese cúu jeē ni cahān de jeē Jítóho de cúu ya? achí yá.

⁴⁶ Te ni ñn de tu ní cúu stió cuñí cuiti de jnūhun nuū yā. Te nde quiví ún tuá ni ñn de ní chūndeyí ni de cajñūhún de ya.

*Jeē ni cahān yā jeē iyó cuéchi de jíjnáhan de
(Mr. 12.38-40; Lc. 11.37-54; 20.45-47)*

23

¹ Yūcuán na te ni cahān Jesús jíin ñáyuu jíin tēe cáscuáha jíin yá:

² Tēe cástéén tutu ley Yaā Dios jíin tēe grupo fariseo, cájeni ni de jeē ndiso jniñu de jeē steén de ley jeē ni jéhe ya nuū Moisés.

³ Núu súcuan te cuatáhú ró te squícu ró táca jéé cándacu de nuū rō. Te ma sáha ró nájñūhun cásaaha máa de. Chi cácahān-ni de, te tu cásquícu de.

⁴ Chi suni cástéén de tāca ley ni catava maá de jeē yí sáha, te cátee de siquē ñáyuu, te tu cákundeyí i squícu i. Te máa de jíjnáhan de, chi ni ñn xinī ndáha de tu cáscánda de jeē squícu de.

⁵ Te máni siquē jeē na cuájñūhún ñáyuu de cúu ndihi jeē casáha de. Chi cánujnahan ni de cuhni de cuehē jnūhun tutu i jneē de jíin ndaha de. Te suni cáscáni ga de yuhvā yusáhma de jeē steén jeē cákujénu ga de vēsú inga ñayuu.

⁶ Te cánujnahan ni de cucōo de nuū silla yíñūhún gá nuū cáyeji ñayuu vico, jíin silla yíñūhún gá ini vehe i sinagoga.

⁷ Te suni cánujnahan ni de jeē cahán yíñūhún ñáyuu jíin de nuū calle, jíin jéé cahán i maestro jíin de.

⁸ Te máa ró jíjnáhan ró, ma cuáha ró jnúhun jeē cahán ñayuu maestro jíin ró. Chi inuú cácuu ndihi ró jéé cácuu ró hermano, te iyó ñn-ni Maestro rō jeē cúu ruhū, Cristo.

⁹ Te ma chíñūhún ró ni ñn tēe ñayiví yáha jeē cahán rō padre jíin de. Chi iyó ñn-ni Tátá rō jíjnáhan ró, Yaā ndeé andiví.

¹⁰ Te suni ma cuáha ró jnúhun jeē cahán i jítóho jíin ró. Chi iyó ñn-ni Jítóho rō, te suu cúu ruhū, Cristo.

¹¹ Te tēe mēhñu ró jíjnáhan ró jeē jejniñu nuū jnáhan, suu de cúu jeē kujénu ga.

¹² Chi tēe jeē sajeñu de máa de, sa ndululí de. Te tēe jeē sálulí de máa de, sa ndujénu de.

¹³ Nacā xeēn ndoho róhó tēe cástéén tutu ley jíin róhó tēe fariseo, chi tēe stáhú-ni cácuu ró. Chi cájesi rō jeē quiví ñayuu ndaha Yaā andiví jéé ndacu ya jniñu nuū i. Chi tu quivícoo máa ró, ni tu cájēhe ro jnúhun quivícoo ñayuu nducú quiví.

¹⁴ Nacā xeēn ndoho róhó tēe cástéén tutu ley jíin róhó tēe fariseo, chi tēe stáhú-ni

cácuu ró. Chi cáquende rō vehe ñahan ní caquendōo ndáhú. Yūcuán na te cájicān tahu nahán ró návāha cani ni ñayuu jeē tú na cuēchi ró. Jeē yúcuān xeēn gā ndoho ró castigo.

¹⁵ 'Nacā xeēn ndoho rōhó tēe cástéén tutu ley jín rōhó tēe fariseo, chi tēe stáhú-ni cácuu ró. Chi ní ñuhun íchi jín ní mar cájica cuu ró cánducú ró ñn ñayuu scandíje ró sáhān maá ró. Te núu ni candíje i, te cásáha ró jēe vihyá gā cúu cuēchi i jeē quihín i infierno vēsú maá ró.

¹⁶ 'Nacā xeēn ndoho ró, chi cácuu ró nájnūhun tēe cuáá jēe steén ichi nuū ñayuu. Chi cácahān rō: Núu ndé tēe jéjnūhun téyí de, te núu cahān de jeē Yaā Dios jeē ndeé ini templo na cuáha ya castigo núu ma squícu de, yūcuán na te tu cánuú squícu de. Te núu cahān de jeē Yaā Dios jeē chíi oro jeē iyó ini templo, na cuáha ya castigo núu ma squícu de, yūcuán na te cánuú squícu nahín de, cácahān rō.

¹⁷ Tēe cánéé tēe cuáá cácuu ró jēe castívi ró jnūhun cácahān rō. ¿Ndé ñn cúu jeē cujéhnū ga, á oro un chí Yaā Dios jeē ndeé ini templo jeē sáhií oro un?

¹⁸ Te suni cácahān rō: Núu ndé tēe jéjnūhun téyí de, te núu cahān de jeē Yaā Dios jeē chíi altar na cuáha ya castigo núu ma squícu de, yūcuán na te tu cánuú squícu de. Te núu cahān de jeē Yaā Dios jeē chíi ndajníñu jeē cásocō nuū altar, na cuáha ya castigo núu ma squícu de, yūcuán na te cánuú squícu nahín de, cácahān rō.

¹⁹ Tēe cánéé tēe cuáá cácuu ró jēe castívi ró jnūhun cácahān rō. ¿Ndé ñn cúu jeē cujéhnū ga, á ndajníñu yúcu nuū altar, chí Yaā Dios jeē sáhií yā ndajníñu ún?

²⁰ Núu súcuan te tēe jéjnūhun téyí, te núu ndácunehen de Yaā Dios jeē chíi altar, núu súcuan te nde jín ndajníñu yúcu nuū altar ndácunehen de.

²¹ Te tēe jeē jéjnūhun téyí, te núu ndácunehen de templo, núu súcuan te nde jín Yaā Dios jeē ndeé ini templo ndácunehen de.

²² Te tēe jéjnūhun téyí, te núu ndácunehen de andívi, núu súcuan te suni ndácunehen de mesa Yaā Dios te nde jín máá Yaā Dios jeē ndeé nuū mesa un.

²³ 'Nacā xeēn ndoho rōhó tēe cástéén tutu ley jín rōhó tēe fariseo, chi tēe stáhú-ni

cácuu ró. Chi cásáha ró úxī uxī nuhnī tamínú jín yucū anís jín yucū comino, te cásocō rō ñn ñn siquī tāca úxī un núu Yaā Dios. Te cástóo ró jnūhun cánuú ndasí gá nuū ley, suu jeē cáca ndaā rō, jín jēe cundáhú ni rō jnáhan ró, jín jēe candíje ró. Tāca jēe yáha cánuú sáha ró núu, te suni ma stóo ró jēe socó rō tāca yúcū ún.

²⁴ Cácuu ró nájnūhun tēe cuáá jēe steén ichi nuū ñayuu. Chi cásquícu ró ñn jeē lulí gá un, te cástóo ró jēe cánuú gá. Te suu cúu nájnūhun jeē cātava rō chūcún ndíhī jeē ñūhun nuū ndúxi, te cácocó ró ñn quití cáhnu jeē naní camello.

²⁵ 'Nacā xeēn ndoho rōhó tēe cástéén tutu ley jín rōhó tēe fariseo, chi tēe stáhú-ni cácuu ró. Chi nájnūhun jeē cánacate ró yátā vaso jín yátā cohó. Te ichi ini rō chí ñūhun máni máá jnūhun cuíhná jín jnūhun ndíyo ni.

²⁶ Tēe cuáá cácuu ró, fariseo. Xíhna gā sáha ró jēe coo ndoo ini anuá rō, te yūcuán na te suni coo ndoo tāca jēe casáha ró jēe cájito ñayuu nuū.

²⁷ 'Nacā xeēn ndoho rōhó tēe cástéén tutu ley jín rōhó tēe fariseo, chi tēe stáhú-ni cácuu ró. Chi cándāa ró nájnūhun vehe ndíyí nuū panteón jeē cáyaa. Chi ichi yátá jító luu, te ichi ini ñūhun chítú yíqui ndíyí jín táca jēe tehyú.

²⁸ Te súcuan cácuu máá ró, chí ichi yátá rō casáha ró jeē tēe ndaā cácuu ró núu ñayuu. Te ichi ini rō ñūhun chítú jnūhun stáhú-ni jín jnūhun néé.

²⁹ 'Nacā xeēn ndoho rōhó tēe cástéén tutu ley jín rōhó tēe fariseo, chí tēe stáhú-ni cácuu ró. Chi cásáha ró vehe siquī nuū yíndūji ndíyí jíi rō, tēe ni canacani jnūhun Yaā Dios nde jenahán. Te cásáha luu ró vehe siquī nuū yíndūji tāca tēe ni íyo ndaā.

³⁰ Te cácahān rō: Núu jeē suni yúcu yó tiempo jeē ní cotecu ndíyí jíi yō, te ma squívi nduu yō jín de jeē cáhni yō tēe ni canacani jnūhun Yaā Dios, achí ró.

³¹ Te súcuan cácahān ndaā rō jeē maá ró cácuu yucūn ñayuu ni cajehni tēe ni canacani jnūhun ya.

³² Núu súcuan te tāca cuéchi jeē ní casqujéé ndíyí jíi rō, máni un cásáha ga maá ró.

33 'Va sēhe coō cácuu ró, chi xeēn rō nájñuhun coō. ¿Nde se cācu ró jēē ma jñahnú ndetū rō quingoo ró infierno?

34 Núu súcuan te tají rí tāca tēe nacani jñuhun Yaā Dios nuū rō, jíin táca tēe ndíchi jēē castéén jñuhun ya. Te sava de cahni rō, te sava de cata caa ró jicā cruz. Te sava ga de cani ró de ini tācá vehe iī sinagoga, te scúnu ró de quingoo de tācá ñuu.

35 Te súcuan te condee cuēchi siquī maá ró jeē ní cajehni jíi rō tāca tēe ndaā, xihna gā nde Abel tēe ndaā, te nde Zacarías sēhe Berequías, tēe ni cajehni de ini templo sava mēhñu cuarto iī jíin altar.

36 Jendaá cahán rī jíin ró jeē tāca cuēchi yáha condee siquī ñayuu iyó vijna.

*Jeē cucuíhyá ni yā jíto ya ñuu Jerusalén
(Lc. 13.34-35)*

37 'Róhó ñuu Jerusalén, jéhni rō tēe cánacani jñuhun Yaā Dios, te jéhe ro yúu xinī tēe táji Yaā Dios vējicoo nuū rō. Te cuehē jínu ni cuni rī nastútú rí sēhe ró, nájñuhun ndují jēē nastútú tí sēhe tí chíji ndijēn tī, te tu ní cúní rō.

38 Núu súcuan te vijna te stóo uun na ri rohó jíin séhe ró.

39 Chi cáhán rī jíin ró jēē ndé vijna te ma cóto cuiti gā rō nuū rī, chi nde quiji quiví jeē cahán sēhe ró: Yōhyo vāha Yaā cúu Yaā véndiji jíin jñiñu maá Jítoho yō Yaā Dios, achi í. Achi yá.

*Jeē ní cachi yā jeē náā templo
(Mr. 13.1-2; Lc. 21.5-6)*

24

1 Te ni quenda Jesús ini templo cáhnu cuahán yā. Te ni quecoo tēe cáscuáha jíin yá, te ni cacahán de jíin yá siquī tācá vehe jeē ndejnáhan jeē cúu maá templo un.

2 Te ni cahán yā jíin de:

Tāca jēē cájito ró yáha, jendaá cahán rī jíin ró jeē quiji quiví jeē ma cóso jñáhan ga ni ññ yuū, chi ndíhi jñanū. Achi yá.

*Na seña coo nuū cuácuyajni ndíhi ñayiví
(Mr. 13.3-23; Lc. 21.7-24; 17.22-24)*

3 Te ni jehēn yā jíin tēe cáscuáha jíin yá nde yucu Olivos, te ni cucōo ya yūcuán. Te ni quecoo de nuū yā, te ni cacajñuhun sñn de ya:

Castūhun ní ndé quiví coo tāca jēē ní cachi ní jēē coo. ¿Te na seña coo núu ni cuyajni quiví ndíji ní jíin jēē jínu ñayiví? áchí de.

4 Te ni cahán Jesús:

Coto ró jēē ma stahú ni ññ de róhó.

5 Chi quijicoo cuehē tēe jeē stahú jíin síhví rí. Máá rí cúu Cristo, achi de. Te súcuan stahú de cuehē ñayuu.

6 Te nihīn rō jñuhun jeē tāca lado iyó guerra, chí je yajni coo guerra. Te ma yūhu ró, chí cánuú coo súcuan. Te ni ná tu jinū quiví ndíhi ñayiví.

7 Chi ndonda nación siquī inga nación, te ndonda ñuu siquī inga ñuu jeē cuajnáhan. Te coo jnamā jíin cuéhyi xeēn. Te cháha chúcuan jñāa.

8 Te tāca jēē yáha cácuu jñundóho quejéé xihna ññhún gá.

9 'Yūcuán na te nastúu i róhó jíin náhan ró jēē stóho i róhó te cahni i róhó. Te ndíhi ñayuu quití ni i nuū rō jeē siquí ruhū.

10 Te quiví ún chi cuehē ñayuu candíje caca yátá i, te quití ni i nuū jñáhan i, te nastúu jñáhan i.

11 Te canecoo cuehē tēe stahú, te cahán de jeē jñuhun Yaā Dios cánacani de, te stahú de cuehē ñayuu.

12 Te nducuehē jñiñu néé, te jeē yúcuán cuehē i ma cóo manī gā i.

13 Te ñayuu cuiñi nihin jíin jñuhun ri nde quiví jínu, ñayuu ún chí cācu.

14 Te jñuhun yáha síquī ndese ndácu Yaā Dios jñiñu, cuitē núu ní cáhnu ñayiví, návāha cuni ñayuu tācá nación. Yūcuán na te jínu ñayiví.

15 'Te Daniel, tēe ni nacani jñuhun Yaā Dios, ni tee de jñuhun ññ tēe néé jēē quíji. Te róhó jēē cácahu tutu ún, na jécūhun ní rō. Chi ññ quiví te cuni rō jeē sáha ndevāha de jeē stíví de tācá ndajníñu iī ini templo, te cuiñi de ini lugar iī.

16 Te núu cuni rō jeē súcuan cúu, te ñayuu cáyūcú región Judea, na cúnu i caa i yucu quingoo i.

17 Te ñayuu cáyūcu núu quéhe, ma ndíví i ini vehe jeē quénehen i ndajníñu i, chí cánuú cunu yachí i návāha cācu i.

18 Te ñayuu cáhīn nuū ítu, ma ndíji i vehe jeē quíhin i sahma i.

19 Te quivī ún nacā jeē ndahú ñahan cáñuhun sēhe jíin ñahan cándeca yiquín, chi ma cúnihin ña cunu yachī ña.

20 Te cacān tahu rō jeē ma quíji jnūndóho un jēē cunu ró máá tiempo cúun yuhvā ni quivī ndétātú.

21 Chi jeē quejéē un te coo cuehē jnūndóho xeēn, jeē ná tu coo súcuan nde quivī ní jecōo ñayiví te nde vijna. Te jeē ndíhi jnūndóho ún te ni ma cóo ga jeē súcuan.

22 Te núu tú nastíyi Yaā Dios tiempo jnūndóho ún, te ni ñin ñayuu ma cácu cuiti i. Te jeē siquí ñayuu cá candíje jeē ní nacāji ya, jeē yúcuan nastíyi ya tiempo un.

23 'Núu súcuan te núu ñin ñayuu cahān jíin ró: Yāhá condēhe ró íne Cristo, chí: Yūcuán condēhe ró íne ya, achi i, te ma candíje ró jēē cahān i.

24 Chi canecoo tēe cástáhú jēē achi de jeē Cristo cúu de, chí achi de jeē téē nácani jnūhun Yaā Dios cúu de. Te sáha de jniñu jéhu jeē naa ni ñayuu coto i, návāha stáhú de nde maá ñayuu ní nacāji ya, te núu na cúu.

25 Je ni castūhun rí nuū rō vijna nde ná tu coo.

26 Núu súcuan te núu cahān ñayuu jíin ró: Cuácondēhe ró, chi nde nuū ñūhun téhé íne ya, achi i, te ma quihín rō condēhe ró. Chí núu cahān i: Nehen condēhe ró, chí ini vehe yāha íne ya, achi i, te ma candíje ró jíjnáhan ró.

27 Chi nájnūhun jeē ndíndēe sáha taja te cúndijin nde ichi núu cáne niāndii jíin ndé ichi núu quée niāndii, suni súcuan coo quivī ndiji ruhū, Yaā ní nduu tēe, chi ndíhi ñayuu coto.

28 Te nájnūhun jeē cutútú téji ndé-ni cúu nuū catú quiti ní jíhī, suni súcuan coo tāca jēē ni cáhān rī ndé-ni cúu-ni nuū cáhīyo ñayuu.

Ndese coo quivī ndiji Yaā ní nduu tēe

(Mr. 13.24-37; Lc. 21.25-33; 17.26-30, 34-36)

29 Yūcuán na te núu ni ndíhi tāca jnūndóho quivī ún, te cojnúú niāndii, te yoō ma ndíi gā. Te ñingoo quimi andiví. Te tāca jēē íin andiví chí quisi i.

30 Yūcuán na te coto ñayuu nuū maá rí, Yaā ní nduu tēe, ndiji ri ichi ándiví. Te ndahyū ñayuu tācá nación ní cáhnu ñayiví.

Te coto i nuū ruhū, Yaā ní nduu tēe, ndiji ri jíin vícō andiví, te condiso ri cuehē poder, te yōhyo luu kujéhu ri.

31 Te tají rí ndajéhé rī quingoo, te tiví ñihin ya trompeta. Te quinastútú yá ñayuu ní nacāji ri ndicúun lado ñayiví, nde ñin lado ñayiví jíin ndé inga lado.

32 'Vijna te scuáha ró ndese sáha nundēhe higo: Núu je ni nane numa, te ni najee ndaha, te cájini rō jeē jé ni cuyajni tiempo jihní.

33 Te suni súcuan núu ni cajini rō jeē ní quejéē cúu tācá jniñu jeē ni cáhān rī, yūcuán na te na jécūhun ni rō jeē ní cuyajni quivī ndiji ri, te yachī coo.

34 Jendaá cahān rī jíin ró jeē ma cúu ndíhi ñayuu jeē cóto jnūndóho ún, chí nde squícu ndíhi jniñu ún.

35 Andiví jíin ñayiví chí naa, te tāca jnūhun cáhān rī chí ma náā, chí ndíhi squícu.

36 'Te quiví jíin hora jeē ndíji ri, tú ni ñin ñayuu jiní, ni máá ndajéhé cáhīyo andiví, ni máá rí, Sēhe Yaā Dios. Chí máá ñin ni Tátá rī Yaā Dios cúu jeē jiní.

37 'Chi nájnūhun ni cuu quiví ni íyo Noé, suni súcuan coo quiví ndiji ruhū, Yaā ní nduu tēe.

38 Chí quiví ún, nde ná tu cuun saū xeén, te cáyeji i cájhi i, cándāha i, te cájēhe i sēhe síhí i jeē nándāha, nde ni jinū quiví jeē ni quiví Noé ini barco cáhnu jeē naní arca.

39 Te tu ní cá candíje ñayuu jeē cuun saū xeén, te ni cuun, te ni ndaa ndute ni cajihí ndíhi i. Te suni súcuan coo núu na ndíji ruhū, Yaā ní nduu tēe.

40 Te quiví ún cone uū tēe sájniñu nuū ítu. Te ñin de naquihin ri, te inga de ndōo.

41 Te coo uū ñahan jeē ndíco cáhnu, te ñin ña naquihin ri, te inga ña ndōo. Súcuan cuu jeē sava ñayuu naquihin ri te sava i quendōo, chí tu ní cá candíje i.

42 'Núu súcuan te ndito na cóo ni rō, chí tu cájini rō na quiví ndiji Jitoho rō.

43 Te na chúhun ni rō jeē cahān jnūhun yátá yáha: Tēe chíi vehe, núu jeē jiní de na hora quiji ñacuínhá, te condito de, te ma cuáha de jnūhun sácuihná ndajniñu vehe de núu.

44 Te rōhó jíjnáhan ró, suni súcuan coo tūhva ró, chí máá hora jeē tú na vé cájeni ni rō, te ndiji ruhū, Yaā ní nduu tēe.

Jnūhun yátá síquī mozo
(Lc. 12.41-48)

45 'Núu súcuan te coo ró nájñūhun ñn mozo jeē ndító xinī te squícu vāha. Te máá patrón ni jeni de mozo un jéē cóto i ñayuu vehe de, návāha scáji i máá hora.

46 Te yōhyo ndetū mozo un jéē núu ni ndee patrón, te cuni de jeē súcuan squícu vāha i.

47 Jendaá cahán rī jín ró jeē cani de mozo un jéē cóto i ndihī ndajniñu de.

48 Te núu mozo sáha nées cúu i, te jéni ni i jeē ma ndíji yachī patrón i,

49 te quejéé i cani i jnáhan mozo i, te caji i coho i jín tée cánajñi,

50 núu súcuan te ndee-ni patrón quivī jeē tu ndétu i jín hora jeē tú na vé jéni ni i.

51 Te stóho xeēn de i, te squívī de i nuū cáhīn tēe stáhú-ni. Te yūcuan ndáhyū i te nacayihí yuhu i jeē ndoho xeēn i. Achí yá.

Jnūhun yátá síquī uxī sūchi síhí

25

1 'Te suhva cúu jeē ndácu Yaā andiví jniñu nuū ñáyuu: Cúu nájñūhun ñn vico nándāha. Te ni Iyo uxī sūchi síhí jeē ní caquihin i linterna cándaha i, te ni quendacoo i cuaj-nahan i ñn tēe nandāha.

2 Te uhūn i chí tú ndito xinī i, te uhūn i chí ndito xinī i.

3 Te sūchi tú ndito xinī, cándaha i linterna i, te tu cándaha i petróleo jeē náchuhun i.

4 Te sūchí ndito xinī, chí cándaha i botella petróleo jín linterna i.

5 Te níni cúcuéé quiji tēe nandāha ún, te ni quee máhná, te ni caquixī ndihī i.

6 Te nuū ní cuu sava ñuú, te ni cajini i jeē cácana jee: Je vēji tēe nandāha. Cuángoo quijnahan rō de jínáhan ró, áchí.

7 Yūcuán na te tāca sūchi síhí un ní candonda i, te ni casátūhva i linterna i.

8 Te sūchi tú ndito xinī, ni cacahān i jín sūchi ndito xinī: Cuāha jecu petróleo nuū rī jijnáhan ró, chí cuandahvā linterna rī, achí i.

9 Te ni cacahān sūchí ndito xinī: Ma cúu, chí ma cánda jeē cúu máá rí jín máá ró. Vāha ga quingoo ró núu cúyāhu, te cuaan ró jéé cúu máá ró. Achí i.

10 Te níni cuángoo i cuaan i, te ni quee-ni tēe nandāha. Te sūchi cáhīyo tūhva un, ní

quívicoo i jín de vico nándāha de. Te ni ndihyū yehyí.

11 Te ni cunúu, te ni quecoo uhūn gā sūchi síhí un. Te ni cacahān i jín tēe nándāha: Nune ní yéhyí na quívicoo ná, áchí i.

12 Te ni cahān maá de: ¿Ndé nuū véjicoo ró? Chí tu jíní rī rohó, áchí de. Achí yá.

13 Yūcuán na te ni cahān yā:

Núu súcuan te ndito coo ni rō, chí tu cájini rō na quivī na hora ndiji ruhū, Yaā ní nduu tēe. Achí yá.

Jnūhun yátá síquī tēe ní jēhe núu xūhun núu tāca mozo

14 'Te suhva cúu jeē ndácu Yaā andiví jniñu nuū ñáyuu: Cúu nájñūhun ñn tēe jeē quihīn jicá de inga ñuu. Te nde ná tu quihīn de te ni cana de mozo de jijnáhan, te ni jēhe núu de xūhún de nuū i, jeē na sájniñu i jín návāha nducuehē.

15 'Te nuū ñn i ni jēhe de uhūn mil xūhun cáa. Te nuū inga i ni jēhe de uū mil. Te nuū inga i ni jēhe de ñn mil. Súcuan ni jēhe de, chí jíní de nasaa canda ñn ñn i sájniñu i jín. Yūcuán na te ni quihin de ichi cuahān jicá de.

16 Te mozo jeē ní quihin uhūn mil xūhún, ni sájniñu de jín. Te ni nihīn de uhūn gā mil síquī.

17 Te mozo jeē ní quihin uū mil xūhún, suni ni nihīn de uū gā mil síquī.

18 Te mozo jeē ní quihin ñn mil xūhún, ni jehēn de ni jete de yaū, te ni chisāhí de xūhún patrón de.

19 'Te ni yāha cuehē tiempo, te ni ndee patrón mozo un jijnáhan. Te ni nandacān de cuenta nuū i.

20 Te ni quee mozo jeē ní quihin uhūn mil xūhún un, te ni nacūaha de xūhún un núu patrón de jín uhūn gā mil jeē ni nihīn de síquī. Te ni cahān de: Ni jēhe ní uhūn mil nuū ná, te yāha íyó uhūn gā mil jeē ni nihīn na síquī. Achí de.

21 Te ni cahān patrón jín de: Iyó váha núu súcuan. Yōhyo vāha mozo cúu ró jéé squícu vāha ró. Chí vāha ni squícu ró ñn jniñu lúlí-ni, te vijna te cuāha ri jniñu jénu ndacu ró. Te quívī ró núu cusī ni rō jín rí. Achí de.

22 Yūcuán na te ni quee mozo jeē ní quihin uū mil xūhún un. Te ni cahān de: Ni jēhe

ní úū mil nuū ná, te yāha íyó úū gā mil jeē ni níhīn na síquī. Achí de.

²³ Te ni cahān patrón jín de: Iyó váha núu súcuan. Yōhyo váha mozo cúu ró jéē squícu váha ró. Chi váha ni squícu ró ñn jniñu lúli-ni, te vijna te cuāha ri jniñu jéhu ndacu ró. Te quivī ró núu cusī ni rō jín rí. Achí de.

²⁴ Te ni quee mozo jeē ní quihin ñn mil xūhún un, te ni cahān de jín patrón: Je jíní na níhín jéē tée xeēn cúu ní. Chi cuehē gā cuní ni vésú jeē cúu sáha mozo ni, te cuehē gā nándacān ní vésú jeē ni jéhe ní.

²⁵ Te jeē yúcuan ní yūhu ná, te ni jehēn na ní chisāhi ná xūhun ní chīji ñuhun. Te yāha na nácuāha na xūhun ní. Achí de.

²⁶ Te ni cahān patrón jín de: Mozo cuxí cúu ró te máni jniñu néé sáha ró. Chi jéni ni rō jeē cuehē gā cuní rī vésú jeē cuu sáha mozo rī, te cuehē gā nándacān rī vésú jeē ni jéhe ri.

²⁷ Núu jeē ni chúne ró xūhun rí nuū banco nuú, te jeē ní ndee rī te naquihin ri xūhun rí nde jín séhe xūhun núu. Achí de jín i.

²⁸ Te ni cahān de jín táca gá mozo de: Núu súcuan te quende rō mil xūhun jínā nuū i, te cuāha ro núu mozo névāha uxī mil.

²⁹ Chi ñayuu jeē névāha, sa quiji ga nuū i, te coneváha cuehē i. Te ñayuu jeē tu névāha, sa cujiyo-ni vésú jecu jeē névāha i.

³⁰ Te mozo yáha jéē tu sájniñu váha, quenehen ró i na quíhín i nuū quéhe nuū néē. Te yúcuan ndáhyū i te nacayihí yuhu i jeē ndoho xeēn i. Achí patrón un.

Siquī jeē cóo juicio táca nación

³¹ Te ni cahān gā yā:

Ñn quivī te ndiji máa Yaā ní nduu tēe, te cuu ya Rey nuū ñayuu. Te táca ndajéhe yā cuiñi ní xiin ya. Te cucōo ya mesa nuū ndácu ya jniñu, te yōhyo luu kujéhu ya.

³² Te ndutútú ñayuu táca nación nuū yā. Te sásín ya i jínáhan i, nájnūhun cúsín lanchi jín ndixúhú sáha tēe ndító ti.

³³ Te ñayuu váha jeē cúu nájnūhun lanchi, chucú yá i lado váha ya. Te ñayuu neé jeē cúu nájnūhun ndixúhú, chucú yá i lado jecó yá.

³⁴ Yūcuán na te cahān Rey jín ñayuu cáhīn lado váha ya: Nacā ndetū rō jeē ni sáha Tátá rī jín ró. Nehen quivīcoo ró núu

ndácu ró jniñu. Chi nde quivī ní jecōo ñayiví te je ni sátūhva ya nuū ndacu ró jniñu.

³⁵ Chi ni jī rī sōco, te ni cajēhe ro jéē ní yeji rī. Ni jichī rī ndute, te ni cajēhe ró jéē ní jihí ri. Ni quiji ri nde ñuu jicá, te ni cajēhe núu ró vehe ni ndōo ri.

³⁶ Ni cumanī sahma ri, te ni cajēhe ró. Ni cocuhū rī, te ni jecōndēhe ró ruhū. Ni ine ri vecāa, te suni ni jecōndēhe ró ruhū. Súcuan cahān yā jín ñayuu cáhīn lado váha ya.

³⁷ Yūcuán na te cahān ñayuu váha un jín yá: ¿Na quivī ní cajito ná níhín jéē jí ni sóco, te ni cajēhe na jéē ní yeji ní, chí jéē jichí ni ndute, te ni cajēhe ná ní jihí ní?

³⁸ ¿Te na quivī ní cajito ná jéē ní quiji ní nde ñuu jicá, te ni cajēhe núu ná vehe ni ndōo ní, chí jéē cúmanī sahma ní, te ni cajēhe ná?

³⁹ ¿Te na quivī ní cajito ná jéē cuhú ni, chí jéē íne ní vecāa, te ni jecōndēhe ná níhín? achi i.

⁴⁰ Yūcuán na te cahān Rey jín i: Jendaá cahán rī jín ró jéē ná ni casáha ró súcuan jín ñn táca hermano rī jeē cácadíje, vésú ñayuu núu ga cúu i, te nuū maá rí ni casáha ró.

⁴¹ Yūcuán na te suni cahān Rey jín ñayuu cáhīn lado jecó yá: Ñayuu jnahnū ndetū cácuu ró. Cujiyo quingoo ró núu ñuhún jeē cayú ní cáni, nuū iyó túhva cone jexeén jín táca táchī jeē cájejniñu nuū.

⁴² Chi ni jī rī sōco, te tu ní cájēhe ro jéē cáji rī. Ni jichí rī ndute, te tu ní cájēhe ro jéē coho ri.

⁴³ Ni quiji ri nde ñuu jicá, te tu ní cájēhe núu ró vehe ndōo ri. Ni cumanī sahma ri, te tu ní cájēhe ró. Ni cocuhū rī, ni ine ri vecāa, te tu ní jecōndēhe ró ruhū. Súcuan cahān yā jín ñayuu cáhīn lado jecó yá.

⁴⁴ Yūcuán na te cahān ñayuu un jín yá: ¿Na quivī ní cajito na níhín jéē jí ni sóco, chí jéē jichí ni ndute, chí jéē ní quiji ní nde ñuu jicá, chí jéē cúmanī sahma ní, chí jéē cuhú ni, chí jéē íne ní vecāa, te tu ní cájēhe na jéē cúmanī nuū ní? Achi i.

⁴⁵ Yūcuán na te cahān yā jín i: Jendaá cahán rī jín ró, jeē tu ní casáha ró súcuan jín ni ñn táca hermano rī jeē cácadíje, vésú ñayuu núu ga cúu i. Núu súcuan te suni nuū maá rí cúu jeē tu ní casáha ró, achi yā.

⁴⁶ Yūcuán na te quingoo ñayuu un núu ndóho i ní cáni. Te ñayuu váha un quivīcoo

i nuū cótecu i nǎ cáni. Achí Jesús.

Jeē ní casquíjnáhan de jnūhun jeē jnǎ de Jesús
(Mr. 14.1-2; Lc. 22.1-2; Jn. 11.45-53)

26

¹ Te nuū ní ndihí ni cahān Jesús tāca jnūhun yáha, te ni cahān yā jíin tēe cáscuáha jíin yá:

² Je cájini rō jeē uū na quivī te coo vico pascua. Te ruhū, Yaā ní nduu tēe, nastúu i ruhū jeē cúu rī jicā cruz, achí yá.

³ Yūcuán na te sutū cáscujéhnū, jíin tēe cástéén tutu ley, jíin tāca tēe jéhnū jeē cándacu jniñu nuū ñáyuu hebreo, ni candutútú de ini patio vehe palacio maá sūtú cujéhnū ga jeē naní Caifás.

⁴ Te ni candajnūhún de ndese jnǎ de Jesús jíin jnūhun stáhú, te cahni de ya.

⁵ Te ni cacahān de:

Ma jnǎ yó de máá quivī vico, chi ndonda ñáyuu siquī yō, achí de.

Jnūhun ñahan jeē ní chuhun perfume xinī yā
(Mr. 14.3-9; Jn. 12.1-8)

⁶ Te íne Jesús ñuu Betania vehe Simón, tēe ni ndoho cuehyī stehyú.

⁷ Te ni quee ñn ñahan nuū yā, ndáhá ña ñn frasco yuū luu jeē ñūhun aceite perfume jeē yóhyo yahu ndéé. Te ni chuhun ña xinī yā níni jéé yéji yā staā.

⁸ Te ni cajito tēe cáscuáha jíin yá, te ni caquitī ni de, te ni cacahān de:

¿Najehē cúu jeē náā saá-ni perfume jíinā?

⁹ Chi cuu xīcō yahu yó núú, te cuāha yo xūhun núú ñáyuu ndahú. Achí de.

¹⁰ Te ni jini Jesús jnūhun cácahān de. Te ni cahān yā jíin de:

¿Naun cásaaha ró jéé nácani uhū ni ñahan yáha? Chi ñn jniñu váha cúu jeē ni sáha ña jíin rí.

¹¹ Chi níni coyūcu ñáyuu ndahú jíin ró, te ruhū chi tuá condee rī jíin ró.

¹² Chi jeē ní chuhun ña perfume yáha ruhū, suu cúu jeē ni sátūhva ña ruhū nde quivī quíndūji rí.

¹³ Jendaá cahán rī jíin ró jeē ní cáhnu ñayīvi ndé-ni cúu nuū cuité jnūhun yáha jéé jnáma rí ñáyuu, suni nacani i jnūhun jeē ni

sáha ñahan yáha, návāha cocuhun ni ñáyuu ña, achí yá.

Jeē ní nastúu Judas yā
(Mr. 14.10-11; Lc. 22.3-6)

¹⁴ Yūcuán na te ñn jeē ndihúxí uū tēe cáscuáha ún, nání de Judas Iscariote, ni jehēn de nuū sutú cáscujéhnū.

¹⁵ Te ni cahān de jíin:

¿Nasaa cuāha ní núú ná, te na nastúu ná de nuū ní? achí de.

Te ni cajēhe ocō uxī xūhun plata nuū de.

¹⁶ Yūcuán na te nde quivī un ní quejéé de ndúcú de modo ndese nastúu de ya nuū sutú jíináhan.

Jeē ní jequin yā Cena yā
(Mr. 14.12-25; Lc. 22.7-23; Jn. 13.21-30; 1 Co. 11.23-26)

¹⁷ Te máá quivī jeē quejéé vico jeē cáyeji ñáyuu pan jeē tú na levadura yíhi, te ni quijicoo tēe cáscuáha un núú Jesús. Te ni cacahān de jíin yá:

¿Ndé nuū cuní ni jéé quísatūhva ná cuxíni ní vico pascua? achí de.

¹⁸ Te ni cahān yā:

Cuángoo nde ñuu, vehe tēe jeē jé ni cacahān yō, te cahān rō jíin de: Achí máá Maestro jeē ní cuyajni quivī cuu yā. Te vijna te caji yā vico pascua ini vehe ní jíin tēe cáscuáha jíin yá, achi rō. Achí yá.

¹⁹ Te tēe cáscuáha jíin yá, ni casáha de nájñūhun ni ndacu Jesús jniñu nuū de, te ni casátūhva de jeē cuxíni ya vico pascua.

²⁰ Te jeē cuácuaa, te ni quee yā, te ni cucōo ya mesa jíin ndihúxí uū tēe cáscuáha jíin yá.

²¹ Te níni yéji yā jíin de te ni cahān yā:

Jendaá cahán rī jíin ró jeē ñn rōhó nastúu ruhū vijna, achí yá.

²² Te ni cacucuíhyá ndasí ni de. Te ná ñn ná ñn de ni cacajnūhún de ya:

¿A sáña cúu? achí de.

²³ Te ni cahān yā:

Ñn rōhó jéé cáyeji cáhnu jíin rí ñn cohō, suu ró nastúu ruhū.

²⁴ Te ruhū, Yaā ní nduu tēe, jendaá cúu jeē quihín rī cuu rī, nájñūhun yósó jnūhun rí nuū tútu íi. Te nacā xeēn ndoho tēe nastúu ruhū. Váha ga núu tu ní cácu tēe un núú, achí yá.

²⁵ Yūcuán na te ni cahān Judas, tēe nastúu ya:

¿A sáña cúu, Maestro? achí de.

Te ni cahān yā jín de:

Suu ró cúu, achí yá.

²⁶ Te níni jéē cáyeji de jín yá, te ni quihin ya pan, te ni nacuatáhú yá, te ni tahu cuéchi yá, te ni jēhe ya nuū téē cáscuáha jín yá. Te ni cahān yā:

Caji rō jijnáhan ró, chi yāha cúu yiqui cúñu rī, achí yá.

²⁷ Yūcuán na te ni quihin ya ñn copa ndūxi uva, te ni nacuatáhú yá, te ni jēhe ya nuū de. Te ni cahān yā:

Coho jijnáhan ró.

²⁸ Chi yāha cúu ññī rī jeē cuáha ri jeē cúu contrato jeé, te cati jeē ndundoo cuēchi cuehē ñayuu, te coo jñūhun cáhnu ni nuū cuéchi i.

²⁹ Te cáhán rī jín ró jeē ndé vijna te ma cóho ga rī ndūxi ndehē uva yāhá, chi nde quiji quivī ndacu Tátá rī jññū ní ñayiví, te sáa te coho tucu ri jín ró jijnáhan ró. Achí yá.

Jeē ní cachi yā jeē yūhu Pedro cahān de jeē jini de ya

(Mr. 14.26-31; Lc. 22.31-34; Jn. 13.36-38)

³⁰ Te ni jita ya ñn yaa iī jín de jijnáhan de. Te ni quenda ya cuahān yā jín de nde yucu Olivos.

³¹ Yūcuán na te ni cahān yā:

Ndivii rō nayūhu ró jeē siquí ruhū jecuāā vijna. Chi suhva je yósó jñūhun ri nuū tútu iī, ni cahān Yaā Dios: Cuāha ri jñūhun jeē cáhni ñayuu téē ndíto lanchi, te lanchi un cuítē núu ti jeē yūhu tí, achí.

³² Te jeē nátecu rī, te xīhna ruhū cosnūu rí quihīn rī región Galilea, te sáa te najinūcoo ró, achí yá.

³³ Yūcuán na te ni cahān Pedro:

Vēsú ndihī de na náyūhú de, te máá ná chi ma náyūhú cuítē ná, achí de jín yá.

³⁴ Te ni cahān yā jín de:

Jendaá cáhán rī jín ró jeē jecuāā vijna, nde ná tu cana líhli, te yūhu ró jeē jññī ñayuu rohó, te unī jínu cahān rō jeē tu jini rō ruhū, achí yá.

³⁵ Te ni cahān Pedro jín yá:

Vēsú núu cuu na jín ní, te ma cáhán cuítē na jéē tu jini na níhín, achí de.

Te suni súcuan ni cacahān ndihī téē cáscuáha jín yá.

Jeē ní jicān tahu yā nuū huerto Getsemaní
(Mr. 14.32-42; Lc. 22.39-46)

³⁶ Yūcuán na te ni jinū Jesús jín téē cáscuáha jín yá ñn lugar nuū naní Getsemaní. Te ni cahān yā jín de:

Yāhá-ni cucōo ró, te na quihín rī yūcuan cácān tahu rī, achí yá.

³⁷ Te ni jeca ya Pedro jín ndindúú séhe Zebedeo cuahān yā jín de. Te ni quejéé yá cucuíhyá ndasí ni yā te cúxií ni yā jeē quíji jññūdóho siquī yā.

³⁸ Yūcuán na te ni cahān yā jín de:

Yōhyo cúcuíhyá ni rī, te ndúcú sáha jeē cúu rī. Yāhá condetu ró te condito ró jín rí.

³⁹ Te ni jica ya jecu gā, te ni jecuiñī yití yá ni jequin ya nuū yā nuū ññūhun, te ni jicān tahu yā suhva nuū Yaā Dios:

Tátá maá ná, núu cuu te tejiyo ní jññūdóho yāha jéē ma quíji siquī ná. Te nasūu jéē cuní maá ná, chi jeē cuní maá ní na cóo, achí yá.

⁴⁰ Yūcuán na te ni ndee yā nuū ndinúní téē cáscuáha jín yá, te ni jito ya jeē cáquixī de. Te ni cahān yā jín Pedro:

¿A tu ní cánda ró condito ró jín rí vēsú ñn hora?

⁴¹ Coó ndito ni rō te cacān tahu rō jeē chindéé ñáhán yá rohó jéē ma sáha ró cuéchi jeē coto ndee jeneé rohó. Chi cuní ndije ánuá rō squícu vāha ró, te yiqui cúñu rō chi tu fuerza, achí yá.

⁴² Te ni jehēn tucu ya vuelta uū, te suhva ni jicān tahu yā:

Tátá maá ná, te núu ma cúu cujiyo jññūdóho yāha jeē ma ndóho ná, te na cóo jeē cuní maá ní núu súcuan, achí yá.

⁴³ Te ni ndee tucu ya nuū de, te ni jito ya jeē cáquixī tucu de, chi yōhyo cájiī de máhná.

⁴⁴ Te ni stóo ya de, te cuahān tucu ya cuacacān tahu yā vuelta unī. Te suni jññūhun yūcuan ní cahān yā.

⁴⁵ Yūcuán na te ni ndee tucu ya nuū de jijnáhan de, te ni cahān yā jín de:

Vijna te cusū rō te ndetātu ró. Te je ni quee hora, te ruhū, Yaā ní nduu téē, natūu rī te jññī téē cáhīyo cuéchi ruhū.

⁴⁶ Ndocuiñī jijnáhan ró, chi je vēji téē nastúu ruhū, te quihīn yō jín de, achí yá.

Jeē ní cajññī de Jesús

(Mr. 14.43-50; Lc. 22.47-53; Jn. 18.2-11)

⁴⁷ Te sá cáhán gā yā súcuan, te ni quee-ni Judas, ñn jnáhan jeē uxí uū tēe cáscuáha jíin yá. Te vējicoo cuehē tēe jíin de, cándaha de espada jíin yujnu. Chi sutū cácujeñnu jíin táca tēe jéñnu cándacu jniñu nuū ñáyuu hebreo, ni catajái tēe ún.

⁴⁸ Te Judas, tēe nástúu ya ún, je ni jēhe de ñn seña nuū tēe un jíjnáhan, chí ni achi de:

Tēe jeē téchūhu rí un cúu. Te jññí ró jíjnáhan ró, áchí de.

⁴⁹ Te ni quee-ni de nuū Jesús, te ni cahān de:

Ta ni cuaa, Maestro, achí de.

Te ni techūhú de ya.

⁵⁰ Te ni cahān Jesús jíin de:

Amigo, ¿na jniñu vēji ró? áchí yá.

Yūcuán na te ni jinūcoo tāca gá tēe ún, te ni cajññí de Jesús.

⁵¹ Te ñn tēe jeē cáhñin jíin Jesús, ni tava de espada de, te ni jehnde de sōho ñn mozo maá sūtū cujeñnu ga.

⁵² Yūcuán na te ni cahān Jesús jíin de:

Nachuvāha espada rō, chí tāca jēe cájejnáhan jíin espada, suni jíin espada cuu.

⁵³ ¿Te á tu cájini rō jeē cuu cacān tahu rí nuū Tatá rí, te vijna ñúhún tají yá víhyá gā uxí uū mil ndajéhé andiví jeē jnama ruhū?

⁵⁴ Te núu súcuan, ¿te ndese cuu squícu jññuhun cáhán tutu ñi jeē cánuú ndoho rí súcuan? áchí yá.

⁵⁵ Yūcuán na te ni cahān yā jíin ñáyuu cuehē ún:

¿Te va tēe cuíhná cúu rí jeē vējicoo ró jíin espada jíin yujnu jeē jññí ró rúhū jeē súcuan. Táca quíví ni cucōo rí jíin ró jíjnáhan ró ini templo cáhnu, ni steén rí jññuhun, te tu ní cájññí ró rúhū.

⁵⁶ Te súcuan cásaaha ró návaha na squícu jeē cahán tutu ñi jeē ní catee tēe ni canacani jññuhun Yaā Dios, achí yá.

Yūcuán na te ndihí tēe cáscuáha jíin yá, ni castóo de ya, ni cajinu de cuango de.

Jeē ní indichi Jesús nuū junta tēe cácujeñnu ga

(Mr. 14.53-65; Lc. 22.54-55, 63-71; Jn. 18.12-14, 19-24)

⁵⁷ Te tēe ni cajññí Jesús, cuango de jíin yá nuū Caifás, tēe cúu sutū cujeñnu ga. Te yūcuán cáhñin tūtú tēe cástéén tutu ley jíin táca tēe jéñnu cándacu jniñu.

⁵⁸ Te Pedro chí jíca-ni ndíquín de ya, te ni jinū de patio sutū cujeñnu ga. Te ni quíví de ini patio, te ni cucōo de jíin táca policía, návaha coto de ndese coo síquī yā.

⁵⁹ Te sutū cácujeñnu jíin táca tēe jéñnu jíin ndihí tēe cásaaha junta cujeñnu ga, ni canducú de tēe cahān jññuhun yáá síquī Jesús, chí cahni de ya cácuni de.

⁶⁰ Te vēsú ni quecoo cuehē ñáyuu cácahān yaá, te tu ní cáhñin de cuēchi síquī yā jeē cáhni de ya. Te jeē sándihí te ni quecoo uū testigo jeē cahán yaá síquī yā.

⁶¹ Te áchí:

Tēe yáha ní cahān de jeē cuu canu de templo Yaā Dios, te nuū uní-ni quíví te nucondichi sáha de, áchí.

⁶² Yūcuán na te ni ndocuññí maá sūtū cujeñnu ga, te ni cahān de jíin yá:

¿Naun tu cáhán cuítí rō? ¿A íyó ndáa jeē cácahān tēe yáha síquī rō? Achí de.

⁶³ Te Jesús tu ní cáhán cuítí yā. Te ni cahān maá sūtū cujeñnu ga:

Ndácu rí jniñu nuū rō jeē cahān ndaā rō cuni nahín maá Yaā Dios, Yaā técu. Cachi cají te núu máá ró cúu Cristo, Sēhe Yaā Dios, achí de jíin yá.

⁶⁴ Te ni cahān yā:

Suu rí cúu, nájnñuhun cáhán rō. Te na cástūhun rí nuū rō jíjnáhan ró jēe tāca quíví jeē quíji te coto ró rúhū, Yaā ní nduu tēe, condee rí lado váha Yaā iyó poder. Te coto ró jēe ndíji rí ichi ándiví jíin vícō. Achí yá.

⁶⁵ Yūcuán na te sutū cujeñnu ga ni jehnde de sahna de jeē quítí ndasí ni de, te ni cahān de:

Tēe yáha chí cáhán de jññuhun ndevāha jeē quítí ni Yaā Dios, chí sáha de máá de Sēhe Yaā Dios. ¿Ndé jíni ñúhún gá yō testigo núu súcuan? Chí je ni cajini ró jññuhun ndevāha cáhán de.

⁶⁶ ¿Te ndese cájeni ni rō? achí de.

Te ni cacahān tēe cuehē ún:

Cuēchi cúu jeē cahán de súcuan, te jíni ñúhún cuu de, áchí.

⁶⁷ Yūcuán na te ni catesihí de nuū yā, te ni cacani de ya. Te sava ga de ni cacatu de nuū yā.

⁶⁸ Te ni cacahān de:

Te núu Cristo cúu ró, te cachi rō ndé ñn cúu jeē ní cani rōhó, áchí de.

Jeē ní cachi Pedro jeē tu jíní de ya
(Mr. 14.66-72; Lc. 22.56-62; Jn. 18.15-18, 25-27)

⁶⁹ Te ní ní jeē súcuan cúu, te Pedro néne de nuū quéhe ini patio. Te ni quee ñin ñahan jéjníñu vehe ún, te ni cahān ña jín de:

Róhó chi suni ni jica ró jín Jesús tē Galilea, achí ña.

⁷⁰ Te máá de tu ní cáchi de, chi ni cahān de ni cajini ndihi ñayuu:

Tu jíní rī na jnūhun cáhán rō, achí de.

⁷¹ Te ni quenda de yéhyí núu quéhe, te ni jito inga ñahan nuū de. Te ni cahān ña jín ñayuu cáhīn yūcuán:

Tēe yáha chi suni ni jica de jín Jesús, tēe ñuu Nazaret, achí ña.

⁷² Te inga jínu tu ní cáchi tucu de, chi sa ni cahān teyí de:

Tu jíní rī tēe ún, achí de.

⁷³ Te ni cunúu jecu gā, te ñayuu cáhīn yūcuan ní quecoo i nuū Pedro, te ni cacahān i:

Jendaá ndije jeē suni jnáhan tēe un cúu ró, chi ndijin cáhán rō jeē tēe Galilea cúu ró, achí i.

⁷⁴ Yūcuán na te ni quejé de cáhán teyí de jeē na cóndee cuēchi siquī de núu tu cáhán ndaā de:

Tu jíní cuiti rī tēe ún, achí de.

Te ni cana-ni líhli.

⁷⁵ Te ni nucūhun ni de jnūhun ni cahān Jesús jín de: Nde ná tu cana líhli, te yūhu ró te cahān rō unī jínu jeē tu jíní rō ruhū. Te ni quenda de cuahān de, te yōhyo ni ndahyū de jeē ní cachi de jeē tu jíní de ya.

Jeē cuángoo de jín yá nuū Pilato
(Mr. 15.1; Lc. 23.1-2; Jn. 18.28-32)

27

¹ Yūcuán na te ni cundijin. Te tāca sūtū cácujeñhu jín táca tēe jéñhu jeē cándacu jniñu nuū ñayuu hebreo, ni casquínáhan de jnūhun ndese sáha de jeē cuu Jesús.

² Te ni cajihni de ya, te cuángoo de jín yá nuū Poncio Pilato, tēe cúu gobernador.

Jeē ni jíñi Judas

³ Yūcuán na te Judas, tēe ni nastúu ya un, ní jito de jeē ní cunīhin siquī yā jeē cúu yā. Te ni jnahuhū ni de, te ni nacūaha de ocó uxī xūhun plata jeē ni níñin de nuū sūtū cácujeñhu jín núu tāca tēe jéñhu.

⁴ Te ni cahān de jín:

Cuēchi ni sáha ná jeē ní nastúu ná ñin tēe cuu de, te tú na cuēchi de.

Te máá sūtū un ní cacahān de:

¿Vé jítú ni ruhū? Cuēchi máá ró cúu. Achí de.

⁵ Te ni scāne Judas xūhún un ini templo. Te ni quenda de cuahān de, te ni scuéhne de máá de.

⁶ Te sūtū cácujeñhu ni canastútú de xūhún un, te ni cacahān de:

Ma cúu chuhun yó xūhun yáha ini yejnū nuū cásocō ñayuu, chi xūhun jeē ni jéconā jeē cúu ñin tēe cúu, achí de.

⁷ Yūcuán na te ni casándaā de jeē xūhun yúcuán cuaan de ñuhun jeē naní Lugar Ñuhun Quíxin, návaha yūcuán quindūji ñayuu ñuu jicá.

⁸ Jeē yúcuán cúu jeē ndé vijna nání ñuhun ún Lugar Ñuhun Niñi.

⁹ Te súcuan ni squícu jnūhun ni cahān Jeremías, tēe ni nacani jnūhun Yaā Dios nde jenahán: Ni caquihin de ndihóco uxī xūhun plata, te súcuan-ni cúu ñin yāhu jeē ní casáha ñayuu Israel cuenta jeē ndeé yā nuū i.

¹⁰ Te jín xūhun un ní cajeen de ñuhun quíxin, nájnūhun ni ndacu máá Jítoho yō Yaā Dios jniñu nuū rī. Achí Jeremías.

Jeē ní indichi Jesús nuū Pilato
(Mr. 15.2-5; Lc. 23.3-5; Jn. 18.33-38)

¹¹ Te nuū ní jinūcoo de jín Jesús nuū gobernador, tēe cúu Pilato, te ni cajnūhún de ya:

¿A máá ró cúu Rey ñayuu hebreo? achí de.

Te ni cahān Jesús:

Suu rī cúu, nájnūhun cáhán rō.

¹² Te sūtū cácujeñhu jín tēe jéñhu cándacu jniñu, ni cacahān de cuēchi siquī yā. Te tú na vé ni cáhán cuiti yā.

¹³ Yūcuán na te ni cahān Pilato jín yá:

¿A tu jini ró jéé cacahān de cuehē cuēchi siquī rō? achí de.

¹⁴ Te tu ní cáhán cuiti yā ni ñin jnūhun jín de. Te nahán ní naa ni gobernador jeē tú na vé ni cáhán yā jín de.

Jeē ní cundaā jeē cúu yā

(Mr. 15.6-20; Lc. 23.13-25; Jn. 18.38-19.16)

¹⁵ Te íyó costumbre gobernador jeē quivī víco un siáá de ñin tēe íne vecā, núu na-ni tēe cáconi ñayuu.

16 Te suu quivī un íyó ñn tēe íne vecāa, naní de Barrabás, te je ni jitē núu jñūhun jeē ní sáha de cuēchi xeēn.

17 Te nuū ní candutútú ñayuu, te ni cahān Pilato jíin i:

¿Ndé tēe cácuñi rō jeē siaá rī vijna: á Barrabás, chí Jesús jeē cúu Cristo, Yaā ní tají Yaā Dios? achí de.

18 Súcuñi ni cahān de chí cúní de siaá de Jesús. Chí je ni jecūhun ni de jeē ní cacucuésún ni táca sūtū un cájito de ya, te jeē yúcuñi ní quiijicoo jíin yá nuū de.

19 Te níni jēe néne Pilato silla nuū sándaā de jñiñu, te ñasihi de ni tají ña jñūhun nuū de: Ma quivī nduu rō jíin ñayuu siquī tēe ndaā jíin, chí yōhyo ni siūhu jéni ruhū cuni jeē siquí de, achí ña.

20 Te sutū cácujeñhu jíin táca tēe jéñhu, ni cascáhán de ñayuu jeē na cácan i jeē siaá de Barrabás, te na cúu Jesús.

21 Yūcuán na te ni cajñūhún tucu gobernador:

Jeē uú de, ¿ndé ñn de cácuñi rō jeē siaá rī? achí de.

Te ni cacahān i:

Siáá ni Barrabás, achí i.

22 Te ni cajñūhún Pilato:

Núu súcuñi te ¿ndese cácuñi rō jeē sáha ri jíin Jesús, tēe cúu Cristo? achí de.

Te ni cacahān ndihi i:

Cata caa ní de jicā cruz, na cúu de, achí i.

23 Yūcuán na te ni cahān Pilato:

¿Na cuēchi ní sáha de núu súcuñi? achí de.

Te ñayuu un ní cacana jee ndasí i:

Cata caa ní de jicā cruz, na cúu de, achí i.

24 Te ni jini Pilato jeē tu cúndeyí de jíin ñayuu, chí sa víhyá gā cácuvaā i. Te ni ndacu de jñiñu jeē na quíji ndute, te ni nandahá de nuū ñayuu cuehē ún. Te ni cahān de:

Jeē nándahá rí yāha cúu seña jeē tú na cuēchi condee siquī rī jeē cúu tēe vāha yāhá. Chí siquī maá ró jijnáhan ró na cóndee. Achí de.

25 Te ni cacahān ndihi ñayuu:

Suu siquī maá ná jíin síquī séhe ná na cóndee cuēchi jeē cúu de, achí i.

26 Yūcuán na te ni siaá de Barrabás. Te ni ndacu de jñiñu jeē na cáni táca soldado un Jesús, jíin jēe cáta caa de ya jicā cruz.

27 Yūcuán na te soldado un cuango de jíin Jesús ini palacio. Te ni cacana de ndihi jñáhan de ni candutútú núu yā.

28 Te ni caquenehen de sahma ya, te ni cachuhun de ya ñn sahma cuehé jeē cúu sahma rey.

29 Te ni casáha de ñn corona iñu, ni cachuhun de xinī yā. Te ni cachihí de ndaha váha ya ñn yujnu jeē nájnūhun bastón. Te ni casácatā de nuū yā, chí ni cajecuiñī yití de, casáha de jeē chiñúhún de ya.

Nacā jeē váha rey cúu Rey ñayuu hebreo, achí de.

30 Te ni catesihí de nuū yā. Te ni caquihin de yujnu jeē ní cachihí de ndaha ya, te ni cacani de xinī yā.

31 Te nuū ní cuu ni casácatā de nuū yā, te ni catava de sahma cuehé un, te ni canachuhun de ya sahma máa yá. Te cuango de jíin yá jeē cata caa de ya jicā cruz.

Jeē ní cacata caa de ya jicā cruz

(Mr. 15.21-32; Lc. 23.26-43; Jn. 19.17-27)

32 Te nuū ní quendacoo soldado un jíin yá, te ni canajnáhan de jíin ñn tēe ñuu Cirene, naní de Simón. Te ni catejñiñu de tēe un jēe cóndiso de cruz yā.

33 Te ni jinūcoo de ñn lugar nuū naní Gólgota, jeē cuni cahān Lugar Yiquí Xíní.

34 Te ni cajēhe de vino jeē ní sácā núu jíin ñn jeē uvuá jeē cóho ya. Te nuū ní jito ndee ya, te tu ní cúní yā coho ya.

35 Te nuū ní cuu ni cacata caa de ya jicā cruz, te ni casáha de sorteo jeē siquí ndese nihín ñn ñn de sahma ya. Te súcuñi ní squícu jñūhun ni tee tēe ni nacani jñūhun Yaā Dios jenahán: Ni casáha de sorteo siquí ndese nihín ñn ñn de sahma ri, achí yā, achí tutu.

36 Yūcuán na te ni cacucōo de yūcuñi jēe cóto de nde cuu yā.

37 Te ni catee de ñn jñūhun xinī cruz yā jeē cahán na siquí ní jíin yā: Yāha cúu Jesús, Rey ñayuu hebreo, achí.

38 Te suni ni cacata caa de uū tēe cuihná núu uū gā cruz, ñn de lado váha ya, te inga de lado jecó yá.

39 Te ñayuu cáyāha yūcuñi cáscuicó i xinī i, te cácahān neé i:

40 Róhó chí cáhán rō jeē cánu rō templo cáhnu, te nuū uní quivī te nacani ró. Núu súcuñi te jnama ró máa ró vijna. Te núu Sēhe Yaā Dios cúu ró, te nuu ró jicā cruz vií, achí i.

41 Te sutū cácujuhnu, jíin téé cástéén tutu ley, jíin téé grupo fariseo, jíin téé jéhu jíjnáhan de, suni súcuan ni cacahān catá de, te áchí de cácahān maá de:

42 Núu inga ñayuu ni jnama de, ¿te naun tu cúu jnama de maá de vijna? Núu Rey ñayuu Israel cúu de, te na núu de jicā cruz, návāha candíje yó de.

43 Ni candíje de Yaā Dios, te na jnáma ya de vijna te núu cúndáhú ni yā de, chi ni cahān de jeē cúu de Séhe ya. Achí de jíjnáhan de.

44 Te tēe cuíhná jeē cándita caa xiin ya, suni súcuan ni cacahān neé de.

Jeē ni jihī Jesús

(Mr. 15.33-41; Lc. 23.44-49; Jn. 19.28-30)

45 Te nuū ní cuu cahuxī uū, te ni cunee ní cáhnu nde cahunī.

46 Te nájnūhun cahunī, te ni cana jee Jesús:

Elí, Elí, ¿lama sabactani? achí yá. Te jnūhun un cúní cahān: Yaā Dios maá ná, Yaā Dios maá ná, ¿naun ni stóo ní sáña?

47 Te sava ñayuu cáhīin yūcuan ní cajini i jnūhun ún, te ni cacahān i:

Tēe yáha cána de xinī Elías, tēe ni nacani jnūhun Yaā Dios jenahán, áchí i.

48 Te ni jinu-ni ñn tēe, ni jequihin de ñn cachī, te ni chundaji de nuū vinagre iyá. Te ni tee de xinī ñn yujnu, te ni tee de yuhu ya jeē coho ya.

49 Te sava ga de ni cacahān:

Condetu ró, na cóndēhe yó núu quiiji Elías jnama de chí tuú, áchí de.

50 Te Jesús ni cana jee ya inga jínu, te ni jihī-ni ya.

51 Te sahma ndíta caa jeē ndihyú cuarto ñ ini templo cáhnu, ni ndatā-ni sava sava nde xinī te nde nuū jehé. Te ni jnāa, te ni catahū sáva toto.

52 Te ni cananune yaū nuū yíndūji ndīyi. Te cuehē ndīyi jeē ní cacandíje i Yaā Dios, ni canatecu i.

53 Te nuū ní natecu Jesús, te ni quenda-coo i nuū yíndūji i. Te ni ndīvícoo i ini ñuu ñ Jerusalén, te cuehē ñayuu ni cajito nuū i.

54 Te ná ni jihī Jesús, te tēe cúu capitán jíin téé cáhīin jíin de jeē cándito de nde cuu yā, ni cajini de jeē ni jnāa, jíin táca gá jniñu ní cuu. Te yōhyo ni cayūhú de, te ni cacahān de:

Jendaá ndije jeē Séhe Yaā Dios cúu tēe yáha, áchí de.

55 Te yūcuan cáhīin cuehē ñahan, cándēhe jíca ña. Te suu ñahan un ní candiquīn ña Jesús nde Galilea, vējicoo ña cájejniñu ña nuū yā.

56 Te unī ñahan un cácuu María ñuu Magdala, jíin María naná Jacobo jíin José, jíin náná ndíndúú séhe Zebedeo.

Jeē ní quindūji Jesús

(Mr. 15.42-47; Lc. 23.50-56; Jn. 19.38-42)

57 Te nuū ní ini quiivī ún, te ni quee ñn tēe cúca, nání de José, te tēe ñuu Arimatea cúu de. Te suni tēe ni scuáha jíin Jesús cúu de.

58 Tēe un ní jehēn de nuū Pilato, te ni jicān de yiqui cúñu Jesús. Te ni ndacu Pilato jniñu jeē na cuáha nuū de.

59 Te José ni quihin de yiqui cúñu yā, te ni chusúcún de ñn sahma cuitá íyó ndoo.

60 Te névāha de ñn yaū jeē ní caan jeé jíca ñn cava, nuū ná tu quindūji ndīyi. Te yūcuan ní chindūji de ya. Te ni jesi de ñn yuū cáhnu yuhu yáú un, te cuahān de.

61 Te María ñuu Magdala, jíin inga María, cáyūcú ña ichi núu nuū yíndūji ya.

Jeē ní cacondito soldado nuū yíndūji ya

62 Te ni cuu tācá jniñu yáha maá quiivī jeē casátūhva ñayuu jeē quiiji quiivī ndétátú. Yūcuán na te ni cundijin maá quiivī ndétátú. Te sutū cácujuhnu jíin téé grupo fariseo ni jengoo de nuū Pilato.

63 Te ni cacahān de:

Cánucūhun ni na jéē nde na técu tēe stáhú neé un te ni cahān de jeē nátecu de nuū uní quiivī.

64 Núu súcuan te ndacu ní jniñu na cóto vāha tācá soldado yuhu yáú un nde núu ni yāha unī quiivī. Chi núu tuú te sanaa te quiijicoo tēe ni cascuáha jíin de, te tava cuíhná de ndīyi ún jecuáa, quingoo de jíin. Yūcuán na te cachí de nuū ñayuu jeē ní natecu tēe ún. Te cáhú gá cuu jnūhun stáhú yūcuan vēsú jeē xíhna ñúhún. Achí de.

65 Te ni cahān Pilato:

Yāha cáhīyo soldado. Cuángoo jíin de, te sácutú váha ró yuhu yáú un, te coto vāha ró, núu ndese vāha ga cuu sáha ró. Achí de.

66 Te cuangoo de, te ni casácutú de yuū jeē ndihyú yuhu yáú nuū yíndūji ya, te ni

castiñ nihin de. Te ni castóo de tãcá soldado un cándito.

Jeē ní natecu Jesús

(Mr. 16.1-8; Lc. 24.1-12; Jn. 20.1-10)

28

¹ Te ni yāha quiivī ndétātú un, te ni cundi-jin quiivī domingo. Te María ñuu Magdala jíin inga María un, ní jecondēhé ña nuū ní yindūji Jesús.

² Yūcuán na te ñin sanaa-ni te ni jnāa nihin ndasí. Chi ñin ndajéhé maá Jítóho yō Yaā Dios ni cuun ya ichi ándiví, ni quee ya nuū ní yindūji Jesús. Te ni stáa ya yuū ndihyú yuhu yáú un, te ni cucōo ya siquī.

³ Te ndíndēe núū yā nájñūhun taja, te sahma ñūhun ya yaa quiyí nájñūhun yuhvā volcán.

⁴ Te soldado cándito yūcuan ní quisi i de jeē cáyūhú de cájito de ya. Te ni cacuu ndīyí de.

⁵ Te ni cahān ndajéhé jíin ndíndúú ñahan ún:

Ma yūhu ró, chi jíiní rī jeē vécondēhe ró Jesús, Yaā ni jíhī jicā cruz.

⁶ Tuá yā yāhá, chi je ni natecu yā, nájñūhun ni cahān yā. Nehen condēhe ró nuū ní cachindūji de ya.

⁷ Te yachī quingoo ró, te cachi rō nuū tée cáscuáha jíin yá jeē ní natecu yā. Te xīhna gā maá yá jinū Galilea, te sáa te najinūcoo de. Te yūcuán coto de nuū yā. Achí rō na cúni de. Je ni castūhun rí nuū rō, achí ndajéhé.

⁸ Te ni quendacoo ña nuū ní yindūji ya, te yachī cuangoo ña. Te cáyūhú ña, te suni yōhyo cácusī ni ña. Te ni cajinu ña cuacastūhún ña nuū tée cáscuáha jíin yá.

⁹ Te níiní cuángoo ña, te ni quee-ni Jesús nuū ña, te ni cahān yā jíin ña. Te ni quecoo ña nde nuū yā, te ni canundee ña jehē yā, te ni cachiñūhún ña ya.

¹⁰ Te ni cahān yā jíin ña:

Ma yūhu ró jijnáhan ró. Cuángoo te castūhun ró nuū tãcá hermano rī, tēe ni cascuáha jíin rí, jeē na núngoo de nde Galilea, te yūcuán coto de nuū rī. Achí yá.

Jñūhun ní cacahān soldado

¹¹ Te níiní cuángoo ña, te sava soldado jeē ní condito ún, cuángoo de nde ñuu. Te

ni cacastūhún de nuū sutú cácujeñhu tãcá jniñu jeē ní cuu.

¹² Te sutū cácujeñhu ni candutútú de nuū táca tée jēhnu cándacu jniñu, te ni casquiñáhan de jñūhun. Yūcuán na te ni cajēhe de cuehē xūhun núū soldado jijnáhan.

¹³ Te ni cacahān de jíin:

Cahān rō jijnáhan ró jēe tée cáscuáha jíin de ni quiijicoo jecuáa, te ni catava cuīhna ndíyí un níiní cáquixī rō, achi rō.

¹⁴ Te núu na cúni gobernador jñūhun yāha, te máa rí quiscahán rī de, návāha tú nihin rō castigo jijnáhan ró. Achí de.

¹⁵ Te soldado un ní caquihin de xūhún un, te ni cacachi de nájñūhun ni cacahān jíin de. Te nde vijna chi súcuan cácahān ñayuu hebreo nájñūhun ni cacahān soldado un.

Jeē ní tejñiñu ya de nacani de jñūhun

(Mr. 16.14-18; Lc. 24.36-49; Jn. 20.19-23)

¹⁶ Te ndihúxí ñin tēe ni cascuáha un cuángoo de nde Galilea, nde yucu nuū ní cachi Jesús jeē quíngoo de.

¹⁷ Te nuū ní cajito de nuū yā, te ni cachiñūhún de ya. Te sava de tu cácañdije vāha de jeē maá yá cúu.

¹⁸ Te ni quee ya nde nuū de, ni cahān yā jíin de:

Je ni jēhe Tátá rī ndihí poder nuū rī jeē ndácu rí jniñu andiví jíin ñáyiví.

¹⁹ Núu súcuan te cuángoo nuū ñayuu tãcá nación, te stéén rō jñūhun rí nuū i návāha na cándije i. Te scuándute ró i jeē ní cacandije i maá Tátá jíin Séhe jíin Espíritu Santo.

²⁰ Te stéén rō nuū i jeē na cuátáhú i tãcá jniñu ní ndacu rí nuū rō. Te cocuhun ni rō jeē maá rí íne rí jíin ró ní cáni nde quiiví jínu ñáyiví. Achí yá. Te ni cuu. Amén.

JNUHUN VAHA NI TEE SAN MARCOS

Jnūhun Juan tēe scuándute

(Mt. 3.1-12; Lc. 3.1-9, 15-17; Jn. 1.19-28)

¹ Yāha quėjéé jnūhun vāha máá Jesucristo Sēhe Yaā Dios, jeē ní quiji ya jeē jnama ya yohó.

² Isaías, tēe ni nacani jnūhun Yaā Dios nde jenahán, súcuan ni tee de jnūhun Juan nuū tútu:

Tají rí tēe nacani jnūhun ri cosnúú de ichi núú rō,
návāha coo tūhva ñayuu jeē jinú rō, achí Yaā Dios jín Cristo.

³ Te tēe ún cana jee de nde nuū ñúhun téhé: Sátūhva ró máá ró jijnáhan ró, chi quee maá Jítóho yō.

Te sáha ró jniñu ndaā, chi vēji ya, achi de. Achí Isaías.

⁴ Te Juan ni jinū de nde nuū ñúhun téhé, scuándute de ñayuu. Te cáhán de jín i jeē na nácani ni i jeē stóo i cuéchi i te cuandute i, návāha cone cáhnu ni Yaā Dios nuū cuéchi i.

⁵ Te tāca ñayuu región Judea jín ñayuu ñuu Jerusalén, ni quijicoo i nuū de. Te ni canacani ndaā i cuéchi i nuū Yaā Dios, te ni scuándute de i ini yūte Jordán.

⁶ Te sahma ñúhun Juan cúu ixi camello, te núhni ñn cinturón ññ chīji de. Te jeē técu de cúu tíca ndicuéhyí jín ndúxi yocó.

⁷ Te suhva ni nacani de jnūhun:

Quiji máá Yaā cujéhnu ndasí. Chi tú na vé jéhnu cuíti cúu ri nuū yā, ni jeē cuajniñu ri nuū yā vésú ñn jniñu lúlí gá nájñūhun jeē cuíta ndeyi ri ndají rí correa ndijēn yā.

⁸ Te ruhū chi jín ndute scuándute ri rohó jijnáhan ró, te Yaā ún chi nájñūhun jeē scuándute ya rohó cúu jeē cuáha ya Espíritu Santo condee ini anuá rō, achí Juan.

Jeē ní jendute Jesús

(Mt. 3.13-17; Lc. 3.21-22)

⁹ Te ni cuu jecu quiiví, te Jesús ni quenda ya ñuu Nazaret ndañū Galilea, te Juan ni scuándute de ya ini yūte Jordán.

¹⁰ Te ná ni quenda ya nuū ndúte, te ni jito ya jeē ní nune-ni andiví, te ni cuun Espíritu

Santo ni quee xinī yā, te cáa nájñūhun ñn paloma.

¹¹ Te ichi ándiví ní cahān ñn jnūhun:

Máá ró cúu Sēhe ri jeē maní ndasí rí jín, te yōhyo cúsiñ ni rí jín ró, achí.

Jeē ní jito ndee jexeén Jesús

(Mt. 4.1-11; Lc. 4.1-13)

¹² Yūcuán na te ni jinū Jesús nde nuū ñúhun téhé ní sáha Espíritu Santo.

¹³ Te uū xico quiiví ni condee yā nuū ñúhun téhé un núú ín quiiti yúcú. Te ni jito ndee Satanás yā, chí cúní jeē sáha ya cuéchi. Te nuū ní cujiyo Satanás cuahān, te ni quecoo ndajéhé Yaā Dios, ni cajejniñu nuū yā.

Jeē ní quejéé Jesús nácani ya jnūhun

(Mt. 4.12-17; Lc. 4.14-15)

¹⁴ Yūcuán na te ná ni cachune de Juan vecāa, te ni jinū Jesús región Galilea, nácani ya jnūhun vāha ndese ndácu Yaā Dios jniñu.

¹⁵ Te ni cahān yā:

Je ni jinū quiiví, te je ni cuyajni jeē ndácu Yaā Dios jniñu nuū rō. Nacani ni rō jeē stóo ró cuéchi ró jijnáhan ró, te candíje ró jnūhun jeē jnáma ya rohó. Achí yá.

Jeē ní cana ya cuñ tēe jñā chācá

(Mt. 4.18-22; Lc. 5.1-11)

¹⁶ Te jíca Jesús yumar Galilea cuahān yā. Te ni jito ya nuū Simón jín ñani de Andrés. Te tēe cájni chācá cácuu de, te cásinga de ñunu de ini mar.

¹⁷ Te ni cahān yā jín de:

Condiquñ ruhū na quíhín yō, te nasáha ri rohó téé nihñ cuéhē ñayuu candíje ruhū, nájñūhun cánihñ rō chācá, áchí yá.

¹⁸ Yūcuán na te ni castóo-ni de ñunu de, te ni candiquñ de ya.

¹⁹ Te ni jica ya jecu gā, te ni jito ya nuū Jacobo jín ñani de Juan, sēhe Zebedeo, suni cáyúcú de ini barco de, cánachijnñ de ñunu de.

²⁰ Te suni ni cana ya de jeē cóndiquñ de ya. Te ni castóo-ni de tátá de Zebedeo ini barco un jín mozo de, te ni candiquñ de ya cuangoo de.

Jeē ní quenehen ya tachī ini ñn tēe

(Lc. 4.31-37)

21 Te ni jinū yā jín de ñuu Capernaum. Te quivī ndétātu ní quivī ya ini vehe iī sinagoga, te ni steén yā jnūhun.

22 Te ni canaa ni ñayuu ni cajini i jnūhun steén yā. Chi ni steén vāha ya nuū i, chi máá yá cúu jeē ndíso jniñu siquī ndihi. Te tēe cástéén tutu ley Yaā Dios, tu súcuan cástéén de.

23 Te ini vehe iī sinagoga ñuu un íne ñn tēe jeē ñūhun tachī ini. Te ni cana cóhó de:

24 ¿Naun vēji ní núū na jíjnáhan ná, Jesús ñuu Nazaret? ¿A vēji ní jēē snāā ni sáña, chí naún? Je jíni na ndé ñn cúu ní, chí Sēhe iī Yaā Dios cúu ní. Achí de.

25 Te Jesús ni cahān xeēn yā jín táchī ún:

Casi yuhu ró te quenda ró ini de, achí yá.

26 Te tachī ún xeēn ni jehni yīhí tēe ún. Te ni cana cóhó, te ni quenda ini de cuahān.

27 Te ndihi ñayuu ni cayūhú i, te cácajnūhun jnāhan í:

¿Na vé cúu jeē yáha? ¿A ñn jnūhun jéé cúu jeē yáha? Chí tēe yáha cújéhnū de jeē ndácu de jniñu nde nuū tachī te quéndacoo, achí i.

28 Te yachī ni jītē núu jnūhun Jesús cuahān ní cáhnu región Galilea.

Jeē ní nasávāha ya naná chīsó Simón Pedro

(Mt. 8.14-15; Lc. 4.38-39)

29 Te ni quenda ya jín de jíjnáhan de ini vehe iī sinagoga. Te Jesús ni jehēn yā jín Jacobo jín Juan nde vehe Simón jín Andrés.

30 Te náná chīsó Simón, cátú ña yīhi quīji ña. Te ni cacastūhún de nuū yā jeē cuhú ña.

31 Yūcuán na te ni quindehe ya nuū catú ña, te ni jniñi ya ndaha ña, te ni ndonehen ya ña. Te ni quenda-ni quīji ún ña, te ni sáha ña jeē ní cayejí de jíni yá.

Jeē ní nasávāha ya cuehē ñayuu

(Mt. 8.16-17; Lc. 4.40-41)

32 Te ni queē niāndii te ni cuaa. Te ni quecoo ñayuu jín táca ñáyuu cácuñū jín jéé ñūhun tachī ini.

33 Te táca ñáyuu ñuu un ní cacutútú i yéhyí un.

34 Te ni nasávāha ya cuehē ñayuu cácuñū tijni nuū cuehyí, te ni quenehen ya cuehē tachī un cuángoo. Te tachī chí je cájini un yá, te tu ní jéhe ya jnūhun jeē cástūhun ndé ñn cúu ya.

Jeē ní nacani ya jnūhun región Galilea

(Lc. 4.42-44)

35 Te nehen ndasí ní ndonda ya, nde yínee gā. Te ni quenda ya cuahān sún ya yatā ñúū nuū tú ñayuu, te yūcuan ní jicān tahú yā.

36 Te Simón jín tēe cáhīn jín de, ni jenan-ducú de ya.

37 Te ni cananihīn de ya, te ni cacahān de jíni yá:

Tāca ñáyuu cánanducú i níhīn, achí de.

38 Te máá yá ni cahān yā:

Sa suhva na quíhīn yō táca gá ñuu íne yajni, návāha suni nacani ri jnūhun nuū i, chí jeē yūcuan ní quee rī. Achí yá.

39 Te súcuan te ni jica cuu ya ní región Galilea, ni nacani ya jnūhun ini vehe iī sinagoga táca ñuu, te ni quenehen ya tachī ini ñayuu.

Jeē ní nasávāha ya ñn tēe ndóho cuehyí stehyú

(Mt. 8.1-4; Lc. 5.12-16)

40 Te ñn tēe ndóho cuehyí stehyú, ni quee de ni jecuiñī yití de nuū yā, te ni cahān de jíni yá:

Jíni na jeē cuu sáha ní jéē nduvāha ná, te núu cúní ni, achí de.

41 Te Jesús ni cundáhú ni yā de, te ni soó yá ndaha ya siquī de, te ni cahān yā:

Cúní rī. Te na ndúvāha ró, achí yá.

42 Te ná ni cahān yā súcuan, te ni nduvāha-ni tēe ndóho cuehyí stehyú un.

43 Yūcuán na te nátají yá de quinhun de, te ni cahān níhin ya jíni de:

44 Ma cáchi cuítí rō nuū ní ñn. Chí quisteén rō maá ró nuū sutú, te condahá ró jeē socó rō nuū Yaā Dios siquī jeē ndúndoo ró núu yā, nájñūhun ni ndacu Moisés jniñu jenahán. Te súcuan te cuni ñayuu jeē ní nduvāha ró. Achí yá.

45 Te ni quenda de cuahān de, te ni quejéé de nācani de jnūhun nuū ndihi ñayuu ndese ni nduvāha de. Te siquī yūcuan tuá ni cúu quivī Jesús táca ñuu, chí cúchitú ndasí ñáyuu nuū yā. Te ni jica ya yatā táca ñuu nuū tu cúchitú ñáyuu. Te táca lado ni quijicoo ñayuu nuū yā.

Jeē ní nasávāha ya ñn tēe ndóho cuehyí ní tjin

(Mt. 9.1-8; Lc. 5.17-26)

2

¹ Te ni cuu jecu quivī, te ni quivī tucu Jesús ñuu Capernaum. Te ni cajini ñayuu jeē néne ya vehe.

² Te ni cacutútú-ni cuehē ñayuu, te ni chitú vehe jeē ndé yehyí tuá núne. Te ni nacani ya jñuhun Yaā Dios nuū i.

³ Yūcuán na te ni quecoo cuūn tēe nuū yā, cándiso de ñn tēe ndóho cuehyī ni íjin.

⁴ Te tu ní cúu quivīcoo de nuū yā siquī jeē chitú ñayuu. Te ni cacao de siquī véhe, te ni canune de ndaā nuū íin ya, te yaū un ní cascúun de tēe cúhú, cátú de nuū ñn camilla.

⁵ Te ni jini Jesús jeē cácandíje de jeē cúu nasávāha ya tēe cúhú un. Te ni cahān yā jíin tēe cúhú un:

Séhē, je íne cáhnu ni rī nuū tāca cuéchi ró, áchí yá.

⁶ Te yūcuan cáyūcú jecu tēe cástéén tutu ley Yaā Dios, te tēe un ní cajeni ni de siquī yā:

⁷ ¿Naun cáhán tēe yáha súcuan? Cáhán de jñuhun ndevāha jeē quití ni Yaā Dios, chi nasūu Yāā Dios cúu de jeē cóne cáhnu ni de nuū cuéchi.

⁸ Te ni jini Jesús jeē súcuan cájeni ni de, te ni cahān yā jíin de:

¿Naun cájeni ni rō jeē cahán ndevāha rí?

⁹ Jeē uú jñuhun yáha, ¿ndé ñn yí gá cáa? ¿A jéē cahán rī jíin tēe cúhú: Je íne cáhnu ni rī nuū tāca cuéchi ró? ¿Chí yí gá jeē cahán rī: Ndocuñī te naquihin ró camilla rō, te caca ró, achí rī?

¹⁰ Te vijna te na stéén rī jeē maá rí, Yaā ní nduu tēe, ndíso jñíñu ri ini ñayivī yáha jéē cóne cáhnu ni rī nuū cuéchi.

Yūcuán na te ni cahān yā jíin tēe ni íjin ún:

¹¹ Cáhán rī jíin ró, ndocuñī te naquihin ró camilla rō, te quinuhun rō vehe ró, áchí yá jíin de.

¹² Yūcuán na te ni ndocuñī-ni tēe ún, te ni naquihin de camilla de, te ni quenda de cuahān de, jito jíinú ndíhi ñayuu. Te ndivii i ni canaa ni i cájito i, te ni cacahān i jeē yóhoyo vāha Yaā cúu Yaā Dios. Te áchí i:

Ná tu coto cuiti yō ni ñn jñíñu súcuan, áchí i.

*Jeē ní cana ya Leví
(Mt. 9.9-13; Lc. 5.27-32)*

¹³ Te ni quenda tucu ya cuahān yā nde yumar. Te tāca ñayuu ni jinūcoo i nuū yā, te ni steén yā jñuhun nuū i.

¹⁴ Yūcuán na te ni yāha ya cuahān yā, te ni jito ya nuū Leví sēhe Alfeo, néne de nuū cutútú xuhun renta. Te ni cahān yā jíin de:

Condiquñ ruhū na quíhín yō.

Te ni ndocuñī de, te cuahān de jíin yá.

¹⁵ Yūcuán na te ni jehēn yā ni yeji yā staā vehe de. Te cuehē tēe cástútú xuhun renta jíin inga tēe cásaaha cuéchi, suni cáyūcú de cáyeji de staā jíin Jesús jíin tēe cáscuáha jíin yá, chí íyó cuéhe de jeē cándiquñ de ya.

¹⁶ Te tēe cástéén tutu ley Yaā Dios jíin tēe grupo fariseo, ni cajito de jeē yéji yā staā jíin ndíhi tāca tēe ún. Te ni cacahān de jíin tēe cáscuáha jíin yá:

¿Naun yéji maestro rō jíin tēe cástútú xuhun renta jíin inga tēe cásaaha cuéchi? áchí de.

¹⁷ Te ni jini Jesús, te ni cahān yā jíin de:

Ñayuu cáhīyo váha, tu jíni ñúhún i tēe tájné, chí ñayuu cácuhū cúu jeē jíni ñúhún. Te ruhū nasūu jéē véji ri cana ri ñayuu tú cuéchi, jeē cúu i nájnuhun ñayuu cáhīyo váha. Chi sa suhva véji ri cana ri ñayuu cáhīyo cuéchi, jeē na nácani ni i te stóo i cuéchi i. Áchí yá.

*Jeē ní cacajñuhún de ya siquī jeē cóndite ni
(Mt. 9.14-17; Lc. 5.33-39)*

¹⁸ Te ni cuu ñn quivī jeē cáhīyo ndite ni tēe cáscuáha jíin Juan, jíin tēe cáscuáha jíin grupo fariseo. Te ni quecoo jecu tēe, ni cacahān de jíin Jesús:

Tēe cáscuáha jíin Juan jíin jéē cascuáha jíin grupo fariseo, tíjni jínu cáhīyo ndite ni de. Te tēe cáscuáha jíin máá ní, ¿naun tu cásaaha de súcuan?

¹⁹ Te ni cahān Jesús jíin de:

¿A cuu condite ni de níni jéē iyó rí jíin de? ¿A cuu condite ni ñayuu cáhīn vico nándāha, te núu níni néne tēe nándāha? Chí núu néne tēe nándāha, te ma cúu condite ni i.

²⁰ Te quee quivī jeē cújiyo tēe nándāha, te quivī ún chí condite ni i.

²¹ Te ni cahān yā uū jñuhun yátá siquī jeē tu quíjnahan jñuhun jeē jéē steén yā jíin táca jñuhun jenahán. Achí yá:

Ni ñn tu náchuhun ñn pedazo sahma jéē núu ñn sahma túhú. Chí núu súcuan te ndiyi

pedazo jeé un, te tahndē gā jeē tuhú un, te nducáhu ga nuū cátahdé un.

²² Te suni tu cáchuhun vino jeé ini ñií tühú. Chi núu súcuan te vino jeé un ndatá ñií ún, te naa vino jíin ñií. Jeē yúcuan cánuú jéé chühun i vino jeé ini ñií jéé.

Jeē ní cataxín de yoco trigo quiví ndétátú (Mt. 12.1-8; Lc. 6.1-5)

²³ Te ñií quiví ndétātu ní yāha Jesús cuahān yā mēhñú nuū cáa trigo. Te tēe cáscuáha jíin yá, cájica de cuahān de, te ni quejéé de cátaxín de yoco trigo cáyeji de.

²⁴ Yūcuán na te tēe grupo fariseo ni cacahān de jíin yá:

Condēhé. ¿Najehē casáha tēe cáscuáha jíin ró súcuan? Chi áchí ley Moisés jeē ma cúu sáha yó ni ñií jniñu quiví ndétátú. Achí de.

²⁵ Te ni cahān maá yá jíin de:

¿A tu ní cácahu cuií rō tutu ndese ni sáha David, ñií quiví ní cumaní jeē cáji de, te ni jíi de sōco jíin tēe cáhīn jíin de?

²⁶ Te ni quiví de ini vehe Yaā Dios. Te Abiatar ni cuu sutū cujéhu ga. Te ni yeji de pan ií jeē yosó ndijin nuū Yaā Dios. Te tú na ley jeé cáji ni ñií tēe, chi maá-ni sutū cuu caji. Te suni ni jēhe de ni cayejí tēe cáhīn jíin de. Te tú na cuēchi ní íyo siquī de. Achí yá.

²⁷ Te suni ni cahān yā jíin de jíināhan de:

Tu ní jéconaā ñayuu jeē ndóho i nuū quiví ndétátú, chi ni jeconaā quiví un jéé ndétátú i.

²⁸ Núu súcuan te ruhū, Yaā ní nduu tēe, maá rí cúu jeé ndácu jniñu siquī ndese sáha ñayuu quiví ndétátú, áchí yá.

Jeē ní nduvāha tēe ni ichī ndaha (Mt. 12.9-14; Lc. 6.6-11)

3

¹ Te ni quiví tucu Jesús ini vehe ií sinagoga. Te yúcuan íne ñií tēe ni ichī ñií ndaha de.

² Te tēe grupo fariseo cájito yuhu de ya núu nasávāha ya tēe un quiví ndétátú, návāha nihīn de cuēchi siquī yā.

³ Yūcuán na te ni cahān yā jíin tēe ni ichī ndaha ún:

Ndocuiñi te condichi rō mēhñu yáha, áchí yá.

⁴ Te ni cajnūhun yá de jíināhan de:

¿Ndese cáhán ley siquī quiví ndétátú? ¿A jéé sáha vāha yó, chí sáha néé yó? ¿A jéé nasávāha yó ñayuu je yajni cuu, chí sáha yó jéé cúu i? áchí yá.

Te maá de tú na vé ni cacahān de.

⁵ Te ni quití ni yā ni jito ya nuū de jíināhan de, te ni cucuíhyá ni yā jeé níhni ni de. Te ni cahān yā jíin tēe ni ichī ndaha:

Scaá ndaha ró.

Te ni scaá de, te ni nduvāha-ni ndaha de.

⁶ Yūcuán na te ni quendacoo tēe grupo fariseo, te ni casquínāhan de jnūhun jíin tēe grupo Herodes siquī yā, ndese cahni de ya.

Jeē ní quecoo cuehē ñayuu nuū yā yumar

⁷ Te Jesús cuahān yā nde yumar jíin tēe cáscuáha jíin yá. Te cuehē ñayuu región Galilea ni candiquīn i ya.

⁸ Te suni ñayuu región Judea, jíin ñayuu ñuu Jerusalén, jíin ñayuu Idumea, jíin ñayuu ichi núu cáne niāndii yūte Jordán, jíin ñayuu región Tiro jíin Sidón, cuehē ndasí ñayuu ni cajini jnūhun i jniñu jéhu ni sáha ya, te ni quecoo i nuū yā.

⁹ Te ni cahān yā jíin tēe cáscuáha jíin yá jeé na cóo tūhva ñií barco quiví ya, návāha ma chítú níhin ñayuu cuehē ún xiin ya.

¹⁰ Chi cuehē ñayuu je ni nasávāha ya, te jeé yúcuan vējicoo cuehē gā ñayuu cándoho tāca núu cuehyí, te chítú níhin i xiin ya jeé quehé i ya cáculi i.

¹¹ Te ñayuu cáñuhun tachí ini, núu ni cajito nuū yā, te cájecuiñi yití núu yā, te cácana cóho:

Maá ní cúu Sēhe Yaā Dios, achí.

¹² Te ni ndacu níhin ya nuū tachí un jéé ma cáhán gā jeé cúu ya Sēhe Yaā Dios.

Jeē ní nacāji ya uxī uū tēe apóstol (Mt. 10.1-4; Lc. 6.12-16)

¹³ Yūcuán na te ni caa ya cuahān yā ñií yucu. Te ni cana ya tāca tēe jeé cuní maá yá caca jíin yá, te ni quecoo de nuū yā.

¹⁴ Te ni jeni ya uxī uū de jeé cuiñi de jíin yá, te tají yá de quingoo de nacani de jnūhun.

¹⁵ Te ni sáha ya jeé cóndiso jniñu de nasávāha de ñayuu cuhú te quenehen de tachí ini ñayuu.

¹⁶ Te yāha cúu ndihúxí uū tēe jeé ní nacāji ya: Simón jeé ní nasnání yá de Pedro.

17 Te Jacobo jíin ñani de Juan, sēhe Zebedeo. Te ni nasnání yá ndindúú de Boanerges, jeē cuní cahān: Tēe yíhi fuerza nacani jnūhun, nájñūhun yíhi fuerza taja.

18 Te sava ga de nání de Andrés, Felipe, Bartolomé, Mateo, Tomás, Jacobo sēhe Alfeo, Tadeo, Simón tēe grupo cananista,

19 jíin Judas Iscariote, tēe jeē ní nastúu de ya.

Jeē ní cacahān ñayuu jeē jejniñu ya fuerza Satanás

(Mt. 12.22-32; Lc. 11.14-23; 12.10)

Yūcuán na te ni quívi ya ñin vehe jíin tēe cáscuáha jíin yá un.

20 Te ni ndutútú tucu cuehē ñayuu, te ni tuá ni cúu caji yā staā jíin de.

21 Te tāca jnāhan vehe ya ni cajini jnūhun jeē súcuan cúu. Te ni quecoo de venūquihni de ya. Chi cacahān de jeē ní sana xinī yā.

22 Te suni tēe cástéén tutu ley Yaā Dios jeē ní quijicoo nde ñuu Jerusalén, ni cacahān de:

Tēe yáha ñūhun Satanás ini de, jeē cujéhnū nuū tachí. Te jíin fuerza un quénehen de tachí, achí de.

23 Te ni cana ya de jíjnāhan de, te ni cahān yā ñin jnūhun yátá jíin de:

¿Ndese cuu quenehen Satanás maá?

24 Chi núu ñin nación sásñin máá te cuajnáhan máá, nación un má cúu ga coyūcu cáhnu.

25 Te núu ñayuu ñin vehe sásñin máá te cuajnáhan máá, ñayuu un má cúu ga coyūcu cáhnu.

26 Te suni súcuan Satanás jíin jnāhan tachí, chi núu sásñin máá te cuajnáhan máá, núu súcuan te ma cóo ga, chi sa suhva naa.

27 Te ni ñin tēe ma cúu quívi de ini vehe tēe ndacuī jeē quenehen de ndajniñu de. Chi cánuú jeē xíhna gā cuhni de tēe ndacuī ún. Te suni súcuan cúu jeē jíhni rī Satanás te quénehen ri tachí.

28 Te jendaá cahán rī jíin ró jeē iyó modo coo jnūhun cáhnu ni nuū tāca cuéchi cáśaha ñayuu, te suni nuū tāca jnūhun néé cacahān i.

29 Te núu cahān ndevāha i síquī Espíritu Santo, te ma cóne cáhnu ni Yaā Dios nuū i, chi sa suhva condee cuéchi síquī i ní cáni, achí yá.

30 Súcuan ni cahān yā, chi ni cacahān i jeē quénehen ya tachí jíin fuerza Satanás.

Náná yā jíin ñani yā

(Mt. 12.46-50; Lc. 8.19-21)

31 Yūcuán na te ni quee naná yā jíin táca ñani yā. Te ín ña nuū quéhe, te ni taji ña jnūhun cuahān nuū yā jeē cána ña ya.

32 Te ñayuu cáyūcu ní xiin ya, ni cacahān i jíin yá:

Náná ni jíin táca ñani ni cáhñin nuū quéhe, te cácuni cahān jíin ní, achí i.

33 Te ni cahān maá yá:

¿Ndé ñin cúu náná rī jíin ñani rī? achí yá.

34 Yūcuán na te ni ndacoto ya nuū ñayuu cáyūcú xiin ya ún, te ni cahān yā:

Suni náná rī jíin ñani rī cácuu tāca ñayuu yáha.

35 Chi tāca ñayuu casquícu jniñu cúní Yaā Dios, suu cácuu ñani rī, cuāha rī, náná rī, achí yá.

Jnūhun yátá síquī tēe jéte trigo

(Mt. 13.1-9; Lc. 8.4-8)

4

1 Te yumar ni quejéé tucu Jesús steén yā jnūhun. Te ni cutútú cuéhē ndasí ñayuu nuū yā, te jeē yúcuan ní quívi ya ni cucōo ya ini ñin barco nuū mar. Te tāca ñayuu un cáyūcú i yumar.

2 Te jíin jnūhun yátá ni steén yā cuehē jnūhun nuū i, te súcuan ni cahān yā:

3 Cuni nahín jíjnāhan ró: ñin tēe cate trigo, ni quenda de jeē cate de.

4 Te ná ni quejéé de jéte de, te jecu trigo ni jité yuhíchi. Te ni quecoo saa, ni cayejí tī.

5 Te jecu gā trigo ni jité nuū ñūhun yuū, nuū tú cuehē ñuhun. Te yachí-ni ni cane, chi tu cóquin ñuhun.

6 Te nuū ní cane niāndij, te ni ichí-ni, te ni casun, chi tu ní níhín nuū quihín yoho.

7 Te jecu gā trigo ni jité nuū náne iñu. Te ni jehnu iñu ún, te ni jesi nuū, te tu ní jéhe nunī.

8 Te jecu ni jité nuū ñūhun váha. Te ni cane, te ni jehnu, te ni jéhe cuehē nunī. Sava ni jéhe ocō uxī jeē ñin ñin nunī, te sava ga ni jéhe unī xico, te sava ga ni jéhe ciento. Achí yá.

9 Yūcuán na te ni cahān yā jíin de:

Tāca róhó jēē jīni sōho, na chúsóhó ró. Achí yá.

Najehē cahán yā máni jnūhun yátá
(Mt. 13.10-17; Lc. 8.9-10)

¹⁰ Yūcuán na te ni quendōo máa na yā, jīin ndihúxí uū tēe cáscuáha jīin yá, jīin jecu gā ñayuu cáhīin jīin de. Te ni cacajñuhún de ya na vé cuní cahān jnūhun yátá un.

¹¹ Te ni cahān yā jīin de:

Róhó, chí sáha Yaā Dios jeē cájecūhun ni rō jnūhun ni yīsāhi yáha, ndese quívicoo ñayuu ndaha ya ndacu ya jniñu nuū i. Te ñayuu jeē cáhīin sīn siquī, chí máni jīin jnūhun yátá cáhān rī tāca jnūhun jīin i.

¹² Súcuan cáhān rī návāha vēsú cájito i, te quendōo i nájnūhun jeē tú na vé ni cájito i. Te vēsú cájini sōho i, te ma jécūhun ni i, te ma násāma ini i quívicoo i nuū rī, te ma cóo jnūhun cáhnu ni nuū cuéchi i, áchí yá.

Jeē ní castūhun cájí yá jnūhun yátá tēe jéte trigo
(Mt. 13.18-23; Lc. 8.11-15)

¹³ Te ni cahān gā yā jīin de jīnāhan de:

Núu tu cájecūhun ni rō jnūhun yátá yáha, ¿te ndese jecūhun ni rō tāca gá jnūhun yátá núu súcuan?

¹⁴ Tēe jéte trigo cúu tēe scuíté núu jnūhun Yaā Dios.

¹⁵ Te trigo jeē ni jítē yuhíchi cúu nájnūhun ánuá sava ñayuu. Chí cájini nahín i jnūhun ya, te ná ni cajini i, te quíji-ni Satanás te quénde-ni jnūhun ini anuá i.

¹⁶ Te trigo jeē ni jítē nuū ñúhun yuū, chí cúu nájnūhun ánuá sava ñayuu cájini nahín jnūhun, te yachī-ni cájetáhú i te cácusī ni i jīin.

¹⁷ Te tu cúcutú jnūhun ún ini anuá i, te jecu-ni quíivī cájetáhú i. Te núu ni quejéé jnūndóho, chí jito xeēn ñayuu i siquī jnūhun ún, te quéjéé nácani yátá ni i.

¹⁸ Te jeē ni jítē nuū náne iñu cúu nájnūhun jecu gā ñayuu. Chí vēsú ni cajini sōho i,

¹⁹ te cándihvī ni i siquī jeē iyó ini ñayivī yáha. Te cácuni i cucúcá i, te stáhú un i jeē cutóo ni i siquī tēcá ndajníñu. Te ndihī jeē yáha cácuñéñu i jīin, te jésī nuū jnūhun ya, te tu íje i jīin jnūhun ya.

²⁰ Te trigo jeē ni jítē nuū ñúhun váha cúu nájnūhun ñayuu cájini nahín jnūhun, te cájetáhú i, te cáhije i jīin jnūhun ya. Te sava

i cúu nájnūhun nunī jeē jéhe ocō uxī jeē ñn ñn, te sava i jéhe unī xico, te sava ga i jéhe ciento. Achí yá.

Jnūhun yátá síquī lámpara
(Lc. 8.16-18)

²¹ Suni ni cahān yā jīin de:

Núu nástīn ñayuu ñn lámpara, ¿a chūne i chíji ñn cajón chí chíji jito? Tuú, chí jéni i nuū sucún návāha cundijin.

²² Te suni súcuan, tu íyó ni ñn jnūhun sáhi jéē ma cúni ñayuu, chí ndihī tāca jnūhun natūu ndijin te cuni ñayuu.

²³ Tāca róhó jēē jīni sōho, na chúsóhó ró, áchí yá.

²⁴ Te suni ni cahān yā jīin i:

Cuni sōho vāha ró. Chí cūhva jeē chusóhó ró jnūhun Yaā Dios, suni cūhva un cuáha ya nuū rō, te víhyá gā cuāha ya nuū maá ró jeē chusóhó váha ró.

²⁵ Chí ñayuu je jécūhun ni, stéén gā yā nuū i. Te ñayuu tu cándíje, máa jecu jeē jiní i ún, sa suhva naa. Achí yá.

Jnūhun yátá síquī trigo jeē jéhnu

²⁶ Te ni cahān gā yā:

Súcuan cúu jeē ndácu Yaā Dios jniñu nuū ñayuu: Cúu nájnūhun trigo jeē ní jete ñn tēe.

²⁷ Yūcuán na te quíxí de te ndóna de, te súcuan jíca quíivī cuahān. Te trigo un cáne te jéhnu. Te máa de tu jíní de ndese cúu jeē jéhnu.

²⁸ Chí máa ñuhun sáha jeē jéhnu trigo, xīhna gā yucū, sáá te cáne yoco, yūcuán na te íje máa núnī.

²⁹ Te núu ni cuaan trigo un, te quéjéé ñayuu cájehnde i, chí je ni jinū quíivī tahndé. Achí yá.

Jnūhun yátá síquī ndiquin mostaza
(Mt. 13.31-32; Lc. 13.18-19)

³⁰ Te suni ni cahān yā:

Na cáhān rī ñn jnūhun yátá návāha cuni rō ndese ndúcuehē ñayuu jeē ndácu Yaā Dios jniñu nuū.

³¹ Ndúcuehē i nájnūhun jéhnu ñn ndiquin mostaza jeē jéquin i nuū ñúhun. Te yūcuan cúu ñn ndiquin lúlí gá vēsú tēcá ndiquin jeē iyó.

³² Te ná ni jequin i, te cáne te jéhnu ga vēsú tāca gá yucū, te cúnáhnu ndaha. Te

tācá saa chi sáha tí tacā tí nuū cuándahū xinī ún. Achí yá.

Jeē máni jnūhun yátá cáhán yā jíin i
(Mt. 13.34-35)

³³ Te cuehē jnūhun yátá súcuan ni cahān yā jíin ñáyyu, núu nasaa cánda i jecūhun ni i.

³⁴ Te tāca jēē ni stéén yā, máni máá jnūhun yátá ní cahān yā jíin i. Te nuū tēe cáscuáha jíin yá chi ni nacastūhun cájí yá jnūhun ún.

Jeē ní jecuiñī tachī níhin jíin mar ni sáha ya
(Mt. 8.23-27; Lc. 8.22-25)

³⁵ Te jeē cuácuaa quíivī ún, te ni cahān yā jíin tēe cáscuáha jíin yá:

Na yáha yó quíhīn yō inga lado mar, achí yá.

³⁶ Te ni casquéndōo de ñayuu cuehē ún, te ni quíivīcoo de ini barco nuū je íne Jesús, cuangoo de jíin yá. Te suni cuangoo jecu gā barco jíin de jíináhan de.

³⁷ Te ni jecuñī ñin tachī níhin, te ni stónnda ndute mar, te ni quíivī ini barco. Te je yajni chitú ndute ini barco.

³⁸ Te Jesús catú yá yatā de ini barco, quíxí yā te yíhi ñin sahma cástíhi xinī yā. Te ni castónnda de ya, te ni cacahān de:

Maestro, ¿á tu sáha ní cuenta jeē quēe yó chíji ndute te cuu yō? achí de.

³⁹ Te ni ndocuiñī yā, te ni cahān yā nuū tachí níhin un jíin núū mar:

Jecuiñī te nayúú-ni coo ró, achí yá.

Te ni jecuiñī tachī, te ni cuu nayúú í-ni.

⁴⁰ Te ni cahān yā jíin de jíináhan de:

¿Naun cáyūhú ndasí ró? ¿Naun tu cácaandíje ró jēē cācu ró sáha ri?

⁴¹ Te yōhyo ni cayūhú de, te ni cacahān de jíin jnāhan de:

¿Ndé ñin ga cúu tēe yáha jēē nde tachī níhin jíin mar cájetáhú jēē cahān de? achí de.

Tēe Gadara jeē ndóho tachī
(Mt. 8.28-34; Lc. 8.26-39)

5

¹ Te ni jinū Jesús jíin de jíináhan de inga lado mar, región Gadara.

² Te ná ni quenda ya ini barco un, te ñin tēe ñūhun tachī ini, ni quenda de nde nuū yíndūji ndīyi, te ni quee de nuū yā.

³ Tēe un ndéē de nuū yíndūji ndīyi. Te tu jéjníñu jeē jíhni ñayuu de, ni jíin cadena.

⁴ Chi cuehē jíinu ni conuhnī jehē de ndaha de jíin cadena. Te tāca jíinu jéhnde de, te sácuéchi de. Te tú ni ñin cúndeyí jíin de.

⁵ Te nduú ñuú jíca de yucu jíin núū yíndūji ndīyi, te cána cóhó de, te stújí de máá de jíin yúu.

⁶ Te náa jíca gá vēji Jesús, te ni jito de ya. Te jíinu de ni quee de nuū yā, te ni jecuiñī yití de nuū yā.

⁷ Te ni cana cóhó de:

¿Naun vēji ní núū ná, Jesús Sēhe Yaā Dios, Yaā cujéhu téyí? Cáhán ndahú ná jíin ní, jíini nahín Yaā Dios, ma stóho ní sáña, achí de.

⁸ Súcuan ni cahān de, chi je ni cahān Jesús: Táchī, quenda ini tēe yáha quíhīn rō.

⁹ Te ni cajnūhun yá de:

¿Na vé naní ró?

Te ni cahān de:

Legión naní ná, chi cuehē tachī ñūhun ini ná, achí de.

¹⁰ Te ni cahān ndahú ndasí de jíin yá jeē ma tájí yá tachī quendacoo región ún.

¹¹ Te yajni yucu yúcuan cáhīin cuehē quíñī cájitu tí.

¹² Te tachī jeē ñūhun ini tēe un ní cacahān ndahú jíin yá:

Núu tají ní sáña, te cuāha ní jnūhun quíivīcoo ná ini quíñī yūcuán, achí.

¹³ Te Jesús ni jēhe ya jnūhun. Te ni quendacoo tachī ún ini tēe ún, te ni quíivīcoo ini quíñī, te íyó nájnūhun uū mīl tí. Te quíñī un ní cajinu tí ni ñingoo tí ñin yucáva, ni quíivīcoo tí nuū mar. Te ni ndaquíhi tí ndute, ni cajihī tí.

¹⁴ Te tēe cándito tí, ni cajinu de cuangoo de jeē ní cayūhú de. Te ni jinūcoo de ni cacastūhún de nuū ñáyyu ñuu un jíin ñáyyu tāca rancho. Te cuangoo ñayuu un cuácondēhé i na vé ni cuu.

¹⁵ Te ni jinūcoo i nuū íne Jesús, te ni cajito i nuū tēe ni ñūhun cuehē tachī ini. Te néne de, te ñūhun de sahma, te je ni nducájí xíní de. Te ni cayūhú ñáyyu ún.

¹⁶ Te tēe ní cajito, ni canacani de jnūhun nuū ñáyyu, ndese ni nduvāha tēe ní ñūhun tachī ini, jíin ndese ni candoho quíñī ún.

¹⁷ Yūcuán na te ni caquejéé i cácahān ndahú i jíin yá jeē na cújiyo ya región yúcuan quíhīn yā.

18 Te ni ndiv̄i ya ini barco. Te tēe ni ñuhun tachī ini un ní cahān ndahú de jíin yá jeē na cuáha ya jnūhun quih̄n de jíin yá.

19 Te Jesús tu ní jéhe ya jnūhun, chi ni cahān yā jíin de:

Cuánuhun vehe ró núū jnāhan ró, te nacani ró jnúhun nuū i ndese yōhyo jéhu jniñu ni sáha máá Jítóho rō jíin ró, te ndese ni cundáhú ni yā rohó, áchí yá.

20 Te ni quenda de cuahān de, te ni quejé de nácani de jnūhun tácá ñuu Decápolis ndese yōhyo jéhu jniñu ni sáha Jesús jíin de. Te ndiv̄i ñayuu un ní canaa ni i cájini nahín i.

Jnūhun sēhe síhí Jairo jíin ñahan ní quehé yusáhmayá

(Mt. 9.18-26; Lc. 8.40-56)

21 Te ni nayāha tucu Jesús cuanuhun yā inga lado mar jíin barco. Te ni quecoo cuehē ñayuu nuū yā, nuū íne ya yumar.

22 Te ni quee ñn tēe cújéhu ini vehe ñi sinagoga, naní de Jairo. Te ná ni jito de nuū yā, te ni jecuiñ̄i yití de nuū jehé yā.

23 Te ni cahān ndahú ndasí de jíin yá:

Sēhe síhí ná je yajni cuu i. Na quih̄n yō vehe ná te soó ní ndaha ní síqūi i návāha na ndúvāha i te cotecu i, áchí de.

24 Yūcuán na te cuahān yā jíin de. Te cuehē ñayuu cándiqūn i ya, te ni chitú níhin i xiin ya cuango i.

25 Te mēhñu ñáyuu un cuahān ñn ñahan cúhú, jeē ní cuu ux̄i uū cuiyā ndóho ña cuehȳi niñ̄i.

26 Te yōhyo ni ndoho ña, chi ni jexin ña tāca jéē névāha ña jíin cuehē tēe tájna, te tu ní jéjníñu jeē ndúvāha ña, chi sa suhva víhyá gā sáha.

27 Te ñahan yáha ná ni nih̄n ña jnūhun Jesús, te ni quee ña ichi yátá yā mēhñu ñáyuu cuehē ún, te ni quehé ña yusáhmayá.

28 Chi ni jeni ni ña: Vēsú maá sahmayá na níhin rī quehé rí, te nduvāha ri, jeni ni ña.

29 Te ni jecuiñ̄i-ni niñ̄i ña, te ni jini ña jeē ní nduvāha ña cuehȳi ún.

30 Te Jesús ni jini yā jeē ní nduvāha ñn ñayuu jíin fuerza yā. Te ni ndió cóto ya nuū ñáyuu cuehē, te ni cahān yā:

¿Ndé ñn ni quehé sahmayá? Achí yá.

31 Te tēe cáscuáha jíin yá, ni cacahān de:

Jító ní jéē ñáyuu cuehē yāha ní chitú níhin i xiin ní te cáqūhi i níhin ní cáni ichi, te cájnūhun ní ndé ñn ni quehé sahmayá.

32 Te máá yá jító ya cháha chúcuán, cúní yā jeē na cáchi ñayuu ni sáha.

33 Te ñahan un yúhú ña te quísi i ña, te je jíin ña jeē ní nduvāha ña. Te ni quee ña, te ni jecuiñ̄i yití ña nuū yā, te ni cachi ña ndih̄i ndese ni cuu jíin ña.

34 Te ni cahān yā jíin ña:

Séhē, ni candíje ró jéē cuu nasávāha ri rohó, te jeē yúcuán ní nduvāha ró. Cuahán te na ndús̄i ni rō, chi je ni nduvāha ró cuehȳi ní ndoho ró, áchí yá.

35 Te níni cáhán gā yā súcuán, te ni quecoo ñayuu cáyúcú vehe tēe cújéhu ini vehe ñi sinagoga, te ni cacahān i jíin de:

Je ni jih̄i sēhe síhí ní. Te ma sajnēñu ga ní Maestro, achí i.

36 Te Jesús tu ní sáha ya cuenta jeē súcuán cácahān i, te ni cahān yā jíin tēe cújéhu ini vehe ñi sinagoga:

Ma yūhu ró, chi candíje ró jéē nastécu rī i, áchí yá.

37 Te tu ní jéhe ga yā jnūhun condiqūn ñayuu yā, chi máá-ni Pedro jíin Jacobo, jíin Juan ñani Jacobo.

38 Te ni jinū yā vehe tēe cújéhu ini vehe ñi sinagoga, te ni jito ya ñayuu, cácuvaā i, te cándahyū i, te cácana cóhó i.

39 Te ni quiv̄i ya, te ni cahān yā:

¿Najehē yōhyo cásvāā rō te cándahyū rō? Sūchi síhí yáha, tu ní jíhí i, chi quíxí-ni i, áchí yá.

40 Te ni cajecū catá i jeē ni cáhán yā. Te ni quenehen ndih̄i ya i cuahān i nuū quehé. Te ni cana ya máá-ni tátá jíin náná sūchi síhí un, jíin tēe cáh̄in jíin yá, te ni quiv̄i ya jíin de nuū catú sūchi síhí ní jih̄i ún.

41 Te ni jniñ̄i ya ndaha i, te ni cahān yā jíin i:

Talita cumi, achí yá. Te jnūhun un cúní cahān: Síh̄i, cáhán rī jíin ró, ndocuñ̄i, achí yá.

42 Te ni ndocuñ̄i-ni sūchi síhí un, te ni nacaca i, chi je íyó i ux̄i uū cuiyā. Te yōhyo ni canaa ni ñayuu cájito i.

43 Te ni ndacu níhin ya jniñu nuū i jíjñahan i jeē ma cáchi cuiti i nuū ni ñn. Te ni cahān yā jeē na cuáha ña jeē cáji sūchi síhí.

*Jeē cuánuhun yā ñuu Nazaret
(Mt. 13.53-58; Lc. 4.16-30)*

6

¹ Te ni quenda Jesús yūcuán, te cuanuhun yā ñuu yā. Te tēe cáscuáha jíin yá cuango de jíin yá.

² Te máa quívī ndétātu ní steén yā jnūhun ini vehe i sinagoga. Te cuehē ñayuu ni canaa ni i cájini nahín i, te ni cacahān i:

¿Ndé nuū ní cutūhva tēe yáha tāca jnūhun yáha? ¿Te ndese cúu jeē cahán de jnūhun ndíchí yáha jíin jéē sáha de jniñu jéhu yáha?

³ Chi tēe yáha cúu carpintero, te sēhe María cúu de, te ñani Jacobo jíin José jíin Judas jíin Simón cúu de. Te suni cáyūcu cuáha de jíin yó yāhá. Achí i.

Te súcuan ni cacujéē ni i nuū Jesús.

⁴ Te ni cahān yā jíin i:

Tāca tēe nácani jnūhun Yaā Dios, íyó yíñúhún ñayuu jíin de, chi máni ñayuu ñuu maá de, jíin jnáhan de, jíin ñayuu vehe de cúu jeē tu íyó yíñúhún jíin de. Achí yá.

⁵ Te tu ní cúu sáha ya cuehē jniñu jéhu yūcuán. Chi jecu-ni ñayuu cácuñu ni soó yá ndaha ya siquī i, te ni nasávāha ya i.

⁶ Te náā ni yā jíto ya jeē tu cácuñu ñayuu jijnáhan i. Yūcuán na te ni jica cuu ya tācá ñuu yajni, ni steén yā jnūhun.

Jeē ní tají yá ndihúxí uū de cuanacani de jnūhun

(Mt. 10.5-15; Lc. 9.1-6)

⁷ Te ni cana ya ndihúxí uū tēe cáscuáha jíin yá, te ni tají yá ndihuū ndihuū de quingoo de. Te ni sáha ya jeē cóndiso jniñu de quenehen de tachī ini ñayuu.

⁸ Te ni ndacu ya jeē tú na vé condiso de jeē cuajniñu de ichi, ni ñunu, ni staā, ni xūhún. Chi máa vara-ni condahá de.

⁹ Te quihí de ndijēn, te ma quihín de jíin uū sahma, achí yá.

¹⁰ Te suni ni cahān yā jíin de:

Na-ni vehe núu ni quívīcoo ró, te yūcuán coyūcu ró ndé quenda tucu ró quihín rō inga ñuu.

¹¹ Te núu iñ ñuu tu cájetáhú i róhó, ni tu cúní i cuni nahín i jnūhun cahān rō, na quéndacoo ró yúcuán, te scóyo ró tícachā jehē rō, te súcuan stéén rō jeē íyó cuéchi i jeē tu ní cájetáhú i. Jendaá cahán rī jíin ró jeē

quívī coo juicio te xeēn gā coo castigo siquī ñuu cása ha súcuan vésú siquī ñuu Sodoma jíin ñuu Gomorra nuū ní casáha ndasí ñayuu cuéchi.

¹² Te ni quendacoo de cuahān de, te ni canacani de jnūhun jeē na nácani ni ñayuu jeē stóo i cuéchi i.

¹³ Te suni ni caquenehen de cuehē tachī ini ñayuu. Te ni cachihí de aceite cuehē ñayuu cácuñu, te ni canduvāha i.

Jeē ni jhī Juan tēe scuándute

(Mt. 14.1-12; Lc. 9.7-9)

¹⁴ Te rey Herodes ni jini jnūhun de jnūhun Jesús, chi ni jitē núu jnūhun ya ní cáhnu. Te ni cahān de:

Tēe yúcuán cúu Juan tēe ni scuándute, te ni natecu de. Jeē yúcuán íyó poder de sáha de jniñu jéhu. Achí de.

¹⁵ Te sava ga ñayuu ni cacahān i:

Tēe un cúu Elías jeē ní nacani jnūhun jenahán.

Te sava ga i ni cacahān:

Tuú chi iñ tēe nácani jnūhun Yaā Dios cúu de, nájnūhun tēe ni canacani jnūhun ya nde jenahán, achí i.

¹⁶ Te ná ni jini Herodes, te ni cahān de:

Tuú chi yúcuán cúu Juan jeē ní ndacu ri jniñu ni tahndē xinī, te ni natecu de núu súcuan, achí de.

¹⁷ Chi máa Herodes ni ndacu de jniñu jeē na quívī Juan vecāa, jíin jéē na cónuhñí de jíin cadena. Súcuan ní sáha de jeē siquī Herodías, ñasihí ñani de Felipe. Chi Herodes ni quihin de ña jeē cúu tucu ña ñasihí de.

¹⁸ Te Juan ni cahān de nuū Herodes:

Tu íyó ley jeē cóndeca ró ñasihí ñani rō, achí de.

¹⁹ Te jeē yúcuán Herodías ni jito uhū ña Juan, te cúní ña jeē na cúu de, te tu ní níhín ña modo.

²⁰ Chi Herodes yúhú de cahni de Juan, chi jíin de jeē tēe ndaā tēe ndoo cúu Juan. Te jeē yúcuán ní jesi de jeē nducú ña jeē cúu Juan. Te nújnahan ni de jíini nahín de jnūhun cahán Juan, vésú tu jécūhun vāha ni de.

²¹ Te ni quee iñ quívī jeē ní cundeyí Herodías. Chi ni sáha Herodes iñ vico quívī ní cacu de, te ni jēhe de jeē ní cacuxíni tēe cándiso jniñu nuū de, jíin tēe cácuu capitán, jíin tēe cacujéhu región Galilea.

47 Te jeē ní cuaa, te barco un je ni cuu sava nuū mar cuahān, te máñuhún-ni ya ni quendōo nuū ñuhun íchi.

48 Te ni jito ya jeē yōhyo jnūndóho cáscaca de barco, chi nīhin vēji tachī ichi núu de. Te jeē yínee gā ni quee ya nuū de, jíca jéhé yá nuū mar. Te yāha ya nuū de quihīn yā nuū.

49 Te ni cajito de jeē jíca ya nuū mar, te ni cajeni ni de jeē jihná cúu, te ni cacana cóhó de.

50 Chi ndihī de ni cajito nuū yā, te ni cayūhú ndasí de. Te ni cahān-ni ya jíin de:

Ndeyí coo ni rō, te ma yūhu ró, chi máá rí cúu, áchí yá.

51 Te ni quīvi ya ini barco un, te ni jecuiñī-ni tachī. Te yōhyo ni canaa ni de cájito de.

52 Chi cándāa néé gá jeē níjnūnī de, chi ni jíin jniñu jéhu jeē ní nducuehē staā, tu ní cájecūhun ni de jeē maá yá cúu Yaā ní tají Yaā Dios.

Jeē ní nasávāha ya ñayuu cácuñū región Genesaret

(Mt. 14.34-36)

53 Te ni quenda jíyo ya jíin de nuū mar ún, ní jinū yā región Genesaret. Te yundúte un ní cajihni de barco.

54 Te nuū ní quenda ya jíin de ini barco, te ñayuu yúcuñān ni canacuni-ni i ya.

55 Te yachī ni jengoo i tēcá ndañū yūcuán, te ni caquindeca i ñayuu cácuñū, cáyosó i nuū camilla, vējicoo ñayuu nuū ní jito i íne ya.

56 Te ndé-ni cúu-ni núu ni quīvi ya, núu ñuu lulí, chí ñuu cáhnu, chí rancho, te cájequin i ñayuu cácuñū yuhíchi, te cácahān ndahú i jíin yá jeē na quéhé i vēsú yusáhma ya. Te tāca ñáyuu jeē ní caquehé sahma ya, ni canduvāha-ni i.

Siquī ndese cújnehén ñayuu

(Mt. 15.1-20)

7

1 Yūcuán na te tēe grupo fariseo jíin jecu tēe cástéén tutu ley Yaā Dios, ni quendacoo de ñuu Jerusalén, te ni quecoo de nuū Jesús.

2 Te tēe un ní cajito de jeē sava tēe cáscuáha jíin Jesús, ni cayejī jnehén de staā, chí tu ní cáscuáha de costumbre jeē nándahá de nuū Yaā Dios. Te ni cacahān siquī de.

3 Chi tēe fariseo jíin ndihī ñayuu hebreo, névāha i costumbre jenahán jēe ma cáji i staā núu tu nandahá váha i xīhna gā.

4 Te núu ni ndecoo i jeē ní jéngoo i nuū yáhu, te tu cáyeji i te núu tu nandahá i. Te íyó cuéhē gā costumbre jenahán jeē casquícu i, nájnūhun jeē ndúndoo taza, tīndohō, cohō cáa, jíin jíto.

5 Te tēe fariseo jíin tēe cástéén tutu ley Yaā Dios, ni cacajñūhún de ya:

Tēe cáscuáha jíin ró, ¿naun tu cáscuáha de costumbre ñayuu jenahán? Chi sa cáyeji jnehén de staā, achí de.

6 Te ni cahān yā jíin de:

Ndaā ni nacani Isaías jnūhun siquī ró jíin náhan ró jēe tēe stáhú-ni cácuu ró. Chi súcuñān ni tee de jnūhun ni cahān Yaā Dios nde jenahán:

Ñayuu yáha chí máá yuhu-ni i cájetáhú i ruhū,

te nasūu ndé jíin ini jíin ánuá i.

7 Te cáchiñūhún sáa-ni i ruhū, chí jnūhun cástéén i cúu jniñu ní candacu tēe,

te nasūu jēe ní ndacu máá rí cúu.

Achí Yaā Dios. Achí Isaías.

8 Súcuñān cácuu ró, chí ni casíáa ró jniñu ní ndacu Yaā Dios nuū rō, te cáscuáha ró costumbre jeē ní cajequin ñayuu, jeē ndúndoo tīndohō jíin taza. Te cuehē gā costumbre súcuñān cáscuáha ró, áchí yá.

9 Te suni ni cahān yā:

Cásiáa ró jniñu ní ndacu Yaā Dios, návāha siquícu ró costumbre ni cajequin máá ró.

10 Chi Moisés ni cahān de: Coo yíñūhún ró jíin tátá ró jíin náná ró. Te núu ndé ñn cahān siquī tátá chí siquī naná, na cúu nahín. Achí Moisés.

11 Te máá ró chí cácahān ró jeē cuu cahān ñn tēe jíin tátá de náná de: Ma cúu chindéé ñáhán ná níhín cuáha na jēe cáji ni jēe cúhun ní, chí ndihī jeē névāha ná, chí Corbán cúu, áchí ró. (Te jnūhun Corbán cuní cahān jeē ní sócō nuū Yaā Dios.)

12 Te cácahān ró jeē núu súcuñān cahān ñn tēe, te tuá cánuu chindéé ñáhán de tátá de náná de.

13 Te súcuñān cástívi ró jniñu ní ndacu Yaā Dios, jeē siquí costumbre ni cajequin ñayuu jenahán vēji. Te cuehē gā jniñu súcuñān cácahá ró, áchí yá.

14 Te ni cana tucu ya ñayuu cuehē ún, te ni cahān yā jín i:

Cuni sōho vāha ró jínáhan ró, te chuhun ni rō:

15 Tāca jēe iyó, te núu ni quívi yuhu ñayuu te tu cújnehén i sáha. Chi jeē quénda ini anuá ñayuu, yūcuan cúu jeē cujnehén i sáha.

16 Tāca rōhó jēe jini sōho, na chúsóhó ró, áchí yá.

17 Te ni stóo ya ñayuu cuehē ún, te ni quívi ya ini vehe. Te tēe cáscuáha ún, ni cacajnūhún de ya síquī jnūhun yátá yáha jēe ni cáhān yā.

18 Te ni cahān yā jín de:

¿A máá ró suni ná tu jecūhun ni rō, chí naún? ¿A tu cájini rō jeē tāca jēe quívi ini ñayuu, ma cúu cujnehén i sáha?

19 Chi tu quívi ini anuá i, chi chíji i quívi, te quénda-ni cuahān, achí yá.

Súcuan ni steén yā jeē tāca jēe yéji ñayuu, tu cújnehén ánuá i sáha.

20 Te ni cahān gā yā:

Jeē quénda ini anuá ñayuu, yūcuan cúu jeē cujnehén i sáha.

21 Chi nde ini anuá ñayuu quénda jeē jéni néé ni, jeē casíquí ndēe jnāhan, jeē jíca jnéni, jeē jéhni ndíyi,

22 jeē sacuíhná, jeē ndíyo ni ndajníñu jnāhan, jeē sáha néé, jeē stahú jnāhan, jeē máni cuēchi sáha, jeē cucuésún ni, jeē cahán yāa síquī jnāhan, jeē sandúxí máá, jeē canéé xíní.

23 Tācá jniñu néé yáha, máni ini anuá ñayuu quénda, te cújnehén i sáha, áchí yá.

*Ñahan inga nación jeē ní candíje nihin
(Mt. 15.21-28)*

24 Te ni quenda ya yūcuan cuahān yā región Tiro jín Sidón. Te ni quívi ya ñn vehe, te cúní yā jeē tú ni ñn ñayuu cuni jeē íne ya yūcuán. Te vésú súcuan, te tu ní cúu cone sáhi yá.

25 Te ñn ñahan íyó séhe síhí ña jeē ñúhun tachí ini i, ni nihín-ni ña jnūhun jeē íne ya. Te ni quee ña, te ni jecuíñí yití ña nuū jehé yā.

26 Te ñahan ñuu jicá cúu ña, chi nde Sirofenicia cúu nación ña. Te ni cahān ndahú ña jín yá jeē na quenehen ya tachí ini séhe síhí ña.

27 Te ni cahān Jesús jín ña:

Nasūu núu maá ní vēji ná, chi máni nuū ñáyuu cácuu séhe Israel. Chi tu íyó vāha jeē quénde yō staā séhe te cuāha yó núu ina, achí yá.

28 Te ni cahān ña:

Jendaá cahán ni Tātā, te chindéé ñáhán ní sáña vésú cúu ná nájnūhun ina. Chi suni máá tí cáhīn tí chíji mesa, cánihín tí staā cuechí jēe cóyo yuhu sūchi lúlí cáyeji tí, achí ña.

29 Yūcuán na te ni cahān yā jín ña:

Vāha ni cahān ní. Cuahán ní núu súcuan, chi je ni quenda tachí ún ini séhe síhí ní, achí yá.

30 Te ni najinū ña vehe ña, te ni jito ña jeē catú séhe síhí ña nuū jito, te je ni quenda tachí ún ini i.

Jeē ní nasávāha ya ñn tēe sóhó cásteté

31 Te ni quenda tucu ya región Tiro, ni yāha ya Sidón jín táca ñuu Decápolis, te ni jinū yā mar Galilea.

32 Te ni caquindeca i ñn tēe sóhó cásteté nuū yā, te ni cacahān ndahú i jín yá jeē na sóo yá ndaha ya síquī de.

33 Te ni quenehen sín ya de nuū ñáyuu cuehē ún, te ni chune ya xiní ndáha ya sōho de, te ni tesíhi yá, te ni quehé yá yaá de.

34 Te ni ndacoto ya ichi ándiví, te ni jitū ni yā, te ni cahān yā:

Efata, achí yá, jeē cuní cahān: Nanune.

35 Te ni nanune-ni sōho de, te ni nduvāha yaá de, te ni nacadahān vāha de.

36 Te ni ndacu ya jniñu nuū ñáyuu un jēe ma cáchi i nuū ní ñn. Te vésú ni cahān nihin ya jín i, te víhyá gā ni cajete i jnūhun.

37 Te yōhyo ni canaa ni i cájito i, te ni cacahān i:

Vāha sáha ya tācá jniñu, chi nde tēe cásohó, cánacuni sōho de, te tēe cándāa ñíhín, cánacadahān vāha de sáha ya, achí i.

*Jeē ní scáji yā cuūn mil ñayuu
(Mt. 15.32-39)*

8

1 Te tiempo un ní candutútú cuéhē ndasí ñáyuu, te tuá na vé caji i. Te ni cana Jesús tēe cáscuáha jín yá, te ni cahān yā:

2 Cúndáhú ni rī ñayuu yāhá, chi je ni cuu unī quívi cáyúcú i jín rí, te tuá na vé caji i.

³ Te núu natajǎ rí i quinhun ndite i vehe i, te cuíta íi i sava ichí, chí íyó sava i jeē jicá véjicoo i, áchí yá.

⁴ Te tēe cáscuáha un ní cacahān de:

¿Te ndé nuū nihín yō staā caji i jíjnáhan i? Chí yāhá tú na ñayuu yúcu, áchí de.

⁵ Te ni cajnúhun yá de:

¿Nasaa staā cánevāha ró?

Te ni cacahān de:

Uxā-ni, áchí de.

⁶ Yūcuán na te ni cahān yā jíin ñáyuu cuehē un jēe na cúcoo i. Te ni quihin ya ndihúxá staā ún, te ni nacuatáhú yá nuū Yaā Dios. Te ni tahu cuéché yá, te ni jēhe ya nuū tēe cáscuáha jíin yá. Te máá de ni casaja de nuū ñáyuu cuehē ún.

⁷ Te suni cándiso de jecu chācá lúli. Te ni nacuatáhú yá siquī, te ni cahān yā jeē suni saja de jíjnáhan de.

⁸ Te ndihí i ni cayeji, te ni candutú chíji i. Yūcuán na te ni canastútú de pedazo jeē ní quendōo, te ni chitú úxā jīca.

⁹ Te tēe ni cayeji un, íyó nájnūhun cuūn mil de. Te ni nacuatáhú yá nuū ñáyuu ún, te cuanungoo i.

¹⁰ Yūcuán na te ni ndivi-ni ya ini barco jíin tēe cáscuáha jíin yá, te cuahān yā región Dalmanuta.

*Jeē ní cajicān de ñn jniñu jéhnu nuū yā
(Mt. 16.1-4; Lc. 12.54-56)*

¹¹ Yūcuán na te ni quecoo tēe grupo fariseo, te ni caquejéé de stíchi de Jesús. Te cácu ni de coto ndee de ya, te ni cajicān de jeē sáha ya ñn jniñu jéhnu jeē coo ñn seña ichí ándivi.

¹² Te ni jítu ni yā siquī jeē tu cácdíje de jíjnáhan de, te ni cahān yā:

¿Naun cájicān ñayuu yáha ñn jniñu jéhnu nuū rí? Jendaá cahán rí jeē ma stéén rí ni ñn jniñu jéhnu nuū ñáyuu yāhá.

¹³ Te ni squéndōo ya de jíjnáhan de, te ni ndivi tucu ya ini barco, te cuahān yā inga lado mar.

*Jnúhun levadura tēe fariseo
(Mt. 16.5-12)*

¹⁴ Te tēe cáscuáha jíin yá ni canaa ni de condiso de jeē cáji de, chí ñn-ni pan cánevāha de ini barco.

¹⁵ Te ni ndacu ya jniñu nuū de:

Coto má candíje ró levadura tēe grupo fariseo jíin levadura Herodes, achí yá.

¹⁶ Te ni cacahān tēe cáscuáha un jíin táca jnáhan de:

Va siquī jeē tú na staā ndíso yó, jeē yúcuán cáhán yā súcuán, áchí de.

¹⁷ Te ni jini Jesús, te ni cahān yā:

¿Najehē cándajnūhun ró jeē ni cáhán rí súcuán siquī jeē tú na staā cándiso ró? ¿A ná tu cuni rō, á ná tu jecūhun ni rō jeē tu ní cáhán rí súcuán siquī jeē tu cándiso ró stáá? ¿A yóhoyo uun ni rō candíje ró?

¹⁸ Iyó tñūu ró ¿te á tu cájito ró? Iyó sóho ró ¿te á tu cájini ró? ¿Te á tu cánucūhun ni rō?

¹⁹ Chí ná ni tahu cuéché rí uhūn staā ni cayeji uhūn mil tēe, ¿te nasaa jīca ni chitú pedazo staā jeē ní canastútú ró? Achí yá.

Te ni cacahān de:

Uxī uū jīca, áchí de.

²⁰ Te suni súcuán ná ni tahu cuéché rí uxā staā ni cayeji cuūn mil tēe, ¿te nasaa jīca ni chitú pedazo staā jeē ní canastútú ró? Achí yá.

Te ni cacahān de:

Uxā jīca, áchí de.

²¹ Te ni cahān yā jíin de:

Te nde vijna ¿á ná tu jecūhun ni rō jijnáhan ró?

Súcuán ni cahān yatá yá jeē ma cándíje de jnúhun stáhú cástéén tēe ún.

Jeē ní nasávāha ya tēe cuáá ñuu Betsaida

²² Yūcuán na te ni jinū yā jíin de ñuu Betsaida. Te ni caquindeca ñayuu ñn tēe cuáá núu yā, te ni cacahān ndahú i jíin yá jeē na tēe ya ndaha ya nuū de.

²³ Yūcuán na te ni jniñu ya ndaha tēe cuáá un, te ni quenehen ya de yatá ñúu ún. Te ni tee ya tesíhi yá tñūu de, te ni tee ya ndaha ya siquī. Te ni cajnúhun yá de núu cuu coto de jecu.

²⁴ Te ni ndacoto de, te ni cahān de:

Jíto ná ñayuu jeē cájica i, te tu jíto cáji ná, chí ná cáa yujnu cáa i, áchí de.

²⁵ Yūcuán na te ni tee tucu ya ndaha ya siquī tñūu de. Te ni ndacoto vāha de, te ni nduvāha-ni tñūu de, te ni jíto cáji de ndihí-ni.

²⁶ Te ni natajǎ yá de quinhun de vehe de, te áchí yá:

Ma quívi ró ñuu, ni ma cáchi cuiti rō nuū ní ñn, áchí yá.

Jeē ni cáhān Pedro jeē Jesús cúu Cristo
(Mt. 16.13-20; Lc. 9.18-21)

²⁷ Yūcuán na te Jesús jíin tēe cáscuáha jíin yá, cuahān yā tācá ndañū Cesarea Filipo. Te ichi un ní cajñūhun yá de:

Ruhū, ¿ndé ñn cúu ri cácahān ñayuu?

²⁸ Te ni cacahān de:

Sava i cácahān jeē cúu ní Juan tēe ni scuándute. Te sava ga i cácahān jeē cúu ní Elías, tēe ni nacani jñūhun Yaā Dios nde jenahán. Te sava ga i cácahān jeē inga tēe ni nacani jñūhun Yaā Dios cúu ní.

²⁹ Yūcuán na te ni cajñūhun yá de:

Te máá ró, ¿ndé ñn cúu ri cácahān rō?

Te ni cahān Pedro:

Máá ní cúu Cristo, Yaā ní tají Yaā Dios, achí de.

³⁰ Te ni ndacu ya jniñu nuū de jíjnáhan de jeē ma cáchi de jñūhun yáha nuū ní ñn ñayuu.

Jeē ní castūhún Jesús jeē cúu yā
(Mt. 16.21-28; Lc. 9.22-27)

³¹ Te ni quejéé yá steén yā nuū de:

Máá rí, Yaā ní nduu tēe, cánuú ndoho xeēn rī. Te tāca tēe jéhu jíin sūtū cácujeñu jíin tēe cástéén tutu ley, squéhichī de ruhū, te cahni de ruhū. Te nuū uní quívi te natecu rī, achí yá.

³² Te cájí ní cahān yā jñūhun yáha. Yūcuán na te Pedro, ni cana máñuhún de ya, te ni quejéé de cáhān de nuū yā jeē ma cuáha ya jñūhun coo súcuan.

³³ Te máá yá ni ndió cóto ya ni jito ya nuū tēe cáscuáha jíin yá. Te ni cahān yā nuū Pedro:

Cujiyo quihīn rō, chí cáhān rō ná cáhān Satanás. Chí tu jéni ní rō nájnūhun jéni ní Yaā Dios, chí sa suhva jéni ní rō nájnūhun cájéni ní ñayuu, achí yá.

³⁴ Te ni cana ya tēe cáscuáha jíin yá jíin ñáyuu cuehē ún, te ni cahān yā:

Na-ni ñayuu núu cúní i condiquīn i ruhū, na cási i jeē cúní maá i, te na condiquīn i ruhū te cuáha i jñūhun ndoho i jñūndóho jeē síquí rī, vésú na cúu i.

³⁵ Chí núu ndé ñáyuu cúní i cácu i nuū jñūndóho quiji nuū i jeē síquí ruhū, núu súcuan te jñahnū ndetū i ñí cáni. Te núu

ndé ñáyuu, vésú na cúu i jeē síquí ruhū jíin síquí jeē scáca i jñūhun jeē jnáma ri ñayuu, núu súcuan te cotecu i ñí cáni.

³⁶ ¿Chí ndé cuajniñu vésú na cúndeyí ñáyuu nihīn i ñí ñáyiví, te núu quívi i nuū jñahnū ndetū i?

³⁷ Chí tú na jíin cuiti chunaa ñayuu jeē cácu ánuá i.

³⁸ Te ñayuu yáha tu cácañdeje cuiti i, te máni máá cuéchi cása i. Te núu na-ni ñayuu cúcanu i nuū ñáyuu yáha jeē síquí ruhū, Yaā ní nduu tēe, jíin síquí jñūhun cáhān rī, suni súcuan cucanu rī jeē síquí máá i, quívi ndíji ri jíin táca ndajéhé ndoo ri. Te quívi ún chí yōhyo luu cujéhu ri nájnūhun cújéhu Tátá rī. Achí yá.

9

¹ Te suni ni cahān yā jíin de jíjnáhan de:

Jendaá cahān rī jíin ró jeē sava tēe cáhīn yáha, ma cúu de chí nde cuni de jeē ndácu Yaā Dios jniñu jíin poder yā, achí yá.

Jeē tucu ni nduu ya
(Mt. 17.1-13; Lc. 9.28-36)

² Yūcuán na te nuū iñú quívi te Jesús ni jeca ya Pedro jíin Jacobo jíin Juan, cuahān sán ya jíin de ñn yucu súcún. Te yūcuán, tucu ni nduu ya nuū de.

³ Te sahma ya ni ndindéé, te ni nducujín quiyi, nájnūhun yuhvā volcán. Te tú ni ñn ñayuu ñáyiví yáha cuu nacate jeē ndúquiyi ndasí súcuan.

⁴ Te ni cajito de jeē Elías jíin Moisés cándajnūhún de jíin yá.

⁵ Yūcuán na te ni cahān Pedro jíin Jesús:

Maestro, nacā jeē váha jeē cáhīn na yáha. Te na sáha ná úní vehe ramada, ñn cuu máá ní, inga cuu Moisés, te inga cuu Elías, achí de.

⁶ Chí yōhyo ni cayūhu tēe cáscuáha ún, te Pedro tu ní sáha de cuenta na vé cúu jeē cáhān de.

⁷ Te ni quiji vicō nūhun ní jesi-ni nuū de. Te nuū vicó un ní cahān ñn jñūhun:

Yáha cúu Sēhe ri jeē maní ndasí rí jíin. Te na cúní nahín ró jñūhun cáhān yā. Achí.

⁸ Te ni candacoto-ni de, te tuá tēe un ní cájito de, chí máá ñn na Jesús.

⁹ Te ni cananuu de jíin yá yucu ún. Te ni ndacu nihīn ya jniñu nuū de jeē ma cáchi de

nuū ní ñn jeē súcuan ni cajito de, chi nde na nátecu maá yá, Yaā ní nduu tēe, áchí yá.

¹⁰ Jeē yúcuan ní cachuvāha de tāca jéē ní cuu ún, te cácajnūhun jnāhan de na jnūhun cúu jeē nátecu yā.

¹¹ Te ni cacajnūhún de ya:

Te tēe cástéén tutu ley Yaā Dios, ¿najehē cácahān de jeē cánuú ndiji Elías xīhna gā, te sáá te quiiji Yaā cúu Cristo? achí de.

¹² Te ni cahān yā:

Jendaá cúu jeē xīhna gā quiiji ñn tēe cúu nájñūhun Elías, te sátūhva de ndihí, áchí tutu. ¿Te ndese cáhán tucu tutu ñ siquī ruhū, Yaā ní nduu tēe? Cáhán jeē ndoño xeēn rī, te sájéē ni i nuū rī.

¹³ Te cáhán rī jíin ró jeē jé ni quiiji tēe ni cuu nájñūhun Elías, te ni casáha ndevāha ñayuu jíin de tāca jéē ní cacuu ni maá i, nájñūhun cáhán jñūhun de nuū tútu, áchí yá.

Jeē ní nasávāha ya ñn sūchi ñúhun tachī ini (Mt. 17.14-21; Lc. 9.37-43)

¹⁴ Te ni najinū yā jíin de nuū sava ga tēe cáscuáha jíin yá, te ni cajito ya ñayuu cuehē ndasí, ni cajicó ndúu i de. Te suní cáhīn tēe cástéén tutu ley Yaā Dios, cátejnāhan jíin de.

¹⁵ Te nuū ní cajito tāca ñayuu un jéē véji ya, te ni canaa ni i. Te cájinu i cuango i nuū yā jeē cahān i jíin yá.

¹⁶ Te ni cajñūhun yá i:

¿Na siquī cátejnāhan ró jíin de jíjnāhan de? áchí yá.

¹⁷ Te ni cahān ñn tēe íne yūcuán:

Maestro, vendeca ná séhe ná núu ní, chi ñúhun ñn tachī ini i, te ni cuñhín i ni sáha.

¹⁸ Te ndé-ni cúu nuū íne i, te tachī un scótúu i, te jéhni yīhí-ni i. Te jéē tiñū yuhu i, te squíhñi jñūhun i. Te cuacuxíi ndasí i sáha. Te ni cahān ndahú ná jíin tēe cáscuáha jíin ní jeē na quenehen de tachī ún, te tu ní cúu sáha de, áchí de.

¹⁹ Te ni cahān yā jíin de jíjnāhan de:

Ñayuu tu cándije cuiti cacuu ró. ¿Nasaa ga quiví condee rī jíin ró? ¿Te nasaa ga quiví cuandeyí ni rī jíin ró? Cuáquihin sūchí un, na quíji i, áchí yá.

²⁰ Te ni caquindeca de i nuū yā. Te nuū ní jito tachī un núu yā, te ni jehni yīhí-ni i. Te ni cotúu i, te cónehén cócáni i, te jéē tiñū yuhu i.

²¹ Te Jesús ni cajñūhun yá tatá i:

¿Nasaa cuiyā ni cuu jeē sáha súcuan jíin i? Te ni cahān de:

Nde lulí i.

²² Te ni cuu cuehē jínu scótúu táchī ún i nuū ñuhún nuū ndúte, jeē cáhni i cúní. Te núu cuu sáha ní, te cundáhú ni ní chindéé ñáhán ní sāña jéē ndúvāha sēhe ná, áchí de.

²³ Te ni cahān Jesús jíin de:

Núu cuu cándije ró jéē sáha rí, chi ñayuu cándije te cuu tāca jéē cuní i, áchí yá.

²⁴ Te máá tátá sūchí un ní cahān jee de:

Cándije ná, te chindéé ñáhán ní sāña jéē cándije ñihin ga ná, áchí de.

²⁵ Te ni jito Jesús jeē ní cutútú cuéhē ñayuu nuū yā. Te ni cahān yā nuū tachí:

Tachí jeē sañhín sásóhó, ruhū ndácu rí jñiñu jeē na quenda ró ini sūchi yáha, te ma ndívi ga rō ini i, áchí yá.

²⁶ Yūcuán na te ni cana cóhó táchī ún, te ni jehni yīhí tucu i, te ni quenda cuahān. Te sūchí un ní cuu i nájñūhun ndívi. Te ni cacahān cuehē ñayuu jeē jé ni jihí i.

²⁷ Te Jesús ni jñi ya ndaha i, te ni ndonehen ya i, te ni nucuiñi-ni i.

²⁸ Yūcuán na te ni quívi ya ini ñn vehe, te tēe cáscuáha jíin yá, ni cacajnūhun sín de ya:

¿Najehē tu ní cúu quenehen ná tachí un jíjnāhan ná? áchí de.

²⁹ Te ni cahān yā:

Ñn tachí súcuan chi ma quenda cuiti te núu tú cacān tahú rō te coo ndite ni rō, achí yá.

Jeē ni cahān tucu ya jeē cúu yā

(Mt. 17.22-23; Lc. 9.43-45)

³⁰ Te ni quenda ya yūcuan jíin de jíjnāhan de, te ni yāha ya ndañú Galilea cuahān yā. Te tu ní cúní yā jeē cúní ni ñn ñayuu.

³¹ Chi stéén yā nuū tēe cáscuáha jíin yá, te áchí yá:

Máá rí, Yaā ní nduu tēe, nastúu i ruhū nuū tāca tēe xeēn. Te cahni de ruhū, te núu ni jihí rī, te nuū uní quiví te natecu rī, achí yá.

³² Te tu ní cájecūhun ni de jñūhun yáha, te cáyūhú de cajñūhún de ya siquī jñūhun ni cahān yā.

Ndé ñayuu cúu jeē cujéhnu ga

(Mt. 18.1-5; Lc. 9.46-48)

33 Te ni jinū yā jín de ñuu Capernaum, te nuū ni quívi ya ini vehe, te ni cajnūhun yá de:

¿Na jnūhun ni candajnūhun ró ichi véji yó? áchí yá.

34 Te tu ní cácahān cuíti de, chi ichi un ní cacahān de siquī núu ndé ñn de cújéhnū ga.

35 Yūcuán na te ni cucōo ya, te ni cana ya ndihúxí uū de, te ni cahān yā:

Núu ndé ñn ró cúní cújéhnū ga, na cúu ró tée núu ga nuū tāca jnáhan ró, te cuajníñu ró núu jnáhan ró.

36 Yūcuán na te ni jñi ya ndaha ñn sūchi lúli, te ni jeni ya i mēhñú de jíjnéhan de. Te ni nundee yā i, te ni cahān yā jín de:

37 Na-ni ñayuu núu jeē siquí ruhū jetáhú i ñn sūchi lúli nájnūhun sūchi yáha, te ruhū jetáhú i. Te ñayuu jetáhú ruhū, nasūu máá ñn-ni ruhū, chí suni Yaā ní tají ruhū jetáhú i, áchí yá.

*Ñayuu tu cáhán siquī yā, ín i jín yá
(Mt. 10.42; Lc. 9.49-50)*

38 Yūcuán na te ni cahān Juan jín yá:

Maestro, ni cajito ná ñn tée jeē jín síhví ní quénehen de tachí ini ñayuu. Te ni cajesi ná jéē sáha de, chi tu jíca de jín yó, achí de.

39 Te ni cahān Jesús jín de:

Ma cási rō jeē sáha de. Chi ni ñn tée jeē jín síhví rí sáha de jniñu jéhnū, ma cúu nacahān de siquī rí.

40 Chi tée tu cáhán siquī yō, ín de jín yó.

41 Te na-ni ñayuu núu jeē siquí ruhū cuāha i vēsú ñn ñajin ndute coho ró, siquī jeē cácañdije ró ruhū, ndaā ndije cúu jeē nihín i tahū i. Achí yá.

*Xeēn coo siquī ñáyuu quívi nuū cuéchi
(Mt. 18.6-9; Lc. 17.1-2)*

42 Te núu ñn sūchi lúli yáha cándije i ruhū, te núu quívi i cuéchi sáha na-ni ñayuu, te vāha ga núu ni conuhnī ñn yōso cáhnū sucūn ñayuu ún, te quēe i chíji ndute mar nuú.

43 Te núu ndaha ró sáha jeē quívi ró cuéchi, vāha ga cahnde rō na quíhín, návāha tuá sáha ró cuéchi. Chi vāha ga jeē cóndee ñn-ni ndaha ró te quívi ró núu cotecu rō ní cáni, vēsú jeē cóndee ndindúú ndaha ró te quívi ró infierno, nuū cayú ñuhūn jeē ma ndahvá cuíti.

44 Te yūcuán chi tu cájihī tindacú, te tu ndáhvá cuíti ñuhūn.

45 Te núu jehē rō sáha jeē quívi ró cuéchi, suni vāha ga cahnde rō na quíhín, návāha tuá sáha ró cuéchi. Chi vāha ga jeē cóo cúhndu ró te quívi ró núu cotecu rō ní cáni, vēsú jeē cóndee ndindúú jehē rō te quívi ró infierno, nuū cayú ñuhūn jeē ma ndahvá cuíti.

46 Te yūcuán chi tu cájihī tindacú, te tu ndáhvá cuíti ñuhūn.

47 Te núu tinūu ró sáha jeē quívi ró cuéchi, vāha ga tava ró na quíhín, návāha tuá sáha ró cuéchi. Chi vāha ga jeē quívi ró ñuu nuū ndácu Yaā Dios jniñu jín ñn na tinūu ró, vēsú jeē cóndee ndindúú tinūu ró te quívi ró infierno.

48 Te yūcuán chi tu cájihī tindacú, te tu ndáhvá cuíti ñuhūn.

49 Chi nájnūhun quénda vāha oro sáha ñuhūn, súcuan quénda vāha ñayuu sáha jnūndóho. Te tāca cúñu jeē socó ñayuu nuū yā, cúhuhvuā sáha ññ.

50 Vāha íyó ññ, te núu ññ ún na náā jeē uhvuá, ¿te ndese nduu uhvuā tucu sáha ró? Núu súcuan te cuu ró ñáyuu vāha, nájnūhun íyó vāha ññ. Te na cóyūcu vāha ró jín jnáhan ró. Achí yá jín de.

*Siquī jeē ma stóo jnáhan tée jín ñahan
(Mt. 19.1-12; Lc. 16.18)*

10

1 Te ni quenda ya ñuu Capernaum, te ni jinū yā región Judea, inga lado yūte Jordán, ichi nuū cáne niāndii. Te yūcuan ní cutútú tucu ñayuu nuū yā, te ni steén tucu ya jnūhun nuū i, nájnūhun sáha ya.

2 Yūcuán na te jecu tée grupo fariseo ni quecoo de nuū yā, chí cácuni de coto ndee de ya núu ndese cahān yā. Te ni cacajnūhún de ya núu íyó ley jeē cuu ndusín ñn tée jín ñasíhí de.

3 Te ni cahān yā jín de:

¿Na jniñu ni ndacu Moisés nuū rō nde jenahán?

4 Te ni cacahān de:

Moisés ni jēhe de jnūhun jeē cúvāha ñn acta jeē ndusín de jín ña, te ndōo ña, áchí de.

5 Te ni cahān Jesús jín de:

Siquī jeē níhni ní rō jijnáhan ró, jeē yúcuan ní ndacu de jniñu yáha núu rō.

6 Te nde xīhna ñúhún, ná ni sáha Yaā Dios ndihí, chí tée jín ñahan ní sáha ya.

⁷ Jeē yúcuán cúu jeē stóo tēe tátá de náná de, te quijnáhan de jíin ñasihí de.

⁸ Te ñin na cuu ndindúú de, áchí Yaā Dios. Núu súcuán te tuá cúu uū jnáhan de, chí ñin na cúu.

⁹ Jeē yúcuán tu íyó váha jeē stóo jnáhan, chí jeē ni squíjnáhan Yaā Dios cúu, áchí yá.

¹⁰ Te tēe cáscuáha ún nuū ni quívicoo de vehe, te ni cacajnūhún tucu de ya siquī jnúhun ún.

¹¹ Te ni cahān yā jíin de:

Núu ndé tēe stóo de ñasihí de te condeca de inga ñahan, núu súcuán te cásiquí ndéē de ñasihí de.

¹² Te núu ñin ñahan stóo ña yī ña te condeca ña inga tēe, suni cásiquí ndéē ña de. Achí yá.

*Jeē ni jicān tahu Jesús jehē sūchi lúlí
(Mt. 19.13-15; Lc. 18.15-17)*

¹³ Yūcuán na te ni quecoo ñayuu jíin sūchi lúlí, jēē na sóo yá ndaha ya xinī i. Te tēe cáscuáha jíin yá, ni cacahān de nuū ñayuu vējicoo jíin i.

¹⁴ Te ni jito Jesús, te ni quitī ni yā, te ni cahān yā jíin de:

Cuāha jnūhun na quíjicoo sūchi lúlí jíñā nuū rī, te ma cási rō jeē quíjicoo i. Chí ñayuu jeē ndió cóo ni i canī ni i nájnūhun sūchi yáha, suu i quívi ndaha Yaā andiví jeē ndacu ya jniñu nuū i.

¹⁵ Te jendaá cahán rī jíin ró, núu ñin ñayuu tú cuatáhú i jeē ndácu Yaā Dios jniñu nuū i, nájnūhun jétáhú ñin sūchi lúlí, ma quívi cuítī i ndaha ya, achí yá.

¹⁶ Te ni nundee ya i, te ni sóo yá ndaha ya xinī i, te ni jicān tahu yā jehē i jíjnáhan i.

*Jnūhun tēe cúcá
(Mt. 19.16-30; Lc. 18.18-30)*

¹⁷ Yūcuán na te ni quihin tucu ya ichi cuahān yā. Te jínu ñin tēe ni quee de, te ni jecuiñī yití de nuū yā, ni cajnūhún de ya:

Tēe vāha cúu ní Maestro. Te cachi ní, ¿na jniñu váha sáha ná te nihīn tahu na cotecu na ní cáni andiví? áchí de.

¹⁸ Te ni cahān yā jíin de:

¿Naun cáhán rō jeē tēe vāha cúu rī? Tú ni ñin tēe vāha íyó, chí máá ñin-ni Yaā Dios.

¹⁹ Je jíin rō táca jniñu ní ndacu Yaā Dios: Ma cosíquí ndéē jnáhan ró. Ma cáhni rō ndīyī. Ma sacuíhná ró. Ma sajnūhún ró. Ma

stahú ró jnáhan ró. Cuatáhú ró nuū tátá rō nuū naná rō. Achí yá.

²⁰ Te ni cahān tēe un jíin yá:

Tācá jniñu yáha je ni squícu ná ndé ná lulí ná, Maestro, achí de.

²¹ Yūcuán na te ndáhú jíto ya nuū de jeē cúsiñi ni yā jíin de. Te ni cahān yā:

Ñin na jniñu cúmanī sáha ró núu súcuán. Cuáhán te xīco ró ndihí jeē névāha ró, te cuāha ró núu ñayuu ndahú. Te nde andiví cuāha ya jeē váha ndasí núu rō. Yūcuán na te quiji ró condiquīn rō ruhū, te cuāha ró jnúhun ndoho ró jnúndóho jeē siquí rī, achí yá.

²² Te ná ni jini sōho de jnūhun yáha, te ni jnahuhū ni de, te cúcuíhyá ni de cuahān de, chí cúcá ndasí de.

²³ Yūcuán na te Jesús ni ndacoto ya ní xiin ya, te ni cahān yā jíin tēe cáscuáha jíin yá:

Tēe cúcá chí yōhyo yí quívicoo de ndaha Yaā Dios jeē ndacu ya jniñu nuū de, áchí yá.

²⁴ Te tēe cáscuáha jíin yá, yōhyo ni canaa ni de jeē ní cajini de jnūhun ni cahān yā. Te ni cahān tucu ya jíin de:

Séhē, ñayuu ténuū xūhún, yōhyo yí quívicoo i ndaha Yaā Dios jeē ndacu ya jniñu nuū i.

²⁵ Yachī gā yáha ñin camello yaū yutícuí, vēsú jeē quívi ñin ñayuu cucá ndaha Yaā Dios jeē ndacu ya jniñu nuū i, áchí yá.

²⁶ Te víhyá gā ni canaa ni de cájini de, te ni cacajnūhun jnáhan de:

¿Ndé ñayuu cúu jeē cácu núu súcuán?

²⁷ Te ni ndacoto ya nuū de, te ni cahān yā:

Ñayuu chí ma cúu squívi i máá i ndaha Yaā Dios, te máá yá chí cuu sáha ya, chí ndihí-ni jniñu cuu sáha ya, achí yá.

²⁸ Yūcuán na te ni cahān Pedro jíin yá:

Sāña jíjnáhan ná, ní castóo ná ndihí jeē cánevāha ná, te cándiquīn na níhín, áchí de.

²⁹ Te ni cahān Jesús:

Jendaá cahán rī jíin ró jíjnáhan ró, núu na-ni ñayuu stóo i vehe, chí ñani, chí cuāha, chí tátá, chí náná, chí ñasihí, chí séhe, chí ñuhun, jeē siquí ruhū jíin síquī jeē scāca i jnūhun jeē jnáma rī ñayuu,

³⁰ núu súcuán te nanihīn i ñin ciento gā jeē súcuán vijna, cúu vehe, cúu ñani, cúu cuāha, cúu náná, cúu séhe, cúu ñuhun, te nde jíin jéē

cóto xeēn ñayuu i. Te nde inga vida quiji te cotecu i ní cáni.

³¹ Te cuehē ñayuu jeē vijna cácujeñnu, nduu i ñayuu núu ga. Te ñayuu jeē núu ga vijna, chi ndujéñnu i, áchí yá.

*Jeē ni cáhān tucu ya jeē cúu yā
(Mt. 20.17-19; Lc. 18.31-34)*

³² Te cáñuhun de ichi jeē cáa cuahān ñuu Jerusalén. Te Jesús yósnúu yá nuū tée cáscuáha ún. Te cánaa ni de ni cajini sōho de jñūhun ni cahān yā. Te cáyūhú de cuángoo de jíin yá. Yūcuán na te ni cana sñn tucu ya ndihúxí uū tée cáscuáha, te ni quejéé yá cástūhún tucu ya nuū de tāca jéé quíji siquī yā.

³³ Achí yá:

Cuni sōho ró, chi je cuángoo yó ñuu Jerusalén vijna, te yūcuán nastúu ñayuu ruhū, Yaā ní nduu tée, nuū sutú cácujeñnu jíin núu tée cástéén tutu ley. Te ndonda de siquī rī jeē cúu rī, te squívi de ruhū nuū tée nación Roma jeē cáyūcú Jerusalén cándacu jniñu.

³⁴ Te tāca tée un sácatā de nuū rī, te cani de ruhū, te tesihí de nuū rī, te sáa te cahni de ruhū. Te nuū uní quívi te natecu rī, achí yá.

*Jeē ni jícān Jacobo jíin Juan ñn favor nuū yā
(Mt. 20.20-28)*

³⁵ Yūcuán na te Jacobo jíin Juan, ndindúú séhe Zebedeo, ni quecoo de nuū Jesús, te ni cacahān de:

Maestro, cácuni na jéé sáha ní ñn jeē cacán na núu ní, áchí de.

³⁶ Te ni cahān yā jíin de:

¿Ndese cácuni rō jeē sáha ri jíin ró? achí yá.

³⁷ Te ni cacahān de:

Cuāha ní jñūhun jeē cónēne ná xiin ní quívi ndujéñnu ní, ñn ná lado váha ní, te inga ná lado jecó ní, áchí de.

³⁸ Yūcuán na te ni cahān Jesús jíin de:

Tu cájini rō na vé cúu jeē cájicān rō. ¿A cuu ndoho ró jnúndóho nájnūhun jeē quíji siquī rī? ¿Te á canda ró ndoho xeēn rō nájnūhun ndoho ri? achí yá.

³⁹ Te ni cacahān de:

Cuu sáha ná.

Te ni cahān yā jíin de:

Jendaá jeē ndoho ró jnúndóho nájnūhun jeē quíji siquī rī, te ndoho xeēn rō nájnūhun ndoho ri.

⁴⁰ Te jeē cónēne ró lado váha ri jíin lado jecó rí, nasūu ruhū cúu jeē cuáha jñūhun. Chi je íyó túhva cuu tāca tée jeē ní nacāji Tátá rī, te tée un níhñn, achí yá.

⁴¹ Te uxī gā tée cáscuáha un, ní cajini de jñūhun yáha, te ni caquítī ni de nuū Jacobo jíin Juan.

⁴² Te Jesús ni cana ya de, te ni cahān yā jíin de:

Cájini rō ndese cása ha tée cácujeñnu nuū ñayuu tāca nación. Chi cándacu níhin de jniñu nuū i, te máa de cáchí ndese coo.

⁴³ Te máa ró jijnáhan ró, chi ma sáha ró súcuan. Chi núu ndé ñn ró cúní cujeñnu, sa suhva cuajniñu ró núu jnáhan ró.

⁴⁴ Te núu ndé ñn ró cúní cuu nuū, sa suhva sáha ró máa ró mozo nuū tāca jnáhan ró.

⁴⁵ Chi suni súcuan sáha ruhū, Yaā ní nduu tée, chi nasūu jéé véji ri jeē cuajniñu ñayuu nuū rī, chi sa suhva véji ri jeē cuajniñu ri nuū ñayuu. Te cuāha ri maá rí cuu rī návaha jnama ri cuehē ñayuu, achí yá.

*Jeē ní nasávāha ya Bartimeo tée cuáa
(Mt. 20.29-34; Lc. 18.35-43)*

⁴⁶ Yūcuán na te ni jinū yā ñuu Jericó jíin tée cáscuáha jíin yá. Te sáa te ni quenda ya yūcuan jíin de jíin ñayuu cuehē ndasí. Te Bartimeo tée cuáa, séhe Timeo, néne de yuhíchi, jícān de caridad.

⁴⁷ Te ni jini de jñūhun jeē Jesús ñuu Nazaret véji ya. Te ni quejéé de cána jee de: Jesús Séhe yucūn David, cundáhú ni ní sáña, achí de.

⁴⁸ Te cuehē ñayuu ni cacahān i nuū de jeē na cási de yuhu de. Te máa de víhyá gā ni cana jee de:

Máa ní jeē cúu ní Séhe yucūn David, cundáhú ni ní sáña víi, achí de.

⁴⁹ Yūcuán na te ni jecuiñī Jesús, te ni cahān yā:

Cana de na quíji de.

Te ni cacana i tée cuáa un:

Ndeyí coo ni rō. Ndocuiñī, na quíhñn yō, chi cána ya rohó, achí i jíin de.

⁵⁰ Yūcuán na te ni scáne de ticāchí de, te yachī ni ndocuiñī de, te ni jinū de nuū Jesús.

⁵¹ Te ni cahān yā jíin de:

¿Na vé cuní rō jeē sáha ri jíin ró?
Te máá de ni cahān de:
Maestro, jeē na ndúndijin tinūu ná cuní na, áchí de.

⁵²Te ni cahān Jesús jíin de:

Cuáhán núu súcuan. Ni candíje ró jeē cuu nasávāha ri rohó, te jeē yúcuan ní nduvāha ró, áchí yá.

Te ni ndundijin-ni tinūú de, te ni ndiquin de Jesús cuahān de jíin yá ichi ún.

*Jeē ni quiví Jesús ñuu Jerusalén
(Mt. 21.1-11; Lc. 19.28-40; Jn. 12.12-19)*

11

¹Te ni cuyajni ya ñuu Jerusalén, vēji ya ñuu Betfagé jíin ñuu Betania, jeē íne jehē yucu Olivos. Te ni tají yá uū tēe cáscuáha jíin yá jeē quingoo de.

²Te áchí yá jíin de:

Cuángoo ñuu lulí íne ichi núú. Te núu ni quiví-ni ró yúcuan, te nihīn rō ñin burro núhni tī, jeē ní ñin tēe ná tu coso de tī. Te ndají ró tī, quijicoo ró jíin tī.

³Te núu ndé ñin cajnūhún naun cándají ró tī, te cachi rō: Máá Jítóho yō jíni ñúhún yá tī, te yachí natajái yá tī ndiji tī, achi rō. Achí yá jíin de.

⁴Te cuangoo de, te ni canihīn de burro un núhni tī yehyí núú quéhe nuū náquijnáhan ichi. Te ni cándají de tī.

⁵Te sava ñayuu cáhīn yūcuan ní cacahān jíin de:

¿Na vé cúu jeē casáha ró jeē cándají ró burro jíin? áchí i.

⁶Yūcuán na te ni cacahān de nájnūhun ni cachi Jesús. Te ni casiáá i tī vējicoo de jíin tī.

⁷Te ni ndecoo de jíin tī nuū Jesús, te ni casoó de sahma de siquī tī, te ni jecosō yá tī.

⁸Te cuehē ñayuu ni cascáa i sahma i ini ichi. Te sava ga i ni cajehnde i ndaha ñúú, te ni cachucun i ini ichi ún.

⁹Te ñayuu cuangoo ichi núú jíin ñayuu cuangoo ichi yátá, cácana jee i:

Yōhyo cújéhnu ya. Yōhyo vāha Yaā cúu Yaā jeē véji jíin jniñu máá Jítóho yō Yaā Dios.

¹⁰Te yōhyo luu coo, chi je yajni ndacu ya jniñu nájnūhun ni ndacu jíi yō rey David. Te yōhyo cújéhnu máá Yaā Dios. Achí i.

¹¹Te ni quiví Jesús ñuu Jerusalén, jíin ini templo cáhnu. Te ni jito ya nuū tāca

ndajniñu yúcu ní yúcuan. Te ni quenda ya cuahān yā ñuu Betania jíin ndihúxi uū de, chi je ni ini.

*Jeē ni cahān yā nuū yújnu higo
(Mt. 21.18-19)*

¹²Te inga quiví ún, nuū ní quenda ya ñuu Betania cuahān yā jíin de, te jíi yā sōco.

¹³Te nde jicá ni jito ya ñin nundēhe higo jeē íin ndaha. Te ni jecondēhe yá núu sanaa te nihīn yā ndehē caji yā. Te tú na vé ni nihín yā, chi máá ndaha-ni íin. Chi nasūu tiempo ndehē cúu.

¹⁴Yūcuán na te ni cahān yā nuū yujnu ún: Tuá na ndehē cuun cuiti xinī rō jeē cáji ñayuu, achí yá.

Te tēe cáscuáha jíin yá ni cajini de jeē súcuan ni cahān yā.

*Jeē ní quenehen ya ñayuu ini templo
(Mt. 21.12-17; Lc. 19.45-48; Jn. 2.13-22)*

¹⁵Te ni najinū yā jíin de ñuu Jerusalén. Te ni quiví ya ini templo cáhnu, te ni quenehen ya ñayuu cájeen quiti te cánaxico núú ñayuu jeē socō i. Te ni scotúú ndeyi ya tāca mesa tēe cástáyí xūhún, jíin silla tēe cáxícō paloma.

¹⁶Te tu ní jéhe ya jnūhun jeē yáha ñayuu ini templo jíin ndajniñu ndiso i.

¹⁷Te ni steén yā jnūhun nuū i, áchí yá:

Yósó núú tútu iī jeē cahán Yaā Dios: Vehe ri chi vehe nuū cájicān tahu ñayuu tācá nación cúu, áchí yá. Te máá ró jijnáhan ró chi nájnūhun yaū cava ñacuīhna ní canasáha ró, áchí yá.

¹⁸Te tēe cástéén tutu ley Yaā Dios jíin sūtū cácujeñnu, ni cajini de jnūhun yáha, te ni quejéé de cánducú de modo ndese cahni de ya. Chi cáyūhú de jeē ndujéñnu ga maá yá vēsú maá de, chi tāca ñayuu yōhyo cácusī ni i cájini i jnūhun steén yā.

¹⁹Te jeē cuácuaa, te ni quenda ya ñuu Jerusalén cuahān yā.

*Jeē ni íchī nundēhe higo
(Mt. 21.20-22)*

²⁰Te jenéhen inga quiví ni nayāha ya jíin de cuahān yā. Te ni cajito de jeē nundēhe higo un je ni ichī nde yoho.

²¹Yūcuán na te ni nucūhun ni Pedro, te ni cahān de jíin yá:

Maestro, cundēhe ní nundēhe higo jeē ni cáhān ni núū, te vijna je ni ichī caján, áchí de.

²² Te ni cahān Jesús jíin de:

Candíje ró jēē sáha Yaā Dios jeē jicán rō.

²³ Chi jendaá cahán rī jíin ró, núu ndé ñáyuu cahān i jeē cújiyo yucu yáha quihīn nde nuū mar, te núu tú nacani síquī ní i, chí sa suhva candíje i jeē cóo nájnūhun ni cahān i, yūcuán na te cundaā jeē ni jíicān i.

²⁴ Jeē yūcuan cáhān rī jíin ró, tāca jēē cacán tahu rō, te núu candíje ró jēē nihín rō, te nihīn rō.

²⁵ Te jeē cájicān tahu rō, te cone cáhnu ni rō nuū ñáyuu casáha cuēchi síquī rō, návāha máá Tátá rō jeē ndeé yá andiví, suni cone cáhnu ni yā nuū cuéchi ró.

²⁶ Chi núu tú cone cáhnu ni rō nuū jnáhan ró, te suni máá Tátá rō jeē ndeé yá andiví, ma cóne cáhnu ni yā nuū cuéchi ró, áchí yá.

*Síquī jeē ndiso jniñu Jesús
(Mt. 21.23-27; Lc. 20.1-8)*

²⁷ Yūcuán na te ni najinū tucu ya ñuu Jerusalén. Te jica cuu ya ini templo cáhnu. Te sutū cácujeñnu jíin téē cástéén tutu ley Yaā Dios jíin téē jéñnu cándacu jniñu, ni quecoo de nuū yā.

²⁸ Te ni cacajnūhún de ya:

¿Ndeé ní nihīn jniñu ró jēē sáha ró jniñu yáha? ¿Te ndé ñin ni tee jniñu síquī rō jeē sáha ró súcuan? áchí de.

²⁹ Te ni cahān Jesús:

Suni ruhū, cajnūhun rí rohó ñin jnūhun jíinahan ró. Te núu cuu stío cuñí rō, yūcuán na te cachi rī nuū rō ndé ní nihīn jniñu ri jeē sáha ri jniñu yáha.

³⁰ ¿Ndeé ñin ni tee jniñu síquī Juan jeē ni scuándute de? ¿A Yaā Dios chí táca téē? Cachi nuū rī, achí yá.

³¹ Yūcuán na te ni candajnūhun máá de:

Núu cahān yō jeē Yaā Dios ni tee ya jniñu un síquī Juan, te cahān de jíin yó: Núu súcuan ¿te najehē tu ní cáccandíje ró de?

³² Te núu cahān yō jeē ñáyuu ni catee jniñu un síquī de, te quitī ni ñáyuu nuū yō, achí de cáccahān maá de.

Chi cáyūhú de jeē quitī ni ñáyuu, chi ndivii i cáccandíje i jeē téē ni nacani jnūhun Yaā Dios ni cuu ndije Juan.

³³ Jeē yūcuan ní cacahān de jíin yá:

Tu cájini rī, achí de.

Yūcuán na te ni cahān Jesús:

Ni ruhū, suni ma cáchi rī nuū rō ndé ñin ni tee jniñu síquī rī sáha ri jniñu yáha, áchí yá.

*Jnūhun yátá síquī téē néē cáccajniñu nuū uva
(Mt. 21.33-46; Lc. 20.9-19)*

12

¹ Te ni quejéé yá cahān yā jnūhun yátá jíin de jíinahan de:

Ñin téē ni nachuhun de cuehē uva, te ni jesi de corral, te ni sáha de ñin nuū cúhun ndehē un táxīn. Te ni sáha de ñin vehe súcún návāha cuu coto de ní cáhnu.

“Te ni stóo de nuū sava téē sájniñu nuū, te cuu sava de ndehē jíin. Te ni tee de ichi cuahān jicá de.

² Te máá tiempo ndutútú uva, te ni tají de ñin mozo de cuanuquīhin sava uva nuū téē cáccajniñu ún.

³ Te téē un ní cajñi de mozo un, te ni cacani de i, te ni canatajé de i cuanuhun i súcuan-ni.

⁴ Yūcuán na te téē chíí uva un ní tají tucu de ñinga mozo cuahān. Te téē cáccajniñu un ní cajēhe de yuū xinī mozo un, te ni castújí de, te ni cacahān ndevāha de nuū.

⁵ Te téē chíí uva ni tají tucu de ñinga mozo cuahān. Te ni cajehni de i. Te suni súcuan ni tají de cuehē gā mozo cuahān, te sava i ni cacani de, te sava i ni cajehni de.

⁶ Te téē chíí uva, íyó ñin sēhe de jeē maní ndasí de jíin. Te jeē sándihí na ni tají de sēhe de un cuahān nuū téē cáccajniñu. Te jéni ni de: Téē ún chí cuatáhú de jíinahan de nuū sēhe ri.

⁷ Te téē cáccajniñu un ní cacahān maá: Téē chíí táhū cúu jeē yáha. Na cáhni yō de, te ndōo tahū de cuu máá yó, achí.

⁸ Te ni cajñi de i, ni cajehni de i, te ni cascáne de i ñinga lado. Achí yá.

⁹ Yūcuán na te ni cajnūhun yá de:

Núu súcuan ¿te ndese sáha téē chíí uva un? Ndiñi de te cahni de téē cáccajniñu ún, te cuāha de ñuhun cáá uva un núu ñinga sava téē sájniñu nuū.

¹⁰ ¿Te á ná tu cahu ró jnūhun yáha jēé yosó núu tútu iñ, jeē ruhū cúu nájnūhun ñin yuū? Chí áchí tutu:

Yuū jeē ní casquéhichī tēe cájeni vehe,
yuū yáha nduu jeē quituu vehe.

¹¹ Máá Jítóho yō Yaā Dios ni sáha ya súcuan,
te cánaa ni yō jító yó jniñu yáha.
Achí tutu, achí yá.

¹² Yūcuán na te ni canducú de modo jniñ
de ya. Chi ni cajecūhun ni de jeē siquī maá
de cúu jnūhun yátá ní cahān yā siquī tēe
cásajniñu nuū uva jíin tēe cájeni vehe. Te
siquī jeē cáyūhú de jeē quitī ni ñayuu, te ni
castóo de ya te cuango de.

Siquī xūhun renta
(Mt. 22.15-22; Lc. 20.20-26)

¹³ Yūcuán na te ni catají de sava tēe grupo
fariseo jíin tēe grupo Herodes cuango de
nuū yā, ndúcú de ndese sáha de návāha
cahān yā ñn jnūhun jeē nihín de cuēchi siquī
yā.

¹⁴ Te ni quecoo de, te ni cacahān de jíin
yá:

Maestro, cájini na jēe tēe cáhān ndaā cúu
ní, te tu yúhú ní jeē cahán ni ñn ñayuu siquī
ní. Chi tu sáha ní cuenta ndese cúu ñn ñn
i, chí inuú-ni sáha ní jíin i. Te stéén ndaā
ní ndese squícu ñayuu nuū Yaā Dios. ¿Te á
íyó váha jeē chúnaa yō renta nuū rey nación
Roma jeē jniñ nación yō, chí tuú? ¿A chúnaa
yō, chí má chúnaa yō? Achí de jíin yá.

¹⁵ Te máá yá jiní yā jeē stahú-ni de, te ni
cahān yā jíin de:

¿Najehē cájito ndee rō ruhū? Cuāha ñn
xūhún na cóto ri, achí yá.

¹⁶ Te ni cajēhe de xūhún. Te ni jito ya, te
ni cajnūhun yá de:

¿Ndé ñn nuū cúu jeē ndeé nuū xūhun
yáha, te ndé síhví cúu jeē ndeé yāhá?

Te ni cacahān de jíin yá:

Nuū jíin síhví rey un cúu, achí de.

¹⁷ Yūcuán na te ni cahān yā jíin de:

Núu súcuan te nacuāha ró núu rey un jēe
yíhi cuenta nuū de, te nacuāha ró núu Yaā
Dios tāca jēe yíhi cuenta nuū maá yá, achí
yá.

Te ni canaa ni de ni cajini de jeē ndichí ní
cahān yā.

Jeē ní cacajnūhún de siquī jeē nátecu ndīyi
(Mt. 22.23-33; Lc. 20.27-40)

¹⁸ Yūcuán na te jecu tēe grupo saduceo ni
quecoo de nuū yā. Te tēe un cácahān jeē tu

nátecu cuitī ndīyi. Te ni cacahān de jíin yá
siquī ñn jnūhun, achí de:

¹⁹ Maestro, Moisés ni tee de nuū tútu jeē
cáneváha yó: Núu ñn tēe cuu de, te ndōo
ñasihí de, te núu tu ní íyo sēhe de jíin ña, núu
súcuan te cánuú jeē ñani de naquihin ñasihí
de, te sēhe de jeē cácu jíin ña nucuñí i nuū
ndīyi ñani de, achí tutu.

²⁰ Núu súcuan te ni íyo uxā ñani. Te tēe núu
ní quijnáhan de jíin ñahan. Te ni jihí de, te tú
sēhe de ní íyo.

²¹ Te tēe uū ni naquihin de ña, te suni ni
jihí de, te tú sēhe de ní íyo. Te suni súcuan
tēe uní.

²² Te ndihúxá de ni condeca de ña, te ni
ñn de tú sēhe de ní íyo. Te jeē sándihí te suni
ni jihí ñahan ún.

²³ Núu súcuan te núu na nátecu de jíináhan
de quiví nátecu ndīyi, ¿te ndé ñn de cuu ña
ñasihí de? Chi ndihúxá de ni condeca de ña.
Achí de jíin yá.

²⁴ Yūcuán na te ni cahān yā jíin de:

Yōhyo cástíví ró jnūhun siquī jeē tu
cajecūhun ni rō jeē cahán tutu ñn, ni tu cájini
rō jeē iyó poder Yaā Dios jeē nastécu yā
ndīyi.

²⁵ Chi quiví nátecu ndīyi, te tuá na jnūhun
quijnáhan tēe jíin ñahan coo. Chi coo i
nájñūhun ndajéhé Yaā Dios andíví.

²⁶ Te siquī jeē nátecu ndīyi, ¿á tu ní cácahu
ró tutu ní tee Moisés, ndese ni cahān Yaā
Dios jíin de mēhñu yúcū jeē cayú yáñuhún?
Máá rí cúu Yaā Dios Abraham jíin Isaac jíin
Jacob, achí yá jíin Moisés.

²⁷ Chi vésú je ni cajihí de, te cátecu de
nuū iyó máá yá, chí cúu ya Yaā sáha jeē técu
ñayuu ní cáni. Yōhyo cástíví ró jnūhun núu
súcuan. Achí yá jíin de.

*Jniñu cánuú ndasí gá jeē ní ndacu Yaā
Dios*
(Mt. 22.34-40)

²⁸ Te ni quee ñn tēe stéén tutu ley Yaā
Dios, te ni jini de jeē castichí jnáhan tēe un
jíin Jesús. Te ni jini de jeē váha ni nastió
cuñí yā jnūhun. Te ni cajnūhún de ya:

¿Ndé ñn cúu jnūhun ndácu jniñu cánuú
ndasí gá nuū tāca gá jniñu ni ndacu ya
jenahán? achí de.

²⁹ Te ni cahān Jesús jíin de:

Yāha cúu jniñu jeē cánuú ndasí gá nuū tāca gá. Achí tutu: Ñayuu Israel, cuni nahín ró. Máá Jítóho yō Yaā Dios, maá ñn-ni ya iyó.

³⁰ Núu súcuan te coo manī ndasí ró jiín máá Jítóho rō Yaā Dios, nde jnāā ndasí ró sáha ró ndihí jeē cúsiñ ni yā, nde jiín ini jiín ánuá rō, jiín ñí jeē níjnūní rō, jiín ñí fuerza rō. Yāha cúu jniñu ndácu ya jeē cánuú ndasí gá.

³¹ Te jniñu uū jeē ní ndacu ya, suni súcuan cáhán: Cundáhú ni rō jnāhan ró nájñūhun cundáhú ni rō maá ró. Tuá ñga jñūhun ndácu jniñu cánuú gá iyó, chi suu máá jéé yáha-ni. Achí yá jiín de.

³² Yūcuán na te ni cahān tēe stéén tutu ley jiín yá:

Vāha ni cahān ní, Maestro. Chi ndaā chi iyó ñn-ni Yaā Dios, te tuá na ñga yā iyó.

³³ Te cánuú jéé coo manī ndasí yó jiín yá nde jiín ini jiín ánuá yō, jiín ñí jeē níjnūní yō, jiín ñí fuerza yō, te cundáhú ni yō jnāhan yó nájñūhun cundáhú ni yō maá yó. Te cánuú ndasí gá jeē yáha vēsú jeē cáhmu yó quiti jiín táca gá jeē sócō yō nuū yā. Achí de jiín yá.

³⁴ Yūcuán na te ni jini Jesús jeē váha ni stió cuñí de, te ni cahān yā jiín de:

Je yajni cuu quivi ró ndaha Yaā Dios jeē ndacu ya jniñu nuū rō, achí yá.

Yūcuán na te ni ñn ga de, tuá ni chūndeyí ni de cajñūhún de ya.

Siqui jeē cúu Cristo sēhe yucūn David
(Mt. 22.41-46; Lc. 20.41-44)

³⁵ Te stéén Jesús jñūhun ini templo, te ni cahān yā:

¿Nde se cúu jeē cácahān tēe cástéén tutu ley Yaā Dios jeē Cristo cúu sēhe yucūn David?

³⁶ Chi máá David suhva ni cahān de jñūhun ya ni sáha Espíritu Santo nde jnahán:

Máá Jítóho yō Yaā Dios ni cahān yā jiín Jítóho rī, Yaā quiji:

Cucōo ró lado váha ri nuū kujéhu ró, te na sáha ri jeē quende rō poder táca jéé cájito uhū rohó.

Achí Yaā Dios. Achí David.

³⁷ Te núu sēhe yucūn David cúu Cristo, ¿te ndese cúu jeē ni cáhān de jeē Jítóho de cúu ya? áchí yá.

Te ñayuu cuehē, cánujnahān ni i cájini nahín i táca jñūhun cáhān yā.

Jeē ni cáhān yā jeē iyó cuéchi de jijnáhan de
(Mt. 23.1-36; Lc. 11.37-54; 20.45-47)

³⁸ Te stéén yā jñūhun, te ni cahān yā jiín i: Coto má candíje ró táca tēe cástéén tutu ley. Chi cácusñ ni de cáñūhun de sahma cáni jeē steén jeē kujéhu de, cájica cuu de jiín. Te cánujnahān ni de jeē cahān yāñūhún ñayuu jiín de ini calle.

³⁹ Te cánujnahān ni de cucōo de nuū silla yāñūhún gá ini vehe iñ sinagoga, jiín silla yāñūhún gá nuū víco cáyeji ñayuu.

⁴⁰ Te cáquende de vehe ñahan ní caque-ndōo ndáhú. Te nahān cájicān tahu de návāha caní ni ñayuu jeē tú na cuéchi de. Tēe yáha jijnáhan de chi xeēn gā ndoho de castigo. Achí yá.

Jeē ni sócō ñahan viuda xūhún
(Lc. 21.1-4)

⁴¹ Te ñn quiví néne Jesús ini templo ichi núu táca yéjñū nuū cásocō i xūhún. Te jító ya ndese cáchuhun ñayuu xūhún ini yejñū ún. Te cuehē ñayuu cucá ní cachuhun i cuehē xūhún.

⁴² Te ni quee ñn ñahan viuda jeē ndóho ndáhú. Te ni chuhun ña uū centavo lulí ini yejñū ún.

⁴³ Yūcuán na te ni cana ya tēe cáscuáha jiín yá, te ni cahān yā jiín de:

Jendaá cahān rī jiín ró jeē cuehē gā cúu jeē ni sócō ñahan viuda ndahú yáha, vēsú jeē ní casocō táca ñayuu cucá.

⁴⁴ Chi táca i ni casocō i jeē ni ndóo siquī xūhun cuéhē i. Te ñahan yáha, vēsú ndahú ndóho ña, te ni chuhun ndihí ña jeē cótecu ña. Achí yá jiín de.

Jeē ní cachí yā jeē náā templo
(Mt. 24.1-2; Lc. 21.5-6)

13

¹ Te ni quenda Jesús ini templo cáhnu, te ñn tēe scuáha jiín yá ni cahān de:

Maestro, condēhe ní ná luu jító táca vehe yáha jéé cúu templo, jiín táca yūū jeē ní cuvāha, áchí de.

² Te ni cahān yā jiín de:

Táca vehe náhnu yáha jéé cájito ró, chi ma cóso jnāhan ga ni ñn yuū, chí ndihí jnanū. Achí yá.

*Na seña coo nuū cuácuyajni ndihi ñayiví
(Mt. 24.3-28; Lc. 21.7-24; 17.22-24)*

³ Te ni jehēn yā jín de yucu Olivos jeē íne ichi núú templo cáhnu. Te ni cucōo ya yūcuán. Te Pedro jín Jacobo jín Juan jín Andrés ni cacajñūhun sñn de ya:

⁴ Castūhun ní nuū ná, ¿ndé quiví coo tāca jéē ní cachi ní jéē coo? ¿Te na seña coo núu cuacuyajni squícu tāca jéē ni cáhān ní? áchí de.

⁵ Te ni cahān yā jín de:

Coto ró jéē ma stahú ni ñn de rōhó.

⁶ Chi quijicoo cuehē tēe jeē stahú jín síhví rí. Máá rí cúu Cristo, achi de. Te súcuan stahú de cuehē ñayuu.

⁷ Te nihīn rō jñūhun jeē tāca lado iyó guerra, chí je yajni coo guerra. Te ma yūhu ró, chí cánuú coo súcuan. Te ni ná tu jinū quiví ndihi ñayiví.

⁸ Chi ndonda nación siquī inga nación, te ndonda ñuu siquī inga ñuu jeē cuajnáhan. Te cháha chúcuan jñāa, te coo jnamā, te ndonda ñayuu siquī jñáhan i. Te tāca jéē yáha cácuu jñūdóho quejéé xihna ñúhún gá.

⁹ Te condito ró máá ró, chí nastúu i rōhó núu tāca tóhō, te ini tācá vehe ñi sinagoga cani i rōhó. Te quindeca i sava ró núu tācá gobernador jín núu tāca rey, te cahān i cuēchi siquī rō siquī jeē cá candíje ró rúhū. Te súcuan te cuu nacani ró jñūhun ri nuū de.

¹⁰ Te jini ñúhún jéē xihna gā cuitē núu jñūhun nuū tācá nación ndese jñáma ri i, te sáá te ndihi quiví.

¹¹ Te núu ni cajñi de rōhó cuángoo de jín ró nuū tāca tóhō, te ma nacani ni rō xihna gā ndese stío cuiñí rō nuū de te cācu ró. Chi máá hora un te máá Yaā Dios cuāha ya jñūhun nuū rō ndese cahān rō, te jñūhun ún cahān rō. Chi nasūu máá ró cúu jeē cahān, chí Espíritu Santo cúu jeē cahān.

¹² Te ñani jín ñani nastúu jñáhan jeē na cúu. Te tátá nastúu sēhe jeē cúu. Te sēhe ndonda siquī tatá jín náná jeē cahni.

¹³ Te tāca ñáyuu quiví ni i nuū rō jeē siquī ruhū. Te ñayuu cuiñi ñihin jín jñūhun ri nde quiví jínu, chí cācu i.

¹⁴ Te Daniel, tēe ni nacani jñūhun Yaā Dios, ni tee de jñūhun ñn tēe néé jéē quíji. Te rōhó jéē cácahu tutu ún, na jécūhun ni rō. Chi ñn quiví te cuni rō jeē sáha ndevāha de jeē stíví de tācá ndajñíñu ñi ini templo, te

cuiñi de nuū tú na ley cuiñi de. Te núu cuni rō jeē súcuan cúu, te ñayuu cáyūcú región Judea, na cúnu i caa i yucu quingoo i.

¹⁵ Te ñayuu cáyūcu núu quéhe, ma ndívi i ini vehe jeē quénehen i ndajñíñu i, chí cánuú cunu yachí i návāha cācu i.

¹⁶ Te ñayuu cáhīn nuū ítu, ma ndíji i vehe jeē quíhin i sahma i.

¹⁷ Te quiví ún nacā jeē ndahú ñahan cáñuhun sēhe jín ñahan cándeca yiquín, chí ma cúnihin ña cunu yachí ña.

¹⁸ Te cacān tahú rō jeē ma quíji jñūdóho un jéē cunu ró máá tiempo cúun yuhvā.

¹⁹ Chi jeē quejéé un te coo cuehē jñūdóho xeēn, jeē ná tu coo súcuan nde quiví ní sáha Yaā Dios ñayiví te nde vijna. Te jeē ndíhi jñūdóho ún te ni ma cóo ga jeē súcuan.

²⁰ Te núu tú nastívi máá Jítoho yō Yaā Dios tiempo jñūdóho ún, te ni ñn ñayuu ma cácu cuiti i. Te jeē siquí ñáyuu cá candíje jeē ní nacāji ya, jeē yúcuan nastívi ya tiempo un.

²¹ 'Núu súcuan te núu ñn ñayuu cahān jín ró: Yáhá condēhe ró íne Cristo, chí: Yūcuán condēhe ró íne ya, achi i, te ma candíje ró jéē cahán i.

²² Chi canecoo tēe cástahú te cahān de jeē Cristo cúu de, chí cahān de jeē tēe nacani jñūhun Yaā Dios cúu de. Te sáha de jñiñu jéhu jeē naa ni ñayuu coto i, návāha stahú de nde máá ñáyuu ní nacāji ya, te núu na cúu.

²³ Te ndito na cóo ni rō, chí je ni castūhun rí nuū rō vijna nde ná tu coo.

*Ndese coo quiví ndiji Yaā ní nduu tēe
(Mt. 24.29-35, 42-44; Lc. 21.25-36)*

²⁴ Te quiví ún, núu je ni ndihi jñūdóho ún, te cujñúú níandii, te yoō ma ndíi gā.

²⁵ Te ñingoo quími ñn andiví. Te tāca jéē ñn andiví chí quisi i.

²⁶ Yūcuán na te coto ñayuu nuū máá rí, Yaā ní nduu tēe, ndiji ri jín vícō, te condiso ri cuehē poder, te yōhyo luu cujéhu ri.

²⁷ Yūcuán na te tají rí ndajéhé rí quinastútú yá ñayuu ní nacāji ri ndicúun lado ñayiví, nde nuū ndíhi ñayiví te nde nuū ndíhi andiví.

²⁸ 'Vijna te scuáha ró ndese sáha nundēhe higo: Núu je ni nane numa, te ni najee

ndaha, te cájini rō jeē jé ni cuyajni tiempo jihní.

²⁹ Te suni súcuan núu ni cajini rō jeē ní quejéé cúu tǎcá jniñu jeē ni cáhān rī, yūcuán na te na jécūhun ni rō jeē ní cuyajni quivī ndíji ri, te yachī coo.

³⁰ Jendaá cahán rī jín ró jeē ma cúu ndihī ñayuu jeē cóto jnūndóho ún, chi nde squícu ndihī jniñu ún.

³¹ Andiví jín ñáyiví chi naa, te tǎca jnúhun cáhān rī chi ma náā, chi ndihī squícu.

³² Te quivī jín hora jeē ndíji ri, tú ni ññayuu jiní, ni máá ndajéhé cáhīyo andiví, ni máá rí, Sēhe Yaā Dios. Chi máá ññ ni Tátá rī cúu jeē jiní.

³³ 'Núu súcuan te na cócuhun ni rō tǎca jnúhun yáha, te ndito na cóo ni rō, te cacān tahu rō, chi tu cájini rō na quivī ndiji ri.

³⁴ Chi coo nájnūhun ññ tēe jeē quihín jicá de, te nde ná tu quenda de vehe de, te ni ndacu de jniñu nuū tǎca mozo de ndese sáha ññ de. Te ni ndacu de jniñu nuū tēe ndíto yéhyí jēe na cóndito de.

³⁵ Te suni súcuan róhó jijnáhan ró, ndito na cóo ni rō. Chi cúu rī nájnūhun jitoho vehe ún, te tu cájini rō na hora ndiji ri, á jēe cuácuaa, chí ñnú, chí jēe cána líhli, chí jénéhen.

³⁶ Chi ññ sanaa-ni te ndiji ri, te coto ró jēe ma nánihīn rī rohó jēe tu ndíto ró.

³⁷ Te jnūhun cáhān rī jín ró jijnáhan ró, suni cáhān rī jín ndivii ñayuu: Ndito na cóo ni rō jijnáhan ró. Achí yá.

Jeē ní casquínáhan de jnūhun jeē jñ de Jesús

(Mt. 26.1-5; Lc. 22.1-2; Jn. 11.45-53)

14

¹ Te cúmanī uū gā quivī te quejéé vico pascua jeē cáyeji ñayuu hebreo pan jeē tú na levadura yíhi. Te sutū cácujeñnu jín tēe cástéén tutu ley, ni canducú de modo ndese jñ de Jesús jín jnúhun stáhú, te cahni de ya.

² Te ni cacahān de:

Ma jñ yó de máá quivī vico, chi ndonda ñayuu siquī yō, achí de.

Jnūhun ñahan jeē ní chuhun perfume xinī yā

(Mt. 26.6-13; Jn. 12.1-8)

³ Te íne Jesús ñuu Betania vehe Simón, tēe ni ndoho cuehyī stehyú. Te níni yéji yā staā, te ni quee ññ ñahan nuū yā, ndáhá ña ññ frasco yuū luu jeē ññhun aceite perfume, jeē máni ita nardo cúu, te yōhyo yahu ndéé. Te ni tahu ña frasco un, te ni chuhun ña xinī yā.

⁴ Te sava tēe cáhīn yūcuan ní caquitī ni de, te ni cacahān de:

¿Najehē cúu jeē náā saá-ni perfume jññā?

⁵ Chi cuu xícó yahu yó víhyá gā unī ciento denario, te cuāha yo núu ñayuu ndahú núu, áchí de.

Te ni cacahān sōó de jín ña.

⁶ Te ni cahān Jesús:

Ma stáhān rō ña. ¿Naun casáha ró jēe nácani uhū ni ña? Chi ññ jniñu váha cúu jeē ni sáha ña jín rí.

⁷ Chi níni coyūcu ñayuu ndahú jín ró, te núu cácu ni rō te cuu sáha váha ró jín i. Te ruhū chi tuá condee rī jín ró.

⁸ Chi ni sáha ña ndihī jeē cuu sáha ña jeē maní ña jín rí. Chi nde ná tu quindūji ri te je ni sátūhva ña ruhū jeē ní chuhun ña perfume ruhū.

⁹ Jendaá cahán rī jín ró jeē ní cáhnu ñayiví ndé-ni cúu nuū cuité núu jnūhun jeē jnáma ri ñayuu, suni nacani i jnūhun jeē ni sáha ñahan yáha, návāha cocuhun ni ñayuu ña, áchí yá.

Jeē ní nastúu Judas yā

(Mt. 26.14-16; Lc. 22.3-6)

¹⁰ Yūcuán na te Judas Iscariote, ññ jeē ndihúxí uū tēe cáscuáha un, ní jehēn de nuū sutú cácujeñnu, ni sándaā de jín jēe nastúu de Jesús nuū jijnáhan.

¹¹ Te nuū ní cajini sōho sutū un jēe cahān de, te ni cacusī ni, te ni cajejnūhun jeē cuáha xūhun núu de. Te nde quivī un ní nducú de modo ndese nastúu de ya.

Jeē ní jequin yā Cena yā

(Mt. 26.17-29; Lc. 22.7-23; Jn. 13.21-30; 1 Co. 11.23-26)

¹² Te ni quee máá quivī jeē quejéé vico pascua jeē cáyeji ñayuu pan jeē tú na levadura yíhi, te suni quivī un cájehni i londe nájnūhun ni ndacu Yaā Dios jniñu jeē sáha i vico pascua un. Te tēe cáscuáha un ní cacajnūhún de ya:

¿Ndé nuū cuní ni jéē quisátūhva ná cuxíni ní vico pascua? achí de.

¹³ Te ni tají yá uū tēe cáscuáha ún quingoo de, te achí yá jíin de:

Cuángoo nde ñuu, te yūcuán najnáhan ró jíin ñn tēe ndíso quīyí ndute. Te condiquín rō de quihín rō jíin de.

¹⁴ Te vehe jeē ndívi de, yūcuan cáhān rō jíin tēe chíi vehe: Achí máa Maestro: ¿Ndé ñn cúu cuarto vehe ní cuāha núú ní núú cuxíni ya vico pascua jíin tēe cáscuáha jíin yá? achí rō.

¹⁵ Te máa de stéén de ñn cuarto cáhnu nde xiní véhe jeē je íyó tūhva. Te yūcuan sātūhva ró jéē cuxíni yó, achí yá jíin de.

¹⁶ Te cuangoo tēe cáscuáha ún, te ni jinūcoo de ñuu, te ni canihín de nájñūhun ni cahān yā jíin de. Te ni casátūhva de jeē cuxíni ya vico pascua.

¹⁷ Te jeē cuácuaa, te ni quee ya jíin ndihúxí uū de.

¹⁸ Te ni cacucōo de mesa cáyeji de staā, te ni cahān yā:

Jendaá cahán rī jíin ró jeē ñn róhó jéē yéji jíin rí, nastúu ro ruhū, achí yá.

¹⁹ Yūcuán na te ni cacucuíhyá ni de, te ná ñn ná ñn de ni cacajnūhún de ya:

¿A sáña cúu? achí ñn de.

Te suni súcuan inga de:

¿A sáña cúu? achí ñn ñn de.

²⁰ Te ni cahān yā jíin de:

Ñn jeē uxí uū rō jeē cáyeji cáhnu jíin rí ñn cohō, suu nastúu ruhū.

²¹ Te ruhū, Yaā ní nduu tēe, jendaá cúu jeē quihín rī cuu rī, nájñūhun yósó jñūhun ri nuū tútu ñ. Te nacā xeēn ndoho tēe nastúu ruhū. Vāha ga núu tu ní cácu tēe un núú, achí yá.

²² Te níni cáyeji de jíin yá, te ni quihin ya pan, te ni nacuatáhú yá, te ni tahú cuéchi yá, te ni jēhe ya nuū tēe cáscuáha jíin yá. Te ni cahān yā:

Caji rō jijnáhan ró, chi yāha cúu yiqui cúñu rī, achí yá.

²³ Yūcuán na te ni quihin ya ñn copa ndūxi uva, te ni nacuatáhú yá, te ni jēhe ya ni cajihí ndihí de.

²⁴ Te ni cahān yā jíin de:

Yāha cúu ññī rī jeē cuáha ri jeē cúu contrato jeé, te cati jeē ndundoo cuēchi cuehē ñayuu.

²⁵ Te jendaá cahán rī jíin ró jeē ndé vijna te ma cóho ga rī ndūxi ndehē uva yāhá, chi nde quiji quivī ndacu Yaā Dios jñiñu ní ñayiví, te sáa te coho tucu ri jíin ró jijnáhan ró. Achí yá.

Jeē ní cachi yā jeē yūhu Pedro cahān de jeē jini de ya

(Mt. 26.30-35; Lc. 22.31-34; Jn. 13.36-38)

²⁶ Te ni jita ya ñn yaa ñ jíin de jijnáhan de. Te ni quenda ya cuahān yā jíin de nde yucu Olivos.

²⁷ Yūcuán na te ni cahān yā:

Ndivii rō nayūhu ró jeē siquí ruhū jecuāa vijna. Chi suhva je yósó jñūhun ri nuū tútu ñ, ni cahān Yaā Dios: Cuāha ri jñūhun jeē cáhni ñayuu tēe ndíto lanchi, te lanchi un cuítē núu ti jeē yūhu tí, achí.

²⁸ Te jeē nátecu rī, te xīhna ruhū cosnūu rī quihín rī región Galilea, te sáa te najinūcoo ró, achí yá.

²⁹ Yūcuán na te ni cahān Pedro:

Vēsú ndihí de na náyūhú de, te máa ná chi ma náyūhú cuítē ná, achí de jíin yá.

³⁰ Te ni cahān yā jíin de:

Jendaá cahán rī jíin ró jeē jecuāa vijna, nde ná tu cana líhli uū jínu, te yūhu ró jeē jñi ñayuu rohó, te uní jínu cahān rō jeē tu jíin rō ruhū, achí yá.

³¹ Te ni cahān teyí de jíin yá:

Vēsú núu cuu na jíin ní, te ma cahán cuítē na jéē tu jíin na níhín, achí de.

Te suni súcuan ni cacahān ndihí de.

Jeē ní jicān tahú yā nuū huerto Getsemaní

(Mt. 26.36-46; Lc. 22.39-46)

³² Yūcuán na te ni jinū Jesús jíin tēe cáscuáha jíin yá ñn lugar nuū naní Getsemaní. Te ni cahān yā jíin de:

Yāhá-ni cucōo ró, te na quihín rī cacān tahú rī, achí yá.

³³ Te ni jeca ya Pedro jíin Jacobo jíin Juan, cuahān yā jíin de. Te ni quejéé yá cucuíhyá ndasí ni yā te cúxií ni yā jeē quiji jñūndóho siquī yā.

³⁴ Te ni cahān yā jíin de:

Yōhoyo cúcuíhyá ni rī, te ndúcú sáha jeē cúu rī. Yāhá condetu ró te condito ró, achí yá.

³⁵ Te ni jica ya jecu gā, te ni jecuññi yití yá ni jequin ya nuū yā nuū ñūhun. Te ni jicān tahú yā nuū Yaā Dios jeē núu cuu te

ma ndóho ya jnūndóho jeē quejéé quiji siquī yā.

³⁶ Te suhva ni cahān yā:

Tátá maá ná, ndihi-ni jniñu cuu sáha máá ní. Te tejiyo ní jnūndóho yáha jéē ma quiji siquī ná. Te nasūu jéē cuní maá ná, chí jeē cuní maá ní na cóo, áchí yá.

³⁷ Te ni ndee yā nuū ndinúni téē cáscuáha jíin yá, te ni jito ya jeē cáquixi de. Te ni cahān yā jíin Pedro:

Simón, ¿á quíxí rō? ¿A tu ní cánda ró condito ró jíin rí vésu in hora?

³⁸ Coó ndito ni rō te cacān tahu rō jeē chindéé ñáhán yá rohó jeē ma sáha ró cuéchi jeē coto ndee jeneé rohó. Chí cuní ndije ánuá rō squícu vāha ró, te yiqui cúñu rō chí tu fuerza, achí yá.

³⁹ Te ni jehēn tucu ya, ni jicān tahu yā, te suni jnūhun yúcuán ní cahān yā.

⁴⁰ Te ni ndee ya nuū de, te ni jito ya jeē cáquixi tucu de, chí yōhyo cájií de māhná. Te tuá ní canihīn de jnūhun stío cuñí de nuū yā.

⁴¹ Te ni ndee yā jeē vuelta unī, te ni cahān yā jíin de:

Vijna te cusū rō te ndetātu ró. Te tuú chí je ni cuu, chí je ni quee hora, te ruhū, Yaā ní nduu tēe, natūu rí te jniñi tēe cáhīyo cuéchi ruhū.

⁴² Ndocuñī jijnáhan ró, chí je vēji tēe nastúu ruhū, te quihīn yō jíin de. Achí yá.

Jeē ní cajni de Jesús

(Mt. 26.47-56; Lc. 22.47-53; Jn. 18.2-11)

⁴³ Te sá cáhán gā yā súcuán, te ni quee-ni Judas, in jnáhan jeē uxí uū tēe cáscuáha jíin yá. Te vējicoo cuehē tēe jíin de, cándaha de espada jíin yujnu. Chí sutū cácujeñnu jíin téē cástéén tutu ley jíin téē jéñnu cándacu jniñu, ni catajī de tēe ún.

⁴⁴ Te Judas, tēe nastúu ya ún, je ni jēhe de in seña nuū téē un jijnáhan, chí ni cachi de:

Tēe jeē téchūhu rí un cúu. Te jniñi ró jijnáhan ró quihīn rō jíin, te ma siaá cuiti rō, achí de.

⁴⁵ Te ni quee de nde nuū Jesús, te ni cahān de jíin yá:

Maestro, Maestro, achí de.

Te ni techūhú de ya.

⁴⁶ Te tāca gá tēe un ní cajni de ya, te cuango de jíin yá.

⁴⁷ Te in tēe íne jíin yá ni tava de espada de, te ni jehnde de sōho in mozo maá sútu cujeñnu ga.

⁴⁸ Te ni cahān Jesús jíin ñáyuú cuehē ún:

¿Te va tēe cuíhná cúu rí jeē véjicoo ró jíin espada jíin yujnu jniñi ró rúhū jeē súcuán?

⁴⁹ Tāca quívī ni ine rí jíin ró jijnáhan ró ini templo cáhnu, ni steén rī jnūhun, te tu ní cájni ró rúhū. Te súcuán cása ha ró návāha na squícu jeē cahán tutu iī, achí yá.

⁵⁰ Yūcuán na te ndihi tēe cáscuáha jíin yá, ni castóo de ya, ni cajinu de cuango de.

Tēe suchí jeē ní jinu

⁵¹ Te in tēe suchí, ndíquín de ya cuahān de jíin yá. Te ndí de máá in sahma cuitá. Te ni cajni tēe ún de.

⁵² Te máá sahma cuitá un ní canihīn. Te ni jinu máá ñi-ni de cuahān de.

Jeē ní indichi Jesús nuū junta tēe cácujeñnu ga

(Mt. 26.57-68; Lc. 22.54-55, 63-71; Jn. 18.12-14, 19-24)

⁵³ Yūcuán na te ni jinūcoo de jíin Jesús nuū sutū cujeñnu ga. Te tāca sútu cácujeñnu jíin téē jéñnu cándacu jniñu jíin téē cástéén tutu ley, ni candutútú de.

⁵⁴ Te Pedro chí jícá-ni ndíquín de ya, te ni jinū de nde ini patio sutū cujeñnu ga. Te ni cucōo de jíin táca policía, násaā de ñuhūn.

⁵⁵ Te sutū cácujeñnu jíin ndihi tēe cása ha junta cujeñnu ga, ni canducú de cuéchi siquī Jesús, chí cahni de ya cácuñi de. Te tu ní canihīn de.

⁵⁶ Chí cuehē de ni cacahān yaá siquī yā, te tu ní quijnáhan jnūhun ni cacahān de.

⁵⁷ Yūcuán na te ni candocuñī sava de, te ni catee de cuéchi siquī yā, achí de:

⁵⁸ Máá ná ni cajini ná cáhán de jeē canu de templo yáha jéē ní cuvāha ni casáha tēe, te nuū uní quívī te nacani de inga jeē násūu jíin ndaha téē cuvāha, achí de. Achí jijnáhan.

⁵⁹ Te ni jnūhun yáha tu ní quijnáhan tucu jeē cácahān de siquī yā.

⁶⁰ Yūcuán na te sutū cujeñnu ga ni ndocuñī de nuū ñáyuú cuehē ún, te ni cajnūhūn de Jesús:

¿Naun tu cáhán cuiti rō? ¿A íyó ndáa jeē cácahān tēe yáha siquī rō? achí de.

⁶¹ Te máá yá tu ní cáhán cuítí yā, chí tú na vé ni stiío cuíñí yā. Te sutū cujéhnú ga ni cajnúhún tucu de ya:

¿A máá ró cúu Cristo, Sēhe Yaā vāha jeē cujéhnú? áchí de jíín yá.

⁶² Te ni cahān yā:

Suu ri cúu. Te coto ró jēē ruhū, Yaā ní nduu tēe, condee rī lado vāha Yaā iyó poder, te ndiji ri ichi ándiví jíín vícō, achí yá.

⁶³ Yūcuán na te sutū cujéhnú ga ni jehnde de sahma de jeē quití ndasí ni de, te ni cahān de:

¿Ndé jííní ñúhún gá yō testigo núu súcuan?

⁶⁴ Chí je ni cajíní ró jēē cahān de jnúhun ndevāha jeē quití ni Yaā Dios, chí sáha de máá de Sēhe Yaā Dios. ¿Te ndese cájeni ni rō? Achí de.

Te ndihi de ni cacahān jeē na cúu yā.

⁶⁵ Te sava de ni cateshí de nuū yā, te ni cajesí de sahma nuū yā, te ni cacani de ya. Te cácahān de jíín yá:

Cachi ndé ñn cúu jeē ní cani rōhó, áchí de.

Te tāca tēe policía ni cacani de nuū yā.

Jeē ní cachi Pedro jeē tu jííní de ya

(Mt. 26.69-75; Lc. 22.56-62; Jn. 18.15-18, 25-29)

⁶⁶ Te íne Pedro ini patio ichi chíji nuū cáhīn de jíín Jesús. Te ni quee ñn ñahan jéjníñu vehe sutū cujéhnú ga ún.

⁶⁷ Te ni jito ña nuū de jeē néne de násaā de yuñúhún. Te ni jito vāha ña nuū de, te ni cahān ña:

Róhó chí suni ni jica ró jíín Jesús, tēe ñuu Nazaret, achí ña.

⁶⁸ Te máá de tu ní cáchi de, chí ni cahān de:

Tu jííní rī de, ni tu jííní rī na jnúhun cáhán rō, achí de.

Te ni quenda de yéhyí núu quéhe. Te ni cana-ni líhli.

⁶⁹ Te ñahan jéjníñu un ní jito tucu ña nuū de, te ni quejéé ña cáhán ña jíín ñáyuu cáhīn yūcuán:

Tēe yáha suni jnáhan tāca tēe un cúu, achí ña.

⁷⁰ Te máá de tu ní cáchi tucu de. Te ni cunúu jecu gā, te ñayuu cáhīn yūcuan ní cacahān tucu i jíín Pedro:

Jendaá ndije jeē suni jnáhan de cúu ró, chí tēe Galilea cúu ró, te ñuú-ni cáhán rō jíín de jíínáhan de. Achí i.

⁷¹ Yūcuán na te ni quejéé de cáhán teyí de jeē na cóndee cuēchi siquī de núu tu cáhán ndaā de:

Tu jííní rī tēe un jēē cácahān rō jnúhun de, achí de.

⁷² Yūcuán na te ni cana-ni líhli vuelta uū. Te ni nucūhun ni de jnúhun ni cahān Jesús jíín de: Nde ná tu cana líhli uū jíín, te yūhu ró te cahān rō uní jíín jeē tu jííní rō ruhū. Te ni nacani ni de siquī jnúhun ún, te ni ndahyū de.

Jeē ní indichi Jesús nuū Pilato

(Mt. 27.1-2, 11-14; Lc. 23.1-5; Jn. 18.28-38)

15

¹ Te jeē ní cundijín, te sutū cácujehnú ni candutútú de jíín tēe jéhnú cándacu jníñu, jíín tēe cástéén tutu ley, jíín ndihi tēe cásaaha junta cujéhnú ga, te ni casquínáhan de jnúhun. Te ni cajíhni de Jesús, te cuangoo de jíín yá nuū Pilato, tēe cúu gobernador.

² Te Pilato ni cajnúhún de ya:

¿A máá ró cúu Rey ñayuu hebreo? achí de.

Te ni cahān yā:

Suu ri cúu, nájnūhun cáhán rō.

³ Te sutū cácujehnú un ní cacahān de cuehē cuēchi siquī yā.

⁴ Te Pilato ni cajnúhún tucu de ya:

¿Naun tu cáhán cuítí rō? ¿A tu jííní ró jēē cuehē cuēchi cácahān de siquī rō? achí de.

⁵ Te tu ní cáhán cuítí yā ni ñn jnúhun jíín de. Te nahán ní naa ni Pilato ndéhé de nuū yā.

Jeē ní cundaā jeē cúu yā

(Mt. 27.15-31; Lc. 23.13-25; Jn. 18.38-19.16)

⁶ Te íyó costumbre Pilato jeē quiví víco un siaá de ñn tēe íne vecāa, núu na-ni tēe cácuni ñayuu.

⁷ Te íyó ñn tēe nání Barrabás, íne de vecāa jíín táca jnáhan de siquī jeē ní candonda de siquī tohō te ni cajehni de ndíyí.

⁸ Te ni quecoo ñayuu cuehē, te ni cacahān i jíín Pilato jeē na sáha de nájnūhun íyó costumbre de.

⁹ Te ni cahān Pilato jíín i:

¿A tu cácuni rō jeē siaá rī tēe cúu Rey rohó ñáyuu hebreo? achí de.

¹⁰ Súcuan ni cahān de, chí cúní de siaá de Jesús. Chí je ni jecūhun ni de jeē ní cacucuésún ni tāca sūtū un cájito de ya, te jeē yúcuan ní quijicoo jíín yá nuū de.

11 Te sutū cácujuhnu un ní cascáhán de ñayuu cuehē un jēē váha ga na cácan i jeē siaá Pilato Barrabás.

12 Yūcuán na te ni cajñuhún tucu Pilato:

Núu súcuan ¿te ndese cáconi rō jeē sáha ri jíin téē jeē cácahān rō jeē cúu de Rey rohó ñáyuu hebreo? áchí de jíin i.

13 Te ni cacana jee i:

Cata caa ní de jicā cruz, na cúu de, áchí i.

14 Te ni cahān Pilato:

¿Na cuēchi ni sáha de núu súcuan?

Te ñayuu un ní cacana jee tucu i:

Cata caa ní de jicā cruz, na cúu de, áchí i.

15 Te Pilato cuní de jeē na cúsi ni ñayuu jíin de, te ni siaá de Barrabás. Yūcuán na te ni ndacu de jniñu jeē na cáni tēcá soldado Jesús, jíin jēē cata caa de ya jicā cruz.

16 Yūcuán na te soldado un cuángoo de jíin yá ini patio palacio, jeē sácata de nuū yā. Te ni canastútú de ndíhi jnáhan de.

17 Te ni cachuhun de ya ñin sahma cuehē ndíhi jēē cúu sahma rey. Te ni casáha de ñin corona iñu, ni cachuhun de xinī yā.

18 Yūcuán na te ni cacana de:

Nacā jeē váha rey cúu Rey ñayuu hebreo, achí de.

19 Te ni cacani de yujnu xinī yā, te ni catesihí de nuū yā, te ni cajecuññi yití de nuū yā, casáha de jeē chiñuhún de ya.

20 Te nuū ní cuu ni casácata de nuū yā, te ni catava de sahma cuehé ndíhi un, te ni canachuhun de ya sahma máá yá. Te ni caquenehen de ya jeē cata caa de ya jicā cruz.

Jeē ní cacata caa de ya jicā cruz
(Mt. 27.32-44; Lc. 23.26-43; Jn. 19.17-27)

21 Te ñin téē nání Simón ñuu Cirene, téē cúu tátá Alejandro jíin Rufo, vendiji de jeē ni jéhēn de rancho. Te ni yāha de yūcuán, te ni catejñiñu soldado un de jeē cóndiso de cruz yā.

22 Te cuángoo de jíin yá ñin lugar nuū naní Gólgota, jeē cuní cahān Lugar Yiqui Xíní.

23 Te ni cajēhe de vino jeē ni sácā núu jíin súje uvuā jeē cóho ya, te tu ní jíhi ya.

24 Te ni cacata caa de ya jicā cruz. Te ni casáha de sorteo jeē siquí ndese nihīn ñin ñin de sahma ya.

25 Te cahīn ni cacata caa de ya.

26 Te jñuhun ni catee de xinī cruz cahán na siquí ni jihī yā: Yāha cúu Rey ñayuu hebreo, achí.

27 Te suni ni cacata caa de uū téē cuíhná núu uū gā cruz, ñin de lado váha ya, te inga de lado jecó yá.

28 Te ni squícu jñuhun cáhán tutu i: Ni casquijnáhan de ya jíin téē casáha neé, áchí.

29 Te ñayuu cáyāha yūcuán cáscuícó i xinī i, te cácahān neé i:

Jājaān. Róhó chí cáhán rō jeē cánu rō templo cáhnu, te nuū uní quiví te nucondichi sáha ró.

30 Núu súcuan te jnama ró máá ró, te nuu ró jicā cruz vií, achí i.

31 Te suni súcuan ni cacahān catá sutū cácujuhnu jíin téē cástéen tutu ley, te áchí de cácahān maá de:

Núu inga ñayuu ni jnama de, ¿te naun tu cúu jnama de máá de vijna?

32 Núu na cúni yō jeē Cristo, Rey ñayuu Israel, nuu de jicā cruz vijna, yūcuán na te candíje yó, áchí de jíjnáhan de.

Te téē cándita caa jíin yá, suni súcuan ni cacahān neé de.

Jeē ni jihī Jesús

(Mt. 27.45-56; Lc. 23.44-49; Jn. 19.28-30)

33 Te nuū ní cuu cahuxi uū, te ni cunee ní cáhnu nde cahuní.

34 Te nuū ní cuu cahuní, te ni cana jee Jesús:

Eloi, Eloi, ¿lama sabactani? achí yá. Te jñuhun un cúni cahān: Yaā Dios maá ná, Yaā Dios maá ná, ¿naun ni stóo ní sáña?

35 Te sava ñayuu cáhīn yūcuán, ní cajini i jñuhun ún, te ni cacahān i:

Cuní nahín, chí cána de xinī Elías, téē ni nacani jñuhun Yaā Dios jenahán, achí i.

36 Te ni jinu ñin téē, ni jechundaji de cachī nuū vinagre iyá. Te ni tee de xinī ñin yujnu, te ni tee de yuhu ya jeē cóho ya. Te ni cahān de:

Na cóndēhe yó núu quiji Elías nasnúu de, achí de.

37 Te máá Jesús ni cana jee ya, te ni jihī-ni ya.

38 Yūcuán na te sahma ndíta caa jeē ndihyú cuarto i ini templo cáhnu, ni ndatā sava sava nde xinī te nde nuū jehé.

39 Te téē ñuu Roma jeē cúu capitán, índichi de nuū yā, te ni jini de jeē ní cana jee ya te ni jihī yā. Te ni cahān de:

Jendaá ndije jeē Séhe Yaā Dios cúu tēe yáha, áchí de.

⁴⁰ Te suni cáhīn sava ñahan, cándēhe jíca ña. Te unī ña cácuu María ñuu Magdala, jíin María naná José jíin Jacobo suchí, jíin ñahan nání Salomé.

⁴¹ Te ñahan yáha ní candiquīn ña ya, ni cajejnīñu ña nuū yā nde náa jíca ya Galilea. Te suni cáhīn cuehē gā ñahan jeē ni jéngoo jíin yá ñuu Jerusalén.

Jeē ní quindūji Jesús

(Mt. 27.57-61; Lc. 23.50-56; Jn. 19.38-42)

⁴² Te ni ini quivī ún. Te quivī sātūhva cúu, chí sajnē cúu quivī ndétātú.

⁴³ Te ni quee José, tēe ñuu Arimatea. Te cúu de ñn tēe cújéhnu nuū junta cujéhnu ga. Te suni ñúhun ni de jeē quiji quivī jeē ndacu Yaā Dios jniñu. Te tu yúhú de chí ni quivī de nuū Pilato, ni jicān de yiqui cúñu Jesús.

⁴⁴ Te Pilato chí náā ni de jeē yachí ni jihī yā. Te ni cana de capitán, te ni cajnūhún de tēe un núu je ni jihī yā.

⁴⁵ Yūcuán na te ni cucáhnū ni de jeē ní cáhān capitán jíin de, te ni jēhe de jnūhun jeē quihīn José yiqui cúñu yā.

⁴⁶ Te José ni jeen de ñn sahma cuitá váha. Te ni snúu de yiqui cúñu yā, te ni chusúcún de sahma ún. Te ni chindūji de ya ini ñn yaū jeē quindūji ndīyī, jeē ní caan jíca ñn cava. Te ni jesi de ñn yuū yuhu yáú un.

⁴⁷ Te María ñuu Magdala, jíin María naná José, ni cajito ña nuū ní cachindūji de ya.

Jeē ní natecu Jesús

(Mt. 28.1-10; Lc. 24.1-12; Jn. 20.1-10)

16

¹ Te ni ini quivī ndétātú, te María ñuu Magdala, jíin María naná Jacobo, jíin Salomé, ni cajeen ña tēcá perfume jeē quíchuhun ña yiqui cúñu yā.

² Te jenéhen quivī domingo, jeē ní cane niāndii, te ni jinūcoo ña nuū ní yindūji ya.

³ Te cáhān ña:

¿Ndé níhīn yō tēe tejiyo yuū ndihyú yuhu yáú? áchí ña.

⁴ Te ni candacoto ña, te ni cajito ña jeē je ní cujiyo yuū cáhnū un cuáhān.

⁵ Te ni quivīcoo ña ini yaū ndīyī. Te ni cajito ña ñn ndajéhé Yaā Dios jeē cáa nájnūhun

tēe suchí, néne ya ichi lado váha, ñúhun ya ñn sahma cuijín cáni. Te ni cayūhú ña.

⁶ Te ni cahān yā jíin ña:

Ma yūhu ró jijnáhan ró. Chí vecondēhe ró Jesús ñuu Nazaret, Yaā ni jihī jíca cruz. Tuá yā yáhá, chí je ni natecu yā. Yáhá condēhé ró nuū ní cachindūji de ya.

⁷ Cuánungoo te cachi rō nuū tēe cáscuáha jíin yá, jíin núu Pedro, jeē xihna gā maá yá jinū Galilea, te sáa te najinūcoo de. Te yūcuán coto de nuū yā, nájnūhun ni cahān yā jíin de nde saá, áchí yá jíin ña.

⁸ Yūcuán na te ñahan un ní quendacoo ña nuū ní yindūji ya, te cájino ña cuangoo ña. Chí quísi i ña jeē cáyūhú ña. Te tu ní cácachi cuiti ña nuū ní ñn, chí cáyūhú ña.

Jeē ní nane Jesús nuū María ñuu Magdala

(Jn. 20. 11-18)

⁹ Te Jesús ni natecu yā jenéhen quivī domingo. Te xihna gā ni nane ndijin yā nuū María ñuu Magdala, ñahan jeē ní quenehen ya uxā tachī ini.

¹⁰ Te cuahān ña cuacastūhún ña nuū tēe ní cajica jíin yá jeē ní nane ya nuū ña. Te cácuuíhyá ni de te cándahyū de.

¹¹ Te nuū ní cajini de jnūhun jeē ní jito ña nuū yā jeē técu yā, te tu ní cácandíje de jnūhun cáhān ña.

Jeē ní nane ya nuū uū tēe cáscuáha jíin yá

(Lc. 24.13-35)

¹² Yūcuán na te ni quendacoo uū jnáhan tēe ún, cájica de cuahān de ichi rancho, te sñn modo ni nane ndijin yā nuū de.

¹³ Te ni canandicó de, ni cacastūhún de nuū tēe gá jnáhan de. Te ni tu ní cácandíje tucu jnáhan de jeē cáhān ndindúú de.

Jeē ní tejniñu ya de nacani de jnūhun

(Mt. 28.16-20; Lc. 24.36-49; Jn. 20.19-23)

¹⁴ Te cúcuéé gá te ni nane ndijin yā nuū ndihúxí ñn de jeē cáyūcú de mesa cáyeji de staā. Te ni cahān yā nuū de, chí níhni ni de jeē tu cácandíje de jeē cáhān jnáhan de un, jēé ní natecu yā ni cajito de ya.

¹⁵ Te ni cahān yā jíin de:

Cuángoo jíjnáhan ró ní ñayiví, te nacani ró jnūhun ri nuū tēe ñáyuu ndese jnáma ri i.

¹⁶ Te ñayuu candíje te cuandute i, chí cácu i. Te ñayuu tú candíje, chí jnahnū ndetū i.

¹⁷ Te ñayuu candíje, sáha i tǎcǎ jniñu jéhnú yáha jeē steén jeē iyó rí jíin i: Jíin síhví rí quenehen i tachí ini ñayuu. Te cahān i tijni yuhu jéé.

¹⁸ Te núu ni jn#i sanaa i coō, chí núu ni jihi i veneno, te ma sáha daño jíin i. Te suni soó i ndaha i siquī ñáyuu cácuñū, te nduvāha. Achí yá jíin de.

Jeē ní ndaa ya cuanuhun yā andiví

(Lc. 24.50-53)

¹⁹ Yūcuán na te nuū ní ndihí ni cahān maá Jítóho yō jíin de jíjnáhan de, te ni ndaa ya cuanuhun yā andiví, te ni cucōo ya lado váha Yaā Dios nuū cujéhnú ya.

²⁰ Te máá de ni quendacoo de, ni canacani de jnūhun ya tǎca lado ndese jnáma ya ñayuu. Te máá Jítóho yō ni chindéé ñáhán yá de. Te ni jēhe ya fuerza jeē sáha de tǎcǎ jniñu jéhnú jeē steén jeē iyó ndáā jnūhun cánacani de. Te ni cuu. Amén.

JNUHUN VAHA NI TEE SAN LUCAS

¹ Cuehē tēe ni cajicu de ni catee yúcún de historia Jesús, tācá jniñu jeē ni sáha ya ni cajito yó.

² Te ni catee de tāca jnúhun jeē ní castúhun ñáyuu nuū yō, jeē ní cajito i jniñu yúcuan nde ná ni quejéé, te ni canacani i jnúhun ya.

³ Te máá ná, suni ni nanducú yúcún ná tāca jnúhun ya, nde nuū ní quejéé. Te ni jeni ni na jéé suni iyó váha jeē téé cájí ná tāca jnúhun yáha núú ní, amigo Teófilo.

⁴ Te súcuan te cuni ni jéé iyó ndáā tāca jnúhun jeē ní cacastúhún i nuū ní.

Jeē ní cachi ndajéhé jeē cacu Juan tēe scuándute

⁵ Tiempo jeē ní cuu Herodes rey región Judea, te ni Iyo ñn sutū ñayuu hebreo, naní de Zacarías, te grupo Abías cúu de. Te ñasihí de nání ña Elisabet, te suni sēhe yucún maá sūtū Aarón cúu ña.

⁶ Te ndindúú de cahīyo ndaā de nuū Yaā Dios, te ndaā váha cásquicu de jniñu ndácu ley maá Jítoho yō Yaā Dios, cájito tāca ñáyuu.

⁷ Te tú sēhe de iyó, chi ñahan númá cúu Elisabet, te je jéhu ndindúú de.

⁸ Te ñn quivī te jéjníñu Zacarías nuū jniñu jeē cúu de sutū nuū Yaā Dios, chi ni quee quivī jeē ndívī grupo de.

⁹ Te ni casáha de sorteo, nájnūhun iyó costumbre sutū. Te ni sáha tocar Zacarías jeē quivī de ini cuarto ñi templo Jítoho yō Yaā Dios, te cahmu de sūje cútú.

¹⁰ Te hora jeē cayú sūje cútú, te tāca ñáyuu cuehē cáhīn i fuera, cájicān tahu i.

¹¹ Te ni cane ñn ndajéhé maá Jítoho yō nuū de, ín ya lado váha altar nuū jéhu de sūje cútú.

¹² Te ni cunéé ni Zacarías ni jito de nuū yā, te yōhyo ni yūhú de.

¹³ Te ni cahān ndajéhé un jín de:

Zacarías, ma yūhu ró, chi je ni chihi Yaā Dios cuenta jeē ni jícān tahu rō. Te ñasihí ró Elisabet, scácu ña ñn sēhe yíí, te snání ró i Juan.

¹⁴ Te yōhyo cusī ni rō. Te cuehē ñayuu cusī ni jeē cácu i.

¹⁵ Chi kujéhu sēhe ró sáha máá Yaā Dios. Te ma cóho i vino ni ndixi cuíí. Te cunuú máá Espíritu Santo jín i, nde ná tu cacu i.

¹⁶ Te sáha i jeē cuehē ñayuu nación rō Israel ndivicoo i nuū Jítoho i Yaā Dios.

¹⁷ Te xīhna gā Juan quiji nacani jnúhun Jítoho yō Jesús, te sáa te quiji ya. Te sáha i nájnūhun ni sáha Elías, tēe ni nacani jnúhun Yaā Dios jenahán, te conevāha i poder jeē nácani i jnúhun, nájnūhun ni conevāha Elías. Te sáha i jeē tāca tátá ndumanī de jín sēhe de. Te suni sáha i jeē ñáyuu ñihni ni cuatáhú i nuū Yaā Dios, nduu i ñayuu ndaā. Súcuan sátúhva i ñayuu návāha candíje i máá Jítoho yō jeē quiji ya. Achí ndajéhé.

¹⁸ Te Zacarías ni cajnúhún de ya:

¿Nde cucáhu ni na núu jendaá cúu? Chi tēe jéhu cúu ná, te suni jéhu ñasihí ná, áchí de.

¹⁹ Te ni cahān ndajéhé un jín de:

Máá rí cúu Gabriel, te íne ri nuū Yaā Dios, jejniñu ri nuū yā. Te ni tají yá ruhū vēji ri cahān rī jín ró, te nácani ri jnúhun váha yáha núú rō.

²⁰ Te jeē tu ní cándíje ró jnúhun ni cahān rī, te cuñíhín ró, te ma cúu cahān rō, chi nde na cácu sēhe ró. Te squícu nahín jnúhun cáhān rī yāhá, na quee quivī, achí ndajéhé.

²¹ Te ñayuu cáhīn ichi fuera, cándetu i Zacarías, te cájeni ni i na vé ni cuu jeē cucuéé de ini cuarto ñi templo.

²² Te nuū ní quenda de, te tuá ni cúu cahān de jín i. Te ni cajecūhun ni i jeē ini templo ni jito ndijin de ñn jeē ni stéén yā nuū de. Te máá seña na ni sáha de nuū i, chi ni cuñíhín de.

²³ Te nuū ni jínu quivī ni jejniñu de ini templo, te cuanuhun de vehe de.

²⁴ Te ni cuu jecu quivī, te ñasihí de Elisabet ni jecūhun sēhe ña. Te ni Iyo ña vehe ña uhūn yoō jeē tuá nde ní jéhén ña. Te jéni ni ña:

²⁵ Súcuan ni sáha máá Jítoho yō jín rí, te ni tejiyo ya jnúhun jeē cúcanu rī nuū ñáyuu jeē tú sēhe rí, jéni ni ña.

Jeē ní cachi ndajéhé jeē cacu Jesús

²⁶ Te nuū íñu yoō, te ni tají Yaā Dios ndajéhé yā Gabriel, ni jehēn yā ñn ñuu naní Nazaret, ndañúu Galilea.

27 Te ni jehēn yā nuū ñn sūchi síhí nání María. Te je ni cundaā jeē quijnáhan ña jíin ñn tēe nání José, te sēhe yucūn rey David cúu de.

28 Te ni quiví ndajéhé un núu ndeé ña, te ni cahān yā:

Tandii, nacā ndetū cúu ró. Chi máá Jítóho yō Yaā Dios iyó yá jíin ró, te ni sáha ya jeē yóhoyo ndetū gā cúu ró núu tāca gā ñahan, áchí yá.

29 Te nuū ni jíto ña nuū yā, te ni cunéé ni ña jeē súcuan cáhán yā, te jéni ni ña naun cáhán yā súcuan jíin ña.

30 Te ni cahān gā ndajéhé un jíin ña:

Ma yūhu ró María, chí ni sáha Yaā Dios jeē váha jíin ró.

31 Te jecūhun sēhe ró te scácu ró ñn sēhe yí, te snání ró i Jesús.

32 Te kujénu i, te conaní i Sēhe Yaā kujénu téyí. Te máá yá jeē cúu ya Jítóho yō Yaā Dios, sáha ya jeē cuu i rey, nájnūhun jíi i David ni cuu de rey.

33 Te ní cáni ndacu i jniñu nuū ñáyuu nación Israel. Te ma ndíhi cuiti jeē ndácu i jniñu. Achí ndajéhé.

34 Yūcuán na te ni cajnūhún María:

¿Ndeese coo jeē ni cáhán ní? Chi ná tu coo yí ná, áchí ña.

35 Te ni cahān ndajéhé un:

Máá Espíritu Santo quiji siquī rō, te poder máá Yaā kujénu téyí sáha ñn jniñu jénu jíin ró. Te jeē yúcuan máá súchi íi jeē cácu, quihi cuenta i nuū Yaā Dios, te cahān ñayuu jeē Séhe Yaā Dios cúu i.

36 Te suni cástūhun rí nuū rō jeē jnáhan ró Elisabet, suni scácu ña ñn sēhe vésú je jénu ña. Te vijna íyó íñu yoō jeē tuá cácahān ñayuu jeē cúu ña ñahan númá.

37 Chi ndíhi-ni cuu sáha Yaā Dios, te tu íyó ni ñn jeē ma cúu sáha ya, achí ndajéhé un.

38 Yūcuán na te ni cahān María:

Cuu núu súcuan, chí sáha ná táca jniñu ndácu Jítóho yō Yaā Dios, te na cóo jíin ná nájnūhun ni cachi ní, áchí ña.

Te máá ndajéhé un cuáhān-ni ya.

Jeē ni jécondēhé María Elisabet

39 Te ni cuu jecu quiví, te yachí cuahān María, ni caa ña yucu cuahān ña ñn ñuu región Judea.

40 Te ni jinū ña vehe Zacarías, te ni cahān ña jíin Elisabet.

41 Te nuū ní jini Elisabet jeē cahán María jíin ña, te sūchi ñúhun chíji ña ni canda-ni i. Te ni cunuú Espíritu Santo ini anuá ña.

42 Te ni cahān jee ña:

Ni sáha Yaā Dios jeē yóhoyo ndetū gā cúu ró núu tāca gā ñahan, jíin jéé yóhoyo ndetū sēhe ró.

43 ¿Te ndese cúu jeē ní quee naná máá Jítóho rí nuū rí? Chi tu cújénu cuiti rí.

44 Chi jeē ní jini-ni ri jnūhun ni cahān rō jíin rí, te sūchi ñúhun chíji ri ni canda i jeē cúsiñ ni i.

45 Te nacā ndetū rō jeē ní candíje ró, chí squícu nahín tāca jnūhun ni cahān máá Jítóho yō jíin ró. Achí Elisabet.

46 Yūcuán na te ni cahān María:

Cáhán rí jeē kujénu ndasí máá Jítóho yō Yaā Dios,

47 te cúsiñ ni rí jíin Yaā Dios, Yaā jnáma ruhū.

48 Chí ni sáha ya cuenta ruhū, vésú tu cújénu ri.

Te na squícu ri jniñu ndácu ya.

Te nde vijna te tāca ñáyuu jeē nácacu, cahān i jeē yóhoyo ndetū rí.

49 Chí Yaā jní ndíhi poder, ni sáha ya jniñu jénu jíin rí.

Te Yaā íi ndoo cúu ya.

50 Te ní cáni cundáhú ni yā tāca ñáyuu ndíso íyo nuū yā.

51 Ni sáha ya jniñu jénu jíin poder yā,

chí ni scúnu ya ñayuu casándúxí máá,

52 te ñayuu cácujeñu, ni quende ya jeē kujénu i.

Te ñayuu ndahú chí ni sajénu ya i,

53 te ñayuu cájiñ sōco ni jēhe ya jeē cáji vāha i.

Te ñayuu cucá ní natají yá i súcuan-ni.

54 Te ni chindéé ñáhán yá yohó, ñáyuu nación Israel, jeē cácuu yó mozo yā,

te tu nāá ni yā jeē cundáhú ni yā yohó.

55 Chí súcuan ni jejnūhun ya nuū tāca jíi yō, nuū Abraham jíin táca yúcūn de jeē cóo ní cáni.

Achí María.

56 Te ni condee ña jíin Elisabet nájnūhun uní yoō. Yūcuán na te cuanuhun ña vehe ña.

Jeē ní cacu Juan tēe scuándute

57 Te ni jinū quivī jeē scácu Elisabet sēhe ña, te ni scácu ña ñn sēhe yí.

58 Te tāca ñáyuu ndeé yajni jíin ña jíin táca jnáhan ña, ni cajini i jeē yóhoyo ni cundáhú ni Yaā Dios ña, te ni jengoo i ni cacahān i jnūhun sī ni jíin ña.

59 Yūcuán na te nuū uná quivī jeē ní cacu i, te ni jengoo ñayuu ni sáha i circuncidar sūchi yíquín un. (Te yūcuán cúu ñn jnunī nuū yíqui cúñu tāca sūchi yí hebreo jeē steén jeē cácuu i ñayuu Yaā Dios.) Te snání i sūchí un síhví tátá i Zacarías nuú.

60 Te ni cahān naná i:

Ma cúu, chi Juan conaní i, áchí ña.

61 Te ni cacahān i jíin ña:

¿Te naun? Chi tú ni ñn jnáhan ró nání súcuán, áchí i.

62 Yūcuán na te jíin seña ni cacajnūhún i tátá sūchí un ndese cúni de jeē cónaní i.

63 Te máá de ni jicān ñn tutu, te ni tee de: Juan conaní i. Te tāca ñáyuu un ní canaa ni i cájito i.

64 Te ni nduvāha Zacarías jeē ní cuñhín de, te ni quejé de cáhán de jeē yóhoyo vāha Yaā cúu Yaā Dios.

65 Te tāca ñáyuu ndeé yajni jíin de, yóhoyo ni canaa ni i. Te ní yucu región Judea ni jitē núu tāca jnūhun yáha jeē súcuán ni cuu.

66 Te tāca ñáyuu jeē ní cajini jnūhun, ni quejé i cánacani ni i, te cacajnūhun jnáhan i:

¿Ndeese coo na cuéhnu sūchi yáha? áchí i.

Chi máá Jítóho yō yóhoyo ni sáha ya jeē vāha jíin i.

Jnūhun luu jeē ní nacani Zacarías

67 Te tátá i Zacarías ni cunuú Espíritu Santo jíin de, te ni nacani de jnūhun ni steén Yaā Dios nuū de:

68 Yóhoyo vāha Yaā cúu máá Jítóho yō, Yaā Dios yohó ñáyuu Israel, chi ni quiiji ya nuū yō jeē cácuu yó ñáyuu yā, te ni jnama ya yohó.

69 Te ni jeni ya ñn Yaā iyó poder jeē jnáma ya yohó, te Yaā ún cacu yucūn mozo yā rey David.

70 Chi súcuán ni jejnūhun ya, ni cacahān tāca té ndoo ánuá jeē ní canacani de jnūhun ya jenahán.

71 Chi ni cacahān de jeē jnáma ya yohó núu jeē cájito uhū yohó, jíin núu jeē cáquitī ni nuū yō.

72 Chi ni cundáhú ni yā tāca jíi yō jijnáhan, te tu ní náa ni yā contrato iī yā.

73 Chi suu un ní jejnūhun téyí yá nuū jíi yō Abraham,

74 suu jeē jnáma ya yohó núu ñáyuu cájito uhū yohó,

návāha cuajniñu yó núu yā, te ma yūhu yó i.

75 Te coo ndaā coo ndoo ánuá yō, cuajniñu yó núu yā tāca quivī jeē cótecu yō.

76 Te róhó sūchi lúli, cuu ró té nacaní jnūhun Yaā cujehnu téyí.

Chi cosnúu ró ichi núu maá Jítóho yō, návāha sátūhva ró ñáyuu, te sáa te quiiji ya.

77 Te castūhun ró nuū ñáyuu maá yá jeē jnáma ya i,

jíin jéé cóne cáhnu ni yā nuū tāca cuéchi i.

78 Chi Yaā Dios maá yó, vāha ni yā te cundáhú ni yā yohó.

Jeē yūcuán tají yá maá Yaā jeē sáha jeē cundijin ini anuá yō, quiiji ya nde andiví,

79 návāha jecūhun ni yohó jéé cáyūcu najnūhun nuū néé nuū jé yajni cuu yō.

Te chuhun ya yohó ichi nuū cóo ndeyí coo sī ni yō.

Achí Zacarías.

80 Te sūchi lúli un ní jehnu i te ni ije i jíin jnūhun ya. Te ni condee i nde nuū ñūhun téhé ndé quivī ní quenda ndijin i nuū ñáyuu Israel.

Jeē ní cacu Jesús (Mt. 1.18-25)

2

1 Te ni cuu jecu quivī, te Augusto, tēe cúu rey, ni ndacu de jniñu jeē coo censo jeē núcosō síhví ndivii ñayuu ní cáhnu nuū ndácu de jniñu.

2 Yāha cúu censo xīhna ñūhún jéé ní casáha de ná ni cuu Cirenio gobernador nación Siria.

3 Te ndivii ñayuu cuanungoo i ná ñuu ná ñuu maá i jeē nácuāha i síhví i.

4 Te suni José ni quenda de ñuu Nazaret, ndañū Galilea. Te cuanuhun de región Judea, te ni najinū de ñuu Belén, jeē cúu ñuu

nuū ní cacu rey David jenahán. Chi sēhe yucūn David cúu de.

⁵ Te ni jehēn de návāha nacuāha de síhví de jíin María, chi je yajni quijnáhan ña jíin de. Te ñúhun sēhe ña ni sáha Espíritu Santo.

⁶ Te níni cáhīn de yūcuán te ni jinū quiivī jeē cácu sēhe ña.

⁷ Te ni scácu ña sēhe yí nūú ña, te ni chusúcún ña i sahma cuitá, te ni jequin ña i ini ñn nundōo nūú yéji quití, chi tuá núne mesón condee ña.

Jeē ní canecoo ndajéhé yā nuū pastor

⁸ Te yajni ñuu Belén cáhīn tēe cácuu pastor, te cándito de lanchi de ní ñiñu jecuáa nde yucu ún.

⁹ Te ñn sanaa-ni te ni cane ñn ndajéhé maá Jítoho yō nuū de, te nduva maá Jítoho yō ni ndindēe ní nūú cáhīn de. Te yōhyo ni cayūhú de.

¹⁰ Te ni cahān ndajéhé un jíin de:

Ma yūhu ró jijnáhan ró, chi vēji ri castūhun rí jnūhun vāha nuū rō, te sáha jeē cúsiñ ndasí ni tāca ñáyuu:

¹¹ Chi vijna nde ini ñuu David ni cacu ñn Yaā jnama róhó, te maá Jítoho yō Cristo cúu ya.

¹² Te súcuán nacuni rō sūchi yíquín un, chi ñúsúcún i sahma cuitá te catú i ini ñn nundōo nūú yéji quití. Achí yá.

¹³ Te ñn sanaa-ni te ni canecoo cuehē gā ndajéhé andiví, cáhīn ya jíin ndajéhé un, te cacahān yā jeē yōhyo vāha Yaā cúu Yaā Dios. Te áchí yá:

¹⁴ Yōhyo luu cújéhnū Yaā Dios nde nuū sucún.

Te na ndúvāha ni tāca ñáyuu ñayiví, sáha ya jeē cúsiñ ni yā jíin i.

Achí tāca ndajéhé.

¹⁵ Yūcuán na te cuanungoo ndajéhé un andiví. Te tēe cácuu pastor ni cacahān de jíjnáhan de:

Na quíhín yō nde ñuu Belén, te cuni yō na vé ni cuu jeē ní castūhun maá Jítoho yō nuū yō, achí de.

¹⁶ Te yachí cuangoo de, te ni nanihīn de María jíin José jíin sūchi yíquín un, catú i ini nundōo nūú yéji quití.

¹⁷ Te nuū ní cajini de nuū i, te ni canacani de jnūhun jeē ní cachi ndajéhé yā nuū de síquī sūchi yíquín un.

¹⁸ Te ni canaa ni tāca ñáyuu cájini nahín i jnūhun cacahān tēe cácuu pastor.

¹⁹ Te María, ni quendōo tāca jnūhun yáha nuū jeē níjnūní ña, te nácani ni ña síquī.

²⁰ Te tēe cácuu pastor cuanungoo de, te ni cacahān de jeē yōhyo vāha Yaā cúu Yaā Dios síquī tāca jéē ní cajini sōho de jíin jéē ní cajito de, chi ni síquīcu nahín nájnūhun ní cahān ndajéhé yā jíin de.

Jeē ní castéén de i nuū Yaā Dios ini templo

²¹ Te ni cuu unā quiivī jeē ní cacu ya, te ni casáha de circuncidar sūchi yíquín un. Te ni casnání de i Jesús, chi síhví yúcuán ní cachi ndajéhé yā nuū María nde ná tu jecūhun i.

²² Te ni jíinu quiivī jeē casquícu ña costume jeē ndúndoo ña nuū Yaā Dios jijnáhan ña, nájnūhun cáhān ley jeē ni jéhe ya nuū Moisés. Te ni jengoo de jíin i ñuu Jerusalén jeē nácuāha de i nuū maá Jítoho yō Yaā Dios.

²³ Súcuán ni casáha de, chi yósó nūú tútu ley yā: Tāca sūchi yí nūú jéē cácacu, quihi cuenta i nuū Jítoho yō Yaā Dios, achí tutu.

²⁴ Te suni cuasocō de nájnūhun cáhān ley maá Jítoho yō: Socō rō uū liví chí uū paloma, achí tutu.

²⁵ Te ni íyo ñn tēe nání Simeón, ndéé de ñuu Jerusalén tiempo un. Te tēe ndaā, tēe chíñuhún vāha nuū Yaā Dios cúu de. Te ñúhun ni de jeē quée maá Yaā jnama ñayuu nación de Israel. Te maá Espíritu Santo íyó yá jíin de.

²⁶ Te je ni castūhun yá nuū de jeē ma cúu cuití de chi nde coto de nuū Cristo jeē tají maá Jítoho yō Yaā Dios.

²⁷ Te ni steén yā nuū de jeē quíhín de templo quiivī ún. Te suni tátá naná sūchi yíquín Jesús, ni quiivícoo de ini templo jíin i, jeē nácuāha de i nuū Yaā Dios nájnūhun cáhān ley Moisés.

²⁸ Te Simeón ni ñunundee de i, te ni cahān de jeē yōhyo vāha Yaā cúu Yaā Dios, te áchí de:

²⁹ Tátá Yaā Dios, vijna te cuu cuāha ni jnūhun jeē cuu ná, chi je ni cusíñ ni ná.

Chi je ni síquīcu ní jnūhun ni jejnūhun ní nūú sāña jéē cúu ná mozo ní.

³⁰ Chi ni jito jíinúu na nūú Yaā jnama sāña jíjnáhan ná.

31 Chi ni jeni ní yá jeē jnáma ya tāca ñáyuu ñayīví.

32 Te máá yá sáha jeē cúndijin ini anuá ñayuu tācá nación, návāha jecūhun ni i siquī ní.

Te sáha ya jeē kujéhu ñayuu maá ní Israel. Achí Simeón.

33 Te José jíin náná i cánaa ni de cájini nahín de jnūhun ni cahān Simeón siquī í.

34 Te ni jicān tahu Simeón jehē de jíjnáhan de, te ni cahān de jíin náná i María:

Sūchi yáha vēji i jeē candíje cuehē ñayuu nación yō Israel, te cācu i jíjnáhan i. Te sava i ma candíje i, te jnahnū ndetū i. Chi cúu i Yaā ní tají Yaā Dios, te sa squéhichī ni cuehē ñayuu i.

35 Te súcuan te quenda ndijin ndese cájini ni tāca ñáyuu. Te máá ró chi jnahuhū ndasí ni rō coto ró jēē ndóho i. Achí Simeón.

36 Te suni íne ñi ñahan nácani jnūhun Yaā Dios, naní ña Ana. Te sēhe Fanuel, yucūn Aser cúu ña. Te je jéhu ndasí ña. Te nde ná lulí ña te ni condee ña jíin yī ña uxā cuiyā.

37 Yūcuán na te ni quendōo ndáhú ña, te ni cuu cuūn xico cuūn cuiyā ña. Te tu cújiyo ña ini vehe íi, chi jéjníñu ña nuū Jítóho yō Yaā Dios nduú ñuú, te ndite ni ña te jicān tahu ña.

38 Te suni hora un ní quee ña, te ni nacuatáhú ña nuū Yaā Dios. Te ni cahān ña jnūhun sūchi yíquin un jíin tāca ñáyuu Jerusalén jeē cáñuhun ni i jeē quée Yaā jnama i.

Jeē cuánungoo de ñuu Nazaret

39 Te ni jínu ni casquícu detācá jniñu ndácu ley maá Jítóho yō Yaā Dios, te cuanungoo de ñuu de Nazaret, ndañū Galilea.

40 Te sūchi lulí un ní jehnu i, te ni ije i, te ni cundíchí gá i. Te ni sáha Yaā Dios jeē váha ndasí jíin i.

Jeē íne sūchi lulí Jesús ini templo

41 Te ndijnahan cuiyā jéngoo tátá i náná i ñuu Jerusalén, jeē cúu vico pascua.

42 Te nuū ní cuu uxī uū cuiyā i, te cuanungoo tucu de Jerusalén, nájñuhun sáha sáha de quivī víco ún.

43 Te ni yáha vico, te cuanungoo de. Te sūchi lulí Jesús, ni quendōo i Jerusalén, te tu ní cájini José jíin náná i.

44 Te cájini ni de jeē cuahán i mēhñu ñáyuu cájica ichi ún. Te ni cajica de ñi quivī, te sáa te ni cananducú de i mēhñu táca jnáhan de jíin ñáyuu cájini jnáhan de jíin.

45 Te tu ní cánanihín de i. Te ni canandicó de cuangoo de Jerusalén, cuananducú de i.

46 Te nuū uní quivī te ni cananihín de i ini templo, néne i mēhñu téé cástéén tutu ley Yaā Dios, te jíni nahín i jeē cácahān de te cájnūhún i de siquī jnūhun ún.

47 Te tāca ñáyuu cájini jnūhun cáhán i, cánaa ni cájito jeē váha cájí xíní i te váha nástió cuíñí i jnūhun.

48 Te nuū ní cajito tátá i náná i nuū i, te ni canaa ni de. Te ni cahān naná i jíin i:

Séhē, ¿naun ni sáha ró súcuan jíin rí? Chi ruhū jíin tátá rō, yōhyo ni canacani ni rí cananducú rí rohó, achí ña.

49 Yūcuán na te ni cahān i:

¿Naun cananducú ní saña? ¿A tu cájini ni jēē cánuú cocu ná jíin jniñu Tátá na Yaā Dios? Achí i.

50 Te tu ní cájecūhun ni tátá i náná i jnūhun ni cahān i.

51 Yūcuán na te cuanuhun i jíin de jíjnáhan de ñuu Nazaret, te ni jendije i nuū de. Te náná i, ni quendōo tāca jnūhun yáha núu jeē níjnūní ña.

52 Te Jesús ni jehnu ga i, te ni cundíchí gá i, te cúsi ni Yaā Dios jíin i, te suni súcuan tāca ñáyuu.

Jnūhun Juan tēe scuándute

(Mt. 3.1-12; Mr. 1.1-8; Jn. 1.19-28)

3

1 Te ni cuu xahūn cuiyā jeē ndácu Tiberio jniñu ní nación. Te Poncio Pilato cúu de gobernador Judea, te Herodes cúu de gobernador Galilea, te ñani de Felipe cúu de gobernador Iturea jíin Traconite, te Lisnias cúu de gobernador Abilinia.

2 Te sutū kujéhu ga cácu Anás jíin Caifás. Te ni quee jnūhun Yaā Dios nuū Juan sēhe Zacarías, jeē íne de nuū ñuhun téhé.

3 Te ni jica nuu de tācá ñuu jeē iyó yajni yūte Jordán. Te cáhán de jíin ñáyuu jeē na nácani ni i jeē stóo i cuēchi i te cuandute i, návāha cone cáhnu ni Yaā Dios nuū cuéchi i.

4 Te súcuan ni squícu jnūhun Juan jeē yosó nuū tútu ni tee Isaías, tēe ni nacani jnūhun Yaā Dios nde jenahán:

Coo ñn tēe cana jee nde nuū ñuhun téhé:
Sátühva ró máá ró jijnáhan ró, chi quee maá
Jítoho yō.

Te sáha ró jniñu ndaā, chi vēji ya.

⁵ Te tāca xéhvā na ndúndaā,
te tācá yucu jíin loma na ndúnduhvā,
te na ndúyóhó ichi yácuá, te na ndúlii ichi
ndáyí.

Te ndihi un cúu jeē ndúvāha ndundaā anuá
ñayuu nuū yā.

⁶ Te ndihi i cuni i jeē jnáma Yaā Dios i.
Súcuan cahān Juan, achí tutu.

⁷ Te ni quendacoo cuehē ñayuu, cuahān i
nuū de jeē scuándute de i. Te ni cahān de
nuū i:

Va sēhe coō cácuu ró, chi xeēn rō nájñuhun
coō. ¿A cájeni ni rō jeē cuu cunu ró cācu ró
núu castigo xeēn jeē quíji?

⁸ Núu súcuan te sáha ró jniñu váha, te
súcuan stéén rō jeē ní nacani ndije ni rō
jeē stóo ró cuéchi ró. Te ma cáni ni rō
cahān rō jeē cuu cācu ró síquī jeē cácuu ró
yúcūn Abraham. Chi cáhān rī jíin ró jeē cuu
sáha Yaā Dios jeē tāca yúu yáha nduu sēhe
Abraham jeē candíje vāha, te núu cúní yā.

⁹ Te cácuu ró nájñuhun nundéhé jeē tu
jéhe ndehē váha. Te vijna je íyó túhva Yaā
Dios jeē cuáha ya castigo xeēn, nájñuhun je
íyó túhva ñn cāa jeē cahnde nde yoho yujnu.
Núu súcuan te sáha ya jíin ró nájñuhun jíin
tāca yujnu jeē tu cúun ndehē váha, jeē tah-
ndé te cayū nuū ñuhún. Achí de.

¹⁰ Te ñayuu un ní cacajñuhún i de:

¿Te ndese sáha ná núu súcuan? Achí i.

¹¹ Te ni cahān de:

Róhó jéē cánevāha uū sahma, na cuáha ró
ñn nuū jeē tu névāha. Te róhó jéē cánevāha
jeē yéji, suni súcuan na sáha ró, achí de jíin i.

¹² Te suni jecu tēe cástútú xúhun renta,
ni quecoo de jeē cuándute de. Te ni caca-
jñuhún de Juan:

Maestro, te máá ná, ¿ndese sáha ná
jijnáhan ná?

¹³ Te ni cahān Juan jíin de:

Ma scaá ró cácan rō xúhún, chi máá
cúhva-ni jeē ní ndacu jniñu nuū rō, achí de.

¹⁴ Te suni ni cacajñuhún jecu soldado:

Te máá ná, ¿ndese sáha ná jijnáhan ná?
achí de.

Te ni cahān Juan jíin de:

Ma quénde rō ndajníñu ni ñn jíin jñuhun
siúhú ni jíin jñuhun stáu yáhu, te cusñ ni rō
jíin yáhu ró, achí de.

¹⁵ Te tāca ñáyuu cándetu i jeē quíji Cristo,
Yaā jeē tají Yaā Dios, te cájeni ni i jeē sanaa
te suu cúu Juan.

¹⁶ Te ni cahān Juan jíin i jijnáhan i:

Ruhū chi jíin ndute scuándute ri rohó. Te
vēji ñn Yaā jeē nájñuhun scuándute ya rohó
cúu jeē cuáha ya Espíritu Santo condee ini
anuá rō, te poder yā cúu nájñuhun ñuhún.
Te cújéhnú ndasí yá, chi tú na vé jéhnú cui-
tí cúu ri nuū yā, ni jeē cuajníñu ri nuū yā vésú
ñn jniñu lúli gá nájñuhun jeē ndají rí vésú
correa ndijēn yā.

¹⁷ Te sáha ya nájñuhun sáha tēe scánda
trigo, chi sásñn ya ñayuu vāha jíin ñáyuu
cunéé, nájñuhun cúndoo trigo jeē quénda
sñn paja. Te nastútú yá trigo yā ndívi ini
yacā yā. Te paja chi jnaa yā nuū ñuhún jeē
ma ndahvá cui-
tí. Achí Juan.

¹⁸ Te súcuan te jíin cuéhé gā jñuhun ni
stíhví ni de ñayuu un, ní nacani de jñuhun
vāha Yaā Dios nuū i.

¹⁹ Te suni ni cahān xeēn de nuū Herodes,
tēe cúu gobernador, chi tēe un ní nacueca
de Herodías, ñasihí ñani de Felipe. Te cuehē
gā jniñu néé súcuan ni sáha Herodes.

²⁰ Te sa víhyá gā ni sáha de jeē neé gá, chi
ni chune de Juan vecāa.

Jeē ní jendute Jesús

(Mt. 3.13-17; Mr. 1.9-11)

²¹ Te nde ná tu quívi Juan vecāa, ná ni
ine de ni scuándute de tāca ñáyuu, te suni ni
scuándute de Jesús. Te jícán tahu yā, te ni
nune-ni andívi.

²² Te ni cuun Espíritu Santo ni quee xiní
yā, te cāa nájñuhun ñn paloma. Te ichi
ándívi ní cahān ñn jñuhun:

Máá ró cúu Sēhe ri jeē maní ndasí rí jíin,
te yōhyo cúsiñ ni rī jíin ró, achí.

Lista ñayuu yucūn ní quiji Jesucristo

(Mt. 1.1-17)

²³ Te ná ni quejéé Jesús steén yā jñuhun,
te íyó yá nájñuhun ocō uxī cuiyā. Te cájeni
ni ñayuu jeē sēhe José cúu ya. Te José ni cuu
sēhe Elí,

²⁴ te Elí ni cuu sēhe Matat, te Matat ni
cuu sēhe Leví, te Leví ni cuu sēhe Melqui,

te Melqui ni cuu sēhe Jana, te Jana ni cuu sēhe José,

²⁵ te José ni cuu sēhe Matatías, te Matatías ni cuu sēhe Amós, te Amós ni cuu sēhe Nahum, te Nahum ni cuu sēhe Esli, te Esli ni cuu sēhe Nagai,

²⁶ te Nagai ni cuu sēhe Maat, te Maat ni cuu sēhe Matatías, te Matatías ni cuu sēhe Semei, te Semei ni cuu sēhe José te José ni cuu sēhe Judá,

²⁷ te Judá ni cuu sēhe Joana, te Joana ni cuu sēhe Resa, te Resa ni cuu sēhe Zorobabel, te Zorobabel ni cuu sēhe Salatiel, te Salatiel ni cuu sēhe Neri,

²⁸ te Neri ni cuu sēhe Melqui, te Melqui ni cuu sēhe Adi, te Adi ni cuu sēhe Cosam, te Cosam ni cuu sēhe Elmodam, te Elmodam ni cuu sēhe Er,

²⁹ te Er ni cuu sēhe Josué, te Josué ni cuu sēhe Eliezer, te Eliezer ni cuu sēhe Jorim, te Jorim ni cuu sēhe Matat,

³⁰ te Matat ni cuu sēhe Leví, te Leví ni cuu sēhe Simeón, te Simeón ni cuu sēhe Judá, te Judá ni cuu sēhe José, te José ni cuu sēhe Jonán, te Jonán ni cuu sēhe Eliaquim,

³¹ te Eliaquim ni cuu sēhe Melea, te Melea ni cuu sēhe Mainán, te Mainán ni cuu sēhe Matata, te Matata ni cuu sēhe Natán,

³² te Natán ni cuu sēhe David, te David ni cuu sēhe Isaí, te Isaí ni cuu sēhe Obed, te Obed ni cuu sēhe Booz, te Booz ni cuu sēhe Salmón, te Salmón ni cuu sēhe Naasón,

³³ te Naasón ni cuu sēhe Aminadab, te Aminadab ni cuu sēhe Aram, te Aram ni cuu sēhe Esrom, te Esrom ni cuu sēhe Fares, te Fares ni cuu sēhe Judá,

³⁴ te Judá ni cuu sēhe Jacob, te Jacob ni cuu sēhe Isaac, te Isaac ni cuu sēhe Abraham, te Abraham ni cuu sēhe Taré, te Taré ni cuu sēhe Nacor,

³⁵ te Nacor ni cuu sēhe Serug, te Serug ni cuu sēhe Ragau, te Ragau ni cuu sēhe Peleg, te Peleg ni cuu sēhe Heber, te Heber ni cuu sēhe Sala,

³⁶ te Sala ni cuu sēhe Cainán, te Cainán ni cuu sēhe Arfaxad, te Arfaxad ni cuu sēhe Sem, te Sem ni cuu sēhe Noé, te Noé ni cuu sēhe Lamec,

³⁷ te Lamec ni cuu sēhe Matusalén, te Matusalén ni cuu sēhe Enoc, te Enoc ni cuu sēhe Jared, te Jared ni cuu sēhe Mahalaleel, te Mahalaleel ni cuu sēhe Cainán,

³⁸ te Cainán ni cuu sēhe Enós, te Enós ni cuu sēhe Set, te Set ni cuu sēhe Adán, te Adán ni cuu sēhe Yaā Dios, chi ni sāha ya de.

Jeē ní jito ndee jexeén Jesús
(Mt. 4.1-11; Mr. 1.12-13)

4

¹ Te Jesús ni cunuú Espíritu Santo ini yā, te ni quenda ya yūte Jordán cuahān yā. Te ni jinū yā nde nuū ñúhun téhé ní sāha Espíritu Santo.

² Te ni ine ya yūcuan úū xico quivī, te ni jito ndee jexeén yā, chi cúní jeē sāha ya cuēchi. Te tāca quivī ún tu ní yéji cuiti yā, te ná ni yāha quivī ún, te jí yā sōco.

³ Yūcuán na te ni cahān jexeén un jíin yá: Núu máá ró cúu Sēhe Yaā Dios, te cahān rō jeē yuū yāha na ndúu staā caji rō, achí.

⁴ Te ni cahān Jesús jíin:

Tuú chi yósó núu tútu iī: Nasūu máni máá jíin stáā cátecu ñayuu, chi suni jíin táca jnúhun cáhān Yaā Dios, achí yá.

⁵ Yūcuán na te cuahān jexeén un jíin yá nde xinī ñn yucu súcún, te ñn núnúu-ni ni steén nuū yā tācá nación ní cáhnu ñayiví.

⁶ Te ni cahān jíin yá:

Nuū maá ró cuāha ri jeē kujéhnú ró núu ndivii nación yāha, chi yōhyo luu cáa. Chi máá rí jnñ ndíhi, te cuu cuāha ri nuū ndé ñn cúní rī.

⁷ Núu súcuan te núu cuiñi yítí ró chiñúhún ró ruhū, te cuāha ndíhi ri nuū rō. Achí jexeén.

⁸ Te ni cahān Jesús jíin:

Satanás, cujiyo quihñ rō, chi yósó núu tútu jeē chiñúhún ñayuu maá Jítóho i Yaā Dios, te nuū maá-ni ya cuajníñu i. Achí yá.

⁹ Yūcuán na te cuahān jexeén un jíin yá nde ñuu Jerusalén. Te ni jeni ya xinī torre templo. Te ni cahān jíin yá:

Te núu Sēhe Yaā Dios cúu ró, te síngava ró máá ró nde nuū ñúhun, chi jnama ya rohó.

¹⁰ Chi yósó núu tútu:

Tejníñu ya ndajéhé yā quijicoo coto róhó.

¹¹ Te cunundee yā rohó jíināhan ya, návāha ma cáchíhi ró jéhē rō nuū yuú. Achí tutu. Achí jexeén.

¹² Te ni cahān Jesús:

Tuú chi suni yósó núū tútu jeē ma coto ndee ñayuu Jitoho i Yaā Dios, núu jnama ya i chí tuú, áchí yá.

¹³ Te tuá ni níhín jexeén modo coto ndee Jesús quiṽi ún, te ni cujiyo cuahān jecu-ni tiempo.

Jeē ní quejéé Jesús nácani ya jnūhun región Galilea

(Mt. 4.12-17; Mr. 1.14-15)

¹⁴ Te ni cunuú fuerza Espíritu Santo ini Jesús, te cuanuhun yā Galilea. Te ní región yajni yūcuan ní jītē núu jnūhun ya.

¹⁵ Te ni steén yā jnūhun ini tācá vehe iī sinagoga, te ndihi ñayuu ni cajejnūhún i ya.

Jeē cuánuhun yā ñuu Nazaret

(Mt. 13.53-58; Mr. 6.1-6)

¹⁶ Te ni najinū yā ñuu Nazaret nuū ní jehnu ya. Te quiṽi ndétātú ni quiṽi ya ini vehe iī sinagoga, nájñūhun sáha sáha ya. Te ni ndocuiñi yā jeē cahu ya tutu iī.

¹⁷ Te ni cajēhe de tutu ni tee Isaías, tēe ni nacani jnūhun Yaā Dios nde jenahán. Te ni nune ya tutu ún, te ni nanihín yā nuū yósó jnūhun ni cahu ya:

¹⁸ Espíritu maá Jítoho yō Yaā Dios iyó yá jín rí, chi ni tejníñu ya ruhū jeē nácani ri jnūhun vāha nuū ñayuu ndahú.

Te ni táji yá ruhū vēji ri jín jnūhun jeē ndúvāha ni ñayuu cácuquíhyá ni.

Te castūhun rí nuū ñayuu cáyihí ndaha jexeén jeē coo libre i.

Te sáha ri jeē ndúndijin ini anuá ñayuu tu cájecūhun ni,

te jnama ri ñayuu jeē cándoho i sáha jnáhan i.

¹⁹ Te nacani ri jnūhun jeē ní quee tiempo jeē sáha Jítoho yō Yaā Dios jeē vāha ñayuu.

Achí tutu ni cahu ya.

²⁰ Te ni nacasi yā tutu ún, te ni nacuāha ya nuū tēe jéjníñu ini sinagoga, te ni nucōo ya jeē steén yā jnūhun nuū ñayuu cáhīn ini sinagoga. Te tācá i cájito vāha i nuū yā.

²¹ Te ni quejéé yá cahán yā jín i:

Vijna te ni squícu jnūhun cáhán tutu iī yāha ní cajini sōho ró, áchí yá.

²² Te ndivii i ni cacahān jeē vāha tēe cúu ya, te cánaa ni i jeē ní cajini i tāca jnūhun luu ni cahán yā. Te ni cacajñūhun jnáhan i:

¿A násūu séhe José cúu tēe yáha?

²³ Te ni cahán yā jín i:

Jíní vāha ri jeē cájeni ni rō cahán rō jnūhun yátá yáha jín rí: Tēe tájñá, sátájñá ró maá ró núu súcuan. Te jnūhun yáha cúní cahán jeē nájñūhun ni nasávāha ri cuehē ñayuu cácuquí ini ñuu Capernaum ni canihín rō jnūhun, suni súcuan na sáha ri ñuu yō yāhá návāha candíje ró cájeni ni rō. Achí yá jín i.

²⁴ Te ni cahán gā yā:

Jendaá cahán rī jín ró, ni ñn tēe nácani jnūhun Yaā Dios, tu cájetáhú ñayuu ñuu maá de nuū de.

²⁵ Te suni jendaá cahán rī jín ró jeē ni íyo cuehē ñahan ní ndóo ndáhú ini nación yō Israel, tiempo ni cotecu Elías, tēe ni nacani jnūhun Yaā Dios. Te tiempo un tu ní cúun cuiṽi saū unī cuiyā yosáva, te ni íyo ñn jnamā xeén ní cáhnu nación.

²⁶ Te tu ní táji Yaā Dios Elías quihín de nuū ni ñn ñahan viuda nación yō Israel, chí nuū máá ñn-ni ñahan viuda jeē ndeé ñuu Sarepta ndañú Sidón, ni jehēn de ni jito de jeē ní yeji ña.

²⁷ Te ini nación yō Israel suni ni íyo cuehē tēe ni candoho cuehyi stehyú, tiempo jeē ní cotecu Eliseo, tēe ni nacani jnūhun Yaā Dios. Te ni ñn de tu ní cándíje jeē ndúvāha de sáha Eliseo, chí sa suhva máñúhún-ni Naamán, tēe nación Siria ni nduvāha. Achí yá.

²⁸ Yūcuán na te tāca ñayuu cáhīn ini sinagoga, yōhyo ni caquiṽi ni i jnūhun ní cahán yā.

²⁹ Te ni candocuiñi i, te ni caquenehen i ya yatá ñúu ún, cuahán i jín yá xinī yúcu íne ñuu ún, chí cácuñi i chundahá i ya ñinga ya cava ún.

³⁰ Te tu ní cúu sáha i, chí ni yāha-ni ya mēhñú i cuahán yā.

Jeē ní quenehen ya tachī ini ñn tēe

(Mr. 1.21-28)

³¹ Yūcuán na te cuahán Jesús ñuu Capernaum región Galilea. Te quiṽi ndétātu ní steén yā jnūhun nuū ñayuu.

³² Te ni canaa ni i cájini i jnūhun steén yā. Chí ni steén vāha ya nuū i, chí jíní vāha máá yá.

³³ Te ini vehe sinagoga un íne ñn tēe jeē ñūhun tachī xeén ini de. Te tēe un ní cana cóhó de:

³⁴ Cuiyo ní. ¿Naun vēji ní núū na jíjnáhan ná, Jesús ñuu Nazaret? ¿A véji ní jéé snáā ni sáña, chí naún? Je jíni na ndé ñn cúu ní, chí Sēhe iī Yaā Dios cúu ní. Achí de.

³⁵ Te Jesús ni cahān xeēn yā nuū tachī ún: Casi yuhu ró te quenda ró ini tēe yáha, áchí yá.

Te ni cotúú-ni tēe un núū tāca ñáyuu, ni sáha tachī ún. Te ni quenda ini de cuahān, te tú na vé ni sáha ga jíin de.

³⁶ Te ndihí ñayuu un ní cayūhú i, te ni cacahān i jíin jnáhan i:

¿Na jnūhun cúu yáha jéē ní cuu súcuan? Chí cújéhnū tēe yáha jéē ndácu nīhin de jniñū nuū tachí, te quéndacoo-ni, áchí i.

³⁷ Te jnūhun ya ni jité núu cuahān ní cáhnu región yūcuán.

Jeē ní nasávāha ya naná chīsó Simón Pedro
(Mt. 8.14-15; Mr. 1.29-31)

³⁸ Yūcuán na te ni quenda Jesús ini vehe iī sinagoga, te cuahān yā te ni jinū yā vehe Simón. Te naná chīsó Simón, yíhi xeēn quíji ña, te ni cacahān ndahú de jíin yá jehē ña.

³⁹ Te ni jíta ndeyi ya nuū ña, te ni cahān yā jeē na ndíco quíji ún. Te ni nduvāha-ni ña. Te ni ndocuñi-ni ña, te ni sáha ña jeē ní yeji yā jíin de.

Jeē ní nasávāha ya cuehē ñayuu
(Mt. 8.16-17; Mr. 1.32-34)

⁴⁰ Te jeē ni quée niāndii, te tāca ñáyuu jeē iyó jnáhan i cácuñū ndinuū cuehyi, ni caquindeca i jnáhan i un núū yā. Te ni soó yá ndaha ya siquī ñn ñn i, te súcuan ni nasávāha ya i.

⁴¹ Te suni cuehē ñayuu ni quendacoo tachī ini i, te cácana cóhó táchī ún:

Máá ní cúu Sēhe Yaā Dios, achí.

Te ni cahān xeēn yā nuū, te tu ní jéhe ya jnūhun jeē cahán gā súcuan, chí cájini jeē maá yá cúu Cristo, Yaā ní tají Yaā Dios.

Jeē ní nacani ya jnūhun región Galilea
(Mr. 1.35-39)

⁴² Te nuū ní cundijin, te ni quenda ya cuahān sñn ya yatā ñúū nuū tú ñayuu. Te tāca ñáyuu cánuñúcu i ya, te ni jinūcoo i nuū íne ya. Te cástétu i ya jeē tú cuiyo ya nuū i.

⁴³ Te ni cahān yā jíin i:

Suni cánuú jéē nacani ri jnūhun vāha nuū tāca gā ñuu siquī ndese ndácu Yaā Dios

jniñū, chí jeē yúcuan ní tají yá ruhū vēji ri. Achí yá.

⁴⁴ Te ni jica cuu ya ní región Galilea, nácani ya jnūhun ini tācá vehe iī sinagoga.

Jeē ní canihīn de cuehē chācá ni sáha ya
(Mt. 4.18-22; Mr. 1.16-20)

5

¹ Te ñn quivī te íne Jesús yumar Gene-saret. Te ni quecoo cuehē ñayuu, te ni chitú níhin i nuū yā, chí cácuñi i cuni nahín i jnūhun Yaā Dios.

² Te ni jito ya jeē yúcu uū barco yajni yumar. Te tēe cájñi chācá, je ni quendacoo de ini barco, te cánacate de ñunu de.

³ Te ni quivī ya ini ñn barco jeē cúu barco Simón. Te ni cahān yā jíin de jeē na scáca yátá de quihīn jecu gā nuū ndúte. Te ni cucōo ya, te nde ini barco un ní steén yā jnūhun nuū ñáyuu cuehē jeē yúcu i yundúte un.

⁴ Te nuū ni jínu ni steén yā, te ni cahān yā jíin Simón:

Scáca ró barco na quihín yō nde nuū iyó cúnú ndute, te sínga ró ñunu ró jñi ró cháca, áchí yá.

⁵ Te ni cahān Simón:

Maestro, ní ñiñū ni casínga ná ñunu jeē jñi ná tí, te tu ní níhín cuítí ná ni ñn tí. Te jeē cahán maá ní súcuan, te na sínga tucu ná ñunu, áchí de.

⁶ Te ni casínga de, te ni quivicoo cuehē ndasí cháca, nde nducú táhndē ñunu de.

⁷ Te ni cacaja ndahá de nuū jnáhan de cáhīn ini inga barco, na quíjicoo chindéé ñájnáhan jíin de. Te ni quecoo de, te ni cascútú ndē de tí ndindúú barco, te nde je yajni quēe barco.

⁸ Te ni jito Simón Pedro jeē súcuan ni cuu. Te ni jecuñi yití de nuū Jesús, te ni cahān de:

Cuiyo ní núū ná, chí tēe íyó cuéchi cúu ná, áchí de.

⁹ Chí máá de jíin táca tēe cáhīn jíin de, ni cayūhú de jeē ní canihīn de cuehē chācá un ní sáha ya.

¹⁰ Te suni ni cayūhú Jacobo jíin Juan, ndindúú séhe Zebedeo, chí tēe chindéé ñájnáhan jíin Simón cácuu de. Te ni cahān Jesús jíin Simón:

Ma yūhu ró, chi nde vijna te sáha ri jeē nihīn rō cuehē ñayuu candíje ruhū, nájnūhun ni nihīn rō cuehē chācá. Achí yá.

11 Yūcuán na te nuū ni jínūcoo de jíin barco nuū ñūhun íchi, te ni castóo de ndihi ndajníñu de, te ni candiquīn de ya cuangoo de.

Jeē ní nasávāha ya ñn tēe ndóho cuehyī stehyú

(Mt. 8.1-4; Mr. 1.40-45)

12 Yūcuán na te íne Jesús ini ñn ñuu, te ni quee ñn tēe ndóho cuehyī stehyú. Te ni jito de nuū Jesús, te ni jecuiñī yití de ni jequīn de nuū de nde nuū ñūhun, te ni cahān ndahú de jíin yá:

Jíní na jēe cuu sáha ní jēe nduvāha ná, te núu cúní ni, áchí de.

13 Yūcuán na te ni soó yá ndaha ya siquī de, te ni cahān yā:

Cúní rī. Te na ndúvāha ró, áchí yá.

Te ná ni cahān yā súcuan, te ni nduvāha-ni tēe ndóho cuehyī stehyú un.

14 Te ni ndacu ya jniñu nuū de jeē ma cáchi cuiñi de nuū ní ñn. Te áchí yá:

Quisteén rō maá ró nuū sutú, te condahá ró jeē socó rō nuū Yaā Dios siquī jeē ndúndoo ró núu yā, nájnūhun ni ndacu Moisés jniñu jenahán. Te súcuan te cuni ñayuu jeē ní nduvāha ró. Achí yá.

15 Te víhyá gā ni jitē núu jnūhun ya cuahān. Te ni cataca cuehē ñayuu jeē cúní nahín i jnūhun stéén yā, jíin jēe nasávāha ya i nuū tāca cuéhyī cándoho i.

16 Te máá yá cuahān sīn ya nuū tú ñayuu, te ni jicān tahú yā.

Jeē ní nasávāha ya ñn tēe ndóho cuehyī ni íjin

(Mt. 9.1-8; Mr. 2.1-12)

17 Te ñn quivī te stéén yā jnūhun, te jecu tēe grupo fariseo jíin tēe cástéén tutu ley Yaā Dios, cáyūcú de yūcuán. Te tēe un ní quecoo de nuū yā jeē véjicoo de tācá ndañū Galilea, jíin ndañū Judea, jíin ñuu Jerusalén. Te poder maá Yaā Dios iyó jíin yá jeē nasávāha ya ñayuu cácuñū.

18 Yūcuán na te ni quecoo jecu tēe, cándiso de ñn tēe ndóho cuehyī ní íjin, catú de nuū ñn camilla. Te cánducú de squivī de tēe ún ini vehe, te caquin de nuū íne ya.

19 Te tu ní cánihīn de modo quivīcoo de jíin tēe un, chi cáyūcú chitú ñayuu. Te ni cacao de siquī véhe, te ni canune de teja. Te ni cascúun de tēe cūhú un jíin camilla de nde nuū íne Jesús mēhñu ñayuu.

20 Te ni jini Jesús jeē cáccandíje de jeē cúu nasávāha ya tēe cūhú un. Te ni cahān yā jíin tēe cūhú un:

Róhó, je íne cáhnu ni rī nuū tāca cuéchi ró, áchí yá.

21 Yūcuán na te tēe cástéén tutu ley Yaā Dios jíin tēe grupo fariseo, ni quejé de cájeni ni de siquī yā: ¿Ndé ñn cúu tēe yáha jēe cahán de jnūhun ndevāha jeē quití ni Yaā Dios? Chi nasūu Yāā Dios cúu de jeē cóne cáhnu ni de nuū cuéchi.

22 Te ni jini Jesús jeē súcuan cájeni ni de, te ni cahān yā jíin de:

¿Naun cájeni ni rō jeē cahán ndevāha rī?

23 Jeē uú jnūhun yáha, ¿ndé ñn yí gá cáa? ¿A jēe cahán rī jíin tēe cūhú: Je íne cáhnu ni rī nuū tāca cuéchi ró? ¿Chí yí gá jeē cahán rī: Ndocuiñī te caca ró, chi je ni nduvāha ró, achi rī?

24 Te vijna te na stéén rī jeē maá rí, Yaā ní nduu tēe, ndíso jniñu rī ini ñayivī yáha jēe cóne cáhnu ni rī nuū cuéchi.

Yūcuán na te ni cahān yā jíin tēe ni íjin ún:

Cahán rī jíin ró, ndocuiñī te naquihin ró camilla rō, te quinhun rō vehe ró, áchí yá jíin de.

25 Te ni ndocuiñī-ni tēe ún, jito jínú ñayuu. Te ni naquihin de camilla nuū ni catu de, te cuanhun de vehe de. Te nácuatáhú de nuū Yaā Dios.

26 Te yōhyo ni canaa ni tāca ñayuu cájito i, te ni cacahān i jeē yōhyo vāha Yaā cúu Yaā Dios. Te suni yōhyo cáyūhú i, te cácahān i:

Vijna te ni cajito yó jniñu jéhnu téyí, áchí i.

Jeē ní cana ya Leví

(Mt. 9.9-13; Mr. 2.13-17)

27 Yūcuán na te ni quenda ya cuahān yā, te ni jito ya nuū ñn tēe stútú xūhun renta, naní de Leví, néne de nuū cutútú xūhun renta. Te ni cahān yā jíin de:

Condiquīn ruhū na quíhín yō.

28 Te ni ndocuiñī de, te ni stóo de ndihi ndajníñu de, te cuahān de jíin yá.

29 Yūcuán na te ni sáha Leví ñn vico cáhnu vehe de, jeē cúsiñi ni de jíin Jesús. Te cuehē

tēe cástútú xúhun renta jíin sava ga tēe, cáyūcú de mesa cáyeji de staā jíin yá.

³⁰ Te tēe grupo fariseo jíin tēe cástéén tutu ley Yaā Dios, ni quejéé de cácahān de síquī tēe cáscuáha jíin yá, te ni cacajnūhún de:

¿Najehē cáyeji rō cájihi rō jíin tēe cástútú xúhun renta jíin tēe cásaaha cuēchi? áchí de.

³¹ Te ni cahān Jesús:

Ñayuu cáhīyo vāha, tu jíini ñúhún i tēe tájná, chí ñayuu cácuñú cúu jeē jíini ñúhún.

³² Te ruhū nasūu jéé véji ri cana ri ñayuu tú cuēchi, jeē cúu i nájnūhun ñayuu cáhīyo vāha. Chí sa suhva véji ri cana ri ñayuu cáhīyo cuēchi, jeē na nácani ni i te stóo i cuēchi i. Achí yá.

Jeē ní cacajnūhún de ya síquī jeē cóndite ni (Mt. 9.14-17; Mr. 2.18-22)

³³ Yūcuán na te ni cacahān de jíin yá:

Tēe cáscuáha jíin Juan, jíin tēe cáscuáha jíin grupo fariseo, cuehē jínu cáhīyo ndite ni de te cájicān tahu de. Te tēe cáscuáha jíin máá ní, ¿naun tu cásaaha de súcuan? Chí cáyeji de cájihi de.

³⁴ Te ni cahān yā jíin de:

¿A cuu condite ni de níni jéé iyó rí jíin de? ¿A cuu sáha rō jéé condite ni ñayuu cáhīin vico nándāha, te núu níni néne tēe nándāha?

³⁵ Te quee quivī jeē cújiyo tēe ni nándāha, te quivī ún chí condite ni i. Achí yá.

³⁶ Te suni ni cahān yā uū jnūhun yátá síquī jeē tu quíjnáhan jnūhun jeé jéé steén yā jíin táca jnūhun jenahán. Achí yá:

Ni ñn ñayuu tu jéhnde i ñn pedazo sahma jéé i, te nachuhun i nuū ñn sahma túhú i. Chí núu súcuan te stívi i sahma jéé i, te suni tu quíjnáhan jeé jeé un jíin jéé tuhú.

³⁷ Te tú ni ñn chúhun vino jeé ini ññ túhú. Chí núu súcuan, te vino jeé un ndatá ññ, te naa vino jíin ññ.

³⁸ Chí cánuú jéé chúhun vino jeé ini ññ jéé, te súcuan te quéndōo vāha ndindúú.

³⁹ Te ñayuu cájihi vino áva, tu cúní i coho i jeé jeé, chí jeé áva cúu jeé vāha ga, achí i. Achí yá.

Jeē ní cataxín de yoco trigo quivī ndétātú (Mt. 12.1-8; Mr. 2.23-28)

6

¹ Te ñn quivī ndétātu ní yāha Jesús cuahān yā mēhñú nuū cáa trigo. Te tēe cáscuáha jíin

yá ni cataxín de yoco trigo, te ni caquiin de ini ndaha de, te ni cayejí de.

² Te sava tēe grupo fariseo ni cacajnūhún de:

¿Najehē casáha rō jniñu jeē tu iyó vāha sáha rō quivī ndétātú?

³ Te ni cahān Jesús jíin de:

¿A tu ní cácahu cuiti rō tutu ndese ni sáha David, ñn quivī jeē ni jíi de sóco jíin tēe cáhīin jíin de?

⁴ Te ni quivī de ini vehe Yaā Dios, te ni quihin de pan íi jeē yosó ndijin nuū Yaā Dios. Te ni yeji de, te suni ni jēhe de ni cayejí tēe cáhīin jíin de. Te tú na ley jeé cáji ni ñn tēe, chí máá-ni sutū cuu caji. Te vésú súcuan te tú na cuēchi ní íyo síquī de. Achí yá.

⁵ Te ni cahān gā yā jíin de:

Ruhū, Yaā ní nduu tēe, máá rí cúu jeé ndácu jniñu síquī ndese sáha ñayuu quivī ndétātú, áchí yá.

Jeē ní nduvāha tēe ni ichī ndaha (Mt. 12.9-14; Mr. 3.1-6)

⁶ Te inga quivī ndétātú, suni ni quivī ya ini vehe íi sinagoga, te ni steén yā jnūhun. Te yūcuán íne ñn tēe ni ichī ndaha vāha de.

⁷ Te tēe cástéén tutu ley jíin tēe grupo fariseo, cájito yuhu de ya núu nasávāha ya tēe un quivī ndétātú, návāha nihīn de cuēchi síquī yā.

⁸ Te máá yá je jíni yā ndese cájeni ni de. Te ni cahān yā jíin tēe ni ichī ndaha ún:

Ndocuññ, te condichi rō mēhñu yāha, áchí yá.

Te ni ndocuññ de, te ni jecondichi de mēhñú.

⁹ Yūcuán na te ni cahān yā jíin de jíjnáhan de:

Na cájnūhun rí rohó ñn jnūhun: ¿Ndesé cáhān ley síquī quivī ndétātú? ¿A jéé sáha vāha yó, chí sáha néé yó? ¿A jéé nasávāha yó ñayuu je yajni cuu, chí sáha yó jéé cúu i? Achí yá.

¹⁰ Te ndéhé yá nuū de jeé cáyūcú de ní xiin ya. Te ni cahān yā jíin tēe chúhú un:

Scáá ndaha rō.

Te ni scaá de, te ni nduvāha-ni ndaha de.

¹¹ Te yōhō ni caquiñ ni táca tēe un, te ni quejéé de cándajnūhún de síquī Jesús, ndese cahni de ya.

*Jeē ní nacāji ya uxī uū tēe apóstol
(Mt. 10.1-4; Mr. 3.13-19)*

¹² Te ni cuu jecu quivī, te ni quenda ya cuacacān tahu yā nde yucu. Te ní niñu ni jicān tahu yā nuū Yaā Dios.

¹³ Te nuū ní cundijin, te ni cana ya tāca tēe cáscuáha jíin yá. Te ni nacāji ya uxī uū de, te ni cahān yā jeē cuu de apóstol, condiso jniñu de nacani de jnūhun ya.

¹⁴ Te yāha cúu síhvī de jíjnáhan de: Simón jeē ní nasnání yá de Pedro, jíin ñani de Andrés, te suni Jacobo jíin Juan, Felipe jíin Bartolomé,

¹⁵ Mateo, Tomás, Jacobo sēhe Alfeo, Simón tēe grupo cananista,

¹⁶ Judas ñani Jacobo, jíin Judas Iscariote, tēe jeē ní nastúu de ya.

*Jeē ni stéén yā nuū ñáyuu cuehē
(Mt. 4.23-25)*

¹⁷ Te ni nanuu ya yucu jíin táca tēe un jéē cascuáha jíin yá, te ni jecuiñī yā ñn nduhvā jíin de. Te cuehē ñayuu ní región Judea jíin ñuu Jerusalén, jíin ñáyuu yumar ñuu Tiro jíin ñuu Sidón, ni quecoo i jeē cúni nahín i jnūhun stéén yā, jíin jéē ndúvāha i cuehyī cándoho i.

¹⁸ Te ñayuu jeē ñūhun tachī ini i, suni ni canduvāha i ni sáha ya.

¹⁹ Te ndivii ñayuu cáculi i quehé i ya, chi súcuan ndúvāha i sáha ya jíin poder yā.

*Jnūhun ñayuu yōhyo ndetū jíin ñáyuu jeē
xeēn ndoho
(Mt. 5.1-12)*

²⁰ Te ni ndacoto ya nuū tēe cáscuáha jíin yá un, te ni cahān yā:

Yōhyo ndetū rohó jéē cándoho ndáhú, chi quivī ró ñuu nuū ndácu Yaā Dios jniñu.

²¹ Yōhyo ndetū rohó jéē cájiī sōco vijna, chi quiji quivī jeē ndutú chíji ró.

Yōhyo ndetū rohó jéē cándahyū rō vijna, chi quiji quivī jeē cuecú rō.

²² Yōhyo ndetū rō te núu cáquitī ni ñayuu nuū rō jeē síquí ruhū, Yaā ní nduu tēe, te cáscuéhichī i rōhó, te cácahān neé i nuū rō, te cácahān i jeē ñáyuu casáha jniñu neé cácuu ró.

²³ Te na cóo sí ni rō quivī sáha i súcuan, te víhyá gā na cúsi ni rō, chi cáhnu téyí coo tahū rō nde andiví. Chi suni súcuan

ni casáha uhū tāca jíi i jíin tēe ni canacani jnūhun Yaā Dios nde jenahán.

²⁴ 'Te nacā jeē xeēn ndoho rōhó ñáyuu cucá, chi vijna-ni cúu jeē cáhīyo sí ni rō.

²⁵ 'Nacā jeē xeēn ndoho rōhó ñáyuu jeē víjna cáhīyo vetū chíji ró, chi quiji quivī jeē cuu rō sōco.

'Nacā jeē xeēn ndoho rōhó ñáyuu jeē víjna cájecū rō, chi quiji quivī jeē nducuíhyá ni rō te ndahyū rō.

²⁶ 'Nacā jeē xeēn ndoho tāca ró núu cájejnúhún ñáyuu rohó, chi suni súcuan ni cajejnúhún jíi i tāca tēe ni canacani jnūhun stáhú nde jenahán.

*Jnūhun jeē cundáhú ni yō ñayuu cájito uhū
yohó*

(Mt. 5.38-48; 7.12)

²⁷ 'Te cáhān rī jíin rōhó jeē cájini sōho: Cundáhú ni rō ñayuu cájito uhū rohó. Te sáha vāha ró jíin ñáyuu cáquitī ni nuū rō.

²⁸ Te cacān rō jeē váha coo ñayuu cácahān ndevāha síquí rō. Te cacān tahu rō jehē ñáyuu cácahān neé núu rō.

²⁹ Te núu ndé tēe cani de ñn lado yiqui núu rō, te vāha ga suni cuāha ró ñga lado cani de, vésú jeē nácuāha ró jéē ndútahū de. Te núu ndé tēe cúni de quende de ticāchi ró, suni cuāha ró jnūhun jeē na quíhín de jíin ndé camisa rō.

³⁰ Te na-ni ñayuu jicān nuū rō, te cuāha ró núu i. Te ñayuu quíhin ndajniñu ró, ma nándacān rō.

³¹ Te nájñūhun cáculi rō jeē sáha vāha ñayuu jíin ró, suni súcuan na sáha vāha ró jíin i.

³² 'Chi núu íyó mánī rō jíin máa-ni ñayuu jeē maní jíin ró, ¿te na vé jeē váha ga sáha ró núu súcuan? Chi nde tēe casáha cuēchi, suni maní de jíin tēe maní jíin máa de.

³³ Te núu sáha vāha ró jíin máa-ni ñayuu jeē casáha vāha jíin ró, ¿te na vé jeē váha ga sáha ró núu súcuan? Chi nde tēe casáha cuēchi, suni súcuan casáha de.

³⁴ Te núu cuāha núu ró núu maá-ni ñayuu jeē ñūhun ni rō nacuāha i nuū rō, ¿te na vé jeē váha ga sáha ró núu súcuan? Chi nde tēe casáha cuēchi, suni jéhe núu de nuū tāca gá tēe casáha cuēchi, návāha nanihín tucu de.

³⁵ Núu súcuan te cundáhú ni rō ñayuu cájito uhū rohó, te sáha vāha ró jíin i, te cuāha núu ró núu i. Te ma cuāha ró máa

síquī jeē cani ni rō jeē suni nacuāha i nuū rō. Te súcuan te cáhnu coo tahū rō, te stéén rō jeē cácuu ró séhe Yaā cujéhnu téyí. Chi máá yá vāha ni yā jíin ñáyuu tu nácuatáhú nuū yā jíin ñáyuu casáha néé.

³⁶ Núu súcuan te cundáhú ni rō ñayuu, nájnūhun máá Tátá rō cundáhú ni yā i.

*Ma cahán yō síquī cuéchi jnáhan yō
(Mt. 7.1-5)*

³⁷ Ma cahán rō síquī cuéchi ñayuu ndese sáha i, návāha suni ma cahán Yaā Dios cuéchi síquī rō jeē casáha ró súcuan. Ma cahán xeēn rō síquī i jeē tú vāha sáha i, návāha suni ma cahán Yaā Dios súcuan síquī rō. Cone cáhnu ni rō nuū i, te suni cone cáhnu ni yā nuū rō.

³⁸ Cuāha ró núu ñáyuu, te suni súcuan cuāha Yaā Dios nuū rō. Chi vāha ndasí cuāha ya nuū rō, nájnūhun jeē chícuāha vāha ya, quisi ya, sánīhin ya, te nde scáa ya cuāha ya nuū rō. Chi cūhva jeē cájēhe ró núu ñáyuu, suni cūhva un cuāha ya nuū rō. Achí yá.

³⁹ Te ni cahán yā ñn jnūhun yátá jíin i:

Tēe cástéén jnūhun tú ndaā, cácuu de nájnūhun tēe cuáá. Te ñn tēe cuáá, ¿á cuu stéén de ichi nuū inga tēe cuáá? ¿A tú ningava ndindúú de ini xehvā?

⁴⁰ ñn tēe scuáha, tu cújéhnu de nuū maestro de. Te tēe scuáha ún, núu je ni cutūhva vāha de, te jinū de coo de nájnūhun maestro de.

⁴¹ Te cuéchi jnáhan ró cúu nájnūhun jeē íne ñn yāca lúli tinūú i. ¿Te naun casáha ró cuenta jeē súcuan, te tu casáha ró cuenta cuéchi máá ró jeē cúu nájnūhun jeē íne ñn nduhu tinūu máá ró?

⁴² ¿Te naun cacahán rō jíin jnáhan ró: Condetu, na táva rī yāca íne tinūu ró, te tu cánacani ni rō jeē íne ñn nduhu tinūu máá ró? Tēe stáhú-ni cácuu ró núu súcuan. Xīhna gā tinūu máá ró tava rō nduhu, te yūcuán na te cuu condēhe vāha ró jēe táva rō yāca tinūu jnáhan ró.

Jíin jniñu casáha ñayuu te nácuuni yō ndese ñayuu cácuu i

(Mt. 7.17-20; 12.34-35)

⁴³ Tu íyó yujnu vāha jeē jéhe ndehē neé, te ni tu íyó yujnu neé jēe jéhe ndehē vāha.

⁴⁴ Chi jíin ndéhē jeē jéhe ñn ñn yujnu, te jíin yō núu yujnu vāha cúu. Chi tu scóyo yó ndehē higo xinī íñu, ni tu scóyo yó ndehē uva xinī yucú zarza.

⁴⁵ Te suni súcuan tēe vāha, cáhán de jnūhun vāha, chí vāha ánuá de. Te tēe sáha néé cáhán de jnūhun néé, chí cánéé ánuá de. Chi modo ndese íyó ánuá ñayuu, máni jeē yúcuu cúu jeē cacahán i.

*Síquī uú vehe
(Mt. 7.24-27)*

⁴⁶ ¿Najehē cacahán yñúhún ró jíin rí: Jitoho ná, áchí ró, te tu casquícu ró jniñu ndácu rí?

⁴⁷ Tāca ñáyuu vēji nuū rī te jíin sōho jnūhun cáhán rī te squícu, na stéén rī nuū rō ndese cúu i.

⁴⁸ Cúu i nájnūhun ñn tēe jeē ní jeni de vehe de, te ni jete cúnú de nde ni nihīn de toto, te ni jeni de síquī. Te nuū ní ndaa yūte, te ni chundahá vehe ún, te tu ní cánda cuíti sáha, chí síquī toto íin.

⁴⁹ Te tāca ñáyuu jíin sōho jnūhun cáhán rī, te tu squícu i, cúu i nájnūhun ñn tēe ni jeni de vehe de nuū ñúhún, te tu yítuu jehē. Te nuū ní ndaa yūte, te ni chundahá vehe ún, te ni cotúú-ni, te ni naa íi-ni. Achí yá jíin i jíjnáhan i.

*Jeē ní nasávāha ya mozo capitán
(Mt. 8.5-13)*

7

¹ Te nuū ni jíinu ni cahán yā ni cajini nahín ñáyuu ún, te cuahán yā ñuu Capernaum.

² Te ñn tēe nación Roma jeē cúu capitán, íyó ñn mozo de jeē manī ndasí de jíin. Te mozo un cúhú i te je yajni cuu i.

³ Te ni jini capitán jnūhun Jesús. Te ni tají de jecu tēe jéhnu cándacu jniñu nuū ñáyuu hebreo, cuango de nuū yā jeē cahán ndahú de jíin yá jeē na quíji ya sávāha ya mozo de.

⁴ Te ni jinūcoo tēe un núu Jesús, te ni cacahán ndahú ndasí de jíin yá:

Chindéé ñáhán ní tēe cúu capitán, chí tēe vāha cúu de.

⁵ Chí manī de jíin nación yō, te máá de ni ndacu jniñu ni cuvāha ñn vehe sinagoga cuu yó. Achí de.

⁶ Yūcuán na te cuahán Jesús jíin de jíjnáhan de. Te nuū ní cuyajni ya vehe

capitán, te ni tají de jecu amigo de cuajnahān yā. Te ni cacahān de jíin yá:

Achí capitán jeē tu cúní de sájneñu de níhín, chí tu cújehnu de jeē quihín ni quívi ní vehe de.

⁷ Jeē yúcuan tu ní sájehnu de máá de jeē quíji de nuū ní, áchí de. Te máá jēē cahán-ni ní, te na ndúvāha-ni mozo de, áchí de.

⁸ Chí máá de suni ndíso jniñu de ni casáha tēe cácujuhnu ga. Te cújehnu de nuū tācá soldado de, áchí de. Te núu cáhán de jíin ñin tēe jeē na quihín de, te cuahān de. Te núu cáhán de jíin ñnga tēe jeē na quíji de, te quíji de. Te núu ndácu de ñin jniñu nuū mozo de, te sáha i, áchí de. Achí táca tēe un jíin yá.

⁹ Te jeē ní jini Jesús jnūhun yáha, te ni naa ni yā. Te ni ndió cóto ya ni cahān yā jíin ñáyuu cuehē cándiquin yatā yā:

Jendaá cahán rī jíin ró jeē ni nación yō Israel tu ní níhín rī ni ñin ñáyuu candíje níhin súcuan, nájnūhun cándíje tēe ún, vésú tēe nación tu jíin jnūhun Yaā Dios cúu de. Achí yá.

¹⁰ Te tēe ni tají capitán nuū yā, ni najinūcoo de vehe, te ni cajito de jeē jé ni nduvāha mozo un.

Jeē ní nastécu yā sēhe yí ñahan viuda

¹¹ Yūcuán na te cuahān yā ñin ñuu naní Naín. Te tēe cáscuáha jíin yá, jíin ñáyuu cuehē, suni cuango i jíin yá.

¹² Te ná ni cuyajni ya yuñúú ún, te yūcuan ní quendacoo ñáyuu jeē quíchindūji i ñin tēe suchí jēē ni jíhī. Te máñuhún-ni i nuū naná i, te ñahan viuda cúu ña. Te cuehē ñáyuu ñuu un véjicoo jíin ña.

¹³ Te ná ni jito máá Jítóho yō nuū ña, te ni cundáhú ni yā ña, te ni cahān yā jíin ña:

Ma ndahyú ni, áchí yá.

¹⁴ Yūcuán na te ni jinū yā nde nuū ndíyi ún, te ni jniñ ya yejnū, te ni cajecuiñī tēe cándiso ún. Te ni cahān yā jíin súchi ní jíhī:

Cáhán rī jíin ró, ndocuiñī, achí yá.

¹⁵ Yūcuán na te ni nucōo sūchi ní jíhī ún, te ni quejé i nácahān i. Te ni nacuāha ya i nuū naná i.

¹⁶ Te ndíviñ ñáyuu ni cayūhú i jeē ní cajito i, te ni cacahān i jeē yóhyo vāha Yaā cúu Yaā Dios. Te cácahān i:

Mēhñu yó ni quee ñin tēe cújehnu nácani jnūhun Yaā Dios.

Te suni cácahān i:

Máá Yaā Dios ni quejé yá chindéé ñáhán yá ñáyuu yā. Achí i.

¹⁷ Te ni jitē núu jnūhun ya ní cáhnu región Judea jíin táca región yajni yūcuán.

Jeē ní tají Juan uū tēe nuū yā (Mt. 11.2-19)

¹⁸ Te íne Juan vecāa, te tēe cáscuáha jíin de ni cacastūhun núu de jeē súcuan ni cuu tācá jniñu yáha.

¹⁹ Te ni cana Juan uū tēe ún, te ni tají de cuango nuū Jesús, návāha cajnūhún de ya núu máá yá cúu ndíje Cristo jeē ní cachi Yaā Dios jeē tají yá, chí núu nasūu yá cúu te condetu de ñnga.

²⁰ Te ni jinūcoo tēe un núu yā, te ni cacahān de:

Juan tēe scuándute ni tají de sāña véjicoo ná cajnūhun ná níhín núu máá ní cúu Cristo jeē achí tutu jeē quíji, chí condetu yó ñnga tēe quíji. Achí de.

²¹ Te máá hora un ní nasávāha ya cuehē ñáyuu cácuñu, jíin ñáyuu cándoho cuehyí xeēn, jíin ñáyuu ñúhun tachí ini. Te suni cuehē ñáyuu cuaá ní ndundijin tinūú i ní sáha ya.

²² Te ni cahān yā jíin de:

Cuango te castūhun ró nuū Juan tācá jniñu ni cajito ró jíin jnūhun ni cajini ró. Te cachi rō nuū de jeē ñáyuu cuaá cánanune tinūú i, te ñáyuu yacuá cánacaca i, te ñáyuu ndóho cuehyí stehyú cánduvāha i, te ñáyuu sohó cánanune sōho i, te ñáyuu jíhí nátecu i sáha ri. Te suni nácani ri jnūhun nuū ñáyuu ndahú jēē jnama Yaā Dios i.

²³ Te yóhyo ndetū tēe jeē ma nácani yátá ni de jeē ruhū cúu Cristo. Súcuan cachi rō nuū Juan. Achí yá jíin de.

²⁴ Te ná cuanuhun ndíndúú tēe ún, te ni quejé Jesús cahán yā jnūhun Juan jíin ñáyuu:

¿Na vé ni jécondēhe ró jijnáhan ró ndé nuū ñúhun téhé? ¿A ñin tēe jéni ñin jéni uū ni, nájnūhun ite jeē cánda sáha tachí?

²⁵ Te núu tuú, ¿te na vé ni jécondēhe ró núu súcuan? ¿A ñin tēe cúní cujehnu jeē ñúhun sahma lúu? Tuú chí cájini rō jeē tēe cáñuhun sahma lúu te cánducú tāca jēē cúsiñ ni, máni ini vehe rey cáyucú de.

26 ¿Te na vé ni jécondēhe ró núu súcuan? ¿A ñn tēe nácani jnūhun Yaā Dios? Cáhán rī jín ró jeē suu ni jécondēhe ró. Te cújēhnu ga Juan yáha vésú tāca gá tēe ni canacani jnūhun Yaā Dios.

27 Chi jnūhun Juan cúu jeē ni cáhān Yaā Dios jeē yosó núu tútu iī:

Tají rí tēe nacani jnūhun ri cosnūú de ichi núu Cristo,

návāha coo tūhva ñayuu jeē jinú yā.

Achí Yaā Dios, achí tutu.

28 Te cáhán rī jín ró jeē ini ñayīvi yáha cújēhnu ga Juan tēe scuándute vésú tāca gá tēe jeē ni iyo ini ñayīvi. Te vésú súcuan te tāca tēe núu ga ini ñuu nuū ndácu Yaā Dios jniñu, cújēhnu ga de vésú Juan. Achí yá.

29 Te tāca ñayuu jín táca tēe cástútú xūhun renta, ni cajini i jnūhun cáhán yā, te ni cajetáhú i jeē Yaā ndaā cúu Yaā Dios, chi je ni cajendute i nuū Juan.

30 Te tēe grupo fariseo jín tēe cástéén tutu ley, ni casquéhichī de jnūhun jeē cuní Yaā Dios sáha ya jeē váha de, chi tu ní cájendute de nuū Juan.

31 Te ni cahān gā maá Jítóho yō:

Yáhá cachi rī ñn jnūhun yátá návāha na cúní rō ndese cúu ñayuu tiempo vijna.

32 Cúu i nájñūhun sūchi lúlí cáhīn nuū yáhu cácasiquí. Te cácana ndee i xinī jñahan i: Ni catīvi rī scuilí, te tu ní cájita jéhé ró. Te ni cajita ri yaa jeē cuihyá jíta, te tu ní cándahyū rō, achí i. Te nájñūhun cándāa sūchi lúlí un jéē tu ní nújñahan ni i ni ñn, suni súcuan cándāa ró.

33 Chi ni quiji Juan tēe scuándute, te cuehē jínu ni iyo ndite ni de, tu ní yéji de staā ni tu ní jíhi de vino. Te tu ní cánujñahan ni rō, chi ni cacahān rō jeē ñūhun tachī ini de.

34 Yūcuán na te ni quee máá rí, Yaā ní nduu tēe, te yéji rī jíhi rī, te tu cánujñahan ni rō, te chísóo jñūhun ró cácahān rō jeē máni máá jéē yéji rī jíhi ri vino. Te quíjñahan ri jín tēe cástútú xūhun renta jín táca gá tēe cásáha cuēchi, achí rō.

35 Te núu cúndichí ñn tēe jín jñūhun Yaā Dios, te jín jniñu sáha de te cájini tāca gá tēe ndíchí jeē ndichí de. Achí yá.

36 Te ñn tēe fariseo ni cana de Jesús jeē cáji yā staā jín de. Te ni jinū yā vehe de, te ni cucōo ya mesa jeē cáji yā staā.

37 Yūcuán na te ñn ñahan sáha cuēchi, ndéé ña ñuu yúcuan, te ni jini ña jeē ni jínū Jesús vehe tēe fariseo un, yéji yā staā. Te ni quee ña jín ñn frasco yuū luu jeē ñūhun chitú aceite perfume.

38 Te ín yítí ña nuū jehé yā, te ndáhyú ña. Te ni quejéé ña stáji ña jehé yā jín ndute tñnúú ña, te ni nasíchí ña jín ixi xíní ña. Te ni techūhú ña jehé yā, te ni chuhun ña perfume un.

39 Te tēe fariseo un jeē ní cana de ya, ni jito de jeē súcuan ni sáha ña, te ni jeni ni de: Núu tēe nácani jnūhun Yaā Dios cúu tēe yáha, te cuni de ndese ñahan cúu ñahan yáha jeē quehé ña de, chi ñahan sáha cuēchi cúu ña, jéni ni de.

40 Yūcuán na te ni cahān Jesús jín de:

Simón, cúní rī cahān rī jín ró ñn jnūhun.

Te ni cahān maá de:

Cahān ní, Maestro.

41 Te ni cahān Jesús:

Ñn tēe jéhe núu xūhún, ni iyo uū tēe táu nuū de. ñn de ni cotaū uhūn ciento denario, te inga de ni cotaū uū xico uxí denario.

42 Te tú na vé cánevāha tēe un jéē náchunaa de. Te tēe jéhe núu xūhun ní ine cáhnu ni de nuū ndíndúú tēe ún. Núu súcuan te cachi rō: Jeē ndíndúú tēe ún, ¿ndé ñn de coo maní gā jín de? Achí yá.

43 Te ni cahān Simón:

Jéni ni na jéē tēe ni cotaū cuehē gā, achí de.

Te ni cahān yā jín de:

Ndaā cahán rō, achí yá.

44 Te jító ya nuū ñahan ún, te ni cahān gā yā jín Simón:

¿A jító ró na vé sáha ñahan yáha? Jeē ní quee rī vehe ró, te tu ní jéhe ró ndute jeē ndúndoo jehē rī nájñūhun íyó costumbre. Te ñahan yáha ní stáji ña jehē rī jín ndute tñnúú ña, te ni nasíchí ña jín ixi xíní ña.

45 Te tu ní téchūhu ró ruhū nájñūhun íyó costumbre. Te ñahan yáha, nde jeē ni quívi ri vehe ró, tu jécuiñí ña jeē téchūhú ña jehé rī.

46 Te tu ní chūhun ró aceite xiní rī nájñūhun íyó costumbre. Te ñahan yáha ní chuhun ña aceite perfume jehé rī.

Jeē íne Jesús vehe Simón tēe fariseo

47 Núu súcuan te cáhán rī jín ró jeē ni stéén ña jeē yóhyo manī ña jín rí síquī jeē íne cáhnu ni rī nuū tāca cuéchi ña, vésú cuehē cúu. Te núu cone cáhnu ni rī nuū ñn ñayuu iyó jecu-ni cuéchi, te jecu-ni stéén i jeē maní i jín rí, achí yá.

48 Te ni cahān yā jín ña:

Je íne cáhnu ni rī nuū tāca cuéchi ró, achí yá.

49 Yūcuán na te ñayuu cáyeji staā jín yá, ni quejéé i cáhān maá i:

¿Ndé ñn ga cúu tēe yáha jéé cahán jeē íne cáhnu ni nuū cuéchi? achí i.

50 Te Jesús ni cahān gā yā jín ñahan ún:

Ni candíje ró rúhū, te jeē yúcuan ní jnama ri rohó. Cuáhán te na ndúsñ ni rō. Achí yá.

Jnūhun ñahan ní cajejníñu nuū yā

8

1 Yūcuán na te ni cuu jecu quivī, te ni jica cuu Jesús tācá ñuu náhnu jín ñuu lulí. Te nácani ya jnūhun vāha te cástūhun yá ndese ndácu Yaā Dios jniñu. Te ndihúxí uū tēe cácuu apóstol, cájica de jín yá.

2 Te suni iyó jecu ñahan cájica jín yá, jeē ní quenehen ya tachī ini sava ña, te ni nasávāha ya sava ña jeē cándoho cuehyī. Te ñn ña cúu María ñuu Magdala, te ini ñahan un ní quenehen ya uxā tachī.

3 Te inga ña cúu Juana, ñasihí Chuza, tēe ndíso jniñu ini vehe Herodes. Te inga ña cúu Susana, jín cuéhē gā ñahan jeē cáchindéé ñáhán ña, jéhe ña tāca jéé jini núhún yá jín de jínáhan de.

Jnūhun yátá síquī tēe jéte trigo
(Mt. 13.1-9; Mr. 4.1-9)

4 Te cuehē ñayuu tācá ñuu yūcuan ní jinūcoo i nuū Jesús. Te ni cacutútú cuéhē ndasí ñáyuu, te ni cahān yā ñn jnūhun yátá jín i:

5 ñn tēe cate trigo, ni quenda de jeē cate de. Te ná ni quejéé de jéte de, te jecu trigo ni jítē yuhíchi. Te ni cajeñū ñayuu síquī, te ni cayejí saa.

6 Te jecu gā ni jítē nuū núhun yuū. Te ni cane, te ni ichī-ni, chí tú cuehē cajin.

7 Te jecu gā ni jítē nuū náne iñu. Te inuú-ni ni canecoo iñu jín, te ni jesi nuū.

8 Te jecu ni jítē nuū núhun váha. Te nuū ní jehnu, te ni jéhe cuehē nunī, chí jeē ñn ñn ni jéhe nde ciento. Achí yá.

Yūcuán na te ni cahān jee ya:

Tāca rōhó jéé jini sōho, na chúsóhó ró, achí yá.

Najehē cahán yā máni jnūhun yátá
(Mt. 13.10-17; Mr. 10-12)

9 Te tēe cáscuáha jín yá ni cacajnúhún de ya na vé cuní cahān jnūhun yátá yáha.

10 Te ni cahān yā:

Róhó jínáhan ró, chí sáha Yaā Dios jeē cájecūhun ni rō jnūhun ni yisāhi yáha, ndese quívicoo ñayuu ndaha Yaā Dios jeē ndacu ya jniñu nuū i. Te máni jín jnūhun yátá cáhán rī jín sava ga i, návāha vésú cájito i, te quéndōo i nájnúhun jeē tú na vé ni cájito i. Te vésú cájini sōho i, te ma jécūhun ni i.

Jeē ní castūhun cáj yá jnūhun yátá tēe jéte trigo
(Mt. 13.18-23; Mr. 4.13-20)

11 Jnūhun yátá yáha cuní cahān: Trigo un cúu jnūhun Yaā Dios.

12 Te trigo jeē ni jítē yuhíchi cúu nájnúhun ñayuu cájini sōho jnūhun, te quíji-ni jexeén te quénde-ni jnūhun ini anuá i, návāha ma candíje i te ma jnáma ri i.

13 Te trigo jeē ni jítē nuū núhun yuū cúu nájnúhun ñayuu cájini jnūhun, te cájetáhú i te cácusñ ni i jín. Te tu cúcutú jnūhun ún ini anuá i. Te jecu-ni quivī cáncandíje i, te núu ni quejéé jnúndóho, te cájica yátá i.

14 Te trigo jeē ni jítē nuū náne iñu cúu nájnúhun ñayuu cájini jnūhun, te cuangoo i te cácuñéñu i jín jniñu i jín jéé cuní i cucúca i te coo sñ ni i. Te tu íje i jín jnúhun ya.

15 Te trigo jeē ni jítē nuū núhun váha cúu nájnúhun ñayuu cájini nahín jnúhun ya, te cájniñ vāha i, chí iyó váha iyó ndáa anuá i. Te cáhije i jín jnúhun ya, chí cáncandíje vāha i.

Jnūhun yátá síquī lámpara
(Mr. 4.21-25)

16 Núu nástñ ñayuu ñn lámpara, te tu jési i ni ñn síquī, ni tu jéni i chíji jito. Chí sa suhva jéni i nuū sucún, návāha cundijin nuū ñáyuu quívicoo vehe.

17 Te suni súcuan tu íyó ni ñn jnūhun sāhi jéē ma cúni ñayuu, chí ndihi tāca jnūhun cácahān i nane ndijin te cuni ñayuu.

18 'Núu súcuan te na cúni sōho vāha ró, chí ñayuu je jécūhun ni, stéén gā yā nuū i. Te ñayuu tu cándíje, máá jecu jeē jéni ni i jeē jiní i, sa suhva naa. Achí yá.

Náná yā jín ñani yā

(Mt. 12.46-50; Mr. 3.31-35)

19 Yūcuán na te ni quee naná yā jín táca ñani yā nuū íne ya. Te tu ní cúu quívicoo ña nuū yā síquī jeē chitú ñayuu.

20 Te ñn ñayuu ni castūhun núu yā:

Náná ni jín táca ñani ni cáhīn nuū quéhe, te cácu ni cahān jín ní, áchí i.

21 Te ni cahān maá yá:

Suni náná rī jín ñani rī cácu ñayuu cájini sōho jnūhun Yaā Dios te cásquícu i, áchí yá jín i.

Jeē ní jecuiñī tachī níhin jín mar ni sáha ya
(Mt. 8.23-27; Mr. 4.35-41)

22 Te ñn quívi ni quívi ya ñn barco jín téé cáscuáha jín yá, te ni cahān yā jín de:

Na yáha yó quíhīn yō inga lado mar.

Te ni cascáca de barco cuango de.

23 Te níni cáscáca de barco, te ni quixī yā. Te ni jequíhi ñn tachī níhin nuū mar, te je yajni chitú ndute ini barco, te ndúcú quéé barco.

24 Te ni castón da de ya, te ni cacahān de:

Maestro, Maestro, vijna te quēe yó chíji ndute te naa yō, achí de.

Te ni ndocuiñī-ni ya, te ni cahān yā nuū tachī níhin jín núu mar. Te ni cajecuiñī-ni, te ni cuu nayúú í-ni.

25 Te ni cahān yā jín téé cáscuáha jín yá:

¿Naun tu cáca ndíje ró?

Te máá de yōhyo ni cayūhú de, te cánaa ni de, te cácahān de jín jnáhan de:

¿Ndé ñn ga cúu tēe yáha jéē nde nuū tachí níhin jín núu ndúte ndácu de jniñu te cájetáhú jéē cahān de? Achí de.

Tēe Gadara jeē ndóho tachī

(Mt. 8.28-34; Mr. 5.1-20)

26 Yūcuán na te ni cane ya jín de región Galilea, te cuahān yā región Gadara jeē íne inga lado mar Galilea.

27 Te nuū ní nanuu ya nuū ñūhun íchi, te ñn tēe ñuu un ní quee de nuū yā. Te je ni cuu

cuehē cuiyā ñūhun cuehē tachī ini de. Te tu ñūhun cuiñi de sahma, ni tu ndéé de vehe, chí sa suhva nuū cáyindūji ndīyi ndéé de.

28 Te ná ni jito de nuū Jesús, te ni jecuiñī yití de nuū yā, te ni cana cóhó de:

¿Naun vēji ní núu ná, Jesús Sēhe Yaā cujéhu téyi? Cáhan ndahú ná jín ní jeē ma stóho ní sáña, áchí de.

29 Súcuan ni cahān de, chí je ni ndacu ya jniñu nuū tachí un jéē na quéndacoo ini de. Te ni cuu cuehē jínu sáha xeēn tachī jín de. Te cájihni ñayuu ndaha de jehē de jín cadena, návāha tú na vé sáha de. Te ndihi-ni jéhnde de, te jínu de jéhén de nde nuū ñūhun téhé sáha tachī ún.

30 Te Jesús ni cajñūhun yá de:

¿Na vé naní ró?

Te ni cahān de:

Legión naní ná.

Súcuan ni cahān de jeē naní de, chí ñūhun cuehē tachī ini de.

31 Te ni cacahān ndahú táchī un jín yá jeē ma tají yá quihīn ini tūhñchi cúnú.

32 Te yucu yúcuan cáhīn cuehē quíñi cájitu ti. Te tachī jeē cáñuhun ini téé un ní cacahān ndahú jín yá jeē na cuáha ya jnūhun quívicoo ini quíñi ún. Te ni jēhe ya jnūhun.

33 Te ni quendacoo tachī ún ini téé ún, te ni quívicoo ini quíñi. Te quíñi un ní cajinu ti ní ñingoo ti ñn yucáva, ni quívicoo ti nuū mar, te ni ndaquíhi ti ndute, ni cajihī tī.

34 Te tēe cándito ti ni cajito de jeē súcuan ni cuu, te ni cayūhú de. Te ni cajinu de cuacastūhún de nuū ñáyuu ñuu un jín ñáyuu táca rancho.

35 Te cuango ñayuu un cuácondēhé i na vé ni cuu. Te ni jinūcoo i nuū íne Jesús. Te ni cajito i nuū téé ní quendacoo tachī ini, néne de nuū jehé Jesús, te ñūhun de sahma, te je ni nducájí xíní de. Te ni cayūhu ñáyuu ún.

36 Te tēe ní cajito ni canacani de jnūhun nuū ñáyuu, ndese ni nduvāha tēe ní ñūhun tachī ini.

37 Yūcuán na te táca ñáyuu ní región Gadara, ni caquejéé i cácahān ndahú i jín yá jeē na cújiyo ya quihīn yā, chí yōhyo cáyūhú i. Te ni ndīvi ya ini barco jeē quíñuhun yā.

38 Te tēe jeē ní quendacoo tachī ini, ni cahān ndahú de jíin yá jeē na cuáha ya jnūhun quihīn de jíin yá. Te Jesús ni cahān yā jeē na quéndōo de, te áchí yá:

39 Cuánuhun vehe ró, te nacani ró jnūhun ndese yōhyo jéhnū jniñu ni sáha Yaā Dios jíin ró, achí yá jíin de.

Te cuahān de, te ni nacani de jnūhun níñu ún, ndese yōhyo jéhnū jniñu ni sáha Jesús jíin de.

Jnūhun sēhe síhí Jairo jíin ñahan ní quehé yusáhmayá

(Mt. 9.18-26; Mr. 5.21-43)

40 Te nuū ní najinū Jesús inga lado mar, te ñayuu un ní cacusī ni i jeē ní najinū yā, chí ndihí i cándetu i ya.

41 Te ni quee ñn tēe cújéhnū ini vehe ñi sinagoga, naní de Jairo. Te ni jecuiñī yití de nuū jehé yā, te ni cahān ndahú de jíin yá jeē na quihín yā jíin de vehe de.

42 Chí íyó ñn sēhe síhí de jeē mañúhún-ni i nuū de, te íyó i nájnūhun uxī uū cuiyā. Te sūchí un je yajni cuu i. Te cuahān yā jíin de. Te cuehē ñayuu cándiquīn i ya, te ni chitú níhin i xiin ya cuangoo i.

43 Te mēhñu ñayuu un cuahān ñn ñahan cúhú jeē ní cuu uxī uū cuiyā ndóho ña cuehyī ñiñī. Te ni jexin ña tāca jéē névāha ña jíin téé tájna, te tu ní ndúvāha ña sáha ni ñn de.

44 Te ni quee ña ichi yátá yā, te ni quehé ña yusáhmayá. Te ni jecuiñī-ni ñiñī ña.

45 Yūcuán na te ni cahān Jesús:

¿Ndé ñn ni quehé sahma ri? achí yá.

Te ndivii i ní cacahān jeē tu ní quehé i. Te Pedro jíin téé cáhīn jíin de, ni cacahān de:

Maestro, jíto ní jéē ñayuu cuehē yāha ní chitú níhin i xiin ní, te cáquīhí i níhín, te cájnūhun ní ndé ñn ni quehé sahma ní.

46 Te ni cahān Jesús:

Tuú chí ñn ñayuu ni quehé sahma ri, chí ni jini rī jeē jíin fuerza rī ni nduvāha ñn ñayuu, achí yá.

47 Te ni jini ñahan un jéē tu ní cúu coo yuhu jeē ní sáha ña. Te quísi i ña ni quee ña, te ni jecuiñī yití ña nuū jehé yā. Te jíto jíinúu tāca ñayuu, te ni cachi cají ña najehē ni quehé ña yusáhmayá, jíin jéē ní nduvāha-ni ña.

48 Te ni cahān yā jíin ña:

Séhē, ni candíje ró jéē cuu nasávāha ri rohó, te jeē yúcuán ní nduvāha ró. Cuahān te na ndúsī ni rō, achí yá.

49 Te níni cáhán gā yā súcuán, te ni quee ñn tēe vēji vehe Jairo, tēe cújéhnū ini sinagoga, te ni cachi nuū de:

Je ni jihī sēhe síhí ní. Te ma sájnēñu ga ní Maestro, achí de.

50 Te ni jini Jesús jnūhun yáha, te ni cahān yā jíin Jairo:

Ma yūhu ró, chí candíje-ni ró, te nastécu rī sēhe ró, achí yá.

51 Te ni jinū yā vehe, te tu ní jéhe ya jnūhun quiví ñayuu jíin yá, chí máá-ni Pedro jíin Juan jíin Jacobo jíin tátá naná sūchi síhí un.

52 Te cácuquíhyá ni ndihí ñayuu cáyūcú ini vehe, te cándahyū i jehē sūchí un. Te ni cahān yā:

Ma ndahyú rō jijnáhan ró. Tu ní jíhí i, chí quíxí-ni i, achí yá.

53 Te ni cajecū catá i jeē ní cáhán yā, chí cájini i jeē ní jíhí sūchi síhí un.

54 Yūcuán na te ni jñi ya ndaha i, te ni cahān jee ya jíin i:

Síhí, ndocuiñī, achí yá.

55 Te ni natecu i, te ni ndocuiñī-ni i. Te ni ndacu ya jniñu jeē na cuáha ña jeē cáji i.

56 Te tátá i náná i yōhyo ni canaa ni de cájito de. Te ni ndacu níhin ya jniñu nuū de jeē ma cáchi de nuū ni ñn jeē súcuán ni cuu.

Jeē ní tají yá ndihúxí uū de cuanacani de jnūhun

(Mt. 10.5-15; Mr. 6.7-13)

9

1 Te ni nastútú yá ndihúxí uū tēe cáscuáha jíin yá, te ni sáha ya jeē cóndiso jniñu de te coo poder de jeē quénehen de tachī ini ñayuu, jíin jéē nasávāha de ñayuu cácuñū.

2 Te ni tají yá de quingoo de jeē nácani de jnūhun ndese ndácu Yaā Dios jniñu, jíin jéē nasávāha de ñayuu cácuñū.

3 Te ni cahān yā jíin de:

Ma cóndiso ró jéē cuajniñu ró ichi, ni vara, ni ñunu, ni staā, ni xūhún. Te quihīn rō jíin ñn-ni camisa, te ma cóndiso ró inga.

4 Te na-ni vehe núu ni quivícoo ró, te yūcuán coyūcu ró nde quenda tucu ró quihīn rō inga ñuu.

⁵ Te núu ñn ñuu tu cájetáhú i róhó, na quéndacoo ró yúcuan, te scóyo ró tícachā jehē rō, te súcuan stéén rō jeē iyó cuéchi i jeē tu ní cájetáhú i. Achí yá.

⁶ Te ni quendacoo de cuahān de, ni cajica nuu de tācā ñuu, ni canacani de jnūhun jnáma Yaā Dios ñayuu. Te tāca lado ni canasávāha de ñayuu cácuñū.

Jeē ni jñhī Juan tēe scuándute
(Mt. 14.1-12; Mr. 6.14-29)

⁷ Te Herodes, tēe cúu gobernador, ni jini jnūhun de tācā jniñu sáha Jesús. Te ni cunéé ni de, chí cájeni ni sava ñayuu cácahān i jeē Juan ni natecu de.

⁸ Te sava ga i cácahān jeē ní nane Elías, tēe ni nacani jnūhun Yaā Dios nde jenahán. Te sava ga i cácahān jeē inga tēe ni nacani jnūhun ya nde jenahán, ní natecu de.

⁹ Te ni cahān Herodes:

Juan chí ni ndacu ri jniñu ni tahndē xinī. Núu súcuan ¿te ndé tēe cúu tēe yáha jeē jini jnūhun ri jeē sáha de jniñu jéñu? Achí de.

Te ni nducú Herodes modo coto de nuū Jesús.

Jeē ni scáji yā uhūn mil tēe
(Mt. 14.13-21; Mr. 6.30-44; Jn. 6.1-14)

¹⁰ Te ni ndecoo tēe cácuu apóstol jeē ní tají yá ni canacani jnūhun. Te ni cacachi de nuū yā tācā jniñu ni casáha de. Te ni jeca ya de cuahān sñn ya jíin de ñn lugar nuū tú ñayuu, yajni ñuu Betsaida.

¹¹ Te ni cajini ñayuu, te suni cuangoo i. Te ni jetáhú yá i, te ni nacani ya jnūhun ndese ndácu Yaā Dios jniñu, te ni nasávāha ya ñayuu cácuñū.

¹² Te nuū cuáhini, te ni quecoo ndihúxí uū tēe cáscuáha jíin yá, te ni cacahān de jíin yá:

Tají ní ñayuu cuehē yāhá na quíngoo i tācā ñuu jíin tāca rancho yajni yāhá, te nducú i nuū ndóo i te cuaan i jeē cáji i, chí tú na vé iyó yáha, achí de.

¹³ Te ni cahān yā jíin de:

Cuāha máá ró jeē cáji i, achí yá.

Te ni cacahān de:

Tú na vé cánevāha ná, chí uhūn-ni staā jíin uū-ni chācá. Te vésú núu quícuaan ná stāa caji ndihī ñayuu cuehē yáha, te ni ma cúu, achí de.

¹⁴ Chí iyó nájnūhun uhūn mil tēe. Te ni cahān yā jíin tēe cáscuáha ún:

Cahān jíin ñáyuu na cúcōo sñn cincuenta cincuenta i, achí yá.

¹⁵ Te súcuan ni casáha de, te ni cacucōo ndihī ñayuu.

¹⁶ Te ni quihin ya ndihúhún staā jíin uū chācá un, te ni ndacoto ya ichi ándiví, te ni nacuatáhú yá. Te ni tahú cuéchi yá staā ún, te ni jēhe ya nuū tēe cáscuáha jíin yá, te ni casaja de nuū ñáyuu cuehē.

¹⁷ Te ndivii i ni cayeji, te ni candutú chíji i. Te ni canastútú de pedazo staā jeē ní quendōo, te ni chitú úxí uū jīca.

Jeē ní cahān Pedro jeē Jesús cúu Cristo
(Mt. 16.13-19; Mr. 8.27-29)

¹⁸ Te ñn quiví ni cusñn Jesús, jíicán tahú yā, te máá-ni tēe cáscuáha un cáhīin de jíin yá. Te ni cajnūhun yá de:

Ruhū, ¿ndé ñn cúu ri cácahān ñayuu? achí yá.

¹⁹ Te ni cacahān de:

Sava i cácahān jeē cúu ní Juan tēe ni scuándute. Te sava ga i cácahān jeē cúu ní Elías, tēe ni nacani jnūhun Yaā Dios nde jenahán. Te sava ga i cácahān jeē inga tēe ni nacani jnūhun ya ni natecu de.

²⁰ Yūcuán na te ni cajnūhun yá de:

Te máá ró, ¿ndé ñn cúu ri cácahān rō?

Te ni cahān Pedro:

Máá ní cúu Cristo, Yaā ní tají Yaā Dios, achí de.

Jeē ní castūhún Jesús jeē cúu yā
(Mt. 16.20-28; Mr. 8.30-9.1)

²¹ Yūcuán na te ni ndacu nīhin ya jniñu nuū de jeē ma cáchi de jnūhun yáha núu ní ñn ñayuu.

²² Te ni cahān yā:

Máá rí, Yaā ní nduu tēe, cánuú ndoho xeēn rī. Te tāca tēe jéñu jíin sūtū cácujeñu jíin tēe cástéén tutu ley, squéhichī de ruhū. Te cahni de ruhū, te nuū uní quiví te natecu rī, achí yá.

²³ Yūcuán na te ni cahān yā jíin ndihī de:

Na-ni ñayuu núu cúní i condiquīn i ruhū, na cási i jeē cúní maá i, te na cóndiquīn i ruhū tāca quíví, te cuāha i jnūhun ndoho i jnūndóho jeē siquí rī, vésú na cúu i.

²⁴ Chí núu ndé ñáyuu cúní i cácu i nuū jnūndóho quiji nuū i jeē siquí ruhū, núu súcuan te jñahnū ndetū i ní cáni. Te núu

ndé ñáyuu, vēsú na cúu i jeē siquí ruhū, te cotecu i ñí cáni.

²⁵ ¿Chi ndé cuajniñu vēsú na cúndeyí ñayuu nihīn i ñí ñáyiví, te núu squíví i máá i nuū jnahnú ndetū i ñí cáni?

²⁶ Chi núu na-ni ñayuu cúcanu i jeē siquí ruhū, Yaā ní nduu tēe, jíin síquī jnúhun cáhán rī, suni súcuan cucanu rī jeē siquí máá i, quíví ndíji ri. Te quíví ún chi yōhyo luu kujéhu ri, nájnuhun cújéhu Tátá rī, te suni cácujuhnu ndajéhé ndoo ya sáha ya.

²⁷ Te jendaá cahán rī jíin ró jeē sava tēe cáhīn yāhá, ma cúu de chi nde cuni de jeē ndácu Yaā Dios jniñu jíin poder yā. Achí yá.

Jeē tucu ni nduu ya
(Mt. 17.1-8; Mr. 9.2-8)

²⁸ Yūcuán na te nájnuhun nuū uná quíví jeē ni cáhán yā jnúhun yáha, te ni caa ya ñn yucu, cuacacān tahu yā. Te Pedro jíin Jacobo jíin Juan cuango de jíin yá.

²⁹ Te níni jíicán tahu yā, te tucu ni nduu nuū yā, te sahma ya ni nducújín quiyí, te ndíndē.

³⁰ Yūcuán na te ni canecoo uū tēe, cándajnuhún de jíin yá. Te cúu de Moisés jíin Elías, tēe ni cahīyo jenahán.

³¹ Te luu ndíndē de cáhīn de, te ni cacahán de jíin yá síquī jeē ní cuyajni cuu yā ñuu Jerusalén.

³² Te Pedro jíin tēe cáyūcu jíin de, yōhyo cájī de māhná, te vēsú súcuan te tu ní cáquixí de. Te ni cajito de jeē lúu ndíndē yá jíin ndíndúú tēe cáhīn jíin yá.

³³ Te nuū ní cacujiyo tēe un núu yā, te ni cahán Pedro jíin yá:

Maestro, nacā jeē váha jeē cáhīn ná yáha. Te na sáha ná úní vehe ramada, ñn cuu máá ní, inga cuu Moisés, te inga cuu Elías, achí de.

Te tu sáha de cuenta na vé cúu jeē cahán de.

³⁴ Te níni cáhán de súcuan, te ni quee vicō nūhun ní jesi nuū de jíicánhan de. Te ni cayūhú de jeē cáhīn de chíji vicō ún.

³⁵ Te nuū vicó un ní cahán ñn jnúhun:

Yáha cúu Sēhe ri jeē maní ndasí rí jíin. Te na cúni nahín ró jnúhun cáhán yā, achí.

³⁶ Te nuū ni jínu ni cahán jnúhun ún, te máá ñn na Jesús ín ya nuū de. Te máá de tu ní cácahán cuítí de, te tāca quíví ún tu ní cácachi de nuū ni ñn jeē súcuan ni cajito de.

Jeē ní nasávāha ya ñn sūchi ñúhun tachī ini
(Mt. 17.14-21; Mr. 9.14-29)

³⁷ Te inga quíví un ní nanuu ya yucu jíin de. Te cuehē ñayuu ni jejnahan i ya.

³⁸ Te mēhñu ñáyuu cuehē un ní cana jee ñn tēe:

Maestro, jíicán tahu na núu ni jēe condēhe ní sēhe yí ná, chí máñuhún i nuū ná.

³⁹ Te máni jeē sáha xeēn tachī jíin i, te cána cóhó i sáha, te jéni yíhí i, te jēe tiñū yuhu i. Te yōhyo stóho i, te yōhyo uhū siaá i.

⁴⁰ Te ni cahán ndahú ná jíin tēe cáscuáha jíin ní jeē na quēnehen te tachī ún, te tu ní cúu sáha de, achí de.

⁴¹ Te ni cahán yā jíin de jíicánhan de:

Ñayuu yōhyo nihni ni cácuu ró, chí tu cácañdije ró jēe cuu nduvāha i. ¿Nasaa ga quíví condee rī jíin ró jeē cuándeyí ni rī jíin ró? Cuáquihin sēhe ró na quíji i, achí yá.

⁴² Te níni véji i nuū yā, te ni cotúú i ní sáha tachī, te ni jehni yíhí i. Te Jesús ni cahán xeēn yā nuū tachí un, te ni nasávāha ya sūchí un, te ni nacuāha ya i nuū tatá i.

⁴³ Te ndívii ñayuu nahán ní canaa ni i cájito i jeē yóhyo jéhu jniñu sáha Yaā Dios.

Jeē ni cáhán tucu ya jeē cúu yā
(Mt. 17.22-23; Mr. 9.30-32)

Te níni cánaa ni i cájito i tācá jniñu ni sáha Jesús, te ni cahán yā jíin tēe cáscuáha jíin yá:

⁴⁴ Chuhun vāha ni rō jnúhun cáhán rī yāhá, te ma náa ni rō, chí ruhū, Yaā ní nduu tēe, nastúu i ruhū quíví ri ndaha tāca tēe xeēn, achí yá.

⁴⁵ Te tu ní cájecūhun ni de jnúhun cáhán yā, chí tu ní cúu cuítí jecūhun ni de. Te ni cayūhú de cajnuhún de ya síquī jnúhun ni cahán yā.

Ndé ñáyuu cúu jeē kujéhu ga
(Mt. 18.1-5; Mr. 9.33-37)

⁴⁶ Yūcuán na te tēe cáscuáha jíin yá ni caquejé de cácahán de síquī núu ndé ñn de cújéhu ga.

⁴⁷ Te Jesús ni jini yā jeē súcuan cájeni ni de. Te ni jniñi ya ndaha ñn sūchi lúlí, te ni jeni ya i xiin ya.

⁴⁸ Te ni cahán yā jíin de:

Na-ni ñayuu núu jeē síquī ruhū jetáhú i sūchi lúlí yáha, te ruhū jetáhú i. Te ñayuu jetáhú ruhū, suni jétáhú i Yaā ní tají ruhū

vēji ri. Te ñayuu núu ga mēhñu ró, máá i cújehnu ga, achí yá.

*Ñayuu tu cáhán siquī yā, ín i jín yá
(Mr. 9.38-40)*

⁴⁹ Yūcuán na te ni cahān Juan:

Maestro, ni cajito ná ñn tēe jeē jín síhví ní quēnehen de tachī ini ñayuu. Te ni cajesi na jēē sāha de, chi tu jíca de jín yó, achí de.

⁵⁰ Te ni cahān Jesús jín de:

Ma cási rō jeē sāha de, chi tēe tu cáhán siquī yō, ín de jín yó, achí yá.

Jeē ni cáhán yā nuū Jacobo jín Juan

⁵¹ Te ni cuyajni quiví jeē quínuhun yā andiví, te ni tee téyí ni yā jeē quihín yā ñuu Jerusalén.

⁵² Te ni tají yá sava tēe yósnúu de jín jnúhun jeē jinú yā. Te cuango de ñn ñuu Samaria návāha nducú de nuū ndóo ya.

⁵³ Te ñayuu Samaria un tu ní cájēhe i vehe ndōo ya, chi ni cajini i jeē ndé Jerusalén quihín yā.

⁵⁴ Te Jacobo jín Juan, tēe cáscuáha jín yá, ni cajini de jeē súcuan cúu, te ni cacahān de jín yá:

¿A cúní ni jēē ndácu yó jniñu quiji ñuhūn nde andiví, nájnūhun ni sāha Elías, návāha naa ñayuu yáha? Achí de.

⁵⁵ Yūcuán na te ni ndió cóto Jesús nuū de, te ni cahān yā nuū de:

Tu cájini rō na nuū vēji jnúhun cácahān rō.

⁵⁶ Chi ruhū, Yaā ní nduu tēe, tú vēji ri jeē snāá rī ñayuu, chi sa suhva jeē jnáma ri ñayuu, achí yá.

Yūcuán na te cuahān yā jín de ñga ñuu.

*Siquī ñáyuu jeē cácu ni i condiquīn i ya
(Mt. 8.19-22)*

⁵⁷ Te ní ní jíca ya ichi jín de, te ni cahān ñn tēe jín yá:

Condiquīn na níhín quihín yō ndé-ni cúu-ni nuū quihín ni, achí de.

⁵⁸ Te ni cahān Jesús jín de:

Tāca ñúcuii, íyó yāu cava cáñuhun tí. Te suni saa, íyó táca tí. Te ruhū, Yaā ní nduu tēe, tú nuū cusú rī, achí yá.

⁵⁹ Te ni cahān yā jín ñga de:

Condiquīn ruhū na quihín yō.

Te máá tēe un ní cahān de:

Condetu ní ndé na quíchindūji ná tátá na xíhna gā. Yūcuán na te condiquīn na níhín, achí de.

⁶⁰ Te ni cahān Jesús jín de:

Stóo tāca ndíyí na chindūji jnáhan ndíyí, chi ndíyí cácuu ñayuu tu cácañíje. Te róhó, cuahān te nacani ró jnúhun ndese ndácu Yaā Dios jniñu, achí yá.

⁶¹ Yūcuán na te suni ni cahān ñga de:

Cúní na condiquīn na níhín, te cuāha ní jnúhun jeē xíhna gā quicahān na jín ñáyuu cáyūcú vehe ná, achí de.

⁶² Te ni cahān Jesús jín de:

Núu na-ni tēe quéjé de condiquīn de ruhū, te núu máni jeē nácani cuíhyá ni de siquī tāca jēē ní stóo de, núu súcuan te cúu de nájnūhun ñn tēe jítu jín yátá, te jícó cóto de ichi vehe de. Te ma cuajniñu de condiquīn de ruhū siquī jniñu ndácu Yaā Dios, achí yá.

Jeē ní tají yá unī xico uxī de

10

¹ Te ná ni cuu tācá jniñu yáha, te máá Jítóho yō ni nacāji ya unī xico uxī gā de. Te ni tají yá ndihuū ndihuū de jeē cósnū de nuū yā, quingoo de tācá ñuu jín táca lugar nuū jé yajni quihín maá yá.

² Te ni cahān yā jín de:

Ñayuu yáha cácuu i nájnūhun trigo jeē tah-ndé, te ndaā jeē cuehē cúu, te tēe cahnde chí jecu-ni de cúu. Núu súcuan te cacān tahu rō nuū maá Jítóho rō Yaā Dios jeē na tájí yá cuehē tēe na quíngoo de cahnde de trigo, cúu jeē nacani de jnúhun ya nuū ñáyuu.

³ Te cuángoo jínáhan ró, te na cástūhun rí nuū rō jeē tají rí rohó quíngoo ró nájnūhun londe mēhñu yíhí.

⁴ Te ma cóndiso ró ñunu, ni yijni xūhún, ni ndijēn. Te ichi ma cucuéé ró ndajnūhun ró jín ni ñn.

⁵ Te na-ni vehe núu ni quiví ró, te xíhna gā cahān rō: Na quíji jnúhun ndeyí jnúhun síh ni nuū rohó, ñáyuu vehe yáha, achi rō.

⁶ Te núu vehe yúcuan íyó ñáyuu vāha, te jnúhun ndeyí ní cahān rō jinū siquī i. Te núu tuú, te jnúhun ndeyí ní cahān rō ma jinú siquī i.

⁷ Te suni vehe yúcuan coyūcu ró, te caji rō coho ró jēē cuāha ñayuu nuū rō. Chi siquī jniñu jeē nácani ró jnúhun nuū ñáyuu, te

cánuú coto i róhó. Ma quéndōo ró tijni vehe, chi ñn-ni vehe.

⁸ Te na-ni ñuu núu ni quivicoo ró, te núu cuatáhú i róhó, te caji rō tāca jēē cuáha i nuū rō.

⁹ Te nasávāha ró ñáyuu cácuñū ñuu yūcuán. Te cachi rō nuū i: Je ni cuyajni Yaā Dios jeē ndacu ya jniñu nuū rō, achi rō.

¹⁰ Te na-ni ñuu núu ni quivicoo ró, te núu tu ní cájetáhú i róhó, te quendacoo ró ini calle yūcuán, te cahān rō:

¹¹ Nde ticachā ñuu rō yāha jēē ni jñí jehē rī, na náscóyo ri jeē cúu seña jeē iyó cuéchi ró jēē tu ní cájetáhú ró. Te na cónahán ró jeē Yaā Dios je ni cuyajni ya jeē ndacu ya jniñu nuū rō nuú.

¹² Te cáhán rī jín ró jeē quiví juicio te xeēn gā coo castigo siquī ñuu casáha súcuan vēsú siquī ñuu Sodoma nuū ní casáha ndasí ñáyuu cuēchi.

Jeē ní cuxeēn yā nuū sava ñuu ñhni ni (Mt. 11.20-24)

¹³ 'Nacā jeē xeēn ndoho ró, ñáyuu ñuu Corazín. Te nacā jeē xeēn ndoho ró, ñáyuu ñuu Betsaida. Chi núu ini ñuu Tiro jín ñuu Sidón ni sáha ri jniñu jéñu jeē ni sáha ri ini ñuu maá ró, te yachī nacani ni ñayuu ñuu un jēē stóo i cuéchi i núú. Te sáha i seña jeē steén jeē nácani ni i siquī cuéchi i, chi cuhun i sahma jnúú te chuhun i yaā xinī i núú.

¹⁴ Núu súcuan te quiví coo juicio te xeēn gā coo castigo siquī rō jijnáhan ró vēsú jeē ni íyo siquī ñuu Tiro jín ñuu Sidón.

¹⁵ Te róhó ñáyuu ñuu Capernaum, ¿á cájeni ni rō jeē cujéñu ró nájnūhun ñn jeē cáa cuahān ichi ándiví? Tuú chi sa nanuu ró ndé lugar nuū cáyūcu ánuá ndíyí. Achí yá.

¹⁶ Te ni cahān gā yā jín tēe jeē tají yá quingoo:

Ñayuu chusóhó jnúhun cahān rō, nuū maá rí chusóhó i. Te ñayuu squéhichí rohó, suni ruhū squéhichí i. Te ñayuu squéhichí ruhū, suni squéhichí i Yaā ní tají ruhū vēji ri. Achí yá.

Jeē ní ndecoo tēe ni tají yá

¹⁷ Te ni ndecoo unī xico uxí tēe un, cácusñ ni de te cácahān de jín Jesús:

Nde tachī cájetáhú núu na jēē jín síhví ní, chi quéndacoo ini ñayuu, achí de.

¹⁸ Te ni cahān yā jín de:

Súcuan cúu, chi ni jito ri jeē nájnūhun ñn taja ni ningava Satanás ichi ándiví, chi ni quende rī ndíhi poder un.

¹⁹ Te vijna te je ni jēhe ri fuerza nuū rō jeē cueñū rō nájnūhun siquī tāca cóo jín tísuhma, te cundeyí ró siquī tāca fuerza maá jēē jíto uhū yohó, te tú na vé sáha ga jín ró.

²⁰ Te ma cúsn ni rō maá-ni jeē cájetáhú táchī nuū rō, chi sa cusñ gā ni rō jeē yosó síhví ró nde ándiví. Achí yá.

Jeē ní cusñ ni Jesús (Mt. 11.25-27; 13.16-17)

²¹ Te suni hora un ní cusñ ni Jesús, ni sáha Espiritu Santo, te ni cahān yā:

Na cútahū na núu ni Tátā, Jitoho ándiví jín ñáyiví. Chi ni jesi ni táca jnúhun ndichí ní, jeē ma cúni ñayuu ndichí jín ñáyuu tūhva cuenta ñayiví yáha. Te ni steén ni núu ñáyuu cácuu nájnūhun sūchi lúli. Chi súcuan ni nujnahan ni ni Tátā, achí yá.

²² Te ni cahān gā yā:

Ndivii ni jēhe Tátá rī nuū rī. Te tu cájini ñayuu ndé ñn cúu ruhū, Sēhe Yaā Dios, chi máá-ni Tátá rī cúu jeē jini yā ruhū. Ni tu cájini ñayuu ndese Yaā cúu máá Tátá, chi máá-ni Sēhe cúu jeē jini. Te íyo ñáyuu jeē cuni máá Sēhe steén yā nuū i ndese Yaā cúu Tátá yā, te máá i suni cuni i. Achí yá.

²³ Yūcuán na te jíto ya nuū tēe cáscuáha ún, te ni cahān yā jín máá-ni de:

Yōhyo ndetū ñayuu cájito jniñu jéñu jeē cájito máá ró.

²⁴ Chi cáhán rī jín ró jeē cuehē tēe ni canacani jnúhun Yaā Dios, jín táca rey, ni cacuni de coto de jeē cájito máá ró, te tu ní cájito de. Te suni ni cacuni de cuni sōho de jeē cájini sōho máá ró, te tu ní cájini de. Achí yá.

Jnúhun ñn tēe vāha ni nación Samaria

²⁵ Yūcuán na te ñn tēe steén tutu ley Yaā Dios, ni ndocuiñ de ni jecahān de jín Jesús, chi cúni de coto ndee de ya. Te ni cajnúhún de:

Maestro, ¿na vé sáha ná te nihñn tahú na cotecu na ñí cáni ándiví? áchí de.

²⁶ Te ni cahān yā jín de:

¿Ndesé yósó núu tutu ley? ¿Ndesé cáhán cáhu ró? Achí yá.

27 Te máá téé un ní cahān de jeē cahān nuū tútu:

Coo manī ndasí ró jíin máá Jítóho rō Yaā Dios, nde jnāā ndasí ró sáha ró ndihi jeē cúsi ni yā, nde jíin ini jíin ánuá rō, jíin ní fuerza rō, jíin ní jeē níjnūnī rō. Te cundáhú ni rō jnāhan ró nájñūhun cundáhú ni rō maá ró, achí. Achí de.

28 Te ni cahān yā jíin de:

Vāha ni cahān rō, Te núu cuu sáha ró súcuan te nihīn tahu rō cotecu rō ní cáni, achí yá.

29 Te máá téé un cúní de jeē quéndō ndaā de nuū yā jíin jñūhun ni cajñūhún de, te ni cahān de:

¿Te ndé ñáyuu cácuu jnāhan ná? achí de.

30 Te ni cahān Jesús:

ñn tēe ni quenda de ñuu Jerusalén, ni cuun de cuahān de ñuu Jericó. Te ichi un ní canecoo ñacuīhna núu de, te ni caquende ndihi ndajñū de, te nde sahma ñūhun de. Te ni cacani ndevāha ún de jeē jé yajni cuu de núu. Te ni castóo ún de, te cuango.

31 Te ni cuu jeē ichi un yāha ñn sutū quihīn de, te ni jito de nuū téé ún, te ni síyo-ni de cuahān de.

32 Te suni súcuan ñn tēe grupo levita jeē cájeññū ini templo, vēji de ichi ún, te ni jito de nuū téé ún, te ni yāha jíca-ni de cuahān de.

33 Te ñn tēe nación Samaria, suni vēji de ichi ún, te nuū ní jito de, te ni cundáhú ni de tēe ún.

34 Te ni quee de nde nuū catú téé ún, te ni chuhun de aceite jíin vino nuū ni túji tēe ún, te ni jihni de sahma nuū. Te ni soó de tēe un síquī quiti de, te cuahān de jíin téé un ndé ñn mesón, te ni condito de.

35 Te inga quivī ún, hora jeē quihín de, te ni tava de uū xūhun cáa, ni jēhe de nuū tēe chíi mesón. Te ni cahān de: Coto ní téé yāha, te núu caxīn gā ni xūhun ní jíin de, te nuū nándicó ná te nachunaa ná núu ní, achí de.

36 Núu súcuan ¿te ndese jéni ni rō? Jeē ndinúní téé ún, ¿ndé ñn de ni chihi cuenta jeē jnāhan de cúu tēe ni canecoo ñacuīhna núu? Achí yá jíin téé stéén tutu ley.

37 Te ni cahān de:

Tēe jeē ní cundáhú ni tēe ni tujī, vēsú tēe ñuu jíca cúu de.

Yūcuán na te ni cahān Jesús jíin de:

Cuáhán núu súcuan, te suni súcuan cundáhú ni rō tāca ñáyuu, achí yá.

Jeē ni íne ya vehe Marta jíin María

38 Yūcuán na te ni quihīn tucu ya ichi cuahān yā, te ni jinū yā ñn ñuu lulí. Te ñn ñahan nání Marta, ni cana ña ya ni jehēn yā vehe ña.

39 Te Marta, íyó ñn cuhū ña nání María. Te María ni cucōo ña nuū jehé Jesús, jíni nahín ña jñūhun cáhān yā.

40 Te Marta chí cúnéé máá ña jíin cuéhē jññū sáha ña. Te ni quee ña nuū yā, te ni cahān ña:

¿A tu sáha ní cuenta jeē cuhū na ní stóo máñūhún ña sãña núu jññū? Te cahān ni jíin ña na chindéé ñáhán ña sãña, achí ña.

41 Te ni cahān Jesús jíin ña:

Marta, yōhyo ndíhvī ni rō jíin cuéhē jññū, te yōhyo stóho ró máá ró jíin.

42 Te íyó ñn-ni jññū cánuú. Te María chí ni nacāji ña jññū cánuú, suu jeē ndíhvī ni ña síquī jññūhun Yaā Dios, te ma quēnehen yó ña nuū ún. Achí yá.

Jeē ni stéén yā ndese cacān tahu yō (Mt. 6.9-15; 7.7-11)

11

1 Te ñn quivī íne Jesús ñn lugar jícan tahu yā. Te nuū ní ndihi ni jícan tahu yā, te ñn tēe scuáha jíin yá, ni cahān de:

Stéén ni núu ná ndese cacān tahu na jíjñāhan ná, nájñūhun ni stéén Juan nuū téé ni cascuáha jíin de, achí de.

2 Te ni cahān yā jíin de:

Jeē cacān tahu rō, te suhva cahān rō: Tátá maá ná jíjñāhan ná jéē ndeé ní andiví, níni na cóo yíñūhún ná nuū ní, chí Yaā íi cúu ní.

Te ñūhun ni na jéē yachī quiji quivī ndacu ní jññū ní ñáyivī yāha.

Te na cóo tācá jññū nújñahan ni ní, nájñūhun íyó ini andiví, súcuan na cóo ini ñayiví.

3 Staā jeē cátecu na táca quivī, cuāha ní núu ná vijna.

4 Te cone cáhnu ni ní núu tāca cuéchi cásaha ná núu ní,

nájñūhun cáhine cáhnu ni na núu ñáyuu casáha cuéchi nuū ná.

Te ma cuáha ní jññūhun jeē coto ndee jexeén sãña,

chi sa suhva jnama ní sáña nuū tāca jéē neé. Achi rō jijnáhan ró. Achí yá.

⁵ Te ni cahān gā yā:

Núu ndé ñn róhó íyó ñn amigo rō, te núu quihīn rō vehe de sava ñuū te cahān rō jīn de: Amigo, cuāha núu unī staā nuū rī.

⁶ Chi ñn amigo rī jeē jíca de viaje, ni quee de vehe ri, te tú na vé névāha ri jeē cuāha ri caji de. Achi rō.

⁷ Te núu cahān tēe íne ini vehe: Ma stáhān rō ruhū, chi ndíhyú yehyí rí, te je cáquixī sēhe ri jīn rí, te ma cúu ndonda ri jeē cuāha ri nuū rō, achi de.

⁸ Te cáhān rī jīn ró, vēsú ma ndóna de cuāha de nuū rō siquī jeē cúu de amigo rō, te jeē yóhoyó stáhān rō de, jeē yúcuan ndonda de cuāha de ndíhi jeē jíni ñúhún ró.

⁹ Núu súcuan te cáhān rī jīn ró jijnáhan ró jeē suni súcuan cacān tahú rō nuū Yaā Dios, te cuāha ya nuū rō. Te nducú ró tāca jéē váha íyó nuū yā, te nihīn rō sáha ya. Te cacān tahú rō nde nihīn rō, nájnūhun sáha ñayuu cahān yehyí ndé nune quívi i.

¹⁰ Chi tāca ñayuu jicán, cuāha ya nuū i. Te ñayuu nducú, suni nihīn i. Te ñayuu cahān, nune ya ichi nihīn i jeē cuní i.

¹¹ '¿Te ndé ñn ró cúu tátá, te núu sēhe ró jicán i staā nuū rō, te á cuāha ró ñn yuū nuū i? Te núu jicán i chācá, ¿te á cuāha ró ñn coō nuū i?

¹² Chí núu jicán i ñn ndívi, ¿te á cuāha ró ñn tisuhma nuū i? Tú cuíti súcuan.

¹³ Núu súcuan te máá ró jijnáhan ró, vēsú ñayuu iyó cuéchi cácuu ró, te cájini rō cuāha ró jéē váha nuū séhe ró. Te nagā ni cuu máá Tátá rō andívi jéē ma cuāha ya Espiritu Santo nuū ñayuu jicán nuū yā. Achí yá.

Jeē ní cacahān de jeē jejniñu ya fuerza Satanás

(Mt. 12.22-30; Mr. 3.19-27)

¹⁴ Te quénehen ya ñn tachī ini ñn tēe, jeē ní cuñíhín de ni sáha. Te nuū ní quenda tachī, te ni nacañān tēe ni cuñíhín un. Te ni canaa ni ñayuu cájito i.

¹⁵ Te sava ñayuu ún chi ni cacahān i:

Jín fuerza Satanás jeē cujéhnū nuū tachí, quénehen tēe yáha táca táchī ini ñayuu, achí i.

¹⁶ Te sava ga i cúní i coto ndee i ya, te ni cajicān i jeē sáha ya jeē coo ñn seña ichi andívi.

¹⁷ Te máá yá jiní yā jeē súcuan cájeni ni i, te ni cahān yā:

Tācá nación jeē sasñn máá te cuajnáhan máá, núu súcuan te snāā jeē iyó váha máá. Te núu ñayuu ñn vehe sásñn máá te cuajnáhan máá, núu súcuan te ma cúu ga coyūcu cáhnu.

¹⁸ Te suni súcuan Satanás, núu sásñn máá jín jnáhan tachī, ¿te ndese cuiñi nihin jeē ndácu jniñu núu súcuan? Chi cácañān rō jeē jín fuerza Satanás quénehen ri tachī ini ñayuu.

¹⁹ Te núu súcuan cúu núu, te ñayuu cascuāha jín máá ró jijnáhan ró, ¿na jín fuerza cáquenehen máá i tachī, cájeni ni rō? Núu súcuan te máá i jijnáhan i cachi jeē ní castívi ndasí ró ni cacahān rō jeē cáquenehen ri tachī jín fuerza Satanás.

²⁰ Te tuú chi sa suhva jín fuerza Yaā Dios cúu jeē quénehen ri tachī. Núu súcuan te je ndeé Yaā Dios mēhñu ró jéē ndácu ya jniñu.

²¹ 'Te núu ñn tēe ndacuī, ndíto de vehe de jín nújí de, núu súcuan te tú ni ñn ndajniñu de ndoñúhún.

²² Te núu quiji ñnga tēe ndacuī gā, te cundeyí jín tēe ún, núu súcuan te quende nují de jeē ndíto de vehe de, te sáha de ndese cúní maá de jín ndajniñu jeē quende de. Te nájnūhun tēe ndacuī gā ún, súcuan cúu máá rí nuū Satanás.

²³ 'Te ñayuu tu íyó mání jín rí, núu súcuan te jíto uhū i ruhū. Te ñayuu tu nástútú jín rí, núu súcuan te sa jéte núu i ñayuu vējicoo nuū rī.

Tachī jeē nastútú jnáhan ndívi ini ñayuu (Mt. 12.43-45)

²⁴ 'Núu ni quenda ñn tachī ini ñn tēe tu cándíje, te jíca cuu nuū ñúhún téhé, ndúcú núu ndétátú, te tu níhín, yūcuán na te jéni ni maá: Na quínūhun rī vehe nuū ní quenda rí.

²⁵ Te núu ni ndee tucu, te jíto jeē tēe tu cándíje un cúu de nájnūhun ñn vehe jeē ní ndundoo.

²⁶ Yūcuán na te jéquihin uxā gā tachī xeén gā vēsú maá. Te quívicoo ini tēe un jéē cóyūcu yúcuan. Núu súcuan te xeén gā ndoho tēe un jéē sándíhí vēsú jeē xíhna ñúhún. Achí yá.

Yóhoyó ndetū ñayuu cájini nahín jnúhun ya

²⁷ Te níni cáhán yā jnūhun yáha, te ìn ñahan íne mēhñu ñáyuu cuehē un, ní cahān jee ña jíin yá:

Yōhyo ndetū ñahan ní scácu níhín te ni scáxin ña níhín, áchí ña.

²⁸ Te ni cahān yā:

Sa suhva yōhyo ga ndetū ñayuu cájini nahín jnūhun Yaā Dios te cásquicu i, áchí yá.

Jeē ní cajicān ñayuu tu cáccandíje ìn jniñu jéhnu

(Mt. 12.38-42; Mr. 8.12)

²⁹ Te ni cataca cuehē gā ñayuu nuū Jesús, te ni quejéé yá cahán yā:

Ñayuu iyó vijna máni cásáha néé i. Te cájicān i ìn jniñu jéhnu jeē steén núu Yaā ní tají Yaā Dios cúu ri. Te tú na ñnga jniñu jéhnu stéén rī nuū i, chi máá-ni jniñu jéhnu nájnūhun ni cuu jíin Jonás, tē ni nacani jnūhun Yaā Dios nde jenahán.

³⁰ Chi nájnūhun ni cajini ñayuu ñuu Nínive jeē ní cuu ìn jniñu jéhnu jíin Jonás, suni súcuan cuni ñayuu tiempo yáha jeē coo ìn jniñu jéhnu jíin rúhū, Yaā ní nduu tē, jeē quijnáhan jíin modo ni ndoho Jonás.

³¹ Te reina jeē ní cujéhnu nación ichi sur, natecu ña jíin ñáyuu tiempo yáha, quivī juicio jeē sándaā yā cuēchi, te cahān ña cuēchi síquī i. Chi nde jicá téyí ní quiji ña ni jini nahín ña jnūhun ndíchí ní cahān rey Salomón. Te vijna chi cújéhnu ga ruhū, Yaā íne yāhá vēsú Salomón, te tu cáccandíje ró rúhū.

³² Te tāca ñáyuu ñuu Nínive nuū ní nacani Jonás jnūhun, natecu i jíin ñáyuu tiempo yáha, quivī juicio jeē sándaā yā cuēchi, te cahān i cuēchi síquī ñáyuu yáha. Chi máá i ni canacani ni i ni castóo i cuēchi i quivī ní nacani Jonás jnūhun nuū i. Te vijna chi cújéhnu ga ruhū, Yaā íne yāhá vēsú Jonás, te tu cáccandíje ró rúhū.

Jnūhun yátá síquī lámpara

(Mt. 5.15; 6.22-23)

³³ 'Núu nástín ñayuu ìn lámpara, tu chísāhí i, ni tu chúne i chíji ìn cajón. Chi sa suhva jéni i nuū sucún, návāha cundijin nuū ñáyuu quívicoo vehe.

³⁴ Te tinūu ró cúu nájnūhun lámpara nuū yiqui cúñu rō. Núu súcuan te núu tinūu ró iyó ndijin, te ní-ni yiqui cúñu rō cundijin.

Te núu tinūu ró tu iyó ndijin, te ní-ni yiqui cúñu rō iyó nee.

³⁵ Te suni súcuan cúu ánuá rō, te coto ró jéé ma cáni néé ni rō, návāha tú coo nee ini anuá rō.

³⁶ Chi núu máni jniñu váha cásáha ró, te tú na jniñu néé cásáha ró, núu súcuan te luz yā cundijin vāha ini anuá rō, nájnūhun ìn lámpara jeē sáha jeē cundijin vāha. Achí yá.

Jeē ni cahān yā jeē iyó cuéchi de jíjnáhan de
(Mt. 23.1-36; Mr. 12.38-40; Lc. 20.45-47)

³⁷ Te nuū ní cuu ni cahān yā, te ìn tēe grupo fariseo ni cana de ya jeē caji yā staā vehe de. Te ni quivī ya, te ni cucōo ya mesa jeē caji yā staā.

³⁸ Te tēe fariseo un náā ni de jíto de jeē tu squícu ya costumbre jeē nandahá yá te caji yā staā.

³⁹ Te ni cahān maá Jítóho yō jíin de:

Róhó tēe fariseo jíjnáhan ró, chi nájnūhun jeē cánacate ró yátā vaso jíin yátā cohó cúu jeē nándahá ró. Te ichi íni rō chi ñūhun máni máá jnūhun cuíhná jíin jnūhun néé.

⁴⁰ Tēe cánéé cácuu ró. ¿A tu cájini rō jeē Yaā ni sáha yiqui cúñu rō, suni ni sáha ya anuá rō?

⁴¹ Te jeē cájēhe ró caridad nuū ñáyuu ndahú, na sáha ró síquī jeē cundáhú ndije ni rō i. Te súcuan te coo ndaā anuá rō.

⁴² 'Nacā xeēn ndoho róhó tēe fariseo, chi cásquicu ró tācá jniñu lúli, te tu cásquicu ró jniñu cánuú. Chi cásáha ró úxī uxī nuhnī tamīnu jíin ruda jíin táca yucū, te cásocō rō ìn ìn síquī tāca úxī un nuū Yaā Dios. Te tu cásáha cuítī rō jniñu ndaā, ni tu cáhīyo manī rō jíin Yaā Dios. Tāca jéé yáha cánuú sáha ró núú, te suni ma stóo ró jéé socó rō tāca yúcū ún.

⁴³ 'Nacā xeēn ndoho róhó tēe fariseo, chi máni cánujnahan ni rō cucōo ró núú silla yíñúhún gá ini vehe ìi sinagoga. Te cánujnahan ni rō jeē cahán yíñúhún ñáyuu jíin ró nuū calle.

⁴⁴ 'Te nacā xeēn ndoho róhó tēe cástéén tutu ley Yaā Dios, jíin róhó tēe fariseo, chi tēe stáhú-ni cácuu ró. Chi cándāa ró nájnūhun yaū ndiyi jeē tú ndijin, chi cásnáā rō anuá ñayuu, te tu jíin i jeē súcuan cásáha ró jíin i. Achí yá jíin de.

⁴⁵ Yūcuán na te ni cahān ìn tēe stéén tutu ley:

Maestro, jeē ni cāhān ni táca jnúhun yáha, suni nde siquī maá ná jíjnáhan ná ní cahān ní, áchí de jíin yá.

⁴⁶ Te ni cahān yā:

Suni nacā xeēn ndoho róhó tée cástéén tutu ley. Chi suni cástéén rō táca ley ni catava maá ró jeē yí sáha, te tu cácuñdeyí ñáyuu squícu i. Te maá ró, chi ni ñin xini ndáha ró tu cáscánda ró jéē squícu ró.

⁴⁷ 'Nacā xeēn ndoho ró jíjnáhan ró. Chi cásáha ró vehe siquī nuū yíndūji ndīyí jíi rō, tēe ni canacani jnúhun Yaā Dios nde jenahán. Te suni táca jíi rō ni cajehni de tēe ún.

⁴⁸ Te jeē casáha ró súcuñ cūu jeē cácuñjánañhán ró jíin de siquī jníñu ní casáha de. Chi maá de ni cajehni tēe ún, te maá ró cásáha ró vehe ndīyí ún.

⁴⁹ 'Jeē yúcuñ nde jenahán ní cahān Yaā Dios ñin jnúhun ndíchí: Tají rí táca tēe nacani jnúhun rí jíin táca tēe apóstol quingoo de nuū i. Te sava de cahni i, te sava ga de coto xeēn i, áchí Yaā Dios.

⁵⁰ Te súcuñ te siquī ñáyuu tiempo yáha na cóndee cuēchi jeē ní cajehni jíi i tēe ni canacani jnúhun Yaā Dios, nde quiví ni jécōo ñayiví te nde vijna,

⁵¹ nde Abel xihna gā te nde Zacarías, tēe ni cajehni de ini templo sava mēhñu cuarto ñi jíin altar. Núu súcuñ te cāhān rí jíin ró jeē siquī ñáyuu tiempo yáha cóndee táca cuēchi ún.

⁵² 'Nacā xeēn ndoho róhó jéē castéén tutu ley, chi cájesi rō ichi jeē jécūhun ni ñáyuu jnúhun ya. Chi ni maá ró tu cácuñi rō jecūhun ni rō, ni tu cájēhe ró jnúhun jeē jecūhun ni ñáyuu cácuñi. Achí yá.

⁵³ Te jeē ni cāhān yā jnúhun yáha, te tēe cástéén tutu ley Yaā Dios jíin tēe fariseo, yōhyo ni caquití ni de nuū yā. Te ni caquejé de cástíchí de ya siquī cuehē gā jnúhun.

⁵⁴ Chi yuhu-ni cánducú de núu sanaa te stíví yá jnúhun cahān yā, návāha nihīn de cuēchi siquī yā.

Siquī jnúhun stáhú cácahān tēe fariseo

12

¹ Te níni súcuñ cūu, te ni cacutútú cuēhē mil ñáyuu, chi nde cájeñū i siquī jehé jnáhan i. Te xihna gā ni quejé yá cāhān yā jíin tēe cáscuáha jíin yá:

Coto má candíje ró levadura tēe grupo fariseo, chi suu cūu jnúhun stáhú cácahān de. Chi jíte núu nuū ñáyuu, nájnūhun ndécava levadura nuū ñújen pan.

² Chi jnúhun stáhú un má quéndōo sáhi cuiti, chi ndihí natūu ndijin, te cuni ñáyuu.

³ Núu súcuñ te suni maá ró, táca jnúhun ni cacahān rō jeē tu ní jíni ñáyuu, ñin quiví te cuni vāha i. Te táca jnúhun ni cacahān sáhi ró jeē ndihyú yehyí, ñin quiví te cahān jee ñáyuu yatā táca vehe.

*Jeē ní cachi yā ndé ñin cūu jeē yūhu yó
(Mt. 10.28-31)*

⁴ 'Cāhān rí jíin ró jíjnáhan ró, amigo: Ma yūhu ró coto ró ñáyuu cahni yiquí cūñu rō, chi núu ni cajehni i róhó, te tuá na vé cūu sáha ga i.

⁵ Te na cáchi rí nuū rō ndé ñin yūhu ró coto ró: Jeē yūhu ró coto ró cūu Yaā Dios jeē núu sáha ya jeē cūu rō, te íyó poder yā chune ya rohó infierno. Suu maá yá cūu jeē yūhu ró jeē ma stíví ró nuū yā.

⁶ 'Te táca saa chi tú yahu ndéé tí, chi nde uhūn tí jeē uú centavo lulí. Te ni ñin tí tu náa ni Yaā Dios jeē tu ndíto ya.

⁷ Te nagā ni cuu róhó jíjnáhan ró, chi nde ndihí xini rō je ni cahu ya. Núu súcuñ te ma yūhu ró jíjnáhan ró, chi cánuú ndasí gá rō nuū yā vésú cuehē táca saa.

*Ñáyuu jejnúhún Jesucristo nuū inga ñáyuu
(Mt. 10.32-33; 12.32; 10.19-20)*

⁸ 'Te cāhān rí jíin ró, táca ñáyuu jeē cuajnúhún rúhū nuū inga ñáyuu, suni súcuñ ruhū, Yaā ní nduu tēe, cuajnúhún rí i nuū táca ndajéhé Yaā Dios.

⁹ Te táca ñáyuu jeē ma cuajnúhún rúhū nuū inga ñáyuu, suni súcuñ ma cuajnúhún rí i nuū táca ndajéhé Yaā Dios.

¹⁰ 'Te núu ndé ñáyuu cahān i siquī ruhū, Yaā ní nduu tēe, cone cāhnu ni Yaā Dios nuū i. Te núu ndé ñáyuu cahān ndevāha i siquī Espíritu Santo, ma cóne cāhnu ni Yaā Dios nuū i.

¹¹ 'Te núu cuandeca i róhó táca vehe ñi sinagoga nuū tēe cásandaā cuēchi, jíin núu tēe cácuu tohō, te ma nácani ndasí ni rō ndese stío cuñí rō jnúhun nuū de.

¹² Chi maá hora un te Espíritu Santo steén yā nuū rō ndese cahān rō. Achí yá.

Siqui jeē ma ténuū yō ndajniñu cúcá

13 Yūcuán na te ñn tēe íne nuū ñáyuu cuehē un ní cahān de jíin Jesús:

Maestro, cahān ni jíin ñani na jēē na táhú sáva de tahū na jíin de, áchí de.

14 Te ni cahān yā jíin de:

¿Ndé ñn ni jeni ruhū jeē ndacu ri jniñu tahū sáva tahū rō? Achí yá.

15 Te ni cahān gā yā:

Condito ró máá ró jijnáhan ró jēē ma ndíyo ni rō xūhun jíin táca gá. Chi vēsú cuehē ndasí ndajniñu névāha ñn tēe, te nasūu jēē yúcuan sáha jeē quéndōo ndetū de, áchí yá.

16 Yūcuán na te ni cahān yā ñn jnūhun yátá jíin i:

Ni ñyo ñn tēe cúcá jeē névāha ñuhun jeē cúu vāha ndasí itu.

17 Te tēe cúcá un ní nacani ni de: ¿Ndese sáha ri? Chi tuá ndé cuhun ññi ri. Achí de.

18 Te ni jeni ni de: Suhva na sáha ri. Na cánu rī táca yácā rī, te nasáha ri jeē náhnu ga. Te yūcuán chuvāha ndihí ri ññi ri jíin táca ndajniñu ri.

19 Yūcuán na te cahān rī jíin ánuá rī: Vijna te cuehē teyí névāha yó jēē canda cuehē cuiyā. Na ndétātu yó te caji yō coho yó, te na cúsi ni yō, ni jeni ni de.

20 Te ni cahān Yaā Dios jíin de: Tēe cánéé cúu ró. Chi jecuáá vijna cuu rō, te táca jēē ní chuvāha ró, ¿ndé tēe cuu? Achí Yaā Dios jíin de.

21 Te súcuan ndoho táca tēe jeē sacúca de máá de, te tu ndúcú de jeē quendōo ndetū de sáha Yaā Dios. Achí yá.

Yaā Dios ndíto ya yohó

(Mt. 6.25-34)

22 Te ni cahān yā jíin tēe cáscuáha jíin yá:

Núu súcuan te cáhán rī jíin ró: Ma nácani ndasí ni rō siquī jeē cótecu rō, núu ndese caji rō, ni siquī sahma, núu ndese cuhun ró.

23 Chi Yaā Dios ni sáha ya jeē técu rō jíin yiqui cúñu rō, te nagā ni cuu jeē ma cuáha ya jeē caji rō jíin jēē cuhun ró.

24 Condēhe ró ndese cátecu quití cácuu nájnūhun calú, chi tu cátaji tí, ni tu cánastútú tí jeē chívāha tí, ni tú yacā tí. Te vēsú súcuan te máá Yaā Dios scáji yā tí. Te cánuú ndasí gá rō jijnáhan ró vēsú táca quití ún.

25 ¿Te ndé ñn ró, á cuu scuéhnu ró máá ró sava metro gā, vēsú na nácani ndasí ni rō?

26 Te núu ma cúu sáha ró vēsú ñn jniñu lúli súcuan, ¿te najehē cánacani ndasí ni rō siquī jeē caji rō jíin jēē cuhun ró?

27 'Condēhe jijnáhan ró ndese jēe ita táca yúcū. Chi tu sájniñu, ni tu táú. Te cáhán rī jíin ró jeē ni rey Salomón, quiví ní ñūhun de sahma váha ndasí, tu ní ñūhun de sahma lúu súcuan nájnūhun ita ún.

28 Te núu súcuan jēhe Yaā Dios sahma lúu ita un jēē jēe vijna te sajnē cayū nuū ñuhún, te nagā ni cuu rōhó jijnáhan ró jēē ma sáha ya jeē nihín rō sahma. ¿Te naun tu cá candíje nihín ró jēē ndíto ya rohó?

29 Núu súcuan te ma nácani cuíhyá ni rō ndese caji rō ndese coho ró.

30 Chi táca ñáyuu ñayiví jēē tu cá candíje cúu jeē máni siquī jeē yáha cándihvī ni i. Te máá ró jijnáhan ró, chí íyó Tátá rō andiví, te jíní yā jeē cājini ñūhún ró táca jēē yáha.

31 Te sa suhva cánuú gá jeē cóndihvī ni rō siquī jniñu jeē ndácu Yaā Dios nuū rō. Yūcuán na te sáha ya jeē nihín rō táca jēē yáha.

Ndese coo cúcá yó nde andiví

(Mt. 6.19-21)

32 'Ma yūhu ró jijnáhan ró chí cácuu ró nájnūhun lanchi ri. Chi vēsú jecu-ni cácuu ró, te máá Tátá rō cúsi ni yā jeē quívicoo ró ñuu nuū ndácu ya jniñu.

33 Xíco ró jeē cánevāha ró, te cuāha ró xūhun un núu ñáyuu ndahú. Te súcuan caya rō tahū rō nde andiví núu ma cútúhú, nájnūhun jeē chívāha ró xūhun ini yijni. Chi nde andiví te ma náā jeē váha coneváha ró. Chi yūcuan má quíví ñacuñhá, ni ma cúu stíví tiquíxin.

34 Chi nde nuū nihín rō tahū váha ró, yūcuan cúu nuū cóndihvī ni rō siquī.

Jeē na cóo tūhva yó jēē ndéē yā

35 'Coo tūhva ró jijnáhan ró jēē ndéē Jitoho rō, te coo ró nájnūhun mozo jeē nastín i lámpara i.

36 Chí íyó tūhva i te cándetu i jeē ndéē patrón i jeē cuahán de vico nándāha. Chí núu ni ndee de te cahān de, te nune-ni i yéhyí jijnáhan i.

37 Te yōhyo ndetū mozo un núu ni ndee patrón i, te cuni de jeē cándito i. Jendaá cahán rī jíin ró jeē maá patrón sātūhva de máá de, te scúcōo de i mesa te caní de cohō i.

38 Te vēsú cucuée de ndee de nde sava ñuú, chí jēē nēē gā, te núu cuni de jeē súcuan cándito mozo de, te yōhyo ndetū i jíjnáhan i núu súcuan.

39 Te na jécūhun ni rō jeē cahán jnūhun yátá yáha: Tēe chíí vehe, núu ni jini de na hora quií ñacuíhná, te condito de, te ma cuáha de jnūhun jeē sacuíhná vehe de núu.

40 Te suni súcuan coo tūhva ró jíjnáhan ró, chí núu tuú, te máá hora jeē tú na vé cájeni ni rō, te ndee ruhū, Yaā ní nduu tēe. Achí yá jíin de.

Jnūhun mozo vāha jíin mozo tu squícu
(Mt. 24.45-51)

41 Yūcuán na te Pedro ni cajnūhún de ya:

¿A jíin máá-ni ná jíjnáhan ná cahán ni jnūhun yátá yáha, chí suni cahán ni jíin ndihí ga ñayuu? achí de.

42 Te ni cahān maá Jítóho yō:

Cahán rī jíin ndé-ni ñayuu cúu nájnūhun mozo jeē ndito xinī te squícu vāha. Te máá patrón sáha de jeē condiso jníñu i coto i ñayuu vehe de, návāha scáji i máá hora.

43 Te yōhyo ndetū mozo un jēē núu ni ndee patrón, te cuni de jeē súcuan squícu vāha i.

44 Jendaá cahán rī jíin ró jeē caní de mozo un jēē cóto i ndihí ndajníñu de.

45 Te núu jéni ni i jeē ma ndíji yachī patrón i, te quejéé i caní i tēe jíin ñahan cácuu jnāhan mozo i, te caji i coho i te najīni i,

46 núu súcuan te ndee-ni patrón quivī jeē tu ndétu i jíin hora jeē tú na vé jéni ni i. Te stóho xeēn de i, te squívī de i ndoho i jíin ñayuu tu cásquícu.

47 Te mozo jeē jiní i ndese nújnahan ni patrón i, te núu tu sātūhva i ni tu squícu i jeē cuni de, ndoho xeēn i jíin yujnu xíi.

48 Te mozo jeē tu jiní i ndese nújnahan ni patrón i, te núu sáha i jniñu jeē caní de i, núu súcuan te cūhva-ni caní de i. Chí ñayuu jeē steén cuehē yā nuū i, suni cuehē nandacān yā nuū i. Te ñayuu jeē cuehē gā jniñu téjniñu ya i, suni cuehē gā nandacān yā nuū i.

Jeē siquí Jesús te cusñn ini ñayuu
(Mt. 10.34-36)

49 Ni quee rī jeē nájnūhun jeē scuíquín rī ñuhūn ini ñayívī, te suu cúu jeē cusñn ini ñayuu jeē siquí ruhū. Te cúní rī jeē yachī coo súcuan, návāha quívīcoo ñayuu ndaha Yaā Dios.

50 Te íyó ñn jnūndóho cánuú ndoho rī, te cúcuíhyá ndasí ni rī chí nde jíinu ndoho rī, te ndusñ ni rī.

51 ¿A cájeni ni rō jeē véji rī jeē cóyūcu mánī ñayuu ñayívī? Cahán rī jíin ró jeē tuú, chí sa suhva jeē cusñn ini ñayuu jeē siquí ruhū.

52 Chí nde vijna te quejéé jēē uhūn ñayuu ñn vehe, sásñn máá jíjnáhan, unī siquī uú, te uū siquī uní.

53 Chí tátá cusñn ini jíin séhe yí, te séhe yí jíin tátá, te náná jíin séhe síhí, te séhe síhí jíin náná, te náná chíso jíin séhe jēnú, te séhe jēnu jíin náná chíso. Achí yá.

Jeē ni cáhān yā siquī seña andiví
(Mt. 16.1-4; Mr. 8.11-13)

54 Te suni ni cahān yā jíin ñayuu cuehē ún:

Núu cájito ró jeē náne vicō ichi núu cáne niāndii, te cácahān rō jeē cuun saū, te súcuan cúu.

55 Te núu quée tachī vēji ichi sur te cácahān rō jeē nandii, te súcuan cúu.

56 Tēe stáhú-ni cácuu ró. Chí cájecūhun ni rō ndese stéén seña andiví jíin ini ñayívī, ¿te naun tu cájecūhun ni rō ndé ñn cúu ruhū jeē sáha rī tācá jniñu jéhnú tiempo yáha?

Jeē cóndihvī ni yō jeē ma cóndee cuēchi siquí yō
(Mt. 5.25-26)

57 ¿Te najehē tu cánacani ni maá ró ndé ñn cúu jniñu ndaā sáha ró?

58 Te núu ñn ñayuu quihñ i jíin ró nuū tohó jeē cacán i cuēchi siquī rō, núu súcuan te níní cuáhān rō jíin i ichi te condihvī ni rō sándaā rō jíin i. Chí núu tuú, te squívī i róhó núu juez, te juez siáha de róhó núu policía, te policía chune de róhó vecāa.

59 Te jendaá cahán rī jíin ró jeē ma quénda cuítī rō yūcuán chí nde chunaa rō ndihí cuítī xūhun cájicān de. Te suni súcuan condihvī ni rō cahān ndahú ró jíin Yaā Dios, návāha ma ndácunehen ya cuēchi siquī rō. Achí yá jíin de.

Jeē cánuú nacani ni yō jeē stóo yó cuéchi yó

13

¹ Te ñn quiṽi yúcuán ní quecoo jecu tēe, ni canacani de jñūhun nuū yā ndese ni candoho jecu tēe Galilea. Chi ná cájehni de quiṽi jeē socó de, te ni quecoo mozo Pilato ni cajehni tēe ún.

² Te ni cahān Jesús:

Tēe Galilea un, ¿á cájeni ni rō jeē súcuán ni candoho de siquī jeē xeēn gā ni ŷyo cuēchi de vēsú tāca gā ñayuu Galilea?

³ Cáhān rī jín rō jeē tuú. Te rōhó jijnáhan rō suni jnahnū ndetū rō núu tú nacani ni rō jeē stóo rō cuéchi rō.

⁴ Te xahūn unī tēe jeē ní cotúú torre Siloé siquī de, te ni cajihī de, ¿á cájeni ni rō jeē ní casáha de cuēchi xeēn gā vēsú tāca gā ñayuu ñuu Jerusalén?

⁵ Cáhān rī jín rō jeē tuú. Te máá rō jijnáhan rō, suni jnahnū ndetū rō núu tú nacani ni rō jeē stóo rō cuéchi rō.

Jñūhun yátá núndēhe higo

⁶ Yūcuán na te ni cahān yā jñūhun yátá yáha jēe steén yā ndese cácuu ñayuu tu squícu jñūhun Yaā Dios:

Cácuu i nájnūhun ñn nundēhe higo jeē ín nuū ñūhun ñn tēe. Te ni jecondēhé de núu ín ndehē xinī, te tú na vé ín.

⁷ Te ni cahān de jín mozo sájniñu nuū ñūhun de: Vijna te je íyó únī cuiyā jeē quiṽi ri nducú rí ndehē xinī yújnu higo yáha, te tú na vé cúun xinī. Núu súcuán te cahnde rō, chi máá jēe sajnēñu nuū ñūhun, áchí de.

⁸ Te ni cahān mozo un jín de: Stóo ní na cuiñi ñn na cuiyā, te na nástáyā ná jéhē te chuhun ná jéhen.

⁹ Te na cóndēhe yó núu tú cuun ndehē inga cuiyā. Te núu tuú, te tahndē, achí mozo. Achí yá.

Jeē ní nasávāha ya ñn ñahan quiṽi ndétátú

¹⁰ Te ñn quiṽi ndétátú te stéén Jesús jñūhun ini vehe ñi sinagoga.

¹¹ Te íyó ñn ñahan jeē ní cuu xahūn unī cuiyā huhú ña. Chi ñn tachī ni sáha jeē jíca tñí ña, te tuá cúu cuiṽi caca jnuu ña.

¹² Te ni jito Jesús nuū ña, te ni cana ya ña, te ni cahān yā jín ña:

Vijna te nduvāha ní jēe huhú ni.

¹³ Te ni soó yá ndaha ya siquī ña, te ni nucuññi jnuu-ni ña, te ni nacuatáhú ña nuū Yaā Dios.

¹⁴ Te tēe cújehnu ini vehe ñi sinagoga, ni quiṽi ni de nuū Jesús jeē ní nasávāha ya ñahan un quiṽi ndétátú. Te ni cahān de jín ñáyuu:

Íñū quiṽi iyó jēe sájniñu yó, te tāca quiṽi ún quiṽi rō nduvāha rō. Te quiṽi ndétátú chi ma cúu, áchí de.

¹⁵ Yūcuán na te ni cahān maá Jítoho yō jín de:

Tēe stáhú-ni cácuu rō. Quiṽi ndétátú ¿á tu cándají rō stiṽi rō burro rō jēe quiṽi rō rō tñi ndute?

¹⁶ Te ñahan yáha jēe cúu ña ñn sēhe yucūn Abraham, chi nájnūhun ni conuhnī ña xahūn unī cuiyā ni sáha Satanás. ¿Te á tu íyó váha jeē nájnūhun nandají rí ña nuū cuehyi ndóho ña quiṽi ndétátú? Achí yá.

¹⁷ Te jeē ni cahān yā súcuán, te tāca tēe cájito uhū de ya, ni cacucanu de. Te ndihi ñayuu ún chi ni cacusñi ni i jito i tācá jniñu jéhu sáha ya.

Jñūhun yátá siquī ndiquin mostaza (Mt. 13.31-32; Mr. 4.30-32)

¹⁸ Te ni cahān yā:

Na cáhān rī ñn jñūhun yátá návāha cuni rō ndese ndúcuehē ñayuu ndácu Yaā Dios jniñu nuū.

¹⁹ Ndúcuehē i nájnūhun jéhu ñn ndiquin mostaza jeē jéquin ñn tēe nuū ñūhun de, te ndúu nájnūhun ñn yujnu. Te cúu cáhnu, te tācá saa chi casáha ti tacā tñi chiji ndaha ún. Achí yá.

Jñūhun yátá siquī levadura (Mt. 13.33)

²⁰ Te ni cahān tucu ya:

Súcuán cúu jeē ndúcuehē ñayuu jeē ndácu Yaā Dios jniñu nuū:

²¹ Cúu nájnūhun levadura jeē ní quihin ñn ñahan, te ni saca ña jín únī kilo harina, te ni ndaa ndihi ñujen ni sáha. Achí yá.

Siṽi jeē quiṽi yó yéhyí túu (Mt. 7.13-14, 21-23)

²² Te jíca Jesús jeē cuahán yā ichi ñūu Jerusalén, te yáha ya tācá ñuu náhnu jín ñuu lulí, te stéén yā jñūhun.

²³ Te ñn ñayuu ni cajñūhún i ya:

¿A jecu-ni ñayuu jnama Yaā Dios, chí naún? Achí i.

Te ni cahān yā jíin i:

²⁴ Condihvī ni rō quivīcoo ró ndaha Yaā Dios. Chi cúu nájnūhun ñn yéhyí túū. Te cáhán rī jíin ró jeē ñn quivī te cuehē ñayuu nducú i quivīcoo i, te ma cúu ga.

²⁵ Te quivī ún te sáha ri nájnūhun ñn tēe chíi vehe jeē ndocuñī de te nacasi de yéhyí. Te ichi yátá véhe cuiñi ró jíináhan ró, te scáján ró yehyí, te cahān rō: Nune ní yéhyí na quivīcoo ná. Te cahān de jíin ró: ¿Ndé nuū véjicoo ró? Chi tu jíin rī rohó, achi de.

²⁶ Yūcuán na te quejéé ró cahān rō jíin de: Ni cayejí ná ni cajihí ná jíin ní, te ini calle ñuu na ní steén ni jnúhun, achi rō.

²⁷ Te cahān maá de: Cáhán rī jíin ró jeē tu jíin rī rohó ndé chi véjicoo ró. Cujiyo quingoo ró, chí ñayuu casáha jniñu neé cácuu ró. Achi de.

²⁸ Te quivīcoo ró núū ndahyú rō, te nacayihí yuhu ró jeē ndoho xeēn rō. Te coto ró núū Abraham jíin Isaac jíin Jacob jíin ndihí tēe ni canacani jnūhun Yaā Dios, cáyucú de ñuu nuū ndácu ya jniñu. Te rōhó, vésú cácuu ró yúcūn de, te quivīcoo ró núū ndoho ró.

²⁹ Te cuehē ñayuu, vésú tu cácuu i yucūn de, te quijicoo i ichi núū cáne niāndii jíin ichi núū quéé niāndii, ichi norte jíin ichi sur. Te cucōo i mesa caji i staā ñuu nuū ndácu Yaā Dios jniñu.

³⁰ Te sava ñayuu jeē vijna cácuu i sandihí, ichi yúcuan nduu i nuū. Te sava ñayuu jeē vijna cácuu i nuū, ichi yúcuan nduu i sandihí. Achí yá.

Jeē ní cucuíhyá ni yā siquī ñáyuu ñuu Jerusalén

(Mt. 23.37-39)

³¹ Te maá quivī un ní quecoo jecu tēe fariseo, te ni cacahān de jíin yá:

Cujiyo ní quihīn ní inga lado, chí cúní Herodes cahni de níhín, achí de.

³² Te ni cahān yā:

Cuángoo te castūhun ró nuū tēe mañoso un jeē ná tu jinū quivī cuu rī, chí vijna jíin sájnē quenehen ri tachī ini ñayuu, te nasávāha ri ñayuu cácuu. Te isá te jñu jniñu sáha ri, achi rō.

³³ Chi cánuú jeē cáca ri quihīn rī vijna jíin sájnē jíin isá, te jinū rī Jerusalén. Chi tēe cánacani jnūhun Yaā Dios, tu cájihī de inga lado, chí maá-ni ini ñuu Jerusalén cájehni i de. Achí yá.

³⁴ 'Róhó ñuu Jerusalén, jéhni rō tēe cánacani jnūhun Yaā Dios, te jéhe ró yūu xinī tēe tájí Yaā Dios véjicoo nuū rō. Te cuehē jíin ni cuni rī nastútú rí sēhe ró, nájnūhun ndují jeē nastútú tí sēhe tí chíi ndijēn tí, te tu ní cúní rō.

³⁵ Núu súcuan te vijna te stóo uun na ri rohó jíin sēhe ró. Te cáhán rī jíin ró jeē ndé vijna te ma cóto cuiñi gā rō nuū rī, chí nde quiji quivī jeē cahān sēhe ró: Yōhyo vāha Yaā cúu Yaā véndiji jíin jniñu maá Jítoho yō Yaā Dios, achi i. Achí yá.

Jeē ní nasávāha ya ñn tēe cúhú cuehyī cuiñi

14

¹ Te ñn quivī ndétātu ní jehēn yā vehe ñn tēe fariseo cujéhnu, ni jecaji yā staā jíin de. Te tāca gá tēe fariseo cájito yuhu de ya núu stíví yá.

² Te yúcuan íne ñn tēe cúhú de cuehyī cuiñi, índichi de nuū yā.

³ Te ni cajnūhun yá tēe cástéén tutu ley Yaā Dios jíin táca tēe fariseo:

¿A íyó ley jeē nasávāha ri ñayuu cácuu quivī ndétātu, chí tuú? áchí yá.

⁴ Te maá de tu ní cácahān cuiñi de. Te ni jñi ya tēe cúhú un, te ni nasávāha ya de, te ni cahān yā jeē na núhun de vehe de.

⁵ Te ni cahān yā jíin de jíináhan de:

¿Ndé ñn rōhó núu burro ró chí stíquī rō ñingava tí ini pozo, te á tu yachī natava rō tí vésú quivī ndétātu cúu, chí naún? Achí yá.

⁶ Te tu ní cúu stío cuiñi de ni ñn jnūhun nuū yā jeē súcuan ni cahān yā.

Jnūhun siquī ñayuu jéngoo vico

⁷ Te ni jito Jesús jeē tēe ni cataca ún, cánacāji de silla yíñúhún gá nuū mesa cucōo de. Te ni cahān yā jnūhun yáha jíin de:

⁸ Núu ñn tēe cana de jeē quihín rō ñn vico nándāha, te ma cúcōo ró lugar nuū yíñúhún gá. Chí núu súcuan te sanaa te je ni cana de ñn tēe cújéhnu ga vésú rohó.

⁹ Te quee tēe ni cana rōhó, te cahān de jíin ró: Ndonga, te na cúcōo tēe yáha jíñā.

Yūcuán na te cucanu rō jeē quihín rō cucōo rō ndé sandihí na.

¹⁰ Chi sa suhva núu ni cana ñn tēe rōhó, te cucōo rō ndé lugar sandihí na. Te núu quee tēe ni cana rōhó, te cahān de jíin rō: Amigo, nehen cucōo rō ñn lugar nuū yñúhún gá, achi de. Yūcuán na te ñayuu cáyūcu mesa jíin rō coto i jeē sajuhnu de rōhó.

¹¹ Súcuán ni cahān rī jñūhun yáha návāha cuni rō jeē tāca ñáyuu jeē sajuhnu i máa i, nuu i sáha Yaā Dios. Te ñayuu jeē snūu i máa i, ndujénu i sáha ya. Achí yá.

¹² Te suni ni cahān yā jíin tēe ni cana ya yéji yā staā:

Núu sáha rō ñn vico cúsamá chí jeē cuxíni, te ma cána rō ñáyuu cácuu amigo rō, jíin ñani rō, jíin jnáhan rō, jíin ñáyuu cucá. Chi núu súcuán te suni máa i nacana i rōhó, te súcuán nanihín rō jeē ni jéhe rō.

¹³ Chi sa suhva núu sáha rō vico, te cana rō ñáyuu ndahú, ñayuu cuhndú, ñayuu chacuá, jíin ñáyuu cuaá.

¹⁴ Te súcuán te quendōo ndetū rō, chi ma cúu nacuāha i nuū rō. Te nihín rō tahū rō quivī nátecu ñayuu ndaā, achí yá.

Jñūhun yátá siquī vico cúxíni

¹⁵ Te ñn tēe yéji staā jíin yá, ni jini de jñūhun yáha, te ni cahān de jíin yá:

Yōhyo ndetū ñayuu jeē cáji staā nde ñuu nuū ndácu Yaā Dios jniñu, achí de.

¹⁶ Yūcuán na te ni cahān Jesús ñn jñūhun yátá jeē steén yā jeē cána Yaā Dios ñayuu quivīcoo i ñuu nuū ndácu ya jniñu:

Ñn tēe ni sáha de ñn vico cáhnu cuxíni, te ni tají de mozo ni cana cuehē ñayuu.

¹⁷ Te máa quivī cuxíni, te ni tají de mozo de cuacana ñayuu jeē quíjicoo caji staā: Nehen ní jíjnáhan ní, chi je íyó túhva ndihí, achí mozo.

¹⁸ Te ndihí i ni cacahān i jeē na cóne cáhnu ni de chi ma quíngoo i. ñn tēe ni cahān de: Sáa ní jeen rī ñn ñūhun te cánuú quícondēhe rí, te na cóne cáhnu ni de chi ma jeé rī. Achí de.

¹⁹ Te ñnga de ni cahān: Ni jeen rī uhūn yunta stiquī, te quihín rī coto ndee rī tī, te na cóne cáhnu ni de nuū rī chi ma jeé rī, achí de.

²⁰ Te ñnga de ni cahān de: Sáa ní quíjnáhan rī, te jeē yúcuán ma cúu jeé rī, achí de.

²¹ Te cuanuhun mozo un, te ni castūhún de nuū patrón de ndese ni cacahān ñayuu. Yūcuán na te ni quitī ni patrón, te ni cahān de jíin mozo de: Yachí quihín rō tāca calle náhnu jíin calle lulí, te cana rō ñáyuu ndahú, ñayuu cuhndú, ñayuu chacuá, jíin ñáyuu cuaá, na quíjicoo i vico, achí de.

²² Te ni jehēn mozo, te ni ndee de, te ni cahān de jíin patrón de: Je ni sáha ná jeē ni cáhān ní, te cúmanī gā ñayuu te chitú vehe ní, achí de.

²³ Te ni cahān tucu patrón: Quihín tucu rō tāca calle jíin ichi, te cana fuerza rō ñayuu na quíjicoo i, návāha chitú vehe rī.

²⁴ Chi cáhān rī jíin rō jeē ní ñn tēe ni cana rī xihna ñúhún, ma cuáha cuiti rī jñūhun jeē cuxíni de vehe rī, achí de. Achí yá.

Jñūhun jeē cánuú nacani vāha ni yō te condiquīn yō Cristo

²⁵ Te cuehē ndasí ñáyuu cándiquīn i Jesús cuangoo i jíin yá, te ni ndió cóto ya nuū i, te ni cahān yā jíin i:

²⁶ Núu na-ni ñayuu cuní condiquīn ruhū, te núu manī gā i jíin tátá i, náná i, ñasihí i, sēhe i, ñani i, cuāha i, vēsú jíin ruhū, ma cúu cuu i ñayuu scuáha jíin rí. Te núu ndíhví gā ni i siquī jeē cóo vāha máa i vēsú jeē cóndiquīn i ruhū, te suni ma cúu tucu.

²⁷ Te na-ni ñayuu núu tu jéhe i jñūhun ndoho i jñūndóho vēsú nde cuu i jeē siquī jeē cóndiquīn i ruhū, te ma cúu cuu i ñayuu scuáha jíin rí.

²⁸ Chi núu ndé ñn rō cúní rō sáha rō ñn vehe cáhnu, ¿á tu cánuú jeē xihna gā cucōo rō te tava rō cuenta núu canda xūhun jéé sínu rō?

²⁹ Chi núu tuú, te núu je ni jequin rō cimientó, te tu canda xūhun rō sínu rō, yūcuán na te tāca ñáyuu sácatā i coto i rōhó.

³⁰ Te cahān i: Tēe yáha ní quejéé de sáha de vehe, te tu ní canda de sínu de, achi i.

³¹ Te suni súcuán núu ñn rey quihín de cuajnáhan de jíin ñnga rey jeē véji siquī de, ¿á tu cánuú jeé xihna gā cucōo de te nacani ni de núu canda uxī mil soldado jeē cuajnáhan de jíin ñnga rey jeē véji siquī de jíin ócō mil soldado?

³² Chi núu tú canda de, te níní jíca gá véji ñnga rey, te tají de tēe cándiso jniñu,

cajnūhún de na vé cuní inga rey jeē cuáha de nuū, te jecuiñī-ni.

³³ Te máá ró jijnáhan ró, suni súcuan cánuú jēē xihna gā nacani ni rō cahnde ni rō stóo ró ndihī jeē névāha ró, chi núu tuú te ma cúu cuu ró ñáyuu scuáha jíin rí.

Jnūhun yátá síquī ñī
(Mt. 5.13; Mr. 9.50)

³⁴ Te ñayuu cá candije cácuu i nájnūhun ñī. Vāha íyó ñī, te núu ñī ún na náa jeē uhvuá, ¿te ndese nduu uhvuā tucu?

³⁵ Tuá cuajniñu cuiñi, ni jeē chúhun ñayuu nuū ítu, ni jeē ndúu jēhen, chi máá cate ī-ni i. Tāca rōhó jēē jíni sōho, na chúsohó ró. Achí yá.

Jnūhun yátá síquī lanchi ní sana
(Mt. 18.10-14)

15

¹ Te tāca tēe cástútú xūhun renta jíin táca gá tēe cása ha cuēchi, ni quecoo de nuū Jesús jeē cuni sōho de jnūhun cáhan yā.

² Te tāca tēe grupo fariseo jíin tēe cástéén tutu ley Yaā Dios, ni cacahān de síquī yā:

Tēe yāha jétáhú de tāca tēe cása ha cuēchi te yéji de jíin, achí de.

³ Te ni cahān yā jnūhun yátá yāha jíin de:

⁴ ¿Ndé ñn ró núu névāha ró ñn ciento lanchi, te núu scuíta ró ñn tí, te á tu stóo ró cúun xico xahūn cuūn gā tí yucu, te quinanducú ró quiñi ní sana ún ndé nanihīn rō tí?

⁵ Te núu ni nanihīn rō tí, te coso sūcun ró tí, te cusī ni rō.

⁶ Te núu ni ndee rō vehe ró, te nastútú ró táca amigo rō jíin ñáyuu yúcu yajni jíin ró, te cahān rō jíin i: Na cúsi ni yō, chi ni nanihīn rī lanchi ri jeē ní sana. Achí rō.

⁷ Te cáhan rī jíin ró jeē suni súcuan cúu nde andiví. Chi cúsi gā ni yā jíin ñn ñayuu iyó cuēchi núu nacani ni i jeē stóo i cuēchi i, vēsú jíin cúun xico xahūn cuūn ñayuu iyó ndāa jeē tuá jíni ñūhún nacani ni i.

Jnūhun yátá síquī ñahan ní scuíta xūhún

⁸ Te núu ñn ñahan névāha ña uxī peso cāa, te núu scuíta ña ñn, ¿á tu nastīn ña lámpara te nastāa ña vehe, te nanducú yúcun ña nde nanihīn ña?

⁹ Te núu ni nanihīn ña, te nastútú ña táca amiga ña jíin ñáyuu yúcu yajni jíin ña, te

cahān ña jíin i: Na cúsi ni yō, chi ni nanihīn rī xūhun jēē ni scuíta ri. Achí ña.

¹⁰ Te cáhan rī jíin ró jeē suni súcuan cúsi ni táca ndajéhé Yaā Dios síquī ñn ñayuu iyó cuēchi núu nacani ni i jeē stóo i cuēchi i. Achí yá.

Jnūhun yátá síquī sūchi ní jēhēn jecó

¹¹ Te ni cahān gā yā:

Ñn tēe ni íyo uū sēhe yí de.

¹² Te tēe suchí gá ni cahān i jíin tátá i: Tátá, tahú sáva ní ndajniñu ní, te cuāha ní sava cuu tahū ná, achí i. Te ni tahú sáva de tahū ndindúu i.

¹³ Te ni cuu jecu-ni quiñi, te tēe suchí gá un ní stutú ndihī i ndajniñu i. Te ni quenda i cuahān i ñn ñuu jicá. Te yūcuan ní snāa i tahū i, chi ni jexīn cāhá i.

¹⁴ Te ná ni ndihī ni jexīn i, te ni quee ñn jnamā xeén ini ñuu ún, te ni quejéé cúmanī jeē caji i.

¹⁵ Yūcuán na te cuanducú jniñu i nuū ñn tēe ñuu ún. Te ni tají de i cuahān i rancho de jeē cóto i quiñi de.

¹⁶ Te cúni i caji i vēsú soō ndúchi jeē cáyeji quiñi ún, návāha ndutú chíji i. Te ni ñn ñayuu tú na vé jéhe nuū i.

¹⁷ Yūcuán na te ni quejéé i nácani ni i: Tāca mozo casājniñu vehe tátá rī, íyó cuéhē staā cáyeji i. Te ruhū chi jíi rī sōco yāhá.

¹⁸ Na quiñuhun rī nuū tátá rī, te cahān rī jíin de: Tátá, ni sáha ná cuēchi nuū Yaā Dios jíin núu maá ní.

¹⁹ Vijna te nasūu gá tēe vāha cúu ná jēe cónaní ná sēhe ní. Te cuāha ní jnūhun cuu ná nájnūhun ñn mozo ni, achi rī.

²⁰ Yūcuán na te ni naquihin i ichi cuanuhun i vehe tátá i.

Te níni jicá gá vēji i, te ni jito tátá i nuū i, te ni cundáhú ni de i. Te jínu de cuajnahān de i, te ni nundee de sucūn i, te ni techūhú de i.

²¹ Yūcuán na te ni cahān i jíin de: Tátá, ni sáha ná cuēchi nuū Yaā Dios jíin núu maá ní. Vijna te nasūu gá tēe vāha cúu ná jēe cónaní ná sēhe ní. Achí i.

²² Te máá tátá i chi sa ni cahān de jíin táca mozo de: Cuáquihin sahma vāha ga te chuhun ró i. Te chuhun ró ñn xehyu ndaha i, te chihī ró ndijēn jēhē i.

²³ Te quiquihin ró becerro xéhen, te cahni rō tī na cáji yō, chí sáha yó vico.

²⁴ Chí sēhe yí rí yáha, nájnūhun je ni jihī i, te ni natecu i. Chí tu ní jíní rī ndé chí ní jéhēn i, te ni ndee i, áchí de. Te ni caquejé de cásáha de vico.

²⁵ 'Te sūchi jévāha, íne i nde rancho, te vëndiji i, te ni cuyajni i yatā véhe. Te ni jini i jeē cúu yaa te cájita jéhé ñáyuu.

²⁶ Te ni cana i ñn mozo, te ni cajnūhún i na vé cúu jeē cúu.

²⁷ Te ni cachi mozo un núu i: Ni ndee ñani rō, te tátá rō ni jehni de becerro xéhen, chí ni ndee vāha i nuū de, áchí mozo.

²⁸ Yūcuán na te ni quitī ni sūchi jévāha, te tu ní cúní i ndívi i. Te ni quenda tátá i, te ni cahān ndahú de jín i jeē na ndívi i.

²⁹ Te ni cahān i jín tátá i: Níní sáha ná jniñu ndácu ní, te tu cúnīhni cuiti ni na núu ní. Te tu jéhe ní vēsú ñn lítú núu ná, jeē sáha ná vico caji na jín táca amigo na.

³⁰ Te ni ndee sēhe ní yáha jeē ni jéxīn cāhá i xūhun ní jín táca ñahan. Te ni jehni ní becerro xéhen caji i, áchí i jín tátá i.

³¹ Yūcuán na te ni cahān de jín i: Séhé, róhó chí níní ndéé ró jín rí, te ndíhi jeē névāha ri chí suni cuenta maá ró cúu.

³² Te vijna chí íyó vāha jeē sáha yó vico te cusī ni yō. Chí ñani rō yāhá, nájnūhun ni jihī i, te ni natecu i. Chí tu ní jíní yō ndé chí ní jéhēn i, te ni ndee i, áchí de. Achí yá.

Jnūhun yátá síquē mozo jeē ni stáhú de patrón de

16

¹ Te suni ni cahān Jesús jín téé cáscuáha jín yá:

Ñn téé cúca ní ñyo ñn mozo de jeē ndíso jniñu nuū tāca gá mozo. Te ni cacahān jín patrón un jéē mozo un snāā cāhá ndajniñu de.

² Te ni cana de mozo un, te ni cahān de jín: ¿Na jnūhun cúu yāha jéē nihín rī síquē rō? Nacuāha cuenta jniñu ndíso ró, chí ma cóndiso jniñu ga rō nuū mozo rī. Achí de.

³ Yūcuán na te jéni ni maá de: ¿Ndese sáha ri vijna? Chí patrón rī quenehen de jniñu ri. Te tú ndacuī rī jeē cáte ri ñuhun, te jeē cacán rī caridad chí cúcanu rī.

⁴ Núu súcuan te jíní rī ñn jeē sáha ri, návāha ñáyuu cájeen nuū patrón rī, cuāha

i vehe condee rī núu na quée quiivī jeē quénehen de jniñu ri.

⁵ Te ni cana de ná ñn ná ñn téé jeē cátaū nuū patrón de. Te ni cajnūhún de ñn: ¿Nasaa táu rō nuū patrón rī?

⁶ Te ni cahān téé ún: ñn ciento barril aceite, achí de. Te ni cahān mozo un: Yāhá na cuāha ri lista rō, te cucōo yachī rō, te na sáha ró ñnga lista jeē uú xico uxī na, achí de.

⁷ Yūcuán na te ni cajnūhún de ñnga téé: Te róhó, ¿nasaa táu rō? Te téé un ní cahān de: ñn ciento cajón trigo, achí de. Te ni cahān de jín téé ún: Yāhá na cuāha ri lista rō, te na sáha ró ñnga lista jeē cuún xico na, áchí de.

⁸ Yūcuán na te patrón ni cahān de: Nacā jeē ndichí ní sáha téé cúnéé un, áchí de. Te cáhán rī jín ró jeē ñáyuu ñayīvi yáha, ndichí gá casáha i jeē quendōo vāha i nuū jnāhan i, vēsú ñáyuu cá candíje nuū Yaā Dios.

⁹ 'Núu súcuan te cáhán rī jín ró jeē ndichí gá na sáha ró vēsú jeē ni sáha mozo ndichí un. Chí ini ñayīvi yáha nuū yíhi cuēchi, na sáha ró jniñu vāha jín xūhun ró, cuāha ró núu ñáyuu ndahú, návāha vēsú núu ni ndíhi xūhun ró ñayīvi yáha, te quiivīcoo ró andiví núu coo vehe ró ní cáni.

¹⁰ 'Téé jeē squícu vāha jín ñn jniñu lúli-ni, suni squícu vāha de jín jniñu cáhnu. Te téé jeē stáhú jín ñn jniñu lúli-ni, suni stáhú de jín jniñu cáhnu.

¹¹ Núu súcuan te núu tu squícu vāha ró jín xūhun jeē iyó ñayīvi yáha nuū yíhi cuēchi, te ma cuāha ya jeē vāha cuu ró ní cáni andiví.

¹² Te núu tu squícu vāha ró jín ndajniñu jeē ni jéhe núu ya nuū rō ñayīvi yáha, te ma cuāha ya tahū cuu ró ní cáni.

¹³ 'Ni ñn mozo ma cúu cuajniñu de nuū uū patrón. Chí quitī ni de nuū ñn te coo manī de jín ñnga, chí squícu vāha de nuū ñn te sájéé ni de nuū ñnga. Te suni súcuan ma cúu cuajniñu ró núu Yaā Dios te núu máni síquē xūhun ndíhvī ni rō, achí yá.

¹⁴ Te téé fariseo ni casacatā de nuū yā jeē ní cajini de tāca jnūhun cáhán yā, chí téé cútóó xūhun cácuu de.

¹⁵ Te ni cahān yā jín de:

Máá ró cásáha ró jéé téé ndaā cácuu ró núu ñáyuu. Te Yaā Dios chí jíní yā ndese cáa ini anuá rō. Chí jniñu cájeni ni ñáyuu jeē jniñu jéhnu cúu, te nuū Yaā Dios chí jniñu néé cúu.

Siquē ley Yaā Dios jín sīquē jeē ndácu ya jniñu

16 'Nde ná tu quiiji Juan tēe scuándute, te ni iyo ley jeē ni jéhe Yaā Dios nuū Moisés, te suni ni castéén tāca tēe cánacani jnūhun ya. Yūcuán na te ná ni quiiji Juan, te ni quejéé jítē núu jnūhun vāha ndese ndácu Yaā Dios jniñu. Te tāca ñáyuu nducú ndéyí i quívicoo i ndaha ya.

17 'Te yí gá cúu jeē náā ñn letra nuū tútu ley yā vēsú jeē náā andiví jín ñáyiví, chi squícu ndihí jnūhun cáhán.

Siquē jeē ma stóo jnáhan tēe jín ñahan (Mt. 19.1-12; Mr. 10.1-12)

18 'Núu ñn tēe stóo de ñasihí de te qui-jnáhan de jín inga ñahan, núu súcuan te cásiquí ndéē de ña. Te núu ñn tēe condeca de ñahan ní ndusñn, suni cásiquí ndéē de ña, áchí yá.

Jnūhun tēe cúcá jín Lázaro

19 Te ni cahān gā yā:

Ni iyo ñn tēe cúcá, ní ñn hun de sahma lúu váha ndasí. Te ndiquiví ni iyo vāha ndasí jéé ní yeji de.

20 Te suni ni iyo ñn tēe ndáhú, nání de Lázaro, néne de yéhyí tēe cúcá un, te ní cáhnu de ñn ndihyí.

21 Te máni cúní de jeē ndutú chíji de jín stáā cuēchi jeē stíví tēe cúcá un. Te quécoo ina te cánayuu ti nuū ndihyí de.

22 Te ni jihí tēe ndáhú un, te tācá ndajéhé Yaā Dios cuangoos ya jín ánuá de nde andiví nuū néne Abraham. Te suni ni jihí tēe cúcá un, te ni quindūji de.

23 Te tēe cúcá un xeēn ndóho de íne de lugar nuū cáyūcu ndíyí tu ní cándíje. Te ni ndacoto de, te nde jicá ní jito de nuū Abraham, te néne Lázaro jín de.

24 Yūcuán na te ni cana cóhó de: Tātā Abraham, cundáhú ni ní sáña, te tají ní Lázaro, na quíchundaji de xiní ndáha de nuū ndúte, te quiiji de stáji de yáá ná. Chi xeēn ndóho ná núu yáñuhūn yāhá. Achí de.

25 Te ni cahān Abraham jín de: Séhē, nucūhun ni rō jeē ni níhīn rō ndihí jeē váha ná ni cotecu rō, te Lázaro chi sa suhva jnūndóho ni nihīn de. Te vijna je ni ndusñ ni de yāhá, te róhó chi ndóho ró jínā.

26 Te suni íyó ñn jeē cunú téyí, íne mēhñu yó jijnáhan yó. Te ñayuu cáhīn yāhá, vēsú

cácuni i yāha i jeē i nuū rō, te ma cúu. Te ni ma cúu yāha máá ró quijicoo ró yāha. Achí Abraham.

27 Yūcuán na te ni cahān tēe cúcá: Núu súcuan te cáhán ndahú ná jín ní, Tātā Abraham, tají ní Lázaro na quíhīn de vehe tātā na.

28 Chi íyó úhūn gā ñani ná, te na quícachi de nuū i jeē na nácani ni i te stóo i cuēchi i, návāha ma quívicoo i nuū ndóho ná yāha, áchí de.

29 Te ni cahān Abraham jín de: Je cánevāha i tutu jeē ní tee Moisés jín táca tēe ni canacani jnūhun Yaā Dios. Suu yūcuán na chúhun ni i, áchí Abraham.

30 Te ni cahān tucu tēe cúcá: Vēsú súcuan, Tātā Abraham, te núu ñn ñayuu ni jihí quihīn nuū i, yūcuán na te nacani ni i jeē stóo i cuēchi i, áchí de.

31 Te ni cahān Abraham jín de: Núu tu chúhun ni i jnūhun ni nacani Moisés jín táca tēe ni canacani jnūhun Yaā Dios, suni ma candíje cuiñi i núu natecu ñn ndíyí quihīn nuū i, áchí de.

Xeēn coo sīquē ñáyuu squíví jnáhan nuū cuéchi (Mt. 18.6-7, 21-22; Mr. 9.42)

17

1 Te ni cahān Jesús jín tēe cáscuáha jín yá: Máni íyó jéé nducú squíví ñayuu nuū cuéchi. Te nacā xeēn ndóho ñayuu jeē squíví jnáhan nuū cuéchi.

2 Vāha ga núu ni conuhnī ñn yōso cáhnu sucūn i te quēe i chíji ndute mar, vēsú jeē squíví i ñn sūchi lúlí yāha núu cuéchi.

3 Coto ma sáha ró súcuan jijnáhan ró.

'Te núu jnáhan ró sáha de cuēchi sīquē rō, te cahān rō nuū de. Te núu nacani ni de, te cone cáhnu ni rō nuū de.

4 Te núu uxā jínu jeē ñn quiví sáha de cuēchi sīquē rō, te núu uxā jínu nácani ni de te cahān de jín ró jeē cone cáhnu ni rō chi ma sáha ga de, te cánuú cone cáhnu ni rō nuū de. Achí yá.

Jeē yóhyo cújéhnu jnūhun cándíje

5 Te tēe cácuu apóstol ni cacahān de jín Jítóho yō:

Sáha ní jéé níhin ga candíje ná jéé sáha Yaā Dios jeē cájicān na núu yā, achí de.

6 Te ni cahān máá Jítóho yō jín de:

Núu cá candíje ró vésú ñn tíhlí-ni, nájnūhun ñn ndiquin mostaza jeē tíhlí-ni cáa, te cuu cahān rō jeē nūyūhndu yāha na quēnda te nucondichi nde nuū mar, te coo nájnūhun cahān rō.

Jeē cánuú squícu vāha yó núu yā

⁷ Ndé ñn ró íyó mozo rō jeē jítu de chí ndíto de quití ndéca ró, te núu ni najinū de vehe ró, te tu cáhān rō jíin de jeē cúcōo de caji de staā.

⁸ Chi sa suhva cáhān rō: Sáha ró ndeyu cuxíni ri, te caní ró cóhō rī. Te núu ni cuu ni yeji rī ni jihí ri, yūcuán na te caji maá ró coho ró, cácahān rō.

⁹ Te cácahān rō jeē tu cánuú nacuatáhú ró nuū mozo núu ni sáha de jniñu ní ndacu ró, chí jeē cánuú sáha de cúu.

¹⁰ Te suni súcuan máá ró jijnáhan ró, cácuu ró mozo Yāa Dios. Te núu ni casquícu ró táca jniñu ní ndacu ya nuū rō, te cahān rō: Tu cánuú nacuatáhú yá nuū rī, chí ni sáha ri máá-ni jeē cánuú sáha ri, achi rō. Achí yá.

Jeē ní nasávāha ya uxī tēe ndóho cuehyī stehyú

¹¹ Te jíca Jesús ichi cuahān yā ñuu Jerusalén, te ni yāha ya cuahān yā mēhñū región Samaria jíin Galilea.

¹² Te ni jinū yā ñn ñuu, te uxī tēe ndóho cuehyī stehyú ni quendacoo de vejnahan de ya, te jíca ní cajecuiñí de.

¹³ Te ni cacana jee de:

Jesús, Maestro, cundáhú ni ni sáña, achí de jíjnáhan de.

¹⁴ Te ni jito Jesús nuū de, te ni cahān yā jíin de:

Cuángoo te stéén rō maá ró nuū táca sútū jeē ní canduvāha ró, achí yá.

Te níni cuángoo de te ni canduvāha-ni de.

¹⁵ Yūcuán na te ñn-ni de ni nandió cóo de nuū Jesús, te cáhān jee de, nácuatáhú de nuū Yāa Dios jeē ní nduvāha de.

¹⁶ Te ni jecuiñí yití de nuū yā, te ni jequin de nuū de nde nuū ñūhun, te ni nacuatáhú de nuū yā. Te tēe Samaria cúu de.

¹⁷ Te ni cahān Jesús:

¿A násūú ndihúxí de ni canduvāha? Te ñn gā de, ¿naun tu ní cánandicó de nacuatáhú de?

¹⁸ ¿A máñuhún-ni tēe ñuu jíca yāha cúu jeē ní nandicó de nácuatáhú de nuū Yāa Dios?

¹⁹ Te ni cahān yā jíin tēe ún:

Ndocuiñí quinuuhun rō. Chí ni candíje ró jeē cuu nasávāha ri rohó, te jeē yúcuán ní nduvāha ró, achí yá.

Ndese coo quiví jeē ndíji ya ndacu ya jniñu (Mt. 24.23-28, 36-41)

²⁰ Te tēe fariseo ni cacajnūhún de Jesús ndé quiví quejéé jeē ndácu Yāa Dios jniñu ini ñayiví. Te ni cahān yā jíin de:

Ma quéē ndijin jeē ndácu Yāa Dios jniñu.

²¹ Ni ma cúu cahān ñayuu: Yāha íne ya ndácu ya jniñu, chí: Yūcuán íne ya, achi i. Chí je ndácu Yāa Dios jniñu mēhñu ró jíjnáhan ró. Achí yá.

²² Yūcuán na te ni cahān yā jíin tēe cáscuáha jíin yá:

Quee tiempo jeē yóhoyo cúu ni rō coto ró jeē ndíji ruhū, Yāa ní nduu tēe, te ma cóto ró jíjnáhan ró.

²³ Te cahān ñayuu jíin ró: Yāha íne ya, chí: Yūcuán íne ya, achi i. Te ma quíngoo ró condēhe ró, ni ma cóndiquin rō i.

²⁴ Chí nájnūhun sáha taja jeē ndíndéé ñn lado andiví te cóndijin nde inga lado, suni súcuan cuu quiví ndíji ruhū, Yāa ní nduu tēe, chí ndihí ñayuu coto.

²⁵ Te jíni ñúhún jéé xíhna gā ndoho xeēn rī, te ñayuu iyó vijna, squéhichí i ruhū.

²⁶ Chí nájnūhun ni cuu quiví ni íyo Noé, suni súcuan cuu quiví ndíji ruhū, Yāa ní nduu tēe.

²⁷ Chí quiví un ní cayeji i, ni cajihí i, ni canandāha i, ni cajēhe i sēhe síhí i jeē nándāha, nde ni jinū quiví jeē ni quiví Noé ini barco cáhnu jeē naní arca. Te ni cuun saū xeēn, te ni ndaa ndute ni cajihí ndihí i.

²⁸ Te suni súcuan ni cuu quiví ni íyo Lot. Ni cayeji i, ni cajihí i, ni cajeen i, ni caxícó i, ni cataji i ítu, ni cajeni i vehe.

²⁹ Te quiví jeē ní quenda Lot ini ñuu Sodoma cuahān de, te ni cuun ñuhūn jíin azufre ichi ándiví, te ni snáa ndihí ñayuu.

³⁰ Te suni súcuan coo quiví jeē ndíji ruhū, Yāa ní nduu tēe.

³¹ Te quiví ún te ñayuu cáhīn yatā véhe, te ndajniñu i ñūhun ini vehe, cáhān rī jíin i jeē ma ndívi i naquihin i, chí cánuú cunu yachí i jeē cácu i. Te suni súcuan ñayuu casájniñu nuū ítu, ma quínuhun i vehe i jeē quíhin i ndajniñu i.

³² Te nucūhun ni rō ndese ni ndoho ñasihí Lot jeē ni jīhī ña.

³³ Te núu ndé ñáyuu cuní i cācu i nuū jnūndóho quiji nuū i jeē siquí ruhū, núu súcuan te jnahnū ndetū i ñí cáni. Te núu ndé ñáyuu, vēsú na cúu i jeē siquí ruhū, te cotecu i ñí cáni.

³⁴ Te cáhán rī jīn ró jeē quiṽi ndíji ri te quíxí uū tēe ñn jīto jecuáa, te ñn de naquihin ri, te inga de ndōo, chi tu ní cándíje de.

³⁵ Te coo uū ñahan jeē ndíco cáhnu, te ñn ña naquihin ri, te inga ña ndōo.

³⁶ Te uū tēe sájniñu de nuū ítu, te ñn de naquihin ri, te inga de ndōo. Achí yá.

³⁷ Te jeē ní cajini de jnūhun yáha, te ni cacajnūhún de ya:

¿Ndé mí coo súcuan nájnūhun ni cahān ní? Achí de.

Te ni cahān yā jīn de:

Nájñūhun jeē cutútú téji ndé-ni cúu nuū catú quiṽi ní jīhī, suni súcuan coo tāca jéē ni cahān rī ndé-ni cúu-ni nuū cáhīyo ñayuu.

Jnūhun yátá síquī juez jīn ñahan viuda

18

¹ Te ni cahān yā ñn jnūhun yátá jīn de jeē cánuú jeē niní cácan tahú de, te ma ndínuu ni de jīn.

² Te ni cahān yā:

Ni iyo ñn juez ini ñn ñuu. Te ni tu ndíso iyo de nuū Yaā Dios, ni tu yúhú de nuū ní ñn ñayuu.

³ Te suni ñuu un íyó ñn ñahan ní ndóo ndáhú. Te ñahan un jéhén-ni jéhén-ni ña nuū de, jícán ña jeē na sándaā de síquī ñn ñayuu jeē jīto uhū i ña.

⁴ Te cuehē quiṽi tu ní cúní de sándaā de, te yūcuán na te ni jeni ni de: Vēsú tu ndíso iyo ri nuū Yaā Dios, ni tu yúhú rí nuū ní ñn ñayuu,

⁵ te ñahan viuda yáha, yōhyo stáhān ña ruhū, te jeē yúcuan na sándaā rī síquī ñáyuu jeē jīto uhū i ña. Chi núu tuú, te quejéé rí jnaníní ni rī jeē quíji quíji ña. Achí de. Achí máá Jítoho yō.

⁶ Te ni cahān gā yā:

Súcuan cúu jeē ni cahān juez, tēe tú ndaā.

⁷ Te Yaā Dios, nasūu súcuan cúu ya, chi sándaā yā síquī jníñu ñayuu ní nacāji ya jeē nduú ñuú cácahān ndahú i jīn yá. Chi

jnama ya i nuū tāca jéē cájito uhū i. ¿Te á cuéé jnama ya i?

⁸ Cáhán rī jīn ró jeē yachī. Te quiṽi ndíji ruhū, Yaā ní nduu tēe, ¿á níñn gā rī ñayuu cácañdíje níñn ini ñayṽi? Achí yá.

Jnūhun yátá síquī tēe fariseo jīn tēe stútú xūhun renta

⁹ Te suni ni cahān yā jnūhun yátá yáha jīn jecu ñayuu jeē cájeni ni i jeē ñáyuu ndaā cácuu i, te cájeni ni i jeē sava ga ñayuu tu cáhīyo ndaā:

¹⁰ ñn tēe fariseo cuahān de templo jeē cacān tahú de. Te ñn tēe stútú xūhun renta suni cuacacān tahú de templo.

¹¹ Te tēe fariseo, índichi de, te súcuan ni jicān tahú de: Tātā Yaā Dios, na cútahū na núu ní, chi tu cúu ná nájnūhun cándāa sava ga tēe, tēe cuíhná, tēe néé, tēe cásiquí ndéē jnáhan cácuu de. Ni tu cúu ná nájnūhun cáa tēe yúcuan jéē stútú xūhun renta jeē scāa ga de jícán de nuū ñáyuu.

¹² Te uū jīnu jeē semana iyó ndite ni na núu ní, te jéhe ná nuū ní ñn ñn síquī tāca úxī ndajniñu níñn na, achí de.

¹³ Te tēe stútú xūhun renta, ni jecuiñi jicá de nuū templo, ni tu ní chūndeyí ni de jeē ndonehen de nuū de, chi sa suhva ni caní de yīqui jicá de jeē cucuíhyá ni de. Te ni cahān de: Tātā Yaā Dios, cundáhú ni ní sáña, chi tēe íyó cuéchi cúu ná, achí de.

¹⁴ Te cáhán rī jīn ró jeē tēe stútú xūhun renta, ni jetáhú Yaā Dios de, te cuanuhun de vehe de. Te tēe fariseo chi tu ní jétáhú yá de. Chi ñayuu jeē sajhēnu i máá i, sa ndululí i. Te ñayuu jeē sálulí i máá i, sa ndujēnu i. Achí yá.

Jeē ni jicān tahú Jesús jehē sūchi lúlí (Mt. 19.13-15; Mr. 10.13-16)

¹⁵ Te ni quecoo ñayuu jīn sūchi lúlí núu Jesús, jeē na sóo yá ndaha ya xiní i. Te tēe cáscuáha un ní cajini de jeē súcuan cúu, te ni cacahān de nuū ñáyuu vējicoo jīn i.

¹⁶ Te máá Jesús ni cana ya de, te ni cahān yā:

Cuāha jnūhun na quíjicoo sūchi lúlí jíñā nuū rī, te ma cási rō jeē quíjicoo i. Chi ñayuu jeē ndió cóo ni i caní ni i nájnūhun sūchi yáha, suu i quiṽi ndaha Yaā Dios jeē ndacu ya jniñu nuū i.

17 Te jendaá cahán rī jíin ró, núu ñn ñayuu tú cuatáhú i jeē ndácu Yaā Dios jniñu nuū i, nájñuhun jétáhú ñn sūchi lúlí, ma quívi cuiti i ndaha ya, achí yá.

Jñuhun tēe cúcá

(Mt. 19.16-30; Mr. 10.17-31)

18 Te ñn tēe cújéñnu ni cajñuhún de ya:

Tēe vāha cúu ní Maestro. ¿Te na jniñu vāha sáha ná te nihín tahu na cotecu na ní cáni andiví? Achí de.

19 Te ni cahān Jesús jíin de:

¿Naun cáhán rō jeē tēe vāha cúu ri? Tú ni ñn tēe vāha íyó, chí máá ñn-ni Yaā Dios.

20 Je jíin rō táca jniñu ní ndacu Yaā Dios: Ma cosíquí ndēe jñáhan rō. Ma cáhni rō ndíyi. Ma sacuíhná rō. Ma sajnúhún rō. Cuatáhú ró nuū tatá rō nuū naná rō. Achí yá.

21 Te ni cahān maá de:

Táca jniñu yáha je ni squícu ná ndé ná lulí ná, achí de.

22 Te Jesús ni jini ya jñuhun yáha, te ni cahān yā jíin de:

Ñn na jniñu cúmanī sáha ró núu súcuan. Xícó ndíhi jeē névāha ró, te cuāha ró núu ñáyuu ndahú. Te nde andiví cuāha ya jeē vāha ndasí núu rō. Yūcuán na te quiji ró condiquín rō ruhū, achí yá.

23 Te ná ni jini sōho de jñuhun yáha, te yōhyo ni cucuíhyá ni de, chí cúcá ndasí de.

24 Te jíto Jesús jeē súcuan cucuíhyá ni de, te ni cahān yā:

Tēe cúcá chí yōhyo yí quívicoo de ndaha Yaā Dios jeē ndacu ya jniñu nuū de.

25 Yachī gā yāha ñn camello yaū yutícuí vésú jeē quívi ñn ñayuu cucá ndaha Yaā Dios jeē ndacu ya jniñu nuū i, achí yá.

26 Te tēe ní cajini jñuhun yáha, ní cacahān de:

¿Ndé ñáyuu cúu jeē cácu núu súcuan? Achí de.

27 Te ni cahān yā jíin de:

Ñayuu chí ma cúu squívi i máá i ndaha Yaā Dios, te máá yá chí cuu sáha ya, achí yá.

28 Yūcuán na te ni cahān Pedro:

Sāña jíjñáhan ná ní castóo ná ndíhi jeē cánevāha ná, te cándiquín na níhín, achí de.

29 Te máá yá ni cahān yā jíin de:

Jendaá cahán rī jíin ró jíjñáhan ró, núu na-ni ñayuu stóo i vehe, chí tátá, chí ñani, chí

ñasihí, chí séhe, jeē siquí jeē scáca i jñuhun jeē ndácu Yaā Dios jniñu nuū ñáyuu,

30 núu súcuan te nanihín cuehē gā i ini ñayívi yáha, te tiempo quiji te cotecu i ní cáni, achí yá.

Jeē ni cahān tucu ya jeē cúu yā

(Mt. 20.17-19; Mr. 10.32-34)

31 Te ni cana sñn ya ndihúxí uū tēe cáscuáha jíin yá, te ni cahān yā jíin de:

Vijna je cuángoo yó ñuu Jerusalén. Te yūcuan squícu ndíhi jñuhun ndese ndoho ruhū, Yaā ní nduu tēe, nájñuhun ni catee tēe ni canacani jñuhun Yaā Dios nde jenahán.

32 Chí ñayuu nastúu i ruhū nuū tēe nación Roma jeē cáyūcú Jerusalén cándacu jniñu. Te tēe un sácata de nuū rī, te cahān neé de nuū rī, te tesíhí de nuū rī.

33 Te caní de ruhū, te sáa te cahni de ruhū. Te nuū uní quívi te natecu rī. Achí yá.

34 Te máá de tu ní cájecūhun cuiti ni de táca jñuhun yáha. Chí jñuhun yí cúu, te tu ní cúu jecūhun ni de jeē cahān yā.

Jeē ní nasávāha ya ñn tēe cuáá ñuu Jericó

(Mt. 20.29-34; Mr. 10.46-52)

35 Te ni cuyajni ya cuahān yā ñuu Jericó. Te ñn tēe cuáá néne de yuhíchi, jícan de caridad.

36 Te ni jini sōho de jeē yáha cuehē ñayuu cuangoo i, te ni cajñuhún de naun cuángoo i.

37 Te ni cacahān i jíin de jeē Jesús, tēe ñuu Nazaret, yáha ya cuahān yā.

38 Yūcuán na te ni cana jee de:

Jesús Sēhe yucūn David, cundáhú ni ni sáña, achí de.

39 Te ñayuu cuangoo ichi núu yā, ni cacahān i nuū de jeē na cási de yuhu de. Te máá de víhyá gā ni cana jee de:

Máá ní jeē cúu ní Séhe yucūn David, cundáhú ni ni sáña víi, achí de.

40 Yūcuán na te ni jecuíñi Jesús, te ni cahān yā jeē na quíndeca i de. Te nuū ní cuyajni de nuū yā, te ni cajñuhun yá de:

41 ¿Na vé cuní rō jeē sáha ri jíin ró? achí yá.

Te ni cahān de:

Jeē na ndúndijin tññu ná cuní na, achí de.

42 Te ni cahān Jesús jíin de:

Ndundijin tinūu ró núu súcuan. Ni candíje ró jeē cuu nasávāha ri rohó, te jeē yúcuan ní nduvāha ró, áchí yá.

⁴³ Te ni ndundijin-ni tinūú de, te ni ndiquin de ya, te nácuatáhu de nuū Yaā Dios. Te ndihi ñayuu jeē ní cajito i, suni ni cacahān i jeē yóhyo vāha Yaā cúu Yaā Dios.

Jnūhun Zaqueo

19

¹ Te ni quiví Jesús ini ñuu Jericó, te ni yāha-ni ya cuahān yā.

² Te yúcuan íyó in tēe cúca nání de Zaqueo, te cújéhn de nuū tée cástútú xūhun renta.

³ Te cúní de coto de návāha cuni de ndé in cúu Jesús. Te tu ní cúu, chi cuehē ñayuu cuango i jín yá, te ndiqui-ni cáa de.

⁴ Te jínu de ni cosnūú de. Te ni caa de xiní in nuyūhdú návāha coto de nuū yā, chi yúcuan yāha ya quihīn yā.

⁵ Te ni jinū yā yūcuán, te ni ndacoto ndaa ya nuū de. Te ni cahān yā:

Zaqueo, yachī nuu ró, chi jini ñúhún jéē ndóo ri vehe ró vijna, áchí yá.

⁶ Yūcuán na te ni cusī ni de, te yachī ni nanuu de, te ni jeca de ya cuahān de jín yá vehe de.

⁷ Te ni cajito ñayuu jeē súcuan ni cuu, te ni cacahān i siquī yā jeē cuahán yā ndōo ya vehe in tēe sáha cuēchi.

⁸ Yūcuán na te ni ndocuīñ Zaqueo, te ni cahān de jín máá Jítoho yō:

Vijna te sava ndihi ndajniñu ná chi cuāha ná nuū ñayuu ndahú. Te núu ni scáa ga na ní jicān na xūhun nuū ñayuu, te nacuāha ná únī gā siquī naquihin i, áchí de.

⁹ Te ni cahān Jesús:

Vijna te vehe yāha je ni cācu in tēe jeē ma jnahnú ndetū de, chi ni candíje de nájnūhun ni candíje jí de Abraham.

¹⁰ Chi ruhū, Yaā ní nduu tēe, ni quiji ri nducú rí ñayuu jeē jnahnú ndetū, te jnama ri i, áchí yá.

Jnūhun yátá siquī uxī mozo jín xūhun

¹¹ Te nuū ñayuu ní cajini tāca jnūhun yāha, ní cahān gā Jesús in jnūhun yátá jéē steén yā ndese coo quiví ndíji ya. Chi je ni cuyajni ya ñuu Jerusalén, te cájeni ni i jeē vijna ñúhún quejéé jéē ndácu ya jniñu sáha Yaā Dios.

¹² Te ni cahān yā:

In tēe cújéhn de cuahān jicá de inga nación, návāha nihīn jniñu de cuu de rey, te ndíji de ndacu de jniñu.

¹³ Te nde ná tu quihīn de, te ni cana de uxī mozo de, te nuū in in i ni jéhe de in xūhun jéē ndeé yahu ndasí. Te ni cahān de jín i: Sájniñu ró jéē na ndúcuehē xūhun yāha jínáhan ró níni jéē quihín rī te ndee rī, achí de.

¹⁴ Te ñayuu nación de cáquitī ni i nuū de, te ni catají i jecu tēe cándiso jniñu cuango yatā de jeē cahān: Tu cánujnahan ni ñayuu nación na jéē cuáha ní jniñu nuū tée yāha jéē cuu de rey nuū i, áchí.

¹⁵ Te vésú súcuan te ni nihīn jniñu de cuu de rey, te vendíji de nación de. Te nuū ní ndee de, te ni ndacu de jniñu jeē na quíjicoo mozo jeē ni jéhe de xūhun núu, návāha na cúní de nasaa ni canihīn in in i siquī.

¹⁶ Te ni quee in mozo un núu de, te ni cahān i: In xūhun jéē ni jéhe ní núu ná, ni nduu uxī, achí i.

¹⁷ Te ni cahān maá rey: Vāha mozo cúu ró, te vāha ni sáha ró. Chi ni squícu vāha ró jín in jniñu lúlí-ni, te vijna te sáha ri jeē cújéhn ró ndacu ró jniñu nuū uxí ñuu jniñi ri, achí de.

¹⁸ Te ni quee inga mozo, te ni cahān i: In xūhun jéē ni jéhe ní núu ná, ni nduu uhūn, achí i.

¹⁹ Te suni ni cahān de jín mozo un: Róhó, cújéhn ró ndacu ró jniñu nuū uhún ñuu jniñi ri, achí de.

²⁰ Te ni quee inga mozo, ni cahān i: Yāha nācuāha ná xūhun ní, chi ni chuvāha ná ini in pañuelo.

²¹ Chi ni yūhu ná nihín, chi tēe xeēn cúu ní. Chi cuehē gā nándacān ní vésú jeē ni jéhe ní, te cuehē gā cúní ni vésú jeē cúu sáha mozo ni, áchí de.

²² Yūcuán na te ni cahān rey: Mozo neé cúu ró núu súcuan, te jín jnūhun ni cahān rō te sándaā rī jeē iyó cuéchi ró jéē tu ní sájniñu ró jín xūhun rí. Chi jeni ni rō jeē tée xeēn cúu ri, te cuehē gā nándacān rī vésú jeē ni jéhe ri, te cuehē gā cúní rī vésú jeē cúu sáha mozo rī.

²³ Núu súcuan ¿te naun tu ní chúne ró xūhun rí vésú nuū banco? Te jeē ní ndee rī te naquihin ri xūhun rí nde jín séhe xūhun

núú. Achí de.

²⁴ Te ni cahān de jíin ñáyuu cáhīn yūcuán: Quende xūhun jíinā nuū i, te cuāha ró núú mozo jeē névāha uxī, achí de.

²⁵ Te ñayuu un ní cacahān i jíin de: Te ndese, chi je névāha de uxī, achí i.

²⁶ Te ni cahān tucu rey: Cáhán rī jíin ró jeē ñáyuu je névāha, sa quiji ga nuū i, te conevāha cuehē i. Te ñayuu jeē tu névāha, sa cujiyo-ni vēsú jecu jeē névāha i.

²⁷ Te tēe jeē cájito uhū ruhū, jeē tu ní cánujnahan ni de jeē cuu ri rey nuū de, cuáquihin de na quíjicoo de yāhá. Te cahni rō de coto ri, achí de. Achí Jesús.

Jeē ni quivī Jesús ñuu Jerusalén

(Mt. 21.1-11; Mr. 11.1-11; Jn. 12.12-19)

²⁸ Te nuū ní ndihī ni cahān yā jnūhun yāha, te ni jica ga yā cuahān yā ñuu Jerusalén.

²⁹ Te nuū ní cuyajni ya ñuu Betfagé jíin ñuu Betania, yajni nuū íne yucu nání yucu Olivos, te ni tají yá uū tēe cáscuáha jíin yá jeē quíngoo de.

³⁰ Te achí yá jíin de:

Cuáhán ñuu lulí íne ichi núú. Te núu ni quivī ró, te nihīn rō ñn burro núhni tī, jeē ní ñn tēe ná tu coso de tī. Te ndají ró tī quiji ró jíin tī.

³¹ Te núu ndé ñn cajnūhún naun cándají ró tī, te cahān rō jíin: Máá Jítoho yō jíni ñūhún yá tī, achí rō. Achí yá.

³² Te cuango tēe ni tají yá, te ni canihīn de tī nájnūhun ni cahān yā jíin de.

³³ Te jeē cándají de tī, te ni cacahān jitoho tī jíin de:

¿Naun cándají ró burro ri? achí.

³⁴ Te ni cacahān de:

Máá Jítoho yō jíni ñūhún yá tī.

³⁵ Te ni ndecoo de jíin tī nuū Jesús. Te ni casoó de sahma de siquī tī, te ni casáha de jeē ní jecosō yā siquī tī.

³⁶ Te ná-ni cuahān yā, sáá cáscáá ñayuu sahma i ini ichi.

³⁷ Te nuū ní cuyajni ya nuū cúun ichi yucu Olivos, te ndihī ñayuu cáncandíje jeē cándiquīn i ya, ni caquejéé i cácusī ni i, te cácana jee i jeē yóhoyo vāha Yaā cúu Yaā Dios siquī táca jniñu jéhnū ni sáha ya ni cajito i.

³⁸ Te achí i:

Yóhoyo vāha Yaā cúu Rey jeē véji jíin jniñu máá Jítoho yō Yaā Dios. Te sáha ya jeē cóo manī yō jíin Yaā Dios andiví. Te yóhoyo cújéhnū Yaā Dios, achí i jíināhan i.

³⁹ Yūcuán na te jecu tēe fariseo cáhīn mēhñu ñáyuu cuehē ún, ní cacahān de jíin yá:

Maestro, cahān ni núu ñáyuu cándiquīn nihín jéé na cási i yuhu i, achí de.

⁴⁰ Te ni cahān Jesús:

Cáhán rī jíin ró jeē núu ñayuu yáha na cási i yuhu i, te tāca yūú chi cana jee, achí yá.

⁴¹ Te nuū ní cuyajni ya Jerusalén, te ni jito ya ñuu ún, te ni ndahyū yā siquī.

⁴² Te ni cahān yā:

Róhó ñáyuu Jerusalén, yóhoyo ni cuu ni rī jeē na jécūhun ni rō jeē cuu ndumanī rō jíin Yaā Dios sáha ri. Te siquī jeē tu cáncandíje ró, te vijna chi ma cúu ga jecūhun ni rō.

⁴³ Chi quee quivī jeē coo jnūndóho, te ñayuu cájito uhū rohó, cuicó ndúu i ñuu rō, te casi cutú i jíin yúú, te tāca lado ndonda i siquī rō.

⁴⁴ Te ndihī vehe scótúú i, te cahni i róhó jíināhan ró. Te ma stóo i ni ñn vehe jeē cóso jnāhan ga yuū. Chi ni quiji ri nde nuū Yaā Dios jeē jnáma ri rohó, te tu ní cáncandíje ró. Achí yá.

Jeē ní quenehen ya ñayuu ini templo

(Mt. 21.12-17; Mr. 11.15-19; Jn. 2.13-22)

⁴⁵ Te ni quivī ya ini templo cáhnu, te ni quejéé yá quenehen ya tāca ñáyuu cájeen quiti te cánaxīco núu ñáyuu jeē socō i.

⁴⁶ Te ni cahān yā jíin i:

Yósó núu tútu iī jeē cahān Yaā Dios: Vehe ri chi vehe nuū cájicān tahú cúu, achí Yaā Dios. Te máá ró jíināhan ró, chi nájnūhun yaū cava ñacuīhna ní canasáha ró, achí yá.

⁴⁷ Te ndiquivī ni steén yā jnūhun ini templo. Te sutū cácujehnū jíin tēe cástéén tutu ley Yaā Dios jíin tēe cácujehnū nuū ñáyuu ñuu ún, cánducú de modo ndese cahni de ya.

⁴⁸ Te tu cánihīn de modo sáha de, chi ndivii ñayuu yóhoyo cájetáhú i cájini nahín i jnūhun cáhán yā.

Siquī jeē ndíso jniñu Jesús

(Mt. 21.23-27; Mr. 11.27-33)

20

¹ Te ñin quivī steén yā jñūhun nuū ñáyuu ini templo, te nácani ya jñūhun jeē jnáma Yaā Dios ñayuu. Te ni quecoo sutū cácujeñhu jíin téé cástéén tutu ley Yaā Dios jíin táca téé jéñhu cándacu jniñu.

² Te ni cacahān de:

Castūhún, ¿ndé ñin nihīn jniñu ró jeē sáha ró jniñu yáha? ¿Te ndé ñin ni tee jniñu siquī rō jeē sáha ró súcuan? Achí de.

³ Te ni cahān Jesús jíin de:

Suni ruhū cajñūhun rí rohó ñin jñūhun jíjnáhan ró. Castūhun núū rī:

⁴ ¿Ndé ñin ni tee jniñu siquī Juan jeē ni scuándute de? ¿A Yaā Dios chí táca téé? Achí yá.

⁵ Yūcuán na te ni candajñūhun máá de:

¿Ndese cahān yō? Núu cahān yō jeē Yaā Dios ni tee ya jniñu un siquī Juan, te cahān de jíin yó: ¿Najehē tu ní cá candíje ró de núu súcuan?

⁶ Te núu cahān yō jeē ñáyuu ni catee jniñu un siquī de, te ndivī ñáyuu cahni i yóhó jíin yúū, chí cá candíje i jeē téé ni nacani jñūhun Yaā Dios ni cuu ndije Juan, achí de cacahān maá de.

⁷ Te ni cacahān de jeē tu cájini de ndé ñin ni tee jniñu siquī Juan jeē ni scuándute de.

⁸ Yūcuán na te ni cahān Jesús:

Ni ruhū, suni ma cáchi rī nuū rō ndé ñin ni tee jniñu siquī rī sáha rí jniñu yáha, achí yá.

Jñūhun yátá siquī téé néé cá sájniñu nuū uva

(Mt. 21.33-44; Mr. 12.1-11)

⁹ Te ni quejéé Jesús cahān yā jñūhun yátá yáha jíin ñáyuu ún:

Ñin téé ni nachuhun de cuehē uva nuū ñūhun de. Te ni stóo de nuū sava téé sájniñu nuū, te cuu sava de ndehē jíin. Te ni tee de ichi jeē cuahān nahán de ñnga ñuu.

¹⁰ Te máá tiempo ndutútú uva, te ni tají de ñin mozo cuahān nuū téé cá sájniñu ún, návāha naquihin de sava ndehē uva un. Te téé un ní cacani de mozo, te ni canatají de i cuanuhun i súcuan-ni.

¹¹ Te téé chíí uva ni tají tucu de ñnga mozo cuahān. Te téé cá sájniñu ún, suni ni cacahān ndevāha de nuū i, te ni cacani de i, te ni canatají de i cuanuhun i súcuan-ni.

¹² Te téé chíí uva ni tají tucu de ñnga mozo cuahān. Te téé cá sájniñu ún, suni ni castújí de mozo un, te ni cascúnu de i.

¹³ Yūcuán na te ni cahān téé chíí uva: ¿Ndese sáha rí? Na tájí rí sēhe rí jeē maní rí jíin, chí sanaa te núu ni cajito de i te coo yñūhún de nuū i. Achí de.

¹⁴ Te téé cá sájniñu ún, ná ni cajito de jeē véji i, te ni cacahān de: Téé chíí táhū cúu jeē véji ún. Na cáhni yō de, te ndōo tahū de cuu máá yó, achí.

¹⁵ Te ni caquenehen de i ñnga lado, te ni cajehni de i, achí yá.

Te ni cajñūhun yá de:

Núu súcuan ¿te ndese sáha téé chíí uva jíin téé cá sájniñu ún?

¹⁶ Ndiji de te cahni de téé un jíjnáhan, te cuāha de ñūhun cáá uva un núū ñnga sava téé sájniñu nuū, achí yá.

Te jeē ní cajini ñáyuu jñūhun yáha, te ni cacahān i:

Aí, núu ma cóo cuiti súcuan víi, achí i.

¹⁷ Te ndéhé yá nuū i jíjnáhan i, te ni cahān yā:

Núu súcuan ¿te á cájecūhun ni rō jñūhun yáha jeé yosó núū tútu ñi jeé cúu rí nájnūhun ñin yuū? Chí achí tutu:

Yuū jeē ní casquéhichí téé cájeni vehe, yuū yáha nduu jeē quítuu vehe.

Achí.

¹⁸ Te ñáyuu tu cá candíje, ndoho i nájnūhun ndóho ñáyuu jeē cotúú siquī yuū te jnáhnú i. Te quivī sándaā Yaā Dios cuēchi, te ñáyuu tu cá candíje, ndoho i nájnūhun ndóho ñáyuu jeé ñnga yuū siquī i te cundihí i sáha. Achí yá.

Siquī xūhun renta

(Mt. 21.45-46; 22.15-22; Mr. 12.12-17)

¹⁹ Yūcuán na te sutū cácujeñhu jíin téé cástéén tutu ley Yaā Dios, ni cacuni de jñi de ya maá hora un. Chí ni cajecūhun ni de jeē siquī maá de cúu jñūhun yátá ní cahān yā siquī téé cá sájniñu nuū uva jíin téé cájeni vehe. Te tu ní cúu, chí cáyūhú de jeē quítí ni ñáyuu.

²⁰ Yūcuán na te ni catají de jecu téé cuacoto yuhu de ya, te téé un cá sáha-ni de jeé téé ndaā cácuu de. Te cánducú de sáha de jeé cahān yā ñin jñūhun jeé nihín de cuēchi siquī yā, te quindeca de ya nuū téé cúu gobernador.

21 Te ni cacahān de:

Maestro, cājini na jēē cahān vāha ní, te stéén ndaā ní. Te tu sáha ní cuenta ndese cúu ññ ññ ñayuu, chí ñnuú-ni sáha ní jíin i. Te stéén ndaā ní ndese squícu ñayuu nuū Yaā Dios.

22 Núu súcuan te cachi ní: ¿A íyó váha jeē chúnaa yō renta nuū rey nación Roma jeē jñí nación yō, chí tuú? áchí de.

23 Te ni jini yā jeē cācuni de stáhú de ya, te ni cahān yā jíin de:

¿Najehē cājito ndee rō ruhū?

24 Stéén ññ xūhún na cóto rī. ¿Ndé ññ nuū cúu jeē ndeé nuū xūhun yáha, te ndé síhví cúu jeē ndeé yáhá? áchí yá.

Te ni cacahān de jíin yá:

Nuū jíin síhví rey un cúu, áchí de.

25 Yūcuán na te ni cahān yā jíin de:

Núu súcuan te nacuāha ró núu rey un jéē yíhi cuenta nuū de, te nacuāha ró núu Yaā Dios tāca jéē yíhi cuenta nuū maá yá, achí yá.

26 Te tāca téé ún tu ní cúu nihīn de cuēchi síquī yā jíin ni ññ jñūhun cáhān yā, cājito jínúú ñayuu. Chi sa ni canaa ni de jeē ndichí ní stió cuñí yā jñūhun nuū de, te tuá na vé ni cacahān de.

Jeē ní cacajñūhún de síquī jeē nátecu ndīyi (Mt. 22.23-33; Mr. 12.18-27)

27 Yūcuán na te jecu tēe grupo saduceo ni quecoo de nuū yā. Te tēe un cacahān jeē tu nátecu cuítī ndīyi. Te ni cacahān de jíin yá:

28 Maestro, Moisés ni tee de nuū tútu jeē cánevāha yó: Núu ññ tēe cuu de, te ndōo ññasíhí de, te núu tu ní íyo sēhe de jíin ñña, núu súcuan te cánuú jeē ññani de naquihin ññasíhí de, te sēhe de jeē cácu jíin ñña nucuñí i nuū ndīyi ññani de, áchí tutu.

29 Núu súcuan te ni íyo uxā ññani. Te tēe núu ní quijnáhan de jíin ññahan. Te ni jihī de, te tú sēhe de ní íyo.

30 Te tēe uū ni naquihin de ñña, te suni ni jihī de, te tú na sēhe de ní íyo.

31 Te tēe unī ni naquihin de ñña. Te suni súcuan ndihúxá de ní condeca de ñña, te ni cajihī ndihī de, te ni ññ de tú sēhe de ní íyo.

32 Te jeē sándihí te suni ni jihī ññahan ún.

33 Núu súcuan te núu na nátecu de jíjnáhan de quivī nátecu ndīyi, ¿te ndé ññ de cuu ñña ññasíhí de? Chi ndihúxá de ní condeca de ñña. Achí de jíjnáhan de.

34 Yūcuán na te ni cahān yā jíin de:

Ñayiví yáha chí cáquijnáhan tēe jíin ññahan.

35 Te ñayuu vāha jeē nátecu i quivícoo i andiví, má quijnáhan ga i yūcuán, chí tuá na jñūhun quijnáhan tēe jíin ññahan coo.

36 Ni ma cúu cuítī gā i, chí coo i nájnūhun ndajéhé Yaā Dios. Te sēhe Yaā Dios cuu i, chí je ni canatecu i.

37 Te suni máá Moisés cáhān de jeē nátecu ndīyi, chí ni tee de nuū tútu ndese ni cahān yā jíin de mēhñu yúcū jeē cayú yáñuhūn. Chí ni cahān de jeē cúu ya Yaā Dios Abraham jíin Isaac jíin Jacob.

38 Te jeē ni cáhān de súcuan cúu jeē ní cachi de jeē cátecu tāca ndīyi. Chí vēsú je ni cajihī i, te cátecu i nuū íyó máá yá, chí cúu ya Yaā sáha jeē técu ñayuu ní cáni. Achí yá jíin de.

39 Te jecu tēe cástéén tutu ley Yaā Dios ni cacahān de:

Vāha ni cahān ní Maestro.

40 Te tuá ni cáchundeyí ni de cajñūhún de ya.

Siquī jeē cúu Cristo sēhe yucūn David (Mt. 22.41-46; Mr. 12.35-37)

41 Te ni cahān yā jíin de jíjnáhan de:

¿Ndese cúu jeē cacahān ñayuu jeē Cristo cúu sēhe yucūn David?

42 Chí máá David suhva ni cahān de jñūhun ya nuū tútu Salmo:

Máá Jítoho yō Yaā Dios suhva ni cahān yā jíin Jítoho rī, Yaā quiji:

Cucōo ró lado váha ri nuū kujéhu ró,

43 te na sáha ri jeē quende rō poder tāca jéē cājito uhū rohó.

Achí Yaā Dios. Achí David.

44 Te núu sēhe yucūn David cúu Cristo, ¿te ndese cúu jeē ni cáhān de jeē Jítoho de cúu ya? áchí yá.

Jeē ni cáhān yā jeē íyó cuéchi de jíjnáhan de (Mt. 23.1-36; Mr. 12.38-40; Lc. 11.37-54)

45 Te ni cahān yā jíin téé cáscuáha jíin yá, te suni ni cajini sōho ndihī ñayuu:

46 Coto má cándíje ró tāca téé cástéén tutu ley. Chí cácusī ni de cáñuhun de sahma cáni jeē steén jeē kujéhu de, cájica cuu de jíin. Te cánujnahan ni de jeē cahān yíñuhún ñayuu jíin de nuū yáhu. Te cánujnahan ni de cucōo de nuū silla yíñuhún gá ini vehe íi sinagoga, jíin silla yíñuhún gá nuū víco cáyeji ñayuu.

47 Te cáquende de vehe ñahan ní caque-ndōo ndáhú. Te nahán cájicān tahu de návāha caní ni ñayuu jeē tú na cuēchi de. Tēe yáha jíjnāhan de chi xeēn gā ndoho de castigo. Achí yá.

Jeē ni sócō ñahan viuda xūhún
(Mr. 12.41-44)

21

1 Te ná ni iyo ya ini templo, te jító ya nuū ñáyuu cucá jéē cáchuhun i cuehē xūhún ini tāca yéjñū nuū cásocō i.

2 Te suni ni jito ya nuū ññ ñahan viuda jeē ndóho ndáhú, te ni chuhun ña uū centavo lulí ini yejñū ún.

3 Te ni cahān yā:

Jendaá cahán rī jíin ró jeē cuehē gā cúu jeē ni sócō ñahan viuda ndahú yáha, vēsú jeē ní casocō tāca gá ñayuu.

4 Chi tācá i ni casocō i jeē ni ndóo siquī xúhun cuéhē i. Te ñahan yáha, vēsú ndahú ndóho ña, te ni chuhun ndihí ña jeē cótecu ña. Achí yá jíin de.

Jeē ní cachi yā jeē náā templo
(Mt. 24.1-2; Mr. 13.1-2)

5 Te sava de ni cacahān de jeē luu cáa templo cáhnu, chí ni cuvāha jíin táca yúu luu jíin táca jéē ní casocō ñayuu. Yūcuán na te ni cahān yā:

6 Ndihi jeē cájito ró yáha, quee quiví jeē ma cóso jnāhan ga ni ññ yuū, chí ndihí jnanū, achí yá.

Na seña coo nuū cuácuyajni ndihí ñayiví
(Mt. 24.3-28; Mr. 13.3-23)

7 Te ni cacajñuhún de ya:

Maestro, ¿ndé quiví coo tāca jéē ní cachi ní jéē coo? ¿Te na seña coo nuū cuácuyajni squícu tāca jéē ni cahān ní? áchí de.

8 Te ni cahān yā:

Coto ró jéē ma stahú i róhó. Chi quijicoo cuehē tēe jeē stahú jíin síhví rí, te cahān de: Máá rí cúu Cristo. Te suni cahān de: Je ni quee quiví ndihí ñayiví, achi de. Te ma cóndiquín rō de.

9 Te núu nihīn rō jñuhun jeē tāca lado iyó guerra te cándonda ñayuu siquī tohō, te ma yūhu ró, chí cánuú jéē xihna gā coo súcuan, te ni ma jinú yachí quiví ndihí ñayiví. Achí yá.

10 Te ni cahān gā yā:

Ndonda nación siquī inga nación, te ndonda ñuu siquī inga ñuu jeē cuajnáhan.

11 Te cháha chúcuan jñāa téyí, te coo jnamā jíin cuéhyí xeēn. Te coo seña jéhnu ichi ándiví jéē yūhú ndasí ñáyuu coto i.

12 Te nde ná tu coo tācá jñiñu yáha, te coto xeēn i róhó, te jññ i róhó. Te quindecas i sava ró táca vehe ññ sinagoga jeē cahán i cuēchi siquī rō. Te chune i sava ró vecāa. Te quindecas i sava ró núu tāca rey jíin núu tācá gobernador, te cahān i cuēchi siquī rō jeē siquí jeē cá candíje ró rúhū.

13 Te jeē súcuan coo, te cuitē núu ga jñuhun rí, chí nacani ndaā rō nuū de jíjnāhan de.

14 Núu súcuan te cundaā ni rō jeē ma nacani ni rō xihna gā ndese stío cuñí rō nuū de te cācu ró.

15 Chi ruhū cuāha rí jñuhun ndichí cahān rō, návāha ñayuu jeē cájito uhū rohó, ma cúndeyí i jíin ró ni ma cúu cahān i siquī rō.

16 Te nde tatá rō, naná rō, ñani rō, jñāhan ró, jíin amigo rō, nastúu i róhó núu ñáyuu xeēn. Te cahni i sava ró.

17 Te tāca ñáyuu chí quití ni i nuū rō jeē siquí ruhū.

18 Te ni ññ ixi xíní rō jíjnāhan ró ma náā, chí coto ya rohó.

19 Te núu cuiñi ññin ró jíin jñuhun rí, te cotecu rō ní cáni.

20 Te núu ni cajito ró jéē ní cajicó ndúu soldado ñuu Jerusalén, te na jécūhun ni rō jeē jé yajni naa ñuu ún.

21 Yūcuán na te ñayuu cáyucú región Judea, na cúnu i caa i yucu quingoo i. Te ñayuu cáyucú Jerusalén, na quéndacoo i quingoo i. Te ñayuu cáhīn nde rancho, ma nándicó i ñuu ún.

22 Chi tāca quiví un cuáha Yaā Dios castigo nuū ñáyuu jeē siquí cuēchi i, návāha squícu tāca jñuhun jeē yosó núu tútu.

23 Te quiví ún nacā jeē ndahú ñahan cáñuhun sēhe jíin ñahan cándeca yiquín, chí ma cúnihīn ña cunu yachí ña. Chí yōhyo xeēn coo jñundóho ini ñayiví, te quiiji castigo xeēn siquí ñáyuu yáha.

24 Te sava i cuu nuū guerra, te sava i quingoo preso nde tācá inga nación. Te ñayuu tāca gā nación ndacu ññin i jñiñu nuū

ñáyuu ñuu Jerusalén, nde jīnu tiempo jeē jehe Yaā Dios jnūhun ndacu i jniñu.

Ndese coo quivī ndiji Yaā ní nduu tēe
(Mt. 24.29-35, 42-44; Mr. 13.24-37)

²⁵ Yūcuán na te coo seña nuū níandii jíin núu yoó jíin núu quími. Te ini ñayīví te quiiji jnūndóho xeēn síquī ñáyuu tācá nación. Te cunée ni i, te yūhú i jeē níhin xeēn mar te ndóna xeēn ndute mar vēji nuū ñūhun.

²⁶ Te cuu sōó sava ñayuu jeē cáyūhú i cándetu i tāca jnūndóho quiiji síquī ñayīví. Te tāca jéē íin andiví chi quisí i.

²⁷ Yūcuán na te coto ñayuu nuū maá rí, Yaā ní nduu tēe, ndiji ri jíin vícō, te condiso ri cuehē poder, te yōhyo luu kujéhu ri.

²⁸ Te núu ni quejéé tāca jniñu yáha, te ndeyí coo ni rō, te cocunuū rō andiví, chi je yajni jnama ya rohó. Achí yá jíin de jíjnáhan de.

²⁹ Te suni ni cahān yā jnūhun yátá yáha:

Condēhe jíjnáhan ró ndese sáha nundēhe higo jíin tāca gá yujnu.

³⁰ Núu cájito ró jéē ní quejéé náne numa yújnu ún, te cájini rō jeē jé yajni coo tiempo jihní.

³¹ Te suni súcuan núu ni cajito ró jéē ní quejéé cúu tācá jniñu jeē ni cáhān rī, yūcuán na te na jécūhun ní rō jeē ní cuyajni quivī ndacu Yaā Dios jniñu ini ñayīví.

³² Jendaá cahān rī jíin ró jeē ma cúu ndihí ñayuu tiempo un, chi nde squícu ndihí jniñu ún.

³³ Andiví jíin ñayīví chi naa, te tāca jnūhun cáhān rī chi ma náā, chi ndihí squícu.

³⁴ Te coto ma stíví ró maá ró jíjnáhan ró jéē sáha ró tāca cuéchi, jíin jéē najīni ró, jíin jéē kujnéñu ró jíin tāca ndajniñu cotecu rō, návāha tú sanaa ni rō te quee quivī un síquī rō.

³⁵ Chi nájnūhun jeē núu ñn trampa, súcuan quee jnūndóho síquī ñáyuu cáyūcu ní cáhnu ñayīví.

³⁶ Núu súcuan te ndito coo ni rō, te níni cácan tahú rō, návāha cuu cācu ró núu tāca jnūndóho jeē quíji ún, te cuu cuiñi ró núu ruhū, Yaā ní nduu tēe. Achí yá.

³⁷ Te ndiquiví steén yā jnūhun ini templo, te ndijnahan jecuāā jéndōo ya nde yucu jeē naní Olivos.

³⁸ Te tāca jénéhen quécoo ñayuu nuū yā ini templo jeē cúni sōho i jnūhun steén yā.

Jeē ní casquíjnáhan de jnūhun jnī de Jesús
(Mt. 26.1-5, 14-16; Mr. 14.1-2, 10-11; Jn. 11.45-53)

22

¹ Yūcuán na te ni cuyajni vico pascua jeē cáyeji ñayuu hebreo pan jeē tú na levadura yíhi.

² Te sutū cácujeñu jíin tēe cástéén tutu ley, ni canducú yuhu de modo cahni de Jesús, chi cáyūhú de jeē quítī ni ñayuu.

³ Te ni quiví Satanás ini anuá Judas jeē nastúu de ya. Te suni nání de Iscariote, te cúu de ñn jnáhan jeē ndihúxí uū tēe apóstol.

⁴ Te ni jehēn de ni candajñūhún de jíin tāca sūtū cácujeñu jíin tēe cándiso jniñu ini templo, núu ndese nastúu de ya nuū tēe un jíjnáhan.

⁵ Te tēe un ní cacusī ni de, te ni caje-jnūhun de jeē cuáha de xūhun núu Judas.

⁶ Te ni jetáhú Judas, te ni nducú de modo ndese nastúu yuhu de ya hora jeē tú na ñayuu iyó.

Jeē ní jequin yā Cena yā

(Mt. 26.17-29; Mr. 14.12-25; Jn. 13.21-30; 1 Co. 11.23-26)

⁷ Te ni quee maá quiví víco jeē cáyeji ñayuu pan jeē tú na levadura yíhi, te suni quiví un cájehni i londe nájnūhun ni ndacu Yaā Dios jniñu jeē sáha i vico pascua un.

⁸ Te Jesús ni tají yá Pedro jíin Juan quingoo de, te áchí yá jíin de:

Cuángoo te sátūhva ró jéē cuxíni yó vico pascua, achí yá.

⁹ Te ni cacajñūhún de ya:

¿Ndé nuū cuní ni jéē quisátūhva ná? áchí de.

¹⁰ Te ni cahān yā jíin de:

Cuángoo ñuu yūcuán, te núu ni quivícoo ró te najnáhan ró jíin ñn tēe ndíso quíyí ndute. Te condiquīn rō de quihīn rō jíin de nde vehe nuū ndívi de.

¹¹ Te cahān rō jíin tēe chíi vehe ún: Achí máá Maestro: ¿Ndé ñn cúu cuarto vehe ní cuáha núu ní núu cuxíni ya vico pascua jíin tēe cáscuáha jíin yá, achi rō.

¹² Yūcuán na te steén de ñn cuarto cáhnu nde xiní véhe jeē je íyó túhva, te yūcuan sátūhva ró jéē cuxíni yó, áchí yá.

13 Te cuango de, te ni canihin de najnūhun ni cahān yā. Te ni casātūhva de jeē cuxini ya vico pascua.

14 Yūcuán na te ni jinū hora jeē cuxini, te ni quee Jesús, te ni cucōo ya mesa jín tée cácuu apóstol.

15 Te ni cahān yā jín de:

Yōhō ni cuu ni rī cuxini ri jín ró jijnáhan ró vico pascua yáha, vijna nde ná tu cuu rī.

16 Chi cáhān rī jín ró jeē ma cáji cuiṭi gā rī vico pascua, chi nde quiṭi quiṭi ndacu Yaā Dios jniñu ní ñayiví, te sáa te caji tucu ri, achí yá.

17 Te ni quihin ya in copa ndūxi uva, te ni nacuatáhú yá, te ni cahān yā:

Quihin copa yáha, te coho ró jín jnáhan ró.

18 Chi cáhān rī jín ró jeē ndé vijna te ma cóho ga rī ndūxi uva, chi nde quiṭi quiṭi ndacu Yaā Dios jniñu ní ñayiví, te sáa te coho tucu ri. Achí yá.

19 Te ni quihin ya pan, te ni nacuatáhú yá, te ni tahú cuéchi yá, te ni jēhe ya nuū de jijnáhan de. Te ni cahān yā:

Yáha cúu yiqui cúñu rī jeē socō rī jeē chunaa rī cuéchi ró jijnáhan ró. Te níni caji rō sūcuan jeē cáñuhun ni rō ruhū jeē ni jíhi rī jehē rō. Achí yá.

20 Te suni sūcuan ni sáha ya jín copa ndūxi uva, ná ni cuu ni cuxini ya. Te ni cahān yā jín de:

Yáha cúu niñi rī jeē cuáha ri jeē cúu contrato jeé, te cati jeē ndundoo cuéchi ró jijnáhan ró.

21 Te vijna chi tēe nastúu ruhū, néne de jín rí nuū mesa yáha.

22 Chi ruhū, Yaā ní nduu tēe, jendaá cúu jeē quihín rī cuu rī najnūhun je ni sándaā Yaā Dios jeē sūcuan coo. Te nacā xeēn ndoho tēe jeē nastúu ruhū, achí yá.

23 Yūcuán na te ni caquejéé de cácajnūhun jnáhan de ndé in de cúu jeē nastúu de ya.

Jeē ní cacahān de siquī ndé in de cújéhu ga

24 Yūcuán na te yōhō ni cacahān de siquī ndé in de cújéhu ga nuū jnáhan de.

25 Te ni cahān Jesús jín de:

Rey tācá nación chi cándacu nihin de jniñu nuū ñayuu cájni de, te cácahān i jeē tée cásáha vāha cúu jeē cácujeñu nuū i.

26 Te róhó jijnáhan ró, ma cóo ró sūcuan. Chi núu ndé in ró cújéhu ga, te sa nasáha lulí ró maá ró. Te núu ndé in ró ndácu jniñu, te sa nasáha ró máa ró tēe jéjníñu nuū jnáhan.

27 Te ndé in cúu jeē cújéhu ga, á tēe yéji nuū mesa, chí tēe jéni cohō? Te ná sūu tēe jeē yéji nuū mesa cúu jeē cújéhu ga? Te ruhū nasūu sūcuan cúu ri, chi ni nasáha ri maá rí najnūhun tēe jéjníñu nuū rō, chí vēji ri sáha ri jeē nihín tahú rō.

28 Te máa ró cácuu tēe jeē níni cáhān jín rí tāca quiṭi jeē ndóho ri jnūndóho.

29 Núu sūcuan te najnūhun ni sáha Tátá rī jeē ndácu ri jniñu, suni sūcuan sáha ri jeē ndacu ró jniñu jijnáhan ró.

30 Te caji rō coho ró jín rí ini ñuu nuū ndacu ri jniñu. Te cucōo ró in in mesa jeē sándaā rō jniñu ndihúxí uū yucūn Israel. Achí yá.

Jeē ní cachi yā jeē yūhu Pedro cahān de jeē jini de ya

(Mt. 26.31-35; Mr. 14.27-31; Jn. 13.36-38)

31 Te suni ni cahān maá Jítoho yō jín Simón Pedro:

Simón, cuni sōho ró, chí ni jicān Satanás rohó jijnáhan ró jéé coto ndee rohó najnūhun jeē síjin trigo, te stúu ndé in ró cácuu najnūhun paja jeē nayūhu ró, te ndé in ró cácuu najnūhun trigo jeē candíje nihin ró.

32 Te ni jicān tahú rī jehē rō návāha ma náyūhu ró jeē ma cándíje ga rō. Te jeē nácandíje tucu ró, te sáha ró jéé íje tāca jnáhan ró jín jnúhun rī. Achí yá.

33 Te ni cahān de jín yá:

Je íyó túhva ná quihín na jín ní vecāa te vēsú na cuu na jín ní, achí de.

34 Te ni cahān yā:

Pedro, cáhān rī jín ró jeē nde ná tu cana líhli vijna, te yūhu ró jeē jniñi ñayuu rohó, te unī jínu cahān rō jeē tu jini rō ruhū, achí yá.

Jeē ní cuyajni coto ya jnūndóho

35 Yūcuán na te ni cácajnūhun yá de jijnáhan de:

Ná ni tají rí rohó ní jengoo ró jéé tu ní cóndiso ró ñunu ni yijni xūhún ni ndijēn, te á ní íyo in jeē ní cumanī nuū rō? Achí yá.

Te ni cacahān de:

Tú ni in ní cumanī.

³⁶ Te ni cahān yā:

Nde vijna sa cáhān rī jeē cóndiso ró ñunu ró, te suni yijni xūhún. Te tēe jeē tu névāha espada jeē coto de máá de, na xíco de ticāchí de te na cuáan de.

³⁷ Chí cáhān rī jíin ró jeē quee quivī ndoho yó jnúndóho, chí cánuú squícu jnúhun yáha jéē cahán nuū tútu síquī rī: Sáha ñayuu jíin yá nájnūhun cása ha í jíin tēe sáha cuēchi xeēn, áchí tutu. Chí tāca jnúhun un jéē yosó cáhān síquī rī, chí squícu nahín, áchí yá.

³⁸ Yūcuán na te ni cacahān de:

Yáha iyó úu espada, achí de.

Te ni cahān yā jíin de:

Jíin jéē yáha-ni, áchí yá.

Jeē ni jicān tahú yā nuū huerto Getsemani
(Mt. 26.36-46; Mr. 14.32-42)

³⁹ Te ni quenda ya cuahān yā yucu Olivos nájnūhun sáha sáha ya. Te tēe cáscuáha jíin yá ni candiquín de ya cuango de jíin yá.

⁴⁰ Te nuū ni jínū yā yūcuán, te ni cahān yā jíin de:

Cacān tahú rō jijnáhan ró jéē chindéé ñáhán yá rohó jéē ma sáha ró cuéchi núu coto ndee jeneé róhó, achí yá.

⁴¹ Te ni jica ya jecu, cūhva jeē jicá jínú yuū jeē squíin. Te ni jecuiñī yití yá, te suhva ni jicān tahú yā:

⁴² Tātā, núu cúní ni te tejiyo ní jnúndóho yáha jéē ma quíji síquī ná. Te nasūu jéē cuní maá ná, chí jeē cuní maá ní na cóo, áchí yá.

⁴³ Te ni cane ñn ndajéhé andiví núu yā, te ni jēhe fuerza nuū yā.

⁴⁴ Te cúcuíhyá ndasí ni yā jeē quiji jnúndóho síquī yā, te ni nducú ndéyí gá yā ni jicān tahú yā. Te ni cane jnañū yā, te tóo nuū ñúhun nájnūhun yúyú náhnu niñī.

⁴⁵ Te ná ni ndocuiñī yā jeē ni jicān tahú yā, te ni ndee yā nuū tēe cáscuáha jíin yá. Te ni jito ya jeē cáquixí de, chí tuá cáhīyo ndeyí ni de cacān tahú de jeē cácuíhyá ndasí ni de.

⁴⁶ Te ni cahān yā jíin de:

¿Naun cáquixí rō? Ndonga te cacān tahú rō jeē chindéé ñáhán yá rohó jéē ma sáha ró cuéchi jeē cóto ndee jeneé róhó. Achí yá.

Jeē ní cajñi de Jesús

(Mt. 26.47-56; Mr. 14.43-50; Jn. 18.2-11)

⁴⁷ Te sá cáhān gā yā súcuan, te ni quecoo cuehē ñayuu. Te tēe nání Judas, ñn jnáhan

jeē uxí uū tēe scuáha jíin yá, yósnúu de nuū ñáyuu un véji de. Te ni quee de nde nuū Jesús, te ni techūhú de ya, te súcuan ni nastúu de ya.

⁴⁸ Te ni cahān Jesús jíin de:

Judas, ¿á jíin jéē téchūhu ró ruhū cúu jeē nastúu ró ruhū, Yaā ní nduu tēe? Achí yá.

⁴⁹ Te tēe cáhīin jíin yá, ni cajito de jeē ní quejéé cúu, te ni cacajñūhún de ya:

¿A ndonda ná jijnáhan ná síquī de jíin espada? áchí de.

⁵⁰ Te ñn de ni stují de mozo sutū cujéhnu ga, chí ni jehnde de sōho lado váha.

⁵¹ Te ni cahān Jesús:

Siáá, na jécuiñī, achí yá.

Te ni tee ya ndaha ya sōho mozo un, te ni nasávāha ya de.

⁵² Te ni cahān yā jíin sūtū cácujeñnu jíin tēe cándiso jniñu ini templo jíin táca tēe jéñnu jeē ní quecoo de jeē jñi de ya:

¿Te va tēe cuíhná cúu ri jeē véjicoo ró jíin espada jíin yujnu jeē jñi ró ruhū jeē súcuan?

⁵³ Tāca quivī ni ine ri jíin ró jijnáhan ró ini templo cáhnu, te tu ní cájñi ró ruhū. Te vijna te ni quee hora jeē jñi ró ruhū jíin jéē sáha ró táca jniñu jeē ndácu jeneé jéē ndee núu néē. Achí yá.

Jeē ní cachi Pedro jeē tu jíní de ya

(Mt. 26.57-58, 69-75; Mr. 14.53-54, 66-72; Jn. 18.12-18, 25-27)

⁵⁴ Te ni cajñi de ya cuango de jíin yá vehe sutū cujéhnu ga. Te Pedro chí jicá-ni ndíquín de ya.

⁵⁵ Te táca policía ni cascáyú de ñuhūn ini patio, te ni condúu de yuñúhún un cáyūcu de. Te suni ni cucōo Pedro jíin de.

⁵⁶ Te ñn ñahan jéjñiñu ini vehe un, ní jito ña nuū de jeē néne de yuñúhún. Te ni jito vāha ña nuū de, te ni cahān ña:

Tēe yáha suni ni jica de jíin tēe ún, áchí ña.

⁵⁷ Te máá de tu ní cáchi de, chí ni cahān de:

Tu jíní rī tēe ún, áchí de.

⁵⁸ Te ni cunúu jecu gā, te ni jito tucu ñnga ñayuu nuū Pedro, te ni cahān:

Róhó, suni jnáhan táca tēe un cúu ró, áchí.

Te ni cahān Pedro:

Nasūu cúu ri, hombre, achí de.

⁵⁹ Te ni cuu nájnūhun ñn hora gā, te ni cahān ñhin ñnga de:

Jendaá ndije jeē té yáha ní jica de jíin téé ún, chí suni téé región Galilea cúu de, áchí de.

⁶⁰ Te ni cahān Pedro:

Hombre, tu jíiní rī na jnūhun cáhān rō.

Te sá súcuan cáhān gā de, te ni cana-ni líhli.

⁶¹ Yūcuán na te ni ndió cóto máá Jítóho yō, te ni jito ya nuū Pedro. Te ni nucūhun ni de jnūhun ni cahān yā jíin de: Nde ná tu cana líhli, te yūhu ró te cahān rō unī jíinu jeē tu jíiní rō ruhū.

⁶² Te ni quenda de cuahān de, te yōhyo ni ndahyū de jeē ní cachi de jeē tu jíiní de ya.

Jeē ní casácatā de nuū yā

(Mt. 26.67-68; Mr. 14.65)

⁶³ Te tāca téé cándito Jesús, ni casácatā de nuū yā, te ni cacani de ya.

⁶⁴ Te ni cajesi de sahma nuū yā, te ni cacani de nuū yā, te ni cacahān de:

Cachi ndé ñn cúu jeē ní cani rōhó, áchí de.

⁶⁵ Te cuehē gā jnūhun súcuan ni cacahān neé de jíin yá.

Jeē ní indichi Jesús nuū junta téé cácujuhnu ga

(Mt. 26.59-66; Mr. 14.55-64; Jn. 18.19-24)

⁶⁶ Te jeē ní cundijin, te ni candutútú táca téé jéhnú cándacu jniñu nuū ñayuu hebreo, jíin sūtū cácujuhnu, jíin téé cástéén tutu ley Yaā Dios. Te cuango de jíin yá nuū junta téé cácujuhnu ga, te yūcuan ní cacajñuhún de ya:

⁶⁷ Cachi, ¿á máá ró cúu Cristo jeē ní tají Yaā Dios? Achí de.

Te ni cahān yā jíin de:

Vésú na cáhān rī jeē suu ri cúu, te ni ma candíje cuítí rō.

⁶⁸ Te suni núu cajñuhun máá rí rohó jíin náhan ró, te suni ma stió cuíñí rō nuū rī, ni ma siaá rō ruhū.

⁶⁹ Te ruhū, Yaā ní nduu téé, táca quívi jeē quíji conene ri lado váha máá Yaā iyó poder, achí yá.

⁷⁰ Yūcuán na te ndihí de ni cacajñuhún de ya:

¿A máá ró cúu Sēhe Yaā Dios núu súcuan?

Te ni cahān yā jíin de:

Suu ri cúu, nájnūhun cácahān rō, achí yá.

⁷¹ Yūcuán na te ni cacahān de:

¿Na testigo gā jíiní ññuhún yó núu súcuan? Chí ni cajini sōho yó jíin yuhu máá de jeē

cahān ndevāha de jeē cúu de Sēhe Yaā Dios. Achí de jíin náhan de.

Jeē ní indichi Jesús nuū Pilato

(Mt. 27.1-2, 11-14; Mr. 15.1-5; Jn. 18.28-38)

23

¹ Yūcuán na te ni candocuiñí ndihí de, te cuango de jíin yá nuū Pilato.

² Te yūcuan ní caquejéé de cácahān de cuēchi siquī yā:

Ni canihín na téé yáha jéé stóna de ñayuu siquī tohō. Te cáhān de jeē tú váha jeē cuāha ná xúhun renta nuū rey nación Roma jeē ndácu jniñu nuū nación na. Te suni cáhān de jeē maá de cúu Cristo, Rey jeē ní tají Yaā Dios. Achí de jíin náhan de.

³ Yūcuán na te Pilato ni cajñuhún de ya:

¿A máá ró cúu Rey ñayuu hebreo?

Te ni cahān yā:

Suu ri cúu, nájnūhun cáhān rō, achí yá.

⁴ Te ni cahān Pilato jíin sūtū cácujuhnu jíin ñayuu cuehē ún:

Tú ni ñn jnūhun stívi cáhān téé yáha jéé nihín rī cuēchi siquī de, achí de.

⁵ Te máá de víhyá gā ni cacahān de:

Téé yáha stóna ndasí de ñayuu siquī tohō jíin jnūhun stéén de ní Judea. Chí ní quejéé de stéén de nde Galilea, te vijna te nde yáha, achí de.

Jeē ní indichi Jesús nuū Herodes

⁶ Te nuū ní jini sōho Pilato jeē Galilea cácahān, te ni cajñuhún de ñayuu núu téé región Galilea cúu ya.

⁷ Te nuū ní cacahān ñayuu jeē cúu ya téé Galilea, te ni ndacu de jniñu jeē na quíngoo de jíin yá nuū Herodes, téé cúu gobernador Galilea. Chí quívi ún suni íne Herodes ñuu Jerusalén.

⁸ Te nuū ní jito de nuū Jesús, te yōhyo ni cusí ni de, chí je ni cuu cuehē tiempo jeē cuní de coto de nuū yā. Chí ni nihín de jnūhun ya, te ññuhun ni de jeē sáha ya ñn jniñu jéhnú coto de.

⁹ Te ni cajñuhún de ya cuehē jnūhun, te tu ní stío cuíñí yā ni ñn jnūhun nuū de.

¹⁰ Te suni cáhān táca sūtū cácujuhnu jíin téé cástéén tutu ley, te nihín ni cacahān de cuēchi siquī yā.

¹¹ Yūcuán na te Herodes jíin táca soldado de ni cacahān neé de jíin yá, te ni casácatā

de nuū yā, chi ni cachuhun de ya sahma váha luu jeē cúu sahma rey. Te Herodes ni ndacu de jniñu jeē na quínundeca de ya nuū Pilato.

¹² Te máá quiṽi un ní candumanī jnáhan Pilato jíin Herodes, chi ichi yátá ni caquiṽi jnáhan ni de.

Jeē ní cundaā jeē cúu yā

(Mt. 27.15-26; Mr. 15.6-15; Jn. 18.39-19.16)

¹³ Yūcuán na te ni cana Pilato tāca sūtū cácujeñnu jíin táca tée cándiso jniñu jíin táca gá ñayuu, ni candutútú.

¹⁴ Te ni cahān de:

Ni caquindeca ró tée yáha núū rī, jeē cácahān rō jeē stóna de ñayuu siquī tohō. Te je ni stichí rī de, ni cajito jíinúū rō. Te tu ní níhín rī ni ñn cuēchi siquī de nájnūhun jeē cácahān rō.

¹⁵ Te ni Herodes, tu ní níhín de, chi ni natají tucu de tée yáha núū rī. Te tú cuṽi ni ñn cuēchi ní sáha de jeē cúu de.

¹⁶ Núu súcuan te na cuáha ri castigo de, te siaá rī de quihīn de, áchí Pilato.

¹⁷ Te íyó costumbre jeē tācá vico pascua siaá Pilato ñn preso jeē cuní ñayuu.

¹⁸ Te ñayuu cuehē ún, inuú-ni ni cacana jee i:

Na cúu tēe jíiná, te siaá ní Barrabás, achí i.

¹⁹ Te Barrabás íne de vecāa siquī jeē ni stóna de ñayuu siquī tohō ini ñuu ún, te ni jehni de ndīyi.

²⁰ Te Pilato cuní de siaá de Jesús, te ni cahān tucu de jíin ñayuu.

²¹ Te máá i víhyá gā ni cacana jee i:

Cata caa ní de jicā cruz, na cúu de, áchí i.

²² Te ni cahān tucu de jíin i vuelta unī:

¿Na cuēchi ni sáha de núu súcuan? Tu ní níhín cuṽi rī ni ñn cuēchi siquī de jeē cúu de. Núu súcuan te na cuáha ri castigo de, te siaá rī de quihīn de, áchí Pilato.

²³ Te víhyá gā ni cacana jee ñayuu un, ní cacahān níhin i jeē na cúu yā jicā cruz. Te máá i jíin táca sūtū cácujeñnu, ni cacana jee ndasí i. Te ni cacundeyí i ni cascāhān i Pilato jeē na cúu yā.

²⁴ Yūcuán na te ni ndacu Pilato jniñu jeē na cóo nájnūhun cáconi i.

²⁵ Te ni siaá de tée jeē ní cajicān i, tée jeē íne vecāa jeē ni stóna de ñayuu siquī tohō te

ni jehni de ndīyi. Te ni jēhe de jnūhun jeē na cúu Jesús nájnūhun cáconi i.

Jeē ní cacata caa de ya jicā cruz

(Mt. 27.32-44; Mr. 15.21-32; Jn. 19.17-27)

²⁶ Te cuango tācá soldado jíin yá jeē cahni de ya jicā cruz. Te ni canihīn de ñn tēe ñuu Cirene, nání de Simón, vendiji de jeē ni jéhēn de rancho. Te ni catejniñu de tée un jēe cóndiso de cruz yā quihīn de yata yā.

²⁷ Te cuehē ndasí ñayuu ndíquín i yata yā cuango i. Te suni cuehē ñahan cuango ña, te cándahyū cohó ña jeē cácuquíhyá ní ña jehē yā.

²⁸ Te ni ndió cóto Jesús nuū ña, te ni cahān yā:

Róhó ñahan Jerusalén jijnáhan ró, ma ndahyú rō jehē rī, chi sa suhva ndahyú rō jehē máá ró jíin jéhē sēhe ró jíináhan i.

²⁹ Chi quee quiṽi jeē coo jnūndóho xeēn siquī rō, te cahān rō: Yōhyo ndetū tācá ñahan númá, jíin jēe tu ní scácu sēhe, jíin jēe tu ní cóndeca yiquín, chi tú sēhe ña jeē jnahuhū ní ña jeē ndóho i, achi rō jijnáhan ró.

³⁰ Quiṽi ún te quejéé ñayuu cahān i jíin táca yucu: Cotúú siquī rī jijnáhan ri návāha cuu rī. Te suni jíin táca loma: Casi siquī rī jijnáhan ri, achi i.

³¹ Chi núu casáha xeēn i jíin rúhū jeē tú na cuēchi ri, te nagā ni cuu jeē ma cóo xeēn siquī ndihi ñayuu chi íyó cuéchi i. Achí yá.

³² Te suni cuango de jíin úū tēe ni casáha cuēchi xeēn, jeē suni cuu de jíin yá.

³³ Te ni jinūcoo de lugar nuū naní Yiquí Xíní, te yūcuan ní cacata caa de ya jicā cruz. Te suni ni cacata caa de ndīndúú tée ni casáha cuēchi xeēn un núu uū gā cruz, ñn de lado váha ya, te inga de lado jecó yá.

³⁴ Te níni jēe súcuan cúu, te ni cahān Jesús: Tátā, cone cáhnu ni ní núu de jíináhan de, chi tu cájini de na vé casáha de, áchí yá.

Te soldado un ní casáha de sorteo jeē siquí ndese níhín ñn ñn de sahma ya.

³⁵ Te cáhīn ñayuu yūcuan, cájito i nuū yā. Te suni nde tée cándiso jniñu, cácahān catá de cájito de ya:

Núu inga ñayuu ni jnama de, te na jnáma de máá de vijna, te núu ndaā jeē Cristo jeē ní nacāji Yaā Dios cúu de, áchí.

³⁶ Te t̄acá soldado suni ni casacat̄a de nuū yā, chi ni quecoo de nde nuū yā, te ni cajēhe de vinagre iyá coho ya.

³⁷ Te cácahān de jíin yá:

Núu máá ró cúu Rey ñayuu hebreo, te na jnáma ró máá ró, achí de.

³⁸ Te suni ni ĩyo jnūhun jeē ndeé xinī cruz yā jeē cahán na siquī ni jíhī yā, te suhva yósó jíin yuhu griego jíin latín jíin hebreo: Yāha cúu Rey ñayuu hebreo, achí.

³⁹ Te ĩn jeē nd̄indúú t̄ee ni casáha cuēchi xeēn, jeē cándita caa, ni cahān neé de nuū yā:

Núu máá ró cúu Cristo, te na jnáma ró máá ró te suni jnama ró nd̄indúú rí, achí de.

⁴⁰ Te ĩnga de ni cahān de nuū jnáhan de:

¿A tu yúhú ró Yaā Dios naún? Chi ĩnuú cándoho yó jíin Yaā yāha.

⁴¹ Te máá yó chi vetū-ni cándoho yó, chi yāha cánih̄in yō castigo siquī jniñu neé ní casáha yó. Te Yaā yāha chí tú ni ĩn cuēchi ní sáha ya, achí de.

⁴² Te ni cahān de jíin yá:

Jesús, nucūhun ni ni sáña j̄eē qūej̄eé ní ndacu ní jniñu, achí de.

⁴³ Yūcuán na te ni cahān Jesús jíin de:

Jendaá cahán rī jíin ró jeē víjna te condee rō jíin rí nuū jardín andiví, achí yá.

Jeē ni jíhī Jesús

(Mt. 27.45-56; Mr. 15.33-41; Jn. 19.28-30)

⁴⁴ Te nuū ní cuu nájnūhun cahuxī uū, te ni cunee ní cáhnu nde cahunī.

⁴⁵ Te ni cujnuú níandii. Te sahma ndíta caa jeē ndihyú cuarto ĩi ini templo cáhnu, ni ndatā-ni sava sava.

⁴⁶ Yūcuán na te ni cana jee Jesús:

Tátā, naquihin ní ánuá na, achí yá.

Te súcuan ni cahān yā, te ni jihī-ni ya.

⁴⁷ Te t̄ee nación Roma jeē cúu capitán ni jito de jeē súcuan ni cuu, te ni cahān de jeē yóhoyo cúj̄ehnu Yaā Dios, te achí de:

Jendaá ndije jeē t̄ee tú na cuēchi cúu t̄ee yāha, achí de.

⁴⁸ Te ndivii ñayuu cáh̄in yūcuan ní cajito ĩ t̄aca j̄eē ní cuu, te cácani ĩ ȳiqui jícā ĩ jeē cájnahuhū ni ĩ, te ni nandió cóo ĩ cuanungoo ĩ.

⁴⁹ Te t̄aca ñayuu cájini jnáhan jíin yá, jíin t̄aca ñahan Galilea jeē ní cajica ña jíin yá, cáh̄in jícá ña cájito ña t̄aca j̄eē ní cuu.

Jeē ní quindūji Jesús

(Mt. 27.57-61; Mr. 15.42-47; Jn. 19.38-42)

⁵⁰ Te ni ĩyo ĩn t̄ee vāha t̄ee ndaā, nání de José. Te t̄ee ñuu Arimatea ndañūū Judea cúu de. Te cúu de jnáhan t̄aca t̄ee hebreo cácujuhnu ga jeē casáha junta.

⁵¹ Te ñūhun ni de jeē quiji quiv̄i jeē ndacu Yaā Dios jniñu, te suni tu ní nújnahan ni de jeē ní casándaā junta un j̄eē cúu Jesús.

⁵² Te t̄ee un ní jeh̄en de nuū Pilato, ni jicān de ȳiqui cúñu Jesús.

⁵³ Te ni snúu de ya jicā cruz, te ni chusúcun de ya ĩn sahma cuitá. Te ni chindūji de ya ini ĩn yaū jeē ní caan jicā ĩn cava, nuū ná tu quindūji nd̄iyi.

⁵⁴ Te quiv̄i un cúu quiv̄i casátūhva ñayuu, chi jeh̄ini un qūej̄eé quiv̄i nd̄etātú.

⁵⁵ Te ñahan ní quijicoo jíin yá nde Galilea, ni jengoo ña jíin José, te ni cajito vāha ña yaū ún, jíin ndese ni cachindūji de ya.

⁵⁶ Te cuanungoo ña vehe ña, te ni casátūhva ña t̄acá perfume jíin aceite yucū jeén as̄in. Te ni candetātú ña quiv̄i nd̄etātú, nájnūhun ndácu ley Yaā Dios jniñu.

Jeē ní natecu Jesús

(Mt. 28.1-10; Mr. 16.1-8; Jn. 20.1-10)

24

¹ Te jenéhen ndasí quiv̄i domingo, te ni jinūcoo tucu ñahan un núu ní ȳindūji Jesús, te cándahá ña t̄acá perfume jíin aceite ni casátūhva ña. Te suni cuangoo sava ga ñahan jíin ña.

² Te nuū ni jínūcoo ña, te ni cajito ña jeē ní cujiyo yuū ndihyú yuyáú nd̄iyi.

³ Te ni quiv̄icoo ña yaū ún, te tuá ȳiqui cúñu Jitoho yō Jesús ni cájito ña.

⁴ Te ni cacunéé ni ña cájito ña jeē tuá nd̄iyi. Sáa te ni cajito ña uū ndajéhé Yaā Dios jeē cáa nájnūhun t̄ee, cáh̄in ya xiin ña, te cáñūhun ya sahma nd̄ind̄eé.

⁵ Te yóhoyo ni cayūhú ña, te ni cajexin ña nuū ña nde nuū ñūhun. Te ni cacahān ndajéhé un jíin ña:

¿Naun sa nuū cáȳindūji nd̄iyi cámanducú ró Yaā t̄ecu?

⁶ Tuá yā yāhá, chi je ni natecu yā. Te nucūhun ni rō ndese ni cahān yā jíin ró ná ĩne ga yā región Galilea.

⁷ Chi ni cachi ya jeē maá yá, Yaā ní nduu tēe, cánuú natūu ya nuū tāca tēe cáhīyo cuēchi, jeē jñi de ya cahni de ya jicā cruz, te nuū uní quivī te natecu yā. Achí ndajéhé un.

⁸ Yūcuán na te ni canucūhun ni ña tāca jnúhun ni cahān Jesús.

⁹ Te ni quendacoo ña nuū ní yindūji ya, te cuanungoo ña. Te ni canacani ña tāca jnúhun yáha núu ndihúxí ñn apóstol jíin núu tāca gá de.

¹⁰ Te ñahan ní canacani jnúhun yáha núu tēe cácuu apóstol, cúu ña María ñuu Magdala, jíin Juana, jíin María naná Jacobo, jíin sava ga ña.

¹¹ Te tāca apóstol chi cájeni ni de jeē jnúhun cánéé cáñúú cacahān ña, te tu ní cácdíje de.

¹² Te vēsú súcuan, te Pedro ni quenda de, te jínu de cuacondéhé de nuū ní yindūji ya. Te ni jito nihni de ini yaū, te ni jito de jeē sahna cuitá un cáyūcu máá na. Te cuanuhun de vehe de, te nahán náa ni de jeē ní jito de jeē tuá yā.

Jeē ní ndajnúhun yá jíin úu de ichi cuáhán Emaús
(Mr. 16.12-13)

¹³ Te suu quivī un cuángoo uū jnáhan de ñn ñuu naní Emaús, jeē jicá nájnūhun uxī ñn kilómetro jíin ñuu Jerusalén.

¹⁴ Te cándajnúhún de siquī tāca jniñu jeē ní cuu ún.

¹⁵ Te níiní cándajnúhún de te cácajnūhun jnáhan de, te máá Jesús ni cuyajni ya yatā de, te jíca ya cuahān yā jíin de.

¹⁶ Te ni sáha jíin de jeē tu ní cánacuni de ya, vēsú cájito de nuū yā.

¹⁷ Te ni cajnúhun yá de:

¿Na jnúhun cándajnúhun ró cájica ró? ¿Te najehē cácuuñhyá ni rō? Achí yá.

¹⁸ Te ñn de jeē naní Cleofas ni cahān de jíin yá:

Ndihī cuiti ñayuu cájini i tāca jniñu ní cuu ini ñuu Jerusalén tāca quivī yáha. ¿Te á máñúhún-ni níhín cúu jeē ní quee ní ñuu un jéē tu jíin ni na vé ni cuu? Achí de.

¹⁹ Te ni cajnúhun yá de:

¿Te na vé ni cuu? Achí yá.

Te ni cacahān de jíin yá:

Jeē ní ndoho Jesús ñuu Nazaret, Yaā ní nacani jnúhun Yaā Dios. Te jíin poder Yaā

Dios ni sáha ya tāca jniñu jéhnú te ni nacani ya jnúhun, jíto jíinúu Yaā Dios jíin tāca ñáyuu.

²⁰ Te sutū cácujeñnu jíin tēe cándiso jniñu nuū ná, ni canastúu de ya nuū tāca tēe Roma, te tēe un ní casándaā de jeē cúu yā jicā cruz.

²¹ Te máá ná ní cañūhun ni na jéē maá yá jnama ya nación na Israel nuū ñáyuu Roma nuú. Te siquī tāca jniñu yáha, te ni cane ñnga jnúhun. Chi vijna je íyó úní quivī jeē ní cuu ún.

²² Te sava ñahan cájini jnáhan ná jíin, ni canacani ña ñn jnúhun jeē yóhoyo cánaa ni na sáha, chi cácahān ña jeē ní natecu yā. Chi jenéhen ndasí ní jengoo ña yaū ndīyí ún.

²³ Te tuá ni cájito ña yiqui cúñu yā. Te ni ndecoo ña nuū na jíjnáhan ná, te cácahān ña jeē ní cajito ña jeē ní canecoo ndajéhé Yaā Dios nuū ña, te ni cacahān jeē ní natecu Jesús.

²⁴ Te ni jengoo sava jnáhan ná ndé yaū ndīyí ún, te ni cajito de jeē súcuan íyó, nájnūhun ni cacahān ñahan ún, te tu ní cájito cuiti de nuū yā.

²⁵ Yūcuán na te ni cahān maá yá jíin de:

Tēe tu cájecūhun cuiti ni cácuu ró. Yóhoyo uhū cácdíje ró tāca jnúhun Cristo ni cacahān tēe ni canacani jnúhun Yaā Dios nde jenahán.

²⁶ ¿Te á tu súcuan ní jíni ñúhún ndoho Cristo tāca jnúndóho yáha, te sáa te quínuhun yā nuū lúu cujéñnu ya? Achí yá.

²⁷ Te ni nacani cájī yá tāca jnúhun jeē yosó núu tútu iī jeē cahán siquī maá yá. Te ni quejéé yá jíin jnúhun ni tee Moisés, te ni cahān gā yā tāca jnúhun jeē ní catee tēe ni canacani jnúhun ya nde jenahán.

²⁸ Te nuū ni jínūcoo de ñuu nuū cuángoo de ún, te Jesús ni sáha ya jeē cáca ga yā quihīn yā.

²⁹ Te máá de ni castétu de ya, ni cacahān de jíin yá:

Ndōo ní vehe ná, chi je ni ini te je yajni cuaa, áchí de.

Yūcuán na te ni quivī ya jeē quéndōo ya jíin de.

³⁰ Te nuū ní cucōo ya mesa jeē cáji yā jíin de jíjnáhan de, te ni quihīn ya staā, te ni jicān tahú yā, te ni tahú cuéchí yá, te ni jēhe ya nuū de.

31 Te jeē sāha ya súcuan, te nájñuhun ni cananune tinūú de, te ni canacuni de ya. Te ni ndoñúhún-ni ya nuū de cuahān yā.

32 Te ni cacahān maá de:

Jendaá jeē yóhyo ni cacusiñ ni yō ná ni nacani ya jñuhun nuū yō ichi ún te ni castūhun cáji yá jñuhun cáhán tutu iñ. Achí de.

33 Yūcuán na te yachiñ ni canaquihin de ichi, ni canandicó de cuanungoo de ñuu Jerusalén. Te ni canajnáhan de jíin ndihúxi ñn ga apóstol, cáyūcu tūtú de jíin sava ga jnáhan de.

34 Te ni cacahān tēe cáyūcu tūtú un:

Jendaá ndije jeē ní natecu maá Jítoho yō, te ni nane ndijin yā nuū Simón, achí de jíjnáhan de.

35 Yūcuán na te ndindúú tēe un ní canacani de jñuhun ndese ni najnáhan ya jíin de ichi, jíin ndese ni canacuni de ya ná ni tahu cuéchi yá staā.

*Jeē ní nane ya nuū tēe cáscuáha jíin yá
(Mt. 28.16-20; Mr. 16.14-18; Jn. 20.19-23)*

36 Te sá cácahān gā de tāca jñuhun yáha, te ni jecuiññ-ni Jesús mēhñú de jíjnáhan de. Te ni cahān yā jíin de:

Ndeyí sñ coo ni rō jijnáhan ró, áchí yá.

37 Te ni candacoto Iyo de, ni cayūhú ndasí de, chí ni cajeni ni de jeē ñn ánuá cúu ya.

38 Te ni cahān yā jíin de:

¿Naun cáyūhu ró, te naun cájeni siquí ni rō súcuan?

39 Condéhé ndaha ri jíin jéhē rī, te cuni rō jeē maá rí cúu. Jññ ruhū te cuni rō, chí ñn ánuá tu névāha cūñu ni yiqui nájñuhun cájito ró jēe névāha maá rí, achí yá.

40 Te jeē ni cáhān yā súcuan, te ni steén yā ndaha ya jehē yā nuū ni yíhi ndūyu cāa.

41 Te yóhyo ni cacusiñ ni de, te cánaa ni de. Te vēsú súcuan te ná tu candíje vāha vāha de jeē maá yá cúu. Te ni cahān yā jíin de:

¿A cánevāha ró jecu jeē cáji rī yāhá? áchí yá.

42 Yūcuán na te ni cajēhe de ñn pedazo chācá ní tau nuū yā, jíin ñn pedazo ñahmā ndūxi yocō.

43 Te ni quihin ya, te ni yeji yā nuū de jíjnáhan de.

44 Te ni cahān yā jíin de:

Tāca jēe ní cuu jíin rí cúu jeē ni cáhān rī ná ni ine ri jíin ró jíjnáhan ró ndé saá, jeē cánuú squícu tāca jñuhun ri jeē yosó núú tūtú ley Moisés, jíin núú tācá tutu tēe ni canacani jñuhun Yaā Dios, jíin núú tūtú salmo, achí yá.

45 Te ni nune ya jeē níjnūní de, návāha cuu jecūhun ni de tāca jēe cahán tutu iñ.

46 Te ni cahān yā:

Súcuan cáhān nuū tūtú jeē ruhū Cristo, cánuú cuu rī, te nuū uní quiví natecu rī.

47 Te cuitē núu jñuhun ri jeē cánuú nacani ni ñayuu jeē stóo i cuēchi i, te cone cáhnu ni Yaā Dios nuū i. Te ñuu Jerusalén quejéé cuitē núu jñuhun yáha, te quihñ nuū ñáyuu tācá nación.

48 Te máá ró cácuu tēe nacani jñuhun tācá jniñu ní cajito ró.

49 Te tají rí Espíritu Santo quiji ya nuū rō jijnáhan ró, nájñuhun ni jejnūhun Tátá rī. Te na quéndōo ró ñuu Jerusalén condetu ró ndé nihñ rō poder Espíritu Santo jeē quiji nde andiví. Achí yá.

*Jeē ní ndaa ya cuanuhun yā andiví
(Mr. 16.19-20)*

50 Yūcuán na te ni quenda ya ñuu Jerusalén, cuahān yā nde ñuu Betania jíin de jíjnáhan de. Te ni ndonehen ya ndindúú ndaha ya, te ni jicān tahu yā jehē de.

51 Te níní jícán tahu yā jehē de, te ni cujiyo-ni ya nuū de, ni ndaa ya cuanuhun yā andiví.

52 Te máá de ni cachiñúhún de ya. Te sáá te cuanungoo de ñuu Jerusalén, te yóhyo cácusñ ni de.

53 Te níní cáhñ de ini templo cáhnu, cánacuatáhú de nuū Yaā Dios. Te ni cuu. Amén.

JNUHUN VAHA NI TEE SAN JUAN

Yaā naní Jnúhun Yaā Dios ni nduu ya tēe

¹ Nde xihna ñúhún ná ni jecōo ndihi jeē iyó, te je iyó Yaā naní Jnúhun Yaā Dios, chi stéen yā ndihi jnúhun ndese Yaā cúu Yaā Dios. Te Yaā naní Jnúhun un ndéé yá jiín Yaā Dios, te Yaā Dios cúu ya.

² Máá yá ndeé yá nde jeē xihna ñúhún jiín Yaā Dios.

³ Te ni sáha Yaā Dios jeē jiín máá yá ni jecōo ndihi tāca jéé iyó. Te ma jécōo ni ñin jeē iyó núu tu ní sáha máá yá.

⁴ Máá yá sáha jeē técu ndihi-ni, te máá yá cúu luz jeē steén ini anuá ñayuu, cúu jeē sáha ya jeē jécūhun ni i síquī Yaā Dios.

⁵ Te Yaā cúu luz ún ndíndēe núu ñayuu tu cájica ndaā, jeē nájnūhun cáhīyo i nuū néē. Te ñayuu cáhīyo nuū néē tu cúu ndahva i luz yā.

⁶ Te ni iyo ñin tēe jeē ní tají Yaā Dios, naní de Juan.

⁷ Tēe un ní quiji de jeē nacani cájī de jnúhun máá Yaā cúu luz, návāha candíje tāca ñayuu jeē jiín jnúhun cáhán de.

⁸ Nasūu máá Juan cúu luz ún, chi cúu de ñin jeē ní nacani cájī jnúhun máá luz un.

⁹ Te máá Yaā cúu luz ndije jeē steén ini anuá tāca ñayuu, nde saá ní quiji ya ini ñayíví.

¹⁰ Te Yaā cúu Jnúhun Yaā Dios ni condee yā ini ñayíví, te vésú jeē jiín máá yá ni sáha Yaā Dios ñayíví, te ñayuu ñayíví tu ní cáconi i cuatáhú i jeē máá yá cúu.

¹¹ Ni quiji ya nuū ñayuu maá yá nación hebreo, te ñayuu ún tu ní cájetáhú i ya.

¹² Te vésú súcuan te sava ñayuu chi ni cajetáhú i ya, te ni cacandíje i jeē sáha ya jehē i. Te nuū maá i ni jēhe ya jnúhun jeē ndúu i sēhe Yaā Dios.

¹³ Te jeē ndúu i sēhe Yaā Dios, nasūu jiín modo jeē cáacu ñayuu ini ñayíví, ni nasūu síquī jeē cáconi tēe, chi máá Yaā Dios sáha ya jeē ndúu i sēhe ya.

¹⁴ Te máá Yaā cúu Jnúhun Yaā Dios ni nduu ya tēe, te ni condee yā jiín yó. Te ni cajito yó jéé yóhō luu cújéhu ya, chi

máñúhún-ni ya cúu Sēhe Tátá yā, Yaā cújéhu súcuan. Te máni máá jéé sáha ya jeē váha yóhō, te máni máá jnúhun ndaā cáhán yā.

¹⁵ Te Juan ni nacani de jnúhun ya, te ni cáhán de:

Yaā yáha cúu jeē ni cáhán rī náa áchí rí jeē Yaā quiji chi cújéhu ga yā vésú ruhū, chi je iyó yá nde ná tu cacu ri, achí de.

¹⁶ Te ndihi yó ní canihín yō cuehē ndasí jeē váha iyó núu yā, chi máni jeē váha sáha sáha ya jiín yó.

¹⁷ Moisés ni steén de ley Yaā Dios nuū ñayuu jenahán, te Jesucristo chi sáha ya jeē váha yóhō te steén yā tāca jnúhun ndaā Yaā Dios nuū yō.

¹⁸ Tú ni ñin ñayuu ni jíto cuítī nuū Yaā Dios. Te máñúhún-ni Sēhe ya jeē ndeé yá jiín Tátá yā, suu ya ni steén nuū yō ndese Yaā cúu Yaā Dios.

Jnúhun Jesús jeē ni cáhán Juan tēe scuándute

(Mt. 3.11-12; Mr. 1.7-8; Lc. 3.15-17)

¹⁹ Te ñayuu hebreo ñuu Jerusalén, ni catajī i jecu sutū jiín tēe grupo levita jeē cájējnīñu ini templo, ni jengoo de nuū Juan, návāha cajnúhún de ndé ñin cúu Juan te na jniñu ndíso de.

²⁰ Te Juan cájī ní cachi de:

Nasūu rúhū cúu Cristo, achí de.

²¹ Te ni cacajnúhún tucu de:

Núu súcuan ¿te ndé ñin cúu ró? ¿A cúu ró Elías, tēe ni nacani jnúhun Yaā Dios nde jenahán, chí naún?

Te ni cáhán Juan:

Nasūú de cúu rí.

Te ni cacajnúhún tucu de:

Núu súcuan ¿te á cúu ró tēe nacani jnúhun Yaā Dios jeē achí tutu ñi jeē quiji?

Tuú, achí tucu Juan.

²² Te ni cacahán tucu jiín de:

¿Te ndé ñin cúu ró núu súcuan? Cachi nuū rī jijnáhan ri, chi jini ñúhún castūhun rí nuū tāca tēe ni catajī rúhū vējicoo ri. Cachi na jniñu ndíso ró ví.

²³ Te ni cáhán Juan:

Máá rí cúu tēe jeē ni cáhán Isaías, tēe ni nacani jnúhun Yaā Dios nde jenahán, jeē quiji ri cana jee ri nde nuū ñúhún téhé. Te cáhán rī jiín ñayuu jeē na sátūhva i máá i, chi quiji máá Jítoho yō. Achí Juan.

24 Te tēe grupo fariseo cácuu jeē ní catajǐ tēe ní quiijicoo ún.

25 Te ní cacajñuhún de Juan:

Núu súcuan ¿te naun scuándute ró te núu nasūu Cristo ní Elías ní máá tēe quiiji nacani jñuhun Yaā Dios cúu ró?

26 Te ní cahān Juan:

Ruhū chi jíin ndute scuándute ri. Te mēhñu ró jijnáhan ró íne ñn Yaā jeē tu cájini rō.

27 Te Yaā un cúu jeē ní cahān rī jeē quiiji ya te cújēhnu ga yā vēsú ruhū. Chi tú na vé jēhnu cuiñi cúu ri nuū yā, ní jeē cuajñíñu ri nuū yā vēsú ñn jniñu lúli gá nájnūhun jeē ndajǐ rí correa ndijēn yā. Achí de.

28 Súcuan ní cuu jeē ní candajñuhún de jíin Juan nde Betábara jeē íne ichi núu cáne niāndii yūte Jordán, nuū scuándute Juan.

Siquē jeē cúu ya Londe Yaā Dios

29 Te inga quiivī un ní jito Juan nuū Jesús jeē véji ya nuū de. Te ní cahān de jíin ñáyuu:

Condēhe jíjnáhan ró, chi yāha véji Yaā cúu Londe jeē ní tajǐ Yaā Dios, te cuu yā jeē sándoo ya cuēchi ñayuu ñayiví.

30 Yaā yāha cúu jeē ní cahān rī jeē quiiji ñn Yaā cújēhnu ndasí, chi je íyó yā nde ná tu cacu rí.

31 Te nde saá te tu ní jíni rī jeē yāha cúu Yaā ní tajǐ Yaā Dios. Te ní quiiji rí jeē scuándute rí ñayuu ñuu yō Israel jíin ndute, návāha stéén rī nuū i jeē suu ya cúu, achí Juan.

32 Te suni ní cahān gā de jñuhun ya:

Ní jito rí Espíritu Santo, ní cuun ya ichi ándiví, cáa ya nájnūhun paloma, te ní quee ya xinī Jesús.

33 Te nde saá te ná tu cuni rī jeē Jesús cúu. Te máá Yaā Dios jeē ní tajǐ yá ruhū jeē scuándute rí jíin ndute, ní cahān yā jíin rí: Núu ní jito ró jēe cúun Espíritu Santo te quendōo xinī ñn tēe, yūcuan cúu Yaā jeē cuáha Espíritu Santo condee ini anuá ñayuu, achí Yaā Dios.

34 Te je ní jito rí ún, te nácani cájǐ rí jñuhun jeē maá yá cúu Sēhe Yaā Dios. Achí Juan.

Uū tēe jeē ní cana ya xñna gā

35 Te inga quiivī ún te Juan íne tucu de yūcuan jíin úu tēe cájica jíin de.

36 Te ní jito de nuū Jesús jeē jíca ya yūcuán. Te ní cahān de:

Condēhe jíjnáhan ró, chi yūcuan cúu Yaā cúu Londe jeē ní tajǐ Yaā Dios.

37 Te ndindúú tēe cájica jíin Juan ní cajini sōho de jñuhun yāha, te ní candiquīn de Jesús.

38 Te ní ndió cóto Jesús, te ní jito ya jeē cándiquīn de yatā yā. Te ní cahān yā jíin de: ¿Na vé cánanducú ró?

Te ní cacahān de jíin yá:

Maestro, ¿ndé nuū ndeé ní?

39 Te ní cahān yā jíin de:

Quíngoo yó te cuni rō.

Te ní jengoo de, te ní cajito de nuū ndeé yá. Te ní caquendōo de jíin yá quiivī ún, chí nájnūhun cacuūn jehíni cúu.

40 Te Andrés, ñani Simón Pedro, cúu ñn jeē ndindúú tēe un jēe ní cajini sōho jñuhun ní cahān Juan, te ní candiquīn Jesús.

41 Te Andrés, yachī ní jenanducú de ñani de Simón, te ní cahān de jíin:

Ní caquiñáhan rí jíin Mesías, achí de. Te jñuhun un cúni cahān Cristo, Yaā ní tajǐ Yaā Dios.

42 Yūcuán na te cuanuhun de nuū Jesús jíin Simón. Te nuū ní jito Jesús nuū Simón, te ní cahān yā:

Máá ró cúu Simón sēhe Jonás. Te nde vijna te conaní ró Cefas, achí yá. Te jñuhun un cúni cahān Pedro, jeē cúni cahān yuū.

Jeē ní cana ya Felipe jíin Natanael

43 Te inga quiivī un cúni Jesús quihīn yā región Galilea. Te ní nihīn jnáhan ya jíin Felipe, te ní cahān yā jíin de:

Condiquīn ruhū na quíhín yō.

44 Te Felipe cúu tēe ñuu Betsaida, jeē cúu ñuu Andrés jíin Pedro.

45 Te ní jenanducú de Natanael, te ní cahān de jíin:

Ní canihīn jnáhan rí jíin Yaā jeē yosó jñuhun ya nuū tútu ley jeē ní tee Moisés, jíin núu tútu ní catee tēe ní canacani jñuhun Yaā Dios nde jenahán. Te Jesús sēhe José ñuu Nazaret cúu ya. Achí de.

46 Te ní cahān Natanael jíin de:

¿Te ndese cúu cújēhnu ñn tēe jeē ní cacu ñuu ndahú Nazaret?

Te ní cahān Felipe:

Quíhín yō de cuni rō, achí de.

47 Te ní jito Jesús jeē véji Natanael, te ní cahān yā:

Yāha véji ñn tēe ndaā jeē cúu ndije yucūn Israel, chí tu stáhú cuiti de, áchí yá.

48 Te ni cahān Natanael jíin yá:

¿Ndese jíiní ni sáña?

Te ni cahān Jesús:

Je ni jito ri rohó ndé ná tu cana Felipe xinī rō, ná ñne ró jéhē nundéhe higo, achí yá.

49 Yūcuán na te ni cahān Natanael jíin yá:

Maestro, máá ní cúu Sēhe Yaā Dios, máá ní cúu Rey ñuu yō Israel, achí de.

50 Te ni cahān Jesús:

¿A máá jēē ni cáhān rī jeē ní jito ri rohó ná ñne ró jéhē nundéhe higo, te jeē yúcuan cándíje ró rúhū naún? Tuú chí coo jniñu jéhnú ga coto ró vēsú jeē yáha, áchí yá jíin de.

51 Te ni cahān gā yā:

Jendaá cahán rī jíin ró jijnáhan ró jēē nde vijna te coto ró jēē núne andiví, te tācá ndajéhé Yaā Dios cándaa cánuu nuū ruhū, Yaā ní nduu tēe, áchí yá.

Jeē ni jéhēn yā ñn vico nándāha ñuu Caná

2

1 Te ni yāha unī quiví, te ni Iyo ñn vico nándāha ñuu Caná ndañúū Galilea. Te yúcuan ñne náná Jesús.

2 Te suni ni cacana i Jesús jíin tēe cáscuáha jíin yá, ni jehēn yā vico un jíin de.

3 Te ni ndoco vino. Te náná Jesús ni cahān ña jíin yá:

Ni ndoco vino i, áchí ña.

4 Te ni cahān Jesús jíin ña:

¿Naun cáhān ni súcuan jíin ná nánā? Chí ná tu quee quiví jeē sáha ná jniñu jéhnú, áchí yá.

5 Te náná yā chí ni cahān ña jíin ñáyuu cájeni cohō:

Sáha ró jijnáhan ró táca jēē cahān yā jíin ró. Achí ña.

6 Te yúcuan íyó ññū tenéjā yuū jeē ññuhun ndute cájichi ñáyuu hebreo jeē ndúndoo i nuū Yaā Dios. Te ñn ñn tenéjā un cánda cuhun cuñ xico chí ciento litro ndute.

7 Te ni cahān Jesús jíin ñáyuu cájeni cohō: Scútú ndñ rō tācá tenéjā yáha.

Te ni cascútú ndñ i.

8 Te ni cahān yā jíin i:

Vijna te quēen ró jecu te quindecá ró coto ndee tēe ndíto vico, áchí yá.

Te ni cajendeca i nuū de.

9 Te ni séyūhú de ndute jeē ní nduu vino, te tu jíiní de ndé ní canihīn i. Chí máni mozo un cúu jeē cájini, chí máá i ni caquēen ndute ún. Yūcuán na te tēe ndíto vico ni cana de tēe nándāha.

10 Te ni cahān de jíin:

Tāca ñáyuu chí xīhna gā vino váha cájēhe i, te núu je ni cajihí váha ñáyuu cáhīn vico, yūcuán na te jéhe de vino ndahú na. Te máá ró tucu ni sáha ró, chí nde jeē sándñhí te jéhe ró vino jeē yóhyo váha ga jíhi, áchí de.

11 Jniñu yáha jēē ni sáha Jesús ini ñuu Caná ndañúū Galilea cúu jniñu jéhnú xīhna ññuhún jēē ni sáha ya jeē steén yā poder yā. Te súcuan ni steén yā jeē yóhyo cújéhnú ya. Te tēe cáscuáha jíin yá ni cacandíje de ya.

12 Te ná ni yāha jniñu yáha, te cuahān yā ñuu Capernaum jíin náná yā jíin táca ñani yā jíin tēe cáscuáha jíin yá. Te ni coyūcu yá yūcuán jecu quiví.

Jeē ní quenehen ya ñáyuu ini templo

(Mt. 21.12-13; Mr. 11.15-18; Lc. 19.45-46)

13 Te jeē cuácuyajni vico pascua casáha jnāhan ñuu yā hebreo, te cuahān yā ñuu Jerusalén.

14 Te ini templo cáhnu ni jito ya ñáyuu cáxícó stiquí jíin lanchi jíin paloma, jíin ñáyuu castáyí xūhun, cáyūcú i nuū mesa i.

15 Te jeē súcuan ni jito ya, te ni sáha ya ñn cuarta ññ. Te ni scúnu ya tācá i ini templo, nde jíin lanchi jíin stiquí i. Te ni jete yā xūhun ñáyuu castáyí. Te ni scotúú yá táca mesa i.

16 Te ni cahān yā jíin ñáyuu cáxícó paloma:

Tava tācá quiti yáha. Te ma sáha ró yáhu ini vehe Tátá rī. Achí yá.

17 Yūcuán na te tēe cáscuáha jíin yá, ni canucūhun ni de jnūhun yósó núū tútu ññ: Je yajni cuu na jēē yóhyo ndñhví ni na síquí vehe ní, áchí yá jíin Tátá yā, achí tutu.

18 Te tēe ñuu yā hebreo ni cacajnūhún de ya:

¿Na jniñu jéhnú sáha ró jēē steén rō poder rō, te cucáhnú ni rī jeē ndíso jniñu ró sáha ró súcuan? áchí de jíin yá.

19 Te ni cahān yatá Jesús:

Canu rō templo yáha, te nuū uní quiví te nucondichi sáha rī, achí yá.

20 Yūcuán na te ni cacahān tēe hebreo un:

Uū xico iñū cuiyā te ni jīnu ni cuvāha templo yāha. Te rōhó, ¿á núū uní-ni quiṽi te nucondichi sáha ró naún? Achí de.

²¹ Te templo jeē cahán Jesús cúu máa yiqui cúñu yā, chi cahni ñayuu yā te natecu yā nuū uní quiṽi.

²² Jeē yúcuan cúu jeē ná ni natecu yā jeē ni jíhī yā, te tēe cáscuáha jíin yá ni canucūhun ni de jeē ni cáhān yā jnūhun yāha. Te ni cacandije de jnūhun jeē yosó núū tútu iī, jíin jnúhun yāha jēē ni cáhān Jesús.

Jeē jíni Jesús ndese cáa ini anuá ñayuu

²³ Te ná íne Jesús ñuu Jerusalén máa vico pascua, te cuehē ñayuu ni cacandije i jeē cúu ya Cristo, chi ni cajito i tācá jniñu jéhu sáha ya jeē steén yā poder yā.

²⁴ Te máa Jesús chi tu ní jétáhú yá i, chi je jíni yā ndese cáa ini anuá i jíjnáhan i.

²⁵ Te tu jíni ñúhún yá jeē cáchi ni ññ ñayuu nuū yā ndese íyó tāca ñayuu, chi máa yá je jíni yā ndese cáa ini anuá i.

Jeē ní candajnúhún Jesús jíin Nicodemo

3

¹ Te ni íyo ññ tēe grupo fariseo, naní de Nicodemo, te cújéhu de nuū ñayuu ñuu de hebreo.

² Tēe yāha ní quiji de nuū Jesús ññ jecuāā, te ni cahān de jíin yá:

Maestro, je cájini na jēē maá Yaā Dios ni tají yá nihín jēē steén ni jnúhun ya nuū na jíjnáhan ná. Chi núu tu íyó Yaā Dios jíin ní, te ma cúu sáha ní ni ññ jniñu jéhu nájnúhun sáha máa ní jeē steén ni poder ní, achí de.

³ Te ni cahān Jesús:

Jendaá cahán rī jíin ró jeē núu tu nacacu jeē ññ ñayuu, te ma cúu quiṽi i ndaha Yaā Dios jeē ndacu ya jniñu nuū i, achí yá jíin de.

⁴ Te ni cahān Nicodemo jíin yá:

¿Te ndese cuu nacacu ññ tēe te núu je ni jehnu de? ¿A cuu nucūhun tucu de chíji náná de te nacacu tucu de? achí de.

⁵ Te ni cahān Jesús:

Jendaá cahán rī jíin ró jeē núu tú nacacu ññ ñayuu, te ma cúu quiṽi i ndaha Yaā Dios jeē ndacu ya jniñu nuū i. Te jeē nácacu i cúu jeē ndúndoo cuēchi i nájnúhun jíin ndute, te condee Espiritu Santo ini anuá i.

⁶ Jeē cácu sáha ñayuu, chi sēhe ñayuu cúu. Te jeē cácu sáha Espiritu yā, chi sēhe ya cúu.

⁷ Ma náa ni rō cani ni rō ndese cúu jnūhun ni cahān rī jíin ró jeē cánuú jēē nacacu jeē ró jíjnáhan ró.

⁸ Te tachī chi quēe cuahān ndé-ni cúu nuū cuní maá, te jíni sōho ró jēē cáyu, te tu jíni ró ndé nuū véji ni ndé nuū quihín. Te suni súcuan cúu tāca ñayuu jeē nácacu sáha Espiritu, chi tu jíni ró ndese sáha ya jniñu ún, achí yá.

⁹ Te ni cahān tucu Nicodemo:

¿Ndese ga cúu núu súcuan?

¹⁰ Te ni cahān Jesús:

Máa ró cúu ññ maestro jeē cújéhu nuū ñayuu ñuu yō Israel, te ¿á tu jécūhun ni rō jnūhun yāha naún?

¹¹ Jendaá cahán rī jíin ró jeē jnūhun cájécūhun ni rī cúu jeē cácahān rī jíin ró. Te cánacani cájí rí jnūhun jniñu ní cajito rí. Te tu cacandije ró jnúhun cácahān rī.

¹² Chi ni cahān rī jnūhun ndese sáha Yaā Dios ini ñayṽi, te tu cacandije ró. Núu súcuan ¿te ndese candije ró núu cahān rī jnūhun tācá ndese sáha ya nde andiví?

¹³ 'Chi ni ññ tu ní cáa andiví jeē cúni ndese íyó yúcuan, chi máñúhún-ni ruhū, Yaā ní nduu tēe. Chi andiví ndéé rí, te ni cuun rí véji rí.

¹⁴ Te nájnúhun ni cata caa Moisés ññ coō cāa nuū ññ yujnu, ná ni cajica ñayuu nuū ñúhun téhé, suni súcuan máa rí, Yaā ní nduu tēe, cánuú jēē cóndita caa rí jicā cruz.

¹⁵ Te súcuan cánuú návāha tāca ñayuu jeē candije i jeē jnáma rí i, ma jnahnú ndetū i, chi sa suhva cotecu i ññ cáni andiví.

Yōhyo ni cundáhú ni yā ñayuu ñayṽi

¹⁶ 'Chi Yaā Dios yōhyo ni cundáhú ni yā ñayuu ñayṽi. Jeē yúcuan ní tají yá Sēhe ya ní quiji, vésú mañúhún-ni ya iyó, návāha tāca ñayuu jeē candije i jeē jnáma ya i, ma jnahnú ndetū, chi sa suhva cotecu i ññ cáni andiví.

¹⁷ Chi tu ní tájí Yaā Dios Sēhe ya ini ñayṽi jēē snahnú ndetū yā ñayuu, chi sa suhva jeē jnáma ya ñayuu.

¹⁸ 'Ñayuu jeē candije i jeē jnáma ya i, ma jnahnú ndetū i. Te ñayuu tu cándije, je ni jnahnú ndetū i, chi tu ní cándije i máa Séhe Yaā Dios, te máa ññ-ni ya iyó.

19 Máá Yaā jeē stíndēe ini anuá ñayuu, je ni quee ya ini ñayīví. Te cánujnahan gā ni ñayuu caca i nájñūhun nuū néē vēsú nuū luz yā, chi jniñu cásáha i cúu jniñu néé. Jeē yúcuán cúu jeē jnahnú ndetū ñayuu tu cácadíje ún.

20 Chi tāca ñáyuu casáha jniñu néé, tu núnjahan cuiti ni i luz yā. Te tu jéhe i jñūhun jeē stíndēe yá ini anuá i, chi tu cúní i jeē natūu jniñu néé cásáha i.

21 Te ñayuu jeē cájica jíin jniñu ndaā, jéhe i jñūhun jeē stíndēe yá ini anuá i, návāha natūu ndijin jeē tācá jniñu cásáha i cúu jniñu cúní Yaā Dios. Achí yá jíin de.

Jeē ni cáhān tucu Juan jñūhun Jesús

22 Yūcuán na te Jesús jíin tée cáscuáha jíin yá, cuahān yā región Judea. Te ni condee yā yūcuán jecu tiempo jíin de, te cáscuándute de ñayuu.

23 Te suni scuándute Juan, íne de lugar jeē naní Enón yajni ñuu Salim, chi yūcuán íyó cuéhē ndute. Te ni quiijicoo ñayuu nuū de, te ni scuándute de i.

24 Súcuán ni sáha Juan nde ná tu quīví de vecāa.

25 Yūcuán na te sava tēe cáscuáha jíin Juan yōhyo ni cacahān de jíin sava jnáhan de hebreo siquī núu ndé ñn cúu modo vāha ga jeē cúchi ñayuu ndundoo i nuū Yaā Dios.

26 Te ni quecoo de nuū Juan, te ni cacahān de:

Maestro, tēe ní ine jíin ní yūte Jordán ichi núu cáne niāndii, jeē ní nacani ní jñūhun de nuū ná, vijna te scuándute máá de, te ndivii ñayuu cuango i nuū de.

27 Te ni cahān Juan:

Ni ñn tēe ma cúu sáha de jniñu Yaā Dios te núu ma tejníñu ya de.

28 Máá ró jijnáhan ró chi ni cajini sōho ró jéē ni cáhān cají rí jeē násūu máá rí cúu Cristo, chi cúu ri ñn jeē ní tají Yaā Dios jeē cósnūú nacani jñūhun jeē quíji ya.

29 Te núu cásáha vico quíjnáhan, te máá yñi cúu jeē ndéca ñasihí. Te amigo yñi un íne jíin de, te jíni sōho jñūhun cáhān de. Te yōhyo cúsiñi ni jíni sōho jñūhun cáhān yñi ún. Te suni súcuán ruhū, chi cúu ri nájñūhun amigo yñi, chi ni quee maá Cristo, te yōhyo cúsiñi ni rí jíni sōho ri jñūhun cáhān yā.

30 Te jíni ñúhún jéē ndujéhu ga maá yá te ndululí gá maá rí, achí Juan.

Jeē ní quiji ya nde nuū sucún

31 Te Yaā jeē véji nde andiví, cújéhu ya nuū ndihí. Chi tāca jéē ní cacu ini ñayīví yáha, sēhe ñayīví cúu, te máni jñūhun ñayīví cáhān. Te Yaā jeē véji ichi ándiví, chi cújéhu ya nuū ndihí ñayuu.

32 Te nácani ya jñūhun jeē ní jito ya jíin jéē ní jini sōho ya. Te ñayuu chi tu cácadíje i jñūhun cáhān yā.

33 Te núu ñn ñayuu candíje i jñūhun cáhān yā, suu cúu jeē jejnúhún i jeē Yaā ndaā cúu Yaā Dios.

34 Chi Yaā ní tají Yaā Dios vēji, máni máá jnúhun Yaā Dios cahān yā. Chi Yaā Dios tu yícuáha jéhe ya Espíritu yā nuū Yaā ní tají yá.

35 Máá yá jeē cúu ya Tatá, yōhyo maní yā jíin Séhe ya, te ndivii ni jéhe ya ndaha Séhe ya jeē ndacu ya jniñu nuū.

36 Ñayuu jeē candíje máá Séhe ya jeē jnáma ya i, cotecu i ní cáni andiví. Te ñayuu tu cúní candíje Séhe ya, ma cótecu i ní cáni andiví, chi sa suhva cuāha Yaā Dios castigo jeē ndoho i ní cáni.

Jeē ni cáhān Jesús jíin ñahan ñūu Samaria

4

1 Te tēe grupo fariseo, ni canihīn de jñūhun jeē íyó cuéhē gā tēe cáscuáha jíin Jesús vēsú jíin Juan, jíin jéē cuehē gā ñayuu scuándute ya vēsú Juan.

2 Te nasūu jéē scuándute máá yá, chi tēe cáscuáha jíin yá cúu jeē cascuándute.

3 Te ná ni jíni Jesús jeē súcuán ni canihīn de jñūhun, te ni quenda ya región Judea, te cuanuhun yā región Galilea.

4 Te ichi jeē nuhún yā chi yáha región Samaria.

5 Te ni jinū yā ñn ñuu región Samaria jeē naní Sicar, yajni ñuhun jeē ni jéhe Jacob nuū séhe de José nde jenahán.

6 Te yūcuán íne pozo jeē naní pozo Jacob. Te ni cucōo Jesús xiin pozo un, chi ni cuíta yá jeē cuahán yā ichi. Te nájñūhun cahuxī uū cúu.

7 Te ni quee ñn ñahan Samaria, vēji ña vequihin ña ndute. Te ni cahān Jesús jíin ña: Cuāha ní ndute coho ná, achí yá.

8 Te tēe cáscuáha jíin yá, chi je cuango de nde ñuu, cuacuaan de jeē cáji de jíin yá.

9 Te ñahan Samaria un ní cahān ña jíin yá: ¿Ndese cúu jeē jicán ni ndute nuū ná coho ní? Chi tēe hebreo cúu ní, te ñahan Samaria cúu ná, áchí ña.

Súcuan ni cahān ña, chi ñayuu hebreo tu cácahān i jíin ñáyuu Samaria.

10 Te ni cahān Jesús:

Núu jeē jíiní ni ndese cúni Yaā Dios sáha ya jeē váha níhín, jíin ndé ñn cúu sãña jéē jicán na ndute nuū ní, yūcuán na te máá ní cacān ni núu ná, te cuāha ná ndute jeē cótecu ni ní cáni sáha, áchí yá.

11 Te ni cahān ña jíin yá:

Tátā, yōhyo cúnú pozo yáha, te tú na vé ndahá ní jéē táva ní ndute. Núu súcuan ¿te ndé nuū nihín ni ndute jeē cótecu na sáha?

12 ¿Te á cújéhnú ga máá ní vēsú jíi yō Jacob, chí naún? Chi máá de ni stóo de pozo yáha nuū yō. Te yáha ní cajihí máá de ndute, jíin táca séhe de, jíin quiiti ndéca de. Achí ña.

13 Te ni cahān Jesús:

Tāca ñáyuu jeē jíhi ndute yáha, chi jichí tucu i.

14 Te ñayuu coho ndute jeē cuáha na núu i, chi ma jichí cuiiti gā i. Chi ndute jeē cuáha ná un, cane ini i nájnūhun ndute jeē cáne ñuhún, te sáha jeē cótecu i ní cáni, áchí yá jíin ña.

15 Te máá ña tu ní jécūhun ni ña, te ni cahān ña jíin yá:

Tátā, cuāha ní ndute ún coho ná, návāha ma jichí cuiiti gā ná, ni tuá jíini ñūhun quiqui-hin ná ndute pozo yáha, áchí ña.

16 Te ni cahān Jesús jíin ña:

Cuácana ní yñ ní te quiji ní jíin de, áchí yá.

17 Te ni cahān ña:

Tú yñ ná íyó.

Te ni cahān Jesús:

Ndaā cahán ni jéē tú yñ ní íyó.

18 Chi je ni cuu uhūn yñ ní, te tēe ndéca ní vijna chi nasūu yñ ní cúu de. Yáha cúu jeē ní cahān ndaā ní, áchí yá.

19 Te jeē súcuan ni cahān yā, te ni cahān ña:

Tátā, ñn tēe nácani jnūhun Yaā Dios cúu ní, jéni ní ná.

20 Tāca jíi na ñáyuu Samaria, yucu yáha ní cachiñúhún i Yaā Dios. Te máá ní ñayuu

hebreo, cácahān ni jéē ñuu Jerusalén cúu nuū cánuú chiñúhún yó yā, achí ña.

21 Te ni cahān Jesús jíin ña:

Nánā, candíje ní jnūhun cáhán na, chi quee quiñi jeē ni nasūu yucu yáha ni nasūu ñuu Jerusalén cúu nuū chiñúhún ní máá Yaā cúu Tátá, chi ndihí-ni lugar te cuu chiñúhún ní yá.

22 Máá ní ñáyuu Samaria tu cájini ni ndé ñn cúu jeē cáchiñúhún ní. Te máá ná jijnáhan ná chi cájini na ndé ñn cúu jeē cáchiñúhún ná. Chi nde nuū máá ná jijnáhan ná ñáyuu hebreo cúu nuū véji Yaā jnama ñayuu.

23 Te je ni quee quiñi jeē ñáyuu cáchiñúhún ndaā, vijna te chiñúhún ndije i Yaā cúu Tátá nde jíin ini jíin ánuá i. Chi máá Tátá cúni yā jeē súcuan chiñúhún ñáyuu yā.

24 Yaā Dios cúu Espíritu, te ñayuu jeē cuní i chiñúhún i ya, cánuú jéē chiñúhún ndije i ya jíin ini jíin ánuá i, áchí yá.

25 Te ni cahān ñahan ún:

Jíiní na jéē quiñi Mesías jeē cúu Cristo, Yaā jeē tají Yaā Dios. Te núu ni quee máá yá, te stéén cají yá tāca jnūhun nuū yō.

26 Te ni cahān Jesús:

Máá ná jeē cahán jíin ní, suu ná cúu Yaā ún.

27 Te sá cáhán gā yā súcuan, te ni nde-coo-ni tēe cáscuáha jíin yá. Te ni canaa ni de cájito de jeē ndájnūhun yá jíin ñahan yúcuan. Te ni ñn de tu ní cájnūhún de ya núu na vé cájnūhun yá ña chí na vé ndájnūhun yá jíin ña.

28 Yūcuán na te ñahan un ní stóo ña quiyí ña, te cuahān ña nde ñuu. Te ni cahān ña jíin ñáyuu ún:

29 Nehen na quíngoo yó te coto ró ñn tēe jeē ní cachi ndihí tāca jéē ni sáha rí. Sanaa te máá yá cúu Cristo, jeē cándetu yó quiñi, áchí ña.

30 Yūcuán na te ni quendacoo i ñuu ún, te cuango i nuū íne Jesús.

31 Te nde ná tu jinūcoo i, te tēe cáscuáha jíin yá ni cacahān ndahú de jíin yá:

Maestro, caji ni stáā víi, achí de.

32 Te ni cahān yā jíin de:

Iyó stáā caji rí jeē tu cájini rō ndese cúu.

33 Yūcuán na te tēe cáscuáha jíin yá, ni cacajnūhun jnáhan de:

¿A ní quindecá ññayuu jeē ní yeji yā, chí naún? áchí de.

³⁴ Te ni cahān Jesús:

Jeē ní cachi rī jeē iyó jēē cáji rī cúu jeē cúshñ ni rī sáha ri jñiñu cúní Yaā ní tají rúhū vēji ri, jíín jēē sínu ri jñiñu ún.

³⁵ Te cácahān rō jeē cúmanī cuūn gā yoō te tahndē trigo. Te ruhū chi cáhān rī jíín ró: Condēhe jíínáhan ró, chí ñayuu cuehē cácuu i nájnūhun trigo jeē jé ni cuaan jeē tahndé, chí je cáhīyo tūhva i candíje i ruhū.

³⁶ Te tē scándíje ñayuu cácuu de nájnūhun tē cájehnde trigo, te nihīn de yāhu de. Te jeē cánastútú de ñayuu cúu jeē cótecu i ní cáni andiví. Te tē cáscuíté núu jñūhun ri, ñnuú-ni cusñ ni de jíín tēe cástéén gā jñūhun ri.

³⁷ Chi ndaā cúu jñūhun jeē cahán: ññ tēe jéte, te inga tēe nástútú, áchí.

³⁸ Te suu cúu jeē ní tají rí rohó jíínáhan ró jēē scándíje ró ñayuu jeē jé ni canihīn jñūhun ya ni casáha inga tēe. Chi inga tēe je ni canacani de jñūhun nuū ñayuu, te máá ró chí nájnūhun cánastútú ró i cúu jeē scándíje ró i.

³⁹ Te cuehē ñayuu Samaria jeē cáyūcú ñnuu ún, ni cacandíje i Jesús jeē ní jini sōho i jñūhun ni cahān ññahan ún. Chi ni cahān ñña: Ni cachi ya ndihī tāca jēē ní sáha ri.

⁴⁰ Te jeē yúcuan cúu jeē ñayuu Samaria un ní jinūcoo i nuū yā, te ni cacahān ndahú i jíín yá jeē na quéndōo ya ñnuu i. Te ni ndōo ya yūcuan úū quivī.

⁴¹ Te cuehē gā i ni cacandíje i ya jíín jñūhun cáhān máá yá.

⁴² Te ni cacahān i jíín ññahan ún:

Tuá niní jēē cahán máá ró te candíje ri yā, chí je ni cajini sōho ri jñūhun cáhān máá yá. Te cájini yō jeē máá yá cúu ndije Cristo, Yaā jnama ñayuu ññayiví. Achí i.

Jeē ní nasávāha ya sēhe tēe ndíso jñiñu nuū rey

⁴³ Te nuū ni yáha uū quivī ún, te Jesús ni quenda ya Samaria, te ni quihin tucu ya íchi cuanuhun yā región Galilea.

⁴⁴ Chi je ni cahān máá yá jeē tēe canacani jñūhun Yaā Dios, tu cáhīyo yíñuhún ññayuu ñnuu de jíín de, te suni súcuan ni cuu jíín máá yá.

⁴⁵ Te ná ni najinū yā Galilea, te ñayuu un ní cajetáhú i ya, chí suni máá i ni jengoo i vico pascua ñnuu Jerusalén, te ni cajito i tācá jñiñu ní sáha ya quivī ni íyo vico ún.

⁴⁶ Yūcuán na te ni jehēn tucu ya ñnuu Caná ndañúū Galilea, nuū ni sáha ya jeē ndúte ni nduu vino. Te ini ñnuu Capernaum ni íyo ññ tēe cújēhnu jeē ndíso jñiñu nuū rey. Te cúhú sēhe de.

⁴⁷ Tēe un ní jini jñūhun de jeē ní najinū Jesús región Galilea jeē ni jehēn yā región Judea. Te ni jecondēhé de ya, te ni cahān ndahú de jíín yá jeē na quíhín yā jíín de vehe de, te nasávāha ya sēhe de, chí je yajni cuu i.

⁴⁸ Te ni cahān Jesús jíín de:

Núu tú coto ró jñiñu jēhnu jeē náā ni rō sáha, te ma candíje cuiti rō jíínáhan ró, áchí yá.

⁴⁹ Te tēe ndíso jñiñu nuū rey, ni cahān de: Cava vāha ni ní na quíhín yō, chí núu cucuée ní te cuu sēhe ná, áchí de.

⁵⁰ Yūcuán na te ni cahān Jesús:

Cuánuhun vehe ró, chí cotecu sēhe ró.

Te tēe un ní candíje de jñūhun ni cahān Jesús, te cuanuhun-ni de.

⁵¹ Te níní jíca de cuanuhun de vehe de, te ni quijicoo mozo de ni caquijnahan i de, te ni cacahān i:

Je ni nduvāha sēhe ní, áchí i.

⁵² Te ni cajñūhún de na hora ni quejéé ndúvāha i. Te ni cacahān i jíín de:

Cahññ jeē ícu ni quenda quíji i.

⁵³ Yūcuán na te máá tátá i ni sáha de cuenta jeē hora un cúu jeē ní cáhān Jesús jíín de jeē cótecu sēhe de. Te ni candíje de jíín ní vehe de jeē cúu ya Yaā ní tají Yaā Dios.

⁵⁴ Yāha cúu vuelta uū jeē ni sáha Jesús jñiñu jēhnu jeē ni stéén yā poder yā región Galilea, jeē ní najinū yā jeē ni jehēn yā región Judea.

Jeē ní nasávāha ya ññ tēe cátú yuhu pila Betesda

5

¹ Yūcuán na te cuahān tucu Jesús ñnuu Jerusalén, chí íyó tucu vico casáha jñáhan ñnuu yā hebreo.

² Te Jerusalén iyó ññ pila ndute yajni yéhyí jēē naní yéhyí lanchí. Te yuhu hebreo

naní Betesda. Te nuū íne pila un íyó úhūn corredor.

³ Te ini t̄acá corredor un c̄acāa cuehē ñayuu c̄acuhū, jeē cuaá, jeē chacuá, jeē ni íjin. Te c̄andetu i jeē canda ndute ún.

⁴ Chi íyó quíiv̄i jeē cúun ñn ndajéhé yā ini pila un, te sc̄anda ya ndute. Te ñayuu quíiv̄i x̄ihna gā ini pila un ná sc̄anda ya ndute, te ndúvāha i na-ni cuehȳi ndóho i.

⁵ Te yūcuan íyó ñn t̄e jeē ní cuu ocō xahūn unī cuiyā kuhú de.

⁶ Te ni jito Jesús jeē catú de, te ni jini yā jeē ní cuu cuehē cuiyā kuhú de. Te ni cahān yā jíin de:

¿A cúní rō nduvāha ró? áchí yá.

⁷ Te ni cahān t̄e kuhú un jíin yá:

Tu níhín na ni ñn t̄e squíiv̄i sañá ini pila hora jeē canda ndute. Chī t̄aca jínu jeē cuní na quíiv̄i ná, te quíiv̄i-ni inga ñayuu x̄ihna gā. Achí de.

⁸ Te ni cahān Jesús:

Ndocuñ̄i te naquihin ró camilla rō te caca ró, áchí yá.

⁹ Te t̄e un ní nduvāha-ni de. Te ni naquihin de camilla de, te ni quejé de jíca de. Te quíiv̄i ndétātu cúu quíiv̄i ún.

¹⁰ Yūcuán na te jnāhan de t̄e hebreo un ní cacahān jíin de:

Quíiv̄i ndétātu cúu vijna. Te áchí ley jeē ma cúu condiso ró camilla rō.

¹¹ Te ni cahān t̄e ni nduvāha ún:

T̄e ni nasávāha ruhū, ni cahān de jíin rí jeē náquihin ri camilla rī te caca rí, achí de.

¹² Yūcuán na te ni cacajnūhún un de:

¿Ndé t̄e ni cahān jíin ró jeē náquihin ró camilla rō te caca ró?

¹³ Te t̄e ni nduvāha ún, tu jíin de ndé ñn cúu jeē ní nasávāha de. Chī c̄ah̄in cuehē ñayuu yūcuán, te Jesús je cuahān yā.

¹⁴ Te cúcuéé gā te ni najnāhan Jesús jíin de ini templo cāhnu. Te ni cahān yā:

Vijna chi je ni nduvāha ró. Ma sáha ga rō cuēchi, chi núu tuú, te quiiji ñn jnūndóho xeēn gā siquī rō, achí yá.

¹⁵ Yūcuán na te cuahān t̄e ún, te ni castūhún de nuū jnāhan de hebreo un jéé Jesús cúu jeē ní nasávāha ya de.

¹⁶ Te siquī jeē ní sáha Jesús jniñu yáha quíiv̄i ndétātu, jeē yūcuan cúu jeē t̄e hebreo un cājito xeēn de ya, te c̄acuni de cahni de ya.

¹⁷ Te ni cahān Jesús jíin de:

Maá Tátá rī chi ní cáni te nde vijna sáha ya jniñu váha, te suni súcuan ruhū sáha ri jniñu váha.

¹⁸ Te siquī jeē ni cāhān yā súcuan, te t̄e hebreo un víhyá gā c̄acuni de cahni de ya. Chi nasūu maá ñn-ni jeē tu squíicu ya jeē cāhān ley siquī quíiv̄i ndétātu, chi suni jeē ni cāhān yā jeē Tátá yā cúu Yaā Dios, te súcuan sáha inuú yá maá yá jíin Yaā Dios.

Siquī jeē ndíso jniñu Sēhe Yaā Dios

¹⁹ Te ni cahān Jesús:

Jendaá cāhān rī jíin ró jijnāhan ró: Ruhū jeē cúu Sēhe Yaā Dios, tú na vé cúu sáha ri jeē maá rí, chi máni sáha ri jeē jíto ri sáha Tátá rī. Chi t̄aca jéé sáha Tátá rī, suni sáha ruhū jeē cúu ri Sēhe ya.

²⁰ Chi maá Tátá rī, manī yā jíin ruhū jeē cúu ri Sēhe ya, te st̄éen yā nuū rī ndih̄i jeē sáha ya. Te j̄ehnu ga jniñu st̄éen yā v̄esú jeē ní cuu vijna, jeē naa ni rō coto ró jijnāhan ró.

²¹ Te nájnūhun jeē nast̄ecu maá Tátá rī nd̄iyi te cotecu tucu i, suni súcuan ruhū jeē cúu ri Sēhe ya, nast̄ecu rī ndé-ni cúu jeē cuní maá rí.

²² Te maá Tátá rī, tu s̄andaā yā siquī ni ñn ñayuu, chi ni j̄ehe ya jnūhun jeē s̄andaā maá rí siquī t̄aca ñáyuu, chi Sēhe ya cúu rí.

²³ Te súcuan te coo yíñúhún ndih̄i ñayuu nuū rī, nájnūhun yíñúhún i nuū Tátá rī. Te ñayuu tu íyó yíñúhún núu rī, núu súcuan te suni tu yíñúhún i nuū maá Tátá rī jeē ní tají yá ruhū v̄eji rí.

²⁴ Jendaá cāhān rī jíin ró: Núu ñn ñayuu chuhun ni i jnūhun cāhān rī, te candíje i jeē Yaā ndaā cúu Yaā ní tají rúhū v̄eji rí, ñayuu ún cotecu i ní cáni and̄iv̄i, te ma jnahnú ndetū i. Chi ma cúu ga i nájnūhun nd̄iyi, chi sa suhva cotecu i ní cáni.

²⁵ Jendaá cāhān rī jíin ró jeē quiiji quíiv̄i, te vijna je ni quejéé, jeē t̄aca ñáyuu c̄acuu nájnūhun nd̄iyi, cuni nahín i jnūhun cāhān ruhū, Sēhe Yaā Dios. Te ñayuu cuatáhú, chí cotecu i ní cáni.

²⁶ Chi nájnūhun íyó poder maá Tátá rī jeē sáha ya jeē t̄ecu ndih̄i-ni, suni súcuan ni j̄ehe ya poder nuū ruhū jeē sáha ri jeē cotecu ndih̄i-ni.

27 Te suni ni sáha ya jeē ndíso jniñu ri sándaā rī siquī ñayuu, chi cúu ri Yaā ní nduu tēe.

28 Ma náā ni rō cani ni rō siquī jnūhun cáhán rī. Chi queue quivī jeē tāca ndíyī cuni sōho i jnūhun cahān rī,

29 te quendacoo i nuū yíndūji i. Te ndīyī jeē ní casáha jniñu váha, natecu i jeē cótecu i ní cáni. Te ndīyī jeē ní casáha jniñu néé, natecu i te quivícoo i nuū jnahnú ndetū i.

Ndé vé cúu jeē steén jeē ní tají Yaā Dios yā

30 'Tú na vé cúu sáha ri jeē maá rí. Chi nájnūhun ndácu Yaā Dios jniñu nuū rī, súcuan sándaā rī jniñu. Te ndaā sándaā rī, chi tu sáha ri jeē cuní maá rí, chi sáha ri jeē cuní maá Tátá rī, Yaā ní tají rúhū vēji rī.

31 Núu ruhū cahān rī jeē cúu ri Sēhe Yaā Dios, te cachi ñayuu jeē tu jéjníñu jnūhun cáhán rī.

32 Te íyó inga jeē cahán jeē cúu ri Sēhe ya. Te jíni rī jeē jnūhun un jéē cahán yā, chi níhín jniñu.

33 Máá rō ni catajī rō tēe ni cacajnūhún de Juan. Te Juan chi ndaā ni cahān de jnūhun rī.

34 Te vēsú súcuan te nasūu rúhū cúu jeē jíni ñúhún jeē steén ñn tēe jeē Sēhe Yaā Dios cúu ri. Chi máá rō cúu jeē jíni ñúhún návāha candíje rō te cācu rō jíjnáhan rō. Jeē yúcuan ní cahān rī jeē iyó ndáā jnūhun ri jeē ní nacani Juan.

35 Máá Juan ni cuu de nájnūhun ñn lámpara jeē cayú te cúndijin, cúu jeē ní nacani de jnūhun rī. Te máá rō, jecu-ni quivī ni canujnahan ni rō jeē ní stéén de nuū rō.

36 Te íyó jéē steén cají gá jeē cujéhnu ri vēsú jeē ní cahān Juan. Suu jniñu sáha ri, jniñu jeē ní tejníñu Tátá rī ruhū jeē sáha ri, jniñu un stéén ndije jeē maá yá ni tají rúhū vēji rī.

37 Te Tátá rī jeē ní tají yá ruhū vēji rī, suni máá yá cahán nuū tútu iī jeē cujéhnu ri, vēsú tu ní cájini sōho cuiti rō jeē cahán yā, ni tu ní cájito rō yá.

38 Te tu ní cáchuhun ni rō jnūhun un jéē ní cahān Tátá rī, chi tu cácandíje rō rúhū, Yaā ní tají yá vēji.

39 Cánanducú vii rō tāca jnūhun cáhán tutu iī, chi cájeni ni rō jeē yūcuan níhín rō jnūhun

jeē cótecu rō ní cáni sáha. Te jnūhun siquī maá rí cúu jeē cahán tutu ún.

40 Te vēsú súcuan te tu cácuni rō cuatáhú ró ruhū quivícoo ró ndaha ri návāha cotecu rō ní cáni.

41 'Tu chíhi ri cuenta jnūhun jeē cácahān ñayuu jeē cujéhnu ri.

42 Chi je jíni rī ndese cándāa ánuá rō jeē tu cáhīyo manī rō jíin Yaā Dios.

43 Ruhū vēji ri jíin jniñu cúní Tátá rī, te tu cájetáhú ró ruhū. Te núu inga tēe queue de jíin jniñu cúní maá de, sa tēe un yáchī cuatáhú ró de.

44 ¿Ndese cuu candíje ró jíjnáhan rō? Chi máni cácuni rō jeē cujéhnu ró sáha jnáhan rō, te tu cánducú ró jeē cujéhnu ró sáha Yaā Dios, jeē maá ñn-ni ya iyó.

45 Ma cáni ni rō jeē cáquin rī cuēchi siquī rō nuū Tátá rī. Chi íyó ñn jeē cáquin cuēchi siquī rō, suu Moisés, tēe jeē cáñuhun ni rō jeē quendōo ndaā rō jíin ley jeē ní tee de.

46 Chi núu ní cácandíje ró jéē ní tee Moisés, te suni candíje ró rúhū nuú, chi jnūhun máá rí ni tee de.

47 Te núu tu cácandíje ró jnūhun ri jeē ní tee de, ¿te ndese candíje ró jnūhun cáhán maá rí núu súcuan? Achí yá jíin de.

Jeē ni scáji yā uhūn mil tēe

(Mt. 14.13-21; Mr. 6.30-44; Lc. 9.10-17)

6

1 Yūcuán na te cuahān Jesús inga lado mar Galilea, jeē cúu mar Tiberias.

2 Te yōhyo cuehē ñayuu ni candiquīn i ya, chi ni cajito i tācá jniñu jéhnu jeē steén yā poder yā jeē ní nasávāha ya ñayuu cácuñū.

3 Te ni caa ya ñn yucu, te ni cucōo ya yūcuan jíin tēe cáscuáha jíin yá.

4 Te je ni cuyajni vico pascua jeē cánucūhun ni jnáhan ñuu yā hebreo jeē ní cacācu i nuū ñayuu nación Egipto.

5 Te ni ndacoto ya, te ni jito ya jeē véjicoo cuehē ndasí ñayuu. Te ni cahān yā jíin Felipe:

¿Ndé nuū cuaan yó jéē cáji ñayuu yáha jíjnáhan i?

6 Te súcuan ni cahān yā jeē jito ndee yā de núu ndese cahān de. Chi je jíni maá yá ndese sáha ya.

7 Te ni cahān Felipe jíin yá:

Te ni ma cánda uū ciento denario staā, ni vēsú jeē cáji i jecu jecu jijnáhan i, áchí de.

⁸ Yūcuán na te ni cahān Andrés, ñani Simón Pedro, inga tēe scuáha jíin yá un:

⁹ Yāha íne ñn sūchi yíí jēē ndíso i uhūn staā cebada jíin úū chācá. ¿Te ndé canda cuiti ún, chi ñayuu cuehē ndasí cúu?

¹⁰ Yūcuán na te ni cahān Jesús:

Cahān jíin ñayuu na cúcōo i, áchí yá.

Te yūcuan cáa cuehē ite, te ni cacucōo i, te nájñūhun uhūn mil tēe cúu.

¹¹ Te ni quihín Jesús staā ún, te ni nacu-atáhú yá nuū Yaā Dios. Te ni jēhe ya nuū tēe cáscuáha jíin yá, te máá de ni casaja de nuū ñayuu ní cacucōo ún. Te suni súcuan ni sáha ya jíin cháca, te ni cayeji i nasaa cáconi maá i.

¹² Te nuū ní candutú chíji i, te ni cahān yā jíin tēe cáscuáha ún:

Nastútú ró táca pedazo jeē ni ndóo, návāha tu stívi cuiti yō.

¹³ Te ni canastútú de, te ni chitú úxī uū jíca pedazo jeē ni ndóo síquī ndihúhún staā cebada un jeē tuá ni ndíhi caji ñayuu.

¹⁴ Te ñayuu un ní cajito i jniñu jéhnū ni sáha Jesús jeē ni stéén yā poder yā. Te ni cacahān i:

Jendaá ndije jeē tēe yáha cúu jeē cahán tutu jeē quíji ini ñayívi jēē nácani jñūhun Yaā Dios. Achí i.

¹⁵ Te ni jini Jesús jeē cáconi i sáfuerza i ya jeē cuu ya rey i núú. Te ni cujiyo tucu máá ñn-ni ya, ni caa ya cuahān yā nuū sucún gá yucu.

*Jeē ní jica jéhé yá nuū mar
(Mt. 14.22-27; Mr. 6.45-52)*

¹⁶ Te nuū cuácuaa, te tēe cáscuáha jíin yá ni nanuu de cuango de nde mar.

¹⁷ Te ni ndíviicoo de ini barco, te ni cascáca de jeē quíngoo de nde inga lado mar nde ñuu Capernaum. Te je ni cunee, te ná tu ndee Jesús nuū de.

¹⁸ Yūcuán na te ni jekuñi ñn tachí níhin, te sáha jeē ndónnda ndute mar un.

¹⁹ Te jeē ní cuu nájñūhun uhūn chí íñū kilómetro cájica de jíin barco, te ni cajito de jeē jíca Jesús nuū mar, te ni cuyajni ya vēji ya nuū barco. Te ni cayūhú de.

²⁰ Te máá yá ni cahān yā jíin de:

Máá rí cúu. Ma yūhu ró jijnáhan ró.

²¹ Te ni cacusī ni de jeē na quívi ya ini barco. Te ni sáha ya jeē yachī-ni ni jñūcoo-ni de ñuhun íchi núu cuango de ún.

Jeē cánanducú ñayuu Jesús

²² Te inga quívi ún, te ñayuu jeē ní caquendōo inga lado mar, ni cajini i jeē tēe cáscuáha jíin yá cuango de jíin máñuhún-ni barco ni íne yūcuán, jíin jēe tu ní quívi Jesús quihín yā jíin de jijnáhan de.

²³ Te sava ga barco jeē véjicoo ichi ñūū Tiberias, ni quecoo yajni lugar nuū ní cayeji i staā jeē ní nacuatahú máá Jítoho yō jehē.

²⁴ Te jeē ní cajito ñayuu un jēe tuá Jesús íne ya yūcuán, ni tēe cáscuáha jíin yá, te ni quíviicoo i táca barco un, te cuango i ñuu Capernaum cuananducú i ya.

Jesús cúu staā jeē cótecu yō ní cáni

²⁵ Te nuū ni jñūcoo i nde inga lado mar, te ni nanihín jñáhan i jíin Jesús. Te ni cacajnūhún i ya:

Maestro, ¿na hora ni quee ni yáha?

²⁶ Te ni cahān Jesús:

Jendaá cahán rī jíin ró jeē cánanducú ró ruhū síquī jeē ní cayeji rō nde ni candutú chíji ró, te nasūu síquī jeē ní cajito ró táca jniñu jéhnū jeē steén rī poder rī.

²⁷ Ma cóndihvī ni rō maá síquī jeē caji rō jeē yachī nataxīn, chi sa suhva condihvī ni rō síquī jeē nihín rō jeē cótecu rō ní cáni sáha. Te máá rí, Yaā ní nduu tēe, cuāha rī nájñūhun staā jeē cótecu rō ní cáni sáha. Chí Tátá rī Yaā Dios ni jeni ya ruhū jeē sáha rī súcuan. Achí yá jíin i.

²⁸ Yūcuán na te ni cacajnūhún i ya:

¿Nde se sáha ná návāha squícu ná jniñu cúní Yaā Dios?

²⁹ Te ni cahān Jesús:

Jniñu jeē cuní Yaā Dios cúu jeē candíje ró ruhū, Yaā ní tají yá vēji.

³⁰ Yūcuán na te ni cacahān i:

Núu súcuan ¿te na jniñu jéhnū sáha ní coto ná jijnáhan ná te candíje ná jēe ní tají yá nihín? ¿Na jniñu cúu jeē sáha ní?

³¹ Chí táca jíí yō jenahán ni cayeji de maná jeē ní cuun ichi ándiví ndé nuū ñūhun téhé, nájñūhun yósó núu tútu: Yaā Dios ni jēhe ya staā ni cuun ichi ándiví, ni cayeji i, áchí tutu. Achí i jíin yá.

³² Te ni cahān Jesús:

Jendaá cahán rī jín ró: Nasū Moisés ni jéhe staā un núu de jijnáhan de jeē ní cuun ichi ándiví, chi máá Tátá rī ni jéhe. Te máá yá jéhe staā andiví jéē cótecu rō ní cáni sáha.

³³ Chi staā jéhe Yaā Dios cúu máá Yaā ní quiji ichi ándiví, te sáha ya jeē ñáyuu ñayiví cótecu i ní cáni andiví. Achí yá.

³⁴ Te ni cacahān i jín yá:

Níní cuáha ni stāá ún caji na núu súcuan.

³⁵ Te ni cahān Jesús:

Máá rí cúu máá stāá jeē cótecu rō ní cáni sáha. Ndé vé quiví ndaha ri, ma cúu cuiti gā sōco. Te ndé vé candíje ruhū, ma jichí cuiti gā.

³⁶ Te nájnūhun je ni cahān rī jín ró, tu cáandíje ró rúhū, vésú ni cajito ró núu rī.

³⁷ Tāca ñáyuu jeē sáha Tátá rī jeē candíje i ruhū, máá i quivícoo ndaha ri. Te jétáhú rí tāca jéē cuní quiví ndaha ri, chi ma squéhichí cuiti rī quihín.

³⁸ Chi ni quiji rī ichi ándiví návāha sáha rī jniñu jeē cuní Yaā ní tají rúhū, te nasūu jéē sáha rī jeē cuní máá rí.

³⁹ Te jniñu jeē cuní Tátá rī, Yaā ní tají rúhū, cúu jeē ma scuíta rī ni ñn ñáyuu ni jéhe ya nuū rī, chi condito rī i te nastécu rī i quiví jínu ñayiví.

⁴⁰ Te Yaā ní tají rúhū, cuní yā jeē tāca ñáyuu jeē nihín i jnūhun ruhū, Sēhe Yaā Dios, te candíje i ruhū, cótecu i ní cáni andiví. Chi nastécu rī i quiví jínu ñayiví. Achí yá.

⁴¹ Yūcuán na te ni caquejéé jnáhan ñuu yā hebreo cácahān de siquí yā, chi ni cahān yā jeē máá yá cúu staā ní quiji ichi ándiví.

⁴² Te ni cacahān de:

¿A násūu téé yáha cúu Jesús, sēhe José? Te cájini yō tatá de náná de. ¿Te ndese cúu jeē cahán de jeē ni quíji de ichi ándiví núu súcuan?

⁴³ Te ni cahān Jesús jín de:

Ma cahán rō siquí rī jijnáhan ró.

⁴⁴ Ni ñn ñáyuu ma cúu quiví i ndaha ri núu ma sáha Tátá rī jeē cúu ni i quiví i, chi máá yá ni tají rúhū vēji ri. Te nastécu rī i quiví jínu ñayiví.

⁴⁵ Te suhva yósó núu tútu ni catee tēe ni canacani jnūhun Yaā Dios: Tācá i chi stéén Yaā Dios nuū i, áchí. Núu súcuan te tāca ñáyuu jini sōho jnūhun cáhán Tátá rī,

te jétáhú i jeē steén yā nuū i, ñáyuu ún chi quivícoo i ndaha ri.

⁴⁶ Te tu ní jito ni ñn ñáyuu nuū maá Tátá rī. Chi máñúhún-ni ruhū ni jito ri nuū yā, chi nde nuū maá yá vēji ri.

⁴⁷ Jendaá cahán rī jín ró jijnáhan ró jéē ñáyuu jeē candíje i jeē jnáma ri i, máá i cótecu i ní cáni.

⁴⁸ Máá rí cúu staā jeē cótecu rō ní cáni sáha.

⁴⁹ Tāca jii rō jenahán, ni cayeji de staā maná jeē ní cuun ichi ándiví ndé nuū ñúhun téhé, te tu ní sáha jeē cótecu de ní cáni andiví.

⁵⁰ Te staā jeē cahán rī jeē vēji ichi ándiví, chi na-ni ñáyuu caji, te cótecu i ní cáni andiví.

⁵¹ Te suu máá rí cúu staā un jéē ní quiji ichi ándiví jéē sáha jeē cótecu rō ní cáni. Te ñáyuu jeē cáji staā yáha, cótecu i ní cáni andiví. Te staā jeē cuáha ri un cúu yiqui cúñu rī, te cuáha ri návāha ñáyuu ñayiví cótecu i ní cáni andiví. Achí yá.

⁵² Yūcuán na te jnáhan ñuu yā hebreo ni cacahān de jín tāca jnáhan de:

¿Ndese cuu cuáha tēe yáha yiqui cúñu de caji yō? achí de.

⁵³ Te ni cahān Jesús jín de:

Jendaá cahán rī jín ró: Núu tú candíje ró jéē yiqui cúñu ruhū, Yaā ní nduu tēe, cúu nájnūhun staā, te niñi rī cúu nájnūhun ndute, núu súcuan te ma cótecu rō ní cáni andiví.

⁵⁴ Chi ñáyuu cáandíje jeē yiqui cúñu rī cúu nájnūhun staā te niñi rī cúu nájnūhun ndute, máá i cótecu i ní cáni. Te nastécu rī i quiví jínu ñayiví.

⁵⁵ Chi yiqui cúñu rī jín níñi rī cúu ndije jeē sáha jeē cótecu i ní cáni.

⁵⁶ Te ñáyuu cáandíje jeē yiqui cúñu rī jín níñi rī cúu nájnūhun staā jín ndute jeē cótecu i ní cáni sáha, máá i níñi ndúú i jín rí, te ndúú rí jín i.

⁵⁷ Máá Tátá rī, Yaā técu, ni tají yá ruhū vēji ri, te técu rī sáha máá yá. Te suni súcuan, ñáyuu cáandíje jeē cúu ri nájnūhun staā i ndute i, suni súcuan cótecu i ní cáni sáha ri.

⁵⁸ Máá rí cúu staā ní quiji ichi ándiví. Te staā jeē cahán rī tu cúu nájnūhun staā maná jeē ní cayeji tāca jii rō jenahán, chi tu ní sáha

jeē cótecu de ní cáni. Te staā jeē cahán rī, chi ñayuu caji, cotecu i ní cáni sáha, áchí yá.

⁵⁹ Tāca jnúhun yáha ní steén Jesús nuū ñáyuu ní candutútú ini vehe i sinagoga ñuu Capernaum.

Jnúhun cotecu yō ní cáni

⁶⁰ Te cuehē ñayuu cascuáha jíin yá, ni cajini sōho i jnúhun yáha jéē ni steén yā. Te ni cacahān maá i:

Yōhyo yí jnúhun cáhán yā yāhá. ¿Ndese cuu cuatáhú yó?

⁶¹ Te ni jini Jesús jeē cacahān i jeē yí cúu jnúhun yāhá, te ni cahān yā jíin i:

¿A yí sáha jnúhun yáha jíin ró jijnáhan ró?

⁶² ¿Te ndese sáha ró núu coto ró jéē ruhū, Yaā ní nduu tēe, ndaa ri nuhun rī nuū ni cóndee rī xihna ñúhún?

⁶³ Máá ánuá ñayuu cúu jeē sáha jeē técu i. Chi yiquí cúñu i tu jéjníñu cuítí súcuan. Te tāca jnúhun ni cahān rī jíin ró cúu jeē quéndō vāha ánuá rō, te cotecu rō ní cáni sáha.

⁶⁴ Te sava ró chi tu cácandíje ró. Achí yá.

Chi nde xihna ñúhún je jíin Jesús ndé-ni cúu ñayuu jeē ma cándíje, jíin ndé ñn de cúu jeē nastúu de ya.

⁶⁵ Te ni cahān gā yā:

Jeē yúcuan ní cahān rī jíin ró jeē ma cúu quívi ni ñn ñayuu ndaha ri, te núu tu sáha Tátá rī jeē cúu ni i quívi i, áchí yá.

⁶⁶ Te nde quívi ún te cuehē ñayuu cascuáha jíin yá, ni castóo i ya, te tuá ni cájica i jíin yá.

⁶⁷ Yūcuán na te ni cahān yā jíin máá ndihúxí uū tēe cáscuáha jíin yá:

¿A suni cáconi máá ró quingoo ró, chí naún?

⁶⁸ Te ni cahān Simón Pedro:

¿Ndé núu gā quingoo ná? Chi máá ní cúu jeē nácani jnúhun jeē cótecu na ní cáni sáha.

⁶⁹ Te ni cacandíje ná te cájini na jéē maá ní cúu Cristo, Sēhe Yaā Dios, Yaā técu, achí de.

⁷⁰ Te ni cahān Jesús:

Te vésú ni nacāji ri ndihúxí uū rō, te íyó ñn ró jeē ní quívi jexeén ini. Achí yá.

⁷¹ Te súcuan ni cahān yā siquí Judas Iscariote, sēhe Simón. Chi máá de nastúu de ya, vésú ñn jnáhan jeē uxí uū tēe cáscuáha jíin yá cúu de.

Jeē tu ní cácandíje ñani Jesús

7

¹ Yūcuán na te jíca cuu Jesús región Galilea. Chi tu cúni yā caca cuu ya región Judea, chi jnáhan ñuu yā hebreo jeē cáyūcu yúcuan, cáconi de cahni de ya.

² Te cuacuyajni vico jeē casáha ñayuu yā hebreo vehe ramadá, cáyūcú i chíji.

³ Te ñani yā ni cacahān de jíin yá:

¿Naun máá yáha-ni íne ró? ¿Naun tú quihín rō región Judea, návāha tēe yúcuan jéē cácandíje de róhó, suni coto de jniñu jéñu sáha ró.

⁴ Chi núu cúni ñn tēe jeē cuité núu jnúhun de, te tu sáha yuhu de jniñu. Te núu sáha nde ró táca jniñu jéñu, vāha ga na sáha ró jéē cúni ndivii ñayuu.

⁵ Súcuan ni cacahān ñani yā jíin yá, chi ni máá de tu cácandíje de ya.

⁶ Yūcuán na te ni cahān Jesús:

Ná tu quee máá quívi jeē quihín rī. Te máá ró jijnáhan ró chi na-ni quívi-ni te cuu quingoo ró.

⁷ Chi ma quití ni ñayuu ñayívi núu rō, te máá rí chí quití ni i jito i ruhū, chí cáhán rī jeē jíin rī jeē máni jniñu néé casáha i.

⁸ Cuángoo máá ró vico ún. Te máá rí chí ma quihín rī vijna, chí ná tu quee máá quívi cánuú quihín rī. Achí yá.

⁹ Súcuan ni cahān yā jnúhun yáha jíin de, te ni quendō ya Galilea.

Jeē ni jéhēn Jesús vico vehe ramadá

¹⁰ Te nuū ni yáha ñani yā cuangoo de vico ún, te sáa te suni cuahān maá yá. Te tú cuahān ndijin yā, chí tu ní steén yā maá yá.

¹¹ Te jnáhan ñuu yā hebreo cánanducú i ya nuū vico ún, te cacahān i:

¿Ndé nuū íne tēe ún? áchí i.

¹² Te yōhyo ni cacahān ñayuu jeē siquí yā, chí sava i cacahān: Tēe vāha cúu de. Te sava ga i cacahān: Tuú chí stáhú de ñayuu.

¹³ Te yuhu-ni ni cacahān i jnúhun ya, chí cáyūhú i jeē quití ni jnáhan i tēe hebreo.

¹⁴ Te jeē ní cuu sava vico, te ni quee Jesús, ni quívi ya templo cáhnu, te ni quejéé yá steén yā jnúhun.

¹⁵ Te ni canaa ni jnáhan ñuu yā hebreo cájini sōho i, te ni cacahān i:

¿Ndese jíni tēe yáha cuéhē jnūhun ndíhí, chí tu ní jíca de escuela? áhí i.

16 Yūcuán na te ni cahān Jesús:

Jnūhun stéén rī chí nasūu jnūhun máá rí cúu, chí jnūhun jeē ni jéhe máá Yaā ní tají rúhū cúu.

17 Nūu ñn ñayuu cuní i sáha i jniñu cuní Yaā Dios, ñayuu ún chí jecūhun ni i nūu nde nuū Yaā Dios vēji jnūhun stéén rī, chí jnūhun jeē jéni ni maá-ní ri cúu.

18 Tēe cáhān jnūhun jéni ni maá de, tēe un ndúcú de jeē na sájéhnū ñayuu de. Te nūu ñn tēe ndúcú de jeē sajéhnū de Yaā ní tají de, tēe un cúu tēe ndaā, te tú na jnūhun stáhú íyó jíin de.

19 ¿A násūu jéē ni jéhe Moisés ley yā nuū rō jeē squícu ró? Te ni ñn ró tu cásquícu. Chí sa jeē cācuni rō cahni rō ruhū, ¿te najehē cúu? Achí yá.

20 Te ni cacahān ñayuu cuehē ún:

Tachī ndóho ró. ¿Ndé ñn cuní cahni rohó?

21 Te ni cahān Jesús:

Ni nasávāha ri ñn tēe quivī ndétātú, te ndivii rō ni canaa ni rō ni cajito ró jéē quivī ndétātú ni sáha ri jniñu ún.

22 Te Moisés ni jéhe de ley jeē cúu circuncidar nuū rō. Te cásáha ró circuncidar sūchi yíí nūu uná quivī jeē ní cacu i, vēsú quivī ndétātu cúu. (Te nasūu máá Moisés ní jéquin ley un, chí je ni íyo nuū tāca jíi de.)

23 Nūu súcuan te nūu cásáha ró circuncidar vēsú quivī ndétātu cúu, návāha squícu ró ley Moisés, ¿te najehē cáquiti ni rō jeē ní nasávāha ndihi ri ñn tēe quivī ndétātú?

24 Ma yachí cani ni rō jeē cuéchi cúu jeē sáha ri. Chí sa cani vāha ni rō siquī tācá jniñu váha. Achí yá.

Jeē ní cachi Jesús ndé nuū véji ya

25 Yūcuán na te sava ñayuu ñnuu Jerusalén ni cacajnūhun jnāhan i:

¿A násūu tēe yáha cúu jeē cānanducú tēe cācujéhnū jeē cáhni de, chí naún?

26 Te yáha cáhān ndijin de nuū chitú, te tú na jnūhun cácahān jíin de. ¿A sanaa te ni cacundaā ni tēe cācujéhnū jeē tēe yáha cúu Cristo jeē achí tutu jeē quiji, chí naún?

27 Te tuú chí je cājini yō nuū véji tēe yáha. Te jeē quíji Cristo, chí ni ñn yó má cūni ndé chí quíji ya. Achí i.

28 Yūcuán na te ni cahān jee Jesús jeē steén yā jnūhun ini templo:

Cājini rō ruhū, te cājini rō ndé ñnuu vēji ri. Te vēsú súcuan te máá Yaā ndaā cúu jeē ní tají rúhū vēji ri, te tú vēji ri jeē cuní maá rí. Te tu cājini rō ndese Yaā cúu ya.

29 Te máá rí chí jíni rī yā, chí nde nuū maá yá vēji ri, te máá yá ní tají rúhū, achí yá.

30 Yūcuán na te ni canducú de jnñ de ya. Te ni ñn de tu ní cúu jnñ de ya, chí ná tu quee maá quivī jeē jnñ de ya.

31 Te cuehē ñayuu chí ni cacandíje i ya, te ni cacahān i:

¿A násūu tēe yáha cúu Cristo, Yaā ndétu yó jéē quiji? Chí cuehē ndasí jniñu jéhnū sáha ya jeē steén yā poder yā. Achí i.

Jeē ní catajé de policía jeē jnñ de Jesús

32 Te ni cajini tēe fariseo jeē súcuan cácahān ñayuu jnūhun ya. Te máá de jíin sūtū cācujéhnū, ni catajé de policía cāndito templo jeē jnñ de ya.

33 Te ni cahān Jesús:

Jecu na quivī condee rī jíin ró jijnáhan ró. Yūcuán na te nuhun rī nuū Yaā ní tají rúhū vēji ri.

34 Te nanducú ró ruhū, te ma nánihīn rō ruhū. Chí ma cúu jinūcoo ró nūu cóndee rī. Achí yá.

35 Yūcuán na te máá tēe un ní cacajnūhun jnāhan de:

¿Te ndé nuū quihín tēe yáha jeē ma nánihīn yō de? ¿A quihín de nuū jnāhan yó hebreo jeē ní cajitē nūu cáyūcu ndé nación Grecia? ¿Te á stéén de jnūhun nuū ñayuu Grecia, chí naún?

36 ¿Te na jnūhun cúu jeē ni cáhān de jíin yó jeē nanducú yó de te ma nánihīn yō de, chí ma cúu jinūcoo yó nūu cóndee de? Achí tēe un jíjnāhan de.

Siquī ndute jeē cótecu yō ññ cáni sáha

37 Te quivī sándihí vico ún te cúu vico cáhnu ga. Te quivī un ní ndocuiñī Jesús, te ni cahān jee ya:

Nūu ndé ñayuu jnáa ndasí i tāca jéē váha jeē sáha ri jehē i, nájñūhun jeē jichí i ndute, nūu súcuan te na quivī i ndaha ri te coho i ndute, cúu jeē nihín i jeē váha ún.

38 Te ñayuu jeē candíje jeē jnáma ri i, chí ini anuá i condee Espíritu Santo, te cuu ya

nájnūhun yūte cáne ñuhún jeē sāha ya jeē cótecu i ñí cáni, nájnūhun cáhán tutu ií. Achí yá.

³⁹ Te súcuan ni cahān yā jeē ñáyuu candíje jeē jnáma ya i, nihīn i Espíritu Santo. Chi ná tu quee Espíritu ún, chí ná tu ndaa Jesús quinuñun yā nuū ndujéñu ya.

Jeē ní cacusññ ñayuu siquī yā

⁴⁰ Te sava ñayuu cuehē ún, ná ni cajini sōho i jñūhun yáha, te ni cacahān i:

Jendaá jeē té yáha cúu jeē achí tutu jeē quiji de nacani de jñūhun Yaā Dios, achí i.

⁴¹ Te sava ga i ni cacahān:

Tēe yáha cúu Cristo, Yaā ní tají Yaā Dios.

Te sava ga i chí ni cacahān i:

Tuú chí nasūú Galilea quiji Cristo.

⁴² Chi cáhán tutu ií jeē ndé yucūn rey David cacu Cristo, te cacu ya ñuu Belén, ñuu nuū ní cacu máá David. Achí i.

⁴³ Te súcuan te ni cacusññ ñayuu jeē siquī yā.

⁴⁴ Te sava i cáconi i jñi i ya, te ni ñn i tu ní jñi i ya.

Jeē tu ní cácandíje tēe cácujeñnu

⁴⁵ Yūcuán na te policia cándito templo tu ní cájñi de Jesús, te cuanungoo de nuū táca tēe fariseo jíin nuū sutú cácujeñnu. Te tēe ún ni cacajnūhún de policia:

¿Najehē tu ní quécoo ró jíin de? achí.

⁴⁶ Te ni cacahān policia un:

Tú cuiñi ni ñn tēe cáhán vāha ndasí nájnūhun cáhán tēe yúcuan, achí.

⁴⁷ Te ni cacahān tēe fariseo:

¿Te á suni nde máá ró jíin náhan ró ní stáhú de naún?

⁴⁸ Ni ñn jnáhan ruhū tēe cácujeñnu jíin tēe fariseo, tu cácandíje ri jñūhun cáhán tēe ún, ¿te naun cácandíje máá ró?

⁴⁹ Te ñayuu cuehē yāhá jēe tu cájecūhun ni i ley Moisés, chí jñahnū ndetū i jeē cácandíje i tēe ún, achí de jíin náhan de.

⁵⁰ Te ni cahān Nicodemo, tēe ni jéhēn nuū yā ñn jecuáa, te suni ñn tēe fariseo cúu de:

⁵¹ Cáhán ley yō jeē ma cúu tee yó cuēchi siquī ñn tēe, te núu tú xīhna gā cuni sōho yó ndese cáhán de, návāha cucáñnu ni yō na cuēchi ni sāha de. Achí de.

⁵² Te ni cacahān jíin de:

Te róhó, ¿á suni nde Galilea vēji ró jēe cahán rō jehē tēe ún? Nanducú váha ró núu

tútu ií te cuni rō jeē ndé Galilea tu quenda cuiñi ni ñn tēe nácani jñūhun Yaā Dios. Achí jíin de.

⁵³ Te cuanungoo de ná vehe ná vehe de.

Jñūhun ñahan ní casíquí ndéē jnáhan

8

¹ Te ni caa Jesús cuahān yā yucu Olivos.

² Te jeē cuácundijin inga quiñi, te ni ndee tucu ya templo. Te ndihí ñayuu ni quecoo i nuū yā. Te ni cucōo ya, te ni steén yā jñūhun nuū i.

³ Yūcuán na te tēe cástéén tutu ley Yaā Dios jíin tēe grupo fariseo, ni quecoo de jíin ñn ñahan jeē ní canihīn de ña jeē casíquí ndéē ña. Te ni cajeni de ña mēñú.

⁴ Te ni cacahān de jíin yá:

Maestro, ni canihīn ná ñahan yáha jēe casíquí ndéē ña.

⁵ Te ley Moisés ndácu jñiñu nuū yō jeē cuáha yó yūu xīnī ñahan cása ha súcuan návāha cuu ña. Te máá ní, ¿ndese cáhán ni?

⁶ Te súcuan ni cacahān de jeē cájito ndee de ya núu cuatáhú yá jeē cahán ley un, chí núu tuú te caquin de cuēchi siquī yā. Te Jesús ni jita ndeyi ya, te ni tee ya nuū ñūhun jíin xīnī ndáha ya.

⁷ Te jeē cácajnūhun cácajnūhún de ya, te ni ndonehen ya maá yá, te ni cahān yā jíin de:

Núu ndé ñn máá ró tú na cuēchi ró, te xīhna gā maá ró cuáha yuū xīnī ña núu súcuan, achí yá.

⁸ Te ni jita ndeyi tucu ya, te ni tee tucu ya nuū ñūhun.

⁹ Te nuū ní cajini de jeē súcuan ni cahān yā, te ni cajecūhun ni de jeē suni cáhīyo cuēchi de. Te ná ñn ná ñn de ni quendacoo de cuahān de, xīhna gā tēe jéñnu ga te nde nuū ní ndihí na. Te ni ndōo máá ñn na Jesús jíin ñahan índichi mēñú un.

¹⁰ Te ni ndonehen tucu ya maá yá, te tuá ni ñn tēe un ní jito ya, chí máá na ñahan ún. Te ni cahān yā jíin ña:

¿Ndé chí cuángoo tēe cájequin cuēchi siquī rō? ¿A tú ni ñn de ní ndón da cahān gā cuēchi siquī rō?

¹¹ Te ni cahān ña:

Tú ni ñn de, achí ña.

Yūcuán na te ni cahān Jesús jíin ña:

Ni ruhū, ma cahán rī cuēchi siquī rō. Cuáhán te ma sāha ga rō cuēchi, achí yá.

Jesús cúu máa luz jeē steén ini anuá ñayuu

12 Te inga jínu ni cahān Jesús jíin ñayuu:

Máa rí cúu nájnūhun luz jeē steén ini anuá ñayuu ñayīví, jeē sáha jeē jécūhun ni i síquī Yaā Dios. Ñayuu candíje ruhū chi ma cáca i nájnūhun nuū néē, chi sa suhva coneváha i luz ini anuá i jeē sáha jeē cótecu i ní cáni.

13 Yūcuán na te ni cacahān tēe fariseo jíin yá:

Róhó chi cáhán rō jnūhun jehē maá ró, te tu jéjníñu jnūhun cáhán rō.

14 Te ni cahān Jesús jíin de jíjnáhan de:

Vēsú cáhán rī jehē maá rí, te íyó ndāā jnūhun cáhán rī. Chi jíin rī ndé nuū véji ri jíin ndé nuū quihín rī. Te róhó tu cájini rō ndé nuū véji ri ni ndé nuū quihín rī.

15 Máa ró chi cuenta ñayuu ñayīví cásandaā rō síquī jnúhun cáhán rī. Te ruhū chi tu sándaā mañúhún rí síquī ni ñin ñayuu.

16 Te núu sándaā rī síquī i, te ndāā sáha rī, chi tu sáha mañúhún rí, chi sándaā rī nde jíin máa Tátá rī, Yaā ní tají rúhū véji ri.

17 Te yósó núu tútu ley cánevāha ró jéé núu inuú cacahān uū testigo, te jíin níñhún cuatáhú ró jeē cacahān, chi íyó ndāā jnūhun ún.

18 Núu súcuán te ruhū cúu ñin jeē cahán ndāā rī jehē rī. Te inga jeē cahán ndāā jehē rī cúu máa Tátá rī, Yaā ní tají rúhū. Achí yá.

19 Te ni cacahān de jíin yá:

¿Nde nuū ndeé Tátá rō?

Te ni cahān Jesús:

Tu cájini rō ruhū ni Tátá rī. Te núu jeē cájini rō ruhū, suni cuni rō Tátá rī nuú.

20 Tāca jnúhun yáha ní cahān Jesús jeē steén yā ini templo nuū cáyūcu yéjñū jeē cásocō i xūhún. Te tú ni ñin de ní jñí de ya, chi ná tu quee maá quívī jeē jñí de ya.

Jeē ni cahān yā jeē ma cúu jinūcoo de nuū cóndee yā

21 Te ni cahān tucu Jesús jíin de:

Ruhū chi quihín rī, te nanducú ró rúhū, te ma nánihín rō ruhū, chi quendōo cuēchi ró síquī rō quívī cúu rō. Te jeē yúcuán má cúu jinūcoo ró núu quihín rī, achí yá.

22 Yūcuán na te tēe hebreo un ní cacahān maá de:

¿A cahni tēe yáha máa de, te jeē yúcuán cáhán de jeē ma cúu jinūcoo yó núu quihín de, chí naún? Achí de.

23 Te ni cahān yā:

Máa ró jíjnáhan ró chi ñayīví yáha véjicoo ró, te ruhū chi nde andívī véji ri. Máa ró cácuu ñayuu ñayīví yáha, te ruhū chi nasūu tēe ñayīví yáha cúu ri.

24 Jeē yúcuán ní cahān rī jeē quendōo cuēchi ró síquī rō quívī cúu rō. Chi núu ma candíje ró jéé maá rí cúu Cristo, te quendōo nahín cuēchi ró síquī rō quívī cúu rō. Achí yá.

25 Te ni cacajñūhún de ya:

Núu súcuán ¿te ndé ñin cúu ró?

Te ni cahān yā:

Je ni cachi ri nuū rō nde xīhna ñúhún ndé ñin cúu ri.

26 Te íyó cuéhē gā jnūhun cuu cahān rī jíin ró te sándaā rī síquī rō. Te ma cahán rī, chí ini ñayīví yáha cáhán rī maá-ni jnūhun jeē ní jíin ri ni cahān Yaā ní tají rúhū véji ri. Te máni jnūhun ndāā cahán yā. Achí yá.

27 Te tu ní cájecūhun ni de jeē cahán yā jnūhun Tátá yā andívī jíin de.

28 Jeē yúcuán ní cahān gā yā:

Nde na yáha jeē cáta caa ró rúhū, Yaā ní nduu tēe, jíicā cruz, yūcuán na te cuni rō ndé ñin cúu ri. Te cuni rō jeē tú na vé sáha ri jeē maá rí, chí cáhán rī maá-ni jnūhun ni steén Tátá rī nuū rī.

29 Chí máa Tátá rī, Yaā ní tají rúhū, ndeé yá jíin rí. Te tu stóo mañúhún yá ruhū, chí níni sáha ri jniñu jeē nújnahan ni maá yá. Achí yá.

30 Te jeē ni cahān yā jnūhun yáha, te cuehē ñayuu ni cacandíje i ya.

Síquī ndé-ni cúu sēhe Yaā Dios jíin sēhe jexeén

31 Yūcuán na te ni cahān Jesús jíin jnáhan ñuu yā hebreo jeē ní cacandíje i ya:

Te núu cuiñi níhin ró jíin jnúhun stéén rī nuū rō, te cuu ndije ró ñayuu scuáha jíin rí.

32 Te jecūhun ni rō jnūhun ndāā, te jnūhun ndāā un sáha jeē nduu libre rō nuū jeē yíhi ró ndaha.

33 Te ni cacahān i jíin yá:

Sēhe yucūn Abraham cácuu ri, te tu cáyihí cuítī rī ndaha ni ñin. ¿Te ndese cúu jeē cahán rō jeē nduu libre rī núu súcuán?

34 Te ni cahān Jesús:

Jendaá cahán rī jīn ró jeē tāca ñáyuu casáha cuēchi, tu íyó libre i, chi yíhi i chíji cuēchi jeē jejníñu cāhá i nuū.

35 Te ñayuu jejníñu cāhá, chi tu cúu i ñn jnáhan ñayuu vehe nuū jejníñu i. Te ñn sēhe chi sa suhva cúu ndije i jnáhan ñayuu vehe ún.

36 Núu súcuan te máá rí jeē cúu Sēhe Yaā Dios, núu sáha rí jeē tuá cuajníñu cāhá ró nuū cuēchi, núu súcuan te nduu libre ndije ró jijnáhan ró, te cuu ró sēhe ya.

37 Te jíní rī jeē sēhe yucūn Abraham cácuu ró, te vēsú súcuan te cácuu rō cahni rō ruhū, chí tu cájetáhú ró jñūhun cáhán rī.

38 Ruhū chí cáhán rī jñūhun jeē ni stéén Tatá rī nuū rī. Te máá ró chí casáha ró jniñu jeē ni cáhán tatá maá ró jijnáhan ró. Achí yá.

39 Te ni cacahān i:

Sēhe yucūn Abraham cácuu rí.

Te ni cahān Jesús:

Núu jeē candíje ró nájñūhun ni candíje Abraham návāha cuu ndije ró yúcūn de, yūcuán na te jniñu váha ni sáha de suni sáha máá ró nuū.

40 Te vijna chí cácuu rō cahni rō ruhū, vēsú ni cahān rī jīn ró tāca jñūhun ndaā ni steén Tatá rī nuū rī. Te Abraham chí tu ní sáha cuiti de súcuan.

41 Máá ró chí inuú casáha ró jíní tatá maá ró. Achí yá jíní i.

Yūcuán na te ni cacahān i:

Máá rí chí tu cácuu rí sēhe ndáhú jē tu tatá. Chí íyó ñn-ni tatá rī, te Yaā Dios cúu ya.

42 Te ni cahān Jesús:

Núu Yaā Dios cúu ndije tatá rō, te coo manī rō jíní rí nuú. Chí nde nuū Yaā Dios ni quenda rí vēji rí. Te tú vēji rí jeē cuní maá rí, chí máá yá ni tají ruhū.

43 ¿Te najehē tu cájecūhun ni rō jñūhun cáhán rī núu súcuan? Suu siquī jeē tu cácuu rō chusóhó ró jñūhun nácani rí.

44 Máá ró jijnáhan ró chí tatá rō cúu jexeén. Te cácuu rō sáha ró máá jē cuní tatá rō ún. Máá jexeén ni jehni ndīyī nde jeē xíhna ñúhún. Te tu ní íin cuiti jíní jñūhun ndaā, te tú cuiti na jñūhun ndaā cahán. Te jeē cahán jexeén jñūhun stáhú cúu jeē súcuan cáa máá. Chí máá un cúu jeē ndíso

jñūhun stáhú, te máá un cúu jeē ní squéjéé ndihí jñūhun stáhú.

45 Te ruhū chí cáhán rī jñūhun ndaā, te jeē yúcuan cúu jeē tu cácuu rō ruhū.

46 Te ni ñn ró ma nihín rō cuēchi siquī rī, chí tú cuiti na cuēchi rí. Te máni jñūhun ndaā cahán rī, ¿te naun tu cácuu rō ruhū?

47 Ñayuu cácuu sēhe Yaā Dios, chí cáchusóhó i jñūhun Yaā Dios. Te nasūu sēhe Yaā Dios cácuu ró, te jeē yúcuan tu cácuu rō chusóhó ró. Achí yá jíní de.

Iyó Jesús nde ná tu coo Abraham

48 Yūcuán na te ni cacahān jnáhan ñuu yā hebreo un:

Ndaā cacahān rī jeē canéé ró nájñūhun ñayuu Samaria, te ñúhun tachī ini rō.

49 Te ni cahān Jesús:

Tu ñúhun tachī ini rī, chí yíñúhún rí jíní Tatá rī. Te máá ró jijnáhan ró chí tu cáhīyo yíñúhún ró jíní rí.

50 Máá rí tu ndúcú rí jeē cujéhnu rí. Iyó ñn jeē sáha jeē cujéhnu rí, te máá yá sándaā siquī jñūhun cacahān rō.

51 Jendaá cahán rī jíní ró, núu ndé ñáyuu squícu jñūhun cáhán rī, ma cúu cuiti i. Achí yá.

52 Te tēe hebreo un tu ní cájecūhun ni de, te ni cacahān de:

Vijna te ni cacucáhnu ni rī jeē ñúhun ndije tachī ini rō. Chí Abraham jíní táca tēe ni canacani jñūhun Yaā Dios nde jenahán, ni cajihí de. Te róhó cáhán rō, núu ndé vé squícu jñūhun cáhán rō, te ma cúu cuiti i, áchí ró.

53 ¿Te chí jéhnu ga rō vēsú jíí yō Abraham naún? Chí ní jihí de, te suni ní cajihí táca tēe ni canacani jñūhun ya. ¿Te ndé ñn ga sáha ró máá ró núu súcuan? Achí de.

54 Te ni cahān Jesús:

Núu ruhū sajeñnu rí maá rí, te tu níhín jniñu. Máá Tatá rī cúu jeē sajeñnu ruhū. Te cacahān rō jeē máá yá cúu Yaā Dios máá ró.

55 Te vēsú súcuan te tu cájini rō ndese Yaā cúu ya. Te ruhū chí jíní rī yā. Te núu cahān rī jeē tu jíní rī yā, te cuu rí tēe stáhú nájñūhun máá ró jijnáhan ró. Te tuú chí jíní ndije rí yā, te squícu rí jñūhun cáhán yā.

⁵⁶ Te jí rō Abraham ni cusī ni de jeē coto de quivī queē rī. Te je ni jito de, te ni jito ri jeē ní cusī ndasí ni de. Achí yá.

⁵⁷ Yūcuán na te ni cacahān tēe hebreo un jíin yá:

Ni ná tu coo ró uū xico uxī cuiyā, ¿te ndese cúu jeē cahán rō jeē ní jito ró núu Abraham? achí de.

⁵⁸ Te ni cahān Jesús:

Jendaá cahán rī jíin ró jeē nde ná tu cacu Abraham te je íyó rí, achí yá.

⁵⁹ Yūcuán na te ni caquihin de yuū jeē cuáha de xinī yā. Te Jesús chi ni quenda sāhi yá ni yāha ya mēhñú de, ni quenda ya ini templo cuahān yā.

Jeē ní nasávāha ya ñn tēe ni cacu cuáá

9

¹ Te jeē jíca Jesús cuahān yā, te ni jito ya nuū ñn tēe ni cacu cuáá.

² Te tēe cáscuáha jíin yá ni cacajnūhún de ya:

Maestro, ¿naun ni cacu cuáá tēe yáha? ¿A cuéchi tátá de náná de cúu, chí cuéchi máa de cúu, chí naún?

³ Te ni cahān Jesús:

Nasūu cuéchi máa de, ni nasūu cuéchi tátá de náná de cúu jeē ní cacu de súcuan, chí sa suhva návāha cuni ñayuu jniñu jéhu sáha Yaā Dios jíin de.

⁴ Níní jéē cúu nájñuhun nduú ini ñayiví, te cánuú sáha ri jniñu Yaā ní tají rúhū. Chí quee tiempo jeē coo nájñuhun jecuáá, jeē tuá cuu sájñiñu ni ñn.

⁵ Níní jéē iyó rí ini ñayiví te cúu ri luz jeē cúndijin ini anuá ñayuu ñayiví, návāha jecūhun ni i siquī Yaā Dios. Achí yá.

⁶ Te ná ni cahān yā súcuan, te ni tesīhi yá nuū ñuhun, te ni sáha ya ndehyū jíin tesīhi yá un, te ni tee ya siquī tñūu tēe cuáá un.

⁷ Te ni cahān yā jíin de:

Cuáhán núu pila Siloé te nacate ró tñūu ró, achí yá. Te jñuhun Siloé cuní cahān, ndute ní cascáca de ni quee.

Yūcuán na te cuahān de, te ni nacate de tñūu de, te ni ndundijin-ni, te ni nandicó de vēji de.

⁸ Yūcuán na te ñayuu yúcu yajni jíin de, jíin ñayuu jeē ní cajito jeē cúu de tēe cuáá, ni cacajnūhun jnáhan i:

¿A násūu tēe yáha cúu jeē ndeé-ni yáha te jíicán caridad?

⁹ Te sava i ni cacahān:

Suu de cúu.

Te sava ga i ni cacahān:

Nasūú de cúu, te súcuan cuní coto de.

Te máá de chi ni cahān de:

Suu ri cúu.

¹⁰ Yūcuán na te ni cacajnūhún i de:

¿Te ndese cúu jeē ní nanune tñūu ró núu súcuan?

¹¹ Te ni cahān de:

Tēe nání Jesús ni sáha de ndehyū, te ni tee de tñūu rí, te ni cahān de jíin rí: Cuáhán núu pila Siloé te nacate ró tñūu ró. Te ni jehēn rī, te ni nacate ri, te ni nanune-ni tñūu rí, achí de.

¹² Yūcuán na te ni cacajnūhún i de:

¿Ndé nuū íne tēe ún? áchí i.

Tu jíin rī, achí de.

Jeē ní castíchi tēe fariseo tēe ni cacu cuáá

¹³ Yūcuán na te ni cajendeca i tēe ni íyo cuáá un núu tēe grupo fariseo.

¹⁴ Te quivī ndétātu cúu jeē ni sáha Jesús ndehyū jeē ní nanune ya tñūu de.

¹⁵ Te tēe fariseo un ní cacajnūhún tucu de tēe ún ndese ni nanune tñūu de. Te ni cahān de:

Ni tee de ndehyū siquī tñūu ná, te ni nacate ná, te ni ndundijin-ni tñūu ná, achí de.

¹⁶ Yūcuán na te ni cacahān sava tēe fariseo:

Tēe ún chi nasūu ndé nuū Yaā Dios vēji de, chí tu nēe íi de quivī ndétātu.

Te sava ga de chi ni cacahān:

¿Ndese cuu sáha tēe un táca jniñu jéhu yáha te núu tēe íyó cuéchi cúu de?

Te ni cacusín de siquī yā.

¹⁷ Te ni cacajnūhún tucu de tēe ni íyo cuáá un:

Róhó, ¿ndese cáhán rō siquī tēe ni nanune tñūu ró núu súcuan?

Te máá de ni cahān de:

Íin tēe nácani jñuhun Yaā Dios cúu de, achí de.

¹⁸ Te tēe hebreo un chí tu ní cá candíje de jeē ni íyo cuáá tēe ún te ni ndundijin tñūu de. Te ni cacana xiní tátá de náná de.

¹⁹ Te ni cacajnūhún de:

¿A yáha cúu sēhe ró jéē ní cacu cuáá cácahān rō? Núu súcuan ¿te ndese ni ndundijin tñūu de vijna? áchí.

20 Te ni cacahān tatá de náná de:

Suu sēhe ri cúu tēe yáha jeē ní cacu cuáá.

21 Te tu cájini rī ndese ni ndundijin tinūú de vijna, ni tu cájini rī ndé tēe ni nanune tinūú de. Cajnūhun ró maá de, chi je jéhnú de, te na cáchi máá de.

22 Súcuān ni cacahān tatá de náná de, chi cáyūhú de cájito de jnáhan de tēe hebreo. Chi je ni casándaā tēe un jeē núu ndé ñáyuu cachí i jeē Jesús cúu Cristo, Yaā ní tají Yaā Dios, te quenehen de i jeē ma cúu ga quívi i ini vehe i sinagoga.

23 Jeē yúcuān ní cacahān tatá de náná de: Cajnūhun ró maá de, chi je jéhnú de.

24 Yūcuān na te tēe hebreo un ní cacana tucu de tēe ni iyo cuáá un. Te ni cacahān de jíin:

Cachi cají ró nuū rī, jíto jínuū Yaā Dios. Chi cájini rī jeē tēe iyó cuéchi cúu tēe ni nanune tinūú ró.

25 Yūcuān na te ni cahān de:

Tu jíni na núu iyó cuéchi de, chí naún. Te iyó ñin jeē jíni ná, cúu jeē tēe cuáá ní cuu ná, te vijna chi ni ndundijin tinūú ná. Achí de.

26 Te ni cacajnūhún tucu de:

¿Ndese ni sáha de jíin ró? ¿Ndese ni nanune de tinūú ró núu súcuān?

27 Te ni cahān de:

Je ni cuu ni castūhun ná nuū ní, te tu ní cácu ni ní cuatáhú ní. ¿Te najehē cácu ni ní jeē cáchi tucu ná núu ní? ¿Te chí suni cácu ni ní jíjnáhan ní candíje ní yá naún?

28 Yūcuān na te ni cacahān neé jíin de, te achí:

Máá ró chi cándíje ró tēe ún, te máá rí chi cácuandíje ri Moisés.

29 Te cájini rī jeē ni cáhān Yaā Dios jíin Moisés. Te tēe yúcuān, ni tu cájini rī ndé nuū véji de.

30 Te ni cahān tēe ni iyo cuáá:

Náa ni na jeē cácahān ni jeē tu cájini ní jeē véji de nuū Yaā Dios, vésú ni nanune de tinūú ná.

31 Te cájini yō jeē Yaā Dios tu jíni nahín yá jeē cájicān ñayuu iyó cuéchi. Chi jíni nahín yá nuū maá-ni ñayuu jeē cáchiñúhún i ya te casáha i jeē cuní yā.

32 Te ní véji yó te tu ní jíni sōho cuíti yō jeē ñin tēe nanune de tinūú inga tēe ni cacu cuáá.

33 Te núu nasūu ndé nuū Yaā Dios véji tēe ún, te ma cúu cuíti sáha de ñin jniñu súcuān. Achí de.

34 Te ni cacahān tēe hebreo un:

Róhó chí iyó ndasí cuéchi ró ndé quívi ní cacu ró, ¿te á máá ró steén nuū rī naún? achí.

Te ni caquenehen tēe un yátā vehe i sinagoga.

Siquí ñayuu cáhīyo cuáá ánuá

35 Te ni jíni jnūhun Jesús jeē ní caquenehen de tēe ún. Te ni ñihín jnáhan ya jíin de, te ni cahān yā jíin de:

¿A cándíje ró Séhe Yaā Dios?

36 Te ni cahān de:

¿Ndé ñin cúu ya návāha candíje ná yá?

37 Te ni cahān Jesús:

Je ni jíto ró núu yā, te suu cúu ruhū jeē cahān jíin ró, achí yá.

38 Yūcuān na te ni jecuíñi yití de nuū yā, te ni cahān de:

Cándíje ná jeē ñihín cúu Jitoho ná.

39 Te ni cahān Jesús:

Véji ri ini ñayívi yáha jeē sándaā rī siquí ñáyuu. Chi ñayuu jeē najnūhun cácuáá ánuá, ndundijin ini anuá i jeē jécūhun ni i siquí rī. Te ñayuu jeē jéni ni i jeē cájecūhun ni i, najnūhun nducuáá ánuá i. Achí yá.

40 Te sava tēe fariseo jeē cáhīin jíin yá, ná ni cajini de jnūhun yáha, te ni cacahān de jíin yá:

¿Te chí jéni ni rō jeē suni tēe tu cájecūhun ni cácu máá rí naún?

41 Te ni cahān Jesús:

Núu jeē cácu ró tēe tu jécūhun ni nuú, te ma cóo cuéchi ró. Te siquí jeē ní cacahān rō jeē cájecūhun ni rō, te tu cájetáhú ró, jeē yúcuān condee cuéchi siquí rō.

Jnūhun yátā siquí lanchi

10

1 'Jendaá cahān rī jíin ró, núu yíhi lanchi ini corral cánevāha cáhnu ñayuu, te núu ndé tēe tu quívi de ichi yéhyí corral un, chi sa suhva inga lado cáa de quívi de, tēe un cúu ñacuíhná, chi véji jeē sacuíhná.

2 Te tēe quívi ichi yéhyí, chi tēe un cúu pastor ndíto lanchi.

3 Te tēe ndíto yéhyí, núne de te quívi tēe ún. Te lanchi de cácu ni tī tachí de. Te cána de síhví lanchi máá de, te táva de tí.

4 Te núu ni tava de ndihi lanchi máá de, te yósnúu de nuū tī cuahān de. Te lanchi un cándiquīn tī de, chi nácuni tī tachī de.

5 Te ma cóndiquīn tī yatā inga tēe, chi sa suhva cunu ti coto ti de, chi nácuni tī jeē nasūu jítoho tī cúu.

6 Jnūhun yátá yáha ní cahān Jesús jíin ñáyuu, te tu ní cájecūhun ni i na jnūhun cúu jeē ni cáhān yā.

Jesús cúu máá pastor vāha

7 Yūcuán na te ni cahān gā Jesús jíin i:

Jendaá cahán rī jíin ró: Máá rí cúu nájñūhun yéhyí corral nuū quívicoo ñayuu cácuu nájñūhun lanchi ri.

8 Tāca tēe jeē tu ní tájí Yaā Dios, jeē ní quijicoo de nde ná tu quee rī, cácuu de nájñūhun ñacuíhná, chi tu ní cástéén de jnūhun ndaā. Te ñayuu cácuu nájñūhun lanchi ri, tu ní cájetáhú i de.

9 Máá rí cúu nájñūhun yéhyí. Te ñayuu jeē jíin máá rí quívicoo, jnama ri i. Te cuu i nájñūhun lanchi jeē ndívicoo ti nuū yíhi vāha ti, te quéndacoo ti nuū cáji vāha ti.

10 'Tēe cuíhná chi máni vēji de jeē sacuíhná de lanchi, te cahni de, te snāā de. Te ruhū chi vēji ri návāha cotecu ñayuu cácuu lanchi ri, te nde yōhyo vāha ndetū coo i.

11 Máá rí cúu máá pastor vāha. Te pastor vāha chi ndító vāha de lanchi de, vēsú nde cuu de jeē siquī tī.

12 Te ñn tēe yíyāhu, nasūú pastor tī cúu de, chi nasūú lanchi máá de cúu ti. Te núu jíto de jeē vēji yíhī, te stóo de lanchi, te jínu de cuahān de. Te yíhī chi jnī ti lanchi, te sáha ti jeē jité núu lanchi.

13 Te tēe yíyāhu ún chi jínu de cuahān de siquī jeē lanchi tátú cúu jeē ndító de, te jeē yúcuu tu cúndáhú ni de ti.

14 'Máá rí cúu máá pastor vāha. Te jíni rī tāca ñáyuu cácuu nájñūhun lanchi ri, te máá i cájini i ruhū.

15 Te yāha cúu nájñūhun jeē Tatá rī jíni yā ruhū, te máá rí jíni rī Tatá rī. Te cuu rī jeē siquí ñayuu cácuu lanchi ri.

16 Te suni íyó gá ñayuu jeē cácuu lanchi ri, te sñn sñn ñayuu cácuu i. Te cánuú jéē suni condeca ri ñayuu ún. Te cuatáhú i jnūhun cáhān rī. Te coyūcu cáhnu-ni ndihi ñayuu candíje, te coo ñn-ni pastor i.

17 'Te Tatá rī manī ndasí yá jíin rí siquī jeē jéhe ri máá rí jeē cúu rī jehē ñayuu, te natecu tucu ri.

18 Nī ñn ma cúu cahni ruhū, chi máá rí cúu jeē jéhe jnūhun cuu rī. Jeē cachí máá rí te cuu rī, te jeē cachí máá rí te natecu rī, chi súcuan íyó poder rī. Súcuan ni cahān Tatá rī jeē sáha ri. Achí yá.

19 Te jeē ní cajini jnáhan ñuu yā hebreo jnūhun yáha, te ni cacusñn tucu i.

20 Te cuehē i ni cacahān:

¿Naun cáchusóhó ró jeē cahán de? Chi ñúhun tachī ini de, te ni tñvi xínī de.

21 Te sava ga i ni cacahān:

Tu súcuan cáhān tēe ñúhun tachī ini, nájñūhun cáhān tēe yáha. Te tēe ñúhun tachī ini, ¿á cuu nanune de tinūu tēe cuáá naún? Achí.

Jeē ní casquéhichī i Jesús

22 Te tiempo míjin cúu, te ñuu Jerusalén cánasáha ñayuu vico jeē cánucūhun ni i quívī ní cuhī templo cáhnu.

23 Te jíca cuu Jesús ini templo, ini corredor jeē naní Salomón.

24 Te jnáhan ñuu yā hebreo ni cacutútú i nuū yā, te ni cacahān i:

¿Nasaa ga quívī sáha ró jéē ma cucáhnu ni rī? Cachí cají núu rī jijnáhan ri núu máá ró cúu Cristo.

25 Te ni cahān Jesús:

Je ni castūhun rí nuū rō, te tu ní cá candíje ró. Tācá jniñu jeē ní tejniñu Tatá rī ruhū sáha ri, yūcuan stéén cají jéē máá yá ni tají ruhū.

26 Te tu cá candíje ró, chi nasūú lanchi ri cácuu ró, nájñūhun je ni cahān rī jíin ró.

27 Ñayuu cácuu lanchi ri, chi nácuni i jeē máá rí cúu jeē cahán jíin i. Te jíni rī i, te cándiquīn i ruhū.

28 Te cotecu i ñí cáni sáha ri, te ma jnahnú ndetū cuíti i. Te ni ñn ma cúu quende i ndaha ri.

29 Máá Tatá rī ni squívī ya i ndaha ri. Te cújéhnu ga máá yá vēsú tāca gá. Te ni ñn ma cúu quende i ndaha ya.

30 Máá rí jíin Tatá rī, chi ñn-ni cúu ri, achí yá.

31 Yūcuán na te jnáhan ñuu yā hebreo ni caquihin tucu de yuū jeē cuáha de xínī yā.

32 Te ni cahān yā jíin de:

Ni steén rī cuehē jniñu váha nuū rō jeē ni sáha ri jíin poder Tatá rī. ¿Te á síquī jeē ni sáha ri jniñu váha cúu jeē cuáha ró yúu xinī rī núu súcuan? Achí yá.

³³ Te ni cacahān de jíin yá:

Nasūu síquī jeē ni sáha ró jniñu váha cúu jeē cuáha ri yuū xinī rō, chi síquī jeē cahán ndevāha ró jéē achí ró jeē inuú cúu ró jíin Yaā Dios. Chi tēe-ni cúu ró, te sáha ró jéē inuú cúu ró jíin Yaā Dios. Achí de jíin yá.

³⁴ Te ni cahān Jesús:

Yósó núu tútu ley cánevāha ró jéē ni cáhān Yaā Dios: Nájñuhun yaā cácuu ró, achí Yaā Dios, achí tutu.

³⁵ Chi ñayuu jeē ní cajetáhú jnúhun ya, ni cahān yā jeē cácuu i nájñuhun yaā. Te cájini yō jeē ma cúu cahān yō jeē tú ndaā jnúhun cáhān tutu iī.

³⁶ Núu súcuan ¿te naun cácahān rō jeē jnúhun ndevāha cúu jeē ni cáhān rī jeē Séhe Yaā Dios cúu ri? Chi máá Yaā Dios ni jeni ya ruhū síquī jniñu iī, te ni tají yá ruhū vēji ri ini ñayīví.

³⁷ Núu tu sáha ri jniñu sáha Tatá rī, núu súcuan te ma candíje ró rúhū.

³⁸ Te núu sáha ri, te vēsú tu cácahān ró rúhū, te na cándíje ró síquī jniñu sáha ri ún. Te súcuan te cucáhnu ni rō jeē ñn-ni cúu Tatá rī jíin rí, te ñn-ni cúu ri jíin Tatá rī. Achí yá.

³⁹ Yūcuán na te cánducú tucu de jñi de ya. Te ni ndoñúhún-ni ya cuahān yā.

⁴⁰ Te cuanuhun yā yūte Jordán ichi núu cáne niāndii, nuū ni íne Juan ni scuándute de. Te ni condee yā yūcuán.

⁴¹ Te ni quijicoo cuehē ñayuu nuū yā, te ni cacahān i jíin táca jnáhan i:

Ndaā chi vēsú tu ní sáha Juan ni ñn jniñu jénu, te ni cundaā ndihī jnúhun ni cahān de síquī ndese sáha tēe yáha. Achí i.

⁴² Te cuehē ñayuu jeē ni jéngoo nuū yā yūcuán, ni cacandíje i ya.

Jeē ni jīhī Lázaro

11

¹ Te ni īyo ñn tēe cúhú, nání de Lázaro. Te máá de jíin cuáha de María jíin Marta, cácuu de ñayuu ñuu Betania.

² Te María un jéē cúu cuāha Lázaro, suu ña cúu jeē ní chihī aceite perfume jehē Jitoho yō, te ni nasíchí ña jíin íxi xíní ña.

³ Te ndindúú cuáha de un ní catajī ña jnúhun cuahān nuū Jesús:

Tēe jeē maní ni jíin, cúhú de, achí ña, achí mozo.

⁴ Te ná ni jini Jesús jnúhun, te ni cahān yā:

Cuehyī yáha chi nasūu cuéhyī jeē ví cuu de cúu. Chi sa suhva sáha Yaā Dios jeē cuni ñayuu ndese cújénu ya. Chi ruhū, Séhe Yaā Dios, jíin cuéhyī yáha te steén rī jeē suni cújénu máá rí. Achí yá.

⁵ Te maní Jesús jíin Marta jíin cúhú ña jíin Lázaro.

⁶ Te vēsú súcuan te nuū ni níhīn yā jnúhun jeē cúhú de, te ni quendōo ya uū gā quivī nuū ndeé yá un.

⁷ Yūcuán na te ni cahān yā jíin tēe cáscuáha jíin yá:

Na quíhīn tucu yó región Judea.

⁸ Te tēe cáscuáha un ní cacahān de jíin yá:

Maestro, ná tu cuu quivī jeē ní canducú jnáhan yó hebreo cuāha de yuū xinī ní. ¿Te cúní ni quíhīn tucu ní yúcuan naún? Achí de.

⁹ Te ni cahān Jesús:

Ma cúu cahni ñayuu ruhū núu ná tu quee maá quivī cuu rī. Chi jeē iyó rí ñayīví yáha cúu nájñuhun jeē iyó úxī uū hora ñn nduú. Te jeē sáha ri jeē cuní Yaā Dios, cúu ri nájñuhun tēe jeē jíca nduú, te tu cáchihī de jehē de, chi cúndijin nuū de ñayīví yáha.

¹⁰ Te tēe jeē tu sáha jeē cuní Yaā Dios, chi nájñuhun jíca de jecuáa, te nájñuhun cáchihī de jehē de, chi tu cúndijin ini anuá de. Achí yá.

¹¹ Yūcuán na te ni cahān tucu ya:

Amigo yō Lázaro quíxī de, te quíhīn rī sáha ri jeē nátahū ni de. Achí yá.

¹² Yūcuán na te tēe cáscuáha un ní cacahān de:

Núu quíxī de te jíin yō jeē nduvāha de.

¹³ Te Jesús chi súcuan ni cahān yā jeē jé ni jihī de. Te cájeni ni tēe cáscuáha jeē quixí ndije de.

¹⁴ Yūcuán na te ni cahān cají yá:

Je ni jihī Lázaro.

¹⁵ Te cúsiñ ni rī jeē tu ní cóyūcu yó yūcuán, návāha vāha ga candíje ró jéē coto ró jniñu jénu sáha ri. Núu súcuan te na quíngoo yó núu ndíyī ún. Achí yá.

¹⁶ Yūcuán na te Tomás, tēe cúu cuátí, ni cahān de jíin jnáhan de jeē cascuáha jíin yá:

Suni na quíngoo yó návāha cuu yō jíin yá, achí de.

Jesús cúu jeē sáha jeē nátecu te cotecu ní cáni

17 Te nuū ní quee Jesús, te jíin yā jeē ní cuu cuūn quivī yíndūji Lázaro.

18 Te yajni-ni íne ñuu Betania jíin ñuu Jerusalén, nájñuhun uū kilómetro yosáva.

19 Te Marta jíin María, ni quecoo cuehē jnáhan ña hebreo jeē cahán i jñuhun ndeyí ni jíin ña jeē síquí jeē ni jíhī cuāha ña.

20 Te nuū ní jini Marta jeē véji Jesús, te ni quenda ña cuajnahān ña ya. Te María chi ni ndōo ña vehe.

21 Te ni cahān Marta jíin Jesús:

Núu ní íyo ní yáha, te ma cúu cuāha ná núú.

22 Te vēsú súcuan te jíin na jéē tāca jéē cacán ni núu Yaā Dios, te sáha ya, achí ña.

23 Te ni cahān Jesús jíin ña:

Natecu cuāha ró.

24 Te ni cahān Marta:

Jíin na jéē nátecu de quivī nátecu tāca ndíyí nde quivī jíinu ñayiví.

25 Te ni cahān Jesús:

Máá rí cúu Yaā sáha jeē nátecu jíin jéē cótecu ní cáni. Ñayuu candíje jeē jnáma ri i, vēsú na cúu i, te natecu i.

26 Te ñayuu cátecu te cándíje i ruhū, cotecu i ní cáni andiví. ¿A cándíje ró jñuhun yáha? Achí yá.

27 Te ni cahān ña:

Cándíje ná jéē maá ní cúu Cristo, Sēhe Yaā Dios, jeē achí tutu jeē quíji ini ñayiví, achí ña.

Jeē ni ndáhyū Jesús nuū yíndūji Lázaro

28 Te ná ni cahān ña súcuan, te cuahān-ni ña, cuacana yuhu ña cuhū ña María:

Máá Maestro ni quee yā, te cána ya rohó, achí ña.

29 Te jeē ní jini María jñuhun yáha, te yachí ni ndocuiñī ña, cuahān ña nuū yā.

30 Te ná tu quiví Jesús ñuu, chi ni ndōo-ni ya nuū ni jéjnahān Marta yā.

31 Te ñayuu hebreo un jéē cáyūcú ini vehe jíin María, jeē cácahān i jñuhun ndeyí ni jíin ña, ni cajito i jeē yachí ni ndocuiñī ña cuahān ña. Te ni candiquīn i ña cuangoo i, chi cájeni ni i jeē cuándahyū ña nde nuū yíndūji ndíyí.

32 Yūcuán na te ni jinū María nuū íne Jesús, te ni jecuiñī yití ña nuū jehé yā, te ni cahān ña:

Núu ní íyo ní yáha, te ma cúu cuāha ná núú, achí ña.

33 Te ni jito Jesús jeē ndahyū ña jíin jéē cándahyū ñayuu vējicoo jíin ña. Te yōhyo ni nducuihyá ni yā, te ni jnahuhū ni yā jeē cundáhú ni yā i.

34 Te ni cajñuhun yá ña:

¿Ndé mí ní cachindūji ró de?

Te ni cacahān ña jíin yá:

Quíhín yō te cuni ní, achí ña.

35 Te ni ndahyū Jesús.

36 Yūcuán na te ni cacahān ñayuu hebreo un:

Condēhe náa yōhyo manī de jíin ndíyí ún.

37 Te sava i chi ni cacahān i:

Tēe yáha jéē ní nanune de tinūu tēe cuáá, ¿á tu ní cúu sáha de jeē ma cúu Lázaro nuú? achí i.

Jeē ní natecu Lázaro

38 Te yōhyo ni jnahuhū ni tucu Jesús, te ni quee yā nde nuū yíndūji ndíyí. Te ñn yaū cava cúu, te yuyáú un ndíhyú ñn yuū.

39 Te ni cahān yā:

Tejiyo yuū un jíjnahān ró, achí yá.

Te Marta, cuāha ndíyí un, ní cahān ña:

Je jéén xicō de, chi je ni cuu cuūn quivī yíndūji de.

40 Te ni cahān Jesús jíin ña:

¿A násūú je ni cahān rī jíin ró jeē núu candíje ró te coto ró jéē yóhyo cújéhu Yaā Dios jíin poder yā? achí yá.

41 Yūcuán na te ni catejiyo i yuū jeē ndési yuyáú ndíyí ún. Te ni ndacoto-ni Jesús ichi ándiví, te ni cahān yā:

Tátā, na cútahū na núu ni jéē sáha ní jéē jicán na.

42 Te jíin na jéē niní sáha ní jéē jicán na.

Te jeē váha ñayuu cáhīn yáha cúu jeē súcuan cáhān na, návāha na cándíje i jeē maá ní ni tají sáña.

43 Te ná ni cahān yā súcuan, te ni cahān jee ya:

Lázaro, quenda quíji ró, achí yá.

44 Te ni quenda-ni tēe ni jíhī ún, te ñúsúcún ndaħa de síħin de jíin tira sahma. Te nuū de ñúsúcún ñn sahma. Te ni cahān Jesús jíin i:

Nandají ró sahma ñúsúcún de, návāha cuu caca de, áchí yá. Te ni canandají i.

Jeē ní casquijnáhan de jnūhun jeē cáhni de Jesús

(Mt. 26.1-5; Mr. 14.1-2; Lc. 22.1-2)

⁴⁵ Yūcuán na te cuehē ñayuu hebreo jeē ní quijicoo nuū María, ni cacandíje i Jesús, chi ní cajito i jniñu ni sáha ya.

⁴⁶ Te sava i chí cuango i nuū tée grupo fariseo, te ni cacastūhún i ndese ní sáha Jesús.

⁴⁷ Yūcuán na te tēe fariseo un jíin sūtū cácujeñnu ni candutútú de junta jíin táca gá tēe cácujeñnu. Te ni cacahān de:

¿Ndesa sáha yó? Chí tēe ún yōhyo cuehē jniñu jéñnu sáha de.

⁴⁸ Te núu condēhé-ni yó, te ndivii ñayuu candíje i de. Te quijicoo táca tēe nación Roma jeē cácujeñnu, te canu de templo cáhnu yó, te scuíté núu de ñayuu nación yō, achí de jíjnáhan de.

⁴⁹ Te ñn jnáhan de jeē naní Caifás, jeē cúu máa sūtū cujeñnu ga cuiyā ún, ni cahān de:

Róhó chí tu cájini cuiti rō,

⁵⁰ ni tu cájecūhun ní rō jeē váha ga jeē cúu ñn tēe jehē ñayuu nación yō vēsú jeē náa ndivii i, áchí de.

⁵¹ Te tu ní cáhán de jnūhun yáha jéē jéni ní maá de. Chí siquī jeē cúu de sūtū cujeñnu ga cuiyā ún, te ní sáha Yaā Dios jíin de jeē ní nacani de jnūhun jeē cúu Jesús jehē ñayuu nación hebreo.

⁵² Te nasūu máa ñn-ni jehē nación hebreo, chí suni jehē ndivii ñayuu cácuu sēhe Yaā Dios jeē ní cajitē núu táca nación, návāha ñn na cuu i jíjnáhan i.

⁵³ Yūcuán na te nde quiivī ún te táca tēe hebreo cácujeñnu un, ní casquijnáhan de jnūhun jeē cáhni de Jesús.

⁵⁴ Jeē yúcuan tuá ní jíca ndijin yā nuū jnáhan ñuu yā hebreo un, chí ní quenda ya región Judea, te cuahān yā ñn ñuu naní Efraín, nuū iyó yajni ñuhun téhé. Te ní condee yā yúcuan jíin tēe cácuáha jíin yá.

⁵⁵ Te ní cuyajni vico pascua jeē cánasáha ñayuu hebreo. Te cuehē ñayuu táca ñuu yūcuán cuango i ñuu Jerusalén, návāha squícu i jeē cahán ley jeē cúchi i ndundoo i nuū Yaā Dios, te sáa te quejéé vico pascua.

⁵⁶ Te cánanducú i Jesús, te cácajnūhun jnáhan i ini templo:

¿Ndesa cájeni ní rō? ¿A quiji de vico, chí tuú? Achí i.

⁵⁷ Te sūtū cácujeñnu jíin tēe fariseo ní candacu de jniñu jeē núu ndé ñn ñayuu jíin ndé nuū íne ya, te na cástūhún i, návāha jñi de ya.

Jeē ní chuhun María perfume jehē Jesús
(Mt. 26.6-13; Mr. 14.3-9)

12

¹ Te cúmanī iñū gā quiivī te coo vico pascua. Te ní jehēn tucu Jesús ñuu Betania nuū ndeé Lázaro, tēe ní jihī te ní nastécu yā de.

² Te ní casáha i ñn vico xíni jeē yiñúhún i jíin yá. Te Marta ní jeni ña cohō. Te Lázaro yéji de staā jíin yá nuū mesa jíin táca gá ñayuu.

³ Yūcuán na te María ní quee ña jíin nájnūhun sava litro aceite perfume jeē máni ita nardo cúu, te yōhyo yahu ndeé. Te ní chuhun ña jehē Jesús, te ní nasíchí ña jíin xíni ña. Te ñí ini vehe un ní chitú xicō perfume un.

⁴ Yūcuán na te ní cahān Judas Iscariote sēhe Simón, ñn tēe scuáha jíin yá un, te suu de cúu jeē nastúu de ya:

⁵ ¿Najehē tu ní cúyāhu perfume yáha jéē uní ciento denario, te cuāha yó núu ñayuu ndahú núu. Achí de.

⁶ Súcuan ní cahān de, nasūu jéē cundáhú ndije ní de ñayuu ndahú, chí sa suhva jeē cúu de tēe cuíhná. Chí máa de ndíso yijni xūhún, te quíhin cuíhná de jeē cájequin táca tēe ún.

⁷ Yūcuán na te ní cahān Jesús:

Ma stáhān rō ña. Chí jeē ní sáha ña yāhá cúu jeē ní sátūhva ña ruhū nde quiivī jeē quíndūji rí.

⁸ Chí níni cáyūcu ñayuu ndahú jíin ró, te ruhū chí tuá condee rí jíin ró. Achí yá.

Jeē ní casquijnáhan de jnūhun jeē cahni de Lázaro

⁹ Te cuehē ñayuu hebreo ní cajini jnūhun i jeē néne ya ñuu Betania. Te ní jinūcoo i, te nasūu máa ñn jeē cuní i coto i nuū Jesús, chí suni jeē cuní i coto i nuū Lázaro, tēe jeē ní nastécu yā.

10 Yūcuán na te sutū cácujuhnu ni casquíjnahán de jnūhun jeē suni cahni de Lázaro.

11 Chi jeē siquí Lázaro te ni cujiyo cuehē jnāhan ñuu de hebreo nuū de, te cá candije i Jesús.

Jeē ni quívi Jesús Jerusalén

(Mt. 21.1-11; Mr. 11.1-11; Lc. 19.28-40)

12 Te inga quívi ún, te ñayuu cuehē jeē ní quecoo vico pascua un, ní cajini jnūhun i jeē véji Jesús ñuu Jerusalén.

13 Te ni cajehnde i ndaha ñúú, te ni quen-dacoo i cuajnahán i ya. Te cá cana jee i:

Yōhyo cújehnu Yaā Dios. Yōhyo vāha Yaā cúu Yaā jeē véji jíin jniñu máá Jítoho yō Yaā Dios. Yōhyo vāha Yaā cúu Rey nación yō Israel. Achí i.

14 Te ni nihin Jesús ñn burro, te ni jecosō yā tī, nájnūhun cáhán tutu i:

15 Ñayuu ñuu Jerusalén jeē naní ñuu Sion, ma yūhu ró jijnāhan ró.

Yāhá condēhe ró jeē véji Rey rō, te yósó yá ñn burro.

Achí tutu.

16 Te quívi ún te tēe cáscuáha jíin yá, tu ní cájecūhun ni de jeē súcuan squícu táca jēe yosó núu tútu i. Te nde ná ni ndujehnu Jesús jeē cuánuhun yā andiví, te sáa te ni canucūhun ni de táca jnūhun yósó síquī yā, jíin jēe ní casáha de súcuan jíin yá.

17 Te ñayuu ní cahin jíin yá ná ni cana ya xinī Lázaro nuū ní yindūji de, te ni nastécu yā de, ni canacani i jnūhun ndese ni sáha ya.

18 Jeē yúcuan ní quendacoo ñayuu cuehē un, ní jejnahan i ya, chi ni cajini jnūhun i jeē ni sáha ya jniñu jehnu un jēe ni steén yā poder yā.

19 Yūcuán na te ni cacahán maá téee fariseo:

Vijna te je ni cajito yó jēe ma cúu cuiti gā casi yō. Chi jito yó jēe ndivii cuiti ñayuu cuangoo i jíin de. Achí de jijnāhan de.

Ñayuu nación Grecia nánducú i Jesús

20 Te sava ñayuu nación Grecia, suni ni quiijicoo i ñuu Jerusalén vico pascua un jēe chiñuhún i Yaā Dios.

21 Te ni quecoo i nuū Felipe, tēe ñuu Bet-saida ndañúu Galilea. Te ni cacahán i jíin de:

Tátā, cá cuni ná cahán na jíin Jesús, achí i.

22 Te ni jehēn Felipe, ni castūhún de nuū Andrés. Te ndindúú de cuacastūhún de nuū Jesús.

23 Te ni cahán Jesús jíin de:

Je ni quee quívi jeē ndujehnu Yaā ní nduu tēe.

24 Te jendaá cahán rī jíin ró, ñn nunī trigo núu tú ningava nuū ñūhun te quindūji, núu súcuan te quendōo máá ñn-ni. Te núu quindūji, te nacayā cuehē ndasí. Te suni súcuan cánuú cuu rī quindūji rī, návāha coo cuehē ñayuu jeē ndúu i sēhe Yaā Dios.

25 Te na-ni ñayuu núu tu jēhe i jnūhun ndoho i jeē síquī ruhū, te jnahnū ndetū i. Te ñayuu jeē jēhe i jnūhun ndoho i jeē síquī ruhū ini ñayiví yáha, cotecu i ní cáni andiví.

26 Núu ndé ñayuu cuni i cuajniñu i nuū rī, na cóndiquin i ruhū. Te nuū cóndee rī, suni yūcuán condēe ñayuu jejniñu nuū rī. Te ñayuu jejniñu nuū rī, chi sáha Tátá rī jeē cujehnu i.

Jeē ni cahán Jesús jeē cuu yā

27 'Te vijna te cúcuíhyá ndasí ni rī sáha jnūndóho quiiji síquī rī. ¿Te ndese cahán rī? ¿A cahán rī jíin Tátá rī: Jnama ní sáha núu jnūndóho jeē quiiji síquī ná, achí rī? Ma cúu, chi jeē síquī yúcuan cúu jeē véji rī.

28 Tátā, stéén ni jēe cujehnu ndasí ní jíin poder ni, achí yá.

Yūcuán na te ichi ándiví ní cahán ñn jnūhun:

Je ni steén rī jeē cujehnu rī, te sáha tucu rī inga jínu, achí yá.

29 Te ni cajini ñayuu cáhlin yūcuán, te ni cacahán i jeē taja cáhán. Te sava ga i ni cacahán:

ñn ndajéhé Yaā Dios ni cahán jíin yá.

30 Te ni cahán Jesús jíin i:

Tu ní cáhán jnūhun yáha jēe síquī ruhū, chi sa suhva návāha cuni rō síquī jnūhun jeē ni cahán yā jíin rí.

31 Vijna cúu jeē sándaā Yaā Dios síquī cuéchi ñayuu ñayiví yáha. Vijna cúu jeē scúnu ya jexeén jeē ndácu jniñu ini ñayiví yáha.

32 Te ruhū, núu na jínu condita caa rī cuu rī ini ñayiví, te sáha rī jeē jnāá táca ñayuu quívicoo i ndaha rī, achí yá.

33 Súcuan ni cahán yā jeē steén yā ndese modo cuu yā.

³⁴ Te ni cacahān ñayuu jiín yá:

Ni cajini sōho ná jéē cahán tutu ley Yaā Dios cánevāha yó, jeē Cristo cotecu yā ní cáni. ¿Te naun cáhán ni jéē Yaā ní nduu tēe, cánuú condita caa ya cuu yā? ¿Ndé ñn cúu máá Yáā ní nduu tēe núu súcuan? Achí i.

³⁵ Yūcuán na te ni cahān Jesús:

Máá jecu na quivī condee rī jiín ró jeē cúu rī luz cundijin ini anuá rō. Núu súcuan te vijna jeē iyó gá luz rī jiín ró, te caca ró jiín, chi sanaa ni rō te cuahān rī, te nájnūhun quendōo ró núu néē. Chi ñayuu cájica nájnūhun nuū néē, tu cájini i ndé nuū cuángoo i.

³⁶ Núu súcuan te níni ndéé gá rī jiín ró, te candíje ró rúhū jeē cúu rī luz, návāha nduu ró ñayuu cájica jiín luz, achí yá.

Súcuan ni cahān Jesús tāca jnūhun yáha, te cuahān-ni ya, te tuá ni stéén yā maá yá nuū i.

Jeē tu ní cá candíje ñayuu hebreo jeē cúu ya Cristo

³⁷ Te vésú cuehē jniñu jéhu ni sáha Jesús jeē steén yā poder yā nuū i, te tu ní cá candíje i ya.

³⁸ Chi squícu nahín jnūhun ni cahān Isaías, tēe ni nacani jnūhun Yaā Dios nde jenahán: Tátā Yaā Dios, tu ní cá candíje ñayuu jnūhun ni canacani ná, te tu ní cá candíje i jniñu jéhu jeē ni stéén ni poder ni núu i.

Achí Isaías.

³⁹ Jeē yúcuan tu ní cúu candíje i, chi ni cahān tucu Isaías:

⁴⁰ Ni sáha ya jeē nájnūhun cáhīyo cuáá ánuá i,

jiín jéē cá cunīhni ni i, návāha coo nájnūhun jeē tu cájito i, te ni ma jécūhun ni i, ni ma násāma ini i quivīcoo i nuū rī, jeē nasávāha rī anuá i nuū cuéchi i.

Achí Cristo, achí tutu.

⁴¹ Jnūhun yáha ní cahān Isaías, chi je ni jito de ndese yōhyo cújéhu Jesús, te ni cahān de ndese coo quivī jeē quíji ya.

⁴² Te vésú súcuan te cuehē ñayuu hebreo chi ni cacandíje i ya, te suni nde jiín sava tēe cándacu jniñu. Te tu ní cá cachi de jeē cá candíje de ya, chi siquī jeē cáyūhú de tāca tēe fariseo. Chi núu súcuan te quenehen

ún de ini vehe iī sinagoga jeē ma cuáha ga jnūhun quivīcoo de.

⁴³ Chi cá cusī gā ni de jeē cújéhu de sáha ñayuu, vésú jeē cújéhu de sáha Yaā Dios.

Jnūhun cáhán Jesús cúu jeē sándaā siquī ñáyuu

⁴⁴ Te ni cahān jee Jesús:

Ñayuu cá candíje ruhū, nasūu máñúhún-ni ruhū cá candíje i, chi suni cá candíje i nde maá Tátá rī, Yaā ní tají rúhū.

⁴⁵ Te ñayuu cájito nuū rī, suni cájito i nuū Yaā ní tají rúhū.

⁴⁶ Máá rí jeē cúu rī luz cundijin ini anuá ñayuu, ni quiji rī ini ñayivī návāha tāca ñáyuu cá candíje ruhū, ma cáca i nájnūhun nuū néē.

⁴⁷ Te núu ñn ñayuu jini sōho i jnūhun cáhán rī, te núu tu jétáhú i, te nasūu rúhū sándaā siquī i. Chi tú vēji rī jeē ndénehen rī cuéchi siquī ñayuu ñayiví, chi sa suhva jeē jnáma rī i.

⁴⁸ Te ñayuu jeē casquéhichī i ruhū te tu cájetáhú i jnūhun cáhán rī, iyó ñn jeē sándaā siquī i. Suu tāca jnūhun jeē ni cahān rī, jnūhun un cúu jeē ndenehen cuéchi siquī i quivī jínu ñayiví.

⁴⁹ Chi tu cáhán rī jeē cúu ni maá rí, chi Tátá rī, Yaā ní tají rúhū, máá yá ni ndacu jniñu nuū rī ndese cahān rī jiín ndese stéén rī.

⁵⁰ Te jini rī jeē jniñu ndácu Tátá rī sáha jeē cótecu ñayuu ní cáni. Núu súcuan te jnūhun cáhán rī, chi máni jnūhun jeē ní cachi Tátá rī cúu, achí yá.

Jeē ní nacate ya jehē tēe cáscuáha

13

¹ Te jehíni inga quivī te quejéé vico pas-cua. Te je jini Jesús jeē ní quee quivī jeē quénda ya ñayiví yáha quínuhun yā nuū Tátá yā. Te níni cundáhú ni yā ñayuu maá yá jeē cáyūcú ini ñayiví. Te vijna jeē jínu jeē íne ya ñayiví, te sáha ya ñn jniñu jeē steén cají yá jeē cundáhú ni yā i.

² Te jexeén je ni squiví ini anuá Judas Iscariote sēhe Simón, jeē vijna nastúu de ya.

³ Te jini Jesús jeē véji ya nuū Yaā Dios, te nuhūn yā nuū Yaā Dios, jiín jéē ni sáha Tátá yā jeē cújéhu ya siquī ndihí-ni.

⁴ Te cúxini ya jiín té cáscahá jiín yá, te ni ndocuiñi yá. Te ni stáa ya sahma ndíi ya, te ni jihni yá in toalla chíi ya.

⁵ Te ni chuhun ya ndute ini in tijehēn. Te ni quejéé yá nácate ya jehē té cáscahá. Te násíchi yá jiín toalla jeē nuhní chíi ya.

⁶ Te ni jinū yá nuū Simón Pedro. Te ni cahān Pedro jiín yá:

¿Sa máá ní nacate jehē ná naún?

⁷ Te ni cahān Jesús:

Tu jécūhun ni rō jeē sáha ri vijna, te cúcuéé gá te jecūhun ni rō.

⁸ Te ni cahān Pedro jiín yá:

Ma nácate cuiti ni jehē ná.

Te ni cahān Jesús:

Núu tú nacate ri jehē rō, te ma cúu cundúú ró jiín rí.

⁹ Te ni cahān Simón Pedro:

Núu súcuan cúu te nasūu máá jéhē-ni ná, chí suni nacate ní ndaha ná jiín xíní ná, áchí de.

¹⁰ Te ni cahān Jesús jiín de:

Tēe jeē sa ní jichi, tu jini ñúhún ndundoo ní cáhnu de, chí máá jéhē-ni de, chí je iyó ndoo ní cáhnu de. Te máá ró chí je ni candundoo ró. Te tú ndihi ró cáhīyo ndoo.

¹¹ Chí je jini yá ndé in de cúu jeē nastúu de ya, te jeē yúcuan ní cahān yá: Tú ndihi ró cáhīyo ndoo.

¹² Te nuū ni jinu ni nacate ya jehē de jijnáhan de, te ni naquihin ya sahma ndíi ya, te ni nucōo tucu ya nuū mesa. Te ni cahān yá:

¿A cájecūhun ni rō na vé cuní cahān jeē ni sáha ri jiín ró?

¹³ Cácahān rō jeē Maestro jiín Jítoho rō cúu ri, te ndaā cácahān rō, chí suu ndije cúu ri.

¹⁴ Núu súcuan te vēsú Maestro rō jiín Jítoho rō cúu ri, te ni nacate ri jehē rō jijnáhan ró, te suni súcuan cánuú jéē nacate máá ró jehē jnáhan ró.

¹⁵ Chí jniñu yáha ni sáha ri jeē steén rī nuū rō jeē suni súcuan sa cuajniñu ró núu jnáhan ró, nájnūhun sa máá rí ni jejniñu ri nuū rō.

¹⁶ Jendaá cahān rī jiín ró jeē in mozo tu cújéhnu de nuū patrón de, te té jica jniñu táhú nuū de, te cújéhnu de nuū téé ni tají de. Te máá ró cácuu mozo rī, te na cuajniñu ró núu jnáhan ró nájnūhun ni steén rī nuū rō.

¹⁷ Te núu ni cajecūhun ni rō jnūhun yáha, te yōhyo ndetū rō te núu squícu ró.

¹⁸ Te nasūu jéē cahān rī jeē ndihi ró ndétū, chí je jini rī tāca rōhó jéē ní nacāji ri. Te cánuú squícu jnūhun yáha jeē cahān tutu i: Tēe yéji staā jiín rí, ni ndió cuíñi de siquī rī, achí tutu.

¹⁹ Te vijna te je cástūhun rí tāca jéē yáha núu rō nde ná tu coo, návāha núu na cóo, te candíje ró jéē máá rí cúu Yaā ní tají Yaā Dios.

²⁰ Jendaá cahān rī jiín ró jeē na-ni ñayuu jeē cuatáhú i tāca jéē tají rí, te ruhū jetáhú i. Te ñayuu jetáhú rúhū, suni jétáhú i Yaā ní tají rúhū vēji ri, achí yá.

Jeē ní cachi yá jeē nastúu Judas yá

(Mt. 26.20-25; Mr. 14.17-21; Lc. 22.21-23)

²¹ Te ná ni cahān Jesús tāca jnūhun yáha, te ni cucuíhyá ndasí ni yá. Te ni cahān cají yá:

Jendaá cahān rī jiín ró jijnáhan ró jéē in máá ró nastúu ruhū, achí yá.

²² Yūcuán na te té cáscahá jiín yá, ni candacoto de nuū jnáhan de, cájeni ni de ndé in de cúu jeē ni cáhān yá.

²³ Te in máá té scuáha jeē maní gā yá jiín, néne de xiin ya mesa jeē cácuixini de jiín yá.

²⁴ Te ni sáha Simón Pedro seña nuū de jeē na cájnūhún de ya ndé in de cúu jeē ni cáhān yá.

²⁵ Yūcuán na te té un ní scáyí de máá de nuū Jesús, te ni cajnūhún de ya:

¿Ndé in de cúu? áchí de jiín yá.

²⁶ Te ni cahān Jesús:

Na chúndaji ri staā te cuāha ri nuū in de, te suu téé un cúu, achí yá.

Te ni chundaji ya staā, te ni jēhe ya nuū Judas Iscariote sehe Simón.

²⁷ Te jeē ní quihin de staā ún, te ni quivi-ni Satanás ini anuá de. Yūcuán na te ni cahān Jesús jiín de:

Jniñu jeē sáha ró, na sáha yachí rō.

²⁸ Te ni in téé cáyeji staā jiín yá, tu ní cájecūhun ni de naun ni cahān yá súcuan jiín de.

²⁹ Chí sava de cájeni ni de jeē ni cáhān Jesús jiín Judas jeē cuāan de jeē jini ñúhún yá vico ún, chí jéé cuáha de jecu xūhun núu ñayuu ndahú. Chí máá de ndíso yijni xūhún.

³⁰ Te jeē ní yeji de staā ún, te ni quenda-ni de cuahān de. Te je ni cuaa.

Jeē ní ndacu ya jniñu jée

³¹ Yūcuán na te jeē cuahān Judas te ni cahān Jesús:

Vijna te ruhū, Yaā ní nduu tēe, stéén rī ndese cújéhnū rī, te suni jíin rúhū te cuni ñayuu ndese cújéhnū Yaā Dios.

³² Te núu jíin rúhū cuni ñayuu ndese cújéhnū Yaā Dios, núu súcuan te suni stéén Yaā Dios ndese cújéhnū ruhū jeē cúu rī Sēhe ya. Te yachī-ni stéén yā.

³³ Séhē, tuá nahán condee rī jíin ró jijnáhan ró. Te nanducú ró ruhū, te nájnūhun ni cahān rī jíin táca jnáhan yó hebreo, suni súcuan cáhán rī jíin ró vijna, jeē ma cúu jinūcoo ró núu quihín rī.

³⁴ Te vijna te ndácu rī ñn jniñu jée núu rō, jeē na cúndáhú ni rō jnáhan ró. Nájnūhun cúndáhú ni rī rohó, suni súcuan na cúndáhú ni rō jnáhan ró.

³⁵ Te núu cúndáhú ni rō jnáhan ró, súcuan te cuni táca ñáyuu jeē cácuu ró tēe cáscuáha jíin rí, achí yá.

Jeē ní cachi yā jeē yūhu Pedro cahān de jeē jiní de ya

(Mt. 26.31-35; Mr. 14.27-31; Lc. 22.31-34)

³⁶ Te ni cahān Simón Pedro jíin yá:
¿Ndé nuū quihín ni núu súcuan?

Te ni cahān Jesús:

Nuū quihín rī chi ma cúu condiquín rō ruhū vijna, te cúcuéé gá te jinū rō.

³⁷ Te ni cahān Pedro:

¿Najehē ma cúu condiquín na níhín vijna? Tu yúhú ná cuu na jée siquí ni.

³⁸ Te ni cahān Jesús:

¿A jéni ni rō jeē tu yúhú ró cuu rō jeē siquí rī? Jendaá cahán rī jíin ró jeē nde ná tu cana líhli, te uní jínu yūhu ró te cahān rō jeē tu jíiní rō ruhū. Achí yá.

Jesús cúu ichi jeē jinú yō nuū Tatá yā

14

¹ Te ni cahān gā yā:

Ma cucuíhyá ni rō siquí táca jnúndóho. Na cándije ró jée sáha Yaā Dios jehē rō, te suni na cándije ró jée sáha rī jehē rō.

² Chi nuū ndeé Tatá rī, íyó cuéhē vehe condee rō jijnáhan ró. Te núu jeē tu súcuan

íyó, te je ni castūhun rí nuū rō nuú. Núu súcuan te quihín rī quisátūhva rī nuū cóyūcu ró.

³ Te jeē quihín rī sátūhva rī nuū cóyūcu ró, te ndiji rī quinaquihín rī rohó quihín yō, návāha suni cóyūcu ró nuū cóndee maá rí.

⁴ Te je cájini rō ndé nuū quihín rī, te cájini rō ndese jinū rō yūcuán. Achí yá.

⁵ Te ni cahān Tomás jíin yá:

Tu cájini na ndé nuū quihín ni, ¿te ndese cuni ná ichi jíinú yūcuán núu súcuan?

⁶ Te ni cahān Jesús jíin de:

Maá rí cúu ichi jinū rō andiví, te maá rí cúu jnūhun ndaā jíin jnúhun cotecu rō ní cáni. Te ni ñn ma jinú nuū Tatá rī te núu tú ruhū.

⁷ Te núu je ni cajini rō ruhū, te suni je ni cajini rō Tatá rī núu súcuan. Te ndé vijna je cájini rō yā, chi je ni cajito ró núu rī, achí yá.

⁸ Te ni cahān Felipe jíin yá:

Stéén ni Tatá ni núu ná, te na cívāha ni na jíjnáhan ná, achí de.

⁹ Te ni cahān Jesús:

Felipe, je ni cuu cuehē quiví jíca rī jíin ró jíjnáhan ró, ¿te á ná tu cuni rō ndé ñn cúu rī naún? Tēe jeē jíto ruhū, suu Tatá rī jíto de. Núu súcuan ¿te najehē cahán rō jeē steén rī Tatá rī nuū rō?

¹⁰ ¿A tu cándije ró jée ñn-ni cúu rī jíin Tatá rī, te Tatá rī ñn-ni cúu ya jíin rí? Táca jnúhun cáhán rī jíin ró, nasūu jnúhun maá rí cúu. Chi Tatá rī jeē ñn-ni cúu ya jíin rí, maá yá sáha táca jniñu jeē sáha rī.

¹¹ Candíje ró jíjnáhan ró jée ñn-ni cúu rī jíin maá Tatá rī, te Tatá rī ñn-ni cúu ya jíin rí. Te núu tu cájecūhun ni rō, te cándije ró rúhū siquí táca jniñu sáha rī.

¹² Jendaá cahán rī jíin ró, núu ndé ñáyuu cándije ruhū, jniñu jéhnū jeē sáha rī yāhá, suni sáha i. Te jéhnū ga jniñu sáha i vēsú yāhá, chi quinhun rī nuū ndeé Tatá rī.

¹³ Te táca na-ni vé cacán rō nuū Tatá rī siquí jeē cándije ró jée cúu rī Sēhe ya, te sáha rī jeē cacán rō, te súcuan stéén rī jeē yóhyo cújéhnū Tatá rī.

¹⁴ Chi táca na-ni vé cacán rō siquí jeē cándije ró rúhū, te sáha nahín rí.

Jeē ni jéjnūhun ya jeē tají yá Espíritu Santo

¹⁵ Te núu maní rō jíin rí jíjnáhan ró, te na squícu ró jniñu ndácu rī nuū rō.

16 Te cacān tahu rī nuū Tatá rī, te taji yá ɪnga Yaā chindéé ñáhán róhó, te sáha ya jeē cóo sī ni rō jijnáhan ró. Te Yaā un cúu máá Espíritu jeē steén jnūhun ndaā, te condee yā jín ró ñí cáni.

17 Te ñayuu ñayīvi má cúu cuatáhú i ya, chi tu cúu coto i nuū yā, ni tu cúu cuni i ndese Yaā cúu ya. Te máá ró chi je cájini rō ndese Yaā cúu ya, chi ndéé yá jín ró, te condee yā ini anuá rō ñí cáni.

18 Ma stóo uun ri rohó, chi ndiji ri nuū rō.

19 Jecu na quivī te ma cóto ga ñayuu ñayīvi nuū rī. Te máá ró jijnáhan ró chi coto ró nuū rī, chi cotecu rī ñí cáni, te jeē yúcuan suni cotecu máá ró.

20 Te quivī ún te cuni rō jeē ñn-ni cúu ri jín Tatá rī, te máá ró ñn-ni cúu ró jín rí jeē ndeé rí ini anuá rō jijnáhan ró.

21 Te na-ni ñayuu núu ñúhun ni i jniñu ní ndacu ri, te squícu i, ñayuu un cúu jeē maní ndije jín rí. Te ñayuu jeē maní jín rí, suni coo maní Tatá rī jín i. Te suni ruhū coo maní rī jín i, te steén rī nuū i jeē nduú rí jín i. Achí yá.

22 Te ni cahán Judas jín yá (te nasūu téé cúu Iscariote):

Najehē cúu jeē steén ni máá ní nuū ná, te nuū ñáyuu ñayīvi chi tuú?

23 Te ni cahán Jesús:

Ñayuu jeē maní jín rí, chi cásquicu i jeē cahán rī. Te coo maní Tatá rī jín i. Te Tatá rī jín máá rí quijicoo ri cundúu rí jín i.

24 Te ñayuu jeē tú maní jín rí, tu cásquicu i jeē cahán rī. Te jnūhun cájini sōho ró cáhán rī, nasūu jnūhun máá rí cúu, chi jnūhun máá Tatá rī jeē ní taji ruhū cúu.

25 'Tāca jnūhun yáha cáhán rī jín ró níni íne ga rī jín ró.

26 Te Tatá rī chi taji yá Espíritu Santo, quiji nucuñi nuū rī. Te máá yá chindéé ñáhán yá rohó, te sáha ya jeē cóo sī ni rō. Te steén yā tāca jnūhun nuū rō, te nacachi tucu ya tāca jeē ni cáhán rī jín ró.

27 'Te jeē quihín rī, te sáha ri jeē cóo ndeyí coo sī ni rō. Nájñuhun íyó ndeyí sī ni máá rí, suni súcuan coo ndeyí sī ni rō sáha ri. Te jeē sáha ri jeē cóo ndeyí sī ni rō, tu quijnáhan jín jnūhun ndeyí cácahán ñayuu ñayīvi. Ma cucuíhyá ni rō siquī tāca jnúndóho, te ni ma yūhu ró.

28 Je ni cajini sōho ró jéē ni cáhán rī jeē quihín rī, te ndiji ri cundúu rí jín ró. Te núu cáhiyo maní vāha ró jín rí, te cusī ni rō jeē ni cáhán rī jeē nuhún rī nuū Tatá rī. Chi cújéhu ga Tatá rī vijna vésú ruhū.

29 Je ni castūhun rí nuū rō tāca jnūhun yáha nde ná tu coo, návāha núu je ni cuu, te candíje ró ruhū jijnáhan ró.

30 'Ma cahán rī cuehē gā jnūhun jín ró, chi je vēji jexeén jeē ndácu jniñu ini ñayīvi yáha. Te tú na vé cúu sáha siquī rī nuū.

31 Te na cóo nájñuhun ni ndacu Tatá rī jniñu nuū rī, návāha cuni ñayuu ñayīvi jéē maní rī jín Tatá rī, te sáha ri jniñu ní ndacu ya. Ndocuñi jijnáhan ró na quíngoo yó. Achí yá.

Jesús cúu nájñuhun yoyúcu uva

15

1 'Máá rí cúu nájñuhun yoyúcu uva váha ndaā, te Tatá rī cúu nájñuhun tēe ndíto yoyúcu uva un.

2 Te máá ró chi cácuu ró nájñuhun ndaha, te núu tu jéhe ró ndéhē te quende yā rohó. Te núu cácuu ró nájñuhun ndaha jeē jéhe ndehē, te nasándoo ya nacahnde yā rohó nájñuhun jeē cúu ró ndaha ún, návāha cuāha ró cuéhē gā ndehē.

3 Te máá ró chi je ni candundoo ánuá rō jín jnūhun ni steén rī nuū rō, nájñuhun ndúndoo ndaha uva.

4 Na cundúu ró jín rí, te suni máá rí cundúu rí jín ró. ñn ndaha uva ma cúu cuāha ndehē jeē maá, te núu tu yjñi jicā yóho. Te suni súcuan máá ró, ma cúu sáha ró jniñu váha te núu tu cundúu ró jín rí.

5 'Máá rí cúu yoyúcu un, te máá ró cácuu ndaha ri. Ñayuu jeē nduú jín rí, te ruhū ndúu rí jín i, máá i cúu nájñuhun ndaha jeē jéhe cuehē ndehē. Chi núu tú cundúu ró jín rí, te tú cuiti na jniñu váha cuu sáha ró.

6 Ñayuu jeē tu cundúu jín rí, quende yā i nájñuhun ñn ndaha uva, te ichī. Te ndoho i nájñuhun ndaha uva un jéē ndutútú te cayū nuū ñuhún.

7 'Núu ndúu ró jín rí, te cáñuhun ni rō jnūhun cáhán rī, yūcuán na te cacān rō na-ni vé cácuu rō, te sáha ri jeē cácahán rō.

8 Te núu cásáha ró cuéhē jniñu váha, súcuan cástéén rō jeē cúu ndije ró ñáyuu

cascuáha jíin rí, te súcuan nácuni ñayuu jeē yóhyo cújéhnú Tátá rī.

9 Nájñūhun manī Tatá rī jíin rí, suni súcuan manī rī jíin ró jijnáhan ró. Núu súcuan te ma siaá rō jñūhun manī rī jíin ró.

10 Núu squícu ró jniñu ní ndacu ri nuū rō, te níni coo manī rī jíin ró, nájñūhun máá rí squícu ri jniñu ní ndacu Tátá rī nuū rī, te níni iyó mání yā jíin rí.

11 'Súcuan ni cahān rī jíin ró návāha coo sñ ni rō nájñūhun iyó sñ ni rī, chi nde cusñ teyí ni rō.

12 Te yāha cúu jniñu ndácu ri nuū rō jijnáhan ró: jeē na cúndáhú ni rō jnáhan ró nájñūhun cúndáhú ni rī rohó.

13 Núu ñin tēe cuu de jehē amigo de, te tuá na vé cúmanī gā sáha de jeē cundáhú ni de amigo de.

14 Te máá ró cácuu amigo rī núu squícu ró jniñu ndácu ri nuū rō.

15 Ma cahān gā rī mozo jíin ró, chi ñin mozo tu cástūhún patrón nuū i ndese jéni ni de sáha de. Chi sa suhva amigo cahān rī jíin ró, chi je ni castūhun rí nuū rō tāca jñūhun ni cahān Tatá rī jíin rí.

16 Máá rí ni nacāji rōhó jēe jnáma ri rohó, te nasūu máá ró ni cánacani ni xihna gā jeē cóndiquín rō ruhū. Te ni jeni ri rohó jēe caca ndaā rō te scándíje ró cuéhē ñayuu jeē cuu i sēhe ri ní cáni. Te súcuan te ndíhi jeē cacán rō nuū Tatá rī siquí jeē cácadíje ró ruhū, sáha ya jeē jicán rō.

17 Te yāha cúu jniñu ndácu ri nuū rō: jeē na cúndáhú ni rō jnáhan ró.

Jeē cáquitī ni ñayuu ñayiví núu Jesús jíin núu ñáyuu cácadíje

18 'Te núu cáquitī ni ñayuu ñayiví núu rō jijnáhan ró, te je cájini rō jeē xihna gā nuū máá rí ni caquitī ni i.

19 Te núu jeē iyó gā rō jíin modo ñayuu ñayiví, te coo manī ñayuu ñayiví jíin ró nuú, nájñūhun manī i jíin jnáhan í. Te ni nacāji ri rohó jēe tuá coo ró jíin modo ñayuu ñayiví. Te jeē yúcuan cáquitī ni i nuū rō, chi tuá cácuu ró cuenta ñayiví.

20 Nucūhun ni rō jñūhun ni cahān rī jíin ró: Núu tu iyó yíñúhún ñáyuu nuū patrón, te nagā ni cuu nuū mozo de. Núu ni cajito xeēn i ruhū, te suni súcuan coto xeēn i rōhó jēe cácuu ró mozo rī. Te núu jeē ni cájetáhú

i jñūhun ni steén rī, te suni cuatáhú i jñūhun cástéén rō.

21 Te tāca jniñu yáha sáha i jíin ró jeē siquí ruhū, chi tu cájini i Yāa ní tají ruhū vēji rī.

22 'Núu jeē tu ní quíji ri nacani ri jñūhun nuū i, te ma cóo cuēchi i núu. Te vijna chí ma cúu ga cahān i jeē tu jíin i jeē iyó cuēchi i.

23 Ñayuu jeē cáquitī ni nuū rī, suni nuū Tatá rī cáquitī ni i.

24 Núu jeē tu ní sáha ri jniñu jéhnú nuū i jeē ní ñin tēe tu ní sáha de súcuan, te ma cóo cuēchi i núu. Te vijna je ni cajito i jniñu ún, te vēsú súcuan te cáquitī ni i nuū rī jíin núu Tatá rī.

25 Te súcuan cásáha i návāha squícu jñūhun yósó núu tútu ley Yāa Dios jeē cánevāha i: Ni caquitī ni i nuū rī, vēsú tú na cuēchi ri, achí.

26 'Te tají rí máá Yāa chindéé ñáhán rōhó te sáha ya jeē cóo sñ ni rō. Te Yāa un cúu máá Espíritu jeē steén jñūhun ndaā, te quíji ya nde nuū Tatá rī, te nacani cájí yá jñūhun rī.

27 Te suni máá ró nacani ró jñūhun ri, chi je cáñin ro jíin rí nde ná ni quejéé rí nácani ri jñūhun.

16

1 'Tāca jñūhun yáha ní cahān rī jíin ró návāha ma náyūhu ró jeē quíji jñūndóho.

2 Chi quenehen i rōhó jēe ma cuáha ga i jñūhun cone ró tāca vehe ñi sinagoga. Te quee quiví jeē cahni i rōhó, te caní ni i jeē ñin jniñu váha ni sáha i nuū Yāa Dios.

3 Te súcuan sáha i jíin ró, chí tu cájini cuítī i máá Tátá rī ni máá rí.

4 Te ni cahān rī jñūhun yáha jíin ró návāha núu je ni quee quiví jeē súcuan coo, te nucūhun ni rō jeē jé ni cahān rī jíin ró.

Jniñu sáha Espíritu Santo

'Te tu ní cahān rī jñūhun yáha jíin ró nde xihna ñúhún, chí íne máá rí jíin ró jijnáhan ró.

5 Te vijna chí nuhūn rī condee rī jíin Yāa ní tají ruhū vēji rī. Te ni ñin ró tu cájñūhun ró ndé nuū quihín rī.

6 Chi máá jēe cácuuñhyá ndasí ni rō jeē ni cahān rī súcuan jíin ró.

7 Jendaá cahān rī jíin ró: Jeē váha máá ró jijnáhan ró cúu jeē quihín rī. Chi núu tú quihín rī, te ma quíji Yāa chindéé ñáhán

róhó te sáha ya jeē cóo sī ni rō. Te núu cuahān rī, te tají rí yā quiji ya nuū rō.

⁸ Te jeē quée yā, te stéén yā nuū ñayuu ñayīvi jéē iyó cuéchi i, jíin ndese quīvicoo i ichi ndaā, jíin jéē sándaā Yaā Dios siquī cuéchi i.

⁹ Stéén yā jeē iyó cuéchi i, chi tu cá candíje i ruhū.

¹⁰ Te stéén yā siquī ichi ndaā, chi máá rí nuhūn rī nuū Tatá rī, te ma cóto ga rō nuū rī.

¹¹ Te stéén yā siquī jeē sándaā Yaā Dios cuéchi ñayuu, chi je ni cundaā jeē jnahnú ndetū maá jéxeén jeē cujéhnú ini ñayīvi yáha.

¹² Te iyó cuéhē gā jnūhun cúní rī cahān rī jíin ró, te ma cóto jecūhun ni rō vijna.

¹³ Te jeē quée maá Espíritu jeē steén jnūhun ndaā, te máá yá steén tāca jnūhun ndaā un núu rō. Chi ma cahán yā jeē maá yá, chi cahān yā tāca jéē jíni sōho ya cahán Yaā Dios. Te stéén yā siquī tāca jniñu jeē cóo.

¹⁴ Te stéén yā jeē cujéhnú rí, chi nacastūhun yá nuū rō tāca jnūhun jeē jé ni cahān rī, te sáha ya jeē jécūhun ni rō.

¹⁵ Ndihí ndese cújéhnú Tatá rī, suni súcuan cújéhnú máá rí. Jeē yúcuan ní cahān rī jeē Espíritu Santo nacastūhun yá nuū rō tāca jnūhun jeē jé ni cahān rī, te sáha ya jeē jécūhun ni rō jijnáhan ró.

Vésú cácuíhyá ni rō, te ndusī ni rō

¹⁶ Jecu na te ma cóto ga rō nuū rī. Te jecu tucu quīvī te coto tucu ró núu rī, chi quínuhun rī nuū ndeé Tatá rī. Achí yá.

¹⁷ Yūcuán na te sava tēe cáscuáha jíin yá, ni cacajnūhun jnáhan de:

¿Na jnūhun cóto jeē yáha jeē cahán yā jíin yó? Chi áchí yá jeē jecu na te ma cóto ga yō nuū yā, te jecu tucu quīvī te coto tucu yó núu yā, chi siquī jeē quínuhun yā nuū ndeé Tatá yā.

¹⁸ ¿Na jnūhun cóto jeē yáha jeē cahán yā, jecu na? Tu cájecūhun ni yō na vé cóto jeē cahán yā. Achí de.

¹⁹ Te ni jíni Jesús jeē cácuñi de cajnūhún de ya. Te ni cahān yā jíin de:

¿A cácajnūhun jnáhan ró na vé cóto jeē ni cahān rī jíin ró jeē jecu na te ma cóto ga rō nuū rī, te jecu tucu quīvī te coto tucu ró núu rī?

²⁰ Jendaá cahán rī jíin ró jeē ndahyū rō jijnáhan ró te cucuíhyá ni rō, te ñayuu ñayīvī chi sa cusī ni i. Te vésú cucuíhyá ni rō, te sa ndusī ni rō jeē cóto tucu ró núu rī.

²¹ In ñahan núu cuacuyajni scácu ña, te jéhnúe chíji ña, chi je ni quee hora jeē scácu ña. Te núu je ni scácu ña sūchi lúli, te tuá nahán ña jeē ní ndoho ña, chi cusī ni ña jeē ní cacu sēhe ña.

²² Te suni súcuan cóto jeē cándoho ró vijna, chi cácuíhyá ni rō jíin rí. Te jecu-ni quīvī te coto jnáhan tucu yó, te cusī ndasí ni rō. Te ni in ma cóto casí jeē cusī ni rō.

²³ Te quīvī ún chi tú na vé cacān gā rō nuū rī. Chi jendaá cahán rī jíin ró jeē nuū maá Tatá rī cacān rō, te sáha ya ndihí jeē cájicān rō, siquī jeē cá candíje ró ruhū.

²⁴ Nde vijna te ná tu cacān rō nuū Tatá rī jeē jíin síhví rí. Te vijna te na quéjéé ró cacān rō jíin síhví rí, te nihīn rō, návāha cusī ndasí ni rō.

Je ni quende yā poder ndihí jeneé cáhīyo ini ñayīvī

²⁵ Tāca jnūhun yáha ní cahān yatá rí jíin ró. Te quee quīvī jeē ma cahán yatá gá rí jíin ró, chi sa suhva castūhun cájí rí nuū rō siquī Tatá rī.

²⁶ Te quīvī ún chi cacān rō nuū Tatá rī siquī jeē cá candíje ró ruhū. Te tu cahán rī jíin ró jeē cacán tahú rí jehē rō nuū Tatá rī.

²⁷ Chi máá Tatá rī je cundáhú ni yā rohó siquī jeē cáhīyo manī rō jíin rí, te ni cá candíje ró jéē ndé nuū maá yá vēji rí.

²⁸ Ni quenda rí nde nuū Tatá rī, te ni quee rí ini ñayīvī. Te vijna te quenda rí ini ñayīvī, te nuhūn tucu rí nuū Tatá rī. Achí yá.

²⁹ Te ni cacahān tēe cáscuáha jíin yá:

Vijna te cáhán cají ní, te tuá cahán yatá ní.

³⁰ Vijna te cájini na jéē jíni ní ndivii cuiti, te tuá jíni ñúhún jéē cájnūhún ni in ná níhín. Jeē yúcuan cá candíje ná jéē véji ní ndé nuū Yaā Dios. Achí de.

³¹ Te ni cahān Jesús jíin de:

¿A ndé vijna te cá candíje ró naún?

³² Te quiji quīvī, te je ni quee, jeē cuité núu ró quínungoo ró ná vehe ná vehe ró, te stóo máñuhún ró ruhū. Te nasūu jéé quéndōo máñuhún rí, chi Tatá rí íne ya jíin rí.

³³ Tāca jnúhun yáha ní cahān rī jín ró návāha coo ndeyí coo sī ni rō síquī jeē cácanđije ró rúhū. Ini ñayīví chi cánuú coto ró jnúndóho. Te vēsú súcuan te na cóo sī ni rō, chi je ni quende rī poder tāca jéneé cáhīyo ini ñayīví. Achí yá.

Jeē ni jícān tahu Jesús jehē ñayuu cácanđije

17

¹ Te ná ni cahān Jesús tāca jnúhun yáha, te ni ndacoto ya ichi ándiví, te ni cahān yā:

Tátā, je ni quee quiví jeē ndóho ná. Vijna te steén ni jéē cujéhu máá ná jeē cúu ná Séhe ní, návāha suni máá ná steén na jéē cujéhu máá ní.

² Chi ni sáha ní jéē ndíso jniñu ná síquī tāca ñáyuu, návāha tāca ñáyuu jeē ni jéhe ní núu ná, cotecu i ñí cáni sáha ná.

³ Te suhva cúu jnúhun cotecu i ñí cáni: suu jeē na cúni i níhín jéē mañúhún-ni ní cúu Yaā ndaā, jín jéē cúni i sãñá jeē cúu ná Jesucristo, Yaā ní tají ní.

⁴ 'Je ni steén na núu ñáyuu ñayīví jéē cujéhu ní, te je sínu ná jniñu ní ndacu ní núu ná.

⁵ Te vijna, Tátā, sáha ní jéē ndujéhu tucu ná ndé nuū néne ní, nájnūhun cújéhu ná jín ní nde ná tu jecōo ñayīví.

⁶ Ñayuu jeē ní nacāji ní ini ñayīví, ni jéhe ní i nuū ná, te ni steén na núu i ndese Yaā cúu ní. Cuenta máá ní cúu i, te ni jéhe ní i nuū ná. Te ni cajetáhú i jnúhun ní, te ni casquícu i.

⁷ Te vijna te cájini i jeē ndé nuū máá ní vēji tāca jéē iyó jín ná.

⁸ Chi tāca jnúhun ni cahān ni jín ná, ní castūhun ná núu i, te ni cajetáhú i. Te ni cajini i jeē ní quenda ndije ná ndé nuū máá ní, te ni cacandije i jeē máá ní ni tají sãña.

⁹ 'Te jícān tahu na jehē máá i jínáhan i. Tu jícān tahu na jehē ñáyuu ñayīví jéē tu cácanđije, chi sa jehē máá ñáyuu ni jéhe ni núu ná, chi cuenta máá ní cácuu i.

¹⁰ Te tācá i jeē yíhi i ndaha máá ná, suni cuenta máá ní cúu. Te tācá i jeē cúu i cuenta máá ní, suni cuenta máá ná cúu i. Te cástéén i ndese cújéhu ná.

¹¹ 'Te tuá condee ná ini ñayīví. Te máá i chi quendōo i ini ñayīví, te máá ná chi najeē ná condee na jín ní. Yaā i Yaā ndoo cúu ní,

Tátā. Te jín poder ní condito ní táca ñáyuu ni jéhe ni núu ná, návāha inuú na cóo ni i jínáhan i, nájnūhun cúu máá yó.

¹² Te jeē ní condee na jín i ini ñayīví, te jín poder ni ní condito ná i. Tāca ñáyuu ni jéhe ni núu ná, ni condito yúcún ná i. Te tu ní jéhe na jnúhun naa i jínáhan i, chi máá ñn-ni tēe jeē je cúu de tēe jnahnū ndetū, návāha squícu jnúhun yósó núu tútu i.

¹³ 'Te vijna te najeē na núu ní, te cáhán na táca jnúhun yáha jín i níni jéē íne ga ná ini ñayīví, návāha na cóo sī ndasí ni i nájnūhun cúsi ní máá ná.

¹⁴ Ni castūhun ná jnúhun ní núu i. Te ni caquīti ní ñayuu ñayīví núu i, chi tuá cácuu i cuenta ñayīví, nájnūhun máá ná tu cúu ná cuenta ñayīví.

¹⁵ Te tu jícān tahu na jéē quénehen ní i ini ñayīví, chi sa suhva jeē cóndito ní i nuū jexeén.

¹⁶ Nasūu cuenta ñayīví cácuu i, nájnūhun máá ná jéē násūu cuenta ñayīví cúu ná.

¹⁷ Jín jnúhun ndaā ní te sáha ní jéē coo ndoo coo i i nuū ní. Tāca jnúhun cáhán máá ní cúu jnúhun ndaā.

¹⁸ Te nájnūhun ni tají ní sãña ní quiji ná ini ñayīví, suni súcuan tají ná i nacani i jnúhun ní núu ñáyuu ñayīví.

¹⁹ Te jehē máá i cúu jeē jéhe ná máá ná cuu ná, návāha suni máá i coo ndoo coo i i nuū ni jéē jín jnúhun ndaā.

²⁰ 'Te nasūu máá ñn-ni jehē ñáyuu yáha jícān tahu na, chi suni jehē tāca gá ñáyuu jeē candije i sãña núu na cúni sōho i jnúhun jeē nacani máá i jínáhan i.

²¹ Te jícān tahu na jéē inuú na cóo ni i jínáhan i. Nájnūhun ñn-ni cúu ní jín ná, Tátā, te ñn-ni cúu ná jín máá ní, suni súcuan na cóo inuú i jín yó. Te cúni na jéē inuú na cóo ni i, návāha na cándije ñayuu ñayīví jéē máá ní ni tají ní sãña.

²² Ni sajeéhu ná i nájnūhun ni sajeéhu ní sãña, návāha inuú na cóo ni i, nájnūhun inuú-ni cúu yó.

²³ Te ndúú ná jín i, te ndúú ní jín ná, te súcuan te inuú cuīti coo ni i jínáhan i. Yūcuán na te cuni ñayuu ñayīví jéē máá ní ní tají ní sãña, jín jéē maní ndasí ní jín i nájnūhun maní ni jín ná.

24 'Tátā, máá ní ni jēhe ní i nuū ná. Te cúni na jēē cóyūcú i jíin ná nuū cóndee ná, návāha coto i ndese luu cújēhnu ná ni sáha ní. Chi íyó mánī ndasí ní jíin ná nde ná tu jecōo ñayīví te nde vijna.

25 Yaā ndaā cúu ní, Tátā, te ñayuu ñayīví tu jíin i níhín, te máá ná chi jíin na níhín. Te ñayuu yáha chi cájini i jeē maá ní ni tají sáña.

26 Ni steén na núu i jíinánhan i ndese Yaā cúu ní. Te steén gā na súcuan nuū i, návāha na cóo manī ndasí i jíin jnánhan i, návāhuhun íyó mánī ndasí ní jíin ná, te návāha condee ná ini anuá i. Achí yá.

Jeē ní cajñi de Jesús

(Mt. 26.47-56; Mr. 14.43-50; Lc. 22.47-53)

18

1 Te nuū ní cuu ni cahān Jesús tāca jnūhuhun yáha, te ni quenda ya jíin tēe cáscuáha jíin yá, cuahān yā inga lado yuu Cedrón. Te yūcuan íyó ñin huerto nuū ní quīví ya jíin tēe cáscuáha jíin yá.

2 Te Judas, tēe jeē nastúu de ya, suni jíin de lugar un, chi cuehē jíinu ni nataca Jesús yūcuan jíin tēe cáscuáha jíin yá.

3 Te ni jinū de yūcuan jíin ñin grupo soldado jíin jecu policía cándito templo, jeē ní catajé sutū cáscuáha jíin tēe grupo fariseo. Te cándiso de machete, te cájñi de linterna jíin yíti.

4 Te Jesús je jíin yā tāca jnūndóho jeē véji síquī yā. Te ni quenda ya ichi núu de, te ni cahān yā:

¿Ndé ñin cánanducú ró?

5 Te ni cacahān de jíin yá:

Jesús tēe ñuu Nazaret cánanducú rí.

Te ni cahān yā:

Máá rí cúu.

Te Judas, tēe jeē nastúu de ya, suni íne de jíin tēe ún.

6 Te jeē súcuan ni cahān yā, máá rí cúu, te ni cajica yátá de, te ni cacotúu-ni de.

7 Yūcuán na te ni cajñuhún tucu ya de:

¿Ndé ñin cánanducú ró?

Te ni cacahān de:

Jesús tēe ñuu Nazaret.

8 Te ni cahān Jesús:

Je ni cachi rí jeē maá rí cúu. Te núu ruhū cánanducú ró, te máá-ni ri jñi ró, te tēe yáha na quíngoo de. Achí yá.

9 Súcuan ni cuu návāha na squícu jnūhuhun jeē ni cáhān yā jíin Tátá yā: Tu ní jēhe na jnūhuhun naa ni ñin tēe jeē ni jēhe ni núu na, achí yá.

10 Te Simón Pedro ndíso de ñin espada. Te ni tava de, te ni jehnde de sōho lado váha ñin tēe nání Malco. Te tēe un cúu de mozo maá sūtū cújēhnu.

11 Te ni cahān Jesús jíin Pedro:

Nachuvāha espada rō ini cubierta. ¿A tu cánuú jēē ndóho ri jnūndóho yáha jeē ni sándaā Tátá rí jeē ndóho ri? Achí yá.

Jeē ní indichi Jesús nuū sutū cújēhnu

(Mt. 26.57-58; Mr. 14.53-54; Lc. 22.54)

12 Yūcuán na te tācá soldado un, jíin capitán de, jíin táca policía tēe hebreo un, ni cajñi de Jesús, te ni cajihni de ya.

13 Te xīhna gā vehe Anás cuangoo de jíin yá. Te tátá chīsó Caifás cúu Anás. Te Caifás cúu máá sūtū cújēhnu ga cuiyā ún.

14 Te suu de ni cachi nuū jnánhan de hebreo jeē cánuú jēē cúu ñin tēe jehē nación de.

Jeē ní cachi Pedro jeē tu jíin de ya

(Mt. 26.69-70; Mr. 14.66-68; Lc. 22.55-57)

15 Te Simón Pedro jíin inga tēe scuáha, cándiquin de Jesús cuangoo de yatā yā. Te inga tēe scuáha ún chi jíin jnánhan de jíin sūtū cújēhnu. Jeē yūcuan ní quīví de jíin Jesús ini patio vehe sutū cújēhnu ún.

16 Te Pedro ni quendōo de yatā yehyí. Te máá tēe scuáha jēē jiní jnánhan jíin sūtū cújēhnu ún, ni quenda de ni cahān de jíin ñahan ndíto yéhyí, te ni squíví de Pedro ini patio.

17 Yūcuán na te ñahan ndíto yéhyí un ní cajñuhún ña Pedro:

¿A násūú ñin tēe scuáha jíin tēe índichi nuū sutū un cúu ró?

Te ni cahān de:

Nasūu cúu rí, achí de.

18 Te tāca mozo jíin policía un ní cascáyú de ñuhūn jíin tícāyí, chi mījin sáha. Te cáhīn de cánasaā de. Te suni índichi Pedro, násaā de jíin táca tēe ún.

Jeē ni stichí sutū cújēhnu ún Jesús

(Mt. 26.59-66; Mr. 14.55-64; Lc. 22.66-71)

19 Te sutū cújēhnu un ní stichí de Jesús ndé-ni cúu tēe cáscuáha jíin yá, jíin na jnūhuhun cúu jeē steén yā.

20 Te ni cahān Jesús:

Níní ní cahān rī nuū chitú ñáyuu, ni cajini sōho ndihī ñayuu. Te níní ní steén rī jnūhun ini tācá vehe iī sinagoga jíin ini templo cáhnu nuū ndutútú ndivii jnáhan yó hebreo. Te tú ni ñin jnūhun ní cáhān sāhi rí.

²¹ ¿Te naun cájnūhun ró ruhū? Cajnūhun ñáyuu ní cajini sōho jnūhun ni cahān rī, te máá i cachi ndese ni cahān rī. Chi cájini i ndese ni cahān rī.

²² Te jeē ni cáhān Jesús súcuan, te ñin policia ndíto templo jeē índichi de yūcuán, ní cani-ni de nuū yā. Te ni cahān de jíin yá:

¿A súcuan cáhān rō jíin sūtū kujéhu naún?

²³ Te ni cahān Jesús:

Núu ni cahān rī ñin jnūhun néé, cachi na jnūhun néé ní cahān rī. Te núu tu ní cáhān rī ñin jnūhun néé, ¿te naun cáni ró ruhū? achí yá.

²⁴ Yūcuán na te Anás, sutū kujéhu un, ní tají de ya, núhni yā cuahān yā nuū Caifás, tēe cúu máá sūtū kujéhu ga.

Jeē ní cachi tucu Pedro jeē tu jíin de ya
(Mt. 26.71-75; Mr. 14.69-72; Lc. 22.58-62)

²⁵ Te níní jéē súcuan cúu, te índichi-ni Pedro, násaā de yuñúhún. Te ni cacahān jíin de:

¿A násūú ñin tēe scuáha jíin tēe un cúu ró, chí naún?

Te máá de tu ní cáchi de:

Nasūu cúu ri, achí de.

²⁶ Yūcuán na te ñin mozo sutū kujéhu, jnáhan tēe jeē ní jehnde Pedro sōho, ni cahān jíin de:

¿A násūu máá ró cúu jeē ní jito ri jíin de ini huerto?

²⁷ Te Pedro tu ní cáchi tucu de. Te ni cana-ni líhli.

Jeē ní índichi Jesús nuū Pilato

(Mt. 27.1-2, 11-14; Mr. 15.1-5; Lc. 23.1-5)

²⁸ Yūcuán na te ni quendacoo de jíin Jesús vehe Caifás, cuangoo de jíin yá nde palacio tēe nación Roma jeē cúu gobernador. Te je cuacundijin. Te ñayuu hebreo tu ní quívicoo i ini palacio, návāha tu stívī i ley i jeē cahān jeē ma quívī i ini vehe ñin ñayuu jeē násūú hebreo cúu. Chi núu súcuan te ma cúu cuxíni i vico pascua jeē cóo inga quívī ún.

²⁹ Yūcuán na te ni quenda Pilato, tēe cúu gobernador, ni cahān de jíin i jíin náhan i:

¿Na cuēchi cájicān rō siquī tēe yáha?

³⁰ Te ni cacahān i:

Núu jeē násūu tēe cúnéé cúu tēe yáha, te ma jnī ná de jeē quíndeca ná de nuū ni núú, achí i.

³¹ Te ni cahān Pilato:

Cuángoo jíin náhan ró, te sándaā rō siquī de jíin ley cánevāha máá ró.

Te ni cacahān ñayuu hebreo un:

Máá ná jeē cácuu ná ñáyuu hebreo, tú na permiso cánevāha ná jéē cáhni ná ni ñin ñayuu.

³² Súcuan ni cacahān i návāha squícu jnūhun jeē ní cachi Jesús jeē quívī ya ndaha tēe Roma te cahni de ya jicā cruz.

³³ Te ni ndivī Pilato ini palacio, te ni cana de jeē na quíji Jesús. Te ni cajnūhún de ya:

¿A máá ró cúu Rey ñayuu hebreo naún?

³⁴ Te ni cahān Jesús jíin de:

¿A cájnūhun ró ruhū jeē súcuan jéni ni máá ró, chí jéē ní cacastūhun ñáyuu hebreo nuū rō?

³⁵ Te ni cahān Pilato:

¿Chí tēe hebreo cúu ri jeē cúni rī? Ñayuu nación maá ró jíin sūtū cácujeéhu ni cachihí rōhó ndaha ri. ¿Na vé ni sáha ró núu súcuan? Achí de.

³⁶ Te ni cahān Jesús:

Nasūu jéē ndácu ri jniñu návāhūhun cándacu tāca rey ñayīvī yáha. Chi núu jeē ñáyuu ñayīvī ní casáha jeē cúu ri rey, yūcuán na te tēe cándiquīn ruhū, cuajnáhan de návāha ma quívī ri ndaha jnáhan ri hebreo nuú. Te nasūu núu ñayīvī yáha cúu jeē ndácu ri jniñu vijna. Achí yá.

³⁷ Yūcuán na te ni cahān Pilato jíin yá:

¿Te á ñin rey cúu ró jéē súcuan?

Te ni cahān Jesús:

Rey cúu ri, návāhūhun cáhān rō. Ni quiiji ri ni cacu ri ini ñayīvī yáha návāha nacani ri jnūhun ndaā. Te ndihī ñayuu cájetáhú jnūhun ndaā, cájini nahín i jnūhun cáhān rī. Achí yá.

³⁸ Te ni cahān Pilato:

¿Ndese cuni yō ndé ñin cúu máá jnūhun ndaā?

Jeē ní cundaā jeē cúu yā

(Mt. 27.15-31; Mr. 15.6-20; Lc. 23.13-25)

Te jeē ni cahān de jnūhun yáha, te ni quenda tucu de nuū ñáyuu hebreo. Te ni cahān de jíin i:

Tú cuiti na cuēchi níhín rī siquī de.

³⁹ Te íyó costumbre maá ró jijnáhan ró jéē vico pascua te siaá rī ñn tēe íne vecāa nuū rō. ¿Te á tu cáconi rō jeē siaá rī Rey rō nuū rō? Achí de.

⁴⁰ Yūcuán na te ndivii i ni cacana jee tucu i:
Ma siaá ni tēe jíñá, chi Barrabás siaá ni, áchí i.

Te tēe cuíhná cúu Barrabás.

19

¹ Yūcuán na te ni cahān Pilato jeē na jnñi soldado Jesús, te caní de ya jíin cuarta ññi.

² Te ni casáha de ñn corona iñu, ni cachuhun de xinī yā. Te ni cachuhun de ya ñn sahma cuehé ndíhí jéē cúu sahma rey.

³ Te ni jecondichi de nuū yā, te ni cacahān catá de:

Nacā jeē váha rey cúu Rey ñayuu hebreo.

Te ni cacani de nuū yā.

⁴ Yūcuán na te ni quenda Pilato inga jínu, te ni cahān de jíin ñáyuu:

Yāhá condēhe ró tava rī de, návāha na cúni rō jeē tú na cuēchi níhín rī siquī de.

⁵ Te ni quenda Jesús, ññuhun ya corona iñu jíin sahma cuehé ndíhí un. Te ni cahān Pilato jíin i:

Yāhá condēhe ró de jíjnáhan ró.

⁶ Te nuū ní cajito sutū cácujeñnu jíin táca policía nuū yā, te ni cacana jee de:

Cata caa ní de jicā cruz, na cúu de.

Te ni cahān Pilato:

Núu súcuan te najññi máá ró de te cahni rō de. Chi ruhū, tú na cuēchi níhín rī siquī de.

⁷ Te ni cacahān ñayuu hebreo un:

Cáneváha ná ñn ley, te jeē siquí ley un cánuú jéē cúu de, chí sáha de máá de jeē Séhe Yaā Dios cúu de.

⁸ Te jeē ní jini sōho Pilato jñuhun yáha, te víhyá gā ni yūhú de.

⁹ Te ni ndivícoo tucu de ini palacio, te ni cajññhún de Jesús:

¿Ndé nuū véji ró?

Te tu ní cáhán cuiti Jesús jíin de.

¹⁰ Yūcuán na te ni cahān de jíin yá:

¿Naun tu cáhán rō jeē cahán rī? ¿A tu jíin rō jeē ndíso jñiñu rī jeē cáhni rī rohó jicā cruz, te suni ndíso jñiñu rī jeē siaá rī rohó quíhñ rō?

¹¹ Te ni cahān Jesús:

Núu tu ní sáha Yaā Dios jeē ndíso jñiñu ró, te tú na vé cúu sáha ró siquī rī. Jeē yúcuán tēe jeē ní nacuāha ruhū ndaha ró, cuēchi xeñ gā condee siquī de vésú maá ró. Achí yá.

¹² Yūcuán na te nde hora un ndúcú ndéyí Pilato ndese siaá de ya. Te ñayuu hebreo chí cacana jee i:

Núu siaá ni tēe jíñá, te tu cúu ní amigo rey Roma jeē cujéñnu ndácu jñiñu núu súcuan. Chí táca tēe jeē sáha de rey maá de, núu súcuan te cúu de enemigo siquī rey un. Achí i.

¹³ Te jeē ní jini sōho Pilato jñuhun yáha, te ni ndacu de jñiñu jeē na quénda Jesús ini vehe quiji ya. Te ni cucōo de silla nuū cúndañ jñiñu, nuū máni máá yúu ni jecāva, te lugar un nání Gabata nuū yúhu hebreo.

¹⁴ Te cuacuu cahuxī uū, te jehíni quiví ún quejéé vico pascua. Te ni cahān Pilato jíin ñáyuu hebreo:

Yāha índichi maá rey rō.

¹⁵ Te ni cacana jee i:

Na cúu de. Cata caa ní de jicā cruz, achí i.

Te ni cahān Pilato jíin i:

¿A jéē cata caa rī rey rō jicā cruz naún?

Te sutū cácujeñnu un ní cacahān de:

Tuá na inga rey cánevāha ná jíjnáhan ná, chí máá-ni rey Roma jeē cujéñnu ndácu jñiñu nuū ná.

¹⁶ Yūcuán na te Pilato ni nacuāha de ya nuū i jeē na cúu yā jicā cruz. Te ni cajññi i ya cuangoo i jíin yá.

Jeē ní cacata caa de ya jicā cruz

(Mt. 27.32-44; Mr. 15.21-32; Lc. 23.26-43)

¹⁷ Te ni quenda Jesús, ndíso ya cruz yā, cuangoo de jíin yá ñn lugar nuū naní Yiquí Xíní, te nuū yúhu hebreo naní Gólgota.

¹⁸ Te yúcuán ní cacata caa de ya jicā cruz. Te suni ni cacata caa de uū tēe nuū uū gā cruz, ñn ñn de ñn lado yā, te máá Jesús mēhñú.

¹⁹ Te suni ni ndacu Pilato jñiñu jeē na cóndee jñuhun xinī cruz yā, jeē cahán: Tēe yáha cúu Jesús ñuu Nazaret, Rey ñayuu hebreo, achí.

²⁰ Te cuehē ñayuu hebreo ni cacahu i jñuhun yáha, chí máá yajni yuñúú cúu nuū ní cacata caa de ya. Te jñuhun un yósó jíin yuhu hebreo jíin griego jíin latín.

21 Te tāca sūtū cácujuhnu nuū ñáyuu hebreo, ni cacahān de jíin Pilato:

Ma tée ní jéē cúu de Rey ñáyuu hebreo, chi sa suhva tee ní jéē maá de ni cahān jeē cúu de Rey ñáyuu hebreo.

22 Te ni cahān Pilato:

Ma násama ri jeē jé ni ndacu ri jniñu ni jecondee.

23 Te soldado un, nuū ní cuu ni cacata caa de Jesús jicā cruz, te ni caquihin de sahma ya, te ni cajehnde de ni nduu cuūn parte, te ñin ñin parte ni cuu ñin ñin soldado un. Te suni ni caquihin de camisa yā. Te camisa un tu ní quícu, chi ni cunu ní.

24 Te ni cacahān maá de:

Ma cáhnde yō, chi vāha ga na sāha yó sorteo, te na cóndēhe yó ndé ñin yó níhīn, achí de.

Te súcuan ni squícu jnūhun yósó nuū tútu ñi nde jenahán jéē cahān Jesús: Ni caquihin de sahma ri cuu máá de. Te ni casáha de sorteo siquī camisa rī. Achí. Súcuan ni casáha soldado un.

25 Te yajni cruz nuū ndíta caa Jesús íne náná yā, jíin cúhū ña María ñasihí Cleofas, jíin María ñuu Magdala.

26 Te ni jito Jesús nuū naná yā jíin núu tée scuáha jeē maní gā yā jíin, suni índichi de yūcuán. Te ni cahān yā jíin náná yā:

Nánā, nde vijna te máá de nucuñī de cuu de sēhe ní.

27 Yūcuán na te ni cahān yā jíin tée scuáha ún:

Nde vijna te cuu ña nájñūhun náná rō, achí yá.

Te nde hora un ní cana de ña cuacondee ña vehe de condito de ña.

Jeē ni jihī Jesús

(Mt. 27.45-56; Mr. 15.33-41; Lc. 23.44-49)

28 Yūcuán na te ni jini Jesús jeē jé ni jīnu tācá jniñu jeē cánuú ndoho ya. Te návāha squícu jnūhun cáhán tutu ñi, te ni cahān yā:

Jíchí rī ndute, achí yá.

29 Te yūcuan ín ñin tīndohō ñūhun chitú vinagre iyá. Te ni cachundaji de ñin cachī nuū vinagre un, te ni catee de xinī ñin ndaha yújnu hisopo, te ni catee de yuhu ya jeē cóho ya.

30 Te ná ni jihī ya vinagre un, te ni cahān yā:

Je ni jīnu, achí yá.

Te ni cāyí-ni xinī yā, te ni jihī-ni ya.

Jeē ní cují soldado lanza xiin ya

31 Te inga quivī ún coo vico pascua. Te tēe hebreo tu cácuñi de jeē cóndita caa ndīyí ún jicā cruz quivī ndétátú un. Chi quivī ndétátú jeē cúu vico pascua, ñi ndasí gá vēsú tāca gá quivī ndétátú. Te ni cacahān de jíin Pilato jeē na ndácu de jniñu jeē jnahnú sīhīn tēe cándita caa, te na cújiyo de jicā cruz.

32 Te ni quecoo soldado, te ni cajehnū de sīhīn ñin tēe jeē ndíta caa jíin yá, te suni súcuan inga de.

33 Te nuū ní quecoo de nuū Jesús, te ni cajito de jeē jé ni jihī yā. Jeē yūcuan tu ní cájehnū de sīhīn ya.

34 Te ñin soldado chi ni cují de lanza xiin ya, te ni cane-ni ñiñi jíin ndute.

35 Te máá rí jeē tée tutu yáha, ni jito ri jeē súcuan ni cuu, te nácani ndaā rī jnūhun ndese ni cuu. Te jíin rī jeē iyó ndáā jnūhun cáhán rī, návāha suni candíje máá ró j- jnāhan ró.

36 Chi súcuan ni cuu návāha squícu jnūhun cáhán tutu ñi: Ma cahnú de ni ñin yiqui ya, achí.

37 Te suni inga jnūhun cáhán tutu ñi: ñin quivī te coto i nuū Yaā jeē ní cují i lanza, achí.

Jeē ní quindūji Jesús

(Mt. 27.57-61; Mr. 15.42-47; Lc. 23.50-56)

38 Te ni cuu tāca jéē yáha. Te íyó ñin tēe ñuu Arimatea jeē naní José, te cúu de tēe cándíje Jesús. Te yuhu-ni cándíje de, chi yúhú de jnāhan de hebreo. Te ni cahān ndahú de jíin Pilato jeē na cuáha jnūhun quihin de yiqui cúñu Jesús. Te ni jēhe Pilato jnūhun. Yūcuán na te cuahān José, ni snúu de yiqui cúñu Jesús.

39 Te suni ni jinū Nicodemo, tēe ni quiji nuū Jesús ñin jecuáa. Te ndíso de nájñūhun ocō uxī kilo sūje uvuā jeē ní saca jnāhan jíin yúcū áloe.

40 Te ndīndúu de ni caquihin de yiqui cúñu Jesús, te ni cachusúcun de jíin tira sahma jeē ni quivī yucū jeē jeén asīn ún, nájñūhun íyó costumbre maá ñáyuu hebreo jeē cáchindūji i ndīyí.

41 Te yajni nuū ni jíhī Jesús íyó ñn huerto. Te nuū huerto un ndéé ñn yaū jeē ní caan jeé jicā ñn cava, nuū ná tu quindūji ndīyí.

42 Te yūcuan ní cachindūji de Jesús, chí íne yajni yaū ndīyí ún. Chí je yajni quejéé quívī ndétātú de jeē cácuu de ñayuu hebreo, te tú na ley chindūji de ndīyí núu je ni quejéé quívī ún.

Jeē ní natecu Jesús

(Mt. 28.1-10; Mr. 16.1-8; Lc. 24.1-12)

20

1 Te jenéhen quívī domingo ni jinū María ñuu Magdala nuū ní yindūji Jesús, te yínee gā cúu. Te ni jito ña jeē ní cujiyo yuū ndihyú yuyáú ndīyí.

2 Yūcuán na te jínu ña cuahān ña nuū Simón Pedro jíin núu ñga tēe scuáha ún jeē maní gā Jesús jíin. Te ni cahān ña jíin de:

Ni catava de Jitoho yō nuū ní yindūji ya, te tu cájini yō ndé nuū ní cachune de ya, achí ña.

3 Te ni quendacoo Pedro jíin ñga tēe scuáha ún, cuácondēhé de yaū ndīyí.

4 Te cájini tayí ndindúú de. Te ñga tēe scuáha ún, ñhin ga ni jinu de vēsú Pedro. Te xīhna gā de ni jinū yaū ndīyí.

5 Te ni scáyí de máá de, te ni jito nihni de ini yaū. Te ni jito de jeē tira sahma un cáyūcu máá na. Te tu ní quíví de.

6 Te sáá te ni jinū Simón Pedro jeē ndiquín jnáhan de vēji de jíin ñga tēe ún. Te ni quíví de nuū ní yindūji Jesús. Te suni ni jito de jeē tira sahma cáyūcu máá na.

7 Te ni jito de sahma jeē ni ñúsúcún xínī Jesús, tu cátú jíin tira sahma, chí ni natuu te cátú sñn.

8 Yūcuán na te suni ni quíví ñga tēe scuáha jeē ni jíin xīhna gā nuū ní yindūji ya. Te ni jito de ndese íyó, te ni candíje de jeē ní natecu yā.

9 Chí nde ná tu jinūcoo de yaū ndīyí, te tu ní jécūhun ni de jnūhun cáhán tutu ñ, jeē jíni ñúhún natecu yā núu je ni jihī yā.

10 Yūcuán na te ndindúú tēe cáscuáha ún cuanungoo de vehe de.

Jeē ní nane ya nuū María ñuu Magdala
(Mr. 16.9-11)

11 Te María índichi ña ndáhyú ña nuū ní yindūji ya. Te níni ndáhyú ña, te ni scáyí ña máá ña, ni jito nihni ña ini yaū ún.

12 Te ni jito ña uū ndajéhé andíví, cáñuhun ya sahma cuijín. Te ñn ya néne ichi xíní, te ñga ya néne ichi núu jehé nuū ni cátu yiqui cúñu Jesús.

13 Te ni cacahān yā jíin ña:

¿Najehē ndahyú rō?

Te ni cahān ña:

Ni catava de Jitoho ná, te tu jíni na ndé nuū ní cachune de ya.

14 Te jeē ni cáhān ña súcuan, te ni ndió cóto ña, te ni jito ña nuū Jesús jeē índichi yā yūcuán. Te tu ní nácuni ña jeē máá yá cúu.

15 Te ni cahān yā jíin ña:

¿Najehē ndahyú rō? ¿Ndé ñn nánducú ró? achí yá.

Te máá ña jéni ni ña jeē tēe ndíto huerto cúu ya. Te ni cahān ña jíin yá:

Núu máá ní ni quenehen ní yá, te cachi ní ndé nuū ni jéchune ní yá, te na quínuquihin ná yá, achí ña.

16 Te ni cahān Jesús jíin ña:

María, achí yá.

Te jeē ni cáhān yā súcuan, te ni nacuni ña ya, te ni ndió cóto ña, te ni cahān ña jíin yuhu hebreo:

Raboni, achí ña. Te jnūhun un cúní cahān, Maestro.

17 Te ni cahān Jesús jíin ña:

Ma quehé ró rúhū, chí ná tu ndaa ri quinhun rī nuū Tatá rī. Te cuáhán núu tēcá hermano rī, tēe ni cascuáha jíin rí, te cachi rō nuū de jeē ndaa ri quinhun rī nuū Tatá rī, jeē suni Tátá máá ró jijnáhan ró cúu. Te cúu ya Yaā Dios máá rí jíin Yaā Dios máá ró jijnáhan ró. Achí yá.

18 Yūcuán na te María ñuu Magdala un, cuáhān ña, te ni castūhún ña nuū tēe cáscuáha un jēe ní jito ña nuū máá Jitoho yō jíin jēe ni cáhān yā jnūhun yáha jíin ña.

Jeē ní nane ya nuū tēe cáscuáha jíin yá

(Mt. 28.16-20; Mr. 16.14-18; Lc. 24.36-49)

19 Te jeē ní cuaa máá quíví domingo un, te cáhān tútú tēe cáscuáha ún ini ñn vehe. Te cándihyū yehyí, chí cáyūhú de jnáhan de hebreo jeē coto xeēn i de. Te ni quee-ni Jesús, ní jecuññí yā mēhñú de vēsú ndihyú yehyí, te ni cahān yā jíin de:

Ndeyí sñ coo ni rō jijnáhan ró, áchí yá.

²⁰ Te ná ni cahān yā súcuan, te ni steén yā ndaha ya jiín xiin ya nuū de. Te ni cacusñ ni tēe cáscuáha un jéē ní cajito de nuū maá Jítóho yō.

²¹ Yūcuán na te ni cahān tucu Jesús:

Ndeyí sñ coo ni rō jijnáhan ró. Te nájnūhun ni tají Tátá rī ruhū ini ñayiví, suni súcuan tájí rí rohó nacani ró jnūhun ri nuū ñáyuu. Achí yá.

²² Yūcuán na te ni tñvī tachī yā nuū de jijnáhan de. Te ni cahān yā:

Vijna te ni canihñ rō Espíritu Santo.

²³ Te tāca ñáyuu jeē cone cáhnu ni rō nuū cuéchi i, núu súcuan te coo jnūhun cáhnu ni nuū cuéchi i. Te núu tú cone cáhnu ni rō nuū cuéchi i, te ma cóo jnūhun cáhnu ni nuū cuéchi i. Achí yá.

Jeē ní nane ya nuū Tomás

²⁴ Te Tomás, tēe ni cacu cuatí, ñn jnáhan jeē uxí uū tēe cáscuáha jiín yá, tu ní íne de quiví jeē ní nane Jesús nuū tāca gá tēe cáscuáha.

²⁵ Yūcuán na te sava ga tēe cáscuáha un, ní cacahān de jiín Tomás:

Ni cajito ri nuū maá Jítóho yō.

Te ni cahān Tomás:

Núu tú coto ri nuū ni túji ndaha ya ni sáha ndūyu cāa, te núu tú chune ri xiní ndáha ri nuū ni íne ndūyu cāa, te núu tú chune ri ndaha ri xiin ya, te ma candíje cuiti rī, achí de.

²⁶ Te nuū uná quiví, te tēe cáscuáha un cáhñn tútú tucu de ini ñn vehe. Te íne Tomás jiín de. Yūcuán na te ni quee-ni tucu Jesús, ni jecuiñí yā mēhñú de, vēsú cándihyū yehyí. Te ni cahān yā jiín de:

Ndeyí sñ coo ni rō jijnáhan ró.

²⁷ Te ni cahān-ni ya jiín Tomás:

Chune xiní ndáha ró ini ndaha ri yāhá te coto ró. Te scáá ndaha ró, te chune ró xiin ri nuū ni tújī. Te ma cáni siquí gá ni rō, chi sa suhva na cándíje ró.

²⁸ Yūcuán na te ni cahān Tomás jiín yá:

Aí, Jítóho maá ná jiín Yaā Dios maá ná cúu ní, achí de.

²⁹ Te ni cahān Jesús jiín de:

Tomás, nde ni jito ró núu rī, te ni candíje ró. Te yōhyo ndetū tāca ñáyuu jeē candíje ruhū vēsú tu ní jito i nuū rī, achí yá.

Najehē ni tee Juan libro yáha

³⁰ Te suni ni sáha Jesús cuehē gā jniñu jéhnu jeē ni steén yā poder yā nuū tēe cáscuáha jiín yá, jeē tu yósó núu tútu yáha.

³¹ Te tāca jniñu yáha ní tee ri návāha candíje ró jijnáhan ró jéē Jesús cúu Cristo, maá Séhe Yaā Dios. Chi jeē candíje ró yá, te cotecu rō ní cáni sáha ya.

Jeē ní nane ya nuū uxá tēe cáscuáha jiín yá

21

¹ Te ni cuu jecu quiví, te inga jínu ni nane Jesús nuū tēe cáscuáha jiín yá, jeē cáhñn de yumar Tiberias. Te suhva ni steén yā maá yá nuū de:

² Cáhñn tútú Simón Pedro, jiín Tomás, tēe ni cacu cuatí, jiín Natanael, tēe ñuu Caná ndañúu Galilea, jiín ndindúú séhe Zebedeo, jiín úu gā tēe cáscuáha.

³ Te ni cahān Simón Pedro jiín de jijnáhan de:

Quíjniñ ri chācá.

Te ni cacahān de:

Suni quingoo ri jiín ró.

Te cuangoo de, te ni quivícoo de ñn barco. Te tu ní cáhñn cuiti de ti jecuáa yúcuan.

⁴ Te jeē cuácundijin, te íne Jesús yumar. Te tēe cáscuáha ún, tu ní cánacuni de jeē maá yá cúu.

⁵ Yūcuán na te ni cahān yā jiín de:

Aá rō jijnáhan ró, ¿á ní canihñ rō chācá caji yō?

Te ni cacahān de:

Tú cuiti, achí de.

⁶ Yūcuán na te ni cahān yā jiín de:

Síngava ñunu ró ichi lado váha barco, te nihñ rō tñ.

Te ni casíngava de ñunu, te tuá ní cúu cuiti natava de, jeē ni quivícoo cuehē ndasí cháca.

⁷ Yūcuán na te tēe scuáha jeē maní gā Jesús jiín, ní cahān de jiín Pedro:

Máa Jítóho yō cúu, achí de.

Te jeē ní jini sōho Simón Pedro jeē maá Jítóho yō cúu, te ni nachuhun de sahna de, chi ni tava de jeē sájniñu de. Te ni ndava-ni de nuū mar cuahān de nuū yā.

⁸ Te tāca gá tēe cáscuáha ún, vendicoo de jiín barco yundúte, cástaa de ñunu ñūhun

chitú cháca. Chi tu jíca cáhīin de jíin ñuhun íchi, chi nájnūhun ciento-ni metro cúu.

⁹ Te nuū ní quendacoo de ini barco, te ni cajito de jeē nduhvá tīcua ñuhūn, te íne staa jíin ñn chācá chíhyó.

¹⁰ Te ni cahān Jesús jíin de:

Cuáquihin jecu chācá jēē sa ní cajñi ró, na táu yó, áchí yá.

¹¹ Te ni quīvi Simón Pedro ini barco, te ni staa de ñunu, ni quee de jíin ndé nuū ñūhun íchi. Te ñūhun chitú cháca náhnu, ñn ciento uū xico uxī unī tī cúu. Te vēsú ñn súcuan tī ñūhun, te tu ní táhndé ñunu.

¹² Te ni cahān Jesús jíin de:

Nehen jijnáhan ró na cási ni yō.

Te ni ñn tēe cáscuáha ún tu ní cúndeyí ni de cajñūhún de ya núu ndé ñn cúu ya. Chi je cájini de jeē maá Jítoho yō cúu ya.

¹³ Te ni quindēhe Jesús yuñūhún, te ni quihin ya staa ún, te ni jēhe ya nuū de, te suni súcuan chācá un.

¹⁴ Yáha cúu vuelta unī jeē ní nane Jesús nuū tēe cáscuáha jíin yá, ná ni natecu yā.

Jeē ní ndajnūhún Jesús jíin Simón Pedro

¹⁵ Te nuū ní cuu ni cajesi ni de, te Jesús ni cajñūhun yá Simón Pedro:

Simón sēhe Jonás, ¿á mánī gā rō jíin rí vēsú tāca gá tēe yáha?

Te ni cahān de:

Je jíiní ni jēē maní na jíin ní, achí de.

Te ni cahān yā jíin de:

Núu súcuan te stéén rō jñūhun ri nuū ñáyuu cácuu nájnūhun londe ri.

¹⁶ Te ni cajñūhun yá de vuelta uū:

Simón sēhe Jonás, ¿á mánī rō jíin rí?

Te ni cahān de jíin yá:

Je jíiní ni jēē maní na jíin ní, achí de.

Te ni cahān yā:

Condito ró ñáyuu cácuu nájnūhun lanchi ri núu súcuan.

¹⁷ Te ni cajñūhún tucu ya de vuelta unī:

Simón sēhe Jonás, ¿á mánī rō jíin rí?

Te ni cucuíhyá ni Pedro jeē ní cajñūhun yá de vuelta unī núu maní de jíin yá. Te ni cahān de:

Máá ní jiní ni ndíhi, te jíiní ni jēē maní na jíin ní.

Te ni cahān yā:

Núu súcuan te stéén rō jñūhun ri nuū ñáyuu cácuu nájnūhun lanchi ri.

¹⁸ Te jendaá cahán rī jíin ró jeē nde ná suchí ró, te ni quihin máá ró sahma ró, te ni jica ró ndé nuū cuní maá ró. Te núu na yí ró, te nasūu jēē cuní maá ró, chí inga ñayuu quindēca i róhó nuū tu cuní rō quihin rō. Te scáá rō ndíndúú ndaha ró jēē cuu rō.

¹⁹ Jñūhun yáha ní cahān yā jeē ni stéén yā jeē cóndita caa de jíca cruz cuu de, te jeē súcuan cuatáhú de cúu jeē steén de jeē yóhyo cújēhnu Yaā Dios. Yūcuán na te ni cahān gā yā:

Condiquīn rō ruhū jeē sáha ró jniñu ní ndacu ri nuū rō, achí yá.

Jñūhun tēe scuáha jeē maní gā yā jíin

²⁰ Te ni ndió cóto Pedro, te ni jito de tēe scuáha jeē maní gā Jesús jíin, ndíquín de vēji de yatā. Tēe un cúu jeē ní conene xiin Jesús ná ni cacuxíni de jíin yá, te ni cajñūhún de ya: ¿Ndé ñn de cúu jeē nastúu níhín?

²¹ Te jeē ní jito Pedro nuū tēe ún, te ni cajñūhún de Jesús:

Te tēe yáha, ¿ndese coo jíin de?

²² Te ni cahān Jesús:

Núu cuní rī jeē cótecu de nde quivī ndíji ri, ¿te naun ndíhví ni rō? Máá ró chí condiquīn rō ruhū jeē sáha ró jniñu ní ndacu ri nuū rō, achí yá.

²³ Yūcuán na te jñūhun yáha ní jītē núu nuū tācá hermano, jeē tēe scuáha un má cúu de. Te tu ní cáhán Jesús jeē ma cúu de, chí sa suhva ni cahān yā: Núu cuní rī jeē cótecu de nde quivī ndíji ri, ¿te naun ndíhví ni rō?

²⁴ Te tēe scuáha un jēē maní gā Jesús jíin, suu cúu ruhū jeē nácani jñūhun tācá jniñu yáha, te suu ri tēe tāca jñūhun yáha. Te cájini rō jijnáhan ró jēē iyó ndáā jñūhun nácani ri.

²⁵ Te suni íyó cuéhē ndasí gá jniñu ní sáha Jesús. Te núu tee yó ná ñn ná ñn, te ma cánda ní ñáyiví cuhun tutu jeē cóso jñūhun ún, jéni ni rī. Te ni cuu. Amén.

JNIÑU JEHNU JEE NI CASAHA TEE APOSTOL

Jeē ni jéjnūhun ya quiji Espíritu Santo

¹ Amigo Teófilo, nuū tútu jeē ní tee ná xíhna gā ni castūhun ná nuū ni táca jniñu ní sáha Jesús, jiín táca jnúhun ni steén yā nde quiví ní quejéé yá ní sáha ya

² te nde quiví ní ndaa ya cuanuhun yā andiví. Te nde ná tu ndaa ya quihīn yā, te ni sáha Espíritu Santo jeē ní ndacu ya jniñu nuū táca apóstol, tēe ni nacāji ya.

³ Te nuū ni jínu ni ndoho ya jeē ni jíhī yā, te uū xico quiví te tijni jínu ni steén ndijin yā maá yá nuū téee un jíjnáhan de, te súcuan ni cajini de jeē iyó ndāā jeē ní natecu yā. Te ni cahān yā jiín de siquī ndese ndácu Yaā Dios jniñu.

⁴ Te ná cáhīn tútú de jíin yá, te ni cahān yā jiín ndihī de jeē ma quéndacoo de ini ñuu Jerusalén, chí áchí yá:

Condetu ró ndé quee Espíritu Santo jeē ni jéjnūhun máá Tátá rī Yaā Dios. Chí je ni cachi rī nuū rō jeē ni jéjnūhun ya quiji Espíritu Santo.

⁵ Chí Juan, jendaá jeē maá ndute-ni ni scuándute de ñayuu. Te róhó jíjnáhan ró, jecu na quiví te nájnūhun cuandute ró jíin Espíritu Santo, cúu jeē condee yā ini anuá rō, achí yá.

Jeē ní ndaa Jesús cuanuhun yā andiví

⁶ Yūcuán na te tēe cáhīn tútú jíin yá, ni cacajnūhún de ya:

¿A vijna te nasáha ní jéē ñayuu ñuu yō Israel ndujéhnu i ndacu i jniñu nuū nación yō chí naún? áchí de.

⁷ Te ni cahān yā:

Ma cúu cuni rō quiví chí cuíyā jeē cóo jeē ni sándaā máá Tátá rī, chí máá ñn-ni máá yá jiní yā na quiví sáha ya.

⁸ Te jeē cúni rō cúu jeē quée Espíritu Santo te condee yā ini anuá rō jíjnáhan ró. Yūcuán na te nihīn rō poder te nacani ró jnúhun ri ní ini ñuu Jerusalén, ní Judea, ní Samaria, nde ní cáhnu ñayiví, áchí yá jíin de.

⁹ Te ni ndihī ní cahān yā táca jnúhun yáha. Te ní ní cájito de nuū yā, te ni ndaa-ni ya

cuanuhun yā andiví. Te ni quee vicō ni jesi-ni nuū cuahān yā, te tuá ní cájito de ya.

¹⁰ Te ní ní cáhīn de cájito ndaa de ichi ándiví núu ní ndaa ya cuahān yā, te uū jnáhan ndajéhé yā cáñūhun ya sahna cuijín ní cajecuiñi yā xiin de jíjnáhan de, te cájito ya nájnūhun tēe.

¹¹ Te ni cacahān yā jíin de:

Róhó tēe Galilea, ¿ñajehē cájito ndaa ró ichi ándiví? Chí máá Yáā Dios ni naquihin ya Jesús cuanuhun yā andiví, te suni súcuan ndiji ya nájnūhun cájito ró cuahān yā andiví, áchí yá.

Jeē ní canacāji de Matías jeē nucuiñi de nuū Judas

¹² Yūcuán na te ni nanungoo de yucu jeē naní Olivos, cuanungoo de ñuu Jerusalén. Te yajni-ni íne yucu un jíin ñuu Jerusalén, nájnūhun ñn kilómetro-ni, cūhva jeē ni jéhe ley permiso caca ñayuu quiví ndétátú.

¹³ Te ni ndivicoo de ini ñuu. Te ni ndacoo de cuarto xiní véhe nuū cáyūcu núu de. Te táca de cúu Pedro, Jacobo, Juan, Andrés, Felipe, Tomás, Bartolomé, Mateo, Jacobo sēhe Alfeo, Simón jeē cúu jnáhan grupo cananista, jíin Judas ñani Jacobo.

¹⁴ Tāca tēe yáha, ní ní cándutútú ñuú de cájicān tahu de jíin táca ñani Jesús jíin náná yā María jíin sava ga ñahan.

¹⁵ Te ñn quiví te ni jecondichi Pedro nuū táca hermano cá candíje. Te cáhīn nájnūhun ciento ocō ñayuu. Te ni cahān de:

¹⁶ Hermano jíjnáhan ní, ni squícu nahín jnúhun cáhán tutu í jeē ní cahān David nde jenahán ní sáha Espíritu Santo. Te jnúhun un ní cuu siquī Judas jeē ní yosnúu núu téee ni cajni Jitoho yō Jesús.

¹⁷ Te suu tēe un ní jica de jíin yó, te ni chindéé ñahán jnáhan de jíin yó siquī jniñu ní jeni ya yohó.

¹⁸ Te ni cajeen ñn ñuhun jíin xúhun ní nihīn tēe un siquī jniñu neé ní sáha de. Te ni ñinga ndeyi de, te ni ndatā sáva chíji de, te ndihī yiti de ni jité.

¹⁹ Te ni jité jnúhun yáha núu táca ñayuu cáyūcú ñuu Jerusalén, te jeē yúcuan cúu jeē ní casnání i ñuhun ún Acéldama nuū yúhu máá i, jeē cuní cahān ñuhun jeē cúu cuenta niñi.

20 Chi súcuan je yósó núū tútu Salmo siquī Judas:
Vehe de na quéndōo iyú,
te ma cóndee ni ñn ga ñayuu ini vehe ún.
Te suni cáhán:
Jniñu ní condiso de na cóndiso ñnga tēe.
Achí.

21 'Núu súcuan te jíni ñúhún jēe núcuññi ñn tēe lugar maá de jíin yó. Te tēe nucuññi jíin yó un, nacāji yó de mēñu táca tēe ni cajica jíin yó táca quivī jeē ní jica máá Jítoho yó Jesús jíin yó.

22 Te tēe nacāji yó un cúu tēe jeē ni íyo de jíin yó nde quivī ní jendute ya ni sáha Juan, te nde quivī ní ndaa ya cuanuhun yā andiví. Te tēe nucuññi jíin yó na cúu de testigo jíin yó jeē jé ni natecu yā, achí de.

23 Te ni catee nuū de uū jnáhan tēe: Matías jíin José jeē naní de Barsabás te suni naní de Justo.

24 Te ni cajicān tahu de:

Tátā Yaā Dios, máá ní chi jíni ni ndese cáa ánuá táca ñayuu. Núu súcuan te jeē ndindúú tēe yáha, stéen ni ndé ñn de cúu jeē ní nacāji ní.

25 Te condiso jniñu de cuu de apóstol. Te naquihin de jniñu ní stóo Judas, chi ni sáha de cuēchi te cuahān de lugar xeēn nuū cánuú quíhñ de, achí de.

26 Yūcuán na te ni casáha de ñn sorteo te ni jinū Matías, te ni nucuññi de ni nduu de jnáhan ndihúxí ñn apóstol.

Jeē ní quee Espíritu Santo

2

1 Te máá quivī víco Pentecostés ni cahñin tútu ñayuu cácanđije ñuu Jerusalén.

2 Te sanaa-ni te ni quejéé ññin vēji nde andiví nájnūhun tachī ññin quée, te táca ñayuu jeē cáyūcú ini vehe un ní cajini sōho i jeē ññin ún.

3 Te ni cajito i nájnūhun yáñuhñ jeē ní cajitē núu te ni cacucōo xinī ná ñn ná ñn i.

4 Te ndihí i, ni cunuú Espíritu Santo jíin i, te ni quejéé i cácahān i sñn sñn yuhu, ndese ni stéen maá Espíritu nuū ná ñn ná ñn i cahān i.

5 Te ñuu Jerusalén, suni cáhñin ñayuu hebreo, yññuhñ núu Yaā Dios, jeē ní quijicoo i nde táca nación ní cáhnu ñayiví.

6 Te jeē ni ññin súcuan te ni cacutútú cuéhē ñayuu ún. Te ni cunéé íi ni i jíināhan i, chi ná ñn ná ñn i ni cajini sōho i jeē tēe ni canihñ Espíritu Santo cácahān de jnūhun yuhu ñúu jicá nuū véji i.

7 Te ni canaa ni i cájito i te ni cacahān i:

¿A násūu tēe Galilea cácuu táca tēe yáha jēe cácahān de táca yuhu ñúu nuū véjicoo yó?

8 ¿Na vé ni cuu yáha núu súcuan? Chi ná ñn ná ñn yó cájini sōho yó cácahān de jnūhun yuhu ñúu nuū ní cacacu yó.

9 Chi vējicoo yó ndé táca ñuu jicá. Sava yó véji nde Partia jíin Media jíin Elam. Te sava ga yō vēji yó ndé Mesopotamia jíin Judea jíin Capadocia jíin Ponto jíin Asia.

10 Suni nde Frigia jíin Panfilia jíin Egipto jíin tijni ñuu jeē íne nde yatā gā ñuu Cirene ñuhun Africa vējicoo yó. Te sava ga yō nde ñuu Roma vējicoo yó, te cáyūcu jínu-ni yó yáha. Te máá yó jeē vējicoo ñuu Roma, sava yó cácuu máá ñayuu hebreo te sava ga yō cácuu ñayuu sñn ñuu, ni cacandíje yó ndíquín yō ley ñayuu hebreo.

11 Suni nde Creta jíin Arabia vējicoo sava yó. Te cájini sōho yó jēe jíin jnūhun yuhu ñúu ná ñn ná ñn máá yó cácahān de táca jniñu jéhnu ní sáha Yaā Dios, achí i.

12 Te ndihí i chi ni canaa íi ni i cájini nahín i. Te ni candajnūhñ i jíin jnáhan i:

¿Na vé cúu jeē ní cuu núu súcuan jeē cácahān de yuhu ñúu yó? achí i.

13 Te sava i ni cacahān catá i:

Tuú chi jeē cánajñi de, achí i.

Jeē ní nacani Pedro jnūhun nuū ñayuu

14 Yūcuán na te ni candocuiññi Pedro jíin ndihúxí ñn ga apóstol, te ni cahān jee Pedro jíin ñayuu ún:

Níhñ jnáhan ñuu yō hebreo, jíin ndihí níhñ jēe cáyūcu ní Jerusalén, jnūhun yáha na chúhun ni ni jíināhan ní, chi cuni nahín ní cahān na jíin ní.

15 Chi máá ná jíināhan ná, nasūu jēe cájñi ná nájnūhun cájeni ni ní, chi sáa cahñ jenéhen cúu, te nasūu hora cánajñi ñayuu cúu.

16 Chi sa suhva squícu jniñu yáha nájnūhun ni cahān Joel, tēe ni nacani jnūhun Yaā Dios nde jenahán, chi súcuan ni cahān de:

17 Achí Yáa Dios: Quivī sándñhí na

te taji rí Espíritu rī cunuú yá jiín táca ñáyuu,
te sēhe yí ró jiín séhe síhí ró, nacani i jnūhun
ri,

te tāca téé lulí chi coto ndijin de jeē steén rī
nuū de,

te tāca téé jéhnū chi sáha ri jeē scóto jēni de.

18 Te quiví ún chi taji rí Espíritu rī cunuú yá
jiín táca mozo rī, cúu tēe cúu ñahan,
te nacani i jnūhun ri.

19 Te ichi ándiví sáha ri jniñu jéhnū jeē náā ni
ñayuu coto i,

te sáha ri jniñu jéhnū ini ñayiví jéē steén jeē
cujéhnū ri,

chi coo niñí jiín ñúhūn jiín ñúhmā nájñūhun
vicō.

Yūcuan cúu jeē sáha ri jeē cóo jnūndóho
xeēn.

20 Te nduu jnúú níāndii te ma cúndijin gā,
te yoō coto cuéhé nájñūhun niñí.

Yūcuán na te quee quiví jeē ndíji maá Jítoho
rō Jesús.

Quiví ún coo cuehē jniñu jéhnū, te cuni
ndihi ñayuu jeē quiví maá Jítoho rō
cúu.

21 Te tāca ñáyuu jeē cahān ndahú i jiín yá te
jnama ya i, áchí Yáā Dios.

Achí Joel ni nacani de jnūhun ya.

22 Jeē yūcuan níhín téé ñuu yō Israel, cuni
nahín gá ni jnúhun yáha jíjnáhan ní. Ni steén
Yaā Dios jeē ní taji yá maá Jesús, Yaā ní
jehnu ñuu Nazaret, chi maá Yáā Dios ni jēhe
ya jeē ní sáha Jesús jniñu jéhnū mēhñu maá
ní, jiín jniñu jeē steén jeē kujéhnū ya, te
jniñu un ní canaa ni ni ní cajito ní. Te je
cájini vāha ní jéē súcuan ni cuu.

23 Te maá ní ni cajñí ní yá, te ni cajendēca
ní yá nuū téé xeēn ni cajehni de ya jicā cruz
ni casáha ní. Te nde jiín tiempo je ni jini
Yaā Dios jeē súcuan sáha ní jíjnáhan ní, chi
súcuan je ni sándaā yā.

24 Te ni nastécu Yaā Dios Jesús te tuá ni
cúu ya ndíyí, chi jnūhun xeēn jeē jihí ñayuu,
tuá na vé cúu ga sáha jiín yá.

25 Chi nde jenahán suhva ni tee David
jnūhun ndese ni cahān Jesús jiín Yáā Dios:
Jíni na núu maá ní jeē cúu ní Jítoho ná, chi
ní cāni ndéé ní jiín ná,

chi ndéé ní ichi ndáváha ná, cúu jeē chindéé
ñáhán ní sāña návāha coo ndeyí ni
ná.

26 Jeē yūcuan cúsiñ ni ná te cáhán na jnúhun
siñ ní.

Jeē yūcuan ma nácani uhū ni na síquí jnúhun
cúu ná.

27 Chi ma cuáha ni jnúhun quendōo ánuá na
lugar nuū cáyūcu ánuá ndíyí,
ni ma cuáha ni jnúhun tehyū ná, chi jéjñíñu
ná núu ní te maní ní jiín ná.

28 Te ni steén ni núu na jéē nátecu ná,
te sáha ní jéē cusíñ teyí ni ná condee na jiín
ní ní cāni.

Achí Jesús, ni achi David.

29 Tāca níhín jíjnáhan ní, na cástūhun cáji
ná nuū ni jnúhun jí yō David, chi tu ní
cáhán de jnūhun yáha síquí maá de. Chi
ni jihí de te ni quindūji de, te jíní yō nuū
yíndūji de nde víjna.

30 Chi ni cuu de tēe ni nacani jnūhun Yaā
Dios nde jenahán. Te ni jini de jeē váha ni
jejnūhun ya nuū de jeē chíji yucūn maá de
quiji Cristo, te condee yā mesa de ndacu ya
jniñu nájñūhun ni ndacu de jniñu jeē ní cuu
de rey.

31 Te nde jiín tiempo ni jini de jeē nátecu
Cristo, te ni cahān de jeē anuá yā, ma ndóo
lugar nuū cáyūcu ánuá ndíyí, ni yíqui cúñu
yā ma tehyú.

32 Chi Yaā Dios ni nastécu yā Jesús, te maá
ná cácuu ná testigo jeē ní natecu yā.

33 Te ni ndujéhnū tucu ya ni sáha Yaā Dios
jiín poder yā. Te nde nuū maá Yáā Dios, Yaā
cúu Tátá yā, ni nihín Jesús Espíritu Santo,
chi súcuan ni jejnūhun ya. Te ni taji Jesús
Espíritu Santo, te suu ya sáha jniñu jeē cájito
ní te cájini sōho ní víjna.

34 Te David, nasūu síquí maá de ní cáhán
de tāca jnúhun yáha, chi tu ní ndáa yíqui
cúñu de ándiví. Chi síquí Cristo cúu jeē ní
cahān de suhva:

Maá Yáā Dios ni cahān yā jiín Jítoho rī
Cristo:

Cucōo ró ichi ndáváha ri jeē steén jeē
cujéhnū ró.

35 Te na sáha ri jeē quende rō poder tāca jéē
cájito uhū rohó, áchí yā.

Achí David.

36 Nūu súcuan te ndihi ní jéē cácuu yó
ñayuu Israel, na cúni vāha ní jéē vésú ni
cajehni ni yá jicā cruz, te Yaā Dios ni jeni ya
maá Jesús jeē cúu ya Jítoho yō te suni cúu ya
Cristo, Yaā jnama yóhó, áchí Pedro jiín i.

37 Te jeē súcuan ni cajini sōho i jnūhun yáha, te ni cajnahuhū ni anuá i. Te ni cacajnúhún i Pedro jíin táca gá apóstol:

¿Te ndese sáha ná jíjnáhan ná núu súcuan? áchí i.

38 Te ni cahān Pedro jíin i:

Nacani ni ni jéē stóo ni cuéchi ní jíjnáhan ní, te cuandute ní jéē ní cacandíje ní Jesucristo, návāha cone cáhnu ni Yaā Dios nuū cuéchi ní, te cuāha Yaā Dios Espíritu Santo yā condee yā ini anuá ni.

39 Chi súcuan ni jejnūhun máá Tátá yō Yaā Dios nuū yō jíin núu séhe yó, te suni súcuan ni jejnūhun ya nuū ñáyuu táca gá nación, táca i jeē cána ya i candíje i.

40 Te jíin cuéhē gā jnūhun súcuan ni cahān cají Pedro, te ni stihví ni de i:

Nducú ndéyí ní jeē na cácu ní, chi jnahnū ndetū ñayuu casáha jniñu néé, áchí de.

41 Yūcuán na te táca i jeē ní cajetáhú jnúhun ni cahān de, ni cajendute i. Te quiví un ní nducuehē gā ñayuu cácuandíje, nájnūhun uní mil gā ñayuu.

42 Te ni cahān níhin i síquí jnúhun cástéén apóstol. Te inuú-ni cándajnúhun mání i te cájicān tahu i, te ñn cáhnu-ni cáyeji i pan, nájnūhun ni steén máá Jítoho yō jeē núcūhun ni yō síquí yā.

Ndese ni coyūcu ñáyuu jeē ní cacandíje jeē xíhna ñúhún

43 Te ndíhi ñayuu ni cayūhú i ni cajito i, chi cuehē jniñu jénu jeē steén jeē cujénu ya ni casáha tēe apóstol.

44 Te inuú ní cahīyo ni ñayuu cácuandíje, te ni cacuu inuú i táca jéē cánevāha i.

45 Te ni caxícó i na-ni na vé cánevāha i, te ni casaja i xūhún un núu táca jnāhan i, núu ndese jíni ñúhún ñn ñn i.

46 Te ndijnahan quiví ni candutútú i ini templo. Te maní ni cayeji cáhnu i pan táca vehé jnāhan i nájnūhun ni steén yā, te ni cahīyo sí ni i.

47 Te ni cacahān i jeē yóhyo cújénu Yaā Dios. Te ndíhi ñayuu ñuu un ní cajejnúhún i ñayuu cácuandíje. Te ndijnahan quiví ni jnama Jítoho yō sava ga ñayuu, te ni nduu inuú i jíin ñáyuu cácuandíje.

Jeē ní nduvāha tēe ríngo

3

1 Te ñn quiví te máá cáhuní jehíni ni caa Pedro jíin Juan cuango de templo, chí hora un cájicān tahu jnāhan de hebreo.

2 Te cájendēca ñayuu ñn tēe cáringo nde quiví ní cacu de. Te tēe un ndéé de ndijnahan quiví yehyí templo jeē naní Hermosa, jícan de caridad nuū táca ñáyuu quivícoo ini templo.

3 Te tēe un ní jito de nuū Pedro jíin Juan jeē véji de quivícoo de ini templo, te ni jícan de caridad nuū Pedro jíin Juan.

4 Te Pedro jíin Juan ni cajito vāha de nuū tēe ún. Te ni cahān Pedro jíin de:

Condēhe núu rí jijnáhan rí, achí de.

5 Te máá tēe un ndétu tūhva de, ni jeni ni de jeē cuáha Pedro jíin Juan jecu xūhun núu de.

6 Te ni cahān Pedro:

Tú na xūhun plata ni xūhun oro cánevāha rí. Te íyó ñn jeē váha ga sáha rí jíin ró: jíin poder maá Jesucristo, Yaā ní jehnu ñuu Nazaret, cáhán rí jíin ró, ndocuñí te caca ró, áchí de.

7 Te ni jñi de ndavāha tēe ún, te ni ndonehen de. Te jehē de jíin súcūn jehé de ni nduvāha-ni.

8 Te ñn ni scānda de máá de ni ndocuñí de, te ni quejéé de jíca de. Te ni quiví de jíin Pedro jíin Juan ini templo, jíca de, cánda de, te nácuatáhú de nuū Yaā Dios.

9 Te ni cajini táca ñáyuu jeē jíca de te nácuatáhú de nuū yā.

10 Te ni canacuni i de jeē maá de cúu tēe ni condee yehyí templo jeē naní Hermosa, ni jícan de caridad. Te ni canaa ni i ni cajito i, te ni cayūhú i cájito i jeē ní nduvāha tēe ún.

Jeē ní nacani Pedro jnūhun ini corredor jeē naní Salomón

11 Te tēe ni nduvāha ún, tu siáa de Pedro jíin Juan. Te ni cacutútú-ni cuehē ñayuu nuū de ini corredor jeē naní Salomón, te ni canaa ni i cájito i.

12 Te ni jito Pedro jeē ní cutútú ñáyuu ún, te ni cahān de jíin i:

Níhín tēe ñuu yō Israel jijnáhan ní, ¿najehe cánaa ni ni cájito ní jniñu yáha? ¿Najehe cájito ní núu ná te cájeni ni ni jéē máá ná jijnáhan ná íyó poder na jéē sáha ná jéē nácaca tēe yáha? ¿Chí ní nduvāha de síquí jeē tēe cájica ndaā cácuu ná cájeni ni ní?

¹³ Tuú chi máá Yáa Dios jíí yō Abraham jíín Isaac jíín Jacob jíín táca gá jíí yō, ni sáha ya jniñu yáha návāha cuni ñayuu jeē cujéhu Sēhe ya Jesús, Yaā jeē ní cajendēca ní núū tēe cácujeéhu. Te ná ni cuni Pilato jeē siaá de ya, te tu ní cájēhe ni jnúhun.

¹⁴ Te ni casquéhichī ni yá vēsú cúu ya Yaā ndaā, Yaā iī. Te sa suhva iin tēe jéhu ndīyī ni cacahān ni jíín Pilato jeē na siaá de.

¹⁵ Te ni cacahān ni jēe na cúu Yaā jeē sáha jeē técu ndīhi-ni. Te Yaā Dios ni nastécu yā Jesús jeē ní cuu ya ndīyī, te máá ná cácuu testigo jeē ní natecu yā.

¹⁶ Te tēe yáha jēe cájito ní te cánacuni ní de, ni candíje de jíín ná jeē iyó poder Jesús nasávāha ya de, te jeē yúcuu ní nasávāha ya de. Te jeē súcuu ni cacandíje ná ní sáha ya, jeē yúcuu ní nduvāha vāha de nájnūhun cájito ndīhi ní.

¹⁷ Te na cástūhun ná nuū ni jíínáhan ní, je jíín na jēe maá ní jíínáhan ní jíín tēe cácujeéhu nuū yō, tu ní cájecūhun ni ní, te jeē yúcuu ní cajehni ni yá.

¹⁸ Te súcuu ni squícu jnúhun ni cahān Yaā Dios nde jenahán jēe cánuú ndoho Cristo siquī cuéchi ñayuu, chi ni sáha ya jeē súcuu ni cacahān tēe ni canacani jnúhun ya nde jenahán.

¹⁹ Te na nácani ni ni jēe stóo ni cuéchi ní, te nasāma ini ní, te quívicoo ní ndaha Yaā Dios návāha ndahva yā cuéchi ní. Te quee quivī jeē ndúsī ni ní sáha máá Jítóho yō.

²⁰ Te natají yá Jesús ndiji ya, chi cúu ya Cristo, Yaā ní jeni Yaā Dios jeē jnáma ya yohó.

²¹ Te jíni ñúhún jēe cóo ya andiví nde nasájeé yá táca jēe iyó, nájnūhun ni cacahān tēe ndoo ni canacani jnúhun nde jenahán ní sáha Yaā Dios.

²² Chi suhva ni nacani jíí yō Moisés jnúhun nuū táca jíí yō: Máá Jítóho yō Yaā Dios cani ya Yaā nacani jnúhun nuū rō jíínáhan ró, nájnūhun ni jeni ya ruhū. Te cuu ya iin jnáhan ñuu yō. Te na chúhun ni rō táca jnúhun jeē nácani ya ún.

²³ Te núu ndé tēe tú chuhun ni de jnúhun cahān yā, jnahnū ndetū de, te ma cúu ga de jnáhan ñayuu yā Israel, áchí Moisés.

²⁴ Te táca tēe ni canacani jnúhun nde jenahán, nde tiempo ni quiiji Samuel te ná

gá nde vijna, suni ni canacani de jnúhun siquī táca jniñu cúu quivī yáha.

²⁵ Yucūn maá tēe ni canacani jnúhun ya nde jenahán cácuu yó, te suni siquī maá yó jíínáhan yó cúu jeē ni sáha Yaā Dios contrato jíín jíí yō. Chi ni cahān yā jíín Abraham: Yucūn maá ró cane Yaā sáha jeē quéndōo ndetū táca ñayuu ní cáhnu ñayivī, áchí yá.

²⁶ Te jeē ní nastécu Yaā Dios Sēhe ya, te ni quiiji ya nuū maá yó xíhna gā, návāha quéndōo ndetū yō sáha ya, chi sama ya anuá yō jeē ma sáha ga yō jniñu neé, áchí Pedro.

Jeē ní cajendēca de Pedro jíín Juan nuū tēe cácujeéhu

4

¹ Te Pedro jíín Juan níni cácahān gā de jíín ñayuu ún te ni quecoo táca sūtū jíín tēe grupo saduceo, jíín tēe cácujeéhu nuū tēe cándito templo.

² Te yōhyo ni caquīti ni de siquī jeē castéén Pedro jíín Juan nuū ñayuu, jíín jēe cánacani de jnúhun jeē nátecu ndīyī chi je ni natecu Jesús.

³ Te ni cajni ún de, te ni cachuhun ún de vecāa cone de nde cundijin inga quivī, chi je ni ini.

⁴ Te cuehē ñayuu jeē ní cajini sōho jnúhun ni cacahān Pedro jíín Juan ni cacandíje i. Te ni nduu nájnūhun uhūn mil jeē maá nene tēe jeē ní cacandíje.

⁵ Te jeē ní cundijin inga quivī ún, te tēe cácujeéhu nuū ñayuu hebreo jíín tēe jéhu cándiso jniñu jíín tēe cástéén jnúhun tutu ley yā, ni candutútú de ini ñuu Jerusalén.

⁶ Te suni ni candutútú de jíín Anás jeē cúu sūtū cujéhu ga, jíín Caifás jíín Juan jíín Alejandro jíín táca gá jeē cácuu jnáhan sūtū cujéhu ga ún.

⁷ Te ni candacu jniñu jeē na quíjicoo Pedro jíín Juan condichi de mēhñú, te ni cajjnūhún de:

¿Ndé iin ni tejniñu róhó te ndese ni nihīn jniñu ró ní sáha ró jēe nduvāha tēe yáha? áchí.

⁸ Yūcuán na te Pedro chi ni cunuú maá Espiritu Santo jíín de, te jíín poder yā ni cahān de jíín táca tēe ún:

Tāca níhín tée cácujuhnu nuū ñūū yō Israel jíin táca níhín tée jéhu cándiso jniñu,

⁹ vijna te cástíhí ní sáña síquī ñn jniñu váha ní casáha ná jéē ní nduvāha tēe cūhú yāhá.

¹⁰ Te na cástūhun ná nuū nihín jéē cácujuhnu ní, návāha suni cuni ndihi jnāhan ñuu yō Israel jeē jíin poder maá Jesucristo, Yaā ní jehnu ñuu Nazaret, ni nduvāha tēe índichi nuū ni yáha. Te suu ya cúu Yaā jeē ní cajehni ni jíca cruz, te ni sáha Yaā Dios jeē ní natecu yā.

¹¹ Jesús cúu nájñūhun yuū cimientu jeē quítuu vehe. Te máá ní jíjnāhan ní cácuu nájñūhun tēe casáha vehe, te ni casquéhichí ni yá nájñūhun jeē cátejiyo ní yūū, chi tu ní cácañdije ní yá. Te ni sáha Yaā Dios jeē cúu ya nájñūhun yuū cánuú gá jeē quítuu vehe.

¹² Te tú cuítu inga jeē cúu jnama yóhó, chi tuá na inga jeē cujéhu ní jéni Yaā Dios ini ñayīvi yáha jéē cúu jnama yóhó, áhí Pedro.

¹³ Yūcuán na te ni cajini un jéē Pedro jíin Juan jéhu-ni cácahān de. Te je cájini jeē tú tūhva de, chi tēe súcuan-ni cácuu de. Te ni canaa ní cájito nuū de, te ni casáha cuenta jeē ní cajica de jíin Jesús.

¹⁴ Te cándēhe núū tēe ni nduvāha un, índichi de jíin Pedro jíin Juan, te tu ní cánihīn gā modo ndese ga cahān.

¹⁵ Yūcuán na te ni candacu jniñu jeē na quéndacoo sīn de yatā véhe juzgado te nda-jñūhun máá jíjnāhan.

¹⁶ Te ni cacahān:

¿Ndese sáha yó jíin tēe yáha núu súcuan? Chi ni jité jñūhun yáha núū tāca ñayuu ñuu Jerusalén jeē súcuan ni casáha de ñn jniñu jéhu, te ma cúu cahān yō jeē tu íyó ndáa.

¹⁷ Te návāha ma cuítu ga jñūhun yáha, na cúxeēn yō nuū de jeē ma cahān cuítu gā de jñūhun Jesús nuū ní ñn ñayuu, áhí.

¹⁸ Te ni cacana ún de, te ni cacahān nīhin jíin de jeē ma cahān cuítu gā de jñūhun Jesús ni ma steén gā de jñūhun un núū ní ñn ñayuu.

¹⁹ Yūcuán na te ni cacahān Pedro jíin Juan:

Caní vāha ni ní te núu nújnahan ni Yaā Dios jeē stóo ná jniñu ní ndacu ya jeē sáha ná te cuandije ná máá na jniñu nándacu ní.

²⁰ Chi ma cúu stóo ná jniñu jeē nácani ná jñūhun ní cajini sōho ná jíin jniñu ní cajito ná, áhí de.

²¹ Yūcuán na te tēe ni cacutútú un ní cacuxeēn tucu de nuū Pedro jíin Juan. Te ni casiáá de cuango de, chi tú cuítu na modo stóho de chi cáyūhu cájito ñayuu, chi síquī jniñu jéhu ni cuu ún te ndihi i cácahān i jeē yóhoyó cújéhu Yaā Dios.

²² Chi tēe jeē ní sáha ya jniñu jéhu jíin de jeē ní nduvāha de, víhyá gā uū xico cuiyā de.

Jeē ní cajicān tahuñ ñayuu cácañdije

²³ Te ná ni casiáá un Pedro jíin Juan cuango de, te ni najinūcoo de nuū tāca gá jnāhan de, te ni cacachi de ndese ni cacahān sutū cácujuhnu jíin tēe jéhu cándiso jniñu.

²⁴ Te jeē ní cajini sōho de jñūhun yúcuán, te inuú-ni ni cajicān tahuñ de nuū Yaā Dios:

Tátā Yaā Dios jeē cujéhu ní núū ndihi, máá ní cúu Yaā Dios ni sáha andiví jíin ñayīvi jíin mar jíin táca ndihi jeē iyó.

²⁵ Te jeē jíin Espíritu Santo te ni sáha ní jéē ni cáhān mozo ní David nde jenahān:

¿Najehē cácuítu ndevāha ni ñayuu sīn nación?

¿Te najehē cájeni sáá ni i jeē ndóna i síquī ní?

²⁶ Ni cacutútú jéē cácuu rey ñayīvi jíjnāhan, te tēe cácujuhnu ni cacutútú de, te inuú-ni ni candonda de síquī maá ní jeē cúu ní Jitoho ná,

jíin síquī Cristo, Yaā jeē ní jeni ní.

Ahí David.

²⁷ Te jendaá chi Herodes jíin Poncio Pilato jíin táca tēe ñuu yō Israel jíin tēe tāca gá nación, ni cacutútú de ini ñuu yáha ní candonda de síquī Séhe ñi ní Jesús, Yaā ní jeni ní.

²⁸ Te súcuan ni cuu návāha squícu tāca jniñu jeē jíin poder ni ní cundaā ni ni ndé jenahān jéē súcuan coo.

²⁹ Te vijna, Tátā, coto ní ndese cácahān xeēn de nuū na jíjnāhan ná, te cuāha ni fuerza ni núū na jéē cácuu ná mozo ni, návāha jéhu-ni nacani ná jñūhun máá ní.

³⁰ Te jíin poder ní nasávāha ni ñayuu cácuñu, te sáha ní jniñu jéhu jeē steén jeē cujéhu ní. Te tāca jéē yáha sáha ní jíin poder Séhe ñi ní Jesús, áhí i jíjnāhan i.

31 Te nuū ní ndihí ni cajicān tahu i, te nuū cáyūcu tūtú i un ní sáha ya jeē ni jnáa. Te ndihí i ni cunuú Espíritu Santo jíin i, te ni jēhe ya fuerza te jéhnū-ni ni canacani i jnūhun Yaā Dios.

Jeē ní canevāha cáhnu i ndajníñu

32 Te ñayuu cuehē jeē ní cacandíje chi inuú cáhīyo ni i jíjnáhan i. Te tú ni in i ní cáhán jeē ndajníñu jeē névāha máá i cuu máá-ni i, chí tēcá ndajníñu ni canevāha cáhnu i.

33 Te nīhin cánacani apóstol jnūhun jeē ní cajito de jeē ní natecu Jítoho yō Jesús. Te yōhyo ni chindéé ñáhán yá ñayuu cáacandíje.

34 Chi tú cuiti ni in i ní ndóho jeē cumani nuū i, chí tēcá ñáyuu cánevāha cuehē ñuhun chí vehe, ni caxícó i sava te ni caquindeca i xūhún un.

35 Te ni cajēhe i xūhún un núū tēe apóstol, te ni casaja tēe apóstol nuū ñáyuu cáacandíje núū ndese jíni ñūhún in in i.

36 Te íyó in tēe nání José jeē cúu yucūn Leví, ni cacu de Chipre, ñuhun jeē íne sán nuū ndúte. Te tēe apóstol ni casnání de tēe ún Bernabé, jeē cuní cahān: tēe cáhán jnūhun ndeyí ni.

37 Te ni xícó de in ñuhun de, te ndáhá de xūhún un ní jēhe de nuū tēe apóstol.

Siquē cuēchi jeē ní casáha Ananías jíin Safira

5

1 Te suni inga tēe nání Ananías jíin ñasihí de Safira, ni caxícó de in ñuhun de.

2 Te ni chuvāha de sava xūhún un cuu máá de jíin ña, chí súcuan ni candajñuhún de jíin ña, te ndáhá de inga sava nájñuhun jeē ndíhi cúu, te ni jēhe de nuū tēe cácuu apóstol.

3 Te ni cahān Pedro:

Ananías, ¿naun ni jēhe ro jnúhun jeē quívi jexeén, jeē cúu Satanás, ini anuá rō te stáhú ró Espíritu Santo cuní rō? Chi jeē ní caxíco ró ñuhun ró te cuēchi ró cúu jeē tu ní cáchi ndaā rō jeē ni squéndōo ró jecu xūhún un cuajníñu máá ró, chí ni sáha ró nájñuhun jeē ndihí xūhun ní jēhe ró.

4 ¿Te á násūu cuenta máá ró cúu ñuhun un ndé ná tu xíco ró? Te ná ni xíco ró ¿te á násūu cuenta máá ró cúu xūhun jéē cuajníñu ró ndé nuū cuní máá ró? ¿Te naun

ni jeni ni rō jeē stáhú ró súcuan? Te nasūu máni máá tēe cúu jeē jícu ró stáhú ró, chí suni Yaā Dios, áchí Pedro.

5 Te ná ni jini sōho Ananías tēcá jnúhun yáha, te ni cotúú-ni de ni jihí de. Te tēcá ñáyuu ní canihín jnūhun ún, yōhyo ni cayūhú i.

6 Te ni candocuíñī tēe suchí, te ni cachusúcun de ndíyí un cuáchindūji de.

7 Te ni cunúu nájñuhun uní hora. Te ni jinū ñasihí ndíyí un ní quívi ña ini vehe ún, te tú na vé jiní cuiti ña.

8 Te Pedro ni cajñuhún de ña:

Cachi nuū rī, ¿á in súcuan-ni ni caxíco ró ñuhun ró chí tuú? áchí de.

Te ni cachi ña:

Suu súcuan-ni ni caxíco ná, áchí ña.

9 Te ni cahān Pedro jíin ña:

¿Naun ni casquíjnáhan jnūhun ró jéē cóto ndee rō Espíritu Santo maá Jítoho yō? Chi ni nducú ró stáhú ró yā. Cuni nahín jéē cáhma nanecoo tēe cuachindūji yí ró, te suni súcuan quichindūji de róhó, áchí de.

10 Te ni cotúú-ni ña nuū jehé Pedro te ni jihí-ni ña. Te ni ndívicoo tēe suchí un te ni cajito de jeē jé ni jihí ña, te ni caquenehen de ña, te ni jechindūji de ña xiin yí ña.

11 Te yōhyo ni cayūhú ndívii ñayuu cáacandíje jíin tēcá gá ñayuu jeē ní cajini jnūhun jeē súcuan ni cuu.

Cuehē jniñu jéhnū ni casáha apóstol

12 Te cuehē jniñu jéhnū jeē steén jeē cujéhnū Yaā Dios ni casáha tēe apóstol nuū ñáyuu. Te tēcá ñáyuu cáacandíje, inuú-ni cándutútú i ini corredor jeē naní Salomón.

13 Te tu ní cáchundeyí ni inga ñayuu quíjnáhan jíin i. Te cájejnūhún i ñayuu cáacandíje.

14 Te ni nducuehē gā i, chí cúu tēe cúu ñahan ni cacandíje i máá Jítoho yō.

15 Te cáquindeca ñayuu jnáhan i jeē cácuhū, te cájequin i ini calle cáca i nuū camilla jíin núu yúu, chí cácuni i vēsú ste cuándahū Pedro na yáha siquē i te nduvāha i.

16 Te suni cuehē ñayuu tēcá ñuu cáhīyo yajni yūcuan ní quijicoo i ñuu Jerusalén ni caquindeca i jnáhan i jeē cácuhū jíin jéē cándoho tachí, te ndihí i ni canduvāha i.

Jeē ní cajito xeēn i tēe cácuu apóstol

17 Yūcuán na te sutū cujéhnū ga jíin táca gá jnáhan jeē cácandíje sahān saduceo, ni cacucuésún ni jeē siquí tēe cácuu apóstol.

18 Te ni cajni de tēe cácuu apóstol ni cachuhun de vecāa.

19 Te in ndajéhé maá Jítóho yō ni nune ya yehyí vecāa ún jecuāā, te ni quenehen ya de jíjnáhan de. Te ni cahān yā jíin de:

20 Cuáhán te cuiñi ró ini templo, te yūcuán nacani cájí ró jnūhun nuū ñáyuu siquí ndese nihīn tahu i cotecu i ní cáni, áchí ndajéhé yā.

21 Te ni cajini sōho de jnūhun yáha. Te nuū ní cundijin te nehen ni quivicoo de ini templo, te cástéén de jnūhun ya nuū ñáyuu.

Te níni cástéén de te sutū cujéhnū ga jíin táca jnáhan de ni canastútú de tēe junta cujéhnū ga, jeē cúu ndihi tēe jéhnū cándiso jniñu nuū ñáyuu nación Israel. Te ni catajái de policía cuaquenehen tēe apóstol ini vecāa.

22 Te nuū ni jínūcoo te tuá gā tēe apóstol. Te ni canandió cóo te ni cacachi:

23 Jendaá cúu jeē ní cajito ná ndési vāha vecāa, te cáhīn tēe cándito yéhyí un. Te nuū ní canune ná, te tú cuiñi gā tēe un cáhīn ini vecāa ún, áchí de.

24 Te sutū cujéhnū ga jíin tēe cújéhnū nuū tēe cándito templo jíin sūtū cácujehnū, nuū ní cajini sōho de jnūhun yáha, te ni cajeni ni de ndese ga cúu un núu súcuan.

25 Te ni quee-ni in tēe te ni cachi:

Tēe jeē ní cachuhun ní vecāa, cáhīn de ini templo, te cástéén de jnūhun nuū ñáyuu, áchí de.

26 Yūcuán na te tēe cácujehnū nuū tēe cándito templo, jíin tēe cácuu policía de, ni jengoo de, te yúcún ní nacueca de táca tēe apóstol vendicoo de jíin, chí cáyūhú de jeē sanaa te cuāha ñáyuu yuū xinī de núu sáha xeēn de jíin táca tēe apóstol.

27 Te nuū ní najinūcoo de jíin tēe apóstol, te ni cajecuiñi de nuū tēe casáha junta. Te sutū cujéhnū ga ni cahān:

28 Ni cacahān nihīn ri jíin ró jeē ma steén cuiñi gā ró jnūhun tēe nání Jesús. ¿Te naun ni casáha ró jēe ní ndecāva jnūhun un ní ñuu Jerusalén yáhá? Te cácuu ró staú yáhu ró rúhū jíjnáhan ri siquí jeē ni jíhī tēe ún, áchí.

29 Te Pedro jíin táca gá apóstol ni cacahān de:

Cánuú jēe squícu ná jniñu ní ndacu Yaā Dios nuū ná te nasūú jniñu nándacu tēe.

30 Máá Yáa Dios jíi yō ni nastécu yā Jesús, Yaā ní cajehni maá ní jeē ní cata caa ní yá jicā cruz.

31 Te ni sáha Yaā Dios jeē ní ndujéhnū tucu Jesús néne ya ichi ndáváha Yaā Dios, te cúu ya Yaā ndácu jniñu, Yaā jnáma ñáyuu. Te súcuan ni sáha Yaā Dios náváha yóhó, jēe cácuu yó ñáyuu Israel, na nacani ni yō jeē stóo yó cuéchi yó, te cone cáhnu ni yā nuū táca cuéchi yó.

32 Te máá ná ni cajito ná táca jniñu yáha, te suni máá Espíritu Santo steén cají yá jeē súcuan cúu, chí jéhe Yaā Dios Espíritu Santo yā condee ini anuá táca ñáyuu jeē cájendetū nuū yā, achí de.

33 Te ná ni cajini sōho un jnūhun yáha, te yōhyo ni caquiñi ni, te cahni de cácuu nuú.

34 Te mēñú un jíjnáhan néne in tēe grupo fariseo nání de Gamaliel, te cúu de maestro jeē steén ley yā, te táca ñáyuu cájejnúhún i de. Te ni ndocuiñi de, te ní ndacu de jniñu jeē na cújiyo núu tēe apóstol.

35 Te ni cahān de:

Róhó jnáhan ñuu yō Israel, cani vāha ni ró núu na vé cácuu ró sáha ró jíin táca tēe yáha.

36 Chí nucūhun ni ró jeē in cuiyā ni ndonda Teudas siquí gobierno, te ni cahān de jeē tēe téyí cúu de, te ni cacutútú nájnūhun cuūn ciento tēe jíin de. Yūcuán na te ni cajehni ñáyuu Teudas, te táca jēe ní caquiñáhan jíin de ni cajitē núu cuango sáa-ni, te ni jecuiñi-ni jniñu ún.

37 Yūcuán na te quiví ni íyo censo te Judas, in tēe Galilea, ni ndonda de siquí gobierno, te ni cacutútú cuéhē tēe jíin de. Te suni ni cajehni ñáyuu Judas, te táca tēe jeē ní caquiñáhan jíin de ni cajitē núu cuango.

38 Te vijna na cuáha ri consejo rohó. Ma stáhān gā ró tēe yáha. Siáa de na quíngoo de. Chí núu ñáyuu-ni ni squejéé jniñu yáha, te jecuiñi i.

39 Te núu Yaā Dios ni squejéé, te ma cúu casí ró, chí sanaa te siquí Yaā Dios cándonda ró, áchí de.

40 Te ni cachusóhó jēe ni cahān Gamaliel. Te ni canacana tēe cácuu apóstol, te ni canani de jíin cuarta ñi te ni cacahān xeēn jíin

de jeē ma cahán gā de jnūhun Jesús, te ni casiáá de cuango de.

⁴¹ Te máá apóstol ni quendacoo de nuū junta cuango de, cácusī ni de jeē ni jēhe ya jnūhun ndoho de jeē cuáha ñayuu jnūhun canu de siquī jeē cácadíje de ya.

⁴² Te ndiquivī castéén de jnūhun vāha Jesucristo, te cánacani de jnūhun ún ini templo jíin táca-ni vehe.

Jeē ní cajeni de uxā tēe cuajniñu mēhñu ñáyuu cácadíje

6

¹ Te ni cucuehē ñayuu cácadíje. Te tiempo un te tēe hebreo jeē cácahān yuhu griego, ni quejéé de cácahñu de nuū jnāhan hebreo de, áchí de jeē ñahan viuda jeē cácahān yuhu griego tu cánihīn vāha ña staā jeē cásaja de táca quívī cuu ña.

² Yūcuán na te máá ndihúxí uū apóstol ni canastútú de táca ñáyuu cácadíje, te ni cacahān de:

Tú vāha jeē jécuiñī jniñu jeē cánacani ri jnūhun Yaā Dios siquī jeē cásaja rī staā.

³ Núu súcuan te róhó, hermano, nacāji ró úxā jnāhan máá yó, te na cóndiso jniñu de saja de staā. Te nacāji ró tēe jeē cájejnūhún ñáyuu de, tēe ndíchí jēe ní cunuú Espiritu Santo jíin de.

⁴ Te ruhū jijnāhan ri, máni cacān tahu rī jíin jēe nácani ri jnūhun ya, achí de.

⁵ Te ndihī ñayuu ni canujnahan ni i jnūhun ni cacahān de. Te ni canacāji i Esteban, tēe cándíje vāha jeē ní cunuú Espiritu Santo jíin de. Te suni ni canacāji i Felipe jíin Prócoro jíin Nicanor jíin Timón jíin Parmenas jíin Nicolás. Te Nicolás cúu tēe ñuu Antioquía, te ni nduu de tēe cándíje sahān ñayuu hebreo nde ná tu candíje de jnūhun Cristo.

⁶ Te ni cajeni i táca tēe yáha núu tēe cácuu apóstol, te tēe apóstol un ní casoó de ndaha de xinī táca tēe un ní cajicān tahu de nuū Yaā Dios siquī jniñu condiso de.

⁷ Te jnūhun Yaā Dios ni jītē gā cuahān, te ni nducuehē teyí ñáyuu cácadíje i jnūhun ya ini ñuu Jerusalén. Te suni cuehē sutū ni cacandíje de jnūhun ya.

Jeē ní cajni de Esteban

⁸ Te ni chindéé ñáhán yá Esteban ni jēhe ya poder nuū de, te ni sáha de táca jniñu jéhnu nuū ñáyuu, jniñu jeē steén jeē cujéhnu Yaā Dios.

⁹ Te ñayuu hebreo jeē ní cacuyāhu i te ni canduu libre i, íyó vehe iī sinagoga i. Te tēe un cácuu tēe ñuu Cirene jíin tēe ñuu Alejandría jíin tēe Cilicia jíin tēe Asia. Te sava tēe un ní caquejéé de cástáhān jnāhan de jíin Esteban.

¹⁰ Te tu ní cácuudeyí jíin de, chi ndíchí ní cahān de ni sáha máá Espiritu Santo.

¹¹ Yūcuán na te ni cascáhān sava tēe jeē na cáhān jnūhun stáhú siquī Esteban. Te ni cacahān jeē ní cajini sōho cáhān ndevāha Esteban siquī Moisés jíin siquī Yaā Dios.

¹² Te jeē súcuan ni cacahān te ni caquīñī ni táca ñáyuu jíin tēe jéhnu cándiso jniñu jíin tēe cástéén jnūhun tutu ley yā. Te ndihī de ni candonda siquī Esteban, te ni cajni de cuango jíin de nde nuū junta cujéhnu ga.

¹³ Te ni cajeni de tēe cahān jnūhun yáá siquī Esteban, te suhva ni cacahān:

Tēe yáha tu ndé jécuiñī de jeē cahān ndevāha de siquī templo iī yáha jíin siquī ley yā.

¹⁴ Chi ni cajini sōho ná cáhān de jeē Jesús, tēe ni jehnu ñuu Nazaret, canu de templo yáha te nasama de jeē tajnúní ley yā jeē ni jēhe Moisés nuū yō, áchí.

¹⁵ Yūcuán na te ndihī tēe cáyūcu núu junta un ní candacoto vāha nuū Esteban, te ni cajini jeē jító nuū de ná jító nuū ñn ndajéhe Yaā Dios.

Jnūhun ni nacani Esteban

7

¹ Te máá sūtū cujéhnu ga ni cajnūhún Esteban:

¿A ndáa jeē súcuan ni sáha ró nájñūhun cácahān de yāhá? áchí.

² Te ni cahān Esteban:

Ndihī níhín jēe cácuu ní jnāhan ñuu yō, jíin ndihī níhín jēe cácuu ní ní nū ñúu yō, cuni nahín ní jnūhun cahān ná: Máá Yáa Dios jeē yóhyo cújéhnu ya, ni steén yā maá yá nuū jíi yō Abraham nde na néne ga de región Mesopotamia, nde ná tu quihīn de condee de ñuu Harán.

³ Te ni cahān yā jíin de: Stóo ñuu rō jíin táca jnāhan ró te quihīn rō nuū cuáha ri

condee rō, chi máá rí steén ichi nuū quihín rō, achí yá.

⁴ Yūcuán na te ni quenda de región Caldea, te ni jinū de ni condee de ñuu Harán. Te yūcuan ní jihī tatá de. Yūcuán na te ni sáha Yaā Dios jeē ní quee de ñuu yáha núū cáyūcu yó vijna.

⁵ Te tu ní jéhe ya ni ñn tíhlí ñuhun yáha cuu tahū de. Te vēsú sūcuan te ni jejnūhun ya jeē cuáha ya ñuhun un núū de nde jíin núū tāca séhe de, vēsú ná tu coo séhe de sáá.

⁶ Te sūcuan ni cahān Yaā Dios jíin de: Sēhe ró coyūcu jíca i inga ñuu, te cuūn ciento cuiyā sájniñu sáá-ni i te stóho ñayuu yūcuan i.

⁷ Te siquī jeē sūcuan sáha i jíin séhe ró, te máá rí chí stóho ri ñayuu ñuu ún. Te sáá te quendacoo séhe ró yūcuan, te nucoyūcú i yáhá chiñúhún i ruhū, achí yá.

⁸ Te ni cahān yā jíin Abraham jeē na cúu de circuncidar, jeē cúu ñn jnunī jeē ni sáha ya contrato jíin de. Te ná ni cacu séhe de Isaac te ni sáha de circuncidar i nuū uná quivī. Te suni sūcuan ni sáha Isaac jíin séhe de Jacob, te Jacob jíin séhe yí de jeē cácuu ndihúxí uū yucūn ñayuu Israel.

⁹ Te tāca séhe Jacob ni cacucuésún ni de jíin ñani maá de José, te ni caxícó de i nuū tée jeē ní cajendēca i nde nación Egipto. Te Yaā Dios chi ni ndito ya José.

¹⁰ Te ni jnama ya i nuū tāca jnúndóho ní jito i, te ni cundichí i ni sáha ya. Te Faraón, tēe cúu rey nación Egipto, ni cusī ni de jíin i ni sáha ya, te ni tejníñu de José jeē cúu de gobernador te ndacu de jniñu nación Egipto jíin núū ñayuu cáyūcú vehe Faraón.

¹¹ Te ni quiji quivī jeē ni íyo ñn jnamā xeēn, te ni ndoho ñayuu ní cáhnu nación Egipto jíin ndé ñuu Canaán. Te tāca jíí yō ún, tuá ni cániñ de jeē cáji de.

¹² Te ni nihīn Jacob jnūhun jeē iyó trigo nde nación Egipto, te ni tají de séhe de ni jengoo de ni cajeen de trigo vuelta ñn.

¹³ Te jeē cuángoo de vuelta uū te ni nastúu José jeē maá de cúu ñani de jíjnahān de. Yūcuán na te ni jini rey Faraón ndé ñn jnahān cúu José.

¹⁴ Te ni cahān José jíin táca ñani de jeē na cóndeca de tátá de Jacob jíin ndihī jnahān vehe de. Te ni íyo unī xico xahūn i.

¹⁵ Te sūcuan ni cuu jeē ni jínū Jacob ni condee de nación Egipto nde ni jihī de. Te suni yūcuan ní coyūcu séhe de jeē cácuu jíí yō un ndé ni cajihī maá de.

¹⁶ Te ná ni quee quivī jeē ndénehen ya tāca yūcūn de jeē cáyūcu tátú de nación Egipto, te ni cacondiso de yiqui ndihúxí uū ndīyī jíí un jéē ndíji ñuu Siquem, te ni cachindūji de ini yaū ndīyī ndeé jíca cáva jeē ní jeen jíí yō Abraham nuū tāca séhe Hamor ñuu Siquem.

¹⁷ Te nde ná cáyūcu gá de nación Egipto, te cuacuyajni quivī jeē squícu jnūhun ni cahān Yaā Dios jíin Abraham jeē quéndacoo séhe de nucoyūcú i ñuu ni jéjnūhun ya nuū i, te ñayuu un ní tahū cuehē i ini nación Egipto.

¹⁸ Yūcuán na te ni nucuñī inga rey ñuu Egipto jeē tu ní jíin de jeē váha ni sáha ndīyī José.

¹⁹ Te rey un ní stahú de tāca jíí yō te ni sáha ndevāha de jíin i, chi ni sáha fuerza de i jeē ma cóto ga i séhe yiquín i te na cúu.

²⁰ Te tiempo un ní cacu Moisés, te ni cusī ni Yaā Dios jíin i. Te unī yoō ni condito sāhi náná i tátá i.

²¹ Te tuá ni cúu condito sāhí de i, te ni cachune de i nuū naniñiñ séhe sñí Faraón i, te ni naquihin séhe ña i ni scuéhnu ña i nájnūhun séhe máá ña.

²² Te ni cutūhva Moisés tāca jnúhun ndíchí ñuu Egipto, te ni cujéhnu de jíin jnúhun cáhān de jíin jniñu sáha de.

²³ Te nuū uú xico cuiyā de te ni jecondéhé de jnahān de jeē cácuu ñayuu Israel.

²⁴ Te ni jito de nuū ñn tēe nación Egipto jeē sáha ndevāha jíin ñn tēe Israel. Te Moisés ni jnama de jnahān de Israel ún, chi ni jehni de tēe Egipto un. Te sūcuan ni ndutahū jeē ni sáha ndevāha jíin jnahān de ún.

²⁵ Te máá Moisés jéni ni de jeē jécūhun ni tāca jnahān de jeē Yāā Dios ni tají yá de jeē jnáma de jnahān de ún ini nación Egipto nuú, te tu ní cájecūhun cuiti ni jnahān de ún.

²⁶ Te inga quivī suni ni jito de nuū uú tēe Israel jeē cájehnahān, te cúní de jeē na jécuiñī. Te jeē yūcuan ní cahān de jíin: ¿Najehē casáha ndevāha ró jíin jnahān ró? Chi nájnūhun ñn ñani-ni cácuu ró, achí de.

27 Te máá téé cáni tahū jnáhan un ní chundahá de Moisés te ni cahān de: ¿Ndé ñni ni jeni rōhó jéé cujéhnū rō núū rī te sándaā rō jniñu ri jijnáhan rī?

28 ¿Chí suni cúni rō cahni rō ruhū nájnūhun ni jehni rō tēe Egipto icu chí naún? áchí de jíin Moisés.

29 Te nuū ní jini sōho Moisés jnūhun yáha, te ni yūhú de jeé cáhni rey de, te ni jinu de cuahān de inga nación. Te ni condee de ñuu jicá Madián, te yūcuan ní scácu ñasihí de uū sēhe yí de.

30 "Te ni jinu uū xico cuiyā jeé néne de yūcuán. Yūcuán na te ñni ndajéhé Yaā Dios ni quenda ya nuū de nde nuū ñūhun téhé nuū ín yucu súcún Sinaí. Te ni quenda ya nuū de xinī ñni yucū cuí cáhnu cándahá yáñuhūn, te tu ní cáyú yucū ún.

31 Yūcuán na te Moisés ni naa ni de jító de ún, te ni jehēn de nde nuū, návāha coto vāha de. Te ni jini sōho de jeé cahán maá Jítóho yō jíin de:

32 Máá rí cúu Yaā Dios tāca jíi rō jenahán, Abraham jíin Isaac jíin Jacob, achí yá. Te Moisés, quísi i de jeé yūhú de, te jeé yūcuan tuá ni cūndeyí ni de coto de nuū.

33 Te máá Jítóho yō ni cahān yā jíin de: Quenehen ndijēn rō chi nuū ín rō, ñūhun íi cúu.

34 Je ni jini rī ñayuu maá rí jeé yóhyo cándoho i nación Egipto, te suni jíni sōho ri jeé cájnana uhū i, te ni cuun ri vēji ri jeé jnáma ri i jijnáhan i. Núu súcuan te vijna chi tají rí rohó ndicó rō quihīn rō nde nación Egipto, achí yá jíin de.

35 "Te nde ná tu quenda Moisés Egipto, te tāca jnáhan de ni casquéhichī i de jeé ní cacahān i jíin de: ¿Ndé ñni ni jeni rōhó jéé cujéhnū rō núū rī te sándaā rō jniñu ri? ni cacahān i jíin de. Te vēsú súcuan te máá ndajéhé Yaā Dios ni quenda nuū Moisés un jéé cándahá cáyú yucū cuí ún. Te súcuan ni cuu jeé ní natají yá de cuanuhun de nde Egipto jeé ndácu de jniñu nuū i te jnama de i.

36 Te máá Moisés ni sáha de jeé ní quendacoo jnáhan ñuu de ini nación yūcuan, te ni cayāha de Mar Rojo, te ni cajica cuu de ñūhun téhé uū xico cuiyā. Te ní tiempo un ní sáha de cuehē jniñu jéhnū jeé steén jeé cujéhnū Yaā Dios.

37 Te máá Moisés cúu jeé suhva ni cahān de jnūhun yáha jíin jnáhan ñuu yō Israel: Máá Yáā Dios caní ya Yaā nacani jnūhun nuū rō jijnáhan rō nájnūhun ni jeni ya ruhū. Te cuu ya ñni jnáhan ñuu yō. Te na chūhun ni rō jnūhun cahān Yaā ún, áchí.

38 Te suni nde ná ni cajica cuu jíi yō nde nuū ñūhun téhé, te ni cahān ndajéhé yā jíin Moisés xinī yūcu súcún Sinaí, te ni nihīn de jnūhun jeé cahán ndese nihīn tahú yō cotecu yō, te ni nacani de jnūhun un núū tāca jíi yō, te ni quendōo jnūhun un núū yō.

39 "Te tāca jíi yō ún tu ní cáculi de cuandetū de nuū Moisés, chí sa suhva ni cacuni de squéhichī ni de Moisés, te ni cacuni de nandicó de nungoo de Egipto nuū.

40 Te ni cacahān de jíin Aarón: Sáha ní tijni yaā na cósnūu núū yō. Chí Moisés, jeé ní quenehen de yóhó Egipto vējicoo yó, tu cájini yō na vé ni ndoho de jeé tú de ndéé jeé cuahán de xinī yucu Sinaí, achí.

41 Yūcuán na te ni cajēhe de oro ni cuvāha ñni becerro oro, te nuū becerro ídolo un ní casocō de quiti, te ni cacusiñ ni de jíin ídolo ni casáha de ún.

42 Te Yaā Dios ni cujiyo ya cuahān yā, te ni stóo ya de na chíñuhún de nuū tāca jéé jító yó ín andiví, nájnūhun yósó núū tútu tēe ni canacani jnūhun Yaā Dios nde jenahán:

Ni cahān yā: Róhó ñáyuu Israel,
¿á cájeni ni rō jeé nuū ruhū ni casocō rō quiti
ná ni cajica cuu rō úu xico cuiyā nde nuū ñūhun téhé?

43 Tuú, chí sa suhva ni cacondiso rō nicho jeé íne ídolo jeé naní Moloc jíin figura quimi jeé naní Renfán, ídolo jeé ní casáha máá rō ni cachiñuhún rō. Jeé yūcuan cúu jeé siáha ri rohó quihīn jicá rō nde yatā núū Babilonia, achí yá.

44 "Te ni ndacu ya jniñu nuū Moisés jeé na sáha de vehe ñni nuū chiñuhún de ya, nájnūhun cáa jeé ní steén yā nuū de. Te tāca jíi yō, nde nuū ñūhun téhé ní canevāha de vehe íi un núū ní cachuvāha de tabla yuū jeé yosó jnūhun ley yā.

45 Te ni castóo de vehe un núū ndihí sēhe de jeé cúu jíi yō. Te ni quiví Josué jíin jíi yō ini nación yáha, te ni sáha ya jeé ní cacundeyí de jíin tāca ñáyuu jeé ní cacoyūcu yáha ní cajinu i cuangoo i. Te ni quivícoo de

tācá ñuu i jíin vehe iī ún, te ni quendōo nde quiv̄ ní cuu David rey.

⁴⁶ Te ni cus̄i ni Yaā Dios jíin rey David. Te ni jicān de nuū yā jeē sāha de ñn vehe iī yā nuú, chi máá yá cúu Yaā Dios jíi de Jacob.

⁴⁷ Te ni cuu jeē nde sēhe yí de Salomón ni sāha vehe iī yā.

⁴⁸ Te vēsú súcuan ni cuu te Yaā cujéhn̄u téyí, tu ndéé yá maá vehe jeē casáha ñayuu, nájnūhun ni cahān tēe ni nacani jnūhun ya nde jenahán:

⁴⁹ Ni cahān yā:

Andiv̄i cúu nájnūhun mesa nuū ndácu ri jniñu

te ñayiv̄i cúu nájnūhun ñn nuū yítuu jehē rī. Núu súcuan ¿te ndese cuu sāha ró vehe jeē cóndee rī,

te ndese cuu sāha ró núu ndétātu rí?

⁵⁰ ¿A násūu máá rí ní sāha ndih̄i jeē iyó?

áchí máá Jítoho yō Yaā Dios.

⁵¹ Te cáhán gā Esteban:

Yōh̄yo cáacun̄h̄ni ni ní, te tu cácuni ní chusóhó ní, te cácuu ní nájnūhun ñayuu tācá nación jeē tu cájini i jnūhun ya ni tu cácandíje i ya. Chi níni cájesi ni núu Esp̄ritu Santo, te nájnūhun ni casáha jíi yō jenahán, suni súcuan casáha ní vijna.

⁵² ¿A ní iyo tēe nácani jnūhun ya nde jenahán jeē tu ní sāha ndevāha jíi yō jíin de? Chi jíi yō ni cajehni de tēe ni canacani jnūhun jeē quíji máá Yáa ndaā. Te je ni quíji Yaā ún, te máá ní ni canastúu ni yá nuū tēe ni cajehni de ya.

⁵³ Te vēsú nde jíin tāca ndajéhé yā ni jēhe ya ley yā nuū yō, te máá ní chi tu cásquicu ní, áchí Esteban.

Jeē ní cajehni de Esteban

⁵⁴ Tāca jnūhun yáha ní cajini sōho, te yōh̄yo ni caqūit̄i ni, te cánacayih̄i yuhu cájito nuū Esteban.

⁵⁵ Te máá Esteban chi ni cunuú Esp̄ritu Santo jíin de. Te ni jito de ichi ándiv̄i, te ni jini de jeē ndíndēe núu néne Yaā Dios, te índichi Jesús ichi ndávāha ya.

⁵⁶ Te ni cahān de:

Vijna te jito ri jeē núne andiv̄i, te jito ri nuū maá Yáa ní nduu tēe, índichi yā nuū cujéhn̄u ya lado váha Yaā Dios, áchí de.

⁵⁷ Yūcuán na te ni cajesi un sóho, te ni cacana cóhó, te inuú-ni ni candonda siqūi Esteban.

⁵⁸ Te ni caquenehen Esteban cuango jíin de nde yatā ñuū. Te tēe ni cacahān yaá un jíin ndih̄i jnāhan de ni cachucú de ticāchí de ndíto ñn tēe suchí nání Saulo, te ni cacani de yuū xin̄i Esteban.

⁵⁹ Te níni jéē cácani tāca tēe un yūu xin̄i de te ni jicān tahu de nuū yā:

Tátā Jesús jeē cúu ní Jítoho ná, naquihin ní ánuá na vijna, áchí de.

⁶⁰ Te ni jecuiñ̄i yit̄i de te ni cahān jee de: Tátā Yaā Dios, ma quēnehen ní cuéchi siqūi i jeē casáha i jíin ná, áchí de.

Súcuan ni cahān de te ni jih̄i-ni de.

Jeē ní jito xeēn Saulo ñayuu cácandíje

8

¹ Te Saulo, ni nujnahan ni de jeē ni jih̄i Esteban.

Te quiv̄i un ní caquejéé de cájito xeēn ndasí de ñayuu cácandíje Jesús ini ñuu Jerusalén, te jeē yúcuan cúu jeē ní cajitē núu ñayuu cácandíje cuango i ní Judea jíin ní Samaria. Te tēe apóstol chi tu ní cajitē núu de.

² Te sava tēe yíñuhún núu Yaā Dios, ni cachindūji de Esteban. Te yōh̄yo ni candahyū de jeē ni jih̄i Esteban.

³ Te Saulo chi jito xeēn de ñayuu cácandíje, te quiv̄i de ndijnahan vehe te jn̄i de tēe, ñahan, chúhun de i vecāa.

Jeē ní canacani i jnūhun Yaā Dios ndañúu Samaria

⁴ Te tācá ñuu nuū cuángoo tāca ñayuu ní cajitē núu un ní canacani i jnūhun ndese jnáma Yaā Dios ñayuu.

⁵ Te ni jinū Felipe ñn ñuu ndañúu Samaria, te nuū ñayuu yúcuan ní nacani de jnūhun Cristo, Yaā ní jeni Yaā Dios jeē jnáma ya yohó.

⁶ Te tāca ñayuu ní cacutútú un ní cajini nahín váha i tāca jnūhun ni nacani Felipe, te ni cajito i tācá jniñu jéhn̄u ni sāha de.

⁷ Chi cuehē ñayuu cándoho tach̄i ni canduvāha i, te cácana cóhó tách̄i un ní caque-ndacoo. Te cuehē ñayuu ni íjin jíin ñayuu ríngo ni canduvāha.

8 Te jeē yúcuán ní cacusī teyí ni ñayuu ñuu ún.

9 Te ini ñuu un néne ñn tēe nání Simón, te tēe tási cúu de. Te nde ná tu jinū Felipe ñuu Samaria, te yōhyo cánaa ni ñayuu ñuu un cájito i jeē sáha Simón, te ni stahú de i ni cahān de jeē ñn tēe cújéhnu téyí cúu máá de.

10 Te nde tēe cácujuhnu jíin ndivii cuiti ñayuu, cájetáhú ndasí i jnūhun cáhán de, te ni cajeni ni máá i te ni cacahān i:

Tēe yáha ní jēhe Yaā Dios cuehē poder nuū de, áchí i.

11 Te cájetáhú váha i jnūhun cáhán de, chi cuehē tiempo ni sáha de jniñu stáhú ní canaa ni i ni cajito i.

12 Te nuū ni jíin Felipe, ni nacani de jnūhun váha ndese ndácu Yaā Dios jniñu, jíin jnúhun Jesucristo, te ni cacandíje i te ni cajendute i, cúu tēe cúu ñahan.

13 Te suni máá Simón ni candíje de te ni jendute de, te ni jica cuu de jíin Felipe. Te ni naa ni de jíto de táca jniñu jéhnu jeē sáha Felipe jeē steén jeē cujéhnu Yaā Dios.

14 Te cáyūcu tēe apóstol ñuu Jerusalén, te ni canihīn de jnūhun jeē ñáyuu Samaria ni cacandíje i jnūhun Yaā Dios. Te ni catají de Pedro jíin Juan cuango de yūcuán.

15 Te ni jinūcoo de, te ni cajicān tahu de jehē ñáyuu un návāha na quívi Espiritu Santo ini anuá i jíinahan i.

16 Chi ná tu quívi ya ini anuá ni ñn i, chi máá-ni jeē ní cajendute i jeē ní cacandíje i jítoho yō Jesús.

17 Yūcuán na te Pedro jíin Juan ni casoó de ndaha de xinī i jíinahan i, te ni quívi Espiritu Santo ini anuá i.

18 Te ni jíto Simón jeē súcuán casoó apóstol ndaha de xinī ñáyuu ún te súcuán quívi Espiritu Santo ini anuá i, te cúní de cuāha de xūhun núu tēe apóstol návāha nihīn de poder un núu.

19 Chi ni cahān de:

Cúní na jēe cuāha ní poder yáha núu na, návāha núu ndé ñáyuu soó ná ndaha ná xíní i te quívi Espiritu Santo ini anuá i, áchí de.

20 Yūcuán na te ni cahān Pedro jíin de:

Na náā xūhun ró je jnahnū ndetū rō siquī jeē jéni ni rō jeē jíin xūhun te cuu cuan ró táhū jeē véji nuū Yaā Dios.

21 Ma nihīn tahu rō jeē sáha ró jniñu yáha, chi tu íyó ndáā anuá rō nuū Yaā Dios.

22 Núu súcuán te jíni ñúhún jēe stóo rō jnúhun jeē jéni néé ni rō súcuán te cahān ndahú ró jíin Yáā Dios, te máá yá sanaa te cone cáhnu ni yā siquī jeē jéni néé ni rō súcuán.

23 Chi jíin rī jeē cucuésún ni rō siquī jeē sáha ri jniñu yáha. Te táca jēe neé jéni ni rō ni cunuú un jíin ró, achí Pedro jíin de.

24 Yūcuán na te ni cahān Simón jíin de:

Cacān tahu ni jéhē na jíinahan ní núu máá jítoho yō návāha tú jnahnū ndetū na nájnūhun ni cahān ní, áchí de.

25 Te Pedro jíin Juan ni cacahān cají de ndese cácandíje de jnūhun Yaā Dios. Te jeē cuánungoo de ichi ñúu Jerusalén, te tíjini ndañúu Samaria ni canacani de jnūhun jeē jnáma ya ñayuu.

Felipe jíin tēe nación Etiopía

26 Yūcuán na te ni cahān ndajéhé maá jítoho yō jíin Felipe:

Quihin ichi te quihīn rō ichi sur, ichi jeē quenda Jerusalén cuahān nde ñuu Gaza, áchí yá.

Te ichi chúcuán chi máá ñuhun téhé cúu.

27 Te ni quihīn Felipe ichi cuahān de. Te nde nación Etiopía ni quiji ñn tēe eunuco jeē ndíso jniñu de cúu de tesorero nuū ñáhan cúu reina ndácu jniñu nación Etiopía, nání ña Candace. Tēe un ní quichiñúhún de Yaā Dios ñuu Jerusalén.

28 Te cuanuhun de néne de nuū carreta de, te cáhu de tutu jeē ní tee Isaías, tēe ni nacani jnūhun Yaā Dios nde jenahán.

29 Te máá Espiritu ni cahān yā jíin Felipe:

Cuáhán quíjnahan rō tēe cuahān jíin carreta un.

30 Te ni jejnahan Felipe carreta un, te ni jini sōho de jeē cáhu tēe ún tutu jeē ní tee Isaías. Te ni cajnūhún de tēe ún:

¿A jécūhun ni ni jnúhun jeē cáhu ní chí tuú? áchí de.

31 Te ni cahān maá tēe un jíin Felipe:

¿Te ndese jecūhun ni ná? Chi tú na tēe castūhun núu ná ndese cúu ún, áchí de.

Te ni cahān de jíin Felipe jeē na cáa de conēne ndúu de jíin de ini carreta.

32 Te jnūhun cáhu de tutu íi un cáhán suhva:

Nájnūhun lanchi jeē cuahán tī nuū cúu tī, súcuán ni casáha ñayuu jíin yá.

Te nájnūhun ñn londe quití sáte jéē tu ndáhyú tī, súcuan ní sáha ya, chi tú na vé ní cáhán cuití yā ná ní cajicān i cuēchi síquī yā.

³³ Te hora jeē ní cajēhe i jnūhun canu yā, tu ní cásáha ndaā i síquī yā jíin jnūhun ndaā, te ni cajehni i ya ini ñayīvi yáha. Te coo cuehē ñayuu candíje nuū yā jeē ma cánda ni ñn ñayuu cahu i ñayuu ún.

Achí.

³⁴ Yūcuán na te ni cahān tē Etiopía un:

Cava vāha ni ní cachi ni núū ná, ¿ndé síquī cahán tē ni nacani jnūhun yáha? ¿A síquī maá de chí síquī ñnga tē? achí de jíin Felipe.

³⁵ Yūcuán na te ni nacani Felipe jnūhun vāha Jesús nuū tēe ún, chi ni quejéē de ni castūhún de jnūhun jeē ní cahu tēe ún, jíin táca gá jnūhun jeē yosó núū tútu yā.

³⁶ Te níni cuángoo de ichi ún te ni jinūcoo de nuū ñūhun ndute, te ni cahān tē Etiopía: Yāha ñūhun ndute ¿te á tú cuu cuandute ná? achí de.

³⁷ Te ni cahān Felipe:

Cuu te núu cándíje ñhin ni ndé jíin ini jíin ánuá ni táca jéē ni sáha Jitoho yō Jesús jehē yō, achí de.

Te ni cahān tē Etiopía:

Cándíje ná jéē Jesucristo cúu maá Séhe Yaā Dios, achí de.

³⁸ Te ni sáha de jeē na jécuiñī carreta de, te ni nuu ndindúú de cuangoo de ichi véyí núū ñūhun ndute ún, te ni scuándute Felipe tē Etiopía.

³⁹ Te nuū ní quendacoo de nuū ndute, te Espiritu maá Jitoho yō ni sáha ya jeē ní ndoñūhún-ni Felipe. Te tē Etiopía vésú tuá ni jito de nuū Felipe, te cúsiñ ní de cuahān de.

⁴⁰ Te ni nane Felipe ñuu Azoto. Te nácani de jnūhun ndese jnáma ya ñayuu, cuahān de tǎcá ñuu nde ni jíin de Cesarea.

Jeē ní nasāma ini Saulo ni sáha Jesucristo (Hch. 22.6-16; 26.12-18)

9

¹ Te Saulo chi máni cáhán de jeē cáhni de táca ñayuu cácandíje i maá Jitoho yō, te jeē yūcuan ní jehēn de nuū sutú cujéhnu ga.

² Te ni jíicān de carta jeē cahán jeē quihin de tǎcá vehe ñi sinagoga ñuu Damasco te

cuhni de tē ñahan jeē cácandíje i Jesús, quiji de jíin i ñuu Jerusalén nuú.

³ Te ni quihin de ichi cuahān de. Te cuacuyajni de ñuu Damasco, te sanaa-ni te ichi ándiví ní stíndēē ñn luz nuū de.

⁴ Te ni cotúú-ni de nuū ñūhun, te ni jini sōho de ñn jnūhun cáhán jíin de:

Saulo, Saulo, ¿najehē jito xeēn rō ruhū? achí.

⁵ Te ni cahān maá de:

¿Na nihín cúu jeē cahán, Tátā?

Te ni cahān yā jíin de:

Máa rí cúu Jesús, te jeē jito xeēn rō ñayuu cácandíje i ruhū cúu jeē jito xeēn rō ruhū. Te jeē sáha ró súcuan cúu nájnūhun síquī jeē tu jéndíje ti te jéñú yatá tí xiní pulla, te súcuan stóho ti maá tí, achí yá.

⁶ Te máa de chi quísi i de jeē yūhú de, te ni cahān de:

Tátā, ¿na vé cuní ni jéē sáha ná núu súcuan? achí de.

Te ni cahān maá Jitoho yō jíin de:

Ndocuiñī, quívi ró ini ñuu, te yūcuan íyó ñn tē jeē cachi nuū rō na vé cúu jeē cánuú sáha ró, achí yá.

⁷ Te tē cuangoo jíin Saulo, ni canaa ndasí ni de cájini sōho de ndusu jeē cahán, te tu ní cájito cuití de nuū jeē cahán un.

⁸ Yūcuán na te ni ndocuiñī Saulo. Te ni nducú de coto de, te tuá cúu coto de, te ni cajniñ tēe ún ndaha de ni jinūcoo jíin de nde ini ñuu Damasco.

⁹ Te yūcuan ní condee de uní quívi. Te tu ní cúu cuití coto de, ni tú na vé ni yéji de, ni tú na vé ni jíhi de.

¹⁰ Te ñuu Damasco néne ñn tēe cándíje, nání de Ananías. Te máa Jitoho yō ni steén ndijin ya maá yá nuū de te ni cahān yā jíin de:

Ananías, achí yá.

Te máa de ni cahān de jíin yá:

Naun ní sáña, Tátā, achí de.

¹¹ Te ni cahān maá Jitoho yō jíin de:

Quihin ichi te quihin rō calle jeē naní Calle Derecha, te vehe Judas cajnūhun ró ñn tēe nání Saulo ñuu Tarso, chi jíicān tahu de.

¹² Te nájnūhun ni jito ndijin de jeē maá ró, Ananías, ni jinū rō, te ni soó ró ndaha ró xini de, te ni nanune tinūú de, achí yá.

¹³ Yūcuán na te ni cahān Ananías:

Tátā, cuehē ñayuu cácahān jeē tēe yúcuan yōhyo jíto xeēn de ñayuu cácaandíje i níhín ñuu Jerusalén.

14 Te vijna ni quee de yāhá, chi sutū cácujeñnu ni catejníñu de vēji de jñi de tāca ñáyuu cácahān ndahú i jíin ní, áchí de.

15 Te ni cahān maá Jítóho yō jíin de:

Cuáhán, chi máá rí ni nacāji tēe un jéē quihīn de nacani de jñuhun rí nuū tāca ñáyuu nación Israel jíin núū ñáyuu tāca gá nación nde jíin núū tāca rey.

16 Chi stéén rī nuū de jeē cánuú ndoho de cuehē jñūndóho jeē siquī rī, áchí yá.

17 Yūcuán na te cuahān Ananías. Te ni quivī de ini vehe nuū néne Saulo, te ni soó de ndaha de xinī Saulo, te ni cahān de:

Hermano Saulo, máá Jítóho yō Jesús, Yaā ní quenda ndijin nuū ní ichi jeē véji ní, ni tají yá sãña véji ná núū ni návāha na nánune tinūu ní, te návāha na cúnuú Espíritu Santo yā jíin ní, áchí de.

18 Te ni nanune-ni tinūu Saulo, chi ni nungoo-ni nájnūhun soó chácá ní condihyū tinūú de ún. Te ni ndocuiñī de ni jendute de.

19 Yūcuán na te ni nacāji de staā, te ni nanihīn ni de. Te ni condee de jecu quivī jíin tēe cácaandíje jeē cáyūcú ini ñuu Damasco.

Jeē ní nacani Saulo jñuhun ini ñuu Damasco

20 Te ni quejéé-ni de nacani de jñuhun Jesús ini tācá vehe iī sinagoga, áchí de jeē Jesús cúu Sēhe Yaā Dios.

21 Te tāca ñáyuu ni cajini sōho jñuhun cáhán de ni canaa ni i, te ni cacahān i:

¿A násūu tēe yáha cúu jeē yóhyo jíto xeēn de tāca ñáyuu Jerusalén jeē cájicān tahu nuū Jesús? Te siquī yúcuan ní quee de yáha jéē cúhni de ñayuu cácaandíje, te quihīn de jíin i nuū sutú cácujeñnu núú, áchí i.

22 Te víhyá gā ni nacani Saulo jñuhun ya, te ni steén cají de jeē Jesús cúu Cristo, Yaā ní jeni Yaā Dios jeē jnáma ya yohó. Te tēe hebreo jeē cáyūcú ñuu Damasco, tu ní cánihīn de modo cahān de jeē tu íyó ndāā jeē cahán Saulo.

Jeē ni cácu Saulo nuū jnáhan de hebreo

23 Te ni yáha cuehē quivī. Te jnáhan de hebreo ni casquijnáhan jñuhun de jeē cáhni de Saulo.

24 Te ni nihīn Saulo jñuhun jeē cándito de nduú ñuú tāca yéhyí pared jeē ní condúu ndihyú ñuu ún.

25 Yūcuán na te ñin jecuāā te tēe cácaandíje ni caquihin de Saulo, te ini ñin jīca cáhnu ni cascúun de Saulo jicā pared ún, te súcuan ni cácu de.

Jeē ní najinū Saulo ñuu Jerusalén

26 Te nuū ní najinū de ñuu Jerusalén, te cúní de najnáhan de jíin tēe cácaandíje. Te ni cayūhu tēe un ní cajito de Saulo, chi tu ní cácaandíje de jeē ní nduu Saulo tēe cándíje nuū Jesús.

27 Te Bernabé cuahān de jíin Saulo nuū cáyūcu tēe apóstol, te ni nacani de jñuhun nuū tēe ún ndese ni jini Saulo nuū maá Jítóho yō ichi nuū cuahān de, jíin jéē ni cáhān yā jíin de, jíin jéē jéñnu-ni ni nacani de jñuhun Jesús ini ñuu Damasco.

28 Te ni condee Saulo ñuu Jerusalén ni jica de jíin tāca tēe apóstol.

29 Te jéñnu-ni ni nacani de jñuhun máá Jítóho yō. Te jnáhan ñuu de hebreo jeē cácahān yuhu griego, ni castáhān jnáhan jíin de, te máá tēe un cácu ni de cahni de Saulo.

30 Te ni cajini tācá hermano cácaandíje, te ni cajendēca de Saulo nde ñuu Cesarea. Te yúcuan ní canatají de Saulo cuanuhun de nde ñuu de Tarso.

31 Te ñayuu cácaandíje Jesús jeē cáyūcú Judea jíin Galilea jíin Samaria, tuá ni cájito xeēn ñayuu i. Te ni ije ga i jíin jñuhun ya, te cándiso iyo i nuū maá Jítóho yō. Te Espíritu Santo ni chindéé ñáhán yá i te ni nducuehē gā i.

Jeē ní nduvāha Eneas

32 Te tāca lado jécondēhe Pedro ñayuu cácaandíje, te suni ni jecondēhé de ñayuu cácaandíje cáyūcú ñuu Lida.

33 Te yúcuan ní jini de nuū ñin tēe nání Eneas jeē ní cuu unā cuiyā cáa de chi ni ijin de.

34 Te ni cahān Pedro jíin de:

Eneas, Jesucristo cúu Yaā nasávāha ya rohó. Ndocuiñī te natuu rō yuu ró, áchí de.

Te ni ndocuiñī-ni tēe ún.

35 Te tāca ñáyuu cáyūcú ñuu Lida jíin ndúhvā Sarón ni cajito i jeē ní nacaca Eneas, te ni casquéndōo i tāca jñuhun jeē tu íyó ndāā te ni cacandíje i máá Jítóho yō.

Jeē ní natecu Dorcas

³⁶ Te nde ñuu Jope ni ñyo ñn ñahan cándíje, nání ña Tabita, te nuū yúhu griego nání ña Dorcas. Te ñahan yáha máni jniñu váha ni sáha ña, te ni sáha ña caridad ni chindéé ñáhán ña ñayuu cúmanī nuū.

³⁷ Te tiempo yúcuán ní quejéé cuéhyī jín ña, te ni jihī ña. Te ni cascúchi i ndíyī ún, te ni cajequin i ndíyī un ndé ini cuarto xinī véhe.

³⁸ Te yajni íne ñuu Lida jín ñuu Jope, te tēe cándíje ñuu Jope ni cajini jñūhun de jeē néne Pedro ñuu Lida, te ni catajī de uū tēe cuacana de Pedro, te ni cacahān de:

Ma cucuéé ní na quíhín yachī yō ñuu Jope, achí de.

³⁹ Yūcuán na te ni quihin Pedro ichi cuahān de jín tēe ún. Te nuū ni jínū de, te ni cacao tēe un jín de nde xinī véhe nuū catú ndíyī ún. Te tācá ñahan viuda ni candicó ndúū ña de cándahyū ña, te cástéén ña tācá sahma jín tícāchi jēé ni sáha Dorcas te ni saja ña nde na técu ña.

⁴⁰ Yūcuán na te ni ndacu Pedro jniñu jeē na quéndacoo ndíhi ñayuu ún quingoo i nde yatā véhe. Te ni jecuiñī yití de ni jicān tahu de, te ni nandió cóto de nuū catú ndíyī ún, te ni cahān de:

Tabita, ndocuiñī ní, áchí de.

Te máá ña ni ndacoto-ni ña te ni jito ña nuū Pedro, te ni nucōo-ni ña.

⁴¹ Te ni jñi de ndaha ña, te ni ndonehen de ña. Yūcuán na te ni nacana de xinī ñáyuu cándíje nde jín ñahan viuda ni ndívicoo i, te ni steén de ña nuū i jeē ní natecu ña.

⁴² Te ni jitē jñūhun jniñu yáha ní ñuu Jope cuahān, te cuehē ñayuu ni cacandíje i jñūhun máá Jítoho yō.

⁴³ Te cuehē quivī ni ndōo Pedro ini ñuu Jope, néne de vehe ñn tēe sáha curtir ññ, nání de Simón.

Pedro jín Cornelio

10

¹ Te ini ñuu Cesarea ni ñyo ñn tēe nání Cornelio, ni cuu de capitán grupo soldado jeē naní Italiano.

² Te cúu de tēe ndíso ñyo nuū Yaā Dios nde jín ndíhi ñayuu vehe de, te yōhyo caridad ni

tēe cúu de, chi jéhe de xūhun núū ñáyuu hebreo cándoho ndáhú, vēsú nasūu tēe hebreo cúu de. Te níní jicān tahu de nuū Yaā Dios.

³ Te ñn quivī ni steén ndijin yā nuū tēe yáha nájnūhun cahunī jehíni, te ni jito de jeē ñn ndajéhé maá Yáā Dios ni quivī ya nuū néne de. Te ni cahān yā jín de:

Cornelio, achí yá.

⁴ Te máá de ni ndacoto vāha de nuū yā, te ni yūhú de. Te ni cahān de:

¿Na vé cuní ni, Tátā? achí de.

Te ni cahān yā jín de:

Je chíhi Yaā Dios cuenta jeē jicān tahu rō jín jēé sáha ró caridad.

⁵ Vijna te tají ró jecu tēe na quíngoo de nde ñuu Jope, quicana de Simón jeē suni nání de Pedro, na quíji de.

⁶ Chi néne núu de vehe tocayo de Simón, tēe sáha curtir ññ, te ndéé vehe ún yajni yumar. Te máá de castūhun núū rō na vé cúu inga jeē cánuú sáhá ró, áchí ndajéhé yā.

⁷ Te ndajéhé yā jeē ni cahān jín Cornelio, cuahān-ni ya. Te ni cana de uū mozo de jín ñn soldado jeē yñūhún núū Yaā Dios, chi cúcáhnū ni de jeē squícu vāha tēe ún.

⁸ Te ni nacani ndíhi de jñūhun nuū tāca tēe ún, te ni tají de cuangoo nde ñuu Jope.

⁹ Te inga quivī un cájica de ichi cuangoo de, te cuacuyajni de ñuu Jope. Te je yajni cahuxī uū cúu, te suu hora un ní caa Pedro siquī véhe chí cándaā, te yūcuán cácn tahu de.

¹⁰ Te ni quee sōco chíji de, te ni cuni de caji de staā. Te sáá cásáha ña ndeyu te ni steén ndijin yā nuū de.

¹¹ Te ni jito de jeē núne andiví. Te ni jito de nájnūhun ñn sahma manta jité cáhnū te núhni jñáhan ndicúún punta, te ni cuun vēji nuū de.

¹² Te chíji un cáñūhun ndinuū quití, tācá quití cúún ndaha jín táca cóo jín táca quití cándava.

¹³ Te ni jini sōho de ñn jñūhun ni cahān: Pedro, ndocuiñī te cahni rō tācá quití jñā, te caji rō tí, áchí.

¹⁴ Te ni cahān Pedro:

Ma cáji na, Tátā, chí tu yéji cuiñi na táca quití jeē cahán ley ni jēé tú vāha caji na tí, chí nájnūhun jeē tu cáhīyo ndoo tí nuū ní, áchí de.

¹⁵ Te ni cahān tucu jñūhun un jín de:

Achí rí jeē iyó váha caji rō tācá quiti jīñā, chí ni sándoo rí, te ma cahán maá ró jeē tu cáhīyo ndoo ti, áchí. Te súcuan ni steén caji yá nuū de jeē cúu quihín de nuū ñáyuu vēsú násūu jnáhan ñuu de hebreo cúu.

16 Te unī jínu ni cahán súcuan jíin de. Te sahma un ní ndaa cuanuhun andiví.

17 Te níni nácani ndasí ni Pedro na vé cuní cahán jeē ní jito ndijin de ún, te ni jinūcoo-ni tēe ni tají Cornelio, cácajnūhún de vehe Simón nde ni jinūcoo de yéhyí tēe ún.

18 Te cácahán jee de cácajnūhún de núu yūcuan ndéé Simón jeē suni nání de Pedro.

19 Te níni nácani ga ni Pedro siquī jeē ní jito ndijin de ún, te Espíritu Santo ni cahán yā jíin de:

Ni quecoo unī tēe cánanducú róhó.

20 Ndocuñī te nanuu ró, te ma cáni ni rō jeē tú váha quihín rō jíin de, vēsú násūu jnáhan ñuu rō hebreo cácuu de, chí máá rí ni tají rí de vėjicoo de, áchí yá.

21 Yūcuán na te ni nanuu Pedro nuū tēe ni tají Cornelio, te ni cahán de:

Máá ná cúu tēe cánanducú ní. ¿Te na siquī vėjicoo ní núu na núu súcuan? áchí de.

22 Te ni cacahán mozo un:

Cornelio, tēe cúu capitán, ni tají de sãñá. Te tēe ndaã, tēe ndíso İyo nuū Yaã Dios cúu de, te tāca ñáyuu hebreo suni cácahán i jeē tēe váha cúu de. Te ni cahán ñn ndajéhé yā jíin de jeē na cána de níhín jéé ní vehe de te chusóhó de jnūhun cahán ni jíin de.

23 Yūcuán na te ni cahán Pedro jíin mozo un jéé na cúcōo de ini vehe ún, te ni candōo de yūcuán. Te nuū ní cundijin, te ni quihín Pedro ichi cuahán de jíin mozo un. Te suni cuangoo jecu hermano cácañdije ñuu Jope jíin de.

24 Te nde inga quivī ni jinūcoo de ñuu Cesarea. Te Cornelio ndétu de jinūcoo Pedro, chí ni nastútú de tāca jnáhan de jíin táca amigo de jeē quijnáhan váha ga de jíin.

25 Te nuū ni jínū Pedro jijnáhan de, te ni quenda Cornelio ni cahán de jíin Pedro, te ni jecuiñī yití de jeē chiñúhún de Pedro nuú.

26 Te Pedro ni ndonehen de Cornelio, te ni cahán de:

Ndocuñī ní, chí sãñá suni ñn tēe-ni cúu ná, áchí de.

27 Te cándajnūhún de ni quivīcoo de ini vehe. Te ni jito Pedro jeē cáyūcu cuéhē ñayuu ini vehe de.

28 Te ni cahán Pedro jíin ñáyuu ún:

Je cájini váha ni jijnáhan ní jéé ley jeē cáneváha sãña ñáyuu hebreo, cáhán jeē tú váha jeē quijnáhan ná jíin ní quivīcoo ná vehe ní siquī jeē cúu ní ñáyuu sñn nación. Te Yaã Dios chí ni steén yā nuū na jéé ma cujéé ni na núu ní ñn ñayuu.

29 Jeē yūcuan cúu jeē vėjī-ni ná, chí ni cana ní sãña, te tu ní sájéé ni ná. Te na cájnūhun ná nihín, ¿na siquī ni cana ní sãña? áchí Pedro.

30 Yūcuán na te ni cahán Cornelio:

Vijna iyó cúun quivī nájñūhun máá hora yáha jéé cúu cahunī jehíni, te ndite ni ná chí súcuan chíñúhún ná nuū yā, te jícán tahu na ini vehe ná. Te ni quiji ñn ndajéhé yā nuū ná, te ndíndéé sahma ñúhun ya.

31 Te ni cahán yā jíin ná: Cornelio, je ni jini sōho Yaã Dios jeē jícán tahu rō, te chíhi ya cuenta jeē sáha ró caridad.

32 Núu súcuan te tají ró mozo na quíngoo de ñuu Jope quicana de Simón jeē suni nání de Pedro, na quiji de nuū rō. Chí tēe un néne de vehe tocayo de Simón, tēe sáha curtir ññ, te yajni yumar ndeé vehe de. Te quee tēe ún te castūhún de nuū rō jñūhun cánuú, áchí yā jíin ná.

33 Súcuan ni cuu te ni tají-ni ná mozo na cuajēcoo de cana de níhín, te na cútahū ná, chí váha ni sáha ní jéé véji ní. Te vijna ni candutútú ná yáha náváha tāca ná cuni sōho ná ndíhi jñūhun Jitoho yō Yaã Dios jeē ni jéhe ya cahán ní, áchí de.

Jeē ní nacani Pedro jñūhun ya vehe Cornelio

34 Yūcuán na te ni cahán Pedro:

Vijna te ni jini váha ná jéé Yaã Dios ñnuú-ni sáha ya jíin táca ñáyuu, cúu ñayuu hebreo jíin ñáyuu tāca gá nación.

35 Chí cúsiñ ní yā jíin ñáyuu tācá-ni nación núu cándīso İyo i nuū ya te cásáha i jñiñū ndaã.

36 Chí ni cahán yā jíin ñáyuu Israel jeē ndívicoo tāca ñáyuu nuū jñūhun manī yā jíin i sáha Jesucristo. Te máá yá cúu Jitoho tāca yóhó.

³⁷ Máá ní je cájini ní ndese ni cuu. Chi ná ni jīnu ni nacani Juan jnūhun jíin jēē ni scuándute de ñayuu, te ni quejéé Jesús nácani ya jnūhun nde Galilea, te ni jitē jnūhun un ní cáhnu Judea.

³⁸ Te cájini ni jēē Yaā Dios ni jēhe ya Espíritu Santo jíin poder nuū Jesús, Yaā ní jehnu ñuu Nazaret. Te cájini ni jēē ní jica cuu ya ni sáha ya jniñu vāha, te ni nasávāha ya tāca ñáyuu jeē cándoho i sáha jexeén, chi Yaā Dios ni chindéé ñáhán yá Jesús.

³⁹ Chi máá ná cánacani cájí ná jnūhun tācá jniñu ní cajito ná ní sáha ya ní cáhnu Judea jíin ini ñuu Jerusalén. Yūcuán na te ni cajehni i ya, chi ni cata caa i ya jicā cruz.

⁴⁰ Te Yaā Dios ni nastécu yā maá Jesús nuū uní quiví, te ni ndiji ya nuū na ní cajito ná núu yā ni sáha Yaā Dios.

⁴¹ Te tu ní quíji ya nuū tācá inga ñayuu, chi nuū maá-ni tāca ná jeē jé ni nacāji Yaā Dios sãña jēē nácani ná jnūhun tācá jniñu jeē ní cajito ná. Chi ni cayejí na stāa ni cajihí ná ndute jíin yá ná ni nane ya jeē ní natecu yā.

⁴² Te ni ndacu ya jniñu nuū na jíjnáhan ná jēē na nácani ná jnūhun ya nuū tāca ñáyuu te cahān cají ná jeē maá Yaā Dios ni jeni ya Jesús jeē sándaā yā jniñu ñayuu cátecu jíin ñáyuu ní cajihí.

⁴³ Chi jnūhun Jesús cúu jeē ní cacahān tāca téē ni canacani jnūhun Yaā Dios nde jenahán. Chi ni cacahān de jeē tāca ñáyuu jeē candíje i Jesús, cone cáhnu ni yā nuū cuéchi i, áchí Pedro.

Jeē ni quiví Espíritu Santo ini anuá ñayuu jeē násūu hebreo cácuu

⁴⁴ Te níni cáhán gā Pedro tāca jnūhun yáha te ni quiví-ni Espíritu Santo ini anuá tāca ñáyuu cájini nahín jnūhun ya jeē cahán de.

⁴⁵ Te tēe hebreo jeē ni jínūcoo jíin Pedro jeē suni cácadíje de Jesús, nahán ní canaa ni de ni cajito de jeē suni ni quiví Espíritu Santo ini anuá ñayuu jeē násūu hebreo cácuu.

⁴⁶ Chi ni cajini sōho de cácahān ñayuu un sīn yuhu, te cácahān i jeē yōhoyo cújehnu Yaā Dios.

⁴⁷ Yūcuán na te ni cahān Pedro:

¿Ndé ñin casi jeē ma cuándute ñayuu yáha? Chi ni quiví Espíritu Santo ini anuá maá i,

nájñūhun ni quiví ya ini anuá maá yó, áchí de.

⁴⁸ Te ni cahān de jíin i jeē na cuándute i siquí jeē ní cacandíje i Jesucristo. Yūcuán na te ni cacahān ndahú i jíin Pedro jeē na quéndōo de jecu quiví jíin i.

Jeē ní nacuāha Pedro cuenta nuū ñáyuu cácadíje ini ñuu Jerusalén

11

¹ Te tēe apóstol jíin tāca hermano cáyūcú Judea, ni canihín de jnūhun jeē súni ñayuu sīn nación ni cacandíje i jnūhun Yaā Dios.

² Te cuanuhun Pedro ñuu Jerusalén. Te sava tēe hebreo jeē cácadíje de ya ni cacahān de nuū Pedro:

³ ¿Najehē ni condee ní vehe ñayuu jeē násūu ñáyuu nación yō cúu? Te ni yeji ni jíin i, áchí.

⁴ Yūcuán na te ni nacani cájí Pedro jnūhun nuū téē ún ndihí ndese ni cuu siquí téē sīn nación:

⁵ Néne ná ñuu Jope. Te níni jícán tahu ná, te ni steén ndijín yā nuū ná, te ni jito ná nájñūhun ñin sahma manta jité cáhnu jeē nuhní jnáhan ndicúún punta, te nde ichi ándiví ní cuun ni quíji nuū ná.

⁶ Te ni jito vāha ná, te ni jini na jēē chíji un cáñūhun quiti cúún ndaha jíin quiti xéén jíin cóo jíin quiti cándava.

⁷ Te ni jini sōho ná ñin jnūhun ni cahān jíin ná: Pedro, ndocuiñí te cahni rō tācá quiti jíin, te caji rō tí, áchí jíni ná.

⁸ Te ni cahān ná: Ma cáji na, Tátā, chi tu yéji cuiti na tāca quiti jeē cahán ley ni jēē tu cáhīyo ndoo tí nuū ní, áchí ná.

⁹ Yūcuán na te jnūhun jeē véji nde andiví ní cahān tucu jíin ná: Ni sándoo máá rí tí, te ma cahán gā rō jeē tu cáhīyo ndoo tí, áchí jíni ná.

¹⁰ Te uní jínu ni cahān súcuan. Yūcuán na te ni ndaa sahma un cuánuhun andiví.

¹¹ Te hora un ní jínūcoo uní tēe vehe nuū ni cóndee ná un, cánanducú de sãñá, te ñin jnáhan ñuu de Cesarea ni tají de vējicoo de.

¹² Te máá Espíritu ni cahān yā jíin ná jeē ma cáni ni na jēē tú vāha quihín na jíin de. Te suni iñū hermano yáha ní jengoo jíin ná, te ni quivícoo ná ini vehe tēe nání Cornelio.

¹³ Te tēe un ní nacani de jnūhun nuū na jíjnáhan ná jēē ní jito de ñin ndajéhé Yaā

Dios, índichi yā ini vehe de, te ni cahān yā jíin de: Tají ró jecu tēe na quíngoo de ñuu Joje, quicana de Simón jeē suni nání de Pedro, na quíji de.

¹⁴ Te tēe ún cachi de nuū rō ndese jnama Yaā Dios rohó jíin ndihí ñayuu cáyūcú vehe ró, áchí yá. Achí Cornelio jíin ná.

¹⁵ Te nuū ní quejéé ná cahán na, te ni quívi-ni Espíritu Santo ini anuá i jíináhan i, nájnūhun ni quívi ya ini anuá maá yó xihna gā.

¹⁶ Yūcuán na te ni nucūhun ni na jnūhun ni cahān maá Jítoho yō: Jendaá jeē maá ndute-ni ni scuándute Juan ñayuu. Te róhó jíináhan ró chí nájnūhun cuandute ró jíin Espíritu Santo, cúu jeē cóndee yā ini anuá rō, achí yá.

¹⁷ Te suni ni jēhe Yaā Dios Espíritu yā nuū maá i nájnūhun ni jēhe ya nuū maá yó jeē cácandíje yó Jítoho yō Jesucristo. Núu súcuan ¿te ndé ñn cúu ná jéé cási ná jniñu jeē sáha Yaā Dios? áchí Pedro.

¹⁸ Súcuan ni cajini sōho de jnūhun yáha, te tuá ni cácahān de nuū Pedro, chí sa suhva ni cacahān de jeē yóhyo cújéhnua Yaā Dios. Te ni cacahān de:

Suni ni jēhe Yaā Dios jnūhun jeē na nácani ni ñayuu tāca gá nación jeē stóo i cuēchi i návāha cotecu i ñí cáni núu súcuan, áchí de.

Ñayuu cácandíje ini ñuu Antioquía

¹⁹ Te quívi ní cajehni de Esteban ni quejéé de cájito xeēn de ñayuu cácandíje, te jeē yúcuan ní cajitē núu ñayuu un tāca ñuu cuango i, te ni jinūcoo i Fenicia jíin Chipre jíin ñuu Antioquía. Te ni canacani i jnūhun vāha ya nuū máni jnáhan hebreo i jeē cáyūcu yúcuan, te tu ní cácanani i jnūhun ya nuū ínga ñayuu.

²⁰ Te jecu tēe cácandíje jeē cáyūcu Chipre jíin ñuu Cirene ni jinūcoo de ñuu Antioquía, te suni nuū ñáyuu táca nación jeē tu cájini i jnūhun ya ni canacani de jnūhun máa Jítoho yō Jesús jeē jnama ya i.

²¹ Te máa Jítoho yō ni chindéé ñáhán yá de, te cuehē ñayuu ni castóo i jniñu jeē tu íyó ndáa te ni cacandíje i máa Jítoho yō.

²² Te ñayuu cácandíje ini ñuu Jerusalén ni cajini jnūhun i, te ni catajái i Bernabé cuahān de nde ñuu Antioquía.

²³ Te nuū ni jíinū Bernabé yūcuán, te ni jini de jeē yóhyo vāha ni sáha Yaā Dios jíin i, te ni cusí ndasí ni de. Te ni stihví ni de tāca ñáyuu un jéé jíin ini jíin ánuá i na cóndihví ni i squícu vāha i nuū maá Jítoho yō, te ma náyūhú i.

²⁴ Chi tēe vāha cúu Bernabé, te ni cunuú Espíritu Santo jíin de, te cándíje ñihin de. Te ni cacandíje cuehē ñayuu nuū maá Jítoho yō ni sáha de.

²⁵ Yūcuán na te cuahān de nde ñuu Tarso cuananducú de Saulo. Te ni nanihín jnáhan de jíin Saulo, te ndéca de tēe un ní ndee de ñuu Antioquía.

²⁶ Te ñí ñn cuiyā ni candutútú de jíin ñáyuu cácandíje yūcuán, te ni castéén de jnūhun ya nuū cuehē ñayuu. Te ñuu Antioquía cúu nuū xihna ñúhún gá ni caconaní ñayuu cristiano siquí jeē ní cacandíje i Cristo.

²⁷ Te suni tiempo un ní quendacoo tēe cácanani jnūhun Yaā Dios ñuu Jerusalén cuango de nde ñuu Antioquía.

²⁸ Te ñn jnáhan de jeē naní Agabo ni ndocuiñí nuū hermano cácandíje. Te ni steén Espíritu Santo nuū de, te ni castūhún de jeē cóo ñn jnamā xeēn ñí cáhnu. Te ni cuu jnamā ún ñn parte tiempo jeē ní ndacu Claudio jniñu jeē ní cuu de rey.

²⁹ Yūcuán na te ni candajnūhun tée cácandíje ñuu Antioquía jeē cuáha ñn ñn de nasaa canda de cuáha de te tají de quihín cotecu hermano cáyūcú Judea.

³⁰ Te súcuan ni casáha de. Te ni catajái de Bernabé jíin Saulo ni cajendéca de nuū tée jéhnua cándiso jniñu nuū ñáyuu cácandíje cáyūcú Judea.

Jeē ní jehni Herodes Jacobo, te ni chune de Pedro vecāa

12

¹ Te suu tiempo un ní quejéé rey Herodes jíto xeēn de sava ñayuu cácandíje.

² Te ni ndacu de jniñu jeē jíin espada na cáhni i Jacobo ñani Juan.

³ Te ni jini de jeē ní cacusí ni tēe hebreo jeē ni sáha de súcuan, te jeē yúcuan suni ni jniñ de Pedro. Te máa quívi un ní cuu vico jeē yéji ñayuu pan jeē tu yíhi levadura.

⁴ Te nuū ní jniñ de Pedro, te ni chune de vecāa, te ni jeni de cuñ grupo soldado jeē

cóndito Pedro, cuūn cuūn soldado cúu jeē ñin ñin grupo. Chi cúni Herodes jeē na yáha vico un jéē cúu vico pascua te quenehen de Pedro vecāa un stéén de nuū ñáyuu cuehē.

⁵ Te súcuan íne Pedro vecāa, te cándito soldado un de. Te ñáyuu cácadíje chi ñihin ni cajicān tahú i jehē Pedro nuū Yaā Dios jeē na cácu de.

Jeē ní quenehen Yaā Dios Pedro vecāa

⁶ Te jéni ni Herodes jeē na cúndijin inga quivī te quenehen de Pedro vecāa, te stéén de nuū ñáyuu un núú. Te núhni Pedro jíin úu cadena, catú de quixí de mēhñu úu soldado jecuāā ún, te suni cáhīn ga soldado cándito yéhyí vecāa ún.

⁷ Te suu jecuāā ún te sanaa-ni te ni jinū ñin ndajéhé maá Jítóho yō, te ni ndindēé ini vecāa. Te ni squíhi ya Pedro, te ni natahū ni de. Te ni cahān yā:

Yachī ndocuiñī rō, achí yá.

Te cadena nuhni ndaha de un ní canandajī-ni.

⁸ Te ni cahān ndajéhé yā jíin de:

Nacuhni ñihin chíji ró, te nuquíhi ró ndíjēn rō, achí yá.

Te súcuan ni sáha de. Te ni cahān tucu ndajéhé yā jíin de:

Condii ticāchi ró, te condiquīn rō ruhū na quíhīn yō, achí yá.

⁹ Te ni quenda de ndíquin de ya cuahān de jíin yá, te jéni ni de jeē násūu jéndaá cúu jeē sáha ndajéhé yā jíin de, chi jéni ni de jeē ñin jeē ni stéén yā jíto ndijin de cúu.

¹⁰ Te ni yáha ya jíin de uū nuū cándito soldado. Te ni jinū yā jíin de yéhyí cáa nuū quénda de caca de calle, te yéhyí un ní nune ñi-ni maá. Te ni quenda ya jíin de, te ni yáha de ñin calle cuahān de. Yūcuán na te ni cujiyo-ni ndajéhé yā nuū de cuahān yā.

¹¹ Te ni nducájī ni Pedro te ni cahān maá ní cahān ñin de:

Vijna te ni jini ndaā rī jeē ní tají maá Jítóho rī ndajéhé yā ni quiji, te ni jnama ya ruhū nuū Herodes jíin núu tāca ñáyuu hebreo jeē cácuni i sáha xeēn i jíin rí nuú, achí de.

¹² Te nuū ní jini de jeē ni cácu ndije de, te ni quihin de ichi cuahān de vehe María naná Juan jeē suni nání de Marcos. Te

yūcuan cáhīn tútú cuehē ñáyuu cájicān tahú i jehē Pedro.

¹³ Te cáhān Pedro ni jinū de yéhyí fuera, te ñin sūchi síhí nání Rode cuahān i jeē cúni i núu ndé ñin cúu jeē cahán.

¹⁴ Te ni nacuni i tachī Pedro, te jeē ní cusī ni i te tu ní núne i yéhyí un, chi ni nandió cóo i te jínu i ni ndīvi i ini cuarto. Te ni castūhún i jeē ní quee Pedro índichi de yéhyí fuera.

¹⁵ Te ni cacahān jíin i:

Jeē cahán neé ró, achí.

Te maá i ñihin cáhān i jeē maá de cúu. Yūcuán na te ni cacahān:

Ndajéhé yā jeē ndíto Pedro cúu núu súcuan, achí.

¹⁶ Te víhyá gā cahán Pedro. Yūcuán na te ni canune i yéhyí, te ni canacuni i nuū de, te nahán ní canaa ni i cájito i.

¹⁷ Te maá de ni sáha de ndaha de jeē ma cúvaā gā i, te ni castūhún de ndese ni quenehen maá Jítóho yō de vecāa. Te ni cahān de:

Castūhun núu Jacobo jíin núu tāca gá hermano jeē ní quenehen ya ruhū vecāa, achí de.

Te ni quenda de cuahān de inga lugar.

¹⁸ Te nuū ní cundijin, te ni cacuvaā teyí soldado jeē tuá Pedro.

¹⁹ Te ni ndacu Herodes jniñu jeē na nánducú váha i Pedro. Te tu ní cánanihīn i de, te nuū ní cuu ni stichí de soldado jíjnāhan, te ni ndacu de jniñu jeē na cúu. Yūcuán na te ni quenda Herodes Judea cuahān de ñuu Cesarea, te ni condee de yūcuán.

Jeē ni jhī Herodes

²⁰ Te yōhyo ni quitī ni rey Herodes nuū ñáyuu ñuu Tiro jíin ñuu Sidón. Te ñáyuu un ní candajnūhún i jeē ñnuú-ni quivīcoo ndihi i nuū rey un. Te ni casáha i amigo i jíin Blasto, tēe cújēhnu jéjniñu nuū rey un. Te ni cacahān ndahú i jíin de jeē na cáhān ndahú de jíin rey un jéē na ndéē ni de jíin i. Chi nde ñuu maá rey un cájeen i jeē cáyeji i.

²¹ Te ni jeni Herodes ñin quivī. Te ni nucūhun de sahna yíñúhún de, te ni cucōo de mesa nuū ndácu de jniñu, te ni cahān de ñin jnūhun jehū ni cajini sōho i.

²² Te ñáyuu un ní caquejéé i cacahān jee i jnūhun yíñúhún jíin de:

Nasūu tēe-ni cúu ní, chí ñn yaā cúu ní, áchí i jíjnáhan i.

²³ Te máá hora un ní sáha-ni ñn ndajéhe maá Jítóho yō jeē ní jññ ñn cuehyī xeēn rey Herodes, te ni cayeji tñdācú de, te ni jihī de, chí ni sandúxí-ni de máá de te tu ní cáhán de jeē Yaā Dios cúu jeē cujéhnu.

²⁴ Te ni jitē gā jññhun máá Jítóho yō, te cuehē ndasí ñáyuu ni cacandíje i tǎcá-ni lugar.

²⁵ Te ni jññu jññu jeē ní quindecá Bernabé jíjn Saulo jeē cótecu ñáyuu Judea. Te ni quendacoo de Jerusalén cuanungoo de Antioquía, te cándēca de Juan jeē suni nání de Marcos cuahān jíjn de.

Jeē ní caquejéé Bernabé jíjn Saulo caca cuu de nacani de jññhun ya

13

¹ Te mēhñu grupo ñáyuu cácandíje ini ññu Antioquía ni cahīyo tēe cástéén jíjn tēe cánacani jññhun Yaā Dios, te cánaní de Bernabé, Simón jeē suni nání de Negro, Lucio ññu Cirene, Saulo, jíjn Manaén tēe ni jehnu jíjn inga Herodes jeē ní cuu gobernador Galilea.

² Te ñn quivī jeē cáhīyo ndite ni tēe yáha cáchiñúhún de nuū máá Jítóho yō, te ni cahān máá Espíritu Santo jíjn de:

Cúni rī jeē sasñn ró Bernabé jíjn Saulo na quíngoo de jññu jeē ní jeni rī de, áchí yá.

³ Yūcuán na te ni cajicān tahu ndite ni de, te ni casoó de ndaha de xinī Bernabé jíjn Saulo, te súcuan ni catajī de ndindúú tēe ún cuanacani de jññhun nuū tǎca ñáyuu.

Jeē ní canacani Bernabé jíjn Saulo jññhun ya nde Chipre

⁴ Te ni sáha Espíritu Santo jeē íchi ññu Seleucia cuangoo de. Te yūcuan ní quivīcoo de ñn barco cuangoo de nde Chipre, ññhun jeē íne sñn nuū ndúte.

⁵ Te ni jinūcoo de ññu Salamina nuū cájecuññi barco, te ni canacani de jññhun Yaā Dios ini tǎcá vehe iī sinagoga jñáhan hebreo de. Te suni cuahān Juan chindéé ñáhán jíjn de.

⁶ Te ni cajica nuu de nñ-ni Chipre nde ni jinūcoo de ññu Pafos jeē suni íne nuū Chipre. Te yūcuan ní cajini de nuū ñn tēe hebreo nání Barjesús. Te tēe tásí cúu de, te

cáhán stahú de jeē ñn tēe nácani jññhun Yaā Dios cúu de.

⁷ Te tēe tásí un jéjññu de nuū gobernador Sergio Paulo, te tēe ndíchí cúu gobernador ún. Te ni cana de Bernabé jíjn Saulo jeē cúni nahín de jññhun Yaā Dios.

⁸ Te tēe tásí un suni nání de Elimas. Te ndúcú ndéyí de casi de jeē ma cándíje gobernador ún.

⁹ Te Saulo jeē suni nání de Pablo, ni cunuú Espíritu Santo jíjn de, te ni ndacoto vāha de nuū tēe tásí un.

¹⁰ Te ni cahān de:

Tēe sáha jññu néé stahú ñáhán cúu ró, chí sēhe jexeén cúu ró te jési rō nuū tǎcá jññu ndaā. Te tu jécuiññi rō jeē sáca núu ró síquī jññhun ndaā máá Jítóho yō návāha ma candíje ñáyuu nuū yā.

¹¹ Te máá Jítóho yō stóho ya rohó vijna, te cucuáá ró jeē ma cóto ga rō niāndii jecu quivī, achí Pablo.

Te ni cunee-ni nuū tēe tásí un, te quéndāha quéhiyú de cuahān de ndúcú de ndé vé jññ ndaha de stéén ichi nuū de quinhun de.

¹² Yūcuán na te ni jini gobernador jeē súcuan ni cuu, te ni candíje de jññhun máá Jítóho yō, te náā ni de jini sōho de jññhun ya.

Jeē ní coyūcu Pablo jíjn Bernabé Antioquía ndañúú Pisidia

¹³ Yūcuán na te ni quendacoo Pablo jíjn Bernabé jíjn Juan ññu Pafos, te ni quivīcoo de barco te cuangoo de ññu Perge ndañúú Panfilia. Te yūcuan ní cusñn Juan, te cuanuhun de ññu Jerusalén.

¹⁴ Te ni quendacoo Pablo jíjn Bernabé ññu Perge cuangoo de, te ni jinūcoo de ññu Antioquía ndañúú Pisidia. Te quivī ndétātu ní quivīcoo de ini vehe iī sinagoga, te ni cacucōo de.

¹⁵ Te ni cahu tutu ley yā jíjn tutu ní catee tēe ni canacani jññhun ya nde jenahán. Yūcuán na te tēe cácujeñnu ini vehe iī sinagoga, vii-ni ni catajī de tēe cahān jíjn Pablo jíjn Bernabé:

Amigo, núu íyó jññhun cahān ni jéé stihví ni ni ñáyuu yáha, te cahān ní na cúni nahín i núu súcuan, áchí de.

¹⁶ Yūcuán na te ni ndocuññi Pablo te ni sáha de seña jíjn ndaha de jeē nahín-ni coo ñáyuu ún, te ni cahān de:

Níhín jnáhan ñuu yō Israel jiín níhín téé jeē suni cáchiñúhún ní Yaā Dios, cuni nahín ní jijnáhan ní.

¹⁷ Máá Yáā Dios yohó ñáyuu Israel, ni nacāji ya jií yō jijnáhan de. Te níni jéé cáyūcu tátú de ñuu Egipto, te ni sáha ya jeē ní nducuehē de. Yūcuán na te jiín poder maá yá ni quenehen ya de nación Egipto.

¹⁸ Te uū xico cuiyā ni cajica de nuū ñúhun téhé, te ni jendeyí ni yā jiín de jeē ní castívi de.

¹⁹ Te ni snáā yā uxā nación Canaán, te ni jēhe ya ñuhun un núū tāca jíi yō cúu tahū de.

²⁰ Yūcuán na te ni jeni ya tāca téé ni candacu jniñu nuū de nájnūhun cuūn ciento uū xico uxí cuiyā, nde quiví ní cotecu Samuel, téé ni nacani jnūhun ya.

²¹ Yūcuán na te máá ñáyuu un ní cajicān i ñn rey, te ni jeni Yaā Dios Saúl ni ndacu de jniñu nuū i uū xico cuiyā. Te yucūn Benjamín sēhe Cis ni cuu Saúl.

²² Te ni quenehen ya jniñu Saúl, te ni jeni ya David ni cuu de rey nuū i. Te ni cahān cají yá jnūhun de: Cúsñ ni rī jiín David sēhe Isaí, chi sáha de tāca jéé cuní rī, achí yá.

²³ Te cáhán gā Pablo:

Te sēhe yucūn David ni cacu Jesús, Yaā ní jeni Yaā Dios jeē jnáma ya yohó ñáyuu Israel, chi súcuan ni jejnūhun ya.

²⁴ Te nde ná tu quejéé Jesús nacani ya jnūhun nuū ñáyuu, te ni nacani Juan jnūhun nuū tāca jnáhan ñuu yō Israel jeē na nácani ni i jeē stóo i cuēchi i, te cuandute i.

²⁵ Te nuū cuácuyajni jeē cúu Juan, te ni cahān de: Cándetu ró jéé quíji Cristo, te jeni ni ró jeē ruhū cúu, te nasūu rí cúu. Chi quiji ya, te cújéhnu ndasí yá jeē ni ndijēn yā tu cújéhnu rí tava rī, achí de.

²⁶ 'Amigo jijnáhan ní, tāca níhín jéé cácuu yó sēhe yucūn Abraham jiín tāca níhín jéé suni cándiso iyo ní núū Yaā Dios, chi cuní Yaā Dios jeē na cuní yō jnūhun yáha jeē cáhán ndese jnáma ya yohó.

²⁷ Chi tāca ñáyuu ñuu Jerusalén jiín tāca téé cácujeñnu nuū i, tu ní cájecūhun ni i jeē Jesús cúu Cristo, Yaā ní jeni Yaā Dios jeē jnáma ya yohó. Te ndijnahan quiví ndétātu ní cajini sōho i jnūhun ni cacahu jeē ní catee téé ni canacani jnūhun Yaā Dios nde jenahán. Te vēsú súcuan te tu ní cájecūhun

ni i, te ni candonda i ni cacahān i jeē na cúu yā. Te súcuan ni casquícu i siquí tāca jnūhun jeē ní cacahān téé ni canacani jnūhun ya nde jenahán.

²⁸ Vēsú tu ní cánihīn i ni ñn cuēchi siquí yā jeē cúu yā, te ni cacahān níhin i jiín Pilato jeē na cúu yā.

²⁹ Te ná ni jīnu ni squícu siquí yā tāca jnūhun cáhán nuū tútu iī, te ni casnúu de ya jicā cruz, te ni cachindūji de ya ñn yaū ní jete jicā cáva.

³⁰ Te ni sáha Yaā Dios jeē ní natecu yā.

³¹ Te ñáyuu Galilea jeē ni jéngoo jíin yá nde Jerusalén nde na técu yā, nuū maá i ni steén ndijin yā maá yá cuehē quiví ná ni natecu yā, te ñáyuu un cácuu jeē cánacani cáji jnūhun ya nuū tāca gá jnáhan yó hebreo vijna.

³² Te máá ná jijnáhan ná cánacani ná jnūhun vāha yáha núū ni jíin náhan ní jéé súcuan ni jejnūhun ya nuū tāca jíi yō.

³³ Te jnūhun yáha ní squícu Yaā Dios nuū maá yó jeē cácuu yó sēhe yucūn de, chi ni nastécu yā Jesús. Chi suhva cáhán salmo uū jeē cahán yā jiín Sēhe ya Jesús: Máá ró cúu Sēhe rí, te vijna ni sajhēnu rí rohó jéé cúu rí Tatá rō, achí yá.

³⁴ Te ni nastécu yā Sēhe ya Jesús návāha ma tehyú cuiti yā, chi suhva cáhán tutu iī jeē ní cáhán Yaā Dios nde jenahán: Te níhīn maá ró tāca jéé vāha ni jejnūhun rí nuū David, achí.

³⁵ Te suni súcuan cáhán ñnga salmo jeē ní tee David jnūhun jeē cahán Jesús jíin Yáā Dios: Ma cuáha ni jnūhun tehyū ná, chi jéjníñu ná núū ní te maní ni jíin ná, achí.

³⁶ Te David chi jíni yō jeē ní jejníñu de nuū ñáyuu ní cotecu de jíin, nájnūhun ni cuni Yaā Dios. Te ni jihí de, te ni quindūji de nájnūhun ni quindūji tāca jíi yō, te ni tehyū de.

³⁷ Te Jesús, Yaā ní nastécu Yaā Dios, chi tu ní téhyú cuiti yā.

³⁸ Jeē yúcuan jíni ñúhún jecūhun ni ní, amigo, jeē Jesús cúu Yaā cóne cáhnu ni nuū tāca cuéchi yó.

³⁹ Chi ni canducú ní ndahva ni cuéchi ní jéé squícu ní ley jeē ní jéhe ya nuū Moisés, te tu ní cúu ndahvā cuéchi ní súcuan. Te Jesús cúu Yaā ndáhva ndíhi cuéchi ñáyuu jeē cácandíje i tāca jéé ní sáha ya jehē i.

⁴⁰ Núu súcuan te coto ní jíjnáhan ní jéē ma ndóho ní táca castigo jeē ní cacahān tēe ni canacani jnūhun Yaā Dios nde jenahán, chi suhva ni cahān Yaā Dios:

⁴¹ Tāca róhó ñáyuu jeē casácatā, na cóto ró na castigo xeēn quiji siquī rō, te naa ni rō coto ró, te cuu rō. Chi tiempo maá ró te sáha ri jniñu xeēn jeē ma cándíje cuiṭi rō jeē súcuan sáha ri vēsú nacani ñayuu jnūhun un núu rō, achí yá.

Achí Pablo.

⁴² Te ni quendacoo Pablo jíin táca jnáhan de vehe iī sinagoga jnáhan hebreo de. Te ñayuu sñn nación ni cacahān ndahú i jíin de jeē inga quiṽi ndétátú nacani tucu de jnūhun yáha núu i.

⁴³ Te ni jité ñayuu un cuángoo i. Te cuehē ñayuu hebreo jíin ñáyuu sñn nación jeē ní cacandíje sahān hebreo te cáchiñúhún i nuū Yaā Dios, cuangoo i jíin Pablo jíin Bernabé. Te ni cacahān nihin de jíin i jeē na cuiñi nihin i jíin jnúhun jeē maní Yaā Dios jíin i.

⁴⁴ Te quiṽi ndétátú inga semana te je yajni ndihi ñayuu ñuu un ní candutútú i jeē cúni nahín i jnūhun Yaā Dios.

⁴⁵ Te nuū ní cajini tēe hebreo jeē ní candutútú cuéhē ñayuu, te ni cacucuésun ni de, te ni cacahān de jeē násūu jnúhun vāha cúu jeē steén Pablo, te ni cacahān neé de nuū Pablo.

⁴⁶ Yūcuán na te jéhnū-ni ni cacahān Pablo jíin Bernabé, achí de:

Cánuú jéē xihna gā nuū maá ní jeē cácuu ní jnáhan ñuu yō hebreo nacani ná jnúhun Yaā Dios, te tu ní cájetáhú ní. Núu súcuan te cuēchi máá ní cúu jeē ma nihín tahu ni cotecu ni ní cáni. Te vijna te quinacani ná jnúhun ya nuū ñáyuu tācá nación jeē tu cájini i jnūhun ya.

⁴⁷ Chi suhva ni ndacu máá Jítóho yō jniñu nuū na jíjnáhan ná:

Ni jeni ri rohó jéē cúu ró nájnūhun luz jeē steén ini anuá ñayuu tācá nación, chi ní ñayīṽi stéén rō jnūhun ri nuū ñáyuu jeē jnáma ri i, achí yá.

Achí de.

⁴⁸ Te ñayuu sñn nación, nuū ní cajini sōho i jnūhun yáha te ni cacusñ teyí ni i. Te ni cacahān i jeē yōhō vāha jnúhun cúu jnúhun

máá Jítóho yō, te tāca ñáyuu jeē ní nacāji Yaā Dios i jeē cótecu i ní cáni, ni cacandíje i.

⁴⁹ Te ni jité jnūhun máá Jítóho yō cuahān ní región yūcuán.

⁵⁰ Te ñuu Antioquía cáyūcú ñahan cácuu nuū te cáchiñúhún ña Yaā Dios. Te tēe hebreo ni cascáhán de ña, te suni ni cascáhán de tēe cácujuhnu ñuu ún, te ni cajito xeēn i Pablo jíin Bernabé te nde ni cascúnu i de cuangoo de.

⁵¹ Te ni cascóyo de ticachā jehē de jeē steén de jeē iyó cuéchi i. Te ni jinūcoo de ñuu Iconio.

⁵² Te vēsú súcuan te ñayuu cácandíje un ní cunuú Espíritu Santo jíin i, te cácusñ teyí ni i.

Jeē ní coyūcu Pablo jíin Bernabé ñuu Iconio

14

¹ Te ñuu Iconio ni quiṽicoo Pablo jíin Bernabé ini vehe iī sinagoga jnáhan de hebreo. Te jíin jnúhun jeē ní canacani de te ni cacandíje cuehē jnáhan de hebreo, te suni súcuan cuehē ñayuu sñn nación ni cacandíje i.

² Te jnáhan de hebreo jeē tu ní cácandíje, ni cascáhán de ñayuu sñn nación, te ni cajeni ni i jeē násūu ñáyuu váha cácuu ñayuu cácandíje.

³ Te ni caquendōo Pablo jíin Bernabé yūcuan cuéhē gā quiṽi. Te jéhnū-ni ni canacani de jnūhun Jítóho yō, chi cácuahnu ni de ya jeē váha quihín jniñu un sáha ya. Te máá yá chi ni steén yā jeē iyó ndáā jnúhun jeē yóhō vāha ni yā jíin i jeē cánacani de, chi ni jēhe ya jeē sáha de jniñu jéhnū jeē steén jeē cujéhnū ya.

⁴ Te ñayuu ñuu un ní cacusñn ni i jíjnáhan i, sava i jíin tēe hebreo jeē tu cácandíje de Jesús, te sava ga i jíin tēe apóstol.

⁵ Te ñayuu hebreo jíin ñáyuu sñn nación jíin tēe cácuu tohō ni casquíjnáhan jnūhun jeē sáha xeēn jíin Pablo jíin Bernabé, jíin jéē cuáha yuū xinī de núu.

⁶ Te ni cajini de jeē súcuan cácuu sáha, te ni cajinu de cuangoo de nde ñuu Listra jíin ñuu Derbe ndañúu Licaonia jíin táca ñuu yajni yūcuán.

⁷ Te yūcuan ní canacani de jnūhun jeē jnáma ya yohó.

Jeē ní cajēhe i yuū xinī Pablo ini ñuu Listra

⁸ Te ñuu Listra néne ñin tēe jeē tu cúu caca, te tu jíca cuiṭi de chi nde quiṽi ní cacu de cácójó de.

⁹ Tēe un ní jini sōho de jnūhun jeē cahán Pablo, te ni jito vāha Pablo nuū de, te ni jini de jeē candíje vāha tēe un jēē ndúvāha de.

¹⁰ Te ni cahān jee Pablo jíin de:

Ndocuiñī, condichi rō, achí de.

Te ni scánda tēe un máá de ni nucōndichi-ni de, te ni quejéé de caca de.

¹¹ Te ni cajini ñayuu ún jniñu jéhu jeē ni sáha Pablo, te ni cacahān jee i jíin yuhu máá i jeē cúu yuhu Licaonia:

Ni cuun yaā ni quecoo nuū yō, te cájica nájñūhun cájica tēe, áchí i.

¹² Te ni cacahān i jeē Bernabé cúu yaā Júpiter, te Pablo cúu yaā Mercurio chi Pablo cúu tēe nácani jnūhun.

¹³ Te yajni yuñúū un néne veñūhun yaā Júpiter. Te máá sūtū jejniñu ini veñūhun un ní quihin de stiḡuṽi jijnáhan ṭi te ni scutú de ṭi ita te vēji de nde nuū quiṽi i yuñúū, te máá de jíin ñáyuu ñuu un cácuni de cahni de stiḡuṽi un sócō de nuū Bernabé jíin Pablo nuú.

¹⁴ Te Bernabé jíin Pablo, tēe cácuu apóstol, ni cajito de jeē súcuan cácuni ñayuu un sáha i, te ni candatá de sahna de jeē steén de jeē castívi ndasí i jeē casáha i súcuan. Te ni quenendava de ni quiṽicoo de mēhñu ñáyuu cuehē ún, te ni cacana jee de:

¹⁵ Tātā jijnáhan ní, ma sáha cuiṭi ni súcuan, chi sãñá suni tēe-ni cácuu ná nájñūhun máá ní jijnáhan ní. Te vējicoo ná nacani ná jnūhun vāha Yaā Dios nuū ní, chi cahān na jíin ní jeē ma sáha ga ni táca jniñu yáha jēē tu ndé jéjniñu cuiṭi, chi sa suhva na chíñúhún ní maá Yáa Dios, Yaā técu, Yaā ni sáha andívi jíin ñáyívi jíin ndute mar jíin táca gá jeē iyó ní cáhnu.

¹⁶ Te nde jenahán ní jēhe ya jnūhun jeē na sáha táca ñáyuu modo cácuni maá i.

¹⁷ Te vēsú súcuan te níni stéén yā ndese Yaā cúu ya, chi máni sáha ya jniñu vāha jíin yó, chi scúun ya saū, te sáha ya jeē cúu vāha itu yō, te jēhe ya jeē jíni ñúhún yó návāha caji yō te coo sñi ni yō, achí ndíndúú de.

¹⁸ Te vēsú súcuan ni cacahān de, te yōhyo uhū ni cajesi de nuū ñáyuu un návāha tú

socō i stiḡuṽi un núu de jeē chíñúhún i ndíndúú de.

¹⁹ Yūcuán na te ni quecoo jecu tēe hebreo ñuu Antioquía jíin ñuu Iconio, te ni cascáhán de ñayuu cuehē ún, te ni cajēhe i yuū xinī Pablo. Te ni caquenehen i de yatā ñúū ún, chi ni cajeni ni i jeē jé ni jihī de.

²⁰ Te tēe cácandíje ni cacondúū de Pablo, te ni ndonda Pablo, te ni ndívi de ini ñuu. Te inga quiṽi ni quihin de ichi cuahān de jíin Bernabé nde ñuu Derbe.

²¹ Te ini ñuu un ní canacani de jnūhun jeē jnáma ya ñayuu, te ni cacandíje cuehē ñayuu ni casáha de. Te ni canandicó de cuanuhun de ñuu Listra jíin ñuu Iconio jíin ñuu Antioquía.

²² Te ni cahije ga ni ñayuu cácandíje yūcuan ní casáha de. Te ni castíhvī ni de i jeē na cuiñi níhin i jíin jnūhun ya, chi ni cacahān de jeē níni quiḡi cuehē jnūndóho siḡuṽi yō te yūcuán na te jinū yō ñuu nuū ndácu Yaā Dios jniñu.

²³ Te táca ñuu ni cajeni de tēe jéhu cándiso jniñu condito de ñayuu cácandíje. Te ni cahīyo ndite ni Pablo jíin Bernabé nuū yā, te ni cajicān tahu de, te ni cacahān de jíin máá Jítóho yō jeē na cóto ya ñayuu ún chí cácandíje i máá yá.

Jeē cuánuhun tucu Pablo jíin Bernabé ñuu Antioquía ndañúū Siria

²⁴ Te ni cayāha de cuango de región Pisidia, te ni najinūcoo de región Panfilia.

²⁵ Te ni canacani de jnūhun ya ini ñuu Perge región Panfilia, te sáa te cuango de ñuu Atalia.

²⁶ Te yūcuan ní quiṽicoo de barco, te ni najinūcoo de ñuu Antioquía. Te ñuu yūcuan cúu nuū ní cajicān tahu ñayuu nuū Yaā Dios jehē de jeē na chindéé ñáhán yá de jeē quíngoo de nacani de jnūhun. Te ni jñu jniñu, te ni najinūcoo de ñuu ún.

²⁷ Te nuū ní najinūcoo de yūcuán, te ni casáha de junta jíin ñáyuu cácandíje, te ni canacani de jnūhun táca ndese cuehē jeē vāha ni sáha Yaā Dios jíin de, chi ni jēhe ya jnūhun jeē suni candíje ñayuu táca nación jeē tu ní cájini i jnūhun ya.

²⁸ Te ni caquendō de yūcuan cuéhē quiṽi jíin ñáyuu cácandíje.

Siḡuṽi junta ñuu Jerusalén

15

¹ Yūcuán na te jecu tēe Judea ni quijicoo de ñuu Antioquía, te ni castéén de nuū tācá hermano jeē núu tu sáha i circuncidar, nájñūhun cáhán ley jeē ni jéhe ya nuū Moisés, te tú na modo cācu i.

² Te Pablo jíin Bernabé ni catejnáhan de jíin tēe ún, te tu ní cūndaā. Te jeē yúcuan ní candajnūhún de jeē quíngoo Pablo jíin Bernabé jíin jecu gā tēe cá candíje un ndé ñuu Jerusalén, te yūcuán ndajnūhún de síquī jñūhun yáha jíin tēe cácuu apóstol jíin tēe jéhnū cándiso jñíñu nuū ñáyuu cá candíje yūcuán.

³ Te ñáyuu cá candíje un ní canachuhun íchí i de. Te ni cayáha de ichi Fenicia jíin Samaria, te canacani de jñūhun jeē suni ñáyuu tāca gá nación jeē tu ní cájini i jñūhun ya, ni castóo i jñíñu jeē tu íyó ndáa te ni cacandíje i Yaā Dios. Te yōhyo ni cacusī ni tācá hermano jeē ní canihīn de jñūhun jeē súcuan ni cacandíje ñáyuu ún.

⁴ Te ni najinūcoo de ñuu Jerusalén, te ñáyuu cá candíje yúcuan jíin tēe apóstol jíin tēe jéhnū cándiso jñíñu nuū ñáyuu un, ní cacusī ni de jeē ní najinūcoo jnáhan de ún. Te Pablo jíin Bernabé ni canacani de tāca jñūhun ndese cuehē jeē váha ni sáha ya síquī jñíñu jeē ní canacani de jñūhun ya.

⁵ Te sava tēe grupo fariseo jeē cá candíje ni candocuñī te ni cacahān:

Ñáyuu sīn nación jeē cá candíje i Jesús, jíni ñūhún jéē sáha i circuncidar nájñūhun cásáha máá yó, te cánuú ndacu yó jñíñu nuū i jeē na squícu i ley jeē ni jéhe ya nuū Moisés, áchí.

⁶ Te tāca tēe apóstol jíin tāca tēe jéhnū cándiso jñíñu nuū ñáyuu cá candíje, ní candutútú de junta návāha ndajnūhún de te sándaā de síquī jñūhun yáha.

⁷ Te tācá de ni cacahān de ndese cájeni ni de. Yūcuán na te ni ndocuñī Pedro, te ni cahān de:

Hermano jijnáhan ní, je cájini váha ni jéē je íyó tiempo jeē ní nacāji Yaā Dios sāña jéē quihín na núu ñáyuu sīn nación te nacani ná jñūhun nuū i jeē jnáma ya i, návāha candíje i Jesucristo.

⁸ Te Yaā Dios chí jíni yā ndese cáá ánuá ndihí ñáyuu, te ni steén yā jeē jetáhú yá i, chí

suní ni jéhe ya Espíritu Santo nuū i jíjnáhan i, nájñūhun ni jéhe ya nuū maá yó.

⁹ Te inuú-ni sáha ya jíin yó jíin máá i, chí síquī jeē suní ni cacandíje i jñūhun jeē jnáma ya i, te jeē yúcuan ní sándoo ya anuá i nuū tāca cuéchi i.

¹⁰ Te vijna ¿naun cá cuni ní ndacu ní jñíñu jeē na squícu i ley un? Chí tu nújnahan ni Yaā Dios jeē súcuan. Chí cá cuni ní tee ní jñíñu yí yáha síquī ñáyuu cá candíje ún, te ní tāca jíi yō tu ní cá cundeyí de squícu de, te ní máá yó.

¹¹ Chí sa suhva cá candíje yó jéē jnáma ya yohó súcuan-ni síquī jeē yóhyo váha ni maá Jítoho yō Jesús jíin yó, te suní súcuan-ni jnáma ya maá i, nasūu síquī jeē squícu i ley un, áchí de.

¹² Yūcuán na te tēe cuehē un ní cacuu nayúu de, te ni cájini nahín de jñūhun cácahān Bernabé jíin Pablo. Chí ni castūhún de jeē ni jéhe ya poder jeē ní casáha de tāca jñíñu jéhnū jeē steén jeē cujéhnū ya, ni cajito ñáyuu tācá nación jeē tu cájini i jñūhun ya.

¹³ Te nuū ni jínu ni cacahān Pablo jíin Bernabé, te ni cahān Jacobo:

Hermano jijnáhan ní, cuni sōho ní na cáhán na.

¹⁴ Ni nacani Simón Pedro jñūhun ndese ni quejéé nuú jñíñu jeē jnáma Yaā Dios ñáyuu tācá nación jeē tu cájini i jñūhun ya, chí suní mēhñu máá i nacāji ya ñáyuu jeē ndúu i ñáyuu maá yá.

¹⁵ Te quíjnáhan jñūhun ni cahān de yáha jíin jñūhun ni catee tēe ni canacani jñūhun Yaā Dios nde jenahán jeē yosó núu tútu i:

¹⁶ Achí Yáa Dios:

Nájñūhun ni cotúu vehe David cúu jeē tuá ndácu sēhe yucūn de jñíñu,

nájñūhun ni ndacu máá de jñíñu nde jenahán.

Te iin quivī te ndee rī

te jeē nasáha rī vehe de cúu jeē sáha rī jeē nandacu Sēhe yucūn de jñíñu.

¹⁷ Súcuan sáha rī návāha tāca gá ñáyuu na nánducú i ruhū

nde jíin ñáyuu tācá nación jeē tu cájini jñūhun rī, tācá i jeē cána rī i candíje i ruhū.

18 Súcuan cáhán maá Jítoho yō, te nde jenahán ní steén yā jnūhun yáha núū ñáyyuu.

Achí tutu iī.

19 Jeē yúcuan jéni ni na jéē ñáyyuu tāca gá nación jeē ní castóo i jniñu jeē tu íyó ndáa te ni cacandíje i máá Yáa Dios, ma stáhān yō i jeē ndácu yó jniñu jeē squícu i ley Moisés.

20 Chi sa suhva na téē yó carta quihín nuū i jeē ma cáji i ndeyu jeē ní sócō nuū ídolo, te ma cáca jnéni i, te ma cáji i cūñu quiñi jeē jihí jeē tu jéti ñiñi tī, te ni ma cáji i ñiñi.

21 Jnūhun yáha-ni tee yó quihín nuū i nájnūhun je cástéén nde jenahán. Chi nde jenahán je íyó téē cástéén jnūhun ley jeē ni jéhe ya nuū Moisés, te ndijnahan quiñi ndétātu cácahu de ley un ini vehe iī sinagoga tācá ñuu, áchí Jacobo.

22 Yūcuán na te tēe apóstol, jín téē jéhu cándiso jniñu, jín ndivii ñayuu cácañde, ni cacundaā ni de jeē nacāji de tēe quingoo jín Pablo jín Bernabé nde ñuu Antioquía. Te tēe ni canacāji de un cácuu Silas jín Judas, te inga síhví de cúu Barsabás. Te cándiso jniñu de nuū tācá hermano cácañde.

23 Te ni cajendēca de carta jeē cahán suhva:

Máá ná cácuu tēe apóstol, jín táca téē jéhu cándiso jniñu nuū ñáyyuu cácañde, jín táca gá hermano yō. Te cátee ná carta yáha cuájeē nuū ni jijnáhan ní, hermano, jeē cácuu ní ñáyyuu sín nación jeē cáyūcu ní ñuu Antioquía jín Siria jín Cilicia. Cuandeyí ni ni jijnáhan ní.

24 Ni cajini jnūhun ná jéē ní quendaco sava jnáhan ná yáha ní jengoo nuū ní, te jín jnúhun jeē ní cacahān de te ni casáha jeē ní canacani ndasí ni ní, te ni cacuxií ni ní, chi cándacu de jniñu jeē sáha ní circuncidar jín jéē squícu ní jniñu cáhán ley jenahán jéē ni jéhe ya nuū Moisés. Te nasūu sáña ní cátají téē un jéē jeé de nuū ní.

25 Jeē yúcuan ní cajeni ni ná, te inuú-ni ni cacundaā ni ná, te ni nacāji ná téē cuajēcoo nuū ni jín úu hermano yō jeē maní yō jín, cúu Bernabé jín Pablo.

26 Te ndíndúú de je ni catana de máá de nuū jnúndóho vésú na cúu de jeē síquí jnūhun Jítoho yō Jesucristo.

27 Núu súcuan te cátají ná Judas jín Silas jeē nuū ní, te suni nájnūhun cáhán carta yáha suni súcuan castūhún de nuū ni jijnáhan ní.

28 Chi máá Espíritu Santo ni steén yā in modo jeē ní cacundaā ni na jéē ma téē ná táca jniñu yí ley Moisés síquí ní, chi máá-ni jniñu yáha jéē cánuú gá:

29 Ma cáji ni táca jéē ní casocō nuū ídolo, ni ma cáji ni ñiñi ni quiñi jeē jihí jeē tu jéti ñiñi tī, te ma cáca jnéni ní. Te vāha squícu ní núu tuá sáha ní táca jéē yáha. Súcuan na cóo te sándeýí ni ní, áchí carta.

30 Yūcuán na te tēe quingoo un cuángoo de nde ñuu Antioquía. Te ni cacana de xini ñáyyuu cácañde ni candutútú de junta, te ni cajēhe de carta un núu i.

31 Te ni cacahu i, te ni candusiñi ni i jeē ni ñiñi i jnūhun ndeyí ni nuū carta ún.

32 Te suni tēe canacani jnūhun Yáa Dios cácuu Judas jín Silas, te jín cuéhē jnūhun ni cacahān de te ni candundeyí ni táca hermano un, te ni cahije ga ni i jín jnúhun ya.

33 Te ni coyūcú de yūcuán jecu quiñi. Yūcuán na te hermano yúcuan ní canacu-atáhú i nuū de jeē quinuhun de nuū téē jeē ní catajé de.

34 Te Silas ni nujnahan ni de ni quendōo de yūcuán.

35 Te suni ni caquendōo Pablo jín Bernabé ñuu Antioquía, te máá de jín sava ga tēe ni castéén de te ni canacani de jnūhun vāha máá Jítoho yō.

Jeē quihín Pablo inga jínu nacani de jnūhun ya

36 Te ni cuu ga quiñi, te ni cahān Pablo jín Bernabé:

Vijna te na quícondēhe yó tācá hermano yō ndijnahan ñuu nuū ní nacani yó jnúhun máá Jítoho yō, na cóndēhe yó ndese cáhiyo i, áchí de.

37 Te Juan jeē suni nání de Marcos, cúní Bernabé jeē quihín tēe un jín de.

38 Te tu ní cúní Pablo jeē quihín tēe un jín de, chi nde Panfilia ni cusín Marcos nuū Pablo jín Bernabé, chi tuá ni chindéé ñáhán de ndíndúú téē un síquí jniñu ya nde saá.

39 Te nahán ní candajnūhun Pablo jíin Bernabé, te tu ní cácondaā ni de siquī Marcos, te ni cacusūn de. Te Bernabé ni jeca de Marcos, te ni quivīcoo de barco cuangoo de nde Chipre, ñuhun jeē íne sūn nuū ndúte.

40 Te Pablo ni nacāji de Silas quihīn jíin de. Te tācá hermano cácondíje ni cajicān tahu de nuū maá Jítóho yō jeē siquī jeē váha ni yā te na chindéé ñáhán yá Pablo. Te cuahān Silas jíin Pablo.

41 Te ni cajica cuu de ní Siria jíin Cilicia. Te tāca grupo ñayuu cácondíje ni cahije ga ni i jíin jnūhun ya ni casáha de.

Jeē cuahán Timoteo jíin Pablo jíin Silas

16

1 Yūcuán na te sáá te ni jinū Pablo jíin Silas ñuu Derbe jíin ñuu Listra. Te yūcuan néne ñn tēe suchí cándíje, nání i Timoteo. Sēhe yí ñn ñahan hebrea cúu i, te ñahan cándíje cúu ña. Te tátá i chi tēe griego cúu de.

2 Te tācá hermano ñuu Listra jíin ñuu Iconio cájejnūhún de Timoteo.

3 Te cúní Pablo condeca de Timoteo quihīn de jíin i. Te ni cahān Pablo jeē quihín i cuu i circuncidar, chi tu cúní Pablo jeē cahān ñayuu hebreo jeē tu ní squícu Timoteo costumbre un, chi ndihí ñayuu cájini i jeē tée griego cúu tátá i.

4 Te tācá ñuu nuū cuángoo de te ni cacastūhún de nuū ñáyuu cácondíje jeē na squícu i máá jniñu jeē ní casándaā tēe apóstol jíin táca tée jéhnú cáyūcú ñuu Jerusalén jeē cándiso jniñu nuū ñáyuu cácondíje.

5 Te ñayuu cácondíje ni cahije ga ni i. Te ndijnahan quivī ni cacandíje cuehē gā ñayuu.

Jeē ní jito ndijin Pablo ñn tēe ñuu Macedonia

6 Te tu ní jéhe Espíritu Santo yā jnūhun jeē nácani de jnūhun ya ní Asia. Jeē yūcuan ní cayāha de ichi Frigia jíin Galacia cuangoo de.

7 Te ni jinūcoo de nuū quijnáhan Misia jíin Bitinia. Te cácumí de quingoo de Bitinia, te máá Espíritu Jesús tu ní jéhe ya jnūhun quingoo de.

8 Te ni cayāha de ñn lado Misia cuangoo de ñuu Troas jeē íne yajni yumar.

9 Te ñn jecuáa te nájnūhun ñn jēni ni jito ndijin Pablo, te ni jito de jeē índichi ñn tēe ñuu Macedonia nuū de cáhán ndahú jíin de: Nehen ní ñuu ná Macedonia te chindéé ñáhán ní sãña jíjnáhan ná, áchí.

10 Te súcuan ni jito ndijin de. Yūcuán na te sãña, Lucas, ni quijnáhan ná jíin de. Te ni casátūhva ná jíin de jíjnáhan de jeē quingoo ná Macedonia, chi ni cajini cají ná jeē maá Yáa Dios táj yá sãña jíjnáhan ná jēe castūhun ná nuū ñáyuu yūcuan jnūhun jnama ya i.

Jeē ní coyūcu Pablo jíin Silas ñuu Filipos

11 Te jíin barco ni quendacoo ná ñuu Troas, te cuangoo ndaā-ni ná ndé Samotracia, ñuhun jeē íne sūn nuū ndúte. Te inga quivī ni jinūcoo ná ñuu Neápolis.

12 Te yūcuan ní quendacoo ná, te ni jinūcoo ná ñuu Filipos jeē cúu ñuu kujéhnú ga íne Macedonia, chi máá ñáyuu ñuu Roma ni casáha i ñuu i ún. Te ni coyūcu ná ñuu Filipos jecu quivī.

13 Te ñn quivī ndétātu ní quendacoo ná ñuu ún, te ni jengoo ná ñn yuyúte, chi yūcuan cúu ñn lugar nuū cájicān tahu ñayuu. Te ni cacucōo ná, te ni canacani ná jnūhun ya nuū tācá ñahan ní canataca yūcuán.

14 Te ñn ña nání Lidia jeē véji ña ñuu Tiatira, xíco ña sahma ndihí jēe yáhu ga ndeé. Te máá ña ní ní chíñúhún ña Yáa Dios. Te ni jini sōho ña jnūhun canacani ná, te máá Jítóho yō Jesús ni sáha ya jeē ní candíje ña jnūhun jnáma ya ña jeē ni cáhán Pablo.

15 Te ni jendute ña nde jíin ñáyuu cáyūcú vehe ña, te ni cahān ndahú ña jíin ná:

Núu cáducáhnú ni ní jēe candíje ndije ná máá Jítóho yō, te cuajeē ní coyūcu ní vehe ná, áchí ña.

Te ni cana fuerza ña sãña jíjnáhan ná.

16 Te ñn quivī te cuangoo tucu ná suu lugar nuū jéngoo ñayuu cájicān tahu. Te ni canajnáhan ná jíin ñn sūchi sñí jēe ñuhun tachí ini i, te máá un sáha jeē cahán i tācá ndese coo te cūndaā jeē cahán i. Te sūchí un ní cajeen patrón i, návaha nihīn de cuehē xūhun siquī jeē cástūhún i nuū ñn ñayuu ndese coo ichi núu.

17 Te sūchí un ndíquín i sãña jíjnáhan ná cána jee i:

Tēe yáha cájejniñu de nuū Yaā Dios, Yaā cujéhnú téyí, te cácastühún de ndese cācu ní nuū cuéchi ní jíjnáhan ní, áchí i.

18 Te cuehē quiví ni cuu súcuan te nde ni jnaniní ni Pablo. Te ni ndió cóto de nuū i, te ni cahān de jíin táchī ún:

Jíin poder maá Jesucristo ndácu ri jniñu nuū rō jeē na quénda ró ini i quihīn rō, achí de.

Te hora un ní quenda-ni cuahān.

19 Yūcuán na te ni cajini patrón i jeē ma níhín gā i xūhún cuu de, te jeē yúcuan ní cajni de Pablo jíin Silas cuangoo jíin de nde vehe juzgado nuū cáyūcu tóhō.

20 Te ni cajeni ún de nuū juez, tēe cásandaā jniñu, te ni cacahān:

Tēe hebreo cácuu tēe yáha, te cástóna de ñayuu ñuu yō cúvaā i.

21 Te cájequin de inga costumbre jeē ma cúu cuatáhú cuítí yō, ni ma cúu sáha yó, chí tu jéhe ley nación yō jnūhun, chí ñayuu nación Roma cácuu yó, áchí.

22 Te suni ni candonda ñayuu siquī Pablo jíin Silas. Te tēe cácuu juez ni candacu de jniñu jeē na quénda sahma ndindúú de te caní yujnu siquī de.

23 Te nuū ní jínu ni cacani téyí un de, te ni casquíví de vecāa. Te ni candacu jniñu nuū tēe ndíto vecāa jeē na cóndito ndasí de jeē ma cácu ndindúú tēe ún.

24 Te jeē súcuan ní tahū jniñu nuū tēe ndíto vecāa te ní squíví de Pablo jíin Silas nde ichi íni gā, te ní squíví jehē de t̄sin yujnu ndéé yaū te ní cajihni de.

25 Te nuū ní cuu sava ñuú, te cájicān tahú Pablo jíin Silas, te cájita de yaa íi nuū maá Yáa Dios. Te ñayuu cáhīn jíin de vecāa un ní cajini nahín i.

26 Te sanaa-ni te ní jnāa níhin téyí, te nde nuū cimíento vecāa un ní canda. Te ní canune-ni yéhyí vecāa ún, te ní canandajī-ni cadena jeē cánuhnī tāca ñayuu ún.

27 Te ní natahū ní tēe ndíto vecāa, te ní jito de jeē núne yéhyí vecāa ún. Te ní tava de espada jeē cáhni de máa de núú, chí ní jeni ní de jeē ndivii cuítí ñayuu cáhīn vecāa un cuángoo i.

28 Te ní cana jee Pablo:

Ma cáhni ní máa ní, chí cáhīn ndihí ná, áchí de.

29 Yūcuán na te máa tēe ndíto vecāa ní cana de jeē na quíndeca i ñuhún, te yachí ní quíví de ini vecāa. Te ní jecuíñí yití de nuū Pablo jíin Silas, te quísi i de jeē yūhú de.

30 Te ní quenehen de Pablo jíin Silas, te ní cajnūhún de:

Tátā, ¿na vé cánuú sáha ná te jnama ya sãñá? áchí de.

31 Te ní cacahān de jíin tēe ún:

Candíje ní táca jēe ní sáha Jitoho yō Jesucristo jehē ní te cācu ní, te suni súcuan cācu ndihí ñayuu cáyūcú vehe ní, áchí de.

32 Te ní canacani de jnūhun máa Jítoho yō nuū tēe un jíin núú táca ñayuu cáyūcú vehe de.

33 Te suu máa jecuāa yúcuan ní nacate tēe ndíto vecāa un núú ní catují Pablo jíin Silas jeē ní cacani yujnu siquī de. Yūcuán na te ní jendute de jíin ndihí ñayuu cáyūcú vehe de.

34 Te ní jeca de Pablo jíin Silas cuahān de jíin vehe de, te ní jēhe de staā ní cayeji de, te cácusī ní ndihí de vehe de jeē ní cacandíje de Yaā Dios.

35 Te nuū ní cundijin, te tēe cácuu juez ní catají de policía cuangoo jíin jnūhun jeē na siáá tēe ndíto vecāa un Pablo jíin Silas quingoo de.

36 Te tēe ndíto vecāa un ní castühún de jnūhun yáha núú Pablo:

Tēe cácuu juez ní catají de jnūhun vēji jeē na siáá na níhín quíngoo ní. Núu súcuan te quendacoo ní quíhīn ní, te cuandeyí ní ní, áchí de.

37 Te ní cahān Pablo jíin policía:

Cuehē ñayuu ní cajito i jeē ní cacani de sãñá, te ní tu ní cásandaā de xīhna gā núu ndaā jeē iyó cuéchi ná. Te ní cachuhun de sãñá vecāa, vēsú cácuu ná séhe nación Roma, te íyó ley jeē ma cúu sáha súcuan jíin ñayuu cácuu séhe nación Roma. Te vijna ¿á quenehen sãhí de sãña cáculi de naún? Ma cúu cuítí. Na quícoo máa de quenehen de sãña jíjnáhan ná, áchí Pablo.

38 Te ní canandió cóo policía ní castühún de jnūhun yáha núú tēe cácuu juez, te ní cayūhú de jeē ní cajini sōho de jnūhun jeē séhe nación Roma cácuu Pablo jíin Silas.

39 Te ní quecoo tēe cácuu juez ún, te yōhyo ní cacahān ndahú jíin Pablo jíin Silas jeē na cóne cáhnu ní de. Te ní caquenehen de

vecāa ún, te ni cacahān ndahú jíin de jeē na quéndacoo de ñuu un quíngoo de.

⁴⁰ Yūcuán na te ni quendacoo de vecāa, te ni jengoo tucu de vehe Lidia, te ni cacahān de jnūhun ndeyí ni jíin táca hermano. Te ni caquihin de ichi cuangoo de.

Jeē ní cacuvaā ñayuu Tesalónica

17

¹ Te Pablo jíin Silas ni cayāha de ñuu Anfípolis jíin ñuu Apolonia cuangoo de, te ni jinūcoo de ñuu Tesalónica nuū iyó ñn vehe ñi sinagoga jnáhan de hebreo.

² Te ni coyūcú de yūcuan únī semana, te tāca quívī ndétātu jéhén Pablo vehe ñi sinagoga, nájñūhun sáha sáha de, te ni nacani de jnūhun ya nuū téé un.

³ Te jíin jnúhun cáhán tutu ñi ni steén de jeē súcuan ni jini ññhún ndoho Cristo jeē cúu yā te natecu yā. Te ni cahān de:

Jnūhun nácani ná núu ni cúu jnūhun Jesús, te máá yá cúu Cristo, Yaā ní jeni Yaā Dios jeē jnáma ya yohó, áchí de.

⁴ Te ni cacandíje sava jnáhan de hebreo jíin cuéhē ñayuu griego jeē cáchiñúhún i Yaā Dios, jíin cuéhē ñahan cácuu nuū, te ni nduu ñnuú ni i jíin Pablo jíin Silas.

⁵ Yūcuán na te yōhyo ni cacucuésún ni jnáhan de hebreo jeē tu cácandíje, te ni castútú téé cunéé jéé cájica cúxí-ni, te ni quejéé cácana ndee cuangoo. Te súcuan ni casaca núu de xinī ñáyuu ñuu ún. Te ni jengoo de vehe Jasón cácanducú de Pablo jíin Silas jeē jná de téé un quíndēca de nuū ñáyuu cuehē.

⁶ Te tu ní cánanihín de, te ni cañuhun de Jasón jíin sava ga hermano cuangoo de jíin núu tohó ñuu ún. Te jeē siquí Pablo jíin Silas ni cacana jee de:

Téé jeē castívī xínī ñáyuu ní ñáyívī, je ni quecoo de nde yāhá.

⁷ Te máá Jasón ni jēhe núu vehe cáyūcu téé ún. Te téé ún tu cájetáhú de ley máá rey yohó ñáyuu Roma, chi sa suhva cácahān de jeē cájetáhú de nuū inga rey jeē naní Jesús, achí de jíin jnáhan de.

⁸ Te ñayuu jíin téé cácuu tohó ni cajini sōho i jnūhun yáha, te ni cacuvaā i siquí.

⁹ Te Jasón jíin táca gá hermano ni castóo de xūhún de, chi ni cacahān tohó un jíin de

jeē nde núu tají de Pablo jíin Silas quíngoo de inga ñuu, yūcuán na te nacūaha tohó un xūhun de. Te súcuan te ni casiáá de Jasón jíin táca gá hermano cuangoo de.

Jeē ní coyūcu Pablo jíin Silas ñuu Berea

¹⁰ Yūcuán na te tācá hermano un, yachī-ni ni cascáca de Pablo jíin Silas jecuáa un, cuángoo de nde ñuu Berea. Te nuū ni jínūcoo de yūcuán, te ni quívīcoo de vehe ñi sinagoga jnáhan ñuu de hebreo.

¹¹ Te jnáhan ñuu de hebreo cáyūcu yūcuan, vāha ga ni maá de vēsú jnáhan ñuu de hebreo cáyūcú ñuu Tesalónica, chi vāha ni cacusī ni de jíin jnúhun ni cacahān Pablo jíin Silas. Te ndijnahan quívī cácanducú yúcún de nuū tutu ñi núu súcuan cáhán chí tuú.

¹² Jeē yūcuan ní cacandíje cuehē jnáhan ñuu de hebreo te suni nde jíin cuéhē ñayuu griego, cúu téé cúu ñahan cácuu nuū.

¹³ Te jnáhan ñuu de hebreo cáyūcú ñuu Tesalónica ni cajini jnūhun de jeē suni nde ñuu Berea nácani Pablo jnūhun Yaā Dios, te ni caquihin de ichi cuangoo de Berea, te suni yūcuan ní castóna de ñayuu siquí Pablo.

¹⁴ Yūcuán na te tācá hermano ni catajī-ni de Pablo cuahān de nde yumar. Te ni ndōo Silas jíin Timoteo ñuu Berea.

¹⁵ Te jecu hermano ni cajendēca de Pablo nde ñuu Atenas. Te ni cahān Pablo jíin de jeē cahān de jíin Silas jíin Timoteo jeē na quíngoo yachī de nuū Pablo. Te vendicoo de ñuu Berea.

Jeē ní ñne Pablo ñuu Atenas

¹⁶ Te níni ndétu Pablo jeē jinúcoo Silas jíin Timoteo nuū de ñuu Atenas, te ni jini de jeē ñáyuu ñuu ún yōhyo cáchiñúhún i ídolo, te ni nacani cuíhyá ni de.

¹⁷ Te ini vehe ñi sinagoga ni cahān de jnūhun ya jíin jnáhan ñuu de hebreo jíin táca gá téé cáchiñúhún Yáa Dios. Te suni táca quívī ni nacani de jnūhun ya nuū táca ñáyuu cáhīn nuū yáhu.

¹⁸ Te sava téé cáscuáha jnūhun jeē castéén grupo epicúreo, jíin inga sava téé cáscuáha jnūhun jeē castéén grupo estoico, ni caquejéé cácahān jíin Pablo. Te sava ni cacahān: ¿Na jnūhun cáhán téé tlóhlé yáha? áchí.

Te sava ga de ni cacahān:

Tēe nácani jnūhun tāca yāā jeē tu cánevāha yó cúu de, áchí.

Súcuan ni cacahān de, chi nácani Pablo jnūhun vāha Jesús jeē ní natecu yā mēhñu ndíyí.

¹⁹ Te ni cajeca de Pablo cuangoo de, te ni jinūcoo de nde lugar nuū naní Areópago nuū cándutútú ñáyuu cándacu jniñu, te ni cacahān de:

Cácuni ná cachi ni núu na jnúhun jeé jéē steén ni.

²⁰ Chi cáhán ni jnúhun jeē ná tu cuni cuítí na jíjnáhan ná, te jeē yúcuan cáculi ná jecūhun ni na síquī tāca jnúhun yáha, áchí jíin de.

²¹ Chi tāca ñáyuu ñuu Atenas jíin tāca ñáyuu inga ñuu jeē cáyūcu núu i yūcuán, tuá na inga jniñu cácusī gā ni i jíin chi máá-ni jeē cuni nahín i jnūhun jeé chí jéē cahán i jnūhun jeé.

²² Te índichi Pablo mēhñu ñáyuu ní candutútú núu naní Areópago, te ni cahān de:

Tēe ñuu Atenas jíjnáhan ní, jíto ná jéé yóhyo cáchiñúhún ní yaā maá ní.

²³ Chi ni jica nuu ná, te ni jecondēhe ná nuū jeē cáchiñúhún ní, te ni jito ná ñn altar jeē yosó jnúhun yáha: Yáha cúu altar yaā jeē ná tu cuni yō jnūhun ya, achí. Te máá Yáā un jéē cáchiñúhún ní, vésú ná tu cuni ni jnúhun ya, suu jnūhun Yaā un cúu jeē nácani ná núu ní vijna.

²⁴ 'Chi Yaā un cúu Yaā jeē ni sáha ñayīví jíin tāca ndíhi jeē iyó, te máá yá cúu Jitoho andíví jíin ñayīví, te tu ndéé yá ini veñūhun cása ha ñayuu.

²⁵ Te ni tu cúmaní ni ñn nuū yā jeē cuáha ñayuu nuū yā, chi máá yá sáha jeē técu ñayuu, jíin jéé stáa i tachí i, jíin jéé nihín i ndíhi jeē jíni ñúhún i.

²⁶ 'Te ni sáha ya jeē chíji ñn-ni yucūn ni tahū tāca ñáyuu jeē ní nduu tācá nación, návāha coyūcú i ní cáhnu ñayīví, te ni tana yā cuiyā cotecu ñayuu jíin lugar coyūcú i jíjnáhan i.

²⁷ Te súcuan ni sáha ya chi cúní yā jeē nanducú yó yā, chi núu nanducú yó yā te cuni yō jeē iyó yá, chi yajni-ni cúu ya jíin ñn ñn yó.

²⁸ Chi máá yá sáha jeē iyó yó jíin jéé cátecu yō jíin jéé cáanda yō. Chi suni súcuan ni

cacahān sava tēe ñuu ni jéē cátava yaa: Suni nde yucūn maá yá cácuu yó, áchí.

²⁹ Te núu yucūn Yaā Dios cácuu yó, te ma cáni ni yō jeē ídolo oro chí plata chí yúu cúu ya, chí cájeni ni ñayuu jeē súcuan cáa ya, te súcuan cásvāha i ídolo.

³⁰ Te ni jendeyí ni yā síquī jeē tu ní cájecūhun ni i ní ndé saá, te vijna chí ndácu ya jniñu jeē ñáyuu ní cáhnu ñayīví na nácani ni i jeē stóo i cuēchi i.

³¹ Chi Yaā Dios, je ni jeni ya quiví jeē ndaā sándaā yā síquī ñayuu ñayīví, te ni jeni ya Jesús jeē maá yá sándaā. Te je ni steén cají Yaā Dios nuū tāca ñáyuu jeē maá yá ni jeni Jesús, chí ni nastécu yā Jesús, achí Pablo.

³² Te jeē ní cajini sōho i jnūhun jeē nátecu ndíyí te sava i ni cacahān catá i, te sava ga i ni cacahān i:

Vāha te núu cuu cuni sōho na jnúhun cáhán ni ndé inga jínu, áchí i.

³³ Te ni quenda Pablo mēhñu ñáyuu un cuahān de.

³⁴ Te cuahān jecu ñayuu jíin Pablo, te ni cacandíje. Te ñn de cúu Dionisio, tēe ndútútú jíin téé cácujuhnu cása ha junta nuū naní Areópago, jíin ñn ñahan nání Dámaris, jíin jecu gā i.

Jeē ni íne Pablo ñuu Corinto

18

¹ Yūcuán na te ni quenda Pablo ñuu Atenas, te cuahān de nde ñuu Corinto.

² Te yúcuan ní jito de nuū ñn jnáhan ñuu de hebreo, nání Aquila, te tēe región Ponto cúu de. Te sáá jecu-ni tiempo ni quee de jíin ñasihí de Priscila jeē ní quenda de Italia, chí rey Claudio ni ndacu de jniñu jeē na quéndacoo tāca ñáyuu hebreo ñuu Roma, jeē cúu capital Italia. Te ni jinū Pablo vehe Aquila jíin Priscila jeē cáyūcú de ñuu Corinto.

³ Te suni jniñu sáha tēe un sáha Pablo, chí cáquīcu de ñn cuu vehe. Te ni quendō Pablo jíin téé ún, te ni casájniñu de.

⁴ Te tāca quiví ndétātu ní jehēn Pablo vehe íi sinagoga ni nacani de jnūhun ya, te ni nducú ndéyí de jeē na cándíje ñayuu jnūhun Jesús, cúu jnáhan ñuu de hebreo jíin ñáyuu tácá nación jeē tu ní cájini i jnūhun ya.

⁵ Te ni jinūcoo Silas jíin Timoteo ñuu Corinto jeē véjicoo de nde Macedonia. Yūcuán

na te tuá na inga jniñu ní sáha Pablo, chi máni jnūhun ya nácani cájī de nuū ñáyuu cácuu jnáhan de hebreo, jeē maá Jesús cúu ya Cristo, Yaā jeē cáñūhun ni i quiji ya.

⁶ Te ni caquejéé i ni cacahān i siquī jnūhun ún, te ni cacahān xeēn i nuū Pablo. Te máá de ni caja de sahma de jeē cúu seña jeē stóo de i jíin cuéchi i, te ni cahān de jíin i:

Cuéchi máá ní cúu jeē jnahnū ndetū ni núu súcuan, te nasūu cuéchi máá ná cúu. Nde vijna te quihīn na núu ñáyuu tācá nación jeē tu cájini i jnūhun ya, te nacani ná jnūhun ya nuū i, áchí de.

⁷ Te ni quenda de ini vehe iī sinagoga, te ni jinū de vehe iñ tēe nání Justo ni condee de. Te chíñúhún tēe un Yáa Dios, te vehe tēe un néne yajni xiin véhe iī sinagoga.

⁸ Te Crispo, tēe cújéhnū ini vehe iī sinagoga, ni candíje de máá Jítóho yō nde jíin ndihī ñáyuu vehe de. Te cuehē ñáyuu ñuu Corinto ni cajini nahín i jnūhun nácani Pablo, te ni cacandíje i, te ni cajendute i.

⁹ Te iñ jecuáa ni sáha máá Jítóho yō jeē ní jito ndijin Pablo yā ni cahān yā jíin de:

Ma yūhu ró ni ma cási rō yuhu ró, chi níni nacani ró jnūhun ri.

¹⁰ Chi ndító ri rohó, te ma cúu sáha xeēn ni iñ ñáyuu jíin ró. Nacani ró jnūhun ri, chi coo cuehē ñáyuu candíje jnūhun ri ñuu yáha, áchí yá.

¹¹ Te ni condee Pablo yūcuán iñ cuiyā yosáva ni steén de jnūhun Yaā Dios nuū ñáyuu ún.

¹² Te ná cúu Galión gobernador Acaya, te ñáyuu hebreo jeē cúu jnáhan ñuu Pablo, iñ cáhnu-ni ni candonda i siquī Pablo. Te ni cajeca i de cuango i jíin de nde vehe juzgado.

¹³ Te ni cacahān i jíin Galión:

Tēe yáha yōhyo scáhán de tāca ñáyuu jeē inga modo chíñúhún i Yaā Dios, suu iñ modo jeē cúu contra siquī ley, áchí i.

¹⁴ Te quejéé Pablo cahān de núu, te ni cahān-ni Galión jíin ñáyuu hebreo un:

Ñáyuu hebreo jijnáhan ró, núu iñ cuéchi xeēn cúu, te cánuú cuni nahín rí jnūhun cácahān rō núu.

¹⁵ Te tuú, chi máni siquī jnūhun-ni jíin siquī ley maá ró jíin siquī tēe cástéén cúu.

Te na sándaā maá ró siquī jniñu yáha, chi tu sándaā rí siquī maá iñ jeē súcuan-ni, áchí de.

¹⁶ Te ni cahān de nuū i jeē na quíngoo i fuera.

¹⁷ Yūcuán na te ñáyuu griego ni cajni i Sóstenes, tēe cújéhnū ini vehe iī sinagoga, te máá fuera yehyí vehe juzgado ni cacani i de, te Galión chi tu ní sáha cuiñi de cuenta.

Jeē ní najinū Pablo ñuu Antioquía, te cuahān de vuelta unī jeē nacani de jnūhun ya

¹⁸ Te cuehē gā quivī ni condee Pablo ñuu Corinto. Yūcuán na te ni nacuatáhú de nuū tācá hermano yúcuan, te Aquila jíin ñasihí de Priscila cuango de jíin Pablo, te ni jinūcoo de ñuu Cencrea. Te yūcuan ní saté iñ Pablo xinī de, te súcuan stéén de jeē squícu de nuū Yaā Dios jeē ni jéjnūhun de. Te ni quivícoo de barco jíin Aquila jíin Priscila quihīn de región Siria.

¹⁹ Te ni jinūcoo de ñuu Efeso, te yūcuan ní caquendōo Aquila jíin Priscila. Te ni jehēn-ni Pablo vehe iī sinagoga, te ni cahān de jnūhun ya jíin jnáhan ñuu de hebreo jeē cándutútú yúcuan.

²⁰ Te ni cacahān ndahú i jíin de jeē na cónene de jecu gā quivī jíin i, te tu ní jéhe de jnūhun.

²¹ Chi ni nacuatáhú de nuū i, te ni cahān de:

Cánuú jéé nuhūn ná ñuu Jerusalén cone ná vico. Te núu cúní Yaā Dios te ndee tucu ná núu ní, áchí de.

Te ni quenda de ñuu Efeso, te ni quiví de barco cuahān de.

²² Te ni jinū de ñuu Cesarea, te ni jehēn de ñuu Jerusalén. Te nuū ní ndihī ni cahān de jíin grupo ñáyuu cácaandíje yūcuán, te cuanuhun de ñuu Antioquía.

²³ Te ni coyūcú de yūcuán jecu quiví, te sáa te ni quenda tucu de cuahān de ni jica cuu de ní Galacia jíin Frigia. Te ñáyuu cácaandíje ni cahije ga ni i jíin jnūhun ya ni sáha de.

Jeē ní nacani Apolos jnūhun Jesús ñuu Efeso

²⁴ Te ñuu Efeso ni quee iñ tēe hebreo nání Apolos, te tēe ñuu Alejandría cúu de. Te vāha nácani de jnūhun ya, chi vāha jíin de jnūhun jeē cahán tutu iī.

²⁵ Te je ni cutūhva vāha tēe un jíin jnūhun máá Jítóho yō Jesús, vēsú jíin de máni máá

jnūhun ya jeē ni stéén Juan ná ni scuándute de ñayuu, te ndíhví ni de stéén cají de jnūhun ya nuū ñáyuu.

²⁶ Te jéhnū-ni ni nacani de jnūhun ya ini vehe iī sinagoga. Te ni cajini sōho Aquila jín Priscila jnūhun nácani de, te ni cajeca de Apolos cuangoo sín de, te ni cacastūhun yúcún ndíndúú de jnūhun ya jeē ná tu cuni Apolos.

²⁷ Te cúní Apolos quihín de nde región Acaya. Te je cáandíje sava ñayuu yúcuan ní sáha Yaā Dios síquī jeē váha ni yā. Te tācá hermano ñuu Efeso ni cachindéé ñáhán i de, chí ni catee i carta quihín de jín núū ñáyuu cáandíje cáyūcú Acaya jeē na cuatáhú i Apolos. Te nuū ni jínū de yūcuán, te vāha ni chindéé ñáhán de tāca ñáyuu cáandíje un jín jnūhun ya.

²⁸ Te nuū tāca ñáyuu ñuu un ndé jín jnāhan ñuu de hebreo jeē cáyūcu yúcuan, ní steén cají de ndese cástíví tāca jnāhan hebreo de síquī jnūhun ya. Te tu ní cánihín jnāhan de un jnūhun cahán síquī jeē ni stéén de, chí jín jéē cahán tutu iī ni steén de jeē Jesús cúu Cristo, Yaā jeē cáñūhun ni de quiji ya.

Jeē ni íne Pablo ñuu Efeso

19

¹ Te ní ní néne Apolos ñuu Corinto, te ni yāha Pablo ichi síquī ñuu Efeso, te ni nanuu de ni jinū de máá ñuu ún. Te yūcuán ní nijnáhan de jín tijni tēe cáandíje.

² Te ni cajnūhún de tēe ún:

¿A ní canihín ní Espíritu Santo ná ni candíje ní, chí ná tuú? áchí de.

Te ni cacahán de jín Pablo:

Tuú, chí ni ná tu nihín na jnūhun jeē iyó Espíritu Santo, achí de.

³ Yūcuán na te ni cahán Pablo:

¿Na síquī ni cajendute ní núu sūcuán? áchí de.

Te ni cacahán de:

Ni cajendute ná síquī jnūhun ni steén Juan, achí de.

⁴ Te ni cahán Pablo:

Jeē ní scuándute Juan ñayuu cúu jeē ni stéén de jeē na nácani ni i jeē stóo i cuēchi i, te ni cahán de jeē na cándíje i máá Yáa quiji jeē cúu Cristo Jesús, áchí Pablo.

⁵ Te nuū ní cajini sōho tēe un jnūhun yāha, te ni cajendute de jeē ní cacandíje de máá Jítóho yō Jesús.

⁶ Te ni soó Pablo ndíndúú ndaha de xinī tāca tēe ún, te ni quíví ní Espíritu Santo ini anuá de jínáhan de, te ni cacahán de sín sín yuhu te ni canacani de jnūhun ya.

⁷ Te ni iyo nájñūhun uxī uū jnahán tēe.

⁸ Te unī yoō ni jehēn jehēn Pablo vehe iī sinagoga. Te jéhnū ni nacani de jnūhun ya, te ni nducú ndéyí de jeē na cándíje ñayuu jnūhun ndese ndácu Yaā Dios jniñu.

⁹ Yūcuán na te sava i ní cacunihni ni i te tu ní cáandíje i, chí sa ní cacahán neé i síquī jnūhun vāha Yaā Dios jín ñáyuu cánataca. Jeē yúcuan ní cujiyo-ni Pablo nuū ñáyuu ún, te ñayuu cáandíje cuangoo i jín de. Te ndijnahan quíví ni steén de nuū ñáyuu ún ini escuela iñ tēe nání Tiranno.

¹⁰ Te sūcuán ni sáha de uū cuiyā, te tāca ñáyuu cáyūcu Asia, cúu ñayuu hebreo cúu ñayuu tāca gá nación, ni cajini sōho i jnūhun máá Jítóho yō Jesús.

¹¹ Te ni jēhe Yaā Dios poder nuū Pablo jeē sáha de cuehē jniñu jéhnū téyí.

¹² Te nde pañú jín sahma jeē ní jni de ni cajengoo jín núū ñáyuu cácuñu, te ni canduvāha-ni i cuehyí cándoho i, te ni quendacoo tachí ini i cuangoo.

¹³ Te jecu tēe hebreo cájica cuu de jeē quénehen de tachí ini ñayuu, te ni cajeni síquī ni de jeē suni jín poder maá Jítóho yō Jesús quenehen de tachí, te suhva ni cacahán de jín tāca táchí:

Jín poder Jesús jeē nácani Pablo jnūhun ya, cáhán nīhin ri jín ró jeē na quénda ró quihín rō, achí de.

¹⁴ Te sūcuán ni casáha uxā sēhe yí iñ tēe hebreo nání Esceva, cúu de iñ sutū cujéhnū.

¹⁵ Te ná ni casáha de, te ni cahán-ni tachí ún:

Je jíní rī Jesús, te suni jíní rī Pablo. Te róho jínáhan ró ¿ndé tēe cácuu ró jéē cuatáhú rí rohó? áchí jín de.

¹⁶ Te tēe ndóho tachí un ní ndonda de, te ni cundeyí de síquī ndihúxá tēe ún. Te ni sáha xeēn ndasí de jín ndé ni catují te ni cacuvichí lī ni quendacoo vehe un ní cajinu cuangoo.

17 Te jnūhun yáha ní cajini tāca ñáyuu cáyūcú ini ñuu Efeso, cúu ñayuu hebreo cúu ñayuu tāca gá nación, te yōhyo ni cayūhú i, te ni cacahān i jeē yóhyo cújéhnū máá Jítóho yō Jesús.

18 Te cuehē ñayuu jeē ní cacandíje ni quijicoo i nuū Pablo ni nacani ndaā i jnūhun tācá jniñu neé ní casáha i.

19 Te cuehē i jeē ní casáha jniñu tásí ní jinūcoo i cándiso i tutu i, te ni cajehmu i tutu un jító nuū tāca ñáyuu. Te ni catava i cuenta nasaa ndéé tutu ní cáyū ún, te ni cajini i jeē uú xico uxí mil xūhun plata cúu.

20 Te ni jitē jnūhun máá Jítóho yō cuahān, te ndihí ñayuu ni cajini i jeē kujéhnū ndasí jnúhun ya.

21 Te nuū ní ndihí tācá jniñu yáha, te jéni téyí ni Pablo jeē quihín de Macedonia jíin Acaya, te sáa te najinū de ñuu Jerusalén. Te ni cahān de jeē na najinū de ñuu Jerusalén, yūcuán na te jíni ñúhún quihín de nde ñuu Roma.

22 Te uū tēe jeē cáchindéé ñáhán jíin Pablo cúu Timoteo jíin Erasto, te ni scáandu de ndíndúú tēe yāhá cuángoo de nde Macedonia, te ni quendōo máá de Asia jecu gā quiví.

Jeē ní cacuvaā ñayuu ñuu Efeso

23 Te suu quiví ún yōhyo ni candonda ñayuu síquī jnúhun ya.

24 Chi ni iyo ñn tēe sájniñu síquī plata, nání de Demetrio. Te máá de jíin ndihí tēe cásajniñu jíin de, cánihín de cuehē xūhún, chí jíin plata casáha de vehe lulí jéé modo veñūhun ídolo i jeē cúu yaā Diana.

25 Te Demetrio ni nastútú de tēe cásajniñu jíin de jíin táca gá tēe jeē suni jniñu yúcuán casáha, te ni cahān de:

Tátā, cájini ni jéé síquí jniñu casáha yó yáha vāha cánihín yō xūhún.

26 Te cájito ní te cájini sōho ní jéé ñn tēe nání Pablo chí cáhán de jeē násūu yāā cácuu jeē casáha ñayuu. Te je ni scandíje de cuehē ñayuu, násūu máá ñn-ni ñuu Efeso yāhá chí ní cáhnu Asia.

27 Te quiyūhú ni na jéé cahān ñayuu jeē tu ndé jéjníñu jeē casáha yó. Te sanaa te suni súcuán cahān i coto i máá veñūhun yaā síhí Diana jeē kujéhnū, te suni sájéé ni i nuū yaā Diana, te ma cúu ga kujéhnū ya vēsú

ndívii ñayuu Asia jíin ñáyuu ní cáhnu ñayiví cáchiñúhún i ya vijna, áchí de.

28 Súcuán ni cajini sōho de jnūhun yáha te yōhyo ni caquítī ni de, te ni cacana jee de:

Cújéhnū téyí Diana, yaā cúu patrona ñuu yō Efeso, achí de.

29 Te ñayuu ñuu Efeso ni cacuvaā i, te ñn cáhnu-ni ni candonda i ni cajniñ i Gayo jíin Aristarco cuangoo i jíin de nde vehe nuū cándutútú ñáyuu casáha i junta. Te ndíndúú tēe un cácuu tēe Macedonia, te cájica de jíin Pablo.

30 Te cúní Pablo quiví de nuū ñáyuu cuehē un cáhán de jíin i, te ñayuu cáchandíje tu ní cájēhe i jnūhun quihín de.

31 Te suni sava tohō jeē cácuu amigo de cáyūcu Asia, ni catají jnúhun cuahān nuū de, cácahān ndahú jíin de jeē ma quihín de nuū ní cacutútú ñáyuu ún.

32 Te ñayuu ní cacutútú un, sava i ni cacana jee i ñn jnūhun te sava ga i inga jnūhun, te súcuán ni cacuvaā teyí i, te cuehē i ni tu cájini cuítī i na síquī cúu jeē ní cacutútú i.

33 Te sava tēe hebreo ni cajeni de ñn jnáhan de jeē naní Alejandro nuū ñáyuu cuehē ún, te ni cacastūhún de nuū tēe ún na síquī cúu jeē cacuvaā i. Yūcuán na te Alejandro ni sáha de seña jíin ndaha de jeē na cúnayúú ñáyuu, chí cúní de cahān de jíin i jeē násūu cuéchi tāca ñáyuu hebreo cúu.

34 Te ni canacuni ñayuu un jéé tēe hebreo cúu de, te jeé yúcuán ní cacana jee téyí gá i najnūhun uū hora:

Cújéhnū téyí Diana, yaā cúu patrona ñuu yō Efeso, achí i.

35 Yūcuán na te ni cacunahín ñáyuu ní sáha tēe cúu secretario ñuu ún, te ni cahān de:

Nihín ñáyuu ñuu yō Efeso, ndihí ñayuu chí je cájini i jeē cándito vāha yó veñūhun yaā Diana jíin imagen Diana jeē ní ñinga nde andiví.

36 Te ni ñn chí ma cúu cahān jeē tú ndaā jnūhun yáha. Núu súcuán te vāha ga na cásí ní yuhu ní, te ma sáha yachí ní ñn jeē tu ní nacani vāha ni ní síquī.

37 Chí tēe yáha ní caquindeca ní de yāhá vēsú tu ní casáha de ni ñn cuéchi síquī Diana yō, ni tu ní cácahān ndevāha de ni ñn jnūhun síquī.

³⁸ Te Demetrio jíin táca gá tēe jeē ñn-ni jniñu cásáha jíin de, núu cécuni de cahān de cuēchi siquī ñn tēe, te na quíngoo de nde vehe juzgado nuū cáyūcu juez, tēe cásándaā jniñu, te yūcuán cundaā siquī de jíjnáhan de.

³⁹ Te núu íyó jnūhun jeē ma cúu cundaā yūcuán, te jíni ñúhún cundaā nuū ñn junta nájnūhun tájnúni ley.

⁴⁰ Chi yúhú ná jeē sanaa te cahān tāca tóhō Roma jeē siquī gobierno de ni candonda yó, chi ma nihín yō jnūhun castūhun yó na siquī cúu jeē ní cacutútú yó ni cacuvaā yō vijna, áchí de.

⁴¹ Te nuū ní ndihí ni cahān secretario jnūhun yáha, te ni cajitē ñayuu un cuángoo.

Jeē ni jéhēn Pablo Macedonia jíin Grecia

20

¹ Te ná ni yáha jéē ní cacuvaā ñayuu, te ni cana Pablo ñayuu cécandíje, te ni jeni ichí de i. Te ni cañunundee jnáhan de jíin Pablo jeē ní nacuatáhu de, te cuahān de Macedonia.

² Te ni jica cuu de tēcá ñuu yúcuan. Te jíin cuéhē jnūhun ni stihví ni de tēcá hermano cécandíje. Te ni jinū de Grecia.

³ Te ni condee de yúcuan úní yoō. Te je yajni quihín de jíin barco nde Siria nuú, te máá quívī ún te ni nihín de jnūhun jeē jnáhan ñuu de hebreo ni casquíjnáhan jnūhun jeē ndonda siquī de ichi nuū quihín de, te jeē yúcuan ní nacani ni de te cuahān tucu de ichi Macedonia.

⁴ Te ni cahīyo sava tēe cájica jíin Pablo, te cánani de Sópater ñuu Berea, Aristarco jíin tēe nání Segundo nde ñuu Tesalónica, Gayo ñuu Derbe, Tíquico jíin Trófimo nde Asia, jíin Timoteo.

⁵ Te ni cacandu tēe yáha, te cándētu de Pablo jíin sáña, Lucas, nde ñuu Troas.

⁶ Te nuū ni yáha vico jeē cáyeji i pan jeē tu yíhi levadura, te jíin barco ni quendacoo ná ñuu Filipos, te nde nuū uhún quívī te ni canajnáhan ná jíin de nde ñuu Troas. Te ñuu yúcuan ní coyūcu ná uxā quívī.

Jeē ni íne Pablo ñuu Troas

⁷ Te máá quívī domingo ni candutútú ñayuu cécandíje jeē cáji i pan, nájnūhun ni steén maá Jítoho yō jeē núcūhun ni yō siquī yā. Te ni steén Pablo jnūhun nuū ñayuu ún. Te siquī jeē inga quívī un jíni ñúhún quenda

de quihín de, te nahán ní nacani de jnūhun nde ni cuñuú.

⁸ Te vehe yósó jnáhan cúu vehe ún. Te nde cuarto xinī nuū ní candutútú ná un ní ñyo cuehē lámpara ni cundijin.

⁹ Te ñn sūchi yí nání i Eutico, néne i yuhu ventana. Te jeē ní cunahán nacani Pablo jnūhun, te yōhyo jíi i máhná, te ni quixī-ni i. Te nde piso unī un ní ñinga i nde nuū ñúhun. Te je ni jihí i ni candonehen de i.

¹⁰ Yūcuán na te ni nuu Pablo te ni jita ndeyi de ni canehen de i ni ñnunundee de i, te ni cahān de:

Ma yūhu ní jíjnáhan ní, chi ni natecu i, áchí de.

¹¹ Te ni ndaa Pablo, te ni yeji de pan jíin i jíjnáhan i jeē cánucūhun ní de siquī yā. Te nahán gá ni nacani de jnūhun nde cuacundijin. Yūcuán na te ni quenda de cuahān de.

¹² Te Eutico chi íyó váha i cuanuhun i jíin de jíjnáhan de, te ndivii ñayuu ún yōhyo cácusī ni i.

Jeē ní quenda Pablo ñuu Troas cuahān de ñuu Mileto

¹³ Te ni quívicoo ná ini barco cuangoo ná. Te Pablo chi cúní de caca jéhé de, te ni cundaā jeē najnáhan ná jíin de nde ñuu Asón.

¹⁴ Te nuū ní canajnáhan ná jíin de ñuu Asón, te ni quívī de barco te cuangoo ná jíin de nde ñuu Mitilene.

¹⁵ Te yúcuan ní quendacoo tucu ná jíin barco te inga quívī ni jinūcoo ná xiin Quío, ñuhun jeē íne sán nuū ndúte. Te quívī uní ni jinūcoo ná Samos jeē súni nuū ndúte íne, te ni caquendōo ná Trogilio. Te quívī cuún ni jinūcoo ná ñuu Mileto.

¹⁶ Te tu ní jéngoo ná ñuu Efeso, chi jéni ni Pablo jeē yáha-ni de ñuu un quihín de, náváha ma cucuéé de Asia te naa tiempo nuú, chi núú de jinū yachí de ñuu Jerusalén cone de máá quívī Pentecostés núu na cúu.

Jeē ní jeni ichí Pablo tēe jénu cándiso jniñu nuū ñayuu cécandíje ñuu Efeso

¹⁷ Te ná íne ga Pablo ñuu Mileto, te ni tají de jnūhun cuahān nde ñuu Efeso jeē na quíjicoo tēe jénu cándiso jniñu nuū ñayuu cécandíje yūcuán.

¹⁸ Te nuū ní quecoo tēe ún, te ni cahān de:

Je cájini vāha ní ndese ni jica ndaā na ndé ná ni quee nuú ná Asia te nde vijna.

¹⁹ Chi ní tiempo jeē ni íne ná jíin ní te nde vijna, jéjníñu vāha na síquī jnúhun máá Jítóho yō, te tu ní sándúxí ná maá ná. Te íyó jínu ni ndahyū na jéhē ñáyuu. Te ni ndoho ná jnúndóho ni casáha jnáhan ñuu ná hebreo, chi ni casquíjnéhan jnúhun i síquī ná.

²⁰ Te cájini ni jéē tu ní táñúhún ná ni ñn, vésú ndese ga cácahān ñayuu síquī ná, chi ni nacani ná ndihí jnúhun ya jeē quéndōo vāha ní sáha. Te ni steén na jnúhun ya nuū ni jíjnéhan ní, cúu nuū chitú cúu tēcá vehe ní.

²¹ Te ñnuú-ni jnúhun ni nacani ná núu ndihí ní, cúu jnéhan ñuu ná hebreo cúu ñayuu táca gá nación, chi ni cahān na jéē na nacani ni ni jéē stóo ni cuéchi ní te na cándíje ní máá Jítóho yō Jesucristo.

²² Te vijna chi ñúhun ichí ná quihín ná ñuu Jerusalén, chi stíhvī ni Espíritu Santo sãña quihín ná. Te tu jíin ná ndese ga coo jíin ná yūcuán.

²³ Te íyó ñn jeē jiní na, cúu jeē chune i sãñá vecāa te quiji jnúndóho síquī ná, chi Espíritu Santo súcuan cáhān jíin ná ndijnéhan ñuu nuū jíca ná.

²⁴ Te ni tu sáha ná cuenta vésú na cáhni i sãñá, chi jeē cuní na cúu jeē na sínu vāha ná jniñu jeē ní tee máá Jítóho yō Jesús síquī ná, te súcuan cusí ni ná. Te jniñu un cúu jeē nacani ná jnúhun vāha ya nuū táca ñáyuu ndese vāha ni Yaā Dios jíin yó.

²⁵ "Te je ni jica cuu ná, ní nacani ná jnúhun ya nuū ní ndese ndácu Yaā Dios jniñu. Te vijna chi jíin na jéē ni ñn ní ma najnéhan ga yō nuū ñáyiví yáha.

²⁶ Jeē yúcuán cástúhun cájí ná nuū ni jíjnéhan ní vijna jeē násūu cuéchi ná cúu núu ndé ñn ní stívi.

²⁷ Chi ni nacani ná núu ní ndihí jnúhun Yaā Dios jeē ni sãndaā yā ndese coo, te tu ní quéndōo ni ñn jnúhun.

²⁸ Núu súcuan te coto vāha ní máá ní jíin ndihí ñayuu cácañíje, chi Espíritu Santo ni jeni ya nihín jéē cóndito ní ñáyuu máá Jítóho yō, chi ni nacuaan ya i jíin níñi yā.

²⁹ Chi jeē quihín na te jíin na jéē quijicoo tēe cástáhú quívicoo mēhñu ní, te nducú de snāa de jnúhun ni cajetáhú ñáyuu cácañíje,

te xeēn sáha jnúhun stáhú de nájnúhun xeēn sáha yihí jeē cájehni tī lanchi.

³⁰ Te suni nuū grupo maá ní quejéé sava de cahān de jnúhun stáhú, te stáhú de sava ñayuu cácañíje jeē na cóndiquín i jnúhun stáhú stéén de.

³¹ Jeē yúcuán condito ní jéē ma cóo súcuan. Te ma náa ni ni jéē uní cuiyā ndiquiví ndíñuu ni condihvī ndasí ni na ndé ndahyú na jéhē ni, ní jeni ichí ná ñn ñn ní jíjnéhan ní.

³² "Te vijna, hermano, jícan tahú na núu Yaā Dios jeē coto ya nihín. Chi jnúhun jeē vāha ni yā ndíso poder sáha jeē íje ga ní jíin, te suu sáha jeē ñn quiví te cuāha ya tahū jeē ndujéhu luu ní ndé jíin ndihí ñayuu ní nacaji ya jeē cóo ndoo coo íi i nuū yā.

³³ Tu ní ndúcú ná jeē nihín na xúhun chí sahna nuū ní ñn i.

³⁴ Chi je cájini vāha ni jéē sa suhva ni sájniñu nihín ná návāha nihín na jéē cótecu na ndé jíin táca tēe cájica jíin ná.

³⁵ Te níni ní steén na núu ni jéē súcuan jíin níñu sájniñu yó návāha nihín yō jeē cuāha yó núu ñayuu cúmaní nuū. Te ma náa ni ni jnúhun jeē ni cáhān máá Jítóho yō Jesús, chi suhva ni cahān yā: Ndetū gā quendōo yó jéē cuāha yó vésú jeē nihín yō, achí yá. Achí Pablo.

³⁶ Te ni ndihí ni cahān de táca jnúhun yáha, te ni jecuiñi yití de, te ni jícan tahú de jíin ndihí tēe ún.

³⁷ Yūcuán na te ndihí de ni cajecunundee jnéhan de jíin Pablo ni catechúhú de jeē cánacuatóhú de, te ni candahyū de.

³⁸ Chi cácuquíhyá ndasí ni de jíin jnúhun ni cahān Pablo jeē ma ndácoto jnéhan ga de. Te cuango-ni de jíin Pablo nde núu ín barco.

Jeē cuánuhun Pablo ñuu Jerusalén

21

¹ Yūcuán na te ni caquendōo tēcá hermano ñuu Efeso, te ni quívicoo ná barco, te cuango ndaā-ni ná ndé Cos. Te inga quiví ni jinūcoo ná Rodas, te yūcuán ní quenda-coo ná te ni jinūcoo ná ñuu Pátara.

² Te ni cane ñn barco jeē quihín Fenicia, te ni quívicoo ná cuángoo ná.

³ Te nuū ní cajito ná núu Chipre jeē íne sín nuū ndúte, te ni quendōo ichi lado jecó

barco, chi ni cayāha ná cuángoo ná nde Siria. Te ni jinūcoo ná ñuu Tiro, chi yūcuan ndóo jeē ndíso barco ún.

⁴ Te ni jenanducú ná ñayuu cá candíje, te ni caquendōo ná jíin i uxā quivī. Te máa Espíritu Santo ni steén nuū i jeē quíji jnūndóho siquī Pablo ñuu Jerusalén, te jeē yūcuan ní cacahān i jíin de jeē ma quihín de.

⁵ Te ni yāha uxā quivī ún, te ni quendacoo ná. Te tāca tēe cá candíje jíin ñasihí de jíin séhe de ni cachuhun ichí de sāña ní jengoo de jíin ná nde yatā ñūū, te ni cajecuiñi yití ná jíin de yumar te ni cajicān tahu na.

⁶ Te ni cañunundee jnāhan ná ní canacu-atáhú ná yūcuán, te ni quivicoo ná barco cuangoo ná. Te ni canandió cóo de cuanungoo de vehe de.

⁷ Te ni quendacoo ná ñuu Tiro cuangoo ná jíin barco, te ni jinūcoo ná ñuu Tolemaida ni quendacoo ná ini barco. Te yūcuan ní jengoo ná ní cacahān na jíin táca hermano, te ni caquendōo ná jíin de ñn quivī.

⁸ Te inga quivī un ní cajica jéhe ná jíin Pablo, te ni jinūcoo ná ñuu Cesarea, te ni quivicoo ná vehe Felipe, tēe nācani jnūhun vāha ya. Tēe un cúu jnāhan jeē ndihúxá tēe jeē ní casaja staā nuū ñāhan viuda. Te ni caquendōo ná jíin de.

⁹ Te tēe un íyó cúun sēhe síhí de jeē cáhīyo máa i, te cánacani i jnūhun Yaā Dios.

¹⁰ Te ni coyūcu ná yūcuán tijni quivī. Te ichi Judea ni quíji ñn tēe nācani jnūhun Yaā Dios, nání de Agabo.

¹¹ Te ni quee de nuū ná. Te ni quihin de sanchíi Pablo, te ni jihni de ndaha de jíin jéhe de, te ni cahān de:

Suhva cáhán Espíritu Santo. Jnāhan yó hebreo súcuan cuhni i tēe chíi sanchíi yáha ini ñuu Jerusalén, te nastúu i de nuū ñayuu sín nación, áchí de.

¹² Te jeē ní cajini sōho na jnūhun yáha te máa ná jíin táca tēe cá candíje cáyūcú ñuu Cesarea ni cacahān ndahú ná jíin Pablo jeē ma quihín de ñuu Jerusalén.

¹³ Yūcuán na te ni cahān Pablo:

¿Najehē cándahyū ni jíjnāhan ní, te cásáha ní jeē cucuíhyá ni ná? Chi sāña je íyó túhva ná jēe násūu máa jēe cónuhni ná ini ñuu

Jerusalén, chi suni jeē vēsú na cúu na jēe siquí maá Jítóho yō Jesús, áchí de.

¹⁴ Te jeē tu ní cúu cuiñi casicoo ná, yūcuán na te sa suhva ni cacahān ná:

Na cóo ndese cúni maá Jítóho yō nuu súcuan, áchí ná.

¹⁵ Yūcuan na te sáa te ni casátūhva ná, te cuangoo ná ñuu Jerusalén.

¹⁶ Te suni jecu tēe ñuu Cesarea jeē cá candíje cuangoo de jíin ná. Suni cuahān ñn tēe Chipre nání de Mnasón, te je ni cuu cuehē cuiyā candíje de. Te ná ni jinūcoo ná ñuu Jerusalén, te ni cacoyūcu ná vehe de.

Jeē ni jécondēhe Pablo Jacobo

¹⁷ Te nuū ni jíinūcoo ná ñuu Jerusalén, te hermano cáyūcú ñuu ún yōhoyo ni cacusiñi de jeē ni jíinūcoo ná.

¹⁸ Te inga quivī un ní cajengoo ná jíjnāhan ná jíin Pablo vehe Jacobo, te yūcuan ní candutútú táca tēe jéhnu cándiso jnīñu nuū ñayuu cá candíje.

¹⁹ Te Pablo ni sáha de saludar tēe ún jíjnāhan de. Yūcuán na te ni castūhún de ndihí jniñu ní sáha Yaā Dios ná ni nacani de jnūhun ya nuū ñayuu táca nación jeē tu cájini i jnūhun ya.

²⁰ Te ni cajini sōho de jnūhun yáha, te ni cacahān de jeē yóhoyo cújéhnu Yaā Dios. Te ni cacahān de jíin Pablo:

Hermano, vijna te jíini ni náa cuehē mil jnāhan ñuu yō hebreo ni cacandíje i Jesús, te cácahān ñihin i jeē cánuú squícu yó ley jeē ni jéhe ya nuū Moisés.

²¹ Te ni canihīn i jnūhun cácahān jeē stívī ní steén ni núu táca jnāhan yó ñayuu hebreo cáyūcu jíca i táca gá nación, chi ni steén ni núu i jeē ma cuatáhú gá i nuū ley Moisés, ni ma sáha ga i circuncidar sēhe i, ni ma cuatáhú gá i táca gá jeē tajnúni jenahán.

²² ¿Ndesé sáha ní núu súcuan? Chi cuni ñayuu un jēe ní ndee ní te cutútú cuéhē i.

²³ Suhva sáha ní núu súcuan. Yáha íyó cúun tēe jeē ní cajejnūhun de ñn jeē squícu de nuū Yaā Dios.

²⁴ Cueca ní tēe yáha quíhīn ni jíin de templo, te cuchi ní nasándoo ní máa ní jíin de nuū yā, te cuaan ní jeē socó de nuū Yaā Dios jíjnāhan de. Yūcuán na te cuu sāté de xinī de, te suu stéén jeē ní casquícu de ndihí jeē ní cajejnūhun de nuū yā. Yūcuán na te cuni

ndihí ñayuu jeē tú ndaā tāca jnúhun ni cajini sōho i siquī ní, chi coto i jeē suni máá ní sa squícu ní ley yā.

²⁵ Te ñayuu tācá nación jeē násūu ñáyuu hebreo cácuu i te ni cacandíje i ya, je ni catee ná carta cuahān nuū i jeē tu cánuú squícu i ley un, chi máá-ni jeē ma cáji i cūñu jeē ni sóco nuū ídolo ni ñiñi ni quití jeē jihí jeē tu jéti ñiñi tī, te ni ma cáca jnéni i, áchí de.

Jeē ní cajni de Pablo ini templo

²⁶ Yūcuán na te ni jeca Pablo tēe ún, te inga quiví un ní cajichi de ni canasándoo de máá de nuū yā. Te ni quiví Pablo ini templo ni cachi de nuū sutú na quiví jínu jeē nasándoo tēe un máá de nuū yā, te quindecas de quití jeē sóco de nuū yā.

²⁷ Yūcuán na te cácuu de jeē sínu de ndihúxá quiví jeē cándundoo de nuū yā, te sava jnáhan hebreo de jeē véjicoo Asia ni cajini de jeē íne Pablo ini templo, te ni cascáhán de ndihí ñayuu, te ni cajni i Pablo.

²⁸ Te ni cacana jee i:

Tēe ñuu yō Israel, cuāha núú ní ndaha jíjnáhan ní na jni yó tēe yáha. Chi máá de cúu tēe jíca cuu ní cáhnu stéén de nuū tāca ñáyuu, te cáhán de siquī nación yō jíin siquī ley jeē ni jēhe ya nuū Moisés jíin siquī templo yáha. Te suni je ni quivícoo de jíin jecu tēe griego ini templo i yāhá, te súcuan stívi de jnúhun i jeē cahán jeē ma cúu quiví ñayuu ini templo te núu nasūu ñáyuu hebreo cúu i, áchí.

²⁹ Chi nde na íne Pablo ini ñuu un ní cajini tēe hebreo jeē jíca de jíin Trófimo, tēe ñuu Efeso jeē násūu hebreo cúu de, te cájeni ni de jeē ni quiví tēe un jíin Pablo ini templo.

³⁰ Te ndihí ñayuu ñuu un ní cuvaā, te ni cacutútú-ni i, te ni cajni i Pablo, te ni castáa i de ni quenehen i de ini templo un, te ni canacasi-ni i yéhyí.

³¹ Te ni cacuni i cahni i de núú. Te general, tēe cújéhnu nuū ndihí soldado, ni nihin de jnúhun jeē ndihí ñayuu ñuu Jerusalén ni candonda i cácuvaā i.

³² Te ni jeca general tācá soldado jíin capitán, te cájnu de cuango de nde nuū cáhlin ñayuu cuehē ún. Te ná ni cajito ñayuu jeē ni jíincoo general jíin soldado, te ni cajecuiñi i jeē cácani i Pablo.

³³ Yūcuán na te ni quiví general mēhñu ñáyuu, te ni jni de Pablo, te ni ndacu de jniñu jeē conuhní de jíin úu cadena. Yūcuán na te ni cajnúhun general ndé tēe cúu Pablo te na cuēchi ni sáha de.

³⁴ Te ni cacana ñayuu cuehē ún, sava i ñin jnúhun te sava ga i inga jnúhun, te tu ní cúu cuni de na cuēchi ni sáha Pablo, chi cácuvaā i. Te ni ndacu de jniñu cuahān Pablo nde cuartel.

³⁵ Te nuū ni jíin Pablo escalera cuartel ún, te soldado ni cajni de Pablo cándiso de siquī jeē cácuu ñayuu ún jni i Pablo sáha xēn i jíin de.

³⁶ Chi ndihí i véjicoo i ichi yátá soldado, te cacana jee i:

Cahni ni tēe jíin, áchí i.

Jeē ní cáhán Pablo jehē maá de nuū ñáyuu

³⁷ Te cásquiví de Pablo ini cuartel nuū, te jíin jnúhun griego ni cahán Pablo jíin general:

¿A cuáha ni jnúhun cahán ná ñin jnúhun jíin ní? áchí de.

Te ni cahán general jíin de:

Te jíin rō cahán rō yuhu griego jeē súcuan.

³⁸ Núu súcuan te nasūu rōhó cúu tēe Egipto jeē jé ni cuu quiví ni ndonda siquī gobierno te ni quenehen cuūn mil tēe jéni ndiyí cuango jíin de nde nuū ñuhun tēhē, áchí.

³⁹ Yūcuán na te ni cahán Pablo:

Tuú, chi tēe hebreo cúu ná, te ni cacu ná ñuu Tarso, ñin ñuu jeē cujéhnu ndañū Cilicia. Te quiñuhun ni ni cuáha ní jnúhun na cáhán na jíin ñáyuu yáha jíjnáhan i, áchí de.

⁴⁰ Te general ni jēhe de jnúhun jeē cahán de. Te ni jecondichi Pablo nuū escalera, te ni sáha de seña jíin ndaha de jeē na cúu nayúú ñáyuu ún. Te nuū ní cuu nayúú-ni i, te jíin jnúhun yuhu ñúu de hebreo ni cahán de:

22

¹ Ndhí níhín jeē cácuu ní jnáhan ñuu yō jíin ndihí níhín jeē cácujeñu ní núu ñúu yō, cuni sōho ní jnúhun cahán na jēhē maá ná, áchí de.

² Te ni cajini sōho i jeē cahán Pablo yuhu hebreo jeē cúu yuhu ñúu i, te víhyá gā ni cacunahín i. Te ni cahán Pablo:

³ Máá ná cúu jnáhan ñuu yō hebreo, te ni cacu ná ini ñuu Tarso ndañúu Cilicia. Te ini ñuu Jerusalén yāha ní jehnu ná, te ni cutūhva ná núu Gamaliel, te ni steén de nuū ná ndihí siquī ley jeē ni jéhe ya nuū jíi yō. Te nde jíin ini jíin ánuá na ní nducú ndéyí ná squícu ná súcuan nuū Yaā Dios, nájñuhun cásáha máá ní vijna.

⁴ Te ni jito xeēn na ñáyyu cácadíje i jñuhun Jesús te nde cuní na jéē na cúu ndihí i núú. Chi cúu tēe cúu ñahan ni jñi ná ni chuhun ná vecāa.

⁵ Te sutū cujéhu ga jíin táca tēe jéhu cándiso jníñu nuū ñúu yō, cácuu de testigo jeē súcuan ni sáha ná, te suni máá de ni cajéhe de tijni carta cuahān na jíin jéē cuáha na núu táca jnáhan yó cáyūcú ñuu Damasco. Chi cuahān ná ñuu un jéē jñi ná ñáyyu cácadíje i Jesús te quindeca ná i ñuu Jerusalén yāha, návāha ndoho i núú.

Jeē ní cachi Pablo ndese ni sama ya de (Hch. 9.1-19; 26.12-18)

⁶ Te ni quihin ná ichi cuahān ná, te cuacuyajni ná ñuu Damasco, te nájñuhun caxū cúu. Te ichi ándiví ní quiji ñn nduva ní ndindéé ndaxín núu ná.

⁷ Te ni cotúu-ni ná núu ñuhun, te ni jini sōho ná ñn jñuhun cáhán jíin ná: Saulo, Saulo, ¿najehe jito xeēn rō ruhū? achí.

⁸ Yūcuán na te ni cahān ná: ¿Na nihín cúu jeē cahán, Tātā? achí ná. Te ni cahān yā jíin ná: Máá rí cúu Jesús jeē ní jehnu ñuu Nazaret, te jeē jito xeēn rō ñayuu cácadíje i ruhū cúu jeē jito xeēn rō ruhū, achí yá.

⁹ Te tēe cuango jíin ná ni cajini ndije de jeē ndíndéé, te ni cayūhú de, te tu ní cájini sōho de ndese ni cahān yā jíin ná.

¹⁰ Yūcuán na te ni cahān ná: Tātā, ¿na vé cuní ni jéē sáha ná? achí ná. Te ni cahān máá Jítóho yō jíin ná: Ndocuiñi te quihñ rō ñuu Damasco, te yūcuan íyó ñn tēe jeē cachi nuū rō na vé cúu jeē cánuú sáha ró, achí yá jíin ná.

¹¹ Te jeē ní ndindéé un ní sacuaá núu ná, te tēe cuango jíin ná un ní cajñi de ndaha ná cuango de jíin ná ní jinūcoo ná ndé ñuu Damasco.

¹² Te yūcuan ní condee ñn tēe nání Ananías, te táca jnáhan yó hebreo yūcuan cácahān jeē tēe vāha cúu Ananías, chi vāha squícu de ley jeē ni jéhe ya nuū Moisés.

¹³ Te ni quee tēe un núu néne ná, te ni cahān de jíin ná: Hermano Saulo, na ndúndijin tinūu ní, achí de. Te ni ndúndijin-ni tinūu ná, te ni jito ná núu de.

¹⁴ Te ni cahān Ananías: Máá Yāā Dios táca jíi yō, je ni nacāji ya nihín návāha cuni ní na vé cuní yā jeē sáha ní, te coto ní núu máá Cristo, Yaā ndaā, te cuni sōho ni jñuhun jeē cahán yā.

¹⁵ Te nacani ní jñuhun ya nuū ndivii ñayuu táca jéē ní jito ní jíin jéē ní jini sōho ní.

¹⁶ Ma cúhuun ni ni núu súcuan. Ndocuiñi ní, te cuandute ní te cahān ndahú ní jíin máá Jítóho yō, návāha nacate ya anuá ni núu cuéchi, achí de jíin ná.

Jeē ní cachi Pablo ndese ni tají Yaā Dios de nuū ñáyyu táca gá nación

¹⁷ Te ni nandió cóo na ní ndee ná ñuu Jerusalén. Te jícán tahu na ini templo, te ni sáha máá Jítóho yō jeē ní jito ndijin ná.

¹⁸ Te ni jini na núu yā ni cahān yā jíin ná: Yachí quenda ró ñuu Jerusalén yāhá, chi ma cuatáhú ñayuu yáha jéē nacani ró jñuhun ri nuū i, achí yá.

¹⁹ Te ni cahān na jíin yá: Tuú, chi cuatáhú i, Tātā, chi je cájini i jeē ni quíví ná ndijnahan vehe ñi sinagoga ni jñi ná táca ñáyyu cácadíje i nihín, te ni cani ná i, te ni chuhun ná i vecāa.

²⁰ Te je cájini i jeē quiví ní cajehni i Esteban, tēe ni nacani cáji jñuhun ní, suni ni indichi na yūcuan, te ni jejnúhún ná jeē na cúu de, chi ni condito ná sahma tēe ni cajehni Esteban, achí ná jíin yá.

²¹ Te ni cahān yā jíin ná: Cuáhán, chi máá rí tají rí rohó quihñ jicá ró nde nuū ñayuu táca nación jeē tu cájini i jñuhun ri, achí yá jíin ná. Achí Pablo.

Jeē ni íne Pablo nuū general

²² Te táca ñayuu ún vāha-ni ni cajini sōho i te nde jñuhun sandihí yáha jéē ní tají yá de nuū ñayuu táca gá nación. Yūcuán na te ni cacuvaā i, te ni cacahān jee i:

Na cúu tēe jíñá, chi tú vāha jeē cótecu gā de, achí i.

²³ Te súcuan cácana jee i, te ni cascádoó i ticāchí i, te ni cascánda i ticachā. Te súcuan cástéén i jeē cáquití xeēn ni i.

24 Te ni ndacu general jniñu jeē na quívi Pablo ini cuartel, te ni cahān de jeē na stíchí soldado Pablo nde jíin cuarta ñi, návāha cujnúní ni general na síquī cúu jeē ní candonda ñayuu un síquī de.

25 Te ni cajihni de Pablo návāha súcuan te cani de. Te ni cahān Pablo jíin capitán jeē índichi tūhva:

¿A jéhe ley jñūhun jeē cani ní cuarta tēe cúu sēhe nación Roma núu ná tu sándaā ní núu íyó cuéchi de? áchí de.

26 Te ni jini sōho capitán jñūhun yáha, te ni jecahān jíin general:

Coto vāha ní jēē ma stívi ní sáha ní jíin tēe yáha, chí cúu de sēhe nación Roma, achí.

27 Yūcuán na te ni jinū general nuū Pablo, te ni cajñūhún de:

Cachí núu jendaá cúu jeē sēhe nación Roma cúu ró, achí.

Te ni cahān Pablo:

Suu cúu ndije ná, achí de.

28 Te ni cahān general:

Ruhū chí nde jeē ni jéhe ri cuehē xūhún te ni nduu ri sēhe nación Roma, achí.

Te ni cahān Pablo:

Te sañá chí nde quívi ní cacu ná cúu ná sēhe nación yō Roma, achí de.

29 Yūcuán na te tāca tēe jeē cácu ni cani Pablo nuú, ni cacujiyo-ni cuango, te suni nde general ni yūhú de, chí ni stívi de jeē ní jihni de Pablo, chí tu íyó váha sáha súcuan jíin sēhe nación Roma.

Jeē ní índichi Pablo nuū junta cujénu ga jnāhan ñuu de hebreo

30 Te inga quívi un cúní general cundaā vāha ni de na síquī cúu jeē ní candonda tēe hebreo síquī Pablo. Te ni ndají de cadena jeē nuhní Pablo, te ni ndacu de jniñu ni cacutútú táca sūtū cácujeñu jíin táca tēe cásaha junta cujénu ga, te ni quenehen de Pablo, te ni jeni de nuū tēe ni candutútú un.

23

1 Yūcuán na te ni ndacoto Pablo nuū tēe ni candutútú junta un, te ni cahān de:

Tátā jijnáhan ní, ní ndé vijna vāha íyó ní anuá na jēe tú na cuéchi ná, jíto jíinú Yaā Dios, achí de.

2 Yūcuán na te Ananías, sutū cujénu ga, ni cahān jíin tēe cáhīn yajni nuū de jeē na cátu maá yuhu de.

3 Te ni cahān Pablo jíin sūtū cujénu ga ún:

Yaā Dios stóho ya nihín chí tēe stáhú-ni cúu ní, chí néne ní jēe sándaā ní núu ní stívi ná ley yā, ¿te naun stívi máá ní ley jeē ndácu ní jniñu jeē cáni de sañá? áchí de.

4 Te ni cacahān tēe cáhīn nuū de ún:

¿Naun cáhān rō súcuan jíin sūtū cujénu ga? Chí nuū Yaā Dios jejniñu de, achí jíin de.

5 Te ni cahān Pablo:

Tátā jijnáhan ní, tu ní jíin na jēe sutú cujénu ga cúu de, chí núu ní jíin na te ma cahān na súcuan núu, chí yósó núu tútu iñ jeē ní cahān yā jeē ma cahān nee yó coto yó táca tēe cácujeñu nuū yō, achí Pablo.

6 Te nuū ní jini Pablo jeē sava de cácuu grupo saduceo te sava ga de cácuu grupo fariseo, te ni cahān jee de:

Tátā jijnáhan ní, máá ná cúu ñin jnāhan grupo fariseo, te suni súcuan ni iyo tátá na. Chí suni máá ná ñūhun ni na jēe nastecu yā ndīyi, te síquī yúcuan cúu jeē cácahān ni cuéchi síquī ná, achí de.

7 Te jeē súcuan ni cahān de te ni cacusñin ni tēe junta jeē cácuu grupo fariseo jíin grupo saduceo, te ni cacahān ñihin.

8 Chí cácahān tēe grupo saduceo jeē ma nátecu ndīyi, ni tu cáhīyo ndajéhé yā ní ánuá, te tēe grupo fariseo cájejnūhún de ndinúní jñūhun yáha.

9 Te yōhoyo ni cuvaā. Te sava tēe cástéén jñūhun cáhān tutu ley yā jeē cácuu jnāhan grupo fariseo, ni candocuiñi de, te ni cacahān de:

Tú ni ñin cuéchi cánihīn na síquī tēe yáha. Sanaa te ni cahān ndije ñin ánuá jíin de chí ñin ndajéhé yā. Ma sáníhni ni yō nuū Yaā Dios nuu súcuan, achí.

10 Te yōhoyo ni catejnáhan, te yúhú general jeē quende i chiyō Pablo, te ni ndacu de jniñu jeē na quívi soldado te quenehen de Pablo sava mēhñú i, te na ndívi de ini cuartel.

11 Te jecuáa un ní quee-ni máá Jítoho yō nuū de, te ni cahān yā jíin de:

Pablo, cuandeyí ni rō, chí nájnūhun ni nacani ró jñūhun ri ini ñuu Jerusalén yāhá, suni súcuan nacani nahín ró jñūhun ri ini ñuu Roma, achí yá.

Jeē ní casquijnáhan jñūhun cahni Pablo

12 Te nuū ní cundijin te ni cacutútú sava ñayuu hebreo, te ni casquíjnáhan jnūhun, te ni cacahān teyí i jeē ma cáji cuiṭi i ni ñn ni ma cóho cuiṭi i nde núu tu cahni i Pablo.

13 Te víhyá gā uū xico tēe hebreo ni cacahān teyí jnūhun yáha.

14 Te ni jengoo nuū sutú cácujeḥnu jín núu tēe jéḥnu cándiso jníñu nuū ñáyuu hebreo, te ni cacahān jín tēe ún:

Ni cacahān teyí ná jeē ma cáji cuiṭi ná ni ñn níni nde ná tu cahni na Pablo.

15 Núu súcuan te máá ní jijnáhan ní jín táca gá tēe cásáha junta cujeḥnu ga, cuácáhān ni jín general jeē quenehen de Pablo na jéé de nuū junta sajnē, chi cachi ni jéé cácuṇi ni stíchí vāha ga ní de. Te máá ná jijnáhan ná cotūhva ná cahni ná de nde ná tu quee de nuū cáhīn tútú ní, achí.

16 Te sēhe yí cuáha Pablo ni nihīn i jnūhun jeē súcuan ni cacahān, te ni jehēn i cuartel, te ni castūhún i nuū Pablo.

17 Te ni cana Pablo xinī ñn jnáhan capitán, te ni cahān de:

Condeca ní súchi yáha quíhīn ni jín i nuū general, chi íyó ñn jnūhun castūhún i nuū de, achí de.

18 Te capitán un ní jeca de i cuahān i jín de nuū general, te ni cahān de:

Pablo, tēe íne vecāa, ni cana de sañá, te ni cahān de jín ná jeē quíndeca ná súchi yáha núu ní, chi íyó ñn jnūhun cahān i jín ní, achí de.

19 Te ni jnī general ndaha i cuahān de jín i ñn lado, te yuhu-ni ni cajnūhún de i:

Na jnūhun cúní rō cahān rō jín rí, achí de.

20 Te ni cahān i:

Tēe hebreo ni casquíjnáhan jnūhun de jeē cahān ndahú de jín ní quenehen ní Pablo sajnē quihīn de nuū tāca tēe cásáha junta cujeḥnu ga, chi cahān-ni de jín ní jeē cácuṇi de jeē stíchí vāha ga de Pablo.

21 Te ma cuáha ni jnūhun, chi víhyá gā uū xico de cándētu sáhí de ichi, te ni cacahān teyí de jeē ma cáji cuiṭi de ni ñn ni ma cóho cuiṭi de nde núu tú cahni de Pablo, te vijna je cándētu tūhva de jeē cuáha ni jnūhun quihīn Pablo nuū junta, achí i.

22 Te ni cahān general jín i jeē ma cáchi i nuū ní ñn ñayuu jeē ni cáhān i jnūhun yáha jín de, te ni tají de i cuanuhun i.

Jeē ní tají general Pablo cuahān de nuū Félix, tēe cúu gobernador

23 Yūcuán na te ni cana general uū capitán de, te ni ndacu de jniñu jeē sátūhva de uū ciento soldado cájica jéhé jín únī xico uxī jeē cáyōsó caballo jín úu ciento jeē cándāha lanza, chi cahīn jecuāá ún quendacoo de jín Pablo quingoo de nde ñuu Cesarea.

24 Te suni ni ndacu de jniñu jeē coo tūhva caballo jeē cóso Pablo, te condito vāha soldado un Pablo quingoo de nde nuū Félix, tēe cúu gobernador.

25 Te ni tee de ñn carta jeē cahān jnūhun yáha:

26 Máá ná cúu Claudio Lisias, te tēe ná carta yáha cuájeē nuū ní, señor Félix, gobernador cujeḥnu. Ndeese tahū cúu ní.

27 Ñayuu hebreo ni cajñi i tēe yáha, te je yajni cahni i de núu, te ni jnama ná de jín soldado, chi ni jini na jéé sēhe nación Roma cúu de.

28 Te ni jendeca ná de nuū junta maá i jijnáhan i jeē sándaā i núu na cuēchi ni sáha de.

29 Te ni jini na jéé siquí ley maá i cúu cuēchi cacahān i siquí de, te tu níhīn na ni ñn cuēchi siquí de jeē cúu de ni jeē cóne de vecāa.

30 Te ni nihīn na jnūhun jeē sava tēe hebreo ni casquíjnáhan jnūhun de jeē cahni de tēe yáha, te jeē yúcuán cúu jeē yachī ni tají ná de cuajeē de nuū ní. Te suni je ni cahān na jín ñáyuu cájicān cuēchi siquí de jecoo i nuū ní, te jiñā cahān i jín ní na cuēchi ni sáha de. Je ni cahān yō, achí carta.

31 Te ni cajeca ñuú-ni soldado Pablo cuangoo jín de nde ñuu Antípatris, nájnūhun ni tahū jniñu nuū de.

32 Te inga quiṽi ni canandió cóo-ni soldado cájica jéhé cuánungoo nde cuartel, te soldado cáyōsó caballo cuangoo de jín Pablo.

33 Te ni jinūcoo ñuu Cesarea, te ni cachihí carta ndaha gobernador, te suni ni cajeni Pablo nuū de.

34 Te ni cahu gobernador carta un. Te ni cajnūhún de ndé ñuu cúu Pablo, te ni jini de jeē tēe ndañū Cilicia cúu Pablo.

35 Te ni cahān de:

Nde na quécōo tēe cájequin cuēchi siquī rō te cuni nahín rí jnūhun cahān rō, áchí de.

Te ni cahān de jeē na quíndihyū Pablo ini palacio ndīyī Herodes.

Jeē ni cahān Pablo jehē maá de nuū Félix

24

¹ Te nuū uhún quivī te Ananías, sutū kujénu ga, ni quee de ñuu ún. Te suni ni quecoo sava tēe jénu cándiso jniñu nuū jnáhan ñuu de hebreo jíin ñn tēe cúu abogado, nání de Tértulo. Te ni quivicoo de nuū gobernador jeē cahān de cuēchi siquī Pablo.

² Te ni cana gobernador Pablo ni quee de. Te ni quejé Tértulo cahán de cuēchi siquī Pablo, chi suhva ni cahān de jíin Félix:

Tátā gobernador, siquī jeē cúu ní tōhō jeē váha ndíchí ndácu ní jniñu, te jeē yúcuan tú na jnūhun cájejnáhan iyó, chí cáyūcu váha yó.

³ Te na cútahū ná, chí tāca quivī váha cúu tāca núu ndácu ní jniñu jeē váha sáha ní, tátā Félix.

⁴ Te tu cúní na snāa na cuéhē tiempo ni, te cáhán ndahú ná jíin ní cuni nahín ní jecu-ni jnūhun cahān na jíin ní.

⁵ Chi ni cajini na tēe yáha jéē cúu de ñn tēe tíxín, te sáha de jeē cánacuajnáhan maá jnáhan ñuu ná hebreo ní cáhnu-ni tāca lado, te cúu de tēe cújénu nuū ñáyuu cascuáha jnūhun tēe nání Jesús jeē ní jehnu ñuu Nazaret.

⁶ Te suni je ndúcú de jeē stívi de tācá jniñu ini templo ñ, te ni cajni ná de. Te cácuni na sándaā na siquī de núu, nájnūhun cáhán ley ñuu ná.

⁷ Te ni jinū-ni general Lisias, te ni quende fuerza de tēe yáha núu na jíin náhan ná.

⁸ Te ni ndacu de jniñu jeē tāca ná jeē cácahān na cuēchi siquī tēe yáha quijicoo ná ndé nuū ní. Te vijna cuu stíchí maá ní de, te jíin jnúhun cahān maá de te cuni ni jéē ní sáha de cuēchi jeē cácahān na jíin ní, áchí Tértulo.

⁹ Te suni ni cacahān tēe hebreo jeē ni jíinucoo jíin de jeē iyó ndāā jeē súcuan cúu cuēchi Pablo.

¹⁰ Yūcuán na te ni sáha gobernador seña nuū Pablo jeē na cáhán de, te ni cahān Pablo:

Je jíiní na jéē cuehē cuiyā cúu ní gobernador ñuu yáha, te jeē yúcuan nújnahan ni na jéē sándaā ni siquī ná.

¹¹ Chi maá ní cuu nanducú ní te cuni ni jéē sáa maá úxí uū quivī ni cuu jeē ni jéhēn ná ñuu Jerusalén jeē chiñúhún ná Yaā Dios.

¹² Te tu ní stáhān jnáhan ná jíin ni ñn ñayuu, ni tu ní stóna ná ñáyuu ini templo ni ini vehe ñi sinagoga ni ini maá ñuu.

¹³ Ni tú na jíin stéen de jeē iyó ndāā jnūhun cácahān de siquī ná.

¹⁴ Te jnūhun cáhán cají ná jíin ní cúu jeē chiñúhún ná Yaā Dios tāca jíi na, te suu cúu jeē chiñúhún ná maá Jesucristo, te maá jnúhun yáha-ni cúu jeē cácahān de jeē stívi ná. Te cándije ná tāca jnúhun yósó núu tútu ley yā jíin núu tútu jeē ní catee tēe ni canacani jnūhun ya nde jenahán.

¹⁵ Te ñuu ñúhun ni na jíin de jeē sáha Yaā Dios jeē nátecu tāca ndīyī, cúu ñayuu ní casáha váha jíin ñáyuu ní casáha néé.

¹⁶ Te jeē yúcuan máni jeē váha ndíhvī ni na sáha ná. Súcuan te váha iyó ni anuá na jéē tú na cuēchi ndéé siquī na núu Yaā Dios ni nuū ñáyuu.

¹⁷ Te ni jica cuu ná tāca ñuu jicá jecu cuiyā, te sáa te ni ndee na jíin xúhun jéē ní cajēhe tāca ñáyuu jeē chindéé ñáhán i jnáhan ñuu na cáyúcú Jerusalén. Te suni ni ndee na jéē socó na quiti nuū Yaā Dios.

¹⁸ Te íne ná ini templo siquī jeē cuchi ná ndundoo ná núu Yaā Dios te socó ná. Te jecu jnáhan ñuu ná hebreo jeē véjicoo Asia ni cajito de sañá ini templo, te tú na ñayuu cuehē ni cóyūcu jíin ná jeē sávaā i.

¹⁹ Te núu ni stívi ná ¿te naun tu ní quijicoo tēe Asia un návaha suni cahān de ndese ni stívi ná?

²⁰ Chí tēe ni quecoo yáha na cáhán maá de núu na cuēchi ni canihñ de siquī na ná ni indichi na núu junta tēe cácujuhnu ini ñuu ná.

²¹ ¿Te chí cájequin de cuēchi siquī na jéē ni cáhán jee ná suhva ná ni iyo ná nuū junta naún? Chi ni achi na jéē cándije ná jéē nátecu tāca ndīyī, te jeē yúcuan cájequin ni cuēchi siquī ná, ni achi na jíin de. Achí Pablo.

²² Te Félix chi je jíiní váha de ndese cácañdije ñayuu Cristo. Te jeē ní jini sōho de

jnūhun yáha te ni stétu de un jíjnáhan, te ni cahān de:

Nde na quée general Lisias te cajnūhun gá rī siquī jniñu yáha, áchí de.

²³ Te ni ndacu de jniñu nuū capitán jeē na cóne ga Pablo vecāa, te ma cási jeē sáha de jeē cuní de, te ni ma cási jeē quíjicoo jnáhan de jeē chindéé ñáhán i de.

²⁴ Te ni cuu jecu quivī, te ni quiji tucu Félix jíin ñasihí de Drusila, te ñahan hebreo cúu ña. Te ni ndacu de jniñu jeē na quíji Pablo návāha nacani de jnūhun ndese candíje yó Jesucristo.

²⁵ Te ni cahān Pablo jíin de jeē cánuú sáha yó jniñu ndaā, te cánuú coto yó máá yó jeē ma sáha yó jniñu stívi, chí quivī sándihí te sándaā Yaā Dios jniñu ndivii ñayuu ndese ni casáha i. Te ni yūhu Félix te ni cahān de:

Vijna te cuáhán, te inga quivī jeē núne ri te cana ri rohó quiji ró, áchí de.

²⁶ Te ñūhun ni de jeē cuāha Pablo xūhun núu de te siáá de quenda de vecāa. Jeē yúcuan tijni jínu ni cana de Pablo ni canda-jnūhún de.

²⁷ Te súcuan ni cuu uū cuiyā, te sáá te ni nucuiñi Porcio Festo nuū Félix. Te cuní Félix jeē na cúsiñi ni ñayuu hebreo jíin de, te jeē yúcuan ní squéndōo de Pablo vecāa.

Jeē ni índichi Pablo nuū Festo

25

¹ Te sáá únī quivī jeē ni quívi Festo cuu de gobernador Judea, te ni quenda de ñuu Cesarea cuahān de ñuu Jerusalén.

² Te tāca sūtū cácujuhnu jíin tée cácujuhnu nuū ñayuu hebreo ni jinūcoo nuū Festo, te ni cajicān cuēchi siquī Pablo.

³ Te ni cacahān ndahú jíin Festo jeē núu vāha ni de te na nátají de Pablo ndiji ñuu Jerusalén. Súcuan ni cacahān, chí je ni casquíjnáhan jnūhun jeē cahni Pablo ichi.

⁴ Te ni cahān Festo jeē yíndesi vāha Pablo nde ñuu Cesarea, te je jéni ni de jeē jecu na quivī te nuhūn maá de ñuu Cesarea.

⁵ Te jeē yúcuan ní cahān de jíin táca tée ún: Tāca níhín jeē cándiso jniñu, na quíngoo yó nde Cesarea, te yúcuan cácan ni cuēchi siquī de te núu íyó cuēchi de, áchí de.

⁶ Te ni ine de yúcuan únā chí úxi-ni quivī, te ni ndee de ñuu Cesarea, te inga quivī ni

cucōo de mesa nuū sándaā de jniñu, te ni cahān de jeē na quíji Pablo.

⁷ Te je cáhīn tēe hebreo jeē ní quijicoo nde ñuu Jerusalén. Te ni quee Pablo, te ni cajicó ndúu nuū de, te ni caquejéé-ni cásájnúhún téyí síquī de, te tú na jíin ní cástéén jeē iyó ndaā jnūhun cácahān.

⁸ Te ni cahān Pablo jehē maá de:

Tu ní sáha ná ni ñin cuēchi siquī ley ñuu na jéé cácuu ná ñayuu hebreo, ni siquī templo, ni siquī rey nación Roma, achí de.

⁹ Te Festo chí cuní de jeē cusī ni ñayuu hebreo jíin de, te ni cajnūhún de Pablo:

¿A tu cuní rō quinhun rō Jerusalén te yúcuan sándaā rī siquī rō? achí de.

¹⁰ Te ni cahān Pablo:

Je índichi na núu cúndaā jniñu jeē ndácu máá tée cúu rey nación Roma, te yáha cúu nuū cánuú cundaā jniñu ná. Máá ní je jíni vāha ni jéé tú na cuēchi ní sáha ná síquī tāca jnáhan ñuu ná hebreo.

¹¹ Chí núu ni sáha ná ñin cuēchi xeēn jeē jíni ñūhún cuu ná, te íyó vāha jeē cúu na núu súcuan. Te núu tu íyó ndaā jnūhun jeē casájnúhún tée yáha síquī ná, te ni ñin tēe ma cúu chihi de sañá ndaha tēe yáha jíjnáhan de. Núu súcuan te cuní na quíhīn na núu maá rey nación Roma sándaā de siquī na, áchí de.

¹² Te ni cajnūhun Festo ndese cájeni ni tēe cándiso jniñu jíin de. Yúcuan na te ni cahān de jíin Pablo:

Je ni cahān rō jeē cuní rō quihīn rō nuū maá rey nación Roma sándaā de siquī rō. Núu súcuan te quihīn nahín ró nuū de, áchí de.

Jeē ni índichi Pablo nuū rey Agripa

¹³ Te ni cuu jecu quivī, te rey Agripa jíin Berenice ni jecondéhé de Festo nde ñuu Cesarea.

¹⁴ Te tijni quivī ni coyūcú de yúcuan. Te ni nacani Festo jnūhun siquī Pablo nuū rey un. Te suhva ni cahān de:

Félix jeē ní cuu de gobernador, ni stóo de ñin tēe íne vecāa yáhá.

¹⁵ Te ná ni jehēn ná ñuu Jerusalén, te sutū cácujuhnu jíin ñayuu jéhu cándiso jniñu nuū ñayuu hebreo ni jinūcoo i nuū na cájequin i cuēchi siquī tée ún, te cácuni i jeē na cúu de.

¹⁶ Te ni cahān na jíin i jeē tu íyó costumbre tāca tóhō Roma jeē cahni de ñin

tēe súcuan-ni, chi jíní ñúhún condichi de jíin ñáyuu cájequin cuēchi síquī de, návāha cahān de jehē maá de te cundaā núu iyó cuēchi de.

¹⁷ Yūcuán na te ni quecoo tútu i yāhá. Te inga quivī ún tu ní cúcuéé ná, chi ni cucōo na mesa nuū sándaā na síquī cuēchi, te ni ndacu ná jniñu jeē na quíji tēe ún.

¹⁸ Te cáhīn ñáyuu cájequin cuēchi síquī de. Te ni jeni ni na jēe iyó cuēchi xeēn cahān de síquī tēe un núú, te tú cuiti.

¹⁹ Chi jeē cácahān de cúu máni síquī jnúhun cácañíje-ni máá de, jíin síquī ñin tēe nání Jesús jeē jé ni jihī de, te Pablo cahán ñihin de jeē ní natecu ndije tēe ún.

²⁰ Te tu ní cújnúní cuiti ni ná ndese sándaā ná, te ni cajnúhun ná de núu cúní de quihīn de ñuu Jerusalén te yūcuán cundaā síquī de.

²¹ Te máá Pablo ni cahān de jeē cuní de quihīn de nuū Augusto, rey yō nación Roma, te yūcuan sándaā rey cuēchi de, ni achi de. Te ni cahān na jēe na cóne de vecāa nde tají ná de quihīn de nuū rey un, áchí Festo.

²² Yūcuán na te ni cahān Agripa jíin Festo: Suni cúní maá ná cuni sōho ná jēe cahán tēe un, áchí de.

Te ni cahān Festo:

Sajnē te cuni sōho ní jēe cahán de núu súcuan, áchí de.

²³ Te inga quivī un ní quecoo Agripa jíin Berenice. Te cáñuhun de sahma cújéhu de, ni quivicoo de ini vehe juzgado jíin táca general jíin tēe cácujeñhu ini ñuu ún. Te ni ndacu Festo jniñu jeē na quíji Pablo.

²⁴ Te ni cahān Festo:

Cahán na jíin ní, tátā rey Agripa, jíin ndihi níhín jēe cáyūcu jíin yó yāhá vijna. Yāha cúu tēe jeē síquī de ni candonda ndivii jnáhan de hebreo ñuu Jerusalén jíin ndé ñuu Cesarea yāhá, te máni cácahān i jeē tú vāha jeē cótecu gā de.

²⁵ Te jéni ni maá ná jēe tú na cuēchi xeēn ni sáha de jeē cúu de. Te je ni cahān de jeē cuní de quihīn de nuū rey Augusto jeē sándaā rey un síquī de, te jeē yūcuan ní cahān na jēe tají ná de quihīn de nuū rey un.

²⁶ Te tu cúcáhu ni ná na jnúhun tee ná núu tútu quihīn jíin de nuū rey yō. Jeē yūcuan ní ndacu ná jniñu ni quee de nuū

yō jijnáhan yó, te cánuú gá nuū maá ní, tátā rey Agripa. Te stíchí ni de návāha nihīn na jnúhun tee ná síquī de, te quihīn jnúhun un jíin de nuū rey.

²⁷ Chi tu jéjníñu cuiti jeē tají ná ñin preso quihīn te núu tú castúhun ná nuū tútu na cuēchi ni sáha de, áchí Festo.

Jeē ni cáhān Pablo jehē maá de nuū rey Agripa

26

¹ Yūcuán na te ni cahān rey Agripa jíin Pablo:

Vijna te jéhe ri jnúhun cahān rō jehē maá ró, áchí de.

Te Pablo ni sáha de ndaha de jeē ní quejé de cáhán de, te suhva ni cahān de:

² Tátā rey Agripa, cúsi ni ná vijna jeē cúu cahān na jíin ní síquī ndihi jeē casájnúhún ñáyuu ñuu yō hebreo síquī ná.

³ Chi je jíiní vāha máá ní táca jēe ní tajnúní ñáyuu ñuu yō hebreo jíin táca jnúhun jeē tu cáhīn inuú i jíin. Jeē yūcuan cáhán ndahú ná jíin ní jeē coo paciencia ni cuni sōho ní jnúhun cahān na jíin ní.

Jeē ní cachi Pablo ndese ni sáha de nde ná tu sama ya ini de

⁴ 'Je cájini táca jnáhan ñuu yō hebreo ndese ni sáha ná ini ñuu nuū ní cacu ná jíin ini ñuu Jerusalén nde ná lulí ná.

⁵ Te núu cácu ni maá de cahān ndaā de, te je cájini de sáña jēe ndé lulí ná ni quivī ná nuū grupo fariseo, te grupo un ñihin ga cánducú ndéyí de squícu de ley yā vésú táca gá grupo tēe nación yō.

⁶ Te ñúhun ni na jnúhun ni jejnúhun Yaā Dios nuū táca jíi yō jeē nastécu yā ndīyí, te máá síquī táca jnúhun yāha-ni cúu jeē cájequin de cuēchi síquī ná.

⁷ Chi máá yó jeē cácuu yó jnáhan ndihúxí uū yucūn ñáyuu Israel, cáñuhun ni yō jnúhun ni jejnúhun ya jeē nastécu yā ndīyí, te jeē yūcuan nduú ñuu cáchiñúhún yó Yaā Dios te cájejniñu yó núu yā. Te suni súcuan ñúhun ni maá ná, tátā rey Agripa, te síquī jeē nácani ná jnúhun jeē natecu ndīyí cúu jeē cájicān jnáhan ñuu yō hebreo cuēchi síquī ná.

⁸ ¿Te chí má nastécu Yaā Dios táca ndīyí cájeni ni ní naún?

Jeē ní cachi Pablo ndese ni jito xeēn de ñayuu cá candíje

⁹ Te máá ná chi ni jeni ni na jéē jíni ñúhún ndonda ná síquī ñayuu cá candíje i Jesús, Yaā ní jehnu ñuu Nazaret.

¹⁰ Te súcuan ni sáha ná ini ñuu Jerusalén, chi táca sūtū cá cujéhu ni cajēhe de jnūhun jeē cóndiso jníñu ná chuhun ná cuéhē ñayuu vecāa síquī jeē cá candíje i Jesús, te íyó váha ni na núu cájehni de i.

¹¹ Te tíjni jínu ni sáha ndevāha na jíin i ini táca vehe íi sinagoga jeē ni sáha fuerza na i jeē na stóo i jnūhun cá candíje i. Te xeēn ni quítī ni na núu i, chi nde ñuu jicá ní jehēn ná ni sáha xeēn na jíin i.

Jeē ní cachi tucu Pablo ndese ni sama ya ini de

(Hch. 9.1-19; 22.6-16)

¹² Te sutū cá cujéhu ni cajēhe de jnūhun jeē cóndiso jníñu ná quíhīn na sáha xeēn na jíin ñáyuu cá candíje cá yūcú ñuu Damasco núu.

¹³ Te cuahān ná ichi ún, tátā rey, te caxū cúu, te ichi ándiví ní quíji ñn nduva ni ndindéé ndaxín núu na jíin núu tée cuan-goo jíin ná, te víhyá gā ndíi vésú niāndii.

¹⁴ Te ndíhi ná ní cacotúú ná nuū ñúhun. Te ni jíni sōho ná ñn jnūhun ni cahān jíin ná jíin jnúhun yuhu yó hebreo: Saulo, Saulo, ¿najehe jito xeēn rō ruhū? Chi jeē sáha ró súcuan cúu nájnūhun síquī jeē tu jéndije tí, te jéñú yatá tí xinī pulla, te súcuan stóho tí maá tí, áchí.

¹⁵ Yūcuán na te ni cahān ná: ¿Na nihín cúu jeē cahán, Tátā? achí ná. Te máá Jítoho na ní cahān yā jíin ná: Máá rí cúu Jesús, te jeē jito xeēn rō ñayuu cá candíje i ruhū cúu jeē jito xeēn rō ruhū.

¹⁶ Ndonda condichi rō, chi vēji ri nuū rō jeē tejníñu ri rohó sáha ró jniñu cúní rī, te nacani cájí ró jnūhun táca jéē ní jito ró vijna, jíin jéē steén gā rī nuū rō táca quívī quíji.

¹⁷ Te jnama ri rohó núu táca jnáhan ñuu rō jíin núu ñáyuu táca gá nación, chi nuū ñáyuu un tájí rí rohó quíhīn rō.

¹⁸ Te tájí rí rohó quíhīn rō nuū i, chi nájnūhun nanune ró tñúú i cúu jeē steén rō jnūhun ri nuū i te jecūhun ni i. Chi ñayuu ná tu candíje i ruhū, nájnūhun cájica i nuū néē. Te jeē candíje i ruhū, quívī i nuū luz rī,

te tuá quihi i chíji jniñu jeē cuní jexeén jeē cúu Satanás, chi sa suhva quihi i chíji jniñu cúní maá rí. Te tájí rí rohó quíhīn rō nuū i, návāha candíje i ruhū te cone cáhnu ni rī nuū cuéchi i. Yūcuán na te inuú níhīn tahú i jíin táca gá ñayuu jeē ni sándoo rí anuá i, áchí yá jíin ná.

Jeē ní cachi Pablo ndese ni jetáhú de jnūhun ni cahān yā

¹⁹ Jeē yúcuán tu ní sánīhni ni na núu jnúhun ni cahān yā ichi ándiví jíin ná, tátā rey Agripa.

²⁰ Chi ni jetáhú ná, te ni nacani ná jnúhun ya xīhna gā nuū ñáyuu ñuu Damasco, te sáa te ni nacani ná jnúhun ya nuū ñáyuu ñuu Jerusalén jíin ná región Judea jíin núu ñáyuu táca gá nación. Te jnūhun ni nacani ná núu i cúu jeē na nacani ni i jeē stóo i cuéchi i te nasāma ini i sáha Yaā Dios, te na sáha i jniñu váha jeē steén jeē ní nasāma ini i.

²¹ Te síquī jeē súcuan ni nacani ná jnúhun te ni cajñi jnáhan ñuu yō hebreo sāñá ini templo, te ni cacuni i cahni i sāña núu.

²² Te ni chindéé ñáhán Yáa Dios sāñá, te jeē yúcuán índichi níhin na ndé vijna nacani cájí ná jnūhun ya nuū ñáyuu cá cujéhu jíin núu táca-ni ñayuu. Chi tu chíso gá na jnúhun síquī jnúhun jeē ní nacani Moisés jíin táca gá tée ni canacani jnūhun Yaā Dios nde jenahán.

²³ Te ni cundaā jnūhun ni canacani de un jéē cánuú ndoho Cristo nde cuu yā, te xīhna gā maá yá natecu vésú táca gá ndíyī, te súcuan steén cájí yá nuū ñáyuu jeē jnáma ya i, cúu ñayuu nación yō Israel jíin ñáyuu táca gá nación, áchí Pablo.

Jeē ní nducú ndéyí Pablo scandíje de Agripa jnūhun Jesús

²⁴ Te súcuan ni cahān Pablo jehē maá de, te ni cahān jee Festo:

Ni nduloco rō, Pablo. Síquī jeē ni scuáha ndasí ró te jeē yúcuán ní tívī xínī rō, áchí de.

²⁵ Te ni cahān Pablo:

Tu ní tívī xínī na, tátā Festo, chi sa suhva íyó cájí ndáa jnūhun cáhán na.

²⁶ Te máá rey Agripa je jíiní váha de táca jniñu ní íyo jeē ní nacani ná, te tu yúhú ná cahān na táca jnúhun yáha, chi je jíiní váha

na jéē jiní de tāca jnúhun yáha, chi tú sáhi ní cúu tācá jniñu yáha.

²⁷ Tātā rey Agripa, ¿á cándije ní jnúhun jeē ní cacahān tēe ni canacani jnúhun ya nde jenahán? Jéni ni na jéē candíje ní, áchí Pablo.

²⁸ Yūcuán na te ni cahān Agripa jíin Pablo:

Va jéni ni rō jeē jíin jecu jnúhun ni cahān rō te sáha ró jeē candíje ri Cristo, achí de.

²⁹ Te ni cahān Pablo:

Vesú jíin jecu-ni jnúhun chí jíin cuéhē, te jícan tahú na jéē maá ní jíin táca gá tēe cájini sōho jnúhun cáhán na vijna, na cándije ní nájnūhun cándije máá ná, te tu cúni na jéē cónuhni ni nájnūhun núhni na.

³⁰ Te ni ndihi ni cahān Pablo tāca jnúhun yáha. Te ni ndocuiñi rey jíin gobernador jíin Berenice jíin táca gá tēe cácujeñu cáyūcu jíin de.

³¹ Te ni cacujiyo de, te ni candajnūhun sín máá de:

Tú ni ñin cuēchi ní sáha tēe yáha jéē cúu de ni jeē cóne ga de vecāa.

³² Te ni cahān Agripa jíin Festo:

Cuu siáá ni tēe yáha núu jeē tu ní cáhán maá de jeē quihín de nde nuū rey yō nación Roma nuú, achí de.

Jeē ní catajé de Pablo cuahān de ñuu Roma

27

¹ Te ni cundaā jeē quihín Pablo jíin barco nde Italia, te suni quingoo ná jíin de. Te Pablo jíin sava ga tēe cáhīn vecāa ni quivicoo de ndaha ñin capitán naní Julio jeē quíndēca de tēe un ndé Italia. Te Julio cúu ñin jnáhan grupo soldado naní Augusto.

² Te nde ñuu Adramitio nuū cájecuiñi barco ni quenda ñin barco ni quee, te ni quivicoo ná, te quihín barco un táca ñuu jeē yíhi chíji Asia jeē yúcu yumar. Te suni cuahān Aristarco jíin ná, te máá de cúu tēe ñuu Tesalónica región Macedonia.

³ Te ñinga quiví ni jinūcoo ná ñuu Sidón nuū cájecuiñi barco. Te Julio ni cundáhú ni de Pablo, te ni jēhe de jnúhun ni jecondēhe Pablo táca amigo de, te ni cachindéé ñáhán i de.

⁴ Te ñuu yúcuán ní quenda barco cuahān jíin ná. Te siquí jeē níhin yíhi tachí te tu ní cúu quihín yohó barco, te ni tee xiin barco cuahān jíin ná xiin isla Chipre, ñuhun jeē

íne sín nuū ndúte, te lado jecó barco ni quendōo Chipre.

⁵ Te ni cayāha ná yumar Cilicia jíin Panfilia cuahān ná, te ni jinūcoo ná ñuu Mira ndañúu Licia.

⁶ Te ñuu yúcuán ní nihīn capitán ñin barco jeē véji ñuu Alejandría te quihín ichi Italia, te ni cahān de jíin ná ni quivicoo ná barco un.

⁷ Te cuehē quiví ni cahīn na núu ndúte jíin barco, chí cuéé ní jica, te fuerza-ni ni jinūcoo ná yuñúu Gnido. Te tuá ni jēhe tachí un jnúhun quihín yohó barco, te ni cayāha ná núu jnúhma tachí xiin ñúu Salmón jeē íne nuū isla Creta.

⁸ Te yōhyo ni canducú ndéyí tēe cáscaca barco un, ní yāha jíin ná ní yumar xiin Creta. Te ni jinūcoo ná ñin lugar naní Buenos Puertos nuū cájecuiñi barco, te yajni un íne ñuu Lasea.

⁹ Te je ni cuu cuehē quiví ni cajica ná jíin barco. Te je yajni quejéé vico míjin, te yúcuán cúu tiempo jeē yíhi jica barco te sanaa te coo jnúndóho nuū mar. Te ni cahān níhin Pablo jíin de:

¹⁰ Tātā jijnáhan ní, jíni na jéē yōhyo yíhi coo viaje yáha, te quiji jnúndóho siquí barco, te naa barco jíin ndajniñu, te nde maá yó sanaa te cuu yō, achí de.

¹¹ Te tu ní chúsóhó capitán jeē cahān Pablo, chí sa suhva jeē cahán tēe scáca barco un jíin tēe chíi barco.

¹² Te siquí jeē tu íyó váha lugar nuū ni jécuiñi barco un jéē cóyúcú de níhi vico míjin, te ni cajeni ni cuehē gā de jeē váha ga núu quendacoo de yúcuán. Chí cajeni ni de jeē núu cuu te jinūcoo de ñuu Fenice te yúcuán coyúcú de vico míjin. Chí Fenice suni íne yundúte isla Creta nuū cájecuiñi barco, te ndijin ichi noroeste jíin suroeste.

Jeē ní jéquíhi ñin tachí níhin jeē stóna ndute mar

¹³ Te ni jéquíhi víta táchí ichi sur, te ni cajeni ni de jeē jinú de Fenice nuú, te ni cascáca ga de barco jica jíin de xiin Creta.

¹⁴ Te ni cunúu jecu gā, te ni quejéé-ni ñin tachí níhin ndasí jeē naní táchí nordeste.

¹⁵ Te tuá ni cúu ga quihín yohó barco, chí ni chundahá-ni tachí cuahān jíin, te ni casiáá-ni de jeē cascáca de, te cháha

chúcuan cuahān barco jín ndihí ná sáha tachī.

¹⁶ Te ni yāha jín ná xiin isla lulí jē naní Clauda, nuū jnúhma tachī. Te vēsú súcuan te yōhyo uhū ni cascāa ná barco lulí jeē ndiquín yatā barco cáhnu.

¹⁷ Te ni casquívī ná ini barco cáhnu. Te ni casucun núu de barco cáhnu jín yoho. Te cáyūhú de jeē quihín barco nuū yaxín ndute nuū naní Sirte te jnā nuū ñíti, te jeē yúcuan ní casnúu de sahma cóquin jeē stechí te jica barco. Te ni casiáá de jeē na quihín ndé chi chúndahá táchī.

¹⁸ Te tu jécuiñī cuítī jeē yíhi tachī níhin. Te inga quivī un ní caquejé de cájete de ndajniñu ndiso barco, návāha nduñama gā barco te ma quée chīji ndute.

¹⁹ Te quivī uní ni cajēhe núu ná ndaha ni cajete ná máá ndajniñu jéjníñu barco.

²⁰ Te cuehē quivī tu ní cájito ná níandii ni quimi siquī jeē ín vicō, ni tu jécuiñī cuítī tachī níhin ún, te tuá cáñūhun ni na cácu ná.

²¹ Te ni cuu quivī jeē tuá cáyeji cuítī na stāa. Te ni jecondichi Pablo sava mēhñu téé ún, te ni cahān de:

Tátā jijnáhan ní, núu ní cájetáhú ní jnūhun jeē ni cáhān ná te ma quéndacoo yó Creta núu, te ni ma cóto yó jnúndóho yāha ni ma náā ndajniñu núu.

²² Te vijna cáhān níhin na jín ní jeē cuandeyí ni ni jijnáhan ní, chi ni ñn ní má cúu ní, vēsú naa barco.

²³ Chi jeē cúni ni quiji ñn ndajéhé jeē ní tají máá Yāa Dios nuū ná. Chi máá yá cúu Jítoho ná, te jéjníñu ná núu yā.

²⁴ Te ndajéhé yā ún suhva ni cahān yā jín ná: Pablo, ma yūhu ró, chi vāha-ni jinū rō nuū rey nación Roma, te jeē siquí rohó te sáha Yāa Dios jeē cácu ndihí tēe cáhīn jín ró ini barco yāhá, áchí yá jín ná.

²⁵ Tátā jijnáhan ní, ma yūhu ní núu súcuan, chi máá ná cúcáhnu ni na Yāa Dios jeē coo nájnūhun ni cahān ndajéhé yā jín ná.

²⁶ Te jinū nahín yó ñn isla, te ma jinū yachí yō nuū quíngoo yó, áchí de.

²⁷ Te ni cuu uxī cuūn jecuáa nde jeē ní quejé táchī, te jica barco nuū mar Adria, te cháha chúcuan cuahān barco sáha tachī. Te máá jecuáa ún te jeē ní cuu sava ñuú te cájeni ni tēe cáscáca barco jeē jé cuacuyajni jinū barco ñuhun íchi.

²⁸ Te ni casínga de ñn jeē cáchicuāhá de nasaa cúnú ndute, te ni cajini de jeē iyó ócō xahūn ñn metro. Te ni jica barco jecu gā te ni casínga tucu de, te ni cajini de jeē iyó ócō uxā na metro.

²⁹ Te cáyūhú de jeē jécujnáhan barco jín toto, te ni cajihni de cuūn cāa gancho náhnu yatā barco un, te ni cascāne de nde jehē ndúte návāha chituu te jecuiñī barco. Te yōhyo jnāa de jeē na cúndijin yachī.

³⁰ Te tēe cáscáca barco un ní canducú de cunu de quíngoo de jín barco lulí te cácu de nuū jnúndóho quiji siquī barco cáhnu núu. Jeē yúcuan ní casnúu de barco lulí un núu ndúte, te cása-ni de nájnūhun jeē snúu de inga cāa gancho ichi núu barco návāha tú cuni ñayuu jeē cácuni de cunu de quíngoo de.

³¹ Te ni cahān Pablo jín capitán jín táca soldado:

Núu tú coyūcu téé yāha ini barco cáhnu jín yó, te ma cácu cuítī maá ní jijnáhan ní, áchí de.

³² Yūcuán na te soldado ni cajehnde de yoho núhni barco lulí, te ni jneni-ni cuahān.

³³ Te nuū cuácundijin te ni cahān Pablo jín táca téé un jē na cáji de stāa. Te suhva ni cahān de:

Vijna íyó uxī cuūn quivī jeē cándito ní te tu cáyeji cuítī ni stāa.

³⁴ Te cáhān ndahú ná jín ní jeē na cáji ni stāa, návāha nanihīn ni ní te cácu ní, chi ni ñn yó má cúu, ni ma tují cuítī yō, áchí de.

³⁵ Te ni ndihí ni cahān de jnūhun yāha, te ni quihín de ñn stāa, te mēhñu táca ñayuu un ní nacuatáhú de nuū Yāa Dios, te ni tahu sáva de stāa ún, te ni quejé de yéji de.

³⁶ Yūcuán na te ni candusī ni ndihí de, te suni ni cayejí de stāa.

³⁷ Te ndívii na jēe cáñūhun ná ini barco cúu uū ciento uní xico xahūn ñn ná.

³⁸ Te ni cayejí vāha ndihí ná. Yūcuán na te ni cajete de trigo cuahān nuū ndúte un, návāha na nduñama gā barco.

Jeē ni quée barco chīji ndute

³⁹ Te nuū ní cundijin te ni cajito de ñuhun, te tu ní cánacuni de ndé nuū cúu. Te ni cajito de nuū íne cuíñi ndute, te suni máá ñíti cúu, te cájeni ni de jinū de yúcuan jín barco núu na cúu núu.

⁴⁰ Te ni cajehnde de yoho núhni cāa gancho yúcuan, te ni caquendōo cāa un núu mar. Te ni canandají de yujnu jeē scotú chíi barco, te ni nacata caa de sahma cóquin ichi núu návāha chundahá táchī barco, te ni quejéé caca quihīn jín de ichi núu iyó ñíti.

⁴¹ Te ni jinū barco nuú níhin náquijnáhan ndute. Te ni quēe barco nuú ñíti ñúhun chíji ndute, te ni jññ-ni ichi núu te tuá ni jíca cuiñi, te yatā barco un ní cahya-ni jeē níhin ni cani suhmā ndute mar.

⁴² Yūcuán na te ni candajñuhún soldado jeē cáhni de tāca preso návāha ma sūte i te cunu i quingoo i.

⁴³ Te cúní capitán un jeē cācu Pablo, te ni jesicoo de. Chí sa ni cahān de núu ndé ñáyuu jiní sūté te xīhna gā i na nungoo i sūté i nuū ndúte, te na quénda-ni i quihīn i nuū ñúhun íchi.

⁴⁴ Te suni súcuan na quécōo ndihī i quihīn i, sava i coso candá i jín yujnu cúnu te sava ga i jín pedazo yujnu barco. Te súcuan ni cacācu ndihī ná ní jinūcoo ná ñuhun íchi.

Jeē ni íne Pablo isla Malta

28

¹ Te nuū ní cacācu ná te ñayuu cáyūcu yúcuan ní cacachi i nuū na jeē isla un nání Malta.

² Te ñayuu un ní cacundáhú ni i sāña jijnáhan ná, te ni cascáyú i ññ ñuhūn cáhnu, te ni cacahān i jín ná jeē nasaā ná, chí mījin sáha jeē cúun saū.

³ Te ni stutú Pablo jecu tujnu íchi. Te jeē jñāa de tujnu un núu ñuhún te ññ coō xeén jínu tí ni quenda tí tujnu un jeē ní cujihní, te ni chiyuhú-ni tí ndaha de.

⁴ Te ñayuu cáyūcu yúcuan ní cajito i jeē ndíta caa coō un yíyuhú tí ndaha de, te ni cacahān i:

Tēe yáha vā sanaa te ni jehni de ndīyí núu súcuan, te vēsú je ni cācu de nuū mar, te máá yāa sándaā jññ ñayuu tu jēhe ga yā jññhun jeē cótecu de, áchí i.

⁵ Te ni caja Pablo ndaha de, te ni ñinga coō un núu ñuhún, te tú na vé ni ndóho de.

⁶ Te cándētu tāca ñáyuu jeē chúhun i cuiñi de chí cotúú-ni de te cuu de. Te ni cunahán téyí cándētu i, te ni cajito i jeē tú na vé ni ndóho de. Yūcuán na te ni nasāma cájeni ni i, te ni cacahān i jeē ññ yaā cúu Pablo.

⁷ Te yajni yūcuan íyó ñuhun tēe cújēhnu ga Malta un, nání de Publio. Te ni cana tēe un sāña jijnáhan ná, te ni jēhe núu de vehe de ni coyūcu ná jín de unī quivī, te ni jito yúcún de sāña.

⁸ Te tátá Publio cāa de, chí ndóho de cuehyī quīji jín cuéhyī ñíñī. Te ni jecondēhe Pablo tēe ún, te ni jicān tahu de te ni soó de ndaha de siquī tēe ún, te ni nduvāha-ni de.

⁹ Yūcuán na te ni quijicoo ndihī ga ñayuu cácu hū yūcuán, te suni súcuan ni canduvāha-ni i.

¹⁰ Te ñayuu un ní cajēhe i cuehē ndajñíñu ni cacutahū ná. Te nuū ni jínū quivī jeē quingoo tucu ná jín barco, te ni cajēhe i tācá ndajñíñu cuu ná ichi.

Jeē ni jínū Pablo ñuu Roma

¹¹ Te unī yoō ni coyūcu ná Malta. Te ññ barco jeē véji ñuu Alejandría ni ine Malta ní vico míjin, te ichi núu barco un ndéé uū figura ídolo ñuu de nání Cástor jín Pólux. Te ni quivīcoo ná barco un cuángoo ná.

¹² Te ni jinūcoo ná ñuu Siracusa, te yūcuan ní coyūcu ná unī quivī.

¹³ Te ni quenda barco cuahān jín ná nduu nduu yundúte, te ni jinūcoo ná ñuu Regio. Te inga quivī ún vāha ni quiji tachī ichi sur, te ni quendacoo ná ñuu Regio, te uū quivī te ni jinūcoo ná ñuu Puteoli.

¹⁴ Te yūcuan ní caquijnáhan ná jín jecu hermano cácandíje, te ni cacana de sāña ní coyūcu ná jín de ññ semana. Yūcuán na te ni quendacoo ná jeē quihīn ná ñuu Roma.

¹⁵ Te hermano cáyūcú ini ñuu Roma, je ni canihīn de jññhun jeē jinūcoo ná, te ni quendacoo de, te sava de ni caquijnahan de sāña ndé ñuu Foro de Apio te sava ga de ñuu Tres Tabernas. Te ná ni jito Pablo nuū de jijnáhan de, te ni nacuatáhú de nuū Yaā Dios, te ni ndundeyí ni de.

¹⁶ Te sáa te ni jinūcoo ná ini ñuu Roma, te capitán ni squivī de tāca preso ndaha tēe cújēhnu nuū tācá soldado ñuu Roma. Te ni cajēhe de jññhun jeē cone sññ Pablo te condito ññ soldado de.

Jeē ní nacani Pablo jññhun ya ini ñuu Roma

¹⁷ Te nuū unī quivī te ni cana Pablo tāca tēe cácu jēhnu nuū jnáhan ñuu de hebreo

cáyūcú ini ñuu Roma. Te ni cacutútú de, te ni cahān Pablo jíin de:

Tátā jijnáhan ní, tú cuíti na vé ni sáha ná síquī jnáhan yó hebreo ni síquī tācá jniñu ní catajnúní jíi yō. Te vēsú súcuan te ni cajni i sãña ndé ñuu Jerusalén ni casquívī i sãña ndaha tēe ñuu Roma jijnáhan de.

¹⁸ Te tēe ñuu Roma jeē cácujuhnu cáyūcú Cesarea ni castíchí de sãña, te cácuñi de síáá de sãña núú, chí ni cajini de jeē tú na cuéchi ná jéē cúū ná.

¹⁹ Te jnáhan ñuu yō hebreo tu ní cájēhe de jnūhun. Jeē yúcuñi ní cahān na jéē quiji ná núū maá rey cujéhu ga nde ñuu Roma yāhá te sándaā maá de síquī ná. Te tú vēji ná jéē cáquin na cuéchi síquī ñayuu nación yō.

²⁰ Jeē yúcuñi ní cana ná níhín jíjnáhan ní, návāha cuni na táca ní te ndajnūhun yó. Chí yóhó ñáyuu Israel cáñūhun ni yō jeē nátecu ndīyī, te suu jnūhun un nácani ná, te jeē yúcuñi cúu jeē nuhní na jíin cadena yáha, áchí de.

²¹ Te ni cacahān tēe un jíin Pablo:

Tú ni ñn carta ni cátají ñáyuu cáyūcú Judea nuū na jéē cástūhun de jnūhun ní, te táca jnáhan yó Judea jeē ní quijicoo yāhá, tú ni ñn jnūhun néé ní cácahān de síquī ní.

²² Te cánujnahan ni ná cuni sōho ná ndese cúu jnūhun jeē cahán ni, chí je cájini na jéē tācá-ni lado cácahān ñayuu contra síquī jnúhun jeé jéē steén ni, áchí de.

²³ Te ni cajeni de ñn quivī, te ni quijicoo cuehē de vehe nuū néne Pablo. Te ni nacani de jnūhun ndese ndácu Yaā Dios jniñu, te ni steén cají de jnūhun nde jenéhen te nde ni ini. Te súcuan ni nducú ndéyí de scándíje de táca tēe un jnúhun Jesús, te ni steén de jeē suni súcuan cáhán ley jeē ni jéhe ya nuū Moisés jíin jnúhun jeē ní catee tēe ni canacani jnūhun Yaā Dios nde jenahán.

²⁴ Te ni cacandíje sava de jnūhun ni cahān Pablo, te sava ga de tu ní cájetáhú de.

²⁵ Chí tú inuú cáhīyo ni de. Te sáá cánducú de quingoo de te ni cahān Pablo:

Ndaā cahán jnūhun jeē ni cáhān Isaías, tēe ni nacani jnūhun Yaā Dios nde jenahán, chí suhva ni cahān de jíin táca jíi yō ni sáha Espíritu Santo:

²⁶ Ni cahān Yaā Dios:
Cuáhán núū jnáhan ñuu rō yāhá te cahān rō jíin i:

Vēsú cuni nahín váha ró te ma jécūhun ni rō, te vēsú coto vāha ró te ma cúni rō.

²⁷ Chí yōhyo níhni ni rō,
chí tu cácuñi rō cuatáhú ró.
Te yōhyo uhū cájini sōho ró,
chí tu cánujnahan ni rō cuni sōho ró jnúhun ri.

Te nájnūhun cájesi rō tinūu ró cúu jeē tu cácuñi rō nanducú ró ndese cúu, te tu cácuñi rō jeē násāma ini rō návāha nasávāha ri anuá rō nuū cuéchi ró, ní achi Yaā Dios.

Achí tutu.

²⁸ Núu súcuan te na cástūhun ná nuū ni jéē jnúhun ni tájí Yáā Dios jeē jnáma ya yohó, nde vijna te tájí yá jnūhun yáha quíhín nuū ñáyuu tācá nación jeē tu cájini i jnūhun ya, te máá i chí cuni sōho i, áchí de.

²⁹ Te ni jínu ni cahān de jnūhun yáha, te cuangoo jnáhan de hebreo, te yōhyo ni cacahān de síquī jnúhun yáha jíjnáhan de.

³⁰ Te ni condee Pablo uū cuiyā vehe jeē ní quihín núu de ún. Te ni cusñi ni de cahān de jíin táca ñáyuu ní quijicoo nuū de.

³¹ Te jéhu-ni ni nacani de jnūhun ndese ndácu Yaā Dios jniñu, te ni steén de jnūhun máá Jítóho yō Jesucristo, te tú ni ñn ní jési jeē nacani de jnūhun.

CARTA JEE NI TEE SAN PABLO APOSTOL NUU ÑAYUU ÑUU ROMA

¹ Máá rí cúu Pablo, mozo Jesucristo, chi ni cana Yaā Dios ruhū cúu rí apóstol yā, ni jeni ya ruhū te ni tají yá ruhū jeē nácani ri jnūhun jeē jnáma ya ñayuu.

² Te jnūhun un ní jejnūhun ya nde jehán ndasí, te yósó núu tútu iī jeē ní catee tēe ni canacani jnūhun ya.

³ Te jnūhun un cáhán siquī Jitoho yō Jesucristo, Yaā cúu Sēhe Yaā Dios. Te ni nduu ya tēe, ni cacu ya chíji yucūn rey David.

⁴ Te ni natecu yā mēhñu ndíyí ni sáha Espíritu iī, te súcuan ni steén Yaā Dios jeē cúu ya Sēhe ya jeē ndíso poder.

⁵ Te jeē jíin Jesucristo ni jēhe Yaā Dios jniñu luu yáha jeē cácuu ri apóstol, cájica ri jíin jnúhun Cristo, návāha coo ñayuu táca nación jeē candíje i jeē sáha ya jehē i, te cuatáhú i nuū yā.

⁶ Te suni máá ró jijnáhan ró, suni ni cana ya rohó ní quívicoo ró ndaha Jesucristo.

⁷ Te tēe ri carta yáha cuajeē nuū rohó ñayuu ñuu Roma. Chi ni cundáhú ni Yaā Dios rohó, te ni cana ya rohó jéē coo ndoo coo iī rō nuū yā. Te ñúhun ni rī jeē maá Tátá yō Yaā Dios jíin Jitoho yō Jesucristo sáha ga yā jeē váha rōhó, te sáha ya jeē coo ndeyí coo sī ni rō.

Jeē cuní Pablo quihñ de ñuu Roma

⁸ Te xīhna gā cástūhun rí nuū rō jeē nácuatáhú rí nuū Yaā Dios jeē siquí rohó jijnáhan ró, chi ni sáha Jesucristo jeē váha rōhó. Chi ní ñáyiví jíte núu jnūhun cuahān ndese vāha cácadíje ró yá.

⁹ Te máá Yaā Dios jiní yā jeē niní jícán tahu rī jehē rō jijnáhan ró nuū jicán tahu rī. Chi yōhyo ndíhví ni rī jejníñu ri nuū yā jeē nácani ri jnūhun Sēhe ya.

¹⁰ Te níiní jícán tahu rī nuū yā jeē núu cuní yā te nde vijna te cuu jecondēhe rí rohó.

¹¹ Chi cúu ni rī coto ri nuū rō jijnáhan ró, te steén gā rī jnūhun ya nuū rō, návāha quendōo vāha ga anuá rō te cuiñi nīhin ga rō jíin.

¹² Súcuan cuní rī návāha sáha yó jéē inuú coo ndeyí ni yō jijnáhan yó siquí jeē inuú cácadíje yó yá.

¹³ Hermano jijnáhan ró, cuní rī jeē na jécūhun ni rō jeē tíjni jínu ni cuu ni rī jecondēhe rí rohó, te nde vijna ná tu cuu. Chi cuní rī scuité núu ga rī jnūhun ya mēhñu rō, nájñūhun ni sáha ri mēhñu ñayuu táca gá nación.

¹⁴ Chi cúu ri tēe táu siquí jnúhun ya, chí táu rī nacuāha ri jnūhun ya nuū ndíhi ñayuu, cúu ñayuu jiní gā siquí ndíhi jeē iyó ñáyiví jíin jéē tu jíiní cuiñi, cúu ñayuu tūhva jíin jéē tú tūhva.

¹⁵ Jeē yúcuan cúu jeē ndíhví ni rī jeē suni nuū rohó ñayuu ñuu Roma nacani ri jnūhun jnáma ya yohó.

Jeē ndíso jnūhun vāha ya poder

¹⁶ Chi tu cúcanu rī siquí jnúhun vāha ya, chí yúcuan cúu poder Yaā Dios jeē jnáma ya táca ñayuu cácadíje, xīhna gā ñayuu hebreo te suni táca gá ñayuu.

¹⁷ Chi jnūhun vāha ya un steén nuū yō jeē ndáhva Yaā Dios cuēchi yó siquí jeē candíje yó jéē sáha ya jehē yō, te máá jéē candíje yó ní cuáhān yō. Chi súcuan cáhān nuū tútu iī: Ñayuu jeē ní ndahva yā cuēchi i, técu i jeē candíje i jeē sáha ya jehē i, áchí.

Siquí jeē iyó ndasí cuēchi ñayuu

¹⁸ Chi jíiní vāha yó jéē Yaā Dios andíví, cuāha ya castigo xeēn nuū táca ñayuu tu cácadíje te máni cuēchi cásáha. Chi jíin jniñu néé cásáha i te cájesi i nuū jnúhun ndaā.

¹⁹ Te ma cúu cahān i jeē tu jécūhun ni i siquí ndese Yaā cúu Yaā Dios, chí máá yá ni steén nuū i.

²⁰ Chi jíin táca jeē ni sáha ya te cúu jécūhun ni ñayuu ndese Yaā cúu máá Yaā tu jíto i nuū. Chi nde ni jecōo ñáyiví jíin ndé vijna te cúu jécūhun vāha ni i jeē maá yá cúu Yaā Dios te iyó poder yā ní cáni. Te jeē yúcuan má cúu cuiñi cahān i jeē tu jíiní i jeē iyó yá.

²¹ Chi vēsú ni cajini i ndese Yaā cúu ya, te tu ní cáchiñúhún i ya jeē cúu ya Yaā Dios, te ni tu ní nácuatáhú i nuū yā. Chi sa suhva ni nduu i ñayuu cájeni cáhá ni, chí ni candunéé iī i, te ni quendōo nee ini anuá i.

²² Cácahān i jeē ndichí i, te sa suhva cáacunéé i.

23 Chi ni castóo i Yaā Dios jeē yóhoyo luu cújéhnú, jeē ma cúu cuiti. Te ni cajetáhú i tǎcá imagen jeē casáha i, jeē cáa nájñūhun tēe cájihī, te suni nde imagen saa jíin cóo jíin quiti cájica ndicúún ndaha.

24 Te jeē yúcuan ní siaá Yaā Dios i jeē na sáha i tǎcá jniñu jnéhén jniñu néé jéē cuni i. Te casáha i jniñu néé jíin jnáhan i jeē cúu máá jnúhun canu.

25 Chi tu ní cá candíje i jñūhun ndaā Yaā Dios, chi sa ni cacandíje i jñūhun stáhú. Te cáhīyo yíñúhún i te cáchiñúhún i nuū tǎca jéē ni sáha ya, lugar jeē chiñúhún i máá Yaā ni sáha ún, Yaā jeē cánuú cahān yō jeē cújéhnú ya ní cáni. Amén.

26 Jeē yúcuan ní siaá Yaā Dios i jeē na sáha i tǎcá jniñu néé jéē cándiyo ni i jeē cúu máá jnúhun canu. Chi nde ñahan ni casama ña modo sihí, te ni quiví ña jíin modo neé.

27 Te suni súcuan tēe ni casiáá de modo chíjñiñu jíin ñahan. Te nde ni nduquijí de ni casáha ndiyí de jíin jnáhan yí de, te tēe jíin tēe ni casáha de jniñu jnúhun canu. Te cándoho de castigo síquī jniñu néé ní casáha de.

28 Te jeē tu ní cá cuni i cuajnúhún i Yaā Dios, jeē yúcuan ní siaá yā i jeē na cáni néé ni i, te sáha i tǎcá jniñu jeē tu iyó váha.

29 Te máni máá na jniñu jeē tu iyó ndáá cándihvī ni, te cájica jnéni, casáha jniñu néé, cándiyo ni, cájito uhū jnáhan. Te máni jeē cácuésún ni, cájehni ndiyí, cájejnáhan, cástáhú, cáshuhū jnáhan, cásjnúhún síquī jnáhan.

30 Cácahān jñūhun néé síquī jnáhan, cájito uhū Yaā Dios, cácujeē ni, cáсандúxí máá, cásatéyí máá, cájequin costumbre neé, tu cájendetū nuū tatá nuū naná.

31 Te tu cájecūhun cuiti ni, tu squícu jñūhun jéjñūhun, tu iyó mánī jíin jnáhan, tu íne cáhnu ni nuū jnáhan, tu cúndáhú ni jnáhan.

32 Te je cájini váha i jeē ni sándaā Yaā Dios jeē ñayuu casáha súcuan, cánuú jnahnū ndetū i. Te vésú súcuan cájini i, te níni casáha i jniñu néé un, te suni cánujnahan ni i jeē casáha jnáhan i súcuan.

Ndaā sándaā Yaā Dios síquī cuéchi

2

1 Núu súcuan te róhó jéē cahán cuéchi síquī jnáhan, núu na-ni ñayuu cúu ró, ma cúu cahān rō jeē tú na cuéchi máá ró. Chi jeē cahán rō cuéchi síquī jnáhan ró cúu jeē ndénehen ró cuéchi síquī máá ró. Chi róhó jéē cahán cuéchi, suni súcuan sáha máá ró cuéchi.

2 Chi jíiní yō jeē Yaā Dios, ndaā sáha ya jeē ndóna ya síquī cuéchi ñayuu casáha súcuan.

3 Te róhó jéē cahán cuéchi síquī ñayuu casáha cuéchi, te suni súcuan sáha máá ró, ¿te á jéni ni rō jeē cácu máá ró quiví ndóna Yaā Dios síquī cuéchi, chí naún?

4 ¿A cújéē ni rō nuū jnúhun jeē yóhoyo váha ni Yaā Dios jíin ró, jíin jéē iyó paciencia yā jeē tú yachí cuāha ya castigo nuū rō? ¿Te á tu jécūhun ni rō jeē jnúhun jeē yóhoyo váha ni yā sáha jeē nácani ni rō síquī cuéchi ró?

5 Chi níhni ni rō te tu nácani ni rō síquī cuéchi ró. Te jeē yúcuan cáyā gā rō castigo síquī rō quiví sáha Yaā Dios juicio, máá quiví jeē cóo ndijin jeē ndaā sándaā yā síquī cuéchi.

6 Chi chunaa yā nuū ná ñn ná ñn ñayuu núu ndese jniñu ni casáha i.

7 Te ñayuu jeē tu jécuiñī i jeē sáha i jniñu váha, cuāha ya jñūhun jeē cótecu i ní cáni. Chi ndúcú i quiví i nuū ndujéhnú yíñúhún i, nuū ní cáni cotecu i.

8 Te quití ni yā te cuāha ya castigo nuū ñayuu cujeē ni nuū yā, te cúnihni ni nuū jnúhun ndaā, chi sa nuū jnúhun yacuá yóho jetáhú i.

9 Te tǎca ñayuu casáha jniñu néé, chi nihīn i jñūndóho xeēn te cucuíhyá ndasí ni i, xīhna gā ñayuu hebreo te suni súcuan ñayuu tǎca gá nación.

10 Te sa suhva tǎca ñayuu casáha jniñu váha, chi quiví i nuū ndujéhnú yíñúhún i, te coo ndeyí coo síni i, xīhna gā ñayuu hebreo te suni súcuan ñayuu tǎca gá nación.

11 Chi Yaā Dios tu sáha ya cuenta ndese cúu ñn ñn ñayuu, chí inuú sáha ya jíin i.

12 Chi tǎca ñayuu jeē casáha cuéchi, vésú tu cáyihī i chíji ley jeē ni jéhe ya nuū Moisés, te tu níni ley un te jnahnū ndetū i. Te tǎca ñayuu cáyihī chíji ley Moisés te casáha cuéchi, jíin ley un sándaā yā cuéchi i.

13 Chi tu ndáhva Yaā Dios cuéchi ñayuu jeē máá jéē cúni nahín-ni i jñūhun cáhán ley yā.

Chi sa suhva ñayuu squícu jeē cahán ley yā cúu jeē ndáhva yā cuēchi i.

¹⁴ Chi ñayuu tācá nación jeē tu cánevāha tutu ley jeē ni jéhe ya nuū ñáyuu hebreo, te núu cásquícu máá i ley yā, suu cúu jeē cánevāha i ley yā ini anuá i, vēsú tu cánevāha i tutu ley un.

¹⁵ Te súcuan cástéén i jeē jnúhun ndácu ley un chi ñúhun ini anuá i. Te tāca jéē cájeni ni i jíin ánuá i, suu cúu jeē steén nuū i siquī núu ni sáha i cuēchi chí váha ni sáha i.

¹⁶ Te súcuan coo máá quíivī jeē jíin Jesu-cristo sándaā Yaā Dios siquī tāca jéē tu iyó váha jeē ní cajeni sáhi ni tāca ñáyuu. Súcuan cáhán jnúhun vāha ya jeē nácani ri.

Siquī jeē tu cásquícu ñayuu hebreo ley Moisés

¹⁷ Te róhó cácahān rō jeē téē hebreo cácuu ró, te cátenuū rō máá ley Moisés, te cácutéyí ró jeē siquí Yaā Dios.

¹⁸ Te cájeni ni rō jeē jíiní rō ndese nújnahan ni yā, jíin jéē cúu nácāji vāha ró ndé-ni cúu jniñu váha, chi ni cacutúhva ró ley un.

¹⁹ Te cájeni ni rō jeē máá ró cácuu téē steén ichi Yaā Dios nuū ñáyuu tu cájini cuiti, jíin jéē cúu sáha ró jéē cúndijin ini anuá ñayuu cájica nájnūhun nuū néē.

²⁰ Te cájeni ni rō jeē cúu steén rō nuū ñáyuu tú tūhva jnúhun ya, jíin jéē máá ró cácuu maestro nuū ñáyuu tu jécūhun ni. Chi jíin tutu ley yā te cájini rō ndese cúu jnúhun ndíchi jnúhun ndaā, cájeni ni rō.

²¹ Núu súcuan te máá ró jeē castéén nuū ñáyuu, ¿te naun tu cástéén rō nuū máá ró? Te máá ró jeē cácahān jeē ma sácúihná i, ¿te naun cásácúihná máá ró?

²² Te máá ró jeē cácahān jeē ma cósiquí ndéē i, ¿te naun cásíquí ndéē máá ró? Te máá ró jeē cácahān jeē cácuquini ni rō ídolo, ¿te naun cásácúihná ró ndajniñu jeē yúcu ini vehe ídolo?

²³ Te cácutéyí ró jíin ley Yaā Dios, te vēsú súcuan te cásáha ró jéē cácahān ñayuu siquī yā, chi tu cásquícu máá ró jnúhun ndácu ley yā ún.

²⁴ Chi súcuan yósó núu tútu iī: Ñayuu tāca gá nación, máni cácahān ndevāha i siquī Yaā Dios, jeē siquí cuéchi róhó ñáyuu hebreo.

²⁵ Te núu cásquícu ró ley Moisés, yūcuán na te níhín jniñu ndije jeē ní canihīn rō

jnunī circuncidar. Te núu tu cásquícu ró ley un, te vēsú ni cuu ró circuncidar, te nájnūhun jeē tu ní cúu ró.

²⁶ Te téē tācá nación, núu cásquícu de jniñu ndácu ley un, vēsú tu ní canihīn de jnunī circuncidar, núu súcuan te nájnūhun ni canihīn de jnunī circuncidar.

²⁷ Te téē jeē tu ní cúu circuncidar yíqui cúñu de, te cásquícu de ley yā, máá de cahān cuēchi siquī rō. Chi tu cásquícu ró, vēsú cánevāha ró tutu ley un, te ni cuu ró circuncidar.

²⁸ Chi nasūu jéē cáca ichi síquí in téē sáha jeē cúu ndije de téē hebreo. Te ni nasūu jéē cúu circuncidar yíqui cúñu in téē sáha jeē cúu de téē ndaā.

²⁹ Chi sa suhva téē cúu hebreo ndije, cúu jeē ini anuá de ñúhun jnúhun ndaā. Te téē cúu circuncidar ndije, chi nde jíin ini jíin ánuá de sáha de jniñu ndaā te nasūu jéē ndíso de jnunī circuncidar jeē cahán ley un cúu. Téē cándāa súcuan, nasūu ñáyuu cájejnúhún i de, chi máá Yaā Dios.

3

¹ ¿Núu súcuan te na vé iyó gá nuū ñáyuu hebreo jeē quéndōo vāha ga i? ¿Te ndé níhín jniñu jeē casáha i circuncidar?

² Vāha ndasí níhín jniñu. Xihna gā níhín jniñu jeē ni jéhe Yaā Dios jnúhun ya nuū máá i.

³ Te vēsú sava i tu ní cácañdije, ¿te á suu sáha jeē ma squícu ga Yaā Dios jnúhun ni jejnūhun ya, chí naún?

⁴ Tú cuiti jeē súcuan, chi vēsú núu ndihi ñayuu castáhú i, te Yaā Dios chí iyó ndáā yā. Chi suhva yósó nuū tútu iī jeē ní cáhān in téē jíin yá:

Cahān ñayuu jeē iyó ndáā ni jíin táca jnúhun cáhān ni,

te cuni i jeē iyó ndáā ní vēsú núu cácahān i siquī ní.

Achí tutu.

⁵ Te cácahān sava ñayuu jeē iyó váha jeē sáha yó cuéchi, chi cuéchi yó jéjniñu steén jeē iyó ndáā Yaā Dios. Núu súcuan ¿te á cuu cahān yō jeē tú vāha sáha Yaā Dios jeē jéhe ya castigo núu jéjniñu cuéchi yó súcuan? (Va cáhān-ni nde ri nájnūhun cácahān ñayuu ñayíiví.)

6 Tú cuiti jeē súcuan. Chi núu jeē tú vāha sāha Yaā Dios, ¿te ndese cuu sándaā yā cuēchi ñayuu ñayiví?

7 Te núu jñūhun stáhú cácahān ñayuu jéjníñu stéén jeē yóhyo cújéñu Yaā Dios síquī jeē máni cáhán ndaā yā, ¿te á cuu cahān yō jeē tú vāha jeē cahán yā jeē cuēchi cúu jeē castáhú i?

8 Tuú, chi núu jeē súcuan cúu, te cuu cahān yō jeē vetū-ni sāha yó jéē neé návāha quee jeē váha núu. Te sava ñayuu cácahān ndevāha i síquī rī jeē súcuan cástéén rī, te tú ndaā. Ñayuu ún chi íyó váha jeē ndénehen ya cuēchi síquī i.

Ndivii yō iyó cuéchi

9 Núu súcuan ¿te á váha ga ñayuu cácuu yóhó ñáyuu hebreo vēsú inga ñayuu naún? Tú cuiti jeē súcuan. Chi je ni cacahān yō jeē vēsú ñayuu hebreo chí ñáyuu tāca gá nación, ndivii yō yíhi chíji cuēchi.

10 Chi suhva cáhán tutu i:
Tú cuiti na ñayuu ndaā iyó, ni ñn i.

11 Te tú cuiti ñayuu jécūhun ni iyó,
te tú ni ñn i nánducú i Yaā Dios.

12 Ndihi i ni cascuíta i jñūhun ya,
te inuú-ni ni castívi ndihi i máa i.
Te tú cuiti ñayuu sāha jñíñu váha íyó, ni ñn i.

13 Yaū sucūn i cúu nájñūhun yaū ndīyī jeē
núne,
chi máni jñūhun stáhú cácahān i.

Te nájñūhun veneno coō yíhi yuhu i,

14 chí máni máa jñūhun ndevāha jñūhun
uvuā cácahān i.

15 Te yóhyo ñama jehē i jeē cáhni i ndīyī.

16 Te ndé-ni cúu-ni nuū cájica i te squívi i
jñūndóho jeē jnahnú ndetū ñayuu.

17 Te tu cájica cuiti i jíin jñūhun coyūcu mánī
i,

18 te ni tu cánacani ni i jeē cónso íyo i nuū Yaā
Dios.

Achí tutu.

19 Te jíni yō jeē tāca jñūhun cáhán ley
jenahán, chí cáhán nuū ñáyuu yíhi chíji ley
un, návāha ndihi i ma cúu cahān i jehē i. Chi
ndenehen Yaā Dios cuēchi síquī i nde jíin
ñáyuu ní ñáyiví.

20 Chi tú ni ñn ñayuu quendōo ndaā i nuū
yā jeē nducú i squícu i jñíñu ndácu ley un.
Chi ley un jéjníñu máni návāha cuni yō jeē
iyó cuéchi yó.

Jeē jnáma ya yohó síquī jeē candíje yó jéé sáha ya jehē yō

21 Te vijna te je cájini vāha yó ndese
ndáhva Yaā Dios cuēchi yó. Te nasūu ley un
sáha jeē quendōo ndaā yō, vēsú maá tutu ley
jíin téé ni canacani jñūhun ya, ni cacahān
ndese ndáhva yā cuēchi ñayuu.

22 Chi tāca ñáyuu jeē cácaandíje i jeē ni
jíhi Jesucristo jeē chúnaa yā cuēchi i, chí
ndahva Yaā Dios cuēchi i síquī jeē súcuan
cácaandíje i. Chi inuú-ni cúu tācá ndihi ñayuu.

23 Chi ndihi yó ni casáha cuēchi, te jeē
yúcuan tu ní cúu quendōo ndaā yō nuū Yaā
Dios.

24 Te síquī jeē yóhyo vāha ni Yaā Dios, jeē
yúcuan ndáhva yā cuēchi yó súcuan-ni. Chí
síquī jeē ni jíhi Cristo Jesús cúu jeē jnáma ya
yohó.

25 Chi Yaā Dios ni jeni ya Cristo návāha
socō yā maá yá chunaa yā cuēchi yó jéé ni
jíhi yā. Te jnáma ya yohó núu súcuan cándíje
yó. Te súcuan ni sāha Yaā Dios návāha stéén
yā jeē Yaā ndaā cúu ya. Chi ichi yátá ni íyo
paciencia yā, te tu ní chíhi ya cuenta cuēchi
ñayuu.

26 Te tiempo yáha stéén yā jeē Yaā ndaā
cúu ya, chí ndaā sāha ya jeē squéndōo
ndaā yā ñayuu candíje vēsú íyó cuéchi i, chí
cácaandíje i jeē ní chunaa Jesús cuēchi i ni
ndahva yā.

27 Núu súcuan ¿te á cuu cutéyí gá yō síquī
maá yó? Ma cúu cuiti, chí ma cúu cutéyí
yó cani ni yō jeē vāha squícu yó ley yā. Chí
jnéma ya yohó máa síquī jeē candíje yó jéé
sáha ya jehē yō.

28 Núu súcuan te je jíni yō jeē ndáhva Yaā
Dios cuēchi yó síquī jeē súcuan cándíje yó, te
nasūu jéé nducú yó squícu yó jéé ndácu ley.

29 ¿Te á núu maá-ni ñayuu hebreo cúu ya
Yaā Dios, chí naún? Tuú, chí suni cúu ya Yaā
Dios jeē jnéma ñayuu tāca gá nación.

30 Chí ñn-ni Yaā Dios iyó, te ndáhva yā
cuēchi ñayuu cácaandíje jeē ni sāha ya jehē
i, cúu ñayuu ndíso jñunī circuncidar, cúu
ñayuu jeē tuú.

31 Te jeē candíje yó jéé jnéma ya yohó, ¿á
sáha jeē tuá jíni ñúhún squícu yó ley yā, chí
naún? Tú cuiti, chí sa suhva sāha jeē váha
ga cuu squícu yó ley yā.

Abraham cúu ñn ejemplo nuū yō

4

¹ Núu súcuan ¿te ndese cahān yō siquī tāca jēē ní cuu jíin jíi yō Abraham? ¿Ndesē ni ndahvā cuēchi de?

² Nasūu jēē ni sāha máá de cúu jeē ní ndahva Yaā Dios cuēchi de. Chi núu jeē súcuan cúu núú, te cuu cutéyí de jeē váha ni sāha de. Te tu ní cutéyí de, chi nasūu siquī jeē ni sāha máá de cúu jeē ní ndahva Yaā Dios cuēchi de.

³ ¿Chi ndese cáhán tutu iī? Cáhán jeē ní candíje Abraham jeē sāha ya jeē ni jéjnūhun ya nuū de, te jeē yúcuan ní ndahva yā cuēchi de.

⁴ Te iin ñayuu sájniñu, te yāhu i chi nasūu jēē cútahū i cúu, chi jeē chúnaa yō nuū i cúu.

⁵ Te jeē jnáma Yaā Dios ñayuu, chi jeē cútahū i cúu. Chi vēsú tu cúu squícu i tācá jniñu váha, te núu candíje i jeē jnáma ya i nuū cuēchi i, yūcuán na te ndahva yā cuēchi i.

⁶ Te David suni ni cahān de ndese yōhyo ndetū ñayuu jeē ndáhva Yaā Dios cuēchi i, vēsú tu cúu sāha i ni iin jniñu jeē quéndōo ndaā i nuū yā.

⁷ Chi ni cahān de:

Nacā ndetū ñayuu jeē íne cáhnu ni yā nuū jniñu néé ni sāha i,
te tu ndénehen ya cuēchi siquī i.

⁸ Te nacā ndetū tēe jeē tuá chíhi máá Jítóho yō cuenta cuēchi de.

Achí tutu.

⁹ ¿Te á máni máá ñayuu squícu ley circuncidar cúu jeē quéndōo ndetū? ¿Chí suni quéndōo ndetū ñayuu jeē tu cúu circuncidar naún? Suni máá i quéndōo ndetū i. Chi je ni cahān yō jeē ní candíje Abraham jeē sāha ya jeē ni jéjnūhun ya, te jeē yúcuan ní ndahva yā cuēchi de.

¹⁰ Te ná ni ndahva yā cuēchi de, ¿á je ni cuu de circuncidar, chí ndé ná tuú? Nasūu jēē jé ni cuu de circuncidar, chi nde ná tuú.

¹¹ Te cuéé gá te ni nihīn de jnunī circuncidar. Te suu ni cuu iin seña, nájñūhun iin sello jeē ní ndahva yā cuēchi de siquī jeē súcuan ni candíje de. Te jeē yúcuan ní cahān yā jeē cuu de jíi nuū tāca ñayuu jeē candíje i jeē sāha ya jehē i, suni nuū ñayuu tu ní cúu circuncidar, chi suni ndahva yā cuēchi máá i.

¹² Te suni cúu de jíi nuū ñayuu ní cuu circuncidar, te nasūu máni jeē ní cuu i circuncidar, chi suni jeē ní jniī i ejemplo de. Chi cáncandíje i jeē sāha ya jehē i, nájñūhun ni candíje máá de nde ná tu cuu de circuncidar.

Núu candíje yó te sāha Yaā Dios jeē ni jéjnūhun ya

¹³ Chi ni jejnūhun Yaā Dios nuū Abraham jíin núu tāca yúcūn de jeē cuāha ya ní ñáyíví cuu tahū de. Te nasūu siquī jeē ní nducú de squícu de ley yā cúu jeē ní jejnūhun ya un núu de, chi sa suhva siquī jeē ní candíje de jeē ni jéjnūhun ya, te ni ndahva yā cuēchi de.

¹⁴ Chi núu jeē máni máá ñayuu nducú squícu ley cúu jeē nihín jeē ni jéjnūhun ya, núu súcuan te cáncandíje cāha yó nuú, te ma nihín jniñu jeē ni jéjnūhun ya ún.

¹⁵ Te ley chi sāha jeē nihín ñayuu castigo siquī jeē tu cúu squícu i. Te núu jeē tu ley, te suni tú na jñūhun stívi ñayuu siquī ley coo núu.

¹⁶ Núu súcuan te ni jejnūhun ya jeē sāha ya jeē váha jíin ñayuu siquī jeē candíje i jeē súcuan sāha ya, te jeē cútahū i súcuan-ni cúu. Te jeē ni jéjnūhun ya ún, íyó cutú nuū tāca yúcūn Abraham, te nasūu núu maá-ni ñayuu jeē nducú squícu ley jenahán, chi suni nuū tāca ñayuu cáncandíje nájñūhun ni candíje Abraham. Te súcuan cúu de jíi nuū tāca yó jeē cáncandíje yó.

¹⁷ Súcuan ni sāha Yaā Dios chi ni candíje de jeē sāha ya. Chi súcuan cáhán tutu iī: Ni jeni ri rohó cuu ró jíi nuū cuehē ndasí ñayuu. Súcuan ni cahān máá Yaā jeē nastécu ndíyí te cáhán yā ndese coo tāca jēē ná tu coo.

¹⁸ Te ni candíje de, te ni cocuhun teyí ni de jeē ni jéjnūhun ya jeē coo cuehē yucūn de, vēsú tuá na modo coo sēhe de núu. Te jeē yúcuan ní nduu de jíi nuū cuehē ndasí ñayuu, nájñūhun ni cahān Yaā Dios: Súcuan nducuehē yucūn rō, achí yá jíin de.

¹⁹ Te je yajni jinū de ciento cuiyā, te vēsú súcuan te tu ní quénda de nuū jñūhun cáncandíje de, vēsú jiní de jeē máá de jíin ñasihí de Sara je jéhnu ndasí ndíndúú de jeē ma cúu ga coo sēhe de.

²⁰ Te tu ní nácani siquí ni de jeē ma cáncandíje ga de jñūhun ní jejnūhun Yaā Dios jeē coo

sēhe de. Chi sa suhva ni candíje nīhin ga de, te ni nacuatáhú de nuū Yaā Dios.

²¹ Chi ni cucáhnū vāha ni de jeē cúu squícu Yaā Dios ndihī jeē ni jéjnūhun ya.

²² Te jeē yúcuān ní ndahva yā cuēchi de síquī jeē súcuān ni candíje de.

²³ Te nasūu máá-ni síquī Abraham cúu jeē yosó núu tútu jeē ní ndahva yā cuēchi de jeē ní candíje de.

²⁴ Chi suni yósó jéē síquí yohó jíjnāhan yó. Chi suni ndáhva yā cuēchi máá yó jéē candíje yó jéē cúu ya Yaā ní nastécu Jitoho yó Jesús.

²⁵ Chi ni jihī Jesús jeē chúnaa yā cuēchi yó, te ni natecu yā návāha ndahva Yaā Dios cuēchi yó.

Ndese quéndōo ñayuu jeē ndáhva yā cuēchi

5

¹ Núu súcuān te je ni ndahva Yaā Dios cuēchi yó síquī jeē ní candíje yó jéē sáha ya jehē yō. Te jeē yúcuān ní sáha ya jeē ní ndīvī yó núu jnúhun manī yā jíin yó, síquī jeē ni jihī Jitoho yó Jesucristo jehē yō.

² Chi máá Cristo ni sáha jeē ni quívicoo yó núu Yaā Dios, chi ni sáha ya jeē vāha yóhó síquī jeē súcuān cándíje yó. Te cáhīn nīhin yó jíin jnúhun jeē sáha ya jeē vāha yóhó. Te cúsiñ ni yō chí ñúhun ni yō jeē jinú yō nuū lúu cujéhnū yó jíin Yaā Dios.

³ Te nasūu máá yáha-ni, chí suni cúsiñ ni yō jeē ndóho yó jnúndóho. Chí jíin yō jeē máá jnúndóho sáha jeē jéndeýí ni yō.

⁴ Te jeē jéndeýí ni yō sáha jeē íje vāha yó cuu yó ñayuu ndaā. Te jeē íje vāha yó sáha jeē ñúhun ni yō tāca jéē vāha jeē cóo.

⁵ Te tāca jéē ñúhun ni yō, chí nihīn nahín yó. Chí jnúhun cúndáhú ni Yaā Dios yohó, ni cunuú ini anuá yō, sáha Yaā Dios jeē jíin Espíritu Santo jeē ni jéhe ya nuū yō.

⁶ Chi náa ndóho yó jéē ma cúu cuítī jnama yó máá yó, te ni jihī Cristo jehē yohó jéē cúu yó ñayuu íyó cuéchi. Te ni jihī yā máá quíví jeē jé ni jeni Yaā Dios.

⁷ Te yíí cúu jeē cúu ñn ñayuu jehē inga ñayuu, vésú jehē ñn ñayuu ndaā. Chí sanaa te íyó jínu jeē chúndeýí ni ñn tēe cuu de jehē ñn tēe ndaā vāha.

⁸ Te máá Cristo chí ni jihī yā jehē yō náa máni cuēchi sáha yó, te súcuān ni steén Yaā Dios jeē cúndáhú ni yā yohó.

⁹ Te vijna je ni ndahva Yaā Dios cuēchi yó síquī jeē ni jíhī Cristo jehē yō. Núu súcuān te suni jíin vāha yó jéē jnama Cristo yohó núu castigo quiñi quíví sáha Yaā Dios juicio.

¹⁰ Chí náa cúu ga yō enemigo Yaā Dios, te síquī jeē ni jíhī Sēhe ya jehē yō, te ni sáha ya jeē ndīvī yó núu jnúhun manī yā jíin yó. Te jeē súcuān ní ndīvī yó nuū jnúhun manī yā jíin yó, te suni jíin vāha yó jéē cácu yó síquī jeē técu Cristo, nduú yá jíin yó.

¹¹ Te nasūu máá yáha-ni, chí suni cúsiñ ndasí ni yō jíin Yaā Dios síquī jeē ni sáha Jitoho yó Jesucristo jehē yō, chí máá yá ni sáha jeē ní ndīvī yó núu jnúhun manī Yaā Dios jíin yó.

Jnúhun Adán jíin jnúhun Cristo

¹² Núu súcuān te jíin yō jeē ni quíví cuēchi ini ñayíví ní sáha máá ñn-ni tēe Adán. Te jeē síquí cuéchi yúcuān te ni jecōo cuehyí jéñni ñayuu. Te jeē yúcuān cúu jeē jihí ndihī ñayuu, chí ndihī í yíhī cuēchi.

¹³ Te nde ná tu cuāha ya ley nuū Moisés, te je íyó cuéchi ini ñayíví. Te síquī jeē ná tu coo ley yā, te tu ní chíhī ya cuenta jeē castíví í.

¹⁴ Te vésú súcuān te nde tiempo Adán te nde tiempo Moisés ni yíhī ñayuu chíñi cuehyí jeē jéñni í síquī jeē íyó cuéchi í. Chí ni jihī í síquī cuéchi ni casáha máá í, vésú tu ní sáha í jnáhan cuéchi jeē ni sáha Adán jeē ní cunīhni ni de nuū ñn jniñu ní ndacu ya. Te Adán ni cuu de ñn muestra maá Yaā ní quiñi cuéé gá.

¹⁵ Te jnúhun jeē ni sáha Adán cuéchi, tu quíjnáhan cuítī jíin táhū jeē jnáma Yaā Dios yohó. Chí jeē ni stíví máá ñn-ni tēe ún, jeē yúcuān cúu jeē jihí ndihī yó. Te jnúhun jeē jnáma Yaā Dios yohó cújéhnū ndasí gá, chí síquī jeē ni sáha máá ñn-ni tēe Jesucristo cúu jeē súcuān-ni jnáma ya ndihī ñayuu candíje.

¹⁶ Te cuéchi jeē ni sáha máá ñn-ni Adán, tu quíjnáhan cuítī jíin jnúhun jeē jnáma Yaā Dios yohó. Chí síquī máá ñn-ni cuéchi ún te ni quívicoo ñayuu chíñi jnúhun jnahñū ndetū í. Te jnúhun jeē jnáma ya ñayuu, sa suhva sáha jeē súcuān-ni ndáhva yā cuéchi í, vésú yóhyo cuehē cuéchi ni casáha í.

17 Chi siquī jeē ni sāha máá ñn-ni tēe Adán cuēchi, te ni nihīn poder cuehyī jéhni ñayuu. Te sa suhva siquī jeē ni jīhī maá ñn-ni tēe Jesucristo, te víhyá gā ni nihīn ñayuu maá yá poder jeē cótecu i caca ndaā i jīn yá. Chi ni ndahva yā cuēchi i siquī jeē yóhyo vāha ni yā.

18 Núu súcuan te siquī jeē ni sāha máá ñn-ni tēe Adán cuēchi, te ni quivícoo ndihi ñayuu chíji jñuhun jnahnū ndetū i. Te sa suhva siquī jeē ni sāha máá ñn-ni tēe Jesucristo ñn jñiñu vāha ndasí, te ndáhva Yaā Dios cuēchi ndihi ñayuu te cotecu i ní cáni.

19 Chi siquī jeē tu ní jéndije máá ñn-ni tēe, te ni quivícoo cuehē ndasí ñayuu chíji cuēchi. Te suni súcuan siquī jeē ní jéndije máá ñn-ni tēe Jesucristo, te ndáhva Yaā Dios cuēchi cuehē ndasí ñayuu.

20 Te ni jēhe ya ley yā návāha cuni yō jeē cuēhē cuēchi cásaha yó. Te jeē ní nducuehē cuēchi yó, te víhyá gā cuehē cúu jñuhun jeē vāha ni yā jeē íne cáhnu ni yā nuū yō.

21 Núu súcuan te nájñuhun ni nihīn poder cuehyī jéhni ñayuu siquī jeē iyó cuēchi i, suni súcuan iyó poder jñuhun jeē vāha ni yā jīn yó. Chi ndáhva yā cuēchi yó te cotecu yō ní cáni siquī jeē ni jīhī Jitoho yō Jesucristo jehē yō.

Jeē tuá yíhi yó chíji cuēchi chi yíhi yó ndaha Cristo

6

1 Núu súcuan ¿te ndese cahān yō? ¿A caca ga yō jīn cuēchi návāha víhyá gā sāha ya jeē vāha yóhó jéē cóne cáhnu ni yā nuū yō?

2 Ma cúu cuiti. Chi nájñuhun je ni jīhī yō jeē tuá yíhi yó chíji cuēchi, te ma cúu ga caca yó jīn cuēchi núu súcuan.

3 ¿A tu cájecūhun ni rō jeē tāca yó jeē ní jendute yó siquī jeē ni quiví yó ndaha Cristo Jesús, suni ni jendute yó siquī jeē ni quiví yó chíji jñuhun jeē ni jīhī yō jīn yá?

4 Chi jeē ní jendute yó cúu nájñuhun ni quindūji yó jéē ni jīhī yō jīn yá. Te vijna te cuu caca yó jīn vida jeē jeē ni jēhe ya nuū yō, chi nájñuhun suni ni natecu yō jīn yá. Chi ni natecu yā ni sāha Tátá yā jīn poder jeē cujéhnu ndasí yá.

5 Chi núu ni cundúu yó jīn yá siquī jñuhun jeē ni jīhī yō jīn yá, te suni súcuan

cundúu yó jīn yá siquī jñuhun jeē ní natecu yō jīn yá.

6 Chi jíní yō jeē ní naa modo maá yó jeē ni jīca yó jīn ichi yátá, chi ni quiví yó núu jñuhun jeē ni jīhī yō jīn Cristo jīcā cruz. Te súcuan ni naa modo yō jeē cúu yó mozo nuū cuēchi, návāha tuá cuajniñu yó núu tācá jñiñu jeē máni cuēchi cúu.

7 Chi ñayuu jeē jé ni cajihī, je ni quenda-coo i chíji tāca cuēchi.

8 Te núu je ni jīhī yō jīn Cristo, te cándije yó jéē suni súcuan ni natecu yō jīn yá.

9 Chi jíní yō jeē ní natecu Cristo, te ma cúu cuiti ga yā, chi cuehyī jéhni yóhó, tuá na vé cúu sāha jīn yá.

10 Chi jeē ni jīhī yā, te ñn jīnu-ni ni jīhī yā jeē siquī cuēchi ñayuu. Te jeē técu yā vijna, chi sāha ya jeē cuní Yaā Dios.

11 Te suni súcuan róhó jijnáhan ró, sāha ró cuenta jeē nájñuhun ni cajihī rō jeē ní quendacoo ró chíji cuēchi. Te cátecu rō návāha sāha ró jéē cuní Yaā Dios, chi ndúu ró jīn Jitoho yō Cristo Jesús.

12 Núu súcuan te ma cuáha ga rō jñuhun quihī ró chíji cuēchi jīn yiquí cúñu rō jeē cúu. Chi cuēchi ún stíhví ni rohó jéē na sāha ró táca jéē ndíyo néé ni rō.

13 Te ma cuáha ró máá ró cuajniñu ró núu cuēchi jeē cócuu ró jīn jñiñu néé. Chi sa suhva cuáha ró máá ró nuū Yaā Dios, te sāha ró cuenta jeē nájñuhun je ni cajihī rō te ni canatecu rō nuū yā. Te cuáha ndihi ró máá ró nuū yā jeē cuajniñu ró núu jñiñu ndaā.

14 Chi tuá na poder cuēchi jeē cundeyí jīn ró, chi tuá cáyihī ró chíji ley jenahán, chi sa cáyihī ró chíji jñuhun jeē vāha ni yā jīn ró.

Jñuhun mozo jeē steén ndese quéndōo ñayuu cácañdije

15 ¿Ndesé sāha yó núu súcuan? ¿A caca ga yō jīn cuēchi siquī jeē tuá yíhi yó chíji ley jenahán, chi sa yíhi yó chíji jñuhun jeē vāha ni yā jīn yó? Ma cúu cuiti.

16 Chi cájini rō jeē núu cuáha ró máá ró jeē cuatáhú ró sájñiñu ró núu ñn tēe, núu súcuan te cácuu ró mozo nuū téé ún, te cánuú cuandije ró núu de. Te suni súcuan núu cuáha ró máá ró jeē sāha ró cuēchi, te mozo cuēchi cácuu ró, te cuu rō. Te núu cuatáhú

ró nuū maá yá, te mozo yā cácuu ró jēē cáca ndaā rō.

¹⁷ Te na cútahū yō nuū Yaā Dios, chi vēsú ni cacuu ró mozo nuū cuéchi, te vijna chi nde jíin ini jíin ánuá rō ni cajetáhú ró nuū jnúhun ya jeē ní quívicoo ró núū.

¹⁸ Te vijna te je ni nduu libre rō jeē tuá cácuu ró mozo nuū cuéchi, te cájejniñu ró núū jniñu ndaā.

¹⁹ (Ni cahān rī ñn jnúhun ndese cúu siquī mozo ini ñayīvi yáha, chi tu cájecūhun yachī ni rō siquī jnúhun ya.) Núu sūcuan te nájnūhun ni cajēhe ró máá ró nde saá jeē ní cajejniñu ró núū tācá jniñu jnéhén jniñu néé, suni sūcuan cuāha ró máá ró vijna jeē cuajniñu ró núū jniñu ndaā, návāha coo ndoo coo īi rō nuū Yaā Dios.

²⁰ Chi nde náa cácuu ró mozo nuū cuéchi, te tu ní cájejniñu ró núū jniñu ndaā.

²¹ ¿Te na vé ni canihīn rō siquī cuéchi ni casáha ró un jēē cácuu rō vijna sáha? Tú cuítī, chi máá jēē jnahnú ndetū rō ní cání sáha.

²² Te vijna te je ni canduu libre rō jeē tuá cácuu ró mozo nuū cuéchi, te cájejniñu ró núū Yaā Dios. Te suu sáha jeē quéndō vāha ró, chi cáhīyo ndoo cáhīyo īi rō nuū yā, te nde sandīhī te cotecu rō ní cání.

²³ Chi yāhu jeē nihīn ñayuu siquī cuéchi cúu jeē jnahnú ndetū i. Te sa tahū jeē jéhe Yaā Dios cúu jeē cótecu yō ní cání andīví, siquī jeē nduú yó jíin Jítoho yō Cristo Jesús.

Jnúhun ñasihí jíin yīi jeē steén ndese quéndō ñayuu cácañje

7

¹ Hermano, je cájini rō ndese cáhán ley yā, te cájini rō jeē yīhī ñayuu chíji ley maá-ni núu técu i ñayīvi yáha.

² Te yāha cúu nájnūhun ñn ñahan jeē ní quijnáhan, chi cáhán ley jeē yīhī ña ndaha yīi ña maá-ni núu técu de. Te núu ni jihī yīi ña, te je ni quenda ña chíji ley jeē ní quijnáhan ña jíin de.

³ Núu sūcuan te núu quijnáhan ña jíin inga tēe níni técu gā yīi ña, te casíquí ndéē ña de. Te núu je ni jihī yīi ña, te je ni quenda ña chíji ley un. Te cuu quijnáhan ña jíin inga tēe, chi nasūu jēē casíquí ndéē ña núu sūcuan.

⁴ Te suni sūcuan rōhó jíin náhan ró, ñánī mánī, chi nduú ró jíin Cristo. Chi nájnūhun ni cajihī rō jíin Cristo, te ni quendacoo ró chíji ley jenahán. Te vijna chi nájnūhun ni quijnáhan ró jíin inga, cúu jeē ní quívicoo ró ndaha Cristo, Yaā ni natecu mēhñu ndīyī, návāha cuu sáha ró jniñu vāha jeē cuní Yaā Dios.

⁵ Chi ná ni cajica yó jíin modo maá yó nde saá, te ley un ní sáha jeē ní ndīyo néé ni yō tāca jēē cuní yíqui cúñu yō jeē sáha yó. Te yūcuan ní sáha jeē jnahnú ndetū yō nuú.

⁶ Te vijna te je ni quenda yó chíji ley jenahán, chi nájnūhun je ni jihī yō jeē ma nihīn gā poder siquī yō. Te sūcuan te íyó libre yō jeē cuajniñu yó núu Yaā Dios. Te jíca yó jíin modo jeē jēē cuní maá Espíritu, chi tuá yīhī yó chíji ley jeē ní tee Moisés jenahán.

Siquī cuéchi jeē ñúhun ini anuá yō

⁷ ¿Ndese cahān yō núu sūcuan? ¿A ley ndíso cuéchi? Tú cuítī jeē sūcuan. Te núu jeē tú ley yā, te ma cúni cuítī rī jeē iyó cuéchi rī. Chi ma cúni rī jeē cuéchi cúu jeē ndīyo ni rī ndajniñu jnáhan rī núu tu ní cáhán ley jeē ma ndīyo ni yō.

⁸ Te sūcuan ni nihīn cuéchi modo cocuu jíin rī. Chi siquī jeē ndácu ley jniñu jeē ma sáha yó cuéchi, te ni quejéé ndīyo ni rī sáha rī tāca jēē néé. Te núu jeē tu ley, te suni tú na jnúhun stívī yó siquī ley nuú.

⁹ Chi ni īyo tiempo jeē técu rī jeē ná tu jecūhun ni rī jeē cahán ley. Te ná ni quejéé rī jécūhun ni rī jniñu jeē ndácu ley, te ni jecūhun ni rī jeē iyó cuéchi rī, te ni nduu rī nájnūhun ndīyī.

¹⁰ Chi ni jini rī jeē ley jeē sáha jeē cótecu anuá rī nuú, te tuú chi sa ni sáha jeē jnahnú ndetū rī nuú.

¹¹ Chi jíin jēē ndácu ley un jniñu, te ni nihīn cuéchi modo cocuu jíin rī, te ni stahú ruhū. Chi jíin jēē ndácu ley jniñu, te cuéchi ni sáha jeē ní quenda jnúhun jeē jnahnú ndetū rī.

¹² Núu sūcuan te íyó ndáa maá ley, te tāca jniñu ndácu chi íyó ndoo íyó ndáa vāha.

¹³ Núu sūcuan te ley jeē iyó vāha ún, ¿á suu sáha jeē jnahnú ndetū rī naún? Tú cuítī. Chi sa suhva máá cuéchi cúu jeē sáha jeē jnahnú ndetū rī, te sūcuan stúu cuéchi

ndese íyó máá. Chi jíín jniñu váha jeē ndácu ley te ni natūu jniñu neé jéē cúu cuēchi.

14 Chi jííní yō jeē nuū maá Espíritu vēji ley. Te ruhū chi sa névāha rī ñn modo neé máá rí jeē ni squívi ruhū jejniñu cāha rí nuū cuéchi.

15 Chi tāca jéē sáha rī, tu jécūhun ni rī najehē cúu jeē sáha rī. Chi jniñu váha jeē cuní rī sáha rī, tu ndé níhín rī fuerza sáha rī, chi sa suhva sáha rī jniñu neé jéē tu cúvāha ni rī sáha rī.

16 Te náa sáha rī jniñu neé jéē tu cuní rī sáha rī, núu súcuan te nácuni rī jeē iyó ndáa ley.

17 Núu súcuan te nasūu rúhū cúu jeē sáha jniñu neé un, chi modo neé jéē ñúhun ini anuá rī cúu jeē sáha cuéchi.

18 Chi jííní rī jeē modo maá rí jeē névāha rī ini anuá rī, tú cuíti na vé jeē váha íyó. Chi cuní rī sáha rī jniñu váha, te tu ndé níhín rī fuerza sáha rī.

19 Chi jniñu váha jeē cuní rī sáha rī, tu sáha rī. Te jniñu neé jéē tu cuní rī, sa yūcuan sáha rī.

20 Te náa sáha rī jniñu jeē tu cuní rī sáha rī, te nasūu rúhū cúu jeē sáha, chi modo neé jéē ñúhun ini anuá rī cúu jeē sáha.

21 Núu súcuan te ni jini rī jeē súcuan cúu jíín rí: Vēsú cuní rī sáha rī jniñu váha, te sa máni modo neé cúu jeē ñúhun ini anuá rī.

22 Chi cúsiñ ni rī jíín ley Yaā Dios nde jíín ini anuá rī.

23 Te ni nacuni rī jeē iyó ñnga modo neé máá rí jeē jési nuū jeē cuní rī sáha rī jeē váha. Te cúu rī nájnūhun preso nuū cuéchi jeē jícu jíín rí.

24 Nacā jeē ndahú gá cúu rī núu súcuan. ¿Ndé ñn jnama ruhū nuū modo neé máá rí jeē jícu jíín rí jeē jnahnú ndetū rī?

25 Na cútahū ndasí rí nuū Yaā Dios, chi máá yá cúu jeē jnáma ruhū nuū modo neé rí siquī jeē ni jíhí Jitoho rī Jesucristo jehē rī. Núu súcuan te vēsú cuní yō squícu yó ley Yaā Dios, te jeē jíín fuerza maá yó ma cúu, chi modo neé máá yó sáha jeē jejniñu cāha yó nuū cuéchi.

Siquī jeē jíca yó jíín modo cuní Espíritu Yaā Dios

8

1 Núu súcuan te ma ndénehen Yaā Dios cuéchi siquī ñayuu cáyihí ndaha Cristo. Chi tuá cájica i jíín modo neé máá i, chi sa suhva cájica i nájnūhun cuní maá Espíritu yā.

2 Chi modo jeē sáha Espíritu cúu jeē técu yō siquī jeē yíhí yó ndaha Cristo Jesús. Te yūcuan ní sáha jeē ní nduu libre yō nuū jnúhun jeē ni yíhí yó chíji cuéchi jeē jnahnú ndetū yō nuú.

3 Chi ni sáha Yaā Dios jeē quéndōo vāha ñayuu jeē tu ní cúu quendōo vāha jíín ley Moisés, siquī jeē tú na fuerza i jíín modo maá i jeē squícu i ley un. Chi ni tají yá Sēhe ya ni quiji, te ni nduu ya nájnūhun ñayuu cáhíyo cuéchi, návāha socō yā maá yá siquī cuéchi, vēsú tú na cuéchi ya. Te súcuan ni ndonda Yaā Dios siquī cuéchi jeē ní casáha ñayuu jíín modo neé máá i.

4 Súcuan ni cuu návāha cuu squícu yó táca jniñu ndaā jeē ndácu ley, chi tuá jíca yó jíín modo neé máá yó, chi jíca yó nájnūhun cuní maá Espíritu.

5 Chi ñayuu jeē cájica jíín modo neé máá, chi máni ndíhví ni i siquī jeē cuní maá i. Te ñayuu jeē cájica nájnūhun cuní Espíritu, chi máni ndíhví ni i siquī jniñu cuní maá Espíritu.

6 Te jeē ndíhví ni yō siquī modo cuní maá yó sáha jeē jnahnú ndetū yō. Te jeē ndíhví ni yō siquī jniñu cuní maá Espíritu, sa suhva sáha jeē cotecu yō ní cáni te coo ndeyí coo siñ ni yō.

7 Chi ñayuu jeē ndíhví ni siquī modo neé cuní maá i, chi jíto uhū i Yaā Dios, chi tu cuní i cuatáhú i ley Yaā Dios, te ni ma cúu squícu i.

8 Jeē yūcuan, ñayuu jíca jíín modo cuní maá, tu cúu sáha i jeē cúsiñ ni Yaā Dios jíín i.

9 Te máá ró jijnáhan ró, chi tuá cájica ró jíín modo cuní maá ró, chi cájica ró nájnūhun cuní Espíritu, chi ndéé Espíritu Yaā Dios ini anuá rō. Te ñayuu jeē tu ndéé Espíritu Cristo ini i, tu cáyihí i ndaha ya.

10 Te núu ndéé Cristo ini rō, te vēsú ñn quiñí te cuu yiquí cúñu rō jeē siquí cuéchi, te cotecu anuá rō siquī jeē ní ndahva Yaā Dios cuéchi ró.

11 Te núu ini rō jijnáhan ró ndéé Espíritu maá Yaā jeē ní nastécu Cristo Jesús mēhñu

ndíyí, yūcuán na te máá yá suni sáha ya jeē natecu yíqui cúñu rō jeē cúū. Te sáha ya súcuan jeē jíin máá Espíritu yā jeē ndeé ini rō.

12 Núu súcuan, hermano jijnáhan ró, ndeé jniñu yó jéē caca ndaā yō, te nasūu jéē sáha yó modo neé cúni máá yó.

13 Chi núu caca ró jíin modo neé máá ró, te jnahnū ndetū rō. Te núu jíin fuerza máá Espíritu snáā rō tācá jniñu casáha ró jíin modo neé máá ró, te cotecu rō ní cáni.

14 Chi tāca ñáyuu jeē cándiquin modo jeē steén Espíritu Yaā Dios, máá i cácuu sēhe Yaā Dios.

15 Chi Espíritu jeē ní canihin rō, tu ní sáha ya rohó jéē cuu ró nájñūhun mozo nuū yā jeē yūhú tucu ró núu yā, chi sa ni sáha ya jeē cúu yó séhe ya. Te jeē yúcuan cúu jeē cahán jee yó: Tátá máá ná.

16 Te máá Espíritu steén yā ini anuá yō jeē cúu ndije yó séhe Yaā Dios.

17 Te núu sēhe ya cácuu yó, te suni nihin yō máá táhū jeē ni jéjnūhun ya, te in cáhnu-ni coo tahū yō jíin Cristo. Chi núu ndóho yó jíin yá vijna, suni kujéhnū yó jíin yá andiví.

18 Núu súcuan te sáha ri cuenta jeē tāca jnúndóho jeē ndóho yó vijna, lúli ndasí cúu nuū jnúhun jeē kujéhnū luu yó jíin yá cucuéé gá.

19 Chi ndihi jeē ni jécōo, yōhyo cándētu jeē na sáha Yaā Dios jeē nduvāha, quiví quénda ndijin jeē kujéhnū sēhe Yaā Dios jijnáhan i.

20 Chi tāca jéē ni jécōo, chi ni quiví chíji jnúhun jeē tu quéndōo vāha. Te nasūu jéē ní castiví máá, chi ñayuu ni casáha cuēchi, te jeē yúcuan ní squéndōo Yaā Dios súcuan. Te máni cándētu jeē ndúvāha.

21 Chi in quiví te tāca jéē ni jécōo, chi quenda chíji jnúhun jeē tiví jíin jéē tehyú. Te nduluu ndasí nájñūhun coo tāca séhe Yaā Dios, chi cácu nuū jnúhun jeē tu quéndōo vāha.

22 Chi jíin yō jeē tāca jéē ni jécōo, chi nde vijna te nájñūhun inuú-ni cándoho te cájitū ni jeē na ndúvāha ndihi.

23 Te nasūu máá-ni tāca jéē ni jécōo cúu jeē ndóho, chi suni nde máá yó ndóho yó, vésú je névāha yó Espíritu jeē cúu seña jeē in quiví te nihin yō ndihi tahū yō. Chi yōhyo ndóho yó jnúndóho, te ndétu yó jéē náquihin

séhe ya yohó te jnama ya yíqui cúñu yō jeē tuá ndoho yó jíin.

24 Chi ni jnama ya yohó síquī jeē ñūhun ni yō jeē súcuan coo. Te núu je ni sáha ya nájñūhun ñūhun ni yō, yūcuán na te tuá ñūhun ni yō jeē sáha ya súcuan jíin yó. Chi tuá ndétu yó te núu je ni cuu súcuan.

25 Te núu ná tu coto yó jéē sáha ya jeē ñūhun ni yō, yūcuán na te jíin paciencia ndétu yó jéē sáha ya.

26 Te suni súcuan máá Espíritu chindéé ñáhán yá yohó jéē tú na fuerza ini yō. Chi tu jíin yō cacán tahú yō nájñūhun cánuú. Te máá Espíritu cahán ndahú yá jíin Yaā Dios jehē yō síquī tāca jéē jitú ndasí ni yō te tu níhin yō jnúhun ndese cacán tahú yō.

27 Te máá Yaā Dios jeē jíto ndee anuá yō, chi jíin yā tāca jéē cuní máá Espíritu cahán yā jehē yō. Chi ñayuu cáyihí ndaha Yaā Dios, cáhán ndahú Espíritu jehē i nájñūhun cúni Yaā Dios.

Vāha-ni cúndeyí yó síquī ndihi jeneé

28 Te jíin yō jeē tācá-ni jeē quíji nuū ñáyuu maní jíin Yaā Dios, jeē vāha chí jéē uhú, chí quéndōo vāha ga i nuū yā, sáha ya jíin tāca jéē yúcuan. Chi cácuu i ñayuu jeē ní cana ya i ni quivícoo i ndaha ya síquī jeē súcuan ni tee ni yā nde jenahán.

29 Chi nde ná tu coo i te je jíin yā i, te je ni jeni ya i jeē ndoo ndaā nduu ánuá i ndacu i máá Séhe ya, návāha na cúu Séhe ya ñani jéhnū nuū cuehē ñayuu cácuu ñani cá candíje.

30 Te jeē ní jeni ya i, te suni ni cana ya i. Te jeē ní cana ya i, te suni ni ndahva yā cuēchi i. Te jeē ní ndahva yā cuēchi i, te suni ni sáha ya jeē kujéhnū i.

31 ¿Te ndese ga cahán yō síquī jnúhun jéhnū yáha núu súcuan? Chi núu íne Yaā Dios jíin yó, ¿te ndé in cuu cahán síquī yō? Tú ni in.

32 Chi máá yá tu ní jnama ya Séhe ya jeē ma cúu yā, chí sa suhva ni jēhe ya Séhe ya ni jihí yā jehē ndihi yó. Te núu súcuan ni jēhe ya Séhe ya, te nagā ni cuu jeē ma cuáha ya tāca gá jeē jíin ñúhún yó.

33 ¿Te ndé in cuu cahán cuēchi síquī ñayuu jeē ní nacáji Yaā Dios? Tú ni in. Chi máá yá ni ndahva yā cuēchi i.

34 ¿Te ndé in cuu ndenehen cuēchi síquī yō núu súcuan? Tú ni in. Chi máá Cristo cúu

jeē ni jíhī yā jehē yō, te suni ni natecu yā. Te vijna te ndéé yá lado váha Yaā Dios nuū cujéhnu ya, te cáhán ndahú yá jíin Yaā Dios jehē yō.

³⁵ ¿Te ndé ìn cuu quenehen yóhó núū jnúhun cundáhú ni Cristo yohó? ¿A jnúndóho, chí táca jéē yí sáha, chí jéē cájito xeēn ñayuu yohó, chí jnámā, chí jéē cúmanī sahma, chí jnúhun yúhú, chí jéē cáhni i yóhó naún? Ni ìn táca jéē yáha.

³⁶ Chi súcuan yósó núū tútu ìi jeē cácahān ñayuu cácañje jíin Yaā Dios: Jeē siquí maá ní te ndihī-ni hora cáculi i cahni i sãñá. Te cásáha i jíin ná jnúhun cásáha i jíin lanchi, quiti cúu.

Achí tutu.

³⁷ Te tuú chi vésú cándoho yó táca jéē yáha, te váha-ni cundeýí yó siquí ndihī-ni, sáha máa Yaā jeē ní cundáhú ni yohó.

³⁸ Jeē yúcuan cúcáhnu ni rī jeē tú ni ìn cuu quenehen yóhó núū jnúhun cundáhú ni Yaā Dios yohó. Ni núu cuu yō, ni núu cotecu yō, ni táca ndajéhé andiví, ni táca jéē neé jéē cáculéhnu jnī poder, ni jeē iyó vijna, ni jeē cóo,

³⁹ ni jeē iyó núū sūcún, ni jeē iyó núū cūnú, ni táca gá jeē ní jecōo, ma cúu cuiti quenehen yóhó núū Yaā Dios, jeē jíin Jítoho yō Cristo Jesús ni cundáhú ni yā yohó.

Siquí ndese ni nacāji ya yucūn Israel

9

¹ Te cáhán ndaā rī chí cúu ri tēe cándije Cristo, te tu stáhú rí, te jíin rī ini anuá rī jeē cahán ndaā rī sáha Espíritu Santo.

² Yōhyo cúcuíhyá ni rī, te níin jnáhuñ ni anuá rī

³ jeē siquí táca jnáhan ri ñayuu nación hebreo, chí ìn-ni yucūn rī jijnáhan ri. Chí jeē siquí maá i te cúu ni rī jeē núu na cúu te cujiyo ri nuū Cristo te jnahnū ndetū rī, náváha jíin yúcuan te cuu cācu ánuá maá i núu.

⁴ Chi cácuu i yucūn ñayuu Israel, te nde jenahán ni sáha Yaā Dios jeē cúu i sēhe ya, te mēhñu vícō jeē ndíndéé ní condee yā jíin i sáa. Te jíin maá i ni sáha ya táca contrato, te ni jēhe ya ley yā nuū Moisés jeē cúu maá i, te ni steén yā ndese chiñuhún i ya ini templo, te nuū maá i ni jejnūhun ya cuehē jnūhun.

⁵ Te máa i cácuu yucūn táca jíi yō jeē ní cacujéhnu, te suni yucūn maá i ni cacu Cristo jeē ní nduu ya tēe. Te máa yá cúu Yaā Dios jeē jnī ndihī-ni, te ní cáni cahān ñayuu jeē cujéhnu ya. Amén.

⁶ Te nasūu jéē tu ní quée ndaā táca jnúhun jeē ni jéjnūhun Yaā Dios nuū ñayuu Israel. Chí ni quée ndaā nahín núū vésú jecu-ni i, chí tú ndihī-ni yucūn Israel cúu jeē cácañje.

⁷ Chí nasūu ndihī yucūn Abraham cácuu ndije sēhe de jeē ni jéjnūhun ya. Chí ni cahān Yaā Dios jíin de: Nuū maá-ni sēhe ró Isaac cúu nuū coo yucūn rō jeē ni jéjnūhun ri nuū rō.

⁸ Te jnúhun yáha cúní cahān jeē ni ìn ñayuu tu cúu i sēhe Yaā Dios siquí jeē ní cacu i ìn yucūn jeē jéni ni i jeē váha ga cúu. Chí sa suhva máni yucūn jeē ni jéjnūhun ya cúu ndije yucūn jeē chíhi ya cuenta.

⁹ Chí yáha cúu jnúhun jeē ni jéjnūhun ya nuū Abraham: Máa tiempo jeē ní jeni ri te quiji ri, te cacu ìn sēhe yí ñasihí ró Sara, achí yá.

¹⁰ Te nasūu máa yáha-ni, chí suni Rebeca ni cacu uū sēhe yí ña, te ìn-ni tátá ndíndúu i, jeē ní cuu jíi yō Isaac.

¹¹⁻¹³ Te nde ná tu cacu ndíndúu i, te ná tu sáha i jeē váha jeē uhú, te je ni cahān yā jíin Rebeca: Sūchi ní cacu xīhna gā cuajníñu i nuū sūchi sándihí, áchí yá. Chí suni súcuan cáhán tutu ìi: Ni jito manī rī Jacob, te Esaú chí tuú, áchí Yaā Dios. Te súcuan jíin yō jeē maá Yaā Dios cuu nacāji ya ñayuu núu ndese tēe ni maá yá, te nasūu siquí jniñu jeē sáha i, chí sa suhva siquí ndese cúní maá yá nacāji ya i.

¹⁴ ¿Ndesé cahān yō núu súcuan? ¿A jéē tu iyó ndaā Yaā Dios jeē sáha ya súcuan, chí naún? Tú cuiti.

¹⁵ Chí nde jenahán ní cahān yā jíin Moisés: Ndé-ni cúu jeē cúní rī cundáhú ni rī, te cundáhú ni rī. Te ndé-ni cúu jeē cúní rī sáha ri jeē váha jíin, te sáha ri jíin, áchí yá.

¹⁶ Núu súcuan te nasūu siquí jeē cúní maá ñayuu, ni nasūu jéē nducú ndéýí maá i cúu, chí siquí ndese cúní maá yá cundáhú ni yā i.

¹⁷ Chí suni súcuan yósó núū tútu ìi jeē ni cáhán yā jíin rey ñuu Egipto: Ni jeni ri rohó jéē cúu ró rey, náváha jíin róhó te steén rī

poder rī, te návāha cuitē núu síhví rí ní ñáyíví, áchí yá.

18 Núu súcuan te núu ndé ñn cúní yā cundáhú ni yā, te cundáhú ni yā. Te núu ndé ñn cúní yā jeē cunīhni ni, te sáha ya jeē cunīhni ni.

19 Te sanaa te cahān ñn ró jíin rí: Núu súcuan cúu ¿te najehē cahán gā yā jeē cuēchi sáha yó? Chi ma cúu casi yō nuū yā jeē ndese cúní maá yá sáha ya. Achí rō.

20 Te sa suhva cáhán rī jíin ró: Róhó, ¿ndé ñn cúu ró jēé jéni ni rō stió cuíñí rō nuū Yaā Dios? ¿A cuu cahān quísi ñuhun jíin tée ni sáha: Najehē ni sáha ró rúhū súcuan? achi.

21 Chi tée sáha quísi, cuu sáha de ndese cúní maá de, chi ñn-ni ñuhun cuu sáha de ñn quísi fino te inga quísi corriente.

22 ¿Te á tu jétáhú ró jeē suni súcuan sáha Yaā Dios jíin ñáyuu? Chi cúní yā steén yā ndese sáha ya juicio siquī ñáyuu, te súcuan te cuni i poder yā. Te vésú súcuan te ni íyo paciencia ni yā jeē tu ní ndóna yachī yā siquī ñáyuu jeē jnahnú ndetū.

23 Te sáha ya súcuan návāha steén yā ndese yōhyo luu cújéhnú ya siquī jniñu sáha ya jíin yóhó ñáyuu cundáhú ni yā. Chi nde jenahán je ni sátūhva ya yohó jēé luu cújéhnú yó jíin yá.

24 Chi ni cana ya yohó jēé candíje yó, te sava yó cúu ñáyuu hebreo te sava yó cúu ñáyuu tāca gá nación.

25 Chi suni súcuan ni cahān yā, yósó núu tútu Oseas:

Ñáyuu jeē tu ní cúu ñáyuu maá rí, vijna te cahān rī jeē cácuu i ñáyuu maá rí.

Te ñáyuu jeē tu ní íyo manī rī jíin, vijna te cahān rī jeē cácuu i ñáyuu jeē manī rī jíin.

26 Te maá lugar nuū ni cáhán rī jeē násūu ñáyuu rī cácuu i,

suu yūcuan cáhán ñáyuu jeē cácuu i sēhe Yaā Dios, Yaā técu ní cáni.

Achí yá.

27 Te Isaías sa suhva ni cahān de jñūhun ñáyuu Israel: Vésú ni cayā yucūn Israel nájnūhun ñíí yumar, te jecu-ni i jnama ya.

28 Chi Jitoho yō Yaā Dios, yachī sínu ya jniñu jeē sándaā yā cuēchi ñáyuu ñáyíví. Achí tutu.

29 Chi nájnūhun ni cahān tucu Isaías:

Máá Yāā cúu Jitoho nuū tācá ndajéhé andiví, núu tu ní jnama ya jecu yucūn yō nuú,

te je ni ndoho yó nájnūhun ñáyuu ñuu Sodoma jíin ñuu Gomorra, jeē ní naa ndihi.

Achí tutu.

Jeē tu cájetáhú ñáyuu hebreo jñūhun jnama ya i

30 ¿Ndese cahān yō núu súcuan? Suu jeē ñáyuu tāca gá nación, vésú tu ní cánducú i quendōo ndaā i nuū Yaā Dios, te ni ndahva yā cuēchi i. Chi siquī jeē ní candíje i jeē ni jíhī Cristo jehē i cúu jeē ní ndahva yā cuēchi i.

31 Te sa suhva ñáyuu Israel, vésú cánducú i quendōo ndaā i nuū Yaā Dios sáha ley yā, te tu cúndeyí i quendōo ndaā i.

32 ¿Te najehē? Siquī jeē tu cánducú i jeē ndahva yā cuēchi i jeē candíje i jeē ni jíhī Cristo jehē i, chi sa jéni ni i jeē squícu máá i ley te quendōo ndaā i. Te jeē stíví i súcuan cúu nájnūhun cácotúú i siquī maá yúu jeē cácachihí jehē, te suu cúu Cristo.

33 Chi súcuan cáhán nuū tútu íi: Nde ñuu rī Sion sáha rí jeē cóne maá Yaā jeē cúu nájnūhun yuū jeē cácachihí i jehē i.

Te cúu ya nájnūhun toto jeē cotúú i sáha.

Te sa suhva ñáyuu cácandíje Yaā ún, chí jnama nahín yá i.

Achí Yaā Dios.

10

1 Hermano jijnáhan ró, cúu ndasí ni rī te jícan tahu rī nuū Yaā Dios jehē ñáyuu nación rī Israel, jeē na jnama ya i jíjnanhan i.

2 Chi cáhán rī jeē vāha cásáha i jeē ndihví ni i cáchiñúhún i Yaā Dios. Te vésú súcuan te cáchiñúhún cáhá i.

3 Chi tu cájecūhun ni i ndese ndáhva Yaā Dios cuēchi ñáyuu, te ndúcú i quendōo ndaā i máá-ni jeē squícu i ley. Te tu cájetáhú i máá modo jeē ndáhva Yaā Dios cuēchi i.

4 Chi siquī jeē ni sáha Cristo te cuu quenda ñáyuu chíji ley Moisés. Te ndáhva Yaā Dios cuēchi tāca ñáyuu jeē candíje i jeē ni sáha Cristo jehē i.

5 Chi súcuan ni tee Moisés jñūhun ñáyuu jeē cánducú quendōo ndaā jíin ley: Núu ñn

ñayuu cuu squícu i tācá jniñu ndácu ley, te cotecu i núú, áchí.

6 Te jñūhun jeē ndáhva Yaā Dios cuēchi ñayuu siquī jeē candíje i jeē sáha ya jehē i, chí sa suhva cáhán: Ma cáni ni rō jeē jíni ñúhún caa ró andiví nasnúu ró Cristo jeē ndahva yā cuēchi ró.

7 Ni ma cáni ni rō jeē jíni ñúhún cuun ró ndé nuū cūnú ndonehen ró Cristo mēhñu ndíyi, nájnūhun jeē tu ní nátecu yā.

8 ¿Te ndese cáhán jñūhun un núu súcuan? Yajni íyó jñūhun ya jíin ró, chí ñúhun ini yuhu ró jíin ini anuá rō, achí tutu. Te suu cúu jñūhun jeē na cándíje yó jéē jnáma ya yohó. Te jñūhun yáha cúu jeē cánacani ri.

9 Chi núu cahān rō jeē Jítóho rō cúu Jesús, te núu candíje ró jíin ini jíin ánuá rō jeē ní natecu yā mēhñu ndíyi ni sáha Yaā Dios, yūcuán na te jnama ya rohó.

10 Chi jíin ini jíin ánuá yō cándíje yó jéē ni jíhī yā jehē yō, te súcuan te ndáhva Yaā Dios cuēchi yó. Te jeē cahān yō jeē Jítóho yō cúu Jesucristo, te súcuan te jnama ya yohó.

11 Chi cáhán tutu iī: Tāca ñáyuu jeē candíje i ya, chí jnama nahín yá i, áchí.

12 Chi inuú-ni cúu ñayuu hebreo jíin táca gá ñayuu, chí máá yá cúu Jítóho nuū ndihí yó, te cuehē jeē váha sáha ya jíin ñáyuu cácahān ndahú jíin yá.

13 Chi súcuan cáhán jñūhun ya: Ndihi ñayuu cácahān ndahú jíin máá Jítóho yō, chí jnama ya i, áchí.

14 ¿Te ndese cahān ndahú i jíin yá te núu tu ní cándíje i jeē jnama ya i? ¿Te ndese candíje i te núu tu ní jíni sōho i jñūhun ya? ¿Te ndese cuni sōho i te núu tú na ñayuu nacani jñūhun nuū i?

15 ¿Te ndese nacani ñayuu jñūhun ya te núu jeē tu tájí yá i quihīn i? Chi nájnūhun cáhán tutu iī: Yōhoyo luu jniñu cásáha ñayuu cájica jíin jñūhun ndeyí sī ni jeē cánacani i jñūhun vāha ya, achí.

16 Te nasūú ndihí i jétáhú nuū jñūhun jnama ya i. Chí ni cahān Isaías nde jnahán: Tátā Yaā Dios, ¿ndé ñáyuu ni candíje jñūhun jeē cánacani ná víi? áchí de.

17 Núu súcuan te núu cuni nahín ñayuu te cuu candíje i. Te jñūhun cuni nahín i cúu jñūhun Cristo.

18 Te cájnūhun rí: ¿A tu ní cájini sōho i jñūhun un núu súcuan? Tuú chí ni cajini sōho i, chí cáhán tutu iī:

Ní ñáyiví ní cajini sōho ñayuu jñūhun jeē ní canacani de.

Te nde nuū jicá gá tāca lado ni jinū jñūhun ún.

Achí tutu.

19 Te suni cájnūhun rí: ¿A tu ní cájecūhun ni ñayuu Israel jñūhun ún? Tuú chí ni cájecūhun ni i, te tu ní cájetáhú i. Chí xīhna gā Moisés ni cachi de jeē ni cáhān Yaā Dios:

Cucuíñí ró jijnáhan ró, chí cuāha ri jñūhun ri nuū inga ñayuu jeē násúú ñn nación cúu.

Te quití ni rō coto ró jéē cuáha ri jñūhun ri nuū ñn nación jeē tu jécūhun ni.

20 Te suni Isaías ni chundeyí ni de ni cachi cájí de jeē ni cáhān Yaā Dios:

Ñayuu jeē tu ní cánanducú ruhū, ni cajini i ruhū.

Te nuū ñáyuu jeē tu ní cácajnūhún, ni steén rī nuū i ndese Yaā cúu rī.

21 Te siquī ñáyuu Israel sa ni cahān de jeē ni cáhān yā: Ndiquíví ni cana ri i jeē quívicoo i nuū rī, te tu ní cácu ni i, chí ñayuu ñihni ni, ñayuu jéē ni cácuu i. Achí yá, achí Isaías.

Jeē iyó jecu na ñayuu Israel jeē jnáma ya

11

1 Núu súcuan te cájnūhun rí: ¿A ní stóo Yaā Dios ñayuu maá yá Israel, chí naún? Tú cuiti. Chí ruhū suni tēe Israel cúu ri, te yucūn Abraham cúu ri, te Benjamín cúu jíi rī jnahán.

2 Tu ní stóo Yaā Dios ñayuu maá yá, chí je ni nacāji ya i nde jnahán. ¿A tu cájini rō ndese cáhán tutu iī jñūhun Elías, tēe ni nacani jñūhun ya jnahán? Chí náa jícán tahu de, te ni cahān de siquī ñáyuu Israel:

3 Tátā Yaā Dios, ni cajehni i tāca tēe cánacani jñūhun ní, te ni cajenu i tācá altar ní. Te máñúhún na sāña ní quendōo, te vijna suni cácu ni i cahni i sāña, áchí de.

4 Te Yaā Dios ni nastió cuíñí yā: Iyó nahín úxā mil ñayuu cácañíje ruhū jeē tu ní cájecuíñí yití i nuū ídolo naní Baal, achí yá.

5 Te suni súcuan vijna, chí íyó jecu na ñayuu jeē ní nacāji ya siquī jeē váha ni yā jíin i.

⁶ Te núu ni nacāji ya i siquī jeē váha ni yā jíin i, te nasūu siquī jeē ni sáha i jniñu váha cúu. Chi núu siquī jeē ni sáha i jniñu váha cúu, yūcuán na te nasūu siquī jeē váha ni yā cúu.

⁷ ¿Te ndese cúu núu súcuan? Cúu jeē ñáyuu Israel tu ní cúndeyí i quendōo ndaā i nájnūhun ni canducú i. Te sava i jeē ní nacāji ya, chi máá i ni ndahva yā cuēchi i. Te sava ga i ni ndunīhni ni i,

⁸ nájnūhun cáhán tutu i: Ni sáha Yaā Dios jeē tu jécūhun cuiṭi ni i siquī yā, ni tu jíin i jíin tñūú i, ni tu jíin nahín i jnūhun ya, te súcuan cúu nde vijna. Achí tutu.

⁹ Te suni ni cahān David: Vico jeē casáha i, na cóo nájnūhun in trampa chí in xeyū, náváha nihín i castigo xeēn siquī jeē castívi i casáha i cuēchi.

¹⁰ Te ánuá i na ndúnee, nájnūhun jeē tuá cúu coto i, te na jécostíhí jnūndóho siquī i ní cáni. Achí tutu.

Siquī jeē jnáma ya ñáyuu tāca gá nación

¹¹ Núu súcuan te cájnūhun rí: ¿A tuá cúu cuiṭi ndívi ñáyuu Israel nuū Yaā Dios jeē súcuan ni castívi i? Tú cuiṭi. Chi sa suhva jeē ní cacunīhni ni i, te sa ñáyuu tāca gá nación ni canihín tahu máá i jnūhun jeē jnáma ya i. Te yūcuan sáha tucu jeē ñáyuu Israel condíhvī ni i jeē suni candíje máá i.

¹² Chi jeē ní castívi i, te sa ñáyuu ní cáhnu ñayívi ní canihín maá i jnūhun ya. Te jeē ní cajica yátá i, suu ni sáha jeē ní canihín ñáyuu tāca nación jnūhun ya. Núu súcuan te quívi jeē ndívicoo tucu ndíhi ñáyuu Israel ndaha ya, te ñáyuu ñayívi víhyá gá quendōo ndetū i sáha ún.

¹³ Te vijna te cáhán rī jíin róhó ñáyuu tāca nación jeē tu ní jíin jnūhun ya. Chi ni tají Yaā Dios ruhū jeē scáca ri jnūhun nuū rohó ñáyuu tāca nación. Te ndúcú rí jeē na cuájnuhún ró jijnáhan ró jniñu sáha ri jeē nácani ri jnūhun ya.

¹⁴ Chi cúní rī jeē jíin yúcuán te nacani ni sava jnáhan ri ñáyuu Israel jeē suni candíje máá i, te jnama ya i.

¹⁵ Chi jeē ní stóo ya ñáyuu Israel, jeē yúcuán cúu jeē sa ñáyuu ñayívi ní sáha ya jeē ndívicoo i nuū jnúhun manī yā jíin i. Núu súcuan te quívi naquihin tucu ya ñáyuu

Israel, quívi ún suni váha ndasí sáha ya jíin ñáyuu ní cáhnu ñayívi. Chi coo nájnūhun jeē natecu i jeē cúu i nájnūhun ndívi.

¹⁶ Te ñáyuu Israel cásocō i nuū Yaā Dios pan jeē quénda xīhna gā nuū ñujen, te súcuan stéén i jeē ndíhi un cúu cuenta yā. Te in yujnu, núu yíhi jeē cuenta yā cúu, te suu cúu nde yoho jíin ndé ndíhi ndaha. Te suni súcuan ñáyuu Israel, yíhi cuenta i nuū yā, siquī jeē jíi i xīhna ñúhún, ni quívicoo de ndaha ya.

¹⁷ Chi ñáyuu Israel cácuu i nájnūhun ndayújnu olivo váha, te sava ndaha un ní quendē. Te róhó ñáyuu tāca nación jeē tu jíin jnūhun ya, cácuu ró nájnūhun ndayújnu olivo yucú, te ni nachuhun ya rohó núu ni quendē ñáyuu cácuu ndayújnu váha ún. Te nájnūhun inuú-ni cástaa ró ndúxi jíin cajin jeē véji nde yoho yújnu ún.

¹⁸ Núu súcuan te ma sáha téyí ró maá ró nuū ñáyuu Israel jeē cácuu nájnūhun ndayújnu jeē ní quendē. Ma cutéyí ró, chi nucūhun ni rō jeē násúú jéé yoho stáa cajin nuū maá ró, chi sa máá ró stáa cajin jeē véji nde yoho.

¹⁹ Te sanaa te cahān rō: Tú chi sava ndaha ni quendē náváha nachuhun ya ruhū nuū ni quendē ún, achi rō.

²⁰ Ndaā, te ni quendē i siquī jeē tu ní cácuandíje i Cristo. Te róhó chí máni siquī jeē cácuandíje ró, jeē yúcuán cúu jeē ní quívicoo ró lugar i. Te ma sándúxí ró maá ró núu súcuan, chí sa suhva conso iyo ró núu Yaā Dios.

²¹ Chi tu ní íne cáhnu ni yā nuū maá ndaha jeē chíjniñu, te suni súcuan ma cóne cáhnu ni yā nuū rō jijnáhan ró te núu stívi ró.

²² Núu súcuan te sáha váha ro cuenta ndese váha ni Yaā Dios jíin ndese xeēn ni yā. Chi ni nduxeēn ni yā jíin ñáyuu hebreo jeē ní castívi ún, te sa cúnáhú ni yā rohó. Te cánuú cuiñi nihín ro jíin jnúhun jeē váha ni yā jíin ró. Chi núu tuú, te suni quende yā rohó.

²³ Te máá i, núu candíje tucu i, te nucōndee tucu i, chí máá Yaā Dios cuu nachuhun tucu ya i.

²⁴ Núu súcuan te róhó ñáyuu tāca nación jeē tu ní jíin jnūhun ya, ni quendē rō xinī yújnu olivo yucú, te ni nachuhun ya rohó

xínī yujnu olivo váha, vēsú nasūú ndaha máá yujnu un cácuu ró. Te nagā ni cuu ñayuu hebreo jeē ma náchuhun ya i nuū ni quéndē i, chi cácuu i máá ndayújnu váha ún.

En quivī te jnama ya ndihī ñayuu nación Israel

²⁵ Hermano, cúní rī jeē na jécūhun ni rō jijnáhan ró ndese iyó jnúhun yáha jéē ní yisāhí, návāha ma cutéyí ró caní ni rō jeē ndichí xínī máá ró: Chi sava ñayuu Israel ni ndunīhni ni i, te súcuan coo máá-ni nde quivī jínu candíje ñayuu tācá nación jeē tu jíní jnúhun ya.

²⁶ Te saá te jnama ya ndihī ñayuu nación Israel, chi cáhán tutu īi: Ichi ñuu rī Sión quiji Yaā jnáma ñayuu, te sáha ya jeē tuá coo cuēchi nuū tāca yúcūn Jacob.

²⁷ Te yāha cúu contrato jeē sándaā rī jín i, quivī jeē quénde ri cuēchi i jijnáhan i, áchí Yaā Dios. Achí tutu.

²⁸ Chi ñayuu hebreo un ní nduu i nájnūhun enemigo Yaā Dios siquī jeē tu ní cácandíje i jnúhun jnáma ya i. Te jeē yúcuan te cuu cuitē núu jnúhun un núu tāca rōhó. Te vēsú súcuan te siquī jeē ní nacāji ya tāca jí i jenahán, te cundáhú gá ni yā i jeē ma stóo ya i ní cáni.

²⁹ Chi tu nácani yátá ni yā jeē cána ya ñayuu jín jéē jéhe ya tahū i.

³⁰ Te rōhó jijnáhan ró, suni ni cahīyo nīhni ni rō nuū Yaā Dios nde saá. Te vijna jeē ní cacunīhni ni máá ñayuu hebreo, te cundáhú ni yā rohó.

³¹ Te suni súcuan máá i, chi vēsú cacunīhni ni i vijna, te cundáhú tucu ni yā i, nájnūhun cundáhú ni yā máá ró jijnáhan ró.

³² Chi Yaā Dios ni sáha ya jeē ní quendōo ndivīi ñayuu chīji jnúhun cúnīhni ni i, návāha suni cuu cundáhú ni yā ndivīi i.

³³ Núu súcuan te náhán náā ni yō jeē yóhō cuehē jnúhun ndichí iyó jín Yaā Dios, te ndihī cuiti jiní yā. Te ni ma cúu cuiti castūhun yó ndese téē ni yā sáha ya tācá-ni, te ma cánda cuiti yō jecūhun ni yō ndese cúu tāca jéē sáha máá yá.

³⁴ Chi cáhán tutu īi: ¿Ndé ñn ni jecūhun ni ndese jéni ni máá Jítoho yō? ¿Chí ndé ñn ni steén nuū yā?

³⁵ ¿Ndé ñn ni jéhe xīhna gā nuū maá yá, návāha nachunaa yā nuū i?

³⁶ Chi nde nuū maá yá vēji tāca jéē iyó, te máá yá ni sáha ndihī, te jeē cúu máá yá cúu. Te na cáhán yō jeē yóhō luu cújénu Yaā Dios ní cáni. Amén.

Jeē na cóo ndoo ánuá yō cuajníñu yó núu Yaā Dios

12

¹ Núu súcuan te cáhán ndahú rí jín ró jijnáhan ró, hermano, jeē siquī jeē cundáhú ni Yaā Dios yohó. Na sócō rō máá ró núu yā, coo ndoo coo īi rō cuajníñu ró núu yā, nájnūhun cúsi ni yā. Chi yāha cúu jeē chiñúhún ró yā nde jín ini jín ánuá rō.

² Te ma cáca ró jín tāca modo casáha ñayuu ñayivī yáha, chi sa na sáma ró modo caní ni rō, te ndujeé jéē níjnūmí rō. Te súcuan te cuu nacāji ró ndé-ni cúu jeē váha jeē nújnahan ni Yaā Dios, jeē cúsi ni yā, jín jéē íje ni rō jín jnúhun ya.

³ Te siquī jeē váha ni yā ni jéhe ya jniñu nácani ri jnúhun ya, jeē yúcuan cáhán rī jín ndihī ró jéē ma cáni ni rō jeē váha ga ñayuu cúu ró núu cūhva jeē iyó ró. Chi ná ñn ná ñn ró na cáni ndaā ni rō siquī máá ró, te ma scáa ga rō caní ni rō jeē váha ga ñayuu cúu ró vēsú nuū cūhva jeē ni jéhe Yaā Dios fuerza ini rō cándíje ró.

⁴ Chi cácuu yó nájnūhun ñn yiqui cúñu jeē iyó cuéhē parte, te sín sín jéjníñu ñn ñn.

⁵ Chi vēsú iyó cuéhē yō, te nájnūhun ñn-ni yiqui cúñu cúu yó jéē yíhi yó ndaha Cristo, chí ñn-ni ni nduu yó jijnáhan yó.

⁶ Te sín sín tahū ni jéhe Yaā Dios nuū yō jeē cuajníñu yó núu yā, núu ndese ni nujnahan ni yā ni jéhe ya nuū ñn ñn yó. Núu súcuan te na cuajníñu vāha yó jín táhū ún. Núu ni nihīn yō tahū jeē nácani yó jnúhun ya, te cánuú sáha yó ndé máá cūhva ni jéhe ya cándíje yó.

⁷ Te núu ni nihīn yō tahū jeē chindéé ñáhán yó jnáhan yó, te na sáha yúcún yó. Te núu ni nihīn yō tahū jeē steén yō, te na cóndihvī ni yō steén yō.

⁸ Te ñayuu jeē stihvī ni inga ñayuu, suni na sáha yúcún i. Te ñayuu jéhe nuū jnáhan, na cuáha i súcuan-ni. Te ñayuu ndíso jníñu,

na ndácu vāha i jniñu. Te ñayuu jító ndáhú ñayuu ndahú, na cúsī ni i sáha i.

Ndese cánuú squícu ñayuu cácandíje

⁹ Te na cúndáhú ndije ni rō jnáhan ró, nasūu máá jéé cahán-ni ró. Te coto uhū rō jniñu néé, te condiquīn rō jniñu váha.

¹⁰ Te cánuú coo manī rō jín jnáhan ró nájnūhun jéé manī rō jín ñani rō. Te nducú ró jeé quéndōo yíñúhún gá jnáhan ró vēsú máá ró.

¹¹ Te ma cucúxí ró jín jniñu cásáha ró. Chi jín ini jín ánuá rō condihvī ni rō cuajniñu rō núu máá Jítóho yō.

¹² Te na cúsī ni rō jeé cáñuhun ni rō tāca jéé váha jeé cóo. Te na cuándeýí ni rō núu ndóho ró jnúndóho. Te níni na cacán tahú rō.

¹³ Te coto ndáhú ró ñayuu cácandíje núu cúmanī nuū i. Te cuāha núu ró vehe nuū ñayuu cájica.

¹⁴ Te cacān tahú rō jehē ñayuu cájito xeēn rohó. Ma cahán ndevāha ro síquī i, chi sa cacān tahú rō jehē i.

¹⁵ Te núu cúsī ni ñayuu, te suni na cúsī ni rō jín i. Te núu cúcuíhyá ni ñayuu, te suni na cúcuíhyá ni rō jín i.

¹⁶ Na cóo inuú ni rō jín táca jnáhan ró. Te ma cundúxí ró, chi sa quijnáhan ró jín ñayuu núu ga. Ma cáni ni rō jeé ndichí xínī rō.

¹⁷ Te ma nasáha ndevāha ró jín ni in ñayuu, núu ni sáha ndevāha i jín ró. Na cóndihvī ni rō sáha ró jniñu váha, jító jínúū tāca ñayuu.

¹⁸ Te na cóndihvī ni rō coyūcu mánī rō jín táca ñayuu, vēsú ndese cándāa máá i.

¹⁹ Nánī mánī jijnáhan ró, ma nacuāha ró jéé ndútahū ñayuu casáha ndevāha jín ró, chi sa cuāha ró jnúhun jeé máá Yaā Dios cuāha ya castigo i. Chi cáhán tutu īi: Máá rí cuāha castigo i, máá rí nacuāha yāhu i, áchí Jítóho yō.

²⁰ Te suni cáhán tutu: Tēe jító uhū rohó, núu jíi de sōco, te cuāha ró jéé cáji de. Te núu jíchí de, te cuāha ró jéé cóho de. Chi núu sáha ró súcuan, te cucanu de te nacani uhū ni de jeé ni jító uhū de rohó.

²¹ Ma cuāha ró jnúhun jeé cúndeýí jniñu néé jín ró, chi sa jniñu váha na sáha ró návāha ndahvā jniñu néé.

13

¹ Tāca ñayuu na cuátáhú i nuū tohō cándiso jniñu ñuu. Chi ma cóo tēe cándiso jniñu te núu tu ní sáha máá Yaā Dios. Te tēe cándiso jniñu chi Yaā Dios ni tee jniñu síquī de.

² Te ñayuu jeé tu jétáhú núu tēe cándiso jniñu, núu súcuan te cúnihni ni i nuū jeé ní jeni Yaā Dios. Te ñayuu jeé cúnihni ni, chi cuēchi sáha i, te nihīn i castigo.

³ Chi tāca tēe ndiso jniñu, nasūu jéé ndiso jniñu de jeé yūhú ñayuu casáha jniñu váha, chi sa jeé yūhú ñayuu casáha jniñu néé. Te núu cúní rō jeé ma cúxeēn tēe cándiso jniñu nuū rō, na sáha ró jniñu váha núu súcuan. Yūcuán na te cuajnúhún de rohó.

⁴ Chi jéjníñu Yaā Dios de jijnáhan de, návāha coyūcu váha ró jijnáhan ró. Te núu sáha ró jniñu néé, te sa yūhu ró, chi nasūu cáha-ni cúu jeé cándiso jniñu de stóho de ñayuu. Chi jéjníñu Yaā Dios de, návāha cuāha de castigo ñayuu casáha jniñu néé.

⁵ Jeé yúcuan cánuú jéé cuatáhú ró núu tēe cándiso jniñu, te nasūu máni jeé ma níhín rō castigo, chi suni jeé tú na cuēchi coo ánuá rō.

⁶ Te jeé yúcuan cúu jeé suni cájēhe ró xúhun núu tēe cándiso jniñu cuu jniñu ñuu. Chi jéjníñu Yaā Dios de, te máni jniñu yúcuan cásáha de.

⁷ Te chunaa rō ndihī jeé cátaū rō nuū tāca ñayuu. Cuāha ró xúhun ñuu nuū tēe stútú xúhun ñuu, te cuāha ró xúhun renta nuū tēe stútú renta. Te na cóo respeto rō nuū ñayuu cánuú coo respeto rō. Te na cóo yíñúhún ró nuū ñayuu cánuú coo yíñúhún ró.

⁸ Ma cótaū rō nuū ní in. Te íyó in jeé taú rō jeé ma tahndé cuiti, suu jeé ni cáhān Yaā Dios jeé cundáhú ni rō jnáhan ró. Chi ñayuu cundáhú ni jnáhan, je ni squícu i ndihī jeé ndácu ley yā.

⁹ Chi súcuan ndácu ley jniñu: Ma cosíquí ndéē rō jnáhan ró, ma cáhni rō ndīyī, ma sacuíhná ró, ma sajnúhún ró, ma ndíyo ni rō jeé névāha jnáhan ró. Te tāca jnúhun yáha jín táca gá jniñu ndácu ley, ndihī-ni yīhī chíjī jnúhun yáha: Cundáhú ni rō jnáhan ró nájnūhun cundáhú ni rō máá ró, áchí tutu.

¹⁰ Te núu cundáhú ni yō jnáhan yó, te tu sáha yó ni in jeé tu íyó váha nuū i.

Núu súcuan te jeē cundáhú ni yō jnáhan yó, yūcuan cúu jeē squícu yó ní ley yā.

¹¹ Súcuan sáha ró jínáhan ró, chi sáha ró cuenta jeē cuácuyajni quivī ndíji ya. Te ma cóo ga rō nájnūhun ñayuu quixí, jeē cúhuun ni rō. Chi vijna je ni cuyajni ga quivī jnáma ya yohó vēsú quivī ní candíje yó jnúhun ya.

¹² Chi nájnūhun je yajni yāha jecuáā, te cuacundijin quivī jnáma ya yohó. Núu súcuan te na stóo yó jniñu jeē ni sáha yó núu nēē, te na cúcutú yó jín táca jniñu ndaā jeē caca yó jín luz yā.

¹³ Na cáca yíñúhún yó nájnūhun cánuú caca yó jín luz yā. Ma nájni ró, ma sáha ró táca vico néé, ma cáca jnéni ró, ma sáha ró jniñu néé, ma cuajnáhan ró, ma cucuésún ni rō.

¹⁴ Chi sa suhva cuiñi cutú ró jín fuerza maá Jítóho yō Jesucristo, jeē ma cuáha ga rō jnūhun sáha ró jniñu cúní modo neé maá ró.

Ma cahán neé yó coto yó jnáhan yó

14

¹ Cuatáhú ró ñayuu jeē ná tu ije jín jnúhun ya, te ma tejnáhan ró jín i siquī táca jnúhun jeē sán jéni ni i jín maá ró.

² Chi íyó ñayuu jeē jéni ni i jeē cúu caji i ndinuū-ni. Te íyó ñayuu jeē ná tu ije jín jnúhun ya, te cájeni ni i jeē tú vāha caji i cūñu, chi jeē ní casocō ñayuu nuū ídolo cúu.

³ Te róhó téé jeē yéji ndinuū-ni, ma cahán rō coto ró téé jeē tu yéji ndinuū. Te róhó téé jeē tu yéji ndinuū, ma cahán rō coto ró téé jeē yéji ndinuū. Chi Yaā Dios ni jetáhú yá tēe ún.

⁴ Te róhó, ¿ndé ñn cúu ró jéé cahán neé ró jító ró mozo Yaā Dios? Chi núu vāha chí néé sáha de, te maá yá cúu jeē sándaā jín de, nasūu maá ró. Te tuú chi cuiñi vāha de, chi mozo maá Jítóho yō cúu de, te cuu sáha ya jeē ma stívi de.

⁵ Te suni íyó ñayuu jeē jéni ni jeē í gā ñn quivī vēsú inga quivī. Te inga ñayuu chí jéni ni i jeē ñnuú-ni cúu táca quivī. Te táca i na cúndaā vāha ni maá i siquī jeē jéni ni i.

⁶ Chi tēe jeē néé ñn quivī, chíñúhún de maá Jítóho yō jeē sáha de súcuan. Te tēe jeē tu néé ñn quivī, suni chíñúhún de Jítóho yō jeē sáha de súcuan. Te tēe jeē yéji ndinuū-ni, chíñúhún de maá Jítóho yō

jeē sáha de súcuan, chi nácuatáhú de nuū Yaā Dios. Te tēe jeē tu yéji ndinuū, suni chíñúhún de Jítóho yō jeē sáha de súcuan, te suni nácuatáhú de nuū yā.

⁷ Chi ni ñn yó tu técu yō jeē váha maá-ni yó, te ni ñn yó tu jíhí yō jeē cuní maá yó.

⁸ Chi núu técu yō, te técu yō jeē cuajniñu yó núu maá Jítóho yō. Te núu cuu yō, te suni cuu yō siquī jeē cuní maá Jítóho yō. Núu súcuan te núu jeē cótecu yō chí jéé cuu yō, te yñi yó ndaha Jítóho yō.

⁹ Chi ni jihí Cristo te ni natecu yā, návāha cuu ya Jítóho nuū ñayuu ni jíhí jín ñayuu técu.

¹⁰ Te róhó, ¿naun jéni néé ni rō jító ró jnáhan ró núu súcuan? ¿Te naun cújéé ni rō jító ró de? Chi táca yó cuiñi yó yuhu mesa Cristo jeē sándaā yā jniñu yó.

¹¹ Chi suhva yósó núu tútu ñn: Jendaá ndije chi nuū maá rí cuiñi yítí táca ñayuu, te ndiñi i cahán jeē maá rí cúu Yaā Dios, áchí maá Jítóho yō.

¹² Núu súcuan te ná ñn ná ñn yó nacuāha yo cuenta nuū Yaā Dios ndese jniñu ni casáha yó.

Ma sáha yó jéé quivī jnáhan yó cuéchi

¹³ Te jeē yúcuan ma cahán neé gá yō coto yó jnáhan yó. Chi sa tee ni rō jeē ma sáha ró ni ñn jniñu jeē sáha jeē stívi jnáhan ró te quivī i cuéchi.

¹⁴ Te jíní rí jeē ni ñn jeē ni sáha Yaā Dios, tu stívi ánuá yō. Chi súcuan ni cucáhnu vāha ni rí siquī jeē candíje ri Jítóho yō Jesús. Te núu ñn ñayuu jéni ni i jeē iyó jéé stívi ánuá i, yūcuán na te súcuan sáha un jín maá i.

¹⁵ Te núu jnáhan ró tu cúvāha ni de jeē yéji rō cūñu ni casocō ñayuu nuū ídolo, chí jéni ni de jeē stívi un ánuá rō, núu súcuan te tu cundáhú ni rō de jeē sáha ró súcuan. Coto má snáā rō anuá jnáhan ró siquī jeē yéji rō ñn jeē jéni ni de jeē cuéchi cúu. Chi suni jehé maá de ni jihí Cristo.

¹⁶ Ma sáha ró jniñu jeē cahán i siquī, vēsú jiní maá ró jeē iyó váha.

¹⁷ Chi jeē ndácu Yaā Dios jniñu nuū yō, nasūu siquī ndese caji yō coho yó cúu, chí sa suhva siquī jeē na sáha yó jniñu ndaā, te coyūcu mání yō jín jnáhan yó, te cusñi ni yō sáha Espíritu Santo.

18 Te ñayuu jeē súcuan jéjníñu nuū Cristo, chi cúsiñi ni Yaā Dios jíin i, te suni cájejnúhún ñáyuu i.

19 Núu súcuan te na cóndihvī ni yō coyūcu mánī yō, návāha jíin yúcuan chindéé ñájnáhan yó ije yó jíin jnúhun ya.

20 Te ma cuáha ró jnúhun jeē ndeyu yéji rō snáa jniñu ni sáha Yaā Dios jíin jnáhan ró. Chi iyó ndoo ndije ndihī jeē yéji yō, te vésú súcuan te tú vāha jeē yéji rō ndeyu jeē sáha jíin jnáhan ró jéē caji de jeē jéni ni de jeē cuēchi cúu.

21 Vāha ga ma cáji rō cūñu, ni ma cóho ró vino, te ni ñin ma sáha ró jéē stívi ánuá jnáhan ró, te quīvi de cuēchi, te caca yátá de nuū jnúhun cándíje de.

22 Te núu cándíje ró jéē tú na vé sáha jeē yéji rō, te súcuan na cándíje máa-ni ró núu Yaā Dios. Te nacā ndetū tēe jeē tu sáha jíin ánuá de jeē cuēchi cúu núu caji de coho de.

23 Te tēe yéji ñin jeē jéni ni de sanaa te stívi ánuá de, núu súcuan te sáha de cuēchi, chi tu cándíje de jeē iyó váha jeē yéji de. Chi tāca jéē sáha yó, núu tu cándíje yó jéē iyó váha, te cuēchi cúu.

Jeē na sáha yó jéē cúsiñi ni jnáhan yó

15

1 Te yóhó jéē ni íje yó jíin jnúhun ya, cánuú condito yó ñáyuu jeē ná tu ije jíin jnúhun ya, návāha candíje vāha i. Te ma sáha yó jéē máa-ni yó cusīñi ni.

2 Chi ná ñin ná ñin yó na sáha yó jéē cúsiñi ni jnáhan yó, návāha quendōo vāha i te ije i jíin jnúhun cándíje i.

3 Chi ni Cristo, tu ní sáha ya jeē cúsiñi ni máa yá, chi sa suhva jeē cúsiñi ni Tatá yā. Chi suhva cáhán tutu iī: Tāca jnúhun ndevāha jeē cácahān ndevāha ñayuu siquī ní, ni ndīvi siquī máa ná, áchí Cristo jíin Tatá yā.

4 Chi tāca jnúhun jeē ni jecosō nuū tútu iī nde jenahán, chi ni jecosō návāha stéén nuū yō, te nihīn yō jnúhun jeē sáha jeē cuandeyí ni yō te ndusīñi ni yō. Te súcuan te cocuhun ni yō tāca jéē váha jeē cóo.

5 Te máa Yaā Dios jeē jéhe jnúhun cuandeyí ni jíin jnúhun ndúsīñi ni, na sáha ya jeē cóo inuú ni rō, nájnūhun cúní Cristo Jesús.

6 Te súcuan te ñin-ni coo ró te inuú-ni cuu cahān rō jeē yóhoyō vāha Yaā cúu Yaā Dios, Tatá Jitoho yō Jesucristo.

Jeē ni jítē jnúhun vāha ya nuū ñáyuu tācá nación

7 Núu súcuan te cuatáhú ró tāca jnáhan ró, nájnūhun ni jetáhú Cristo yohó, návāha cuni ñayuu jeē luu cújéhnu Yaā Dios.

8 Chi cáhán rī jeē ní quiiji Cristo Jesús, ni sáha ya tācá jniñu jeē quéndōo vāha ñayuu hebreo, návāha cundaā tāca jnúhun jeē ni jéjnūhun Yaā Dios nuū tāca jíi i. Te súcuan ni steén Cristo jeē squícu Yaā Dios tāca jéē ni jéjnūhun ya.

9 Te suni ni quiiji ya návāha ñayuu tācá nación jeē tu jíin jnúhun ya, cahān i jeē yóhoyō vāha ni Yaā Dios jeē cundáhú ni yā i. Chi suhva cáhán tutu iī:

Núu súcuan te cahān na jéē yóhoyō vāha ni ní, cuni ñayuu tācá nación, te cata ná yaa jeē chiñúhún ná nihín.

10 Te cáhán tucu tutu iī: Róhó ñáyuu tācá nación, inuú na cúsiñi ni rō jíin ñáyuu máa yá.

11 Te cáhán tucu: Róhó ñáyuu tācá nación, na cáhán rō jeē yóhoyō vāha ni Jitoho yō Yaā Dios, te róhó ñáyuu tācá-ni ñuu, suni na cáhán rō jeē yóhoyō cújéhnu ya.

12 Te suni ni tee Isaías jnúhun yáha: Nuū yúcūn Isaí quiiji ñin jeē cújéhnu, te ndacu ya jniñu nuū ñáyuu tācá nación. Te ñayuu ún chi cocuhun ni i tāca jéē sáha ya. Achí tutu.

13 Te máa Yaā Dios jeē sáha jeē cáñuhun ni yō tāca jéē váha jeē coo, na sáha ya jeē cóo siñi ndasí ni rō jíin jéē cóo ndeyí ni rō siquī jeē cácaandíje nihīn ró yá. Te súcuan te cocuhun teyí gá ni rō tāca jéē váha jeē coo, sáha poder máa Espíritu Santo.

14 Nánī mánī, cúcahnu ni rī jeē váha ndasí cándihvī ni rō jíin jniñu váha, te vāha ndasí cájecūhun ni rō, te cúu stíhvī jnáhan ni rō.

15 Te ni jeni ni rī jeē tee ri carta yáha cáhán caji rí jíin ró jijnáhan ró, návāha víhyá gā na cócuhun ni rō tāca jnúhun yáha. Chi súcuan sáha rí siquī jeē váha ni Yaā Dios te ni jéhe ya jniñu nuū rī

16 jeē jejniñu rí nuū Jesucristo, jeē nácani rí jnúhun nuū ñáyuu tācá nación jeē tu jíin

jnūhun ya. Te nácani ri jnūhun vāha Yaā Dios nuū i jeē jnáma ya i. Súcuan sáha ri návāha ñayuu tǎcá nación, cuu squívi ri i ndaha ya jeē cúu i nájñūhun in jeē socó rī nuū yā jeē cúsi ni yā jíin. Chi ni sáha Espíritu Santo jeē iyó ndoo íyó íi i nuū yā.

17 Núu súcuan te siquī jeē candíje ri Cristo Jesús, te cúsi ni rī jeē jejniñu vāha ri nuū Yaā Dios.

18 Chi ma cúu cahān rī siquī jniñu casáha inga tēe, chi máa-ni siquī ndese ni jejniñu Cristo ruhū jeē sáha ri jeē ñáyuu tǎcá nación tu ní jíní jnūhun Yaā Dios, vijna jétáhú i nuū yā. Chi súcuan ni cuu jíin jnūhun ni cahān rī jíin jniñu ni sáha ri.

19 Chi ni sáha ri jniñu jéhnū ndíso poder jeē steén jeē cujéhnū ya, te ni iyo poder Espíritu Santo jíin rí. Te súcuan ni nacani ndíhi ri jnūhun ndese jnáma Cristo ñayuu. Te ni nacani ri nde ñuu Jerusalén, jíin ndíhi tǎcá ñuu, jíin nde ní región Ilírico.

20 Súcuan cúu jeē ní condíhvī ni rī ni nacani ri jnūhun jeē jnáma ya ñayuu. Te ni jehēn rī nuū ñáyuu jeē ná tu cuni jnūhun Cristo, chi tu ní cúní rī nacani ri nuū ñáyuu jeē jé ni jini i ni canacani inga tēe.

21 Chi sa suhva ni sáha ri nájñūhun cáhán tutu i:

Tāca ñáyuu jeē tu ní quíji jnūhun ya nuū i,
vijna chi cuni i jnūhun ya,

te tāca ñáyuu jeē tu ní jíní cuíti jnūhun ya,
vijna chi jecūhun ni i.

Achí tutu.

Jeē ñúhun ni Pablo jeē quihín de Roma

22 Te jeē yúcuan cúu jeē cuehē jínu ni cujneñu rī, te tu ní cúu jecondēhe rí rohó jíjnáhan ró.

23 Te vijna chi ni ndíhi jniñu rī ní cáhnu tǎcá región ndañúu yáha. Te je ni cuu cuehē cuiyā jeē cúní rī jeē rī nuū rō.

24 Núu súcuan te ñúhun ni rī jecondēhe rí rohó jíjnáhan ró núu na yáha ri quihín rī España. Te ñúhun ni rī jeē núu je ní cusí ni rī jeē ní jito jnáhan yó, yūcuán na te chindéé ñáhán ró ruhū jeē quihín gā rī.

25 Te xīhna gā na quihín rī ñuu Jerusalén quindēca ri xūhún cuu hermano cáyūcu yúcuan.

26 Chi ñayuu Macedonia jíin Acaya ni caji ni i jeē cáquin i xūhun quihín nuū hermano cándoho ndáhú ñuu Jerusalén.

27 Chi súcuan ni cacusi ni i ni casáha i. Te íyó vāha jeē súcuan, chi máa i jeē cácuu i ñayuu tǎca gá nación, táu i jeē sáha vāha i nuū ñáyuu hebreo un. Chi ñayuu hebreo ni casáha jeē ní quiji jnūhun Yaā Dios nuū i jeē quéndōo vāha ánuá i sáha. Jeē yúcuan cánuú jéé chindéé ñáhán i ñayuu hebreo cáncandíje jíin ndajniñu ñayívi yáha.

28 Núu súcuan te jeē jínu jniñu yáha jéé quindēca ri xūhun yáha nuū i, yūcuán na te jecondēhe rí rohó jíjnáhan ró jéé yáha ri quihín rī España.

29 Te jíní vāha ri jeē quivī jinú rī nuū rō, te vāha ndasí quendōo ró jéé nacani ga rī jnūhun vāha Cristo nuū rō.

30 Hermano jíjnáhan ró, cáhán ndahú rí jíin ró jeē chindéé ñáhán ró ruhū cacān tahú rō jehē rī nuū Yaā Dios siquī jniñu ndúcú ndeyí rí. Súcuan sáha ró siquī jeē candíje yó Jítoho yō Jesucristo, jíin siquī jeē cundáhú ni yō jnáhan yó sáha máa Espíritu.

31 Te cacān tahú rō jeē na cácu ri nuū tēe región Judea jeē tu cáncandíje, jíin jéé na cúsi ni tǎcá hermano ñuu Jerusalén jeē quindēca ri xūhun yáha cuu de.

32 Te súcuan te núu cúní Yaā Dios te jecondēhe rí rohó jíjnáhan ró, te cusí ni yō, te nanihín ni rī jeē condee rī jíin ró.

33 Te máa Yaā Dios jeē jéhe jnūhun ndeyí sí ni, na cóo ya jíin ró jíjnáhan ró. Amén.

Jeē cáhán Pablo jeē sándeiyí ni i

16

1 Te vijna te cáhán rī jíin ró jíjnáhan ró jéé na chindéé ñáhán ró hermana Febe, chi cúu ña ñahan jéjniñu jeē siquī jnūhun ya nuū ñáyuu cáncandíje ñuu Cencrea.

2 Te cuatáhú ró ña nájñūhun cúní maá Jítoho yō, chi súcuan cánuú sáha hermano cáncandíje. Te chindéé ñáhán ró ña na-ni vé cúu jeē jíní ñúhún ña, chi súcuan ni chindéé ñáhán máa ña cuehē ñayuu, te suni nde ruhū.

3 Cahān rō jíin Priscila jíin Aquila jeē sándeiyí ni ndíndúu de, áchí rí, chi cáchindéé ñájñáhan de jíin rí siquī jniñu Cristo Jesús.

4 Chi ná ni īyo jnūndóho jeē cuu rī nuú, te ni cachundeyí ni de ni canducú de scácu de ruhū, vēsú suni cuu maá de núú. Te nácuatáhú rí nuū ndīndúú de, te nasūu máá-ni ruhū, chí suni tāca grupo ñayuu cá candíje tācá naciún.

5 Te suni cahān rō jīn ñáyuu cá candíje ndútútú vehe de, sándeyí ni i, áchí rí. Te cahān rō jeē sándeyí ni Epeneto, tēe manī rī jīn. Chí ñuu Acaya, máá de cúu jeē ní candíje xīhna gā nuū Cristo.

6 Suni cahān rō jeē sándeyí ni María, ñahan jeē ní jejniñu ndasí jeē siquí jnúhun ya mēhñu rō jijnáhan rō.

7 Te cahān rō jeē sándeyí ni Andrónico jīn Junias, tēe cácuu jnáhan ñuu rī jeē ní cahīn jīn rí vecāa. Te tācá apóstol chí cájejnúhún de ndīndúú tēe jíñá, te xīhna gā de ni candíje Cristo vēsú maá rí.

8 Cahān rō jeē sándeyí ni Amplias, tēe manī rī jīn, chí cándíje de Jítoho yō.

9 Te cahān rō jeē sándeyí ni Urbano, tēe chīndéé ñájnañan jīn yó siquí jniñu Cristo Jesús, te suni súcuan Estaquis, tēe jeē manī rī jīn.

10 Suni cahān rō jeē sándeyí ni Apeles, tēe jeē ní stéén jeē candíje vāha de Cristo, te suni súcuan cahān rō jīn ñáyuu vehe Aristóbulo.

11 Cahān rō jeē sándeyí ni Herodión, tēe cúu jnáhan ñuu rī. Te suni súcuan ñayuu vehe Narciso jeē cá candíje maá Jítoho yō.

12 Te suni cahān rō jeē sándeyí ni Trifena jīn Trifosa, ñahan cásajniñu siquí jnúhun máá Jítoho yō. Te suni sándeyí ni Pérsida, hermana jeē maní yō jīn, chí suni ní sájniñu ndasí ña siquí jnúhun Jítoho yō.

13 Te cahān rō jeē sándeyí ni Rufo, tēe cájejnúhún ñáyuu jeē vāha cándíje de máá Jítoho yō. Te suni súcuan cahān rō jīn náná de, te máá ña suni ní jito ña ruhū nájnūhun jeē naná rī cúu ña.

14 Te cahān rō jeē sándeyí ni Asíncrito jīn Flegonte jīn Hermas jīn Patrobas jīn Hermes jīn tāca hermano jeē cáyūcu jīn de.

15 Te suni súcuan Filólogo jīn Julia jīn Nereo jīn cuáha de, jīn Olimpás jīn ndihi hermano cá candíje cáyūcu jīn de jijnáhan de.

16 Te jeē cahán tāca rō jīn jnáhan rō, te

yíñuhún techūhu rō ndaha i. Te tāca grupo ñayuu cá candíje nuū Cristo, cáhán i jeē na sándeyí ní rō.

17 Te cáhán ndahú rí jīn rō, hermano jijnáhan rō, jēe cóto rō máá rō nuū ñáyuu cútucu ni te ndúcú stívi jnáhan jīn jnúhun tu quiñáhan jīn jēe ní cacutūhva rō. Te cujiyo rō núu i jijnáhan i.

18 Chí ñayuu súcuan, tu jéjniñu i nuū Jítoho yō Jesucristo, chí máni ndíhví ni i siquí jeē cáji i. Te yōhyo ndúxi i jīn jnúhun cácahān i, te súcuan stáhú i ñayuu jeē tu jíní vāha.

19 Te máá rō jijnáhan rō, chí je cájini ndihi ñayuu ndese vāha cájetáhú rō nuū yā, te jeē yúcuan cúsi ni rī. Te cúní rī jeē cóo listo vāha rō sáha rō jniñu vāha, te ma sáha rō jniñu née.

20 Te máá Yaā Dios jeē jēhe jnúhun ndeyí sí ni, yachí sáha ya jeē cúndeyí rō siquí jexeén jeē cúu Satanás. Te ñúhun ní rī jeē Jítoho yō Jesucristo na sáha ya jeē vāha rōhó jijnáhan rō.

21 Sándeyí ní rō jijnáhan rō, áchí Timoteo, tēe chīndéé ñáhán jīn rí siquí jnúhun ya. Te suni súcuan cácahān jnáhan ñuu rī Lucio jīn Jasón jīn Sosípater.

22 Te ruhū jeē naní Tercio, jeē tēe ri carta yáha jēe cahán Pablo, suni cáhán rī jeē sándeyí ní rō jeē cá candíje rō Jítoho yō.

23 Te Gayo, tēe ní jēhe núu vehe ndéé rúhū Pablo, cáhán de jeē sándeyí ní rō jijnáhan rō. Te suni jēhe núu de vehe nuū tāca ñáyuu cá candíje. Te suni súcuan cáhán Erasto, tēe cúu tesorero ñuu yáha, te suni súcuan cáhán hermano Cuarto.

24 Te ñúhun ní rī jeē maá Jítoho yō Jesucristo, na sáha ya jeē vāha rōhó jijnáhan rō. Amén.

Jnúhun sándihi jēe cahán jeē yóhyo cújēhnu ya

25 Te vijna na cáhán yō jeē yóhyo cújēhnu Yaā Dios. Chí máá yá cuu sáha jeē cuñi nihin ga rō jijnáhan rō jīn jnúhun jnáma ya rohó jeē nácani ri, jīn jnúhun Jesucristo jeē steén rī. Chí súcuan ní steén Yaā Dios jnúhun sáhi yá, jeē ní yisáhi ní cáni nde ná tu jecōo ñayíví.

26 Te vijna te je ní nane cájí. Chí jīn tútu īi jeē ní catee tēe ní canacani jnúhun ya, ní jítē núu jnúhun sáhi yáha nuū ñáyuu tācá

nación, návāha candíje i te cuatáhú i. Chi Yaā Dios jeē técu nǎ cáni, súcuan ni ndacu ya jniñu.

²⁷ Te nǎ cáni na cáhán yō jeē yóhō cújéhnū Yaā Dios siquī jniñu ní sáha ya jeē jín Jesucristo. Chí máá ïn-ni ya iyó te yóhō ndíchí yá. Súcuan na cóo. Amén.

CARTA HIN JEE NI TEE SAN PABLO APOSTOL NUU ÑAYUU ÑUU CORINTO

¹ Máá rí cúu Pablo, te ni cana Yaā Dios ruhū cúu ri apóstol Jesucristo. Chi súcuan ni nujnahan ni yā ni tají yá ruhū nacani ri jnūhun ya. Te ndindúú rí jiín hermano yō Sóstenes

² cátee ri carta yáha cuájeē nuū rohó ñáyuu ñuu Corinto jeē cácan díje ró Yaā Dios. Chi cácuu ró ñáyuu maá yá, chi cáyihí ró ndaha Cristo Jesús. Chi ni cana Yaā Dios rohó jíjnáhan ró jéē coo ndoo coo iī rō nuū yā. Te ni cana ya rohó ndé jiín táca gá ñáyuu jeē ndácunehen i máá Jítoho yō Jesucristo, ndé-ni cúu nuū cáhīyo i. Chi Jítoho táca yō jíín i cúu ya.

³ Te cáñuhun ni rī jeē Tatá yō Yaā Dios jíín Jítoho yō Jesucristo na sáha ga yā jeē váha rōhó, te sáha ya jeē coo ndeyí coo sī ni rō.

Cristo sáha ya táca jéē váha yóhó

⁴ Te níni nácuatáhú rí nuū Yaā Dios jeē síquí rohó jíjnáhan ró, chi jeē jíín Cristo Jesús ni sáha ya jeē váha rōhó.

⁵ Chi cáyihí ró ndaha Cristo, te jeē yúcuan ní sáha Yaā Dios jeē cáhīyo cúca ró jíín táca jnūhun ya, chi cájecūhun vāha ni rō te cúu nácani ró.

⁶ Chi súcuan cúu jeē cáhīin nīhin ró jíín jnūhun Cristo jeē ní canacani ri nuū rō.

⁷ Te súcuan te tu cúmanī ni ñn tahū jeē jéhe ya cuu ánuá rō níni jéē cándetu ró quíví jeē quénda ndijin Jítoho yō Jesucristo.

⁸ Te máá yá chi sáha ya jeē cuiñi nīhin ró nde na jínu quíví, návāha ma cóo cuēchi síquí rō quíví ndíji Jítoho yō Jesucristo.

⁹ Te squícu Yaā Dios táca jéē ni jéjnūhun ya, te ni cana ya rohó jíjnáhan ró návāha cuni jnáhan ró jíín Séhe ya, Yaā cúu Jítoho yō Jesucristo.

Síquí jeē ma cóo sñn ni i jíín jnáhan i

¹⁰ Hermano, nde jíín síhví Jítoho yō Jesucristo cahán ndahú rí jíín ró jeē inuú-ni na ndájñūhun ró jíjnáhan ró, te ma cóo sñn ni rō. Chi vāha inuú na cóo ni rō jíín táca jéē cájeni ni rō.

¹¹ Súcuan cáhan rī, ñánī mánī, chi ni cacastūhun ñáyuu vehe Cloé nuū rī jeē cátejnáhan ró.

¹² Chi táca iin iin ró sñn sñn cácahān rō: Ruhū chi jíín Pablo índichi rī, cácahān sava ró. Te sava ga rō: Ruhū chi jíín Apolos. Ruhū chi jíín Pedro. Ruhū chi jíín Cristo. Cácahān rō.

¹³ Te jeē cácahān rō súcuan ¿te á cájeni ni rō jeē sñn sñn Cristo iyó jéē cánacani ri jnūhun? ¿Te á ruhū Pablo ni jihí jicā cruz jehē rō? ¿Chí jíín síhví ruhū ni cajendute ró, chí naún?

¹⁴ Tú cuíti. Te na cútahū rī nuū Yaā Dios jeē tú cuehē rō ni scuándute ri, chí máá Crispo jíín Gayo-ni,

¹⁵ návāha ma cahán ni ñn ró jéē jíín síhví rí ni jendute ró.

¹⁶ Te sá núcūhun ni rī jeē suni ni scuándute ri Estéfnas jíín ñáyuu vehe de. Te sanaa te súcuan-ni cúu ñáyuu ni scuándute ri, jéni ni rī.

¹⁷ Chi tu ní téjníñu Cristo ruhū jeē scuándute ri, chí sa suhva jeē nácani ri jnūhun jeē jnáma ya ñáyuu. Te tu ní ndúcú rí jeē steén rī nuū rō ñn modo ndichí jéē ma jécūhun ni rō, chí núu súcuan te ma cúu jecūhun vāha ni rō jnūhun jeē ni jihí Cristo jicā cruz.

Jíín Cristo ni steén Yaā Dios poder yā jíín jnūhun ndíchí yá

¹⁸ Te jnūhun jeē ni jihí yā jicā cruz jeē jnáma ya ñáyuu, chí jnūhun cánéé íi cúu nuū ñáyuu cuango nuū jnahnú ndetū. Te máá yó jeē cuahán yō nuū cácu yó, chí jíni yō jeē jnūhun Yaā Dios jeē ndíso poder cúu.

¹⁹ Chi suhva yósó núu tútu iī jeē ni cáhān Yaā Dios:

Na snáā rī jnūhun ndíchí cácahān ñáyuu ndíchí cuenta ñayíví yáha,

te ma cuatáhú rí jnūhun cácahān ñáyuu jeē jéni ni jeē jíni vāha.

Achí yá.

²⁰ Núu súcuan ¿te ndé cuajníñu tēe ndíchí cuenta ñayíví yáha, jíín tée cástéén tutu, jíín tée cámanducú yúcún síquí jeē steén ñáyuu ñayíví yáha? Chi táca jnūhun ndíchí cuenta ñayíví yáha, ni cahān Yaā Dios jeē jnūhun cánéé íi cúu.

²¹ Te yōhyo ndíchí sáha Yaā Dios. Chi táca jnūhun ndíchí cájini ñáyuu ñayíví, ni cachi

ya jeē tu jéjníñu jeē cúni i ndese Yaā cúu ya. Yūcuán na te ni nujnahan ni yā jeē jíin jnúhun ya jeē cáncani ri te jnama ya ñayuu cáncandíje, vésú cájeni ni ñayuu ñayívi jéē jnúhun cánéé íi cúu.

²² Chi ñayuu hebreo, máni cáncuni i jeē sáha Yaā Dios cuehē jniñu jénu jeē steén poder yā. Te ñayuu griego chi máni síquī jnúhun ndíchí cándihvī ni i.

²³ Te máá rí chi sa suhva cáncani ri jnúhun jeē ni jíhī Cristo jicā cruz jeē jnáma ya ñayuu. Te jnúhun yáha sáha jeē jnáníni ni ñayuu hebreo, te ñayuu tāca gá nación chi cájeni ni i jeē jnúhun cánéé íi cúu.

²⁴ Te ñayuu jeē ní cana ya ni quívicoo ndaha ya, vésú ñayuu hebreo chí ñayuu griego, chí jíni i jeē jíin Cristo ni steén Yaā Dios poder yā jíin jnúhun ndíchí yá.

²⁵ Chi jnúhun Yaā Dios jeē cácahān ñayuu jeē jnúhun cánéé íi cúu, yōhō ndíchí gá vésú jnúhun ndíchí ñayuu. Te cájeni ni ñayuu jeē tú na poder yā ná ni jíhī Jesús jeē jnáma ya yohó, te tuú chi níhin téyí gá poder yā ún vésú poder ñayuu.

²⁶ Hermano, máá ró cácuu jeē ní cana ya ni quívicoo ró ndaha ya. Te condēhe ró jeē tú cuehē ró ndíchí jíin jnúhun ñayívi, ní tú cuehē ró cándacu jniñu, ní tú cuehē ró cácuu sēhe ñayuu cujénu.

²⁷ Chi sa suhva ni nacāji Yaā Dios tāca jéē cácahān ñayuu ñayívi jéē tu ndíchí cuítí, návāha coo jnúhun canu nuū tāca jéē ndíchí. Te ni nacāji ya ñayuu tu téyí ini ñayívi, návāha coo jnúhun canu nuū ñayuu téyí.

²⁸ Te suni ni nacāji Yaā Dios tāca jéē tu cújénu ini ñayívi, jíin tāca jéē sajéē ni i nuū, nde jíin tāca jéē tú jniñu cájeni ni i, návāha snúu ya tāca jéē cujénu ini ñayívi.

²⁹ Súcuan ni sáha ya návāha ni ññ ñayuu ma cúu sátéyí i máá i nuū yā.

³⁰ Te máá ró jíin náhan ró chi ni sáha Yaā Dios jeē nduú ró jíin Cristo Jesús. Chi nde nuū maá yá ni canihīn yō jnúhun ndíchí, te ni ndahva yā cuēchi yó, te ni sáha ya jeē iyó ndoo íyó íi yō nuū yā, chí ni jnama ya yohó.

³¹ Te jeē yúcuan na cóo nájnūhun cáhān tutu íi: Núu ññ ñayuu cuní i cutéyí i, te na cutéyí i síquī jeē ní sáha máá Jítóho yō jehē i, áchí.

Jeē nácani Pablo jnúhun jeē ni jíhī Cristo

2

¹ Te ruhū, hermano, ná ni jeē rī nuū rō jíin náhan ró jéē nácani ndaā rī jnúhun Yaā Dios, te tu ní nácani ri jnúhun ndíchí jéē ma jécūhun ni rō.

² Chi ná ni íyo ri jíin ró te tú na ñnga jnúhun ní ndúcú rí castūhun rí nuū rō, chí máni máá jnúhun Jesucristo jeē ní jíhī yā jicā cruz jeē jnáma ya yohó.

³ Te ná ni jinū rī nuū rō jíin náhan ró, chí tú na fuerza rī, te yúhú rí, te quísi i ruhū.

⁴ Te ná ni nacani ri jnúhun nuū rō, chí nasūu jíin jnúhun ndíchí ñayuu ñayívi ní scándíje ri rohó, chí sa suhva jíin máá poder Espíritu yā ni steén rī nuū rō jíin náhan ró,

⁵ návāha ma cuíñi ró síquī jnúhun ndíchí cácahān ñayuu, chí cuíñi ró síquī poder Yaā Dios.

Jíin Espíritu te steén Yaā Dios ndese Yaā cúu ya

⁶ Te ndaā chí ndíchí cácahān rī jíin ñayuu jeē jé ni ije jíin jnúhun cándíje i ya. Te nasūu jnúhun ndíchí jéē iyó ini ñayívi yáha, ní nasūu jnúhun ndíchí cácahān tēe cácujuhnu ñayívi yáha, chí tēe ún yāha-ni jeē cácujuhnu de.

⁷ Chi jnúhun cácahān rī cúu jnúhun ndíchí máá Yaā Dios jeē ní yisāhí. Chí jnúhun ndíchí un jéē ní yisāhí, ní jequin Yaā Dios nde ná tu jecōo ñayívi, návāha cácu yó jéē cótecu yō ní cáni sáha jnúhun ún.

⁸ Chí ni ññ tēe cújénu nuū ñayívi yáha, tu ní jécūhun ni de jnúhun ndíchí un. Chí núu ni jécūhun ni de núú, te ma cáhni cuítí de máá Jítóho yō, Yaā cujénu luu.

⁹ Chí cúu nájnūhun cáhān tutu:

Tāca jéē ni sátūhva Yaā Dios jeē cúu ñayuu jeē maní jíin yá,

ni ññ ún tu ní jító jínúu ñayuu, ni tu ní jíni sōho i,

ni tu ní quíji jeē súcuan cani ni i.

Achí tutu.

¹⁰ Te máá yó jíin náhan yó chí ni steén Yaā Dios tāca un núu yō jeē jíin Espíritu yā. Chí máá Espíritu jíni vāha ya te steén yā ndihí, chí nde ndihí jeē ndíchí gá máá Yaā Dios.

¹¹ Chí ni ññ ñayuu ma cúu cuní i ndese jéni ni ñnga ñayuu, chí máá-ni i jíin ánuá i cúu jeē jíni. Te suni súcuan ni ññ ñayuu tu jíni

i ndese jéni ni Yaā Dios, chi máá-ni Espiritu Yaā Dios cúu jeē jiní.

¹² Te máá yó chi ni nihīn yō Espiritu un jéē véji nuū Yaā Dios, te tu cájeni ni yō nájnūhun cájeni ni ñayuu ñayīví. Te jeē yúcuan cúu jeē cájecūhun ni yō ndese ni sáha Yaā Dios jeē váha yóhó síquī jeē váha ni yā.

¹³ Te suu síquī tāca jéē yáha cúu jeē cácahān rī, te nasūu jíin jnūhun jeē castéén ñayuu ndichí, chi jíin jnūhun jeē steén maá Espiritu. Chi cástéén rī jnūhun Espiritu nuū ñayuu cánevāha Espiritu.

¹⁴ Te ñayuu ñayīví tu cájetáhú i tāca jnūhun jeē véji nuū Espiritu Yaā Dios, chi cájeni ni i jeē jnūhun cánéé lí cúu. Te ma cúu jecūhun ni i, chi tu cánevāha i máá Espiritu jeē sáha jeē jécūhun ni i.

¹⁵ Te ñayuu cánevāha Espiritu, chi cájecūhun ni i ndese íyó ndihī-ni. Te ñayuu ñayīví ma cúu jecūhun ni i ndese ñayuu cácuu ñayuu ún.

¹⁶ Chi suhva cáhán tutu īi: ¿Ndé ĩn cuu cuni ndese jéni ni maá Jítóho yō? ¿Te ndé ĩn cuu steén nuū yā? Ni ĩn ma cúu. Achí tutu. Te vésú súcuan te máá yó chi cájeni ni yō nájnūhun jéni ni Cristo.

Jeē cáchindéé ñájnáhan de cájegniñu de nuū Yaā Dios

3

¹ Te ruhū, hermano, tu ní cúu cahān rī jíin ró jijnáhan ró nájnūhun cáhán rī jíin ñayuu jica jíin Espiritu. Chi ni cahān rī jíin ró nájnūhun jíin ñayuu cájica jíin modo maá, chi cácuu ró nájnūhun sūchi lúlí jéē ná tu ije ró jíin jnūhun Cristo.

² Ni steén rī nuū rō jeē tú yí, chi cácuu ró nájnūhun sūchi lúlí jéē jéxin gā. Te tu ní cáhán rī jíin ró jnūhun yí jeē cúu nájnūhun jeē ndáva jeē véji ñayuu ni ije, chi ná tu canda ró jíin ndé saá. Te ni vijna ná tu canda ró jíin.

³ Chi cájica ga rō jíin modo neé máá ró. Chi cácuésún ni rō, te cácajnáhan ró, te cácusún ni rō. Núu súcuan te cácuu ró nájnūhun ñayuu ñayīví jéē cájica jíin modo neé máá.

⁴ Chi ĩn ró cáhán: Ruhū chi jíin Pablo índichi rī. Te inga rō cahán: Ruhū chi jíin Apolos. Te súcuan cúu jeē cájica ró jíin modo neé máá ró

⁵ ¿Te ndé ĩn cúu ruhū, te ndé ĩn cúu Apolos núu súcuan? Chi máá mozo-ni Yaā Dios cácuu ri, te ni jejniñu ya ruhū návaha candíje ró máá Jítóho yō. Chi ná ĩn ná ĩn ri ni sáha jniñu ndese ni jēhe máá Jítóho yō nuū rī.

⁶ Ruhū, nájnūhun ni taji ri jnūhun ya ini anuá rō, te Apolos, nájnūhun ni chuhun de ndute cúu jeē ní steén gā de nuū rō. Te máá Yaā Dios cúu jeē ni scuéhnu jnūhun ini anuá rō.

⁷ Núu súcuan te tú na vé cúu sáha tēe táji ni tēe chūhun ndute, chi sa suhva máá Yaā Dios cúu jeē scuéhnu.

⁸ Te tēe táji jíin tēe chūhun ndute, ĩn-ni cácuu de. Te tāca de chi cuāha ya yāhu nuū de ndese jniñu ni casáha ĩn ĩn de.

⁹ Chi ruhū jijnáhan ri chi tēe chindéé ñájnáhan cájegniñu nuū Yaā Dios cácuu ri. Te máá ró jijnáhan ró cácuu nájnūhun itu Yaā Dios jeē jicu ya jíin.

Te suni nájnūhun ĩn vehe jeē sáha Yaā Dios cácuu ró.

¹⁰ Te ruhū chi cúu ri nájnūhun ĩn maestro albañil jeē ní jequin rī cimientto vehe ún, cúu jeē ni scándíje ri rohó. Te inga de cásama de síquī, cúu jeē castéén gā de nuū rō. Núu súcuan te ná ĩn ná ĩn de na cóo cuidado de ndese sáma de síquī.

¹¹ Te Jesucristo cúu cimientto vehe ún, te ni ĩn ma cúu caquin inga cimientto, chi máá yá cúu jeē ní ndahva cuēchi ró.

¹² Te tāca ñayuu cácañíje, chi sáha i vehe síquī cimientto un, núu jíin ndajniñu vāha nájnūhun oro chí plata chí yūu luu, chí jíin jéē yachí naa, nájnūhun yujnu chí ite chí ndayóhō.

¹³ Te natūu jniñu un jéē ní sáha ĩn ĩn i, te suu cúu ndese ni condihvī ni i síquī maá yá. Chi máá quivī juicio jeē sándaā yā jniñu ñayuu, quivī ún natūu cájijniñu i. Chi jíin ñuhūn quiji quivī ún, te nájnūhun sáha ñuhūn jeē jéhu tāca jéē cúu cayū, súcuan coto ndee ya jniñu ĩn ĩn i.

¹⁴ Te núu tú cayū jniñu ní sáha i síquī cimientto un, te nihīn i tahū i.

¹⁵ Te núu tu ní cóndihvī ni i jíin jniñu ya, te ma nihīn i tahū i, chi nájnūhun cayū jniñu i. Te máá i chi cácu ánuá i, vésú nájnūhun je yajni cayū i nuū yáñuhūn.

¹⁶ ¿A tu cájini rō jeē cácuu ró nájnūhun

templo Yaā Dios, chi ndéé Espíritu Yaā Dios ini anuá rō?

¹⁷ Te núu ñn tēe stívi de templo Yaā Dios, te snáhnú ndetū yā tēe ún. Chi ndoo ndasí cúu templo yā, te suu cácuu máá rō.

¹⁸ Ni ñn rō ma stahú rō maá rō jíin jéé jéni ni rō. Núu ñn ñayuu jéni ni i jeē ndichí i jíin jnúhun ñayívi yáha, vāha ga na siáa i ún, návāha coo ndíchí ndije i jíin jnúhun máá yá.

¹⁹ Chi jnúhun ndíchí jéé iyó ini ñayívi yáha, jnúhun cánéé íi cúu nuū Yaā Dios. Chi cáhán nuū tutu íi: Ñayuu ndichí cuenta ñayívi, chi nájni ya i siquí jnúhun ndíchí i jeē jési i jnúhun ya, achí.

²⁰ Te cáhán tucu tutu: Máá Jítoho yō jiní yā tāca jéé jéni ni ñayuu ndichí, chi máni jeé jéni cáhá ni i, achí.

²¹ Núu súcuan te ni ñn rō má cutéyí rō jeé siquí ni ñn tēe ndíchí. Chi cuenta maá rō cúu ndíhi-ni.

²² Cúu Pablo, cúu Apolos, cúu Pedro jeé castéén nuū rō. Cúu ndíhi jeé iyó ini ñayívi, jeé iyó vijna jíin jéé quíji. Te vésú núu cotecu rō chí cuu rō, te ndíhi-ni chi cuenta maá rō cúu.

²³ Te máá rō cácuu cuenta Cristo, te Cristo cúu cuenta Yaā Dios.

Jeé casájniñu apóstol siquí jnúhun ya

4

¹ Núu súcuan te na cáni ni rō jijnáhan rō jeé mozo-ni nuū Cristo cácuu ri, jeé ní tejniñu ya ruhū jeé steén rī jnúhun Yaā Dios jeé ní yísahi ndé jenahán.

² Te ndaā chi tēe jeé sájniñu siquí ún, iyó responsable ná ñn ná ñn de jeé squícu vāha de.

³ Te ruhū tu sáha ri cuenta núu cánanducú rō siquí rī ndese sáha ri, chí núu cánanducú ñáyuu cácujuhnu ini ñayívi. Te ni máá rí tu chíhi ri cuenta siquí máá rí.

⁴ Chi vésú jiní rī jíin ánuá rī jeé tú na cuēchi ri, te nasūu yúcuan cúu jeé quéndō ndaā rī, chi máá Jítoho yō cúu jeé jíto ndee ruhū.

⁵ Jeé yúcuan ma nánducú rō siquí jniñu jnáhan rō, chi nde na quée máá quívi te cuni rō. Chi nde na ndíji máá Jítoho yō te nastúu ndijin yā tācá jniñu jeé yísahi núu néē, te steén ndijin yā tāca jéé jéni ni ñayuu jíin ánuá

i. Yūcuán na te máá Yaā Dios cuajnúhún yá ná ñn ná ñn i ndese ni casáha i.

⁶ Hermano, tāca jnúhun yáha ní cahán rī návāha quéndō vāha rō jijnáhan rō. Te ni cachi rī jeé máá rí jíin Apolos cácuu ri mozo-ni nuū yā, te súcuan cácuu ri ñn ejemplo nuū rō. Te cáhán rī jeé súcuan cácuu ri, návāha cutúhva rō cani ni rō maá-ni nájnuhun cáhán tutu íi. Chi ma sandúxi rō jeé cuajnúhún rō ñn tēe stéén, te inga de tuú.

⁷ ¿Te naun cácutéyí rō nuū jnáhan rō núu súcuan? ¿Te na vé cúu jeé iyó núu rō jeé tu ní cacutahū rō nuū yā? Te núu ni cacutahū rō nuū yā, ¿te naun casátéyí rō máá rō jeé nájnuhun jeé nasūu jéé ní cacutahū rō cúu?

⁸ Va je ni cacucúca rō, chi je cánevāha rō ndíhi, cájeni ni rō. Te je cándacu máá rō jniñu, te ni tuá cájini ñnúhún rō ruhū, cájeni ni rō. Tú vāha jeé súcuan cácutéyí rō. Te nacā jeé vāha núu jeé cándacu ndije nde rō jniñu núu, návāha suni cuāha rō jnúhun jeé ndacu nde ri jniñu jíin rō jijnáhan ri.

⁹ Te iyó jéni ni rī jeé ruhū tēe cácuu apóstol, ni sáha Yaā Dios jeé cácuu ri nájnuhun tēe núu ga nuū ñáyuu, nájnuhun tēe jeé jé ni cundaā jeé cúu. Te ní ñáyívi jíin andívi cándēhe vāha nuū rī, cúu ndajéhé Yaā Dios jíin ñáyuu.

¹⁰ Chi jeé siquí Cristo te cácahán i jeé tēe cánéé cácuu ri. Te tāca róhó va ndíchí rō jíin jnúhun Cristo, cájeni ni rō. Te tāca rúhū chi tu fuerza rī, te róhó va iyó fuerza rō, cájeni ni rō. Te róhó chi cáhīyo yíñnúhún ñáyuu nuū rō, te nuū rī chi casájéé ni i.

¹¹ Ní véjicoo ri cáji rī sōco te nde vijna. Te cájichī rī ndute, te cúmanī sahma ri, te tu casáha vāha ñayuu jíin rí, te ni tu cánevāha ri vehe.

¹² Te níhin casájniñu ri jíin ndaha ri. Cácahán neé i nuū rī, te cácahán vāha ri jíin i. Cájito xeén i ruhū, te cájendeyí ni rī.

¹³ Cácahán neé i siquí rī, te sa cácahán manī rī jíin i. Te cácuu ri nájnuhun yācá ini ñayívi, te casquéhichī i ruhū nde vijna.

¹⁴ Te nasūu jéé tēe ri yāha jéé cúcanu rō, chi sa suhva jeé stíhví ni rī rohó, chi cácuu rō nájnuhun sēhe ri chí manī rī jíin rō.

¹⁵ Chi vésú na cóo uxī mil tēe stéén jnúhun Cristo nuū rō, te ñn-ni tátá rō iyó. Te máá rí cúu nájnuhun tátá rō, chi ni scandíje ri rohó

jeē ní nacani ri jnūhun vāha Cristo Jesús jeē jnáma ya yohó.

¹⁶ Núu súcuan te cáhán ndahú rí jín ró jeē na ndácu ró ruhū jijnáhan ró.

¹⁷ Te jeē yúcuan cúu jeē tají rí Timoteo cuajeē de nuū rō. Chi cúu de nájnūhun sēhe ri jeē maní rī jín de, te squícu vāha de nuū maá Jítóho yō. Te maá de nacachi tucu de nuū rō ndese jíca ri jeē candíje ri Cristo, jín ndese stéén rī nuū tāca grupo ñayuu cácadíje tāca lado.

¹⁸ Te sava ró chi cásátéyí ró maá ró, chi cájeni ni rō jeē ma jée cuítí gā rī nuū rō.

¹⁹ Te tuú chi yachī jeē rī nuū rō te núu súcuan cúní maá Jítóho yō. Yūcuán na te nanducú rí siquī téé cácutéyí, te ma sáha ri cuenta jnūhun cácahān-ni de, chi sa coto ndee rī de núu cuu squícu nde de.

²⁰ Chi jeē ndácu Yaā Dios jniñu nuū yō, nasūu maá jée cahán ī-ni yó cúu, chi jini ñuhún condiso poder jnūhun cáhán yō jín jniñu sáha yó.

²¹ Núu súcuan ¿te ndese cácu ni rō? ¿A jée cuxeēn rī nuū rō núu na jée rī, siquī jeē tu cánacani ni rō, chí nacani ni rō te jeē rī jín jnúhun cundáhú ni jín jnúhun vītá ni?

Jeē sándaā Pablo siquī ñn cuēchi

5

¹ Te ni nihīn rī jnūhun jeē jíca jnéni ñn tēe jeē íne mēhñu ró, chi ndéca de naná uū de. Te xeēn ndasí sáha tēe ún, chi ni ñayuu jeē tu cájini jnūhun Yaā Dios, tu cásáha i súcuan.

² Te vésú súcuan te cásátéyí ró maá ró jijnáhan ró. Vāha ga jeē na cúcuíhyá ndasí ni rō. Te cánuú jée na quénehen ró téé sáha cuēchi ún na quénda de mēhñu ró.

³ Te ruhū, vésú tu íyó rí jín ró, te nájnūhun jeē iyó rí jín ró cúu jeē ñuhún ni rī rohó. Te je ni sándaā rī siquī tēe ni sáha cuēchi ún, chi nájnūhun jeē iyó rí jín ró cúu.

⁴ Núu súcuan te na ndútútú ró jijnáhan ró, te maá Jítóho yō Jesucristo coo ya jín ró. Te maá rí chi nájnūhun cone ri jín ró, chi ñuhún ni rī rohó. Te poder maá Jítóho yō Jesús suni coo jín ró.

⁵ Te na chíhi yó téé ún ndaha Satanás, návāha na ndóho yiquí cúñu de, te nacani ni de te cācu ánuá de quivī ndiji Jítóho yō Jesús.

⁶ Tuú vāha jeē casátéyí ró maá ró. ¿A tu cájini rō jnūhun cáhán suhva? Vésú jecu-ni levadura te ndáa ní ñujen sáha, áchí.

⁷ Núu súcuan te quenehen ró téé un nájnūhun scáne ró levadura jeē ni tíví. Te súcuan te cuu ró nájnūhun pan jeē cúvāha jín ñujen jée jée tú na levadura yíhi, jeē cáyeji i vico pascua. Te ndaā jeē súcuan cácuu ró. Chi je ni jihī Cristo jeē ni sócō yā maá yá jehē yō, chi cúu ya nájnūhun londe pascua jeē ni jihī.

⁸ Núu súcuan te na cócūhun ni yō ndese ni cuu vico pascua un, te na cóo ndije ndaā anuá yō, te suu cúu nájnūhun pan jeē tú na levadura yíhi. Te ma sáha yó jniñu néé jín jniñu jnéhén, jeē cúu nájnūhun levadura jeē ni tíví.

⁹ Nuū inga carta jeē ní tee ri nuū rō jijnáhan ró ni cahán rī jeē ma quíví nduu rō jín ñayuu cájica jnéni.

¹⁰ Te tu ní cáchi rī jeē ma quíjnáhan cuítí rō jín ñayuu tu cácadíje jeē cájica jnéni, jeē ndíyo ni, jeē sácuhná, jeē chíñuhún ídolo. Chi núu súcuan te jini ñuhún jeē quénda ró ini ñayíví núu, chí tuá na inga modo jeē cújiyo ró núu i chí ndée yó ñayíví jín i.

¹¹ Chi sa suhva ni cachi rī jeē ma quíví nduu rō jín máa ñayuu jeē cácahān i jeē cúu i hermano, te núu jíca jnéni i, chí ndíyo ni i, chí chíñuhún i ídolo, chí chísó jnúhun i siquī jnáhan i, chí nájini i, chí cuíhna i. Te ni ma cáji cuítí rō staā jín ñayuu casáha súcuan.

¹²⁻¹³ Chi nasúu jniñu ri cúu jeē sándaā rī siquī ñayuu jeē tu cáhīn jín yó. Yaā Dios cúu jeē sándaā siquī i. Te ñayuu cáhīn jín ró chí cánuú jée sándaā rō siquī i. Núu súcuan te cánuú jée quénehen ró téé ni sáha cuēchi un jée íne de mēhñu ró, na quénda de.

Jeē ma cáquin i cuēchi siquī jnáhan i nuū tohó tu cácadíje

6

¹ Te núu jnáhan ró jée candíje ni sáha cuēchi siquī rō, ¿te naun jéngoo ró jín de nuū tohó jeē tu cácadíje jín yó? ¿Te naun tu cásándaā rō nuū jnáhan ró cácadíje Yaā Dios?

² ¿A tu cájini rō jeē ñayuu cácadíje Yaā Dios chí ñn quivī te sándaā i jniñu ñayuu ñayíví? Te núu ñn quivī sándaā rō jniñu

ñayuu ñayīvī, ¿te á má cúu sándaā rō vijna siquī tāca cuēchi lúli cásáha jnáhan ró?

³ ¿A tu cájini rō jeē ñin quivī te sándaā yō nde jniñu tācá ndajéhé andivī? Te nagā ni cuu jniñu ñayīvī yáha jeē ma cúu sándaā yō.

⁴ Núu súcuan te núu jnáhan ró sáha de ñin cuēchi siquī rō, ¿te naun jéngoo ró sa nuū tāca tée jeē tu cúu de jnáhan ñayuu cácañdije jeē sándaā de siquī cuēchi ún?

⁵ Súcuan cáhán rī návāha na cúcanu rō jijnáhan ró. ¿A tu iyó ni ñin tēe jécūhun ni mēhñu ró jeē cuu sándaā de siquī rō?

⁶ Tú vāha jeē ñin hermano caquin cuēchi siquī ñinga hermano nuū tohó jeē tu cácañdije.

⁷ Te jeē cájequin rō cuēchi siquī jnáhan ró, chi jeē castivī íi rō cúu. ¿A tú vāha ga cuandeyí ni rō na sáha i cuēchi siquī ró chí quende i ndajniñu ró?

⁸ Te tuú chi sa máá ró cásáha cuēchi te cáquende ró ndajniñu, te nuū tācá hermano ró cúu jeē casáha ró.

⁹⁻¹⁰ ¿A tu cájini rō jeē ñayuu tu iyó ndāā, ma nihín tahú i quivī i ñuu nuū ndácu Yaā Dios jniñu? Ma stahú ró maá ró cani ni rō jeē nihín tahú rō, chi ni ñayuu jeē jica jnéni, ni ñayuu chiñúhún ídolo, ni ñayuu casiquí ndéé jnáhan, ni tēe sáha ndiyī jín jnáhan yí, ni ñayuu cuīhná, ni ñayuu ndíyo ni, ni ñayuu nájini, ni ñayuu chisó jnúhun siquī jnáhan, ni ñayuu stahú jnáhan siquī xúhun, ma nihín tahú i quivícoo i ñuu nuū ndácu Yaā Dios jniñu.

¹¹ Te súcuan ni candāa sava ró núu, te vijna chi je ni nacate ya rohó, te cáhīyo ndoo cáhīyo íi rō nuū yā. Chi je ni ndahva yā cuēchi ró jéé jín máá Jítóho yō Jesús jín Espíritu Yaā Dios.

Jeē iyó ndoo iyó íi yiqui cúñu ñayuu cácañdije

¹² Te ndāa cúu jeē cácahān jeē ndihi-ni jniñu iyó váha sáha yó núu ndese cúní yō. Te vésú súcuan te nasūú ndihi sáha jeē quéndōo váha ánuá yō. Ndihi chi cuu sáha yó, te vésú súcuan te tu iyó váha jeē quivī yó núu jniñu jeē stíví ánuá yō.

¹³ Te ndāa cúu jeē cácahān jeē ndeyu cúu jeē cúhun chíji, te chíji cúu jeē cúhun ndeyu. Te ñin quivī te tuá coo súcuan, chi naa ndindúú un sáha Yaā Dios. Te nasūu

siquī jeē cáca jnéni yó cúu jeē iyó yiqui cúñu yō, chi sa suhva jeē sáha yó jéé cúní maá Jítóho yō. Te Jítóho yō chí ndíto ya yiqui cúñu yō.

¹⁴ Te nájnuhun jeē ní nastécu Yaā Dios Jítóho yō, suni súcuan nastécu yā yohó jín poder yā.

¹⁵ ¿A tu cájini rō jeē yiqui cúñu tācá ñin ñin ró cúu nájnuhun tāca parte yiqui cúñu Cristo? Núu súcuan ¿te á cuu quende yó ñin parte yiqui cúñu Cristo te squíjnanhan yó jín ñin ñahan jica jnéni? Ma cúu cuiti súcuan.

¹⁶ ¿A tu cájini rō jeē tēe quíjnanhan jín ñahan jica jnéni, ñin na yiqui cúñu ni nduu de jín ña? Chi cáhán tutu íi: Jeē ndindúú chí ñin na yiqui cúñu cuu, áchí.

¹⁷ Te ñayuu jeē quijnanhan jín máá Jítóho yō, chi suni súcuan ñin na cúu i jín yá siquī jeē candije i ya.

¹⁸ Núu súcuan te cunu ró jéé ma quivī ró núu jnúhun jica jnéni. Chi tāca gá cuēchi jeē sáha ñayuu, chí nasūú yiqui cúñu i stíví i. Te núu jica jnéni i, te siquī yiqui cúñu i cúu jeē sáha i cuēchi.

¹⁹ ¿A tu cájini rō jeē yiqui cúñu rō cúu templo Espíritu Santo jeē ni jéhe Yaā Dios nuū rō, te ndéé yá ini rō? Te nasūu cuenta maá ró cácuu ró.

²⁰ Chí Yaā Dios yahu ni cuu jeē ní nacuaan ya rohó jijnáhan ró. Te jeē yúcuan cánuú jéé cáca yíñúhún ró nuū Yaā Dios jeē sáha ró jniñu váha nde jín yiqui cúñu rō jín ini jín ánuá rō, chí máni cuenta Yaā Dios cúu.

Jnúhun cástūhun siquī tēe jín ñasihí

7

¹ Vijna te na cáchi rī siquī tāca jnúhun jeē ní cacajnuhun ró ruhū nuū carta. Jendaá jeē váha ga quendōo ñin tēe núu tú condeca de ñahan.

² Te siquī jeē iyó jnúhun jnéni, te váha ga jeē tāca tée na cóo ñasihí máá de, te suni tācá ñahan coo yí máá ña.

³ Te yí na squícu váha de nuū ñasihí de jeē cúu de yí ña. Te suni súcuan ñasihí na squícu váha ña nuū yí ña.

⁴ Chí ñasihí chí tu cúu sáha ña jeē cúní ña jín yiqui cúñu ña, chí suni jeē cúní yí ña. Te suni súcuan yí tu cúu sáha de jeē cúní de jín yiqui cúñu de, chí suni jeē cúní ñasihí de.

5 Te ma sasáhán ró maá ró nuū jnáhan ró. Te núu cácu ni rō jeē vihyá gā cacān tahu rō jecu tiempo, te núu cáhīyo conforme ndindúú ró, te cuu sásáhán ró maá ró nuū jnáhan ró. Te yūcuán na te vāha ga naquijnáhan tucu ró, návāha ma cóto ndee Satanás rohó siquī jnūhun jnéni.

6 Te nasūu jēē ndácu ri jniñu jeē cánuú quijnáhan ró, chi jeē jéhe ri jnūhun cúu.

7 Chi nújnahan ni rī jeē tāca téē na cóo máá ñn-ni de, nájnūhun íyó máá rí. Te sñn sñn ni sáha Yaā Dios jíin ñn ñn de ndese cúu máá de, chi sava de cuu quendōo máá ñn-ni de, te inga de chi tuú chi sñn ni sáha ya jíin de.

8 Núu sūcuan te cáhán rī jíin ñayuu cáhīyo máá ñn-ni, jíin ñahan ní caquendōo ndáhú, jeē vāha ga te núu quendōo máá ñn-ni i, nájnūhun íyó máá rí.

9 Te núu jíin i jeē ma cánda i quendōo máá ñn-ni i, te na quijnáhan i núu sūcuan. Chi vāha ga jeē quijnáhan i vēsú jeē ndúquji i.

10 Te nuū ñayuu jeē jé ni quijnáhan chi ndácu ri jniñu jeē ñahan ma ndusñn ña jíin yñ ña. Te nasūu rúhū cúu jeē ndácu jniñu, chi máá Jítoho yō.

11 Te núu ñn ñahan ndusñn ña jíin yñ ña, te na quendōo máá ñn-ni ña, chí cuu naquijnáhan ña jíin yñ ña. Te yñ suni ma ndusñn de jíin ñasihí de.

12 Te jíin sava ga ñayuu chi cahān rī yāha jēē jéni ni maá rí, te nasūu jēē ní cachi maá Jítoho yō cúu. Núu ñn hermano ndéca de ñahan jeē tu cándije, te núu nújnahan ni ña condee ña jíin de, te ma ndusñn de jíin ña.

13 Te núu ñn ñahan ndéca ña tēē jeē tu cándije, te núu nújnahan ni de condee de jíin ña, te ma ndusñn ña jíin de.

14 Chi tēē tu cándije, yñi cuenta de nuū Yaā Dios siquī jeē ní quijnáhan de jíin ñahan cándije. Te ñahan tu cándije, yñi cuenta ña nuū Yaā Dios siquī jeē ní quijnáhan ña jíin téē cúu hermano cándije. Chi núu tu sūcuan te sēhe i ma quñi cuenta i nuū Yaā Dios, te vijna chi yñi cuenta i nuū yā.

15 Te yñ chí ñasihí tu cándije, núu fuerza cuní i ndusñn i jíin jnáhan i, te na ndusñn i. Chi núu sūcuan cuní i, te hermano chí hermana cándije tu cánuú casí i jeē ndusñn jnáhan i jeē tu cándije. Chi ni cana Yaā Dios yohó jēē condee manī yō jíin jnáhan yó.

16 Te rōhó jēē cácuu ñasihí, tu cájini rō, sanaa te cándije yñi ró sáha ró, te cácu de. Te suni sūcuan rōhó jēē cácuu yñi, tu cájini rō, sanaa te cándije ñasihí ró sáha ró, te cácu ña.

17 Te ná ñn ná ñn ró na quendōo ró ndese ni sáha Jítoho yō jeē cúu ró, jíin ndese íyó ró ná ni cana ya rohó ní cándije ró. Te sūcuan ndácu ri nuū tāca grupo ñayuu cándije.

18 Núu ni cana ya ñn tēē jeē ní cuu circuncidar, te sūcuan na quendōo de. Núu ni cana ya ñn tēē jeē tu ní cúu circuncidar, te ma cúu de circuncidar.

19 Chi tú na vé sáha núu cúu yó circuncidar chí tuú, chi jeē cánuú gá cúu jeē na squícu vāha yó jniñu cuní Yaā Dios.

20 Ná ñn ná ñn ró na quendōo ró ndese íyó ró ná ni cana ya rohó ní cándije ró.

21 Núu mozo jeē ní jeen ñayuu cúu ró ná ni cana ya rohó, te ma cóndihvī ni rō jeē quenda ró. Te núu íyó modo jeē quenda ró nduu libre rō, te íyó vāha jeē sáha ró.

22 Chi tēē cúu mozo jeē ní jeen ñayuu, te núu ni cana Jítoho yō de, te vijna chi ni nduu libre de nuū cuéchi de, jéjníñu de nuū maá Jítoho yō. Te suni sūcuan tēē sájniñu cuenta máá, te núu ni cana ya de, te vijna chi ni nduu de mozo jeñníñu nuū Cristo jeē ní nacuaan ya de.

23 Chi yahu ni cuu jeē ní nacuaan Yaā Dios rohó jijnáhan ró, cúu jeē ni jíhī Sēhe ya jehē rō. Núu sūcuan te ma cuajníñu ró núu jniñu cáhá-ni jeē ndácu ñayuu ñayiví.

24 Núu sūcuan hermano, ná ñn ná ñn ró na quendōo ró núu Yaā Dios ndese íyó ró ná ni cana ya rohó.

25 Te vijna te siquī ñayuu jeē iyó máá-ni, tú na jnūhun ní ndácu Jítoho yō nuū rī. Te na cáhán rī jeē jéni ni maá rí, chí ni cundáhú ni Jítoho yō ruhū, te ni sáha ya jeē cúu cahān ndaā rī.

26 Jéni ni rī jeē vāha-ni núu quendōo-ni tēē ndese cáhīyo de, jeē siquí jeē iyó jnúndóho tiempo yáha.

27 Núu íyó ñasihí ró, te ma ndusñn ró jíin ña. Te núu tu íyó ñasihí ró, te ma nducú ró ña.

28 Te núu quijnáhan ró, te nasūu cuéchi cúu. Te núu quijnáhan sūchi sñhí, te suni nasūu cuéchi cúu. Te ñayuu quijnáhan, chí nihñ i jnúndóho ñayiví yáha, te cuní rī jeē ma nihñ rō jnúndóho.

²⁹ Hermano jijnáhan ró, jnūhun jeē cahán rī yāha cúu jeē yachī-ni ndihī tiempo jeē sáha yó jniñu ya. Núu súcuan te nde vijna te tēe iyó ñasihí, na cóndihvī gā ni de siquī jniñu máa yá vēsú siquī ña.

³⁰ Te ñayuu jeē ni jīhī jnáhan vehe i, na sáha i nájnūhun jeē tu cúcuíhyá ni i. Te ñayuu cúsiñ ni, na sáha i nájnūhun jeē tu cúsiñ ni i. Te ñayuu jéen, na sáha i nájnūhun jeē nasūú ndajniñu i cúu. Ma cuáha i jnūhun jeē cási taca un jéē ma cúu condihvī ni i jniñu máa yá.

³¹ Te ñayuu jeē ní cacondihvī ni siquī ndajniñu ñayiví yáha, ma cujnéñu ga i jín. Chi je yajni naa taca jéē iyó ñáyiví yáha.

³² Cúni rī jeē ma nácani ndasí ni rō siquī taca jéē iyó ini ñayiví. Chi tēe cúu soltero, ndihvī ni de jniñu máa Jítoho yō, ndese cusñ ni Jítoho yō sáha de.

³³ Te tēe iyó ñasihí chi ndihvī ni de jniñu iyó ñayiví, ndese cusñ ni ñasihí de sáha de.

³⁴ Te suni súcuan sñn sñn jéni ni ñahan iyó yñ jín ñahan iyó máa. Chi ñahan iyó máa, ndihvī ni ña jniñu máa Jítoho yō, chi cúni ña jeē coo ndoo coo iñ anuá ña jín yiqui cúñu ña cuajniñu ña nuū yā. Te ñahan iyó yñ chi ndihvī ni ña jniñu iyó ñayiví, ndese cusñ ni yñ ña sáha ña.

³⁵ Jeē váha máa ró jijnáhan ró cúu jeē ni cáhān rī súcuan. Chi nasūu jéē nducú rí casi rī jeē quijnáhan ró, chi sa suhva cúni rī jeē caca yíñuhún ró te nune ró cuajniñu cutú ró núu máa Jítoho yō.

³⁶ Te núu ñn tēe iyó sēhe síhí de, te núu cuayñ i, te núu jéni ni de jeē váha ga jeē quijnáhan i, núu súcuan te na sáha de jeē jéni ni de, te cuáha de jnūhun quijnáhan i, chi nasūu cuéchi cúu.

³⁷ Te núu ñn tēe ni cundaā ni de jeē cóndee sēhe síhí de súcuan-ni, jeē ma cuáha de i vēsú fuerza jícán ñayuu i, núu súcuan te cuu quendōo i nájnūhun cúni de, chi jeē váha sáha de.

³⁸ Núu súcuan te tēe jéhe jnūhun quijnáhan i, váha sáha de. Te tēe tu jéhe jnūhun, chi váha ga sáha de.

³⁹ Te ñahan ní quijnáhan, chi yñi ña ndaha yñ ña níni jeē técu de. Te núu je ni jīhī yñ ña, yūcuán na te je ni cuu libre ña jeē

quijnáhan tucu ña jín na-ni tēe cúu ni ña, te núu tēe cándije nuū Jítoho yō cúu de.

⁴⁰ Te jéni ni rī jeē ndetū gā coo ña te núu quendōo ña súcuan-ni. Te suni jéni ni rī jeē jín Espíritu Yaā Dios cúu jeē cahán rī.

Siquī cúñu ni sócō nuū ídolo

8

¹ Te vijna te na cáchi rī siquī cúñu ni sócō nuū ídolo. Ndaā chi taca yó jéni ni yō jeē máa yó cúu jeē jiní ndese cúu. Te taca jéē jiní yō ún, chi ndúcú sáha jeē cundúxí yó. Te sa suhva jeē cundáhú ni yō jnáhan yó, sáha un jéē ije i jín jnúhun ya.

² Núu na-ni ñayuu jéni ni i jeē jiní váha i, te tuú chi ná tu cuni cuiti i nájnūhun cánuú cuni i.

³ Te sa suhva ñayuu jeē maní i jín Yaā Dios, máa i cúu jeē jetáhú yá.

⁴ Núu súcuan te na cástūhun rí siquī cúñu jeē ní casocō ñayuu nuū ídolo. Ndaā chi jiní yō jeē taca ídolo ñayiví, tú ndaā cuiti. Te tú na inga yaā iyó, chi máa ñn-ni Yaā Dios.

⁵ Te ñayuu chi cájeni ni i jeē iyó taca yáa ini andiví jín ñáyiví, chi cácahān i jeē iyó ndije cuehē yaā i jín Jítoho i.

⁶ Te nuū máa yó chi ñn-ni Yaā iyó, jeē cúu Tátá yō Yaā Dios. Te máa yá ni sáha taca jéē iyó, te cuenta máa yá cúu yó jijnáhan yó. Te suni iyó ñn-ni Jítoho yō Jesucristo, te nde nuū máa yá vēji taca jéē iyó, te suni máa yá ni sáha yóhó.

⁷ Te ñayuu cácañdije, chi tú ndihī i jín jnūhun yáha. Chi sava i ni cacān i ni chiñuhún i ídolo nde ná tu candije i. Te nde vijna núu cáyeji i cúñu ún te sáha i cuenta jeē ni sócō nuū ídolo cúu. Te siquī jeē ná tu ije i jín jnúhun Yaā Dios, te jéni ni i jeē cujnéhén ánuá i sáha cúñu jeē ni sócō nuū ídolo ún.

⁸ Te ndaā chi nasūu jéē yéji yō cúu jeē sáha jeē cuatáhú Yaā Dios yohó. Chi núu yéji yō, nasūu yúcuan sáha jeē quendōo váha ga yō nuū Yaā Dios. Te núu tú yéji yō, ni tu sáha jeē quendōo ndáhú gá yō nuū yā.

⁹ Te vēsú tú ni ñn jési jeē ma cúu caji rō cúñu ún, te coto ró jnáhan ró jéē ná tu ije jín jnúhun ya, te ma sáha ró jéē suni caji i jeē jéni ni i jeē cuéchi cúu.

¹⁰ Váha ga ma cáji rō núu súcuan, chi sanaa te hermano rō jeē ná tu ije jín jnúhun

ya, coto de róhó jéē yéji rō ini vehe ídolo, chi jíni vāha ró jéē tú na vé sáha. Te súcuan te sáha ró jéē cájni ni de jeē suni caji maá de cūñu jeē ni sócō nuū ídolo, vēsú jéni ni de jeē cuēchi cúu.

¹¹ Te súcuan stívī ró anuá hermano rō jeē ná tu ije jíin jnúhun ya, vēsú jíni vāha maá ró jeē tú na vé sáha jeē cáji rō. Te tú vāha sáha ró, chi suni jehē maá de ni jihī Cristo.

¹² Te núu súcuan stívī ró anuá hermano rō jeē ná tu ije jíin jnúhun ya, núu súcuan te siquī Cristo cúu jeē sáha ró cuéchi.

¹³ Núu súcuan te núu cūñu un sáha jeē quívī hermano rī cuēchi, te ma cáji cuiti ga rī cūñu ún, návāha ma sáha ri jeē quívī de cuēchi.

Siquī jeē iyó derecho tēe cácuu apóstol

9

¹ Te maá rí chi jíca libre rī, te íyó derecho rī siquī jeē cúu rī apóstol, tēe ni tají yá scáca jnúhun ya. Chi ni jito ri nuū maá Jítoho yō Jesús, te maá ró jijnáhan ró cácuu jniñu jeē ni sáha ri jeē ni squívī ri rohó ndaha Jítoho yō.

² Te núu sava ga ñayuu tu jétáhú i jeē cúu ri apóstol, te nuū maá ró chi suu cúu ndije ri. Chi siquī jeē ní scandíje ri rohó jijnáhan ró, te jeē yúcuan cácuu ró prueba jeē steen jeē ndíso jniñu ri cúu ri apóstol nuū maá Jítoho yō.

³ Te jnúhun yáha cáhán rī jehē maá rí nuū ñayuu cácahān siquī rī.

⁴ Achí rí: Iyó derecho rī caji rī coho ri jeē cájehē ñayuu núu cúní rī.

⁵ Te suni íyó derecho rī núu jeē cuní rī condeca rī ñn hermana candíje cuu ñasihí rí, caca ña jíin rí, nájnuhun íyó ñasihí Pedro jíin táca gá apóstol jíin tēe cácuu ñani maá Jítoho yō.

⁶ ¿Chí cájeni ni rō jeē maá rúhū-ni jíin Bernabé tú na derecho rī jeē stóo ri jniñu cásaha ri jeē cótecu rī, návāha nune ga rī nacani ri jnúhun vāha ya, chí naún?

⁷ ¿A íyó soldado jeē técu de xūhún vehe de? ¿A íyó tēe jeē jítu uva te tu yéji de ndehē ún? ¿A íyó tēe jeē ndíto lanchi te tu jíhi de leche tī? Tú cuiti. ¿Te á suni tu íyó derecho rī cotecu rī siquī jnúhun ya naún?

⁸ Te ma cáni ni rō jeē tāca jéē cahán rī yāhá, máni maá jéē cácahān ñayuu ñayívī cúu. Chi nde maá ley yā jeē ni jéhe ya nuū Moisés, cáhán súcuan.

⁹ Chi cáhán nuū tútu ley yā: Ma chúhun ró ñunu yuhu stíquī, quití jéxín trigo, achí. Te ndaā chi nasūu máni siquī stíquī cúu jeē ni cáhān yā súcuan.

¹⁰ Chi suni siquī maá yó ní cahān yā. Chi ley un ní jéhe ya jeē vāha maá yó, chi stéen jeē tēe jítu jíin tēe jéxín trigo cánuú jeē nihín de sava un quívī ndutútú.

¹¹ Te suni súcuan ruhū jijnáhan ri jeē ní cataji ri jnúhun Espíritu ini anuá rō, ¿te á véyi cúu jíin ró núu nastútú rí jeē cótecu rī nuū rō?

¹² Te núu sava ga tēe cástéen nuū rō, íyó derecho de cacān de nuū rō, te nagā ni cuu ruhū jijnáhan ri jeē ma cóo derecho rī cacān rī.

Te tu ní cájicān rī derecho un, chi sa suhva ni jendeyí ni rī coto maá rí jeē cáji rī, návāha ma cási rī jeē cáca jnúhun vāha Cristo.

¹³ Te cájini rō jeē sutū ni cajejniñu ini templo, ni cacotecu de siquī jeē ní casocō ñayuu ini templo. Chi sutū ni cajejniñu nuū altar nuū ní casocō i quití, suni ni cayeji de sava quití ún.

¹⁴ Te suni súcuan ni ndacu maá Jítoho yō jniñu jeē tēe cánacani jnúhun jeē jnáma ya yohó, siquī jniñu un níhín de jeē cótecu de.

¹⁵ Te ruhū tu ní jícan cuiti rī derecho rī yāhá, te suni nasūu jéē tēe ri jnúhun yáha návāha cuāha ró núu rī jijnáhan ró. Chi jéni ni rī jeē vāha ga núu na cúu rī nasūu jéē quíhin ri jeē cuáha ró, chi casí jeē cúsiñi ni rī scáca ri jnúhun ya súcuan-ni.

¹⁶ Te tú vāha núu sátéyí rí maá rí siquī jeē nácani ri jnúhun jeē jnáma ya yohó. Chi ñn jeē ní tejniñu ya ruhū cúu, te cánuú squícu ri. Chi nacā ndahú cúu ri te núu tú nacani ri jnúhun ya.

¹⁷ Te núu jeē cúu ni maá rí sáha ri nuú, yūcuán na te cuu cacān rī yāhu ri. Te tuú chi cánuú sáha ri, chí maá Yaā Dios ni tee ya jniñu siquī rī.

¹⁸ Núu súcuan te yāhu ri cúu jeē cúsiñi ni rī jeē súcuan-ni nácani ri jnúhun jeē jnáma ya yohó, te tu jícan rī derecho rī jeē cotecu rī siquī jeē nácani ri jnúhun ya.

19 Chi vēsú tú ni ñin ñayuu ndácu jniñu nuū rī, te ni sáha ri maá rí mozo nuū tãcá i jeē nácani ri jñūhun nuū i, návāha nihīn rī cuehē i candíje i Cristo.

20 Núu íne ri jín jnánhan ri hebreo te sáha ri nájñūhun cásáha i, návāha cuu scándíje ri i. Chi násáha ri maá rí nájñūhun tēe cáyihī chīji ley Moisés, návāha cuu scándíje ri i jeē cáyihī i chīji ley un, vēsú tuá yīhī ri chīji ley un.

21 Te suni násáha ri maá rí nájñūhun ñayuu tu cáyihī chīji ley Moisés, návāha cuu scándíje ri ñayuu ún. Te vēsú súcuan te yīhī ri chīji ley Yaā Dios, chi suu cúu ley Cristo jeē squícu ri.

22 Te núu íne ri jín ñáyuu jeē ná tu ije jín jñūhun ya, te sáha ri maá rí nájñūhun jeē ná tu ije ri jín jñūhun ya, návāha cuu scándíje ga rī i. Núu súcuan te násáha ri maá rí núu ndese cándāa tãca ñáyuu, návāha tãcá-ni modo un te cuu scándíje ri sava i.

23 Tãca yáha sáha ri jeē síquī jñūhun jeē jnáma ya yohó, návāha suni nihīn rī tahū jeē ndíso jñūhun ya.

24 Je cájini rō jeē tēe cájину carrera, jendaá chi ndihī de cájину, te ñin-ni de cúndeyí nihīn premio. Te suni súcuan nducú ndéyí máá ró squícu ró, návāha nihīn rō premio nuū yā.

25 Te tãca tēe cúní cundeyí síquī ñin de-
porte, chi cáscuáha de te cándito de máá de. Súcuan cásáha de návāha nihīn de ñin premio jeē cúu corona ndaha yújnu jeē náā yachī. Te máá yó chi sa suhva cánducú ndéyí yó návāha nihīn yō ñin premio jeē ma náā cuiti.

26 Te máá rí suni nducú ndéyí rí nájñūhun tēe cájину, te tu nducú ndéyí cāha rí. Te sáha ri nájñūhun tēe cácajnánhan juego jeē tu jéhe iyú de, chi quée jniñu sáha ri.

27 Chi sa suhva stóho ri yiqui cúñu rī, te stíhvī ni rī maá rí squícu ri. Chi vēsú ni stíhvī ni rī inga ñayuu jeē nducú ndéyí i, te núu tu nducú ndéyí máá rí te snāā rī premio rī.

Siquī jeē ma chíñúhún i ídolo

10

1 Hermano jijnánhan ró, cúní rī jeē na jécūhun ni rō ndese ni cajica jí yō jenahán. Chi ndihī de ni cajica chīji vicō jeē ni stéén

ichi nuū de, te ndihī de ni cayāha mēhñū ndute Mar Rojo jeē ní cusñin, ni nune ichi.

2 Súcuan cúu jeē ní canduu ñnuú ndihī i jín Moisés, chi ni candiquīn i de chīji vicō jín méhñu mar.

3 Te ndihī i chi ñnuú-ni ni cayeji i alimento jeē ni jéhe máá Espíritu.

4 Te suni ndihī i ni cajihī ndute jeē ni jéhe Espíritu. Chi ni cajihī i ndute jeē ní cane jicā cáva nuū ní cajica cuu i. Te Cristo cúu nájñūhun cava un jéē jéhe ya ndute cotecu yō ní cáni.

5 Te vēsú súcuan te cuehē i ni cunīhni ni i, te tu ní cúsiñi ni Yaā Dios jín i, te jeē yúcuan ní cajihī i nuū ñūhun téhé.

6 Te tãca jéē ní cuu ún, ñin ejemplo cúu nuū yō, návāha ma ndíyo ni yō tãca jéē neé, nájñūhun ni candiyo ni ñayuu ún.

7 Te ma chíñúhún ró ídolo, nájñūhun ni casáha sava i. Chi súcuan cáhán nuū tútu ñi: Ni cacucōo ñayuu ún, ni cayeji i ni cajihī i vico ídolo, te ni ndocuññi i ni cajita jéhe i, áchí.

8 Te ni ma cáca jnéni ró nájñūhun ni casáha sava i, te ni cajihī ocō unī mil i jeē ñin quivī-ni.

9 Te ni ma sáha ró jniñu jeē squití ni rō Jitoho yō, nájñūhun ni casáha sava i, te ni cajihī i jeē ní catuu coō i, ni sáha ya.

10 Te ni ma cahán sōó ró síquī Yaā Dios, nájñūhun ni cacahán sōó sava i, te ni cajihī i jeē ní jehni ndajéhe yā i.

11 Te tãca jéē ní cuu ún, chi ñin ejemplo cúu nuū yō. Te súcuan yósó núu tútu návāha na chúhun vāha ni maá yó. Chi cácuu yó ñayuu cátecu quivī cuándihī ñayiví.

12 Núu súcuan te rōhó jéē cájeni ni rō jeē cáhīin nihīn ró jéē ma sáha ró cuéchi, coto má quivī ró cuéchi.

13 Chi máni íyó jéē nducú squivī rōhó cuéchi, te ñnuú-ni cándoho ró súcuan nde jín tãca gá ñayuu. Te cuu cucáhnu ni rō Yaā Dios jeē ma cuáha ya jñūhun jeē vihyá gā coto ndee jexeén rōhó vēsú jeē cúu cundeyí ró jín. Chi sa suhva núu vēji jeē nducú squivī rōhó cuéchi, te chindéé ñáhán yá rohó quenda ró te cundeyí ró síquī.

14 Ñánī mánī, ma chíñúhún cuiti rō ídolo núu súcuan.

15 Cáhán rī jín ró jéē cúu ró ñáyuu cájecūhun ni, te na sáha ró cuenta núu ndaā jnūhun cáhán rī.

16 Máá copa ī jeē cájicān tahu yō jehē, suu cájihu cáhnu yó jéē steén yō jeē inuú cúu ndihī yó, chí ni jeti ñiñī Cristo jeē siquī yō ná ni jihī yā jicā cruz. Te pan jeē sacuéchī yó cáyeji cáhnu yó, stéén jeē inuú cúu ndihī yó siquī jeē ni jéhe Cristo yiquī cúñu yā ni jihī yā jehē yō.

17 Te vēsú cuehē yō iyó, te ñn-ni ñáyuu cácuu yó, chí ñn-ni pan un cáyeji cáhnu yó siquī jeē cácanđije yó.

18 Condēhe ró ndese cásáha ñayuu Israel. Tāca téē jeē yéji quiti jeē ni sócō nuū yā, chí inuú-ni cúu ndihī de siquī jeē cáyeji de jeē ni sócō ún.

19 Núu súcuan te cáhán rī jeē tu ndé jéjníñu ídolo, ni tu jéjníñu cúñu jeē ni sócō nuū ídolo, chí inuú cúu jín táca gá cúñu.

20 Te suni cáhán rī jeē ñáyuu tu cájini jnūhun Yaā Dios, núu cásocō i, te nuū tachī cásocō i, nasūu núu Yaā Dios. Te tu cúní rī jeē cuajníñu ró núu tachī.

21 Ma cúu coho ró copa maá Jítoho yō te núu cájihu ró jéē ni sócō nuū tachī. Te ma cúu caji rō nuū mesa Jítoho yō te núu cáyeji rō jeē ni sócō nuū tachī.

22 Ma quívi nduu yō súcuan jín táchī, návāha ma cucuíñi Jítoho yō jín yó. ¿Chí téyí gá maá yó vēsú maá yá jeē ma cúu stóho ya yohó, cájeni ni rō, chí naún?

Ndihī chí sáha yó jín jnūhun cúndáhú ni

23 Te ndaā cúu jeē cácahān jeē ndihī-ni jniñu íyó váha sáha yó núu ndese cúní yō. Te tuú chí nasūú ndihī sáha jeē quéndōo vāha ánuá yō. Ndihī chí cuu sáha yó, te vēsú súcuan te nasūú ndihī sáha jeē ije jnāhan yó jín jnūhun ya.

24 Chí cánuu sáha yó jéē váha jnāhan yó, nasūu máni máá jéē váha máá yó.

25 Cuu caji rō ndihī-ni cúñu cúyāhu nuū yáhu, te ma cájnūhun ró ni ma cáni ni rō núu jeē ni sócō nuū ídolo cúu.

26 Chí cuenta maá Jítoho yō cúu ñayívi jín ndivii jeē iyó ini, te cuu cuajníñu yó.

27 Te núu ñn tē tu cándije, cana de rōhó caji rō jín de, te núu cácu ni rō quihīn rō, núu súcuan te caji rō táca jéē cáni de nuū rō. Te

ma cájnūhun ró ni ma cáni ni rō núu jeē ni sócō nuū ídolo cúu.

28 Te núu cachi ñn i nuū rō jeē cúñu ni sócō nuū ídolo cúu, yūcuán na te ma cáji rō, chí siquī jeē jéni ni i jeē cuēchi cúu, te tu cúní rō sáha ró jéē quívi i cuēchi.

29 Te súcuan cáhán rī siquī jeē inga i cájeni ni i jeē cuēchi cúu, te nasūu jéē súcuan cájeni ni maá ró.

Te sanaa te cahān ñn ró: ¿A tu íyó libre rī caji rī jeē cúní maá rí, vēsú cájeni ni inga i jeē cuēchi cúu?

30 ¿Te núu nácuatáhú rí nuū Yaā Dios te yéji rī, te najehē cácahān i siquī rī jeē yéji rī? achi rō.

31 Tuú chí ndihī jeē sáha ró, vēsú jeē caji rō chí jéē coho ró, chí na-ni jniñu sáha ró, ndihī na sáha yíñuhún ró jín Yaā Dios, návāha cuni ñayuu jeē luu cújéhu ya.

32 Te ma sáha ró jniñu jeē squívi ró ñáyuu nuū cuēchi, cúu ñayuu hebreo, cúu ñayuu táca nación jeē tu jín jnūhun ya, cúu ñayuu cácanđije Yaā Dios.

33 Te ruhū chí ndúcú rí jeē na cúsi ni táca ñáyuu jín táca jniñu sáha rí. Tu ndúcú rí jeē váha máá-ni rí, chí sa ndúcú rí sáha rí jeē váha cuehē ñayuu, návāha cácu i.

11

1 Te na ndácu ró ruhū jijnáhan ró, nájñūhun ndácu máá rí Cristo.

Siquī ndese cánuu sáha ñahan cándutútú

2 Vāha cásáha ró, hermano, jeē niní cánucūhun ni rō ruhū, te cándihvī ni rō jín táca jniñu jeē ni steén rī nuū rō.

3 Te cúní rī jeē na jécūhun ni rō jeē Cristo cúnuú yá nuū táca téē. Te téē cúnuú de nuū ñasihí de. Te Yaā Dios cúnuú yá nuū Cristo.

4 Núu ñn tē ñūhun de lélú te jícán tahu de chí nácani de jnūhun nuū ndutútú ñáyuu cácanđije, núu súcuan te jéhe de jnūhun canu máá de.

5 Te sa núu ñn ñahan tu ndési xinī ña te jícán tahu ña chí nácani ña jnūhun, núu súcuan te jéhe ña jnūhun canu máá ña, chí ñn-ni cúu un núu ní sáte xinī ña.

6 Chí núu tú casi ña xinī ña, vāha ga na sáte ña ixi ña núu súcuan. Te núu cúcanu ña jeē sáte ña ixi ña chí jéē sáte ña ña, te na cási ña núu súcuan.

⁷ Te tēe chi ma cási de xinī de, chi máá de cúu muestra jeē steén ndese cúu Yaā Dios jeē cujéhnū ya. Te ñahan chi stéén ña jeē cujéhnū tēe.

⁸ Chi ná ni sáha ya tēe, te nasūu jíin yiqui ñáhan ni sáha ya, chi sa suhva jíin yiqui tēe ni sáha ya ñahan.

⁹ Te ñahan chi ni cuvāha ña jeē siquí tēe, nasūu tēe jeē siquí ñahan.

¹⁰ Te jeē yúcuan cánuú jéē cóndesi xinī ñahan, te suu stéén jeē cujéhnū tēe, chi suni cándéhé ndajéhé yā ndese sáha ña.

¹¹ Te vésú súcuan te yóhó jéē candíje yó, chi jíni yō jeē tu íyó tēe núu jeē tu íyó ñahan, te tu íyó ñahan núu jeē tu íyó tēe.

¹² Chi vésú ni sáha ya ñahan jíin yiqui tēe, te vijna cácu tēe chíji ñahan, te máá Yaā Dios cúu jeē sáha tǎcá-ni.

¹³ Na sáha máá ró cuenta ¿á íyó váha núu tu ndési xinī ñahan te jícan tahu ña nuū Yaā Dios?

¹⁴ Chi sáha yó cuenta jeē ini ñayiví yáha, núu cáni ixi tēe te cúcanu de sáha.

¹⁵ Te ñahan chi sa váha jíto ña te núu cáni ixi ña, chi suu ni jēhe ya jeē cóndesi xinī ña.

¹⁶ Te núu ndé ñn ñayuu cuní i cahān i siquí jnúhun yáha, te ruhū jíin táca grupo ñayuu cá candíje nuū Yaā Dios, tú na inga costumbre jejnúhún rí siquí jnúhun yáha.

Jeē castívi i siquí Cena Jitoho yō

¹⁷ Te íyó inga jnúhun cánuú cahān rī jíin ró, chi tu cúu cahān rī jeē váha cásáha ró. Chi nuū cándutútú ró te tu sáha jeē quéndō vāha ga rō, chi sa jeē castívi ró.

¹⁸ Xihna jnúhun yáha cáhān rī, jeē nihín rī jnúhun jeē nuū cándutútú ró te cácusñn ni rō. Te jéni ni rī jeē ndaā cúu.

¹⁹ Chi níni coo sava ró jéē cusñn ni, návāha natūu ndé-ni cúu jeē cá candíje váha mēhñu ró.

²⁰ Te jeē cácusñn ró súcuan nuū cándutútú ró, te nasūu cena máá Jitoho yō cúu jeē cáyeji rō núu súcuan.

²¹ Chi núu cáyeji rō, te tǎcá ñn ñn ró cuní caji xihna gā vésú jnáhan ró. Te súcuan te sava ró tu cániñn, te cáji sōco, te sava ró cá najini jeē cájihi cuehē.

²² ¿A tu cánevāha ró vehe nuū cáji rō coho ró, chí naún? Chi jeē casáha ró súcuan cúu jeē tu íyó yíñuhún ró ini vehe

nuū cándutútú ñáyuu cá candíje Yaā Dios, chi cásáha ró jéē cá cucanu ñayuu jeē tú na vé névāha. ¿Ndeese cahān rī jíin ró núu súcuan? ¿A cáhān rī jeē váha cásáha ró? Tuú chi nasūu jéē váha cúu jeē casáha ró súcuan.

Siquí jeē ní jequin Jitoho yō Cena yā (Mt. 26.26-29; Mr. 14.22-25; Lc. 22.14-20)

²³ Chi jnúhun yáha jéē ní nastéén rī nuū rō, chi nuū máá Jitoho yō ni nihín rī: Jeē máá jecuáa jeē ní nastúu de Jitoho yō Jesús, te ni quihin ya pan.

²⁴ Te ni nacuatáhú yá, te ni tahu cuéchi yá, te ni cahān yā jíin tēe cáscuáha jíin yá: Quihin te caji rō jijnáhan ró, chi yáha cúu yiqui cúñu rī jeē ní sócō rī jeē siquí rō. Te níni caji rō súcuan jeē cáñuhun ni rō ruhū jeē ni jíhī rī jehē rō. Achí yá.

²⁵ Te suni súcuan ni quihin ya copa ná ni cuu ni cuxíni ya jíin de, te ni cahān yā: Jeē ñuhun copa yáha cúu niñī rī jeē sácútu contrato jeé jeē jnáma rī ñayuu. Te táca jínu jeē cájihi ró, te nucūhun ni rō ruhū. Achí yá.

²⁶ Chi táca jínu jeē cáyeji rō pan un te cájihi ró copa un, súcuan cástéén rō jeē ni jíhī Jitoho yō jehē yō. Te súcuan na sáha ró ndé quiví ndíji ya.

Ndeese caji yíñuhún i Cena yā

²⁷ Te núu na-ni ñayuu caji i pan un chí coho i copa Jitoho yō ún, te núu tu sáha yíñuhún i nuū Yaā Dios, núu súcuan te sáha i cuéchi jeē tu íyó yíñuhún i siquí yiqui cúñu máá Jitoho yō jíin siquí niñī yā.

²⁸ Núu súcuan te coto ndee rō máá ró núu íyó ndoo ánuá rō jeē tú cuéchi ró. Te sáa te cuu caji rō pan un te coho ró copa un.

²⁹ Chi núu ñn ñayuu tu yéji tu jíhi yíñuhún i te tu nucūhun ni i jeē yiqui cúñu yā cúu, ñayuu ún chi nihín i castigo núu na cáji i coho i.

³⁰ Jeē yúcuan cúu jeē iyó cuéhē ñayuu cácuñu jíin jéē ní cacuxíi, cáhiyo mēhñu ró. Te sava i je ni cajihī.

³¹ Te núu coto ndee yō máá yó nde ná tu caji yō, te Jitoho yō ma cuáha ya castigo yohó.

³² Te núu Jitoho yō jéhe ya castigo yohó, te súcuan stóho ya yohó návāha ma jnahnú ndetū yō jíin ñáyuu ñayiví.

³³ Ñánī mánī, núu súcuan te jeē cándutútú ró jeē cáji rō Cena yā, te condetu ró te caji inuú ró.

³⁴ Te núu ññayuu jíí i sōco, te xīhna gā na cáji i vehe i návāha ma stívi i nuū cándutútú ró. Te súcuan te ma cuáha ya castigo i. Te quivī jécondēhe rí rohó te cachi rī ndese coo sava ga jniñu.

Siquī tāca táhū jeē jéhe Espíritu

12

¹ Hermano, cúní rī jeē na jécūhun ni rō siquī tāca táhū jeē jéhe Espíritu nuū yō, suu tāca modo jejniñu ññ ññ yó núu Yaā Dios.

² Te cájini rō jeē ná ni cuu ró ññayuu ná tu candíje, te ni cacondihvī ni rō ni cachiñúhún ró ídolo ññín.

³ Te vijna te na jécūhun ni rō jeē núu ndé ññayuu cahán ndevāha i siquī Jesús, te nasūu jíín poder Espíritu Yaā Dios cúu jeē cahán i súcuan. Te ni ññ i ma cúu cahán i jeē Jitoho i cúu Jesús, te núu tu ndéé poder Espíritu Santo ini i.

⁴ Te sññ sññ tahū jéhe ya jeē cuajniñu ññ ññ yó núu yā, te ññ-ni máá Espíritu cúu jeē jéhe.

⁵ Te sññ sññ jéjniñu yó, te nuū maá ññ-ni Jitoho yō jejniñu yó.

⁶ Te sññ sññ modo sáha yó jniñu ya, te ññ-ni Yaā Dios cúu jeē sáha jniñu un jíín yó.

⁷ Te nuū ná ññ ná ññ yó ní jéhe Yaā Dios tahū jeē sáha Espíritu yā jíín yó, návāha na sáha yó jéé ije jnāhan yó jíín jnúhun ya.

⁸ Chi sava yó ní canihññ tahū jeē ndichí cahán yō jnúhun ya, sáha máá Espíritu. Te sava ga yō ni canihññ yō jeē cúu jécūhun vāha ni yō te castūhun yó, te suni máá Espíritu sáha.

⁹ Te nuū sava ga yō ni jéhe ya tahū jeē cúu cándíje ññññ yó jéé sáha ya jeē jicán yō, te sava ga yō cúu sáha yó jéé ndúvāha ññayuu cácuññ, te suni máá Espíritu sáha.

¹⁰ Te sava ga yō cúu sáha jniñu jéñnu jíín fuerza Yaā Dios. Te sava ga yō cúu nácani jnúhun ya. Te sava ga yō ni sáha ya jeē nácuni yō tāca jnúhun, núu vēji nuū Espíritu yā chí tuú. Te sava ga yō ni nihññ tahū jeē cahán yō tijññ yuhu jeē tu jécūhun ni yō. Te sava ga yō cúu nacastūhun yó jnúhun ni cahán jnāhan yó jíín inga yuhu ún.

¹¹ Te tāca táhū yáha, chi ññ-ni máá Espíritu sája, te sññ sññ jéhe ya nuū ññ ññ yó, ndese nújnahan ni maá yá.

Ndihí yó cúu nájññhun ññ na yiqui cúññ

¹² Chi nájññhun ññ yiqui cúññ iyó cuéhē parte, súcuan cúu yó jíín Cristo jeē cúu yó nájññhun yiqui cúññ yā, chi ññ na cúu yó jíín yá. Te vēsú cuéhē parte cácuu yó te ññ-ni cúu yó, nájññhun ññ yiqui cúññ jeē iyó cuéhē parte.

¹³ Chi ññ na ni canduu yó jíín yá ni sáha ññ-ni máá Espíritu ná ni cajendute yó. Súcuan cúu vēsú cúu yó ññayuu hebreo chí ññayuu griego, vēsú mozo jeē ní jeen ññayuu chí téé sájñññ cuenta maá. Te ndihí yó chí ññ-ni Espíritu ni canihññ yō.

¹⁴ Te ññ yiqui cúññ chi nasūú ññ-ni parte cúu, chi sa cuéhē parte cúu.

¹⁵ Te núu jehē cahán: Nasūu cuenta yiqui cúññ cúu ri, chi nasūú ndaha cúu ri, te tuú chí parte yiqui cúññ cúu nahín.

¹⁶ Te núu sōho cahán: Nasūu cuenta yiqui cúññ cúu ri, chi nasūu tinūu cúu ri, te tuú chí parte yiqui cúññ cúu nahín.

¹⁷ Núu ní yiqui cúññ yō cúu tinūú, ¿te ndese cuni sōho yó núu súcuan? Te núu ní yiqui cúññ yō cúu sōho, ¿te ndese cuaan yó xícō núu súcuan?

¹⁸ Te Yaā Dios ni chujnāhan ya ññ ññ parte yiqui cúññ, nájññhun cúní yā jeē coo.

¹⁹ Chi núu ññ-ni parte cúu ndihí, te nasūú ññ ní yiqui cúññ cúu núu súcuan.

²⁰ Te tuú chí cuéhē parte iyó, te ññ-ni yiqui cúññ cúu.

²¹ Te ni ma cúu cahán tinūu jíín ndaha: Tu jíni ñññññ rí rohó. Te ni xiní ma cúu cahán jíín jéhē: Tu jíni ñññññ rí rohó.

²² Chi sa suhva tāca parte yiqui cúññ jeē jéni ni yō jeē núu ga fuerza, suu cúu jeē cánuú gá.

²³ Te tāca parte yiqui cúññ jeē jéni ni yō jeē tu cáa vāha, suu cúu jeē yucún gá chúhun yó sahma. Te parte jeē tú-ni luu cáa, sa vāha ga jési yō.

²⁴ Chi parte jeē lúu cáa, tu cánuú jéé condihyū. Chi súcuan ni chujnāhan Yaā Dios yiqui cúññ, jeē yucún gá ndíto yó jéé tu cáa luu.

²⁵ Súcuan ni sáha ya návāha ma cusññ tāca parte yiqui cúññ, chi sa chindéé ñññññ vāha jíín jnāhan.

²⁶ Te núu jétú ñn parte yiqui cúñu, te suni ní cáhnu-ni jétú. Te núu ñn parte ndíto yúcún yó, te suni ndíhi-ni parte quéndō vāha.

²⁷ Te rōhó jíjnáhan ró chi nájnūhun yiqui cúñu Cristo cácuu ró, chi ñn na cúu yó jíin yá. Te ná ñn ná ñn ró cúu ñn ñn parte yā.

²⁸ Núu súcuan te sñn sñn jniñu ni jēhe Yaā Dios nuū tāca ñáyuu cácanđije jeē cácuu i nájnūhun ñn ñn parte yā: Te suu ñn parte yā cúu tāca apóstol jeē ní jeni ya xīhna gā jeē scāca de jnūhun ya. Yūcuán na te jeē uú, tēe cánacani jnūhun ya, te jeē uní, tēe cástéén. Yūcuán na te ñayuu casáha jniñu jéhu jíin fuerza yā, jíin ñáyuu casáha jeē ndúvāha ñayuu cácuu, jíin ñáyuu cachíndéé ñájnañan, jíin ñáyuu cándiso jniñu, jíin ñáyuu cácahān sñn sñn yuhu jeē tu cájecūhun ni.

²⁹ ¿A ndíhi yó cácuu apóstol, chí naún? ¿A ndíhi yó cánacani jnūhun? ¿A ndíhi yó cástéén? ¿A ndíhi yó cuu sáha jniñu jéhu?

³⁰ ¿A ndíhi yó cuu sáha jeē ndúvāha ñayuu cácuu? ¿A ndíhi yó cuu cahān sñn sñn yuhu? ¿A ndíhi yó cuu nacastūhún yuhu ún, chí naún? Tuú chi sñn sñn tahū ni canihñ yō.

³¹ Núu súcuan te na cóndihvī ni rō cacān rō jeē cuáha Yaā Dios tahū cánuú gā nuū rō. Te vijna te na stéén rī nuū rō ñn jeē váha ga nuū tāca gā tahū ún, suu jnūhun cúndáhú ni jnáhan.

Jnūhun jeē cundáhú ni jnáhan

13

¹ Vēsú núu cuu cahān yō tijni yuhu jeē cácahān ñayuu chí jēe cácahān ndajéhé Yaā Dios, te núu tu cúndáhú ni yō jnáhan yó, te jnūhun cahān yō un cúu nájnūhun ñn tambor jeē ndaxín cáján chí ñn platillo jeē ndaxín cáxín sánee sōho ñayuu.

² Te vēsú cuu nacani vāha yó jnúhun ya, te cuu jecūhun ni yō tāca jnúhun sāhi yá jíin tāca jnúhun ndíchí, te núu tu cúndáhú ni yō jnáhan yó, te tu ndé jéjníñu cuiti yō núu súcuan. Te vēsú cuu candíje téyí yó jeē nde cuu cahān yō jeē cújiyo yucu, te núu tu cúndáhú ni yō jnáhan yó, te tu ndé jéjníñu cuiti.

³ Te vēsú na sája yó ndíhi jeē névāha yó cuu ñayuu ndahú, te vēsú núu cuāha yó jnúhun cahmu ñayuu yohó jéē siquí jnúhun

ya, te núu tu cúndáhú ni yō jnáhan yó, te tu ndé jéjníñu cuiti.

⁴ Ñayuu cundáhú ni chi íyó paciencia jíin jnáhan, te íyó mánī ni, te tu cúcuésún ni. Te tu sándúxí, te tu sátéyí máá.

⁵ Tu sájéē ni, tu ndúcú jéē cúu máá-ni, tu quítí ni, tu ñúhun ni jnūhun quítí ni.

⁶ Tu cúsiñ ni jíto jniñu néé casáha jnáhan, chi sa cúsiñ ni jíin jniñu váha.

⁷ Ñayuu cundáhú ni chi ndíhi jénde ni ndoho jehē jnáhan, te tu jécuiñī jeē candíje jnáhan, jíin jéē ñúhun ni jeē squícu jnáhan, jíin jéē jénde yí ni jíin jnáhan.

⁸ Jnūhun cúndáhú ni chi ma náā cuiti. Te quiji quivī jeē tuá nacani i jnūhun, ni tuá cahān i tijni yuhu, ni tuá jíni ñúhún jnūhun ndíchí.

⁹ Chí tu jíni vāha vāha yó vijna, te jnūhun cánacani yó suni jecu-ni cúu.

¹⁰ Te núu na quíji quivī jeē cúni yō ndíhi, yūcuán na te tuá coo jeē jíni yō jecu-ni.

¹¹ Ná ni cuu yó súchi lúlí te ni cahān yō, ni jeni ni yō, ni jecūhun ni yō nájnūhun sūchi lúlí. Te ná ni jéhu yó te ni stóo yó modo sūchi lúlí.

¹² Te suni súcuan, jecu-ni jecūhun ni yō vijna, nájnūhun jeē jíto yó núu ñn espejo jeē tú ndijin vāha. Te cúcuéé gā te jecūhun cájí ni yō ndíhi. Te vijna chí jecu-ni jíni yō, te cúcuéé gā te cuni vāha yó ndese Yaā cúu ya, nájnūhun jíni vāha ya yohó ndese ñayuu cúu yó.

¹³ Núu súcuan te íyó únī jnūhun jeē quéndō cutú ní cáni: Jeē candíje ñihin yó jéē squícu ya jeē ni jéjnūhun ya, jeē cócuhun ni yō tāca jéē váha coo, jíin jéē cundáhú ni yō jnáhan yó. Te jnūhun cúndáhú ni chí jéhu ndasí gā cúu nuū tāca jéē yáha.

Siquí jeē cácahān i tijni yuhu

14

¹ Na cóndihvī ni rō cundáhú ni rō jnáhan ró, te suni cóndihvī ni rō cacān rō tāca táhū jeē jéhe Espíritu. Te tahū jeē cánuú gā cúu jeē nácani ró jnúhun ya.

² Chí tēe névāha tahū jeē cahán de tijni yuhu jeē tu jecūhun ni de, chí máá-ni Yaā Dios jíni jeē cahán de, nasūu ñáyuu. Chí ni ñn i ma jecūhun ni jeē cahán de. Chí sáha Espíritu jeē cahán de tāca jnúhun yisāhí.

³ Te sa suhva tēe nácani jnūhun ya, chi jíin ñáyuu cahán de návāha ije i jíin jnūhun ya, te stíhví ni de i, te cáhán ndeyí ni de jíin i.

⁴ Te tēe jeē cahán tijni yuhu, chi máa-ni de ije jíin jnūhun ya. Te tēe jeē nácani jnūhun ya, chi sa suhva sáha de jeē ñáyuu cá candíje ije i jíin jnūhun ya.

⁵ Nújnahan ni rī jeē ndihi ró cuu cahān rō tijni yuhu jeē tu jécūhun ni rō, te jeē cánuú ndasí gá cúu jeē nácani ró jnūhun ya. Chi jéhu ga jniñu sáha tēe nácani jnūhun ya vésú tēe cáhán tijni yuhu. Chi núu tú tēe castūhun jnūhun cáhán de, te ma cuajniñu jeē ije ñáyuu cá candíje.

⁶ Jeē yúcuan hermano jijnáhan ró, núu na jée rī nuū rō, te núu cahān rī tijni yuhu jeē tu jécūhun ni rō, ¿te ndé cuajniñu ún? Te núu na cáhán rī ñn jeē ni stéen yā, chí ñn jeē cútūhva ró jnūhun ndaā, chí ñn jeē nácani ri jnūhun ya, chí ñn jeē steén rī nuū rō, yúcuan cúu jeē cuajniñu.

⁷ Sáha yó cuenta jeē nájnūhun instrumento música, vésú tu técu, te cuu cata, nájnūhun flauta jíin arpa. Te núu tu jíta sñn sñn nota, ¿te ndese cuni yō na yaa jíta?

⁸ Te núu corneta tu jécú cájí, te ni ñn tēe ma sátūhva de quihñ de guerra.

⁹ Te suni súcuan róhó jijnáhan ró, núu tu cáhán cají ró jnūhun jecūhun ni ñáyuu, ¿te ndese cuni i na vé cahán rō? Chi jnūhun cáhán rō ndíso tachī cuahān jíin.

¹⁰ Te ndaā chí íyó cuéhē yuhu ini ñayí, te tācá yuhu chí íyó ñáyuu jécūhun ni.

¹¹ Te núu tu jécūhun ni yō yuhu cáhán ñn tēe, te cúu yó nájnūhun tēe ñuu jicá núu tēe cáhán, te suni nájnūhun tēe ñuu jicá cúu de nuū maá yó.

¹² Jeē yúcuan róhó jée cá cuni ndasí ró nihñ rō tahū jeē jéhe Espíritu, na cácan rō tahū jeē sáha jeē ije ñáyuu cá candíje jíin jnūhun ya.

¹³ Núu súcuan te ñáyuu jeē cahán inga yuhu jeē tu jécūhun ni i, na cácan tahú i jeē cuu nacastūhún i yuhu ún.

¹⁴ Chi núu jicán tahú yō jíin inga yuhu, te maá ánuá-ni yó cúu jeē jicán tahú, te tu ndé jéjníñu nuū jeē níjnūni yō.

¹⁵ ¿Ndesé sáha yó núu súcuan? Na cácan tahú yō jíin ánuá yō, te suni jíin jée níjnūni

yō. Na cáta yó yaa ñn jíin ánuá yō, te suni jíin jée níjnūni yō.

¹⁶ Chi núu nácuatáhú ró máni jnūhun jeē ní quiji nuū anuá rō te tu jécūhun ni rō, núu súcuan te tēe jíni sōho te tu jécūhun ni, ma cúu nacuatáhú de jíin ró. Chi tu jíni cuiti de na jnūhun cáhán rō.

¹⁷ Ndaā chí vāha nácuatáhú máa ró, te inga de chí tú na vé nihñ de jeē ije de jíin jnūhun ya.

¹⁸ Na cútahū rī nuū Yaā Dios jeē cahán gā rī jíin tijni yuhu vésú maá ró jijnáhan ró.

¹⁹ Te vésú súcuan te núu íne ri nuū cáyūcu tútú ñáyuu cá candíje, te nújnahan gā ni rī cahān rī uhñ-ni jnūhun jeē jécūhun ni i te stéen nuū i, vésú jeē cahán rī uxī mil jnūhun jíin inga yuhu jeē tu jíni cuiti i.

²⁰ Hermano jijnáhan ró, ma cáni ni rō nájnūhun sūchi lúli, chí sa suhva na ije ró jée jecūhun vāha ni rō. Te coo ró nájnūhun sūchi lúli jée tu jíni i jniñu néé.

²¹ Te yósó núu tútu ley yā jenahán: Jíin jnūhun cácahān tēe inga yuhu, jíin jnūhun cácahān tēe ñuu jicá, sáha ri jeē cúni sōho ñáyuu yáha jnūhun ri. Te ni jíin súcuan ma sáha i cuenta jnūhun cahān rī, achí maá Jítóho yō.

²² Núu súcuan te tahū jeē cahán yō tijni yuhu, yúcuan cúu ñn jeē steén poder Yaā Dios nuū ñáyuu tu cá candíje, nasūu núu ñáyuu cá candíje. Te jeē nácani yó jnūhun ya, yúcuan cúu jeē steén nuū ñáyuu cá candíje, nasūu núu ñáyuu tu cá candíje.

²³ Núu súcuan te núu ndihi ró ñáyuu cá candíje cáhīyo tútú, te tāca ró cácahān sñn sñn yuhu, te quívicoo ñáyuu tu jécūhun ni jíin ñáyuu tu cándíje, ¿te á má cahán i jeē ní canduu loco rō?

²⁴ Te núu tāca ró cánacani jnūhun ya, te núu quívi ñn tēe tu cándíje chí ñn tēe tu jécūhun ni, yúcuan na te nacuni de jeē tée íyó cuéchi cúu de, te coto ndee de maá de jíin jnūhun cánacani ró.

²⁵ Te nucūhun ni de tāca jée ní jeni yuhu ni de jíin ánuá de. Yúcuan na te jecuiñi yití de te chiñúhún de Yaā Dios. Te cahān de jeē íne ndije Yaā Dios jíin ró jijnáhan ró.

Siquē jeē yucún yñúhún na cóo nuū ndututú yó

²⁶ Núu súcuan hermano jijnáhan ró: Nuū cándutútú ró te tāca ró coo ñn yaa ñi cata ró, chí ñn jnūhun stéén rō, chí ñn jnūhun jeē ni sāha Yaā Dios jeē jécūhun ni rō, chí ñga yuhu jeē cahán rō, chí jéē nácastūhun ró jnūhun ñga yuhu ún. Te ndihí ún na sāha ró návāha ije ñayuu cácandíje jíin jnūhun ya.

²⁷ Te núu cáhīyo tēe cahán ñga yuhu, te na cáhán uū de chí únī-ni de, te ná ñn ná ñn de na cáhán. Te suni jíni ñūhún jéē nacastūhún ñn tēe jnūhun ún.

²⁸ Te núu tu íyó tēe jeē cúu nacastūhun jnūhun ún, te tēe cácahán ñga yuhu, vāha ga ma cahán de nuū cándutútú ró, te na cáhán maá-ni de jíin Yaā Dios.

²⁹ Te suni súcuan tēe cánacani jnūhun, na cáhán uū de chí únī de, te sava ga rō nacani ni rō núu íyó ndāā jeē cácahán tēe ún.

³⁰ Te núu ñga tēe néne ni nihīn de ñn jnūhun jeē ni stéén yā nuū de, núu súcuan te tēe cáhán na jécuiñī jeē cahán de, návāha cahán ñga tēe ún.

³¹ Te súcuan te ná ñn ná ñn ró cuu nacani ró jnūhun jeē steén yā nuū rō, návāha cutūhva ró te coo ndeyí ni rō.

³² Te tēe cánacani jnūhun, jíni ñūhún cuatáhú de jeē nácani ñga tēe jnūhun te jecuiñī jeē cahán maá de.

³³ Chi Yaā Dios cuní yā jeē coo nayúú mēhñu ró, násūu jéē sacā núu cuvaā rō.

Te nájnūhun casáha tāca grupo hermano cácandíje,

³⁴ suni súcuan tācá ñahan cándutútú jíin ñayuu cácandíje, na cóo nayúú ña. Chi tú vāha jeē cahán ña, chí sa cuatáhú ña nájnūhun cáhán tutu ley yā.

³⁵ Te núu cuní ña cucáhu ni ña ñn jnūhun, te nde vehe na cájnūhún ña yñ ña. Chi jnūhun canu cúu jeē cahán ñn ñahan mēhñu núu cándutútú ró.

³⁶ Te na sāha ró cuenta jeē tu ní quenda jnūhun Yaā Dios nuū maá ró jijnáhan ró, te nasūu máá ñn máá ró ní cánihīn jnūhun ya.

³⁷ Núu ñn tēe jéni ni de jeē tēe nácani jnūhun ya jíin tēe névāha Espíritu cúu de, núu súcuan te na cuájnuhún de jeē jniñu ní ndacu Jitoho yō cúu jeē tēe ri yāhá.

³⁸ Te núu tu jétáhú de jnūhun yáha, suni ma cuatáhú yó de.

³⁹ Núu súcuan, ñánī mánī jijnáhan ró, na cóndihvī ni rō nacani ró jnūhun ya, te ma cási rō nuū tēe cácahán sñn sñn yuhu.

⁴⁰ Te yúcún yñūhún na sāha ró tāca jniñu.

Jnūhun jeē ní natecu Cristo

15

¹ Hermano jijnáhan ró, vijna te nucūhun ni rō jnūhun jnáma ya yohó jeē ní nacani ri nuū rō. Te jnūhun ún chí je ni cajetáhú ró, te suni cáhīn nīhin ró jíin.

² Te suni jíin jnūhun ún te ni jnama ya rohó, te núu cáhīn nīhin ró jíin jnūhun ni nacani ri nuū rō, te núu tu ní cácandíje cāha ró.

³ Chi jnūhun cánuú gá jeē ni níhīn maá rí ni nastéén rī nuū rō: Jeē ni jíhī Cristo siquī cuéchi yó, nájnūhun je cáhán tutu ñi nde jenahán.

⁴ Te ni quindūji ya, te ni natecu yā nuū uní quivī, nájnūhun cáhán tutu ñi.

⁵ Te ni nane ya nuū Pedro. Te sáa te ni nane ya nuū ndihúxí gā apóstol.

⁶ Te sáa te ni nane ya nuū vihyá gā uhūn ciento hermano jeē cáyūcu tútú. Te sava i tēcu gā nde vijna, te sava i je ni jihī.

⁷ Te sáa te ni nane ya nuū Jacobo, yūcuán na te nuū ndihí ga apóstol.

⁸ Te jeē sándīhí na te ni nane ya nuū maá rí. Te nájnūhun ñn jeē ní cacu yúte, súcuan cúu jeē ñn sanaa-ni te ni nduu ri apóstol.

⁹ Chi tēe núu ga nuū tāca gá apóstol cúu ri, te ni nasūu tēe vāha cúu ri jeē cónaní rí apóstol, chí ni jito xeēn rī ñayuu cácandíje nuū Yaā Dios.

¹⁰ Te siquī jeē ni sāha Yaā Dios jeē váha ruhū, jeē yúcuan cúu ri apóstol vijna. Te jeē ni sāha ya jeē váha ruhū, chí tú cāha ní cúu, chí sa ni scáca ga rī jnūhun ya vēsú tāca gá tēe apóstol. Te nasūu máá rí ni sāha, chí Yaā Dios ni sāha ya jeē váha un jíin rí.

¹¹ Núu súcuan te vēsú ruhū chí tāca gá tēe ún, súcuan cánacani ri jnūhun, te súcuan ni cacandíje ró.

Jnūhun jeē natecu ndīyī

¹² Te jeē cánacani ri jnūhun Cristo jeē ní natecu yā mēhñu ndīyī, ¿te naun cácahán sava ró jéē ma nátecu ndīyī?

¹³ Chi núu jeē tú natecu ndīyī, te suni tu ní nátecu Cristo nuú.

14 Te núu jeē tu ní nátecu Cristo, te cánacani cāha rí jnūhun ya nuú, te suni cácandíje cāha ró núú.

15 Chi núu jeē súcuan cúu núú, te cácuu ri tēe jeē tu cácahān ndaā jnūhun Yaā Dios, chi ni cacachi rī jeē ní nastécu Yaā Dios Cristo. Te núu jeē tú natecu ndije ndīyi, núu súcuan te tú ndaā jeē ní nastécu Yaā Dios Cristo.

16 Chi núu tú natecu ndīyi, te ni Cristo suni tu ní nátecu yā nuú.

17 Te núu tu ní nátecu Cristo, te cácandíje cāha ró te cándiso iī gā rō cuēchi ró núú.

18 Te núu jeē súcuan cúu núú, te suni je ni cajnahñū ndetū ñayuu ni cacandíje Cristo.

19 Chi núu tú natecu ndīyi, te núu máa ñn-ni siquī vida yáha ñūhun ni yō jeē sáha Cristo jeē váha yóhó, núu súcuan te ndahú ndasí gá cácuu yó vēsú tāca gá ñayuu, chi cácandíje cāha yó nuú.

20 Te tuú chi íyó ndaā jeē ní natecu Cristo mēhñu ndīyi. Te máa yá cúu jeē xihna gā ni natecu nuú tāca gá ndīyi jeē natecu.

21 Chi siquī jeē ni stívi ñn-ni tēe Adán, te ni quejéé jíhí ñayuu. Te suni súcuan siquī jeē ni sáha ñn-ni tēe Cristo, te natecu ñayuu.

22 Chi nájnūhun cájihí ndihí yó siquī jeē cácuu yó yúcūn Adán, suni súcuan natecu ndihí yó siquī jeē yíhi yó ndaha Cristo.

23 Te ná ñn ná ñn ndese ndíquin jnáhan máa: Xihna gā Cristo ni natecu yā, te sáa te quiví ndíji ya te natecu tāca ñayuu yíhi ndaha ya.

24 Yūcuán na te jīnu tiempo, te snāā yā poder tācá enemigo jeē cujéhnu jíin jéé ndácu jniñu jíin jéé iyó poder. Te ndihí jeē ndácu ya jniñu nuú, nacuaña ya nuú Tatá yā Yaā Dios.

25 Chi cánuú jéé ndacu Cristo jniñu nde quiji quiví jeē quénde Yaā Dios poder tāca jéé jíto uhū nuú Cristo, te stóho ya.

26 Te jeē sándihí na te snāā yā cuehyí jéhni ñayuu.

27 Chi cáhán tutu iī jeē sáha Yaā Dios jeē cujéhnu Cristo siquī ndihí, te cuatáhu núu yā. Te jeē cahán jeē cujéhnu ya nuú ndihí-ni, te jíiní vāha yó jéé maá Yaā Dios ma quíhi ya ndaha Cristo, chi Yaā Dios cúu jeē ni chíhi tācá un ndaha Cristo.

28 Te ná ni quiví ndihí ún ndaha Cristo, yūcuán na te suni máa Cristo jeē cúu ya

Sēhe, quiví ya ndaha Tatá yā, Yaā jeē ní chíhi tācá un ndaha ya. Te súcuan te máa Yaā Dios jniñi ya ndihí-ni.

29 Te íyó ñayuu cájendute jehē ndīyi. Te núu tú natecu cuiti ndīyi, ¿te najehē cájendute i jehē ndīyi núu súcuan?

30 Te ruhū jijnáhan ri, ¿najehē cúu jeē ndiquiví cájendeyí ni rī jíto ri jnūndóho cuu rī, te núu tú natecu ndīyi?

31 Hermano, nájnūhun íyó ndaā jeē cúsiñi ni rī siquī jeē cácandíje ró Jítoho yō Jesu-cristo, suni súcuan íyó ndaā jeē ndiquiví nducú ñayuu cahni ruhū siquī jniñu ya.

32 Te jeē ní ndoho ri ni casáha tēe xeēn ñuu Efeso, jeē cácuu de nájnūhun quiti xéén, ¿te na vé nihín rī siquī un núu súcuan? Chi núu tú natecu ndīyi, te cuu cahán yō nájnūhun áchí ñn jnūhun: Na cúsiñi ni yō caji yō coho yó, chi sanaa te sajnē te cuu yō, achí yō nuú.

33 Ma cuáha ró jnūhun stáhu ñayuu rohó. Chi áchí ñn jnūhun: Núu cájica ró jíin ñayuu neé, te stívi i ríhó jéé tuá caca ndaā rō.

34 Nachuhun ni rō jijnáhan ró, te sáha ró jniñu ndaā, te ma sáha ga rō cuēchi. Chi sava ró tu cájini cuiti rō ndese Yaā cúu Yaā Dios. Súcuan cáhán rī návāha na cúcanu rō.

Ndese natecu ndīyi

35 Te sanaa te cahán ñn ró: ¿Ndese natecu ndīyi? ¿Ndese coo yiqui cúñu i? achí rō.

36 Tu jécūhun cuiti ni rō núu súcuan. Chi cúu nájnūhun jeē cátají ró tāca tata chíhi ñuhun návāha nane yucū i.

37 Te tata jeē quiví chíhi ñuhun, núu trigo chí inga tata, chí nasūu yúcū cúu, chí máa núní-ni cúu.

38 Te cuéé gá te cane, chí Yaā Dios ni jēhe ya yucū tata ún, ndese ni nujnahan ni maá yá, te ná ñn ná ñn tata chí sín sín cáa yucū ni sáha ya.

39 Te suni súcuan tācá yiqui cúñu, chí tú inuú cándāa. Chí sín cáa ñayuu, te sín cáa quiti, te sín cáa saa, te sín cáa chācá.

40 Te suni súcuan cúu tāca jéé ín andiví jíin táca jéé iyó ñayiví. Te sín luu cáa jeē ín andiví, te sín luu cáa jeē iyó ñayiví.

41 Te sín ndíndēe níandii, te sín ndíndēe yóō, te sín ndíndēe táca quími. Te tācá ñn ñn quími chí suni sín sín ndíndēe.

42 Te suni súcuan coo jíin ndíyí jeē natecu. Ndíyí jeē chindūji yó chi téhyū, te jeē nastécu yā chi ma cúū gā.

43 Jeē chindūji yó chi ndáhú cáa, te jeē nastécu yā chi luu cujéhnū. Jeē chindūji yó chi tú na fuerza, te jeē nastécu yā chi coo fuerza.

44 Jeē chindūji yó chi ñn yiquí cúñu cuenta ñayívi cúu, te jeē nastécu yā chi ñn yiquí cúñu cuenta Espíritu yā cúu. Chi íyó yiquí cúñu cuenta ñayíví, te suni íyó yiquí cúñu cuenta Espíritu.

45 Chi súcuan yósó núū tútu ñ: Adán, tēe xíhna ñúhún, ni cuvāha de jíin vida cuenta ñayíví, áchí. Te Cristo cúu nájnūhun inga Adán uū, te máá yá cúu Espíritu jeē jéhe vida.

46 Te nasūú yiquí cúñu cuenta Espíritu cúu jeē ní cuvāha xíhna gā, chi sa suhva yiquí cúñu cuenta ñayíví, te sáá te nduu cuenta Espíritu.

47 Te cuenta ñayívi cúu tēe xíhna ñúhún, chi ni cuvāha de jíin tícachā ñuhun. Te Adán uū jeē cúu máá Jítóho yō, chi nde andiví ní quiji ya.

48 Te ñayuu ñayívi yáha, chi cúu i jnáhan Adán jeē ní cuvāha jíin tícachā ñuhun. Te ñayuu jeē quívicoo andiví, chi ndúu i nájnūhun máá Yaā ní quiji nde andiví.

49 Chi jeē cáa yó nájnūhun tēe ni cuvāha jíin tícachā ñuhun, suni súcuan coo yó nájnūhun cáa máá Yaā ní quiji nde andiví.

50 Jnūhun yáha cástūhun rí nuū rō jijnáhan ró, hermano, jeē yiquí cúñu yō cuenta ñayívi yáha, ma cúu quívi ñuu nuū ndácu Yaā Dios jniñu. Chi jeē jihí cúu, te ma cúu quívi nuū cótecu ní cáni.

51 Te cúní rī jeē na jécūhun ni rō jnūhun yáha jeē ní yisāhí: Nasūú ndíhi yó cuu, te ndíhi yó chi nasāma yiquí cúñu yō.

52 Chi quíví jeē cuécu sandíhí na trompeta, te ñn yachí-ní, nájnūhun ñn jeē nácuení-ní yó, te nasama ya yohó. Chi cuecu trompeta un, te natecu tāca ndíyí jeē ma cúū gā í. Te tāca yó jeē cátecu yō quíví ún, chi nasama ya yiquí cúñu yō.

53 Chi jeē tehyú yāhá, cánuú nucūhun jeē ma téhyú gā. Te jeē jihí cánuú nucūhun jeē ma cúū cuítí gā.

54 Chi jeē jihí jeē tehyú, chi quiji quíví jeē nucūhun jeē ma cúū gā ma tehyú gā. Yūcuán na te cundaā jnūhun yósó núū tútu ñ: Jíin poder yā ni snáā yā cuehyí jéhni ñayuu.

55 Cuehyí jéhni yóhó ¿ndese ga cuu sáha xeēn jíin yó? Chi natecu yō. ¿Te ndese ga cundeyí jíin yó? Chi snáā yā. Achí tutu.

56 Chi cuéchi cúu jeē sáha jeē cundeyí cuehyí jéhni ñayuu. Te ley yā jenahán sáha jeē náne cuéchi síquí yō.

57 Te na cútahū yō nuū Yaā Dios, chi jíin máá Jítóho yō Jesucristo sáha ya jeē cundeyí yó síquí cuéchi jíin síquí jnūhun cuu yō.

58 Jeē yúcuan, ñání mání, cuiñi nihin ró te ma cáca yátá ró jijnáhan ró. Te níní na sájniñu vāha ró jíin jniñu máá Jítóho yō. Chi je cájini rō jeē tu cásájniñu cāha ró jíin máá Jítóho yō.

Siquí jeē cáquin i xūhún cuu tācá hermano

16

1 Te vijna te cahán rī síquí xūhun jéé cáquin rō cuu hermano cácandíje cándoho ndáhú. Suni na sáha máá ró jijnáhan ró nájnūhun ni ndacu rí nuū tāca grupo ñayuu cácandíje ichi Galacia.

2 Tācá domingo te ná ñn ná ñn ró chuvāha sñn ró jecu xūhún, núu ndese ni nihin maá ró, návāha quíví jeē jinú rī nuū rō te je íyó túhva.

3 Te jeē jeé rī, te cuāha rí carta nuū tāca tēe jeē nácāji ró, te tají rí de quingoo de nuū tācá hermano cáyūcú Jerusalén, quísiáha de xūhun jéé ní casocō rō.

4 Te núu íyó váha jeē quihín rī, te suni quihín rī jíin de jijnáhan de.

Jeē cahán Pablo síquí jeē quícondēhé de ñayuu cácandíje

5 Te jeē jeé rī nuū rō jijnáhan ró, te jíní ñúhún jeē xíhna gā jeé rī región Macedonia, yūcuán na te jeé rī ñuu rō Corinto.

6 Te sanaa te quendōo rí jíin ró jijnáhan ró jecu tiempo, chí sanaa te coyūcu yó ní tiempo mījin. Yūcuán na te cuu chindéé ñáhán ró ruhū, núu ndé chi quihín tucu rí.

7 Chi tu cúní rī jeé rī nuū rō vijna te yāha yachí rī quihín rī, chi ñúhún ni rī jeé quendōo rí jíin ró jecu tiempo, te núu cuāha Jítóho yō jnūhun.

⁸ Te cone ri ñuu Efeso yāhá nde na yáha quiiv̄ Pentecostés.

⁹ Chi coo cuehē ñayuu scandíje ri, te vāha quih̄n jniñu Jitoho yō. Te suni íyó cuéhē ñayuu cácuu contra.

¹⁰ Te núu na jée Timoteo, te sáha ró jée coo s̄i ni de meh̄ñu ró, te ni ñin ma cáni ni de siqū. Chi suni jniñu máá Jítoho yō sáha de, nájñuhun máá rí.

¹¹ Núu súcuan te ni ñin ró má sajeē ni rō nuū de. Chi sa suhva chindéé ñájnáhan ró jíin de jeē na quih̄n gā de, te coo ndeyí coo s̄i ni de, návāha ndiji de coto jnáhan ri jíin de. Chi ruhū jíin sava ga hermano cándetu ri de.

¹² Te hermano Apolos chi ni cahān ndahú rí jíin de jeē na jée de jíin sava ga hermano, condēhé de rōhó. Te ni jeni ni de jeē ma cúu jeē de vijna. Te núu na núne de te jeē de.

Saludo jeē sándihí

¹³ Ndito coo ni rō jijnáhan ró, te cuiñi n̄hin ro jíin jnúhun cácandíje ró. Te téyí na cóo ni rō, te na cóo fuerza ini rō.

¹⁴ Te tāca jée casáha ró, na sáha ró jíin jnúhun cúndáhú ni jnáhan.

¹⁵ Hermano, cájini rō jeē xihna gā ñayuu vehe Estéfanas ni cacandíje ichi Acaya. Te ni cajēhe i máá i nuū jniñu jeē chindéé ñáhán i tācá hermano cácandíje.

¹⁶ Te cúni rí jeē suni máá ró jijnáhan ró, cuatáhú váha ró ñáyuu casáha súcuan, jíin táca ñáyuu cachindéé ñájnáhan te cásajniñu siqū jniñu ya.

¹⁷ Cúsi ni rí jeē ní quiijicoo Estéfanas jíin Fortunato jíin Acaico, chi tēe yáha ni cajejniñu de nuū rí jehē rō jeē tu ní cáh̄yo ró jíin rí.

¹⁸ Chi ni ndundeyí ni rí, te suni súcuan máá ró jijnáhan ró, ni casáha de. Te cánuú cuajnúhún ró tāca tēe cándāa súcuan.

¹⁹ Sándeyí ni rō jijnáhan ró, áchí táca grupo ñayuu cácandíje cáyūcu Asia. Aquila jíin Priscila jíin ñáyuu cácandíje jeē cándutútú vehe de, cácahān i jeē sándeyí ndasí ni rō jíin jnúhun máá Jítoho yō.

²⁰ Te tācá hermano cácahān i jeē sándeyí ni rō. Te jeē cahán rō jíin táca jnáhan ró, te yíñúhún techūhu ró ndaha i.

²¹ Ruhū Pablo, jíin ndaha máá rí tēe ri jnúhun yáha jeē na sándeyí ni rō jijnáhan ró.

²² Te núu ndé ñin tu íyó mánī jíin Jítoho yō Jesucristo, te na jnáhnú ndetū i núu súcuan. Te na cáhán yō: Jitoho ná, cúni na jée yachī ndiji ní.

²³ Te ñúhun ni rí jeē maá Jítoho yō Jesucristo na sáha ga yā jeē váha rōhó jijnáhan ró.

²⁴ Te manī rí jíin ró jijnáhan ró jée cácandíje ró Cristo Jesús. Súcuan na cóo. Amén.

CARTA UU JEE NI TEE SAN PABLO APOSTOL NUU ÑAYUU ÑUU CORINTO

¹ Máá rí cúu Pablo, apóstol Jesucristo, chi súcuan ni nujnahan ni Yaā Dios ni tají yá ruhū nacani ri jñūhun ya. Te ndindúú rí jín hermano yō Timoteo cátee ri carta yáha cuájeē nuū rohó hermano ñuu Corinto jeē cácañíje ró Yaā Dios, jín núū ndíhi ríhó jéé cáyíhi ndaha Yaā Dios jeē cáyūcu ní cáhnu Acaya.

² Te cáñuhun ni rí jeē Tatá yō Yaā Dios jín Jítoho yō Jesucristo na sáha ga yā jeē váha ríhó te sáha ya jeē coo ndeyí coo sñ ni rō.

Siquí jeē ní ndoho Pablo jñúndóho

³ Na cáhán yō jeē yóhyo cújéhu Yaā Dios, Yaā cúu Tatá maá Jítoho yō Jesucristo. Chi máá yá cúu Tatá yō jeē cundáhú ni yohó, te níni sáha ya jeē ndúsñ ni yō.

⁴ Chi sáha ya jeē ndúsñ ni yō siquí tāca jñúndóho ndóho yó, návāha suni cuu sáha máá yó jeē ndúsñ ni jnahan yó jéé cándoho jñúndóho. Chi nájnūhun ni sáha ya jeē ndúsñ ni maá yó, suni súcuan sáha yó jéé ndúsñ ni i.

⁵ Chi jeē ndóho yó cuehē jñúndóho nájnūhun ni ndoho Cristo, suni súcuan nihín yō cuehē jñūhun ndusñ ni, sáha Cristo.

⁶ Jeē yúcuan núu cándoho ri jñúndóho te súcuan te cuu sáha ri jeē ndúsñ ni rō te quendōo vāha ga anuá rō. Te jeē sáha Yaā Dios jeē ndúsñ ni rí, suu sáha tucu jeē ndúsñ ni maá ró, te quendōo vāha ga anuá rō. Te súcuan te nihín rō fuerza jeē cuándeýí ni rō jín táca jñúndóho nájnūhun cándoho ri.

⁷ Te cáñuhun ndasí ni rí jeē cúu ríhó, chi cájini rí jeē nájnūhun cándoho ró jñúndóho jín rí, suni súcuan ndusñ ni rō jín rí sáha máá Yaā Dios.

⁸ Hermano, cáconi rí jeē na cúni rō jijnahan ró ndese ni candoho ri ichi Asia. Chi yóhyo xeēn jñúndóho ni cajito ri, nde je yajni tuá canda ri, te ni jeni ni rí jeē cuu rí nuú.

⁹ Te siquí jeē ní cajehnde ni rí cuu rí, te yúcuan ní sáha jeē ní cajecūhun ni rí jeē ma

ténuū rí maá rí chi tú jñíhu ri, chi sa suhva Yaā Dios jeē nastécu ndíyi tenuū rí.

¹⁰ Chi máá yá ni scácu ruhū jijnahan ri nuū jñúndóho xeēn jeē jé yajni cuu rí nuú, te suni súcuan scácu ya ruhū vijna. Te ñúhun ni rí jeē suni scácu tucu ya ruhū ichi núú gā.

¹¹ Te suni na chindéé ñáhán ró rúhū jijnahan ri jeē cacān tahú rō jehē rí. Chi núu cuehē ñayuu cacān tahú jehē rí, te suni cuehē i cuu nacuatáhú jehē rí jeē ni sáha ya jeē váha ruhū.

Jeē ní cucuéé Pablo quihín de ñuu Corinto

¹² Iyó ññ jeē sáha jeē cácusñ ni rí: Chi vāha iyó ni anuá rí jeē váha ndoo te ndaā ni cajica ri nuū ñayuu ñayívi, te víhyá gā nuū maá ró jijnahan ró. Chi siquí jeē váha ni Yaā Dios, te ni chindéé ñáhán yá ruhū, te nasūu siquí jéé ndichí máá rí cúu jeē ní cajica ri súcuan.

¹³ Te jñūhun cátee ri nuū tāca carta rí, chi máni jeē cúu cahu ró te jecūhun ni rō cúu. Te ñúhun ni rí jeē jecūhun vāha ga ni rō,

¹⁴ nájnūhun je cájecūhun ni rō jecu. Te súcuan te cuu cusñ ni rō siquí rí quívi ndíji Jítoho yō Jesús, nájnūhun cácusñ ni rí siquí maá ró.

¹⁵ Te siquí jeē súcuan ni cucáhnu ni rí, te jeē yúcuan ní jeni ni rí jeē núu na quihín rí Macedonia te jeē rí nuū maá ró xíhna gā, návāha cusñ ni rō jeē jécondēhe rí rohó úu jínu núú.

¹⁶ Chi ni jeni ni rí jeē jécondēhe rí rohó, te yāha ri quihín rí Macedonia, te jeē nándicó rí Macedonia te ndíji tucu ri nuū rō. Yūcuán na te cuu chindéé ñáhán ró ruhū jeē quihín rí ichi Judea nuú.

¹⁷ Te jeē súcuan ni jeni ni rí, ¿te á tée tu nacani vāha ni cúu ri jeē tu ní jéé rí nuū rō, chí naún? ¿A cájini ni rō jeē cúu ri nájnūhun ñayuu ñayívi jéé yachí cahán jeē cuu, yūcuán na te tuú, chí naún?

¹⁸ Tuú chi máá Yaā Dios jíní yā jeē tu cáhán rí jín ró jeē cuu, te yachí nácahán rí jeē ma cúu.

¹⁹ Chi ruhū jín Silvano jín Timoteo ni canacani ri jñūhun Jesucristo Sēhe Yaā Dios nuū rō jijnahan ró. Te máá yá tu cáhán yā jeē cuu te nacahán tucu ya jeē ma cúu. Chi siquí ya jeē cahán yā.

20 Chi ndihi jeē ni jéjnūhun Yaā Dios, squícu máá Cristo. Te jeē yúcuan cácahān yō jeē yóhoyo luu cújéhnū Yaā Dios, te cácahān yō Amén, chi ndihi squícu Cristo Jesús.

21 Te Yaā Dios cúu jeē sáha jeē ruhū jijnáhan ri jíin róhó jijnáhan ró, cáhīin nīhin yó jíin Cristo, te ni sándoo ya yohó jéē cuajniñū yó núu yā.

22 Te suni ni jēhe ya Espíritu yā jeē cóndee ini anuá yō, te cúu ya nájnūhun ñn sello jeē steén jeē cúu yó séhe Yaā Dios. Te sáha Espíritu jeē iyó ndāā ni yō jeē cuāha Yaā Dios tahū yō.

23 Te jeē ná tu jeē rī nuū rō ñuu Corinto, nájnūhun ni jeni ni rī, suu cúu siquī jeē tu ní cúní rī cuxeēn rī nuū rō jeē tu cásáha vāha ró. Te máá Yaā Dios cúu Yaā jini jeē cahán ndāā rī. Te iyó vāha jeē na cúu rī te núu tu cáhán ndāā rī.

24 Te nasūu jéē cácuni rī ndacu nīhin ri jniñū nuū rō siquī jnúhun cá candíje ró yá, chi je cáhīin nīhin ro jíin jnúhun ún. Chi sa suhva cácuni rī chindéé ñáhán rī rohó jéē na cúsiñ gā ni rō.

2

1 Núu súcuan te ni jeni ni rī jeē ma jéē rī ñnga jínu nuū rō jíin jnúhun cuxeēn rī te cucuíhyá ni rō sáha rī.

2 Chi núu cucuíhyá ni rō sáha rī, ¿te ndé ñáyuu sáha jeē cusīñ ni maá rí? Tuá na ñnga ñáyuu, chi máni máá róhó, te ndese cuu te núu ni sáha rī jeē cucuíhyá ni rō.

3 Te jeē yúcuan cúu jeē ní tee ri carta un núu rō, návāha nacani ni rō siquī cuéchi ró sáha, te ma cucuíhyá ni rī sáha cuéchi ró quíivī jeē rī nuū rō. Chi sa suhva sáha ró jéē cúsiñ ni rī. Te jíin vāha rī jeē núu cusīñ ni rī, te suni ndihi ró jijnáhan ró cusīñ ni rō.

4 Te jeē ní tee ri carta un núu rō, te yóhoyo ni nacani ni rī siquī rō, te ni jnahuhū ni rī, te nde ndahyú rī ni tee ri. Te tu ní téē ri jeē sáha rī jeē cucuíhyá ni rō, chi sa suhva návāha cuni rō ndese yóhoyo manī rī jíin ró.

Jeē íne cáhnu ni Pablo nuū téē ni sáha cuéchi

5 Te jeē ní cucuíhyá ni rī ni sáha téē jeē ni sáha cuéchi ún, te nasūu máá-ni ri, chi suni nde máá ró jijnáhan ró ni sáha de jeē

ní cacucuíhyá ni rō jecu. Te cáhán rī jeē jecu-ni, chi tu cúní rī cuxeēn ndasí rí.

6 Te jíin jéē ní cacuxeēn rō nuū de ná ni candutútú ró, te jíin yúcuan-ni te ni cuu-ni.

7 Te vijna chi jíin ñúhún jeē cóne cáhnu ni rō nuū de, te sáha ró jéē ndúsīñ ni de, chi sanaa te caa ga cucuíhyá ni de, te ma ndúsīñ gā ni de.

8 Núu súcuan te cáhán ndahú rí jíin ró jijnáhan ró jéē steén tucu ró jéē iyó máni rō jíin de.

9 Chi jeē siquī jniñū yáha cúu jeē ní tee ri carta un núu rō, návāha coto ndee rī rohó núu cuatáhú vāha ró jniñū ndácu ri nuū rō.

10 Núu súcuan te núu íne cáhnu ni rō nuū ñáyuu, te suni súcuan ruhū. Chi jeē íne cáhnu ni rī nuū ñáyuu núu ni sáha i cuéchi, te sáha rī súcuan siquī jeē maní rī jíin ró jíto jínuú Cristo.

11 Chi cánuú cone cáhnu ni yō, chi tu cúní yō jeē nihín Satanás cuéchi siquī yō, chi je jíin vāha yó ndese ndúcú un stáhú yóhó sáha yó cuéchi.

Jeē tu ní íyo nayúú ni Pablo ini ñuu Troas

12 Ná ni jehēn rī ñuu Troas jeē nácani ri jnúhun Jitoho yō Cristo, te vāha ni sáha ya jeē ni íyo modo jeē nácani ri jnúhun ya.

13 Te vésú súcuan te tu ní íyo nayúú ni anuá rī, chi tu ní níjnáhan ri jíin hermano yō Tito. Yūcuán na te ni nacuatáhú rí nuū ñáyuu yūcuán, te cuananducú rí de ichi Macedonia.

Jnúhun jeē cújéhnū ndúú yó jíin Cristo

14 Te na cútahū yō nuū Yaā Dios, chi níni ndéca vāha ya yohó cuángoo yó jíin Cristo Jesús, te ndúú yó jíin yá jeē cújéhnū ndasí yá snāā yā poder ndihi enemigo yā. Te jéjnīñū ya yohó jéē scuité núu yó jnúhun ya tēcá-ni lugar, nájnūhun jité núu ñn xicō asīn.

15 Te cúu yó nájnūhun ñn sūje jeē jeén asīn nuū Yaā Dios sáha Cristo. Te nájnūhun jeē jinú xicō un núu ñáyuu cācu ánuá jíin núu ñáyuu jnahnū ndetū.

16 Nuū ñáyuu jnahnū ndetū chi cúu yó nájnūhun ñn xicō jeē cúu i sáha, te nuū ñáyuu cācu ánuá chi cúu yó nájnūhun ñn xicō vāha jeē cótecu i sáha. Te ni ñn yó ma cánda yó sáha yó jniñū yáha, te núu ma chindéé ñáhán yá yohó.

17 Te ruhū jijnáhan ri, tu cásáha ri nájnūhun cásáha cuehē tēe jeē cánducú de nihīn de xūhun síquī jnūhun Yaā Dios. Chi sa cánacani ndaā rī jnūhun ya, chi máá Yaā Dios ni tají rúhū, te máá yá jiní jeē cánacani ndaā rī síquī jeē cándíje ri Cristo.

Jnūhun síquī contrato jeé

3

1 Te jeē cácahān rī sūcuan, ¿te á cájeni ni rō jeē cánducú tucu ri cahān rī jeē váha ga tēe cácuu ri, chí naún? ¿Te chí jini ñúhūn jēe steén rī carta recomendación nuū rō, chí jēe cacán rī cuāha ró nuū rī jijnáhan ri, nájnūhun cásáha sava i?

2 Tuú chi máá-ni ró cácuu nájnūhun ñn carta recomendación rī. Te jeē ñúhūn ni rī jeē ní cacandíje váha ró ni sáha ri, suu cúu nájnūhun jeē yosó jnūhun carta un ini anuá rī. Te ndihī ñayuu chi nájnūhun cáhu i, cúu jeē jiní i ndese ni nasāma ró.

3 Chi máá ró cácuu nájnūhun ñn carta jeē ní tee Cristo te cáscáca rī. Te nasūu jíin tinta ni tee ya, chi sa suhva jíin Espíritu Yaā Dios, Yaā técu. Te nasūu nuū tabla yuū nájnūhun ni tee ya ley yā, chi sa suhva nuū anuá ñayuu ni tee ya.

4 Te cácahān rī sūcuan, chi cácuahūni ni rī Yaā Dios síquī jeē ní sáha Cristo.

5 Te nasūu jēe cájeni ni rī jeē cúu canda máá rí sáha ri jniñu ún. Chi sa suhva máá Yaā Dios sáha jeē cuu squícu ri.

6 Te máá yá ni sáha jeē cuu cuajniñu váha ri síquī contrato jeé yá. Te contrato yáha tu cáhān jeē squícu yó ley jeē ní tee jíin letra, chi sa suhva jeē caca yó jíin vida jeé, suu jeē ní jéhe Espíritu yā. Chi contrato ley jeē yosó jíin letra, jnahnū ndetū ñayuu sáha. Te jeē sáha máá Espíritu cúu jeē cótecu yō ní cáni.

7 Te ley jenahán jeē ni jéhe ya nuū Moisés, ni yosó letra nuū tabla yuū. Te yōhyo ni kujéhnū, te ni ndindēe ndasí ni sáha, te nde Moisés ndíi nuū de ni sáha. Te tu ní cúu coto váha ñayuu Israel nuū de ni sáha. Te vēsú sūcuan te cuéé-ni cuéé-ni ni ndahvā jeē ndíndēe nuū de. Te núu sūcuan ni kujéhnū ndasí ley jeē sáha jeē cuu ñayuu te jnahnū ndetū i,

8 te sa víhyá gā kujéhnū ndasí gā jnūhun cotecu yō jeē jéhe Espíritu nuū yō.

9 Chi núu yōhyo ni kujéhnū ley un jēe jnahnū ndetū ñayuu sáha, te sa víhyá gā kujéhnū jnūhun jeē ndáhva Yaā Dios cuēchi yó.

10 Chi ley un jēe ní kujéhnū nde saá, tuá kujéhnū cuiti, síquī jeē kujéhnū ndasí gā jnūhun Espíritu jeē iyó vijna.

11 Te núu sūcuan ni kujéhnū ley jeē ni íyo jecu-ni tiempo, te sa kujéhnū ndasí gā jnūhun jeē coo ní cáni.

12 Te jeē sūcuan cáñuhun ni rī, jeē yūcuan cáhíyo téyí ni rī nácani ri jnūhun yáha.

13 Chi tu cásáha ri nájnūhun ni sáha Moisés jeē ní jesi de ñn sahma nuū de, návāha tú coto ñayuu Israel ndese cuandahvā jeē ní ndíndēe nuū de.

14 Te ñayuu ún tu ní cájecūhun ni i. Te nde vijna núu cácahu ñayuu Israel tutu contrato ley jenahán, suni tu cájecūhun ni i, chí nájnūhun jési sahma un nuū jeē níjnūní i, te tu cújiyo cuiti. Chi nde jeē candíje i Cristo, yūcuán na te cujiyo.

15 Te suni sūcuan nde vijna núu cácahu i tutu ley Moisés, te nájnūhun jeē jési ñn sahma nuū jeē níjnūní i.

16 Te jeē násāma ini ñn ñayuu quívi i nuū máá Jítóho yō Cristo, yūcuán na te cújiyo-ni jeē jési ún.

17 Chi Jítóho yō cúu máá Espíritu. Te nuū íne Espíritu máá Jítóho yō, yūcuan cúu nuū iyó libre ñayuu jeē tuá yíhi i chíji ley jenahán.

18 Te jeē yūcuan máá yó jijnáhan yó, tuá jési nuū jeē níjnūní yō. Chi cácuu yó nájnūhun espejo jeē jéhe nduva, cúu jeē cájica ndaā yō te suu stéén ndese yōhyo luu kujéhnū máá Jítóho yō. Te máá yó táca quívi cuanasāma yó cuanduu luu ga anuá yō nájnūhun cáa máá yá. Chi máá Jítóho yō jeē cúu ya Espíritu, sūcuan sáha ya jíin yó.

4

1 Núu sūcuan te tu ndínuu ni rī cánacani ri jnūhun ya. Chi síquī jeē ní cundáhú ni yā ruhū jijnáhan ri te ni jéhe ya jniñu yáha nuū rī.

2 Te tu cásáha ri jniñu néé jēe cúcanu yō sáha, ni tu cájica cuu ri jíin jnūhun ndíchí stáhú, ni tu cásama ri jnūhun Yaā Dios. Chi sa suhva cácahān rī máni jnūhun ndaā. Te

súcuan te cuu cuni tāca ñáyuu ini anuá i jeē cácahān ndaā rī jító jínúū Yaā Dios.

³ Te núu iyó ñáyuu tu jécūhun ni jnūhun jnama ya yohó jéē cánacani rī, te súcuan cúu nuū máni máá ñáyuu jnahnū ndetū.

⁴ Te jeē tu cácañdije i, te máá jéxeén jeē ndácu jniñu ini ñayiví yáha, ní jesi nuū jeē níjnūní i, návāha ma ndíndēe jnúhun Cristo ini anuá i, te ma cúni i jeē yóhyo luu cújéhnu Cristo, Yaā jeē ínuú cáa jíin Yaā Dios.

⁵ Te jeē cánacani rī jnūhun, te nasūu jnúhun máá rí, chi sa suhva jnūhun Jitoho yō Jesucristo cánacani rī. Te máá rí chi cácuu rī mozo-ni nuū rō jijnáhan ró jéē siquí jeē maní rī jíin Jesús.

⁶ Chi ná ni sáha Yaā Dios ñayiví te ni cahān yā jeē na cúndijin nuū néē. Te suni súcuan ni sáha ya jeē ní cundijin nuū anuá yō jeē cájecūhun ni yō siquí Jesucristo, ndese ndíndēe núu yā, cúu jeē yóhyo luu cújéhnu ya nájnūhun cúu Yaā Dios.

Jeē cándiquīn yō jnūhun cácañdije yó yá

⁷ Te tāca jnúhun yáha jeē yóhyo luu cújéhnu, chi nájnūhun jeē ñūhun ini ñn quīsí ñuhun. Chi cácuu yó nájnūhun quīsí ñuhun, chi tú na fuerza yō. Te jeē yúcuan cájini vāha rī jeē maá Yaā Dios cúu jeē jéhe poder siquí jnúhun yáha jeē yóhyo luu cújéhnu, te nasūu fuerza maá rí cúu.

⁸ Te jeē yúcuan, vēsú tāca lado cájito rī jnūndóho, te tu sáha jeē ma ndúsí gā ni rī. Te vēsú cácuuhyá ni rī siquí jnūndóho, te cáñuhun ni rī jeē quee vāha jniñu rī.

⁹ Te vēsú cájito xeēn ñayuu ruhū, te máá yá tu stóo ya ruhū jijnáhan rī. Te vēsú cánducú i snáa i ruhū jíin jniñu sáha rī, te ma cúu.

¹⁰ Te ndé-ni cúu nuū cuángoo rī, te nájnūhun ni ndoho Jesús jeē ni jíhī yā, suni súcuan cándoho rī jeē jé yajni cuu rī, návāha suni cuu stéén rī fuerza Jesús jeē técu yā ini yiquí cúñu rī.

¹¹ Chi jeē niní cátecu rī, te tāca quíví je yajni cahni ñayuu ruhū jeē siquí Jesús. Te súcuan te cájito ñayuu jeē técu Jesús ini yiquí cúñu rī jeē cúu.

¹² Núu súcuan te ruhū jijnáhan rī, niní cúu jeē jé yajni cuu rī siquí jnúhun ya, te yúcuan sáha jeē cotecu maá ró ní cáni jijnáhan ró.

¹³ Te yósó núu tútu íi: Ni candije rī te jeē yúcuan ní cahān rī, achí. Te suni jeē cácañdije máá rí cúu jeē cánacani rī jnūhun ya.

¹⁴ Chi cájini rī jeē maá Yaā jeē ní nastécu Jitoho yō Jesús, suni súcuan nastécu yā ruhū, te sáha ya jeē ñn cáhnu ni cuiñi ndihi yó núu yā.

¹⁵ Chi tāca jnūndóho yáha cándoho rī návāha coo vāha ró jíjnáhan ró. Te súcuan te cayā cuehē gā ñayuu jeē sáha ya jeē vāha i. Yūcuán na te suni yóhyo cuehē i nacuatáhú i nuū Yaā Dios, te kujéhnu ga yā sáha.

¹⁶ Jeē yúcuan cúu jeē tu ndínuu ni rī, te vēsú cuandihí fuerza yiquí cúñu rī, te sa suhva cuanduu fuerza gā anuá rī tāca quíví.

¹⁷ Chi jnūndóho jeē ndóho yó ñayiví yáha, tú-ni xeēn cúu, te yachí yāha. Te sáha jeē nihín yō ñn tahū jeē kujéhnu yó ní cáni jeē cáa ndasí gā vēsú jnūndóho ún.

¹⁸ Te tu táñuhún yó nuū tāca jnūndóho jító yó núu vijna, chi sa suhva táñuhún yó nuū tāca jéē vāha jeē tu jító yó núu vijna. Chi tāca jéē jító yó núu vijna, chi yachí ndihi, te tāca jéē tu jító yó núu, chi coo ní cáni.

5

¹ Chi yiquí cúñu yō jeē ndeé yó ñayiví yáha, cúu nájnūhun ñn vehe jeē náā. Te cájini yō jeē núu na náā, te cuāha Yaā Dios ñn yiquí cúñu jeé, te suu cúu nájnūhun ñn vehe jeē coo ní cáni ichi ándiví. Te nasūu ñn vehe jeē sáha ñayuu cúu, chi jeē sáha Yaā Dios cúu.

² Te niní jéē ndeé yó vehe yáha jeē cúu yiquí cúñu yō, te cájitū ni yō sáha, chi yóhyo cúni yō jeē núcūhun yó yiquí cúñu jeé yó nde ándiví.

³ Chi jeē núcūhun yó un, te ma cóo máá na anuá yō jeē náā yiquí cúñu yō yáha.

⁴ Chi niní jéē iyó gā yō ini vehe yiquí cúñu yō yáha, te jítú ni yō te cúcuhyá ni yō. Te nasūu jéē cuní yō jeē stóo yó yiquí cúñu yō te coo máá-ni ánuá yō. Chi sa suhva cúni yō núcūhun yó jéē jeé, návāha ndahvā yiquí cúñu yō jeē náā, te coo máá jéē cótecu ní cáni.

⁵ Te Yaā Dios cúu jeē ni sáha ya jeē súcuan coo yó. Te ni jéhe ya Espíritu yā jeē cóndee ini anuá yō, te sáha Espíritu jeē iyó ndáā ni yō jeē cuāha Yaā Dios tahū yō.

⁶ Núu súcuan te níni cúu jeē cáducáhnu ni rī. Chi cájini rī jeē níni ndéé gá rī chíjī yiqui cúñu yáha, te jíca cúu ri jíin núu ndéé máa Jítóho yō.

⁷ Chi vijna chi cáducandije ri jeē iyó yá jíin rí, vésú ná tu coto ri nuū yā.

⁸ Te cáducáhnu ni rī, chi sáha ri cuenta jeē váha ga núu na quénda ri chíjī yiqui cúñu yáha te quihīn rī condee rī jíin máa Jítóho yō.

⁹ Jeē yúcuan cúu jeē cáducú ndéyí rí sáha ri jeē cusī ni yā jíin rí, vésú núu ndéé gá rī yiqui cúñu rī chí vésú núu condee rī jíin yá.

¹⁰ Chi cánuú jéē ndihī yó cuiñi yuhu mesa Cristo jeē sándaā yā jniñu yó. Te ná ñin ná ñin yó níhīn yō síquī ndese ni casáha yó, á jéē váha chí jéē neé, ná ni condee yō chíjī yiqui cúñu yō.

Siquī jeē ndivicoo yó núu jnúhun manī Yaā Dios jíin yó

¹¹ Núu súcuan te cándiso īyo ri nuū máa Jítóho yō, te jeē yúcuan ndúcú ndéyí rí scandije ri ñayuu. Te jíni Yaā Dios jeē cáhīyo ndaā rī, te ñúhun ni rī jeē suni súcuan cájini máa ró.

¹² Te nasūu jéē cáducú tucu ri cahān rī jeē váha ga tēe cácuu ri, chi sa suhva cástūhun rí jeē cuu cusī ni rō jeē síquí rī jíināhan rī. Te súcuan te cuu stío cuiñi rō nuū ñayuu jeē cutéyí i síquī ndese cáa ñayuu, te tu sáha i cuenta ndese cáa ini anuá ñayuu.

¹³ Te va sanaa te cájeni ni rō jeē tēe loco cácuu ri jeē cácahān rī súcuan. Te síquī jeē cándihvī ni rī jehē Yaā Dios cúu. Te tuú chi cáhīyo vāha xinī rī, te jeē yúcuan cájejniñu ri jeē quéndōo vāha ró.

¹⁴ Chi síquī jeē ní cundáhú ni Cristo ruhū jíināhan rí cúu jeē cánuú nacani ri jnúhun ya. Chi cájini vāha ri jeē ni jíhī mañúhún-ni ya jeē síquí ndihī yó, te jeē yúcuan nájnūhun ni jíhī ndihī yó jíin yá.

¹⁵ Chi ni jíhī yā jeē síquí ndihī yó návāha tāca yó jéē técu, ma cótecu ga yō jeē sáha yó jéē cuní máa yó, chi sa suhva jeē cuní máa yá jeē ni jíhī yā te ni natecu yā jeē síquí yō.

¹⁶ Jeē yúcuan tuá casáha ri cuenta ndese-ni cándaā ñayuu, nájnūhun casáha ñayuu ñayiví. Te vésú súcuan ni casáha ri cuenta síquī Cristo nde saá, jeē ñin tēe-ni

cúu ya, te vijna chi cájini rī jeē cúu ya Sēhe Yaā Dios.

¹⁷ Chi núu ñin ñayuu yíhi i ndaha Cristo, te je ni ndujeé i. Te tāca modo neé ní nevāha i, je ni yāha cuahān, te vijna je ni ndujeé ndihī.

¹⁸ Te Yaā Dios cúu jeē sáha ndihī jeē yáha, chi jíin Cristo ni sáha ya jeē ní ndivicoo yó núu jnúhun manī yā jíin yó. Te ni tejniñu ya ruhū jeē cánacani ri jnúhun jeē ndivicoo ñayuu nuū jnúhun manī yā jíin i.

¹⁹ Chi jíin Cristo te ni sáha Yaā Dios jeē ñayuu ñayiví ndivicoo i nuū jnúhun manī yā jíin i. Te tu ndácunehen ya cuēchi ni casáha ñayuu. Te ni tejniñu ya ruhū jeē cánacani ri jnúhun yáha ndese ndivicoo i nuū jnúhun manī yā jíin i.

²⁰ Núu súcuan te cácuu ri tēe cájica jniñu máa Cristo. Te jeē cahán rī, te nájnūhun jeē máa Yaā Dios cahán ndahú yá jíin ró. Núu súcuan te cácahān ndahú rí jíin ró jeē cahán Cristo, jeē na ndivicoo ró núu jnúhun manī Yaā Dios jíin ró.

²¹ Te Cristo, vésú tú ni ñin cuēchi ya, te ni sáha Yaā Dios jeē ní nucondee cuēchi yó síquí yā. Te súcuan te yóhó jéē yíhi ndaha Cristo, ni nucondee síquí yō jeē iyó ndáa yō nájnūhun íyó ndáa Yaā Dios.

6

¹ Núu súcuan te síquī jeē cácuu ri tēe casájniñu jíin yá, te cácahān ndahú rí jíin ró jeē ma stío uun ró jnúhun jeē ni sáha Yaā Dios jeē váha róhó.

² Chi áchí yá nuū tútu īi:

Máa tiempo cuní máa rí te cuni sōho rí jnúhun cahán ndahú ró jíin rí.

Te máa tiempo jnáma ri ñayuu, te jnama ri rohó.

Achí yá. Te vijna-ni cúu máa tiempo jeē cuní yā, chi vijna-ni cúu tiempo ni quíjī Yaā jnáma yóhó.

³ Te cáducú rí jeē ma sáha ri ni ñin jniñu jeē casi jeē candije ñayuu, návāha ma cahán i síquí jniñu ndiso ri.

⁴ Chi sa suhva cáducú rí jeē ndihī jeē sáha ri, steén jeē cácuu ri tēe cájejniñu nuū Yaā Dios. Jeē yúcuan cájendeyí ní rī jíin jéē ndóho ri jnúndóho, jíin jéē cúmanī nuū rī, jíin jéē yí sáha jíin rí.

⁵ Chi ni ìyo tìjní jínu jeē ní cacani i ruhū, jeē ní cachune i ruhū vecāa, jeē ní candonda i siquī rī, jeē ní casájniñu nihin ri, jeē ní cajehni rī māhna máá rí, jeē ní cahīyo ndite ni rī.

⁶ Te suni cánducú rí jeē cuajnúhún i ruhū siquī jeē ndoo cájica rí, te cájecūhun vāha ni rī jnūhun ndaā, te cáhīyo paciencia ni rī, te vāha ni rī, te ndéé Espíritu Santo ini rī, te cákundáhú ndije ni rī jnāhan ri.

⁷ Te canacani ndaā rī jnūhun, te poder Yaā Dios íne jín rí. Te jín jnúhun ndaā cándahva rī tācá jniñu néé, chi nájnūhun jeē cájejnāhan ri siquī. Chi nájnūhun jeē ndónnda un siquī rī te ndónnda ri siquī.

⁸ Iyó jínu yíñúhún ñayuu jín rí, te iyó jínu tuú. Iyó jínu jéjnúhún i ruhū, te iyó jínu cácahān i siquī rī. Iyó jínu cácahān i jeē té stáhú cácuu ri, te iyó jínu cácahān i jeē té ndaā cácuu ri.

⁹ Iyó jínu cásáha i nájnūhun jeē tu jín i ruhū jijnāhan ri, te iyó jínu jeē jiní vāha i ruhū. Iyó jínu jeē cuní ñayuu cahni i ruhū, te cátecu nahín rí. Te vēsú cástóho i ruhū, te tu cájihī rī sáha.

¹⁰ Te vēsú iyó jéē cácuuñhyá ni rī, te níni cácusī ni rī. Te vēsú tēe ndáhú cácuu ri, te sácúcá rí cuehē ñayuu jín jnúhun ya. Te vēsú tú na vé cánevāha ri, te jín máá yá te ndihī-ni cúu jeē cánevāha ri.

¹¹ Hermano ñuu Corinto, súcuan cúu jeē cácahān cají rí jín ró jijnāhan ró, chi siquī jeē maní rí jín ró, jeē yúcuan cáchí ndihī ri ndese cándoño ri.

¹² Máá rí jijnāhan ri cácahān cají rí siquī jeē maní ndasí rí jín ró, te máá ró jijnāhan ró sanaa te tu súcuan cúu.

¹³ Nájnūhun cáhān tatá jín séhe, súcuan cáhān ndahú rí jín ró jeē nájnūhun íyó mánī rī jín ró, súcuan na cóo maní tucu ró jín rí.

Siquī jeē cúu yó templo Yaā Dios

¹⁴ Ma quívi nduu ró jín jniñu néé cásáha ñayuu tu cácandíje, chi ma cúu coo ñuu ró jín i. ¿Chi ndese cuu quijnāhan jniñu cásáha ñayuu ndaā jín jniñu cásáha ñayuu tú ndaā? ¿Te ndese cuu coyūcú ñuu ñayuu cájica jín luz yā jín ñayuu cájica nájnūhun nuū néé?

¹⁵ ¿Ndese cuu coo ñuu ni Cristo jín Sataán? ¿Te ndese cuu cuiñi cáhnu ñayuu cácandíje jín ñayuu tu cácandíje?

¹⁶ ¿Te ndese cuu quijnāhan templo Yaā Dios jín ídolo? Chi máá ró cácuu templo Yaā Dios, Yaā técu, chi ndéé yá ini anuá ró, nájnūhun ni cahān yā:

Condee rī ini i te caca cuu ri mēhñú i, te cuu ri Yaā Dios maá i, te cuu i ñayuu maá rí.

¹⁷ Te jeē yúcuan ní cahān gā yā:

Ma quívi nduu ró jín jniñu néé cásáha i, te cusīn ró jijnāhan ró, áchí Jítóho yō.

Te ma jnā ró tāca jéé tú ndaā. Yūcuán na te naquihin ri rohó,

¹⁸ te cuu ri Tatá ró jijnāhan ró, te cuu ró séhe yí rí jín séhe síhí rí, áchí Jítóho yō, Yaā jnā ndihī poder. Achí tutu.

7

¹ Núu súcuan, ñánī mánī, cánevāha yó tāca jnúhun yáha jéé ni jéjnúhun ya. Jeē yúcuan na sándoo yó máá yó tāca jéé sajnéhén yiqui cúñu yō jín ánuá yō. Te na cónso ìyo yó núu Yaā Dios, te coo ndoo coo ñuu yā jín ndihī jniñu cúni yā.

Jeē ní canacani ni ñayuu Corinto siquī cuéchi i

² Coo maní ró jín rí jijnāhan ró ví. Chi tu ní sáha ri falta nuū ní ñn ró, te tu ní stívi rí anuá ni ñn ró, te ni ñn ró tu ní stáhú rí.

³ Te nasūu jéé nducú rí cahān rī nuū ró cúu jeē cahān rī súcuan, chi je ni cahān rī jeē yóhoyo maní rí jín ró. Te níni ñúhun ni rī rohó, vēsú cuu yō chí cotecu yō.

⁴ Te cúcāhnu ndasí ni rī rohó jijnāhan ró, te cúsi teyí ni rī jeē siquí ró. Te vēsú cájito rí tāca jnúndóho yáha, te iyó ndeyí ni rī te cúsi ndasí ni rī jeē siquí ró.

⁵ Ná ni jengoo ri Macedonia te tu ní ìyo nayúú ni anuá rī, chi sa suhva yí ní ìyo jnúndóho jín rí tāca lado. Chi ni ìyo jeē ní castáhān jnāhan jín rí, te ni cayūhu rí sanaa te caca yátá ñayuu cácandíje.

⁶ Te Yaā Dios jeē sáha jeē ndúndeyí ni ñayuu cácuuñhyá ni, ni sáha ya jeē ní candundeyí ni rī, chi ni quiji Tito ni sáha ya.

⁷ Te ni candusi ni rī, nasūu máá ñn-ni siquī jeē ní quiji de, chi suni jeē ní ndundeyí ni de ni casáha ró. Chi ni castúhún de jeē cáñuhun ni ró coto tucu ró rúhū, jín jéé cácuuñhyá ni ró jeē siquí cuéchi ró, jín jéé

cánacani ni rō jehē rī. Te jeē yúcuan ní cusīh gā ni rī.

⁸ Te carta jeē ní tají rí nuū rō, vēsú ni sáha jeē ní cacucuíhyá ni rō, te tuá nácani cuíhyá ni rī jeē ni sáha súcuan. Chi vēsú ni cucuúhyá ni rī saá, te vijna te tuá, chi jíní rī jeē jecu-ni quivī ni cacucuíhyá ni rō ni sáha.

⁹ Te vijna te cúsīh ni rī, te nasūu síquī maá jée ní cacucuíhyá ni rō. Chi cúsīh ni rī jeē ní jejniñu jeē ní cacucuíhyá ni rō, chi ni sáha jeē ní canacani ni rō síquī cuéchi ró. Chi ni cacucuíhyá ni rō nájnūhun cúní maá Yaā Dios, te nasūu jée ni sáhuhū rī rohó.

¹⁰ Chi núu cúcuíhyá ni yō nájnūhun cúní Yaā Dios, te suu sáha jeē nácani ni yō síquī cuéchi yó te jnama ya yohó, te ma cóo ga jeē nácani cuíhyá ni yō. Te jeē cácuuhyá ni ñayuu tu cácandíje, tu jéjniñu jeē nácani ni i, chi sa jnahnū ndetū i.

¹¹ Te ni cacucuíhyá ni rō nájnūhun cúní Yaā Dios, te vijna te cájito ró náa vāha ni jejniñu. Chi ni canacani ndasí ni rō ni sáha, te ni canducú ró jeē quéndōo ndaā rō, te ni cacuxeēn rō nuū tée ni sáha cuéchi, te ni cayūhu ró jeē ní castívī ró núu yā. Yūcuán na te yōhyo ni cacuni rō coto tucu ró núu rī, te yōhyo ni candihvī ni rō ni cacuxeēn rō nuū tée ni sáha cuéchi ún. Te súcuan ni castéén rō jeē tú cuéchi ró, chi tu ní cájejnūhún ró cuéchi ni sáha tée ún.

¹² Te jeē ní tee ri carta un, nasūu máa-ni jeē cúxeēn rī nuū tée ni sáha cuéchi ún, ni nasūu máa-ni jeē cahán rī jehē tée ni ndoho ni sáha de. Chi sa suhva ni tee ri návāha nucūhun ni rō ndese yōhyo ni canacani ni rō jehē rī jito jínū Yaā Dios.

¹³ Jeē yúcuan ní candusīh ni rī jeē síquī rō.

Te víhyá gā ni cacusīh ni rī jeē ní jini rī jeē cúsīh ni Tito, chi ni nduu nayúú ini de ni casáha ró.

¹⁴ Chi je ni cahán rī jín de jeē cúsīh ni rī jeē váha ñayuu cácuu ró, te vijna te tu ní quéndōo rī jnūhun canu jeē síquī rō. Chi nájnūhun ní cajini rō jeē iyó ndáa táca jnúhun ni cacahán rī jín ró, suni súcuan ni cundaā jnūhun ni cacahán rī jín Tito jeē cúsīh ni rī síquī rō jeē váha cásquícu ró.

¹⁵ Te víhyá gā manī de jín ró vijna jeē ñūhun ni de jeē vāha ni cajetáhú ró jeē cahán de, te ni cahīyo yíñūhún ró ni candiso īyo ró núu de.

¹⁶ Núu súcuan te cúsīh ni rī síquī jeē cucáhnu ndasí ni rī rohó jijnáhan ró.

Jeē na cúsīh ni i socō i cuehē

8

¹ Hermano, vijna te suni cácuu rī castūhun rí nuū rō jijnáhan ró ndese cuehē jeē váha ni sáha Yaā Dios jín ñayuu cácandíje cáyūcú Macedonia.

² Chi vēsú yōhyo ni jito ndee jnūndóho i, te suni yōhyo ni cacusīh ni i jín jnúhun ya. Te vēsú ñayuu ndahú ndasí cácuu i, te yōhyo vāha ni cajequin i cuehē xūhun jée cúu ñayuu ndahú cácandíje.

³ Chi cúu ri testigo jeē ní cacusīh ni maá i ni cajēhe i ndésaa ni canda i, te nde vihyá gā ni cajēhe i.

⁴ Chi ni cacahán ndahú ndasí i jín rí jeē na cuáha ri jnūhun chindée ñáhán i jín yó cuāha i xūhún cuu hermano cándoho ndáhú.

⁵ Te víhyá gā ni casáha i vēsú jeē ní cajeni ni rī, chi xīhna gā ni casocō i máa i nuū Jítoho yō, te saá te ni cajēhe i máa i sáha i táca jée cácuu rī, ndihī ndese nújnahan ni Yaā Dios.

⁶ Te jeē súcuan ni casáha ñayuu Macedonia, te ni castíhvī ni rī Tito jeē na jée tucu de nuū maá ró, sáha de jeē jīnu jniñu jeē ní squéjée de jín ró jeē suni caquin rō cuehē xūhún cuu ñayuu ndahú.

⁷ Chi máa ró yōhyo vāha casáha ró táca-ni, chi vāha cácandíje ró, vāha cánacani ró jnúhun, vāha cájecūhun ni rō, vāha cándihvī ni rō, vāha manī rō jín rí jijnáhan ri. Núu súcuan te suni cánuú sáha vāha ró jniñu yáha jée cuáha ró jée cúu ñayuu ndahú.

⁸ Te nasūu jée cuní rī ndacu ri jniñu nuū rō, chi sa cástūhun rí nuū rō ndese yōhyo cácusīh ni sava ga ñayuu jéhe i xūhún, te súcuan te cuní rī jeē suni máa ró cácuu ndáhú ndije ni rō ñayuu ndahú.

⁹ Chi je cájini rō ndese yōhyo vāha ni Jítoho yō Jesucristo jín yó. Chi síquī jeē ní cundáhú ni yā rohó te ni nasáha ndáhú yá maá yá, vēsú cucá ndasí yá nde andívī núu. Te súcuan ni sáha ya jeē cácuu ró ndihī jeē ndíso jnūhun ya, síquī jeē ní nasáha ndáhú yá maá yá.

10 Te jeē váha máá ró cúu jeē na cáchi rī ndese jéni ni rī siquī jniñu yáha. Váha ni caquejeé ró nde jendujin, chi nasūu máá-ni jeē ní cajequin rō xūhún, chi suni yóhyo ni cacusī ni rō sáha ró.

11 Núu súcuan te vijna te sínu ró. Te nájnūhun ni cacusī ni rō ni caquejeé ró jíin, suni súcuan na cúsi ni rō sínu ró, chi cuāha ró núu ndese cánevāha ró.

12 Chi núu cúsi ni yō cuāha yó, te jétáhu yá núu ndese névāha yó, chi tu jícan yā jeē cuāha yó jéē tu névāha yó.

13 Te nasūu jéē cahán rī jeē cáhni ndahú ró máá ró jeē cáa ga nihīn i vésú jeē ndóo nuū maá ró.

14 Chi sa suhva jeē ĩn cūhva-ni conevāha ró jíin i. Chi cánevāha cuehē rō vijna, te cuu cuāha ró jéē cúmanī nuū i. Yūcuán na te núu ndé ĩn quivī conevāha i, te suni cuu cuāha i te núu ni cumanī nuū rō. Te súcuan te ĩn cūhva-ni conevāha ró jíinahan ró,

15 nájnūhun cáhán tutu ĩi siquī ñáyuu jeē ní canastútú maná nde jenahán: Tēe jeē ní nastútú cuehē, tu ní ndóo ga nuū de. Te tēe jeē ní nastútú jecu-ni, suni tu ní cúmanī nuū de. Achí tutu.

Jnūhun Tito jíin úu gā jnahan de

16 Te na cútahū rī nuū Yaā Dios jeē ni sáha ya jeē ndihví ni Tito jehē rō nájnūhun cándihví ni maá rí.

17 Chi ni jetáhu de jeē ní cacahán rī jíin de jeē jeé de nuū rō. Te siquī jeē ndihví ni de jehē rō, jeē yúcuan cuájeē de, chi súcuan cúu ni maá de.

18 Te suni cátají rí ĩn hermano cuajeē jíin Tito nuū rō. Te táca grupo ñayuu cácandíje cájejnūhún i tēe un jéē váha jéjníñu de siquī jnūhun jeē jnáma ya yohó.

19 Te táca grupo ñayuu cácandíje suni ni catee i jniñu siquī de jeē cáca de jíin rí chindéē ñáhán de quindēca de xūhun jíin rí jeē ní cajēhe ñayuu. Te jniñu yáha cása ha ri návāha cahán ñayuu jeē yóhyo váha Yaā cúu máá Jítóho yō, chi cuni i ndese yóhyo cácusī ni rō cásocō rō xūhún.

20 Te quingoo ndindúú rí návāha ni ĩn ñayuu ma tēe i cuēchi siquī rī siquī xūhun cásocō ñayuu.

21 Chi ndúcú rí jeē squícu ndaā rī táca jniñu, nasūu máá ĩn-ni nuū Yaā Dios, chi suni nuū ñáyuu.

22 Te suni cátají rí ĩnga hermano yō cua-jeē de jíin ndindúú tēe yáha. Te tijni jínu ni steén de jeē yóhyo cúsi ni de ndihví ni de táca jniñu. Te vijna chi ndihví gā ni de jehē rō, chi cúcáhnu ndasí ni de jeē cásquícu ró.

23 Te núu cácajnūhún ñayuu siquī Tito, te achi rō jeē cúu de tēe chindéē ñáhán jéjníñu jíin rí nuū rō siquī jnūhun ya. Te uū gā hermano yō yáha, achi rō jeē cácuu de tēe jeē ní catejníñu ñayuu cácandíje, te cáhīyo yíñuhún de nuū Cristo.

24 Núu súcuan te stéén rō nuū de jeē cáhīyo manī ndije ró jíin de, návāha na cúni táca grupo ñayuu cácandíje. Te súcuan cuni i jeē tu ní cácusī cáhá ni rī siquī rō.

Siquī jeē cájequin i xūhún cuu táca hermano

9

1 Te vijna te tuá jíni ñuhún tee ri nuū rō siquī xūhun jeē cájequin rō cuu táca hermano cándoho ndáhú.

2 Chi je jíni rī jeē cánujnahan ni rō cuāha ró. Te jeē yúcuan máni cúsi ni rī cahán rī jíin ñáyuu Macedonia jeē rohó ñáyuu Acaya, je ni casátūhva ró xūhun ndé jendujin. Te jeē súcuan ni cacusī ni maá ró, te jeē yúcuan cuehē ñayuu Macedonia ni cacondihví ni i ni cajēhe máá i.

3 Te tájí rí ndinúní hermano yáha cuájeē maá de nuū rō xīhna gā, návāha jeē jinú maá rí te ma quéndōo néé rí siquī jnūhun ni cahán rī jeē squícu váha ró jíin jniñu ún. Chi coo tūhva ndije ró jíin xūhun nájnūhun ni cahán rī jíin i.

4 Chi sanaa te jecoo jecu tēe Macedonia jíin rí, te núu cuni de jeē tu cáhīyo tūhva ró, te coo jnūhun canu nuū rī, te suni nuū maá ró jíinahan ró, chi ni cahán teyí rí jeē cáhīyo tūhva ndije ró.

5 Jeē yúcuan ní jeni ni rī jeē cánuú cahán rī jíin táca hermano yáha jecoo de xīhna gā, te saá te jinū rī, návāha stīhvī ni de rōhó jéē yáchī na cóo tūhva xūhun jéē ní cacahán rō jeē cuáha ró. Te súcuan te coo tūhva siquī jeē váha ni rō, te nasūu jéē safuerza rī rohó.

6 Cocuhun ni rō jnūhun yáha, jeē núu jecu-ni cuāha ró te suni jecu-ni nanihīn rō: Chi tēe jeē tihlí-ni táji, suni tíhli-ni nastútú.

Te tēe jeē táji cuehē, suni cuehē nastútú. Achí tutu.

⁷ Tācá ñn ñn ró cuāha ró ndésaa ni tee ni rō. Ma cúxi ni rō cuāha ró, chi nasūu fuerza cúu. Chi Yaā Dios manī yā jín ñáyuu jeē cúsi ni cuāha.

⁸ Te máá Yaā Dios cuu sáha ya jeē nducuehē ndinuū jeē váha cuu ró jijnáhan ró, návāha níni coneváha ró ndihi táca jeē jini ñúhún ró, te coo sobra gā jeē cuāha ró jée cúu táca jniñu váha.

⁹ Chi súcuan cáhán tutu ñi siquī tāca ñáyuu jéhe:

Ni scáa i ni jéhe i nuū ñáyuu ndahú.

Te táca jniñu váha sáha i, chi quendōo ní cáni.

Achí tutu.

¹⁰ Te Yaā Dios jéhe ya tata nuū tēe táji, te nihin de staā jeē cáji de. Te suni súcuan cuāha ya ndinuū jeē váha cuu ró, te sáha ya jeē cáyā te nducuehē jniñu váha cásáha ró.

¹¹ Súcuan cucúca ró jín táca-ni, návāha cuu cuāha cuehē rō. Te xūhun jéē cuāha ró quíhín nuū hermano cándoho ndáhú, suu sáha jeē nácuatáhú i nuū Yaā Dios.

¹² Chi xūhun jéē cuāha ró núu i, nasūu máá ñn-ni jeē nihín i jeē cúmanī nuū i, chi suni sáha jeē nácuatáhú ndasí i nuū Yaā Dios.

¹³ Te cahán i jeē yóhoyo váha Yaā cúu Yaā Dios, chi xūhun jéē ní cajēhe ró stéén jeē váha cácanáje ró jnúhun Cristo. Te suni sáha jeē cahán i jeē yóhoyo cújéhnú Yaā Dios siquī jeē ní cajēhe cuehē rō nuū i jín núu sava ga ñáyuu.

¹⁴ Te suni cacān tahú i jehē rō, chi coo manī ndasí i jín ró siquī jeē yóhoyo váha ni sáha Yaā Dios jín ró.

¹⁵ Te na cútahū yō nuū Yaā Dios, chi ni jéhe ya Sēhe ya nuū yō, jeē cúu ñn tahū cáhnu ndasí jéē ma cánda cuiti yō castūhún ndihi yó.

Jeē ndíso jniñu Pablo cúu de apóstol

10

¹ Te ruhū Pablo, cáhán ndahú rí jín ró jijnáhan ró jín modo maá Cristo jeē vítá ni yā te váha ni yā. Ruhū, chi cácahán rō jeē iyó suchí ni rí núu ndéé rí jín ró, te núu ndéé jíca rí te tu yúhú cuiti rí cahán ñihin rí jín ró, cácahán rō.

² Núu súcuan te cáhán ndahú rí jín ró jeē núu na jée rí te ma cahán rō jnúhun jeē sáha jeē cuxeēn rí nuū rō. Chi sava ró cácahán jeē casáha rí jniñu ya siquī jeē máni jeē na nihín rí siquī ún. Núu súcuan te iyó túhva rí cuxeēn rí nuū ñáyuu cácahán súcuan.

³ Chi vésú cácuu rí ñáyuu cáyūcú ñi ñayiví, te tu cájejnáhan rí modo cájejnáhan ñáyuu ñayiví. Chi nájnūhun jeē cájejnáhan rí siquī táca jniñu neé.

⁴ Chi nasūu ndajniñu ñayiví jéjníñu rí cájejnáhan rí, chi jín poder Yaā Dios cájejnáhan rí snáa rí tāca fuerza jeē cúu contra siquī yā.

⁵ Súcuan cásnáa rí tāca jnúhun ndúxí jín jnúhun téyí jeē nducú casi jeē ma cúni ñáyuu ndese Yaā cúu Yaā Dios. Te cájesi rí nuū ndihi jeē tú váha jeē cájeni ni ñáyuu, návāha cuandetū i nuū Cristo.

⁶ Te jeē jínu cuandetū váha máá ró, yūcuán na te coo túhva rí cuāha rí castigo nuū tāca gā ñáyuu jeē tu cájendetū.

⁷ Máá ró jijnáhan ró máni cájeni ni rō modo ñáyuu tu cájecūhun ni. Núu na-ni tēe jeni ni de jeē Cristo ni tejníñu ya de, te na sáha de cuenta jeē suni súcuan ni tejníñu ya ruhū jijnáhan rí.

⁸ Te núu ni cahán teyí rí jín ró jeē ndíso jniñu rí, te tu cúcanu rí sáha. Chi máá Jítoho yō ni tejníñu ya ruhū jijnáhan rí, návāha sáha rí jeē ije ánuá rō jín jnúhun ya, nasūu jéē snáa rí.

⁹ Núu súcuan te tu cúni rí jeē cáni ni rō jeē nducú rí siúhú rí rohó jín carta rí.

¹⁰ Chi cácahán sava ró jéē tāca carta rí yóhoyo stíhví ni te ñihin ndácu jniñu, te sa suhva núu ndéé rí jín ró te tu cúndeyí ni rí ndacu ñihin rí jniñu, te suni tu cúu cahán vāvihí rí, achí ró.

¹¹ Te ñáyuu cácahán súcuan na sáha i cuenta jeē nájnūhun ñihin cáhán carta rí jeē íne jíca rí, suni súcuan ñihin ndacu rí jniñu nuū rō jeē cóndee rí jín ró.

¹² Te va ma chúndeyí cuiti ni nde rí jeē sajehnú rí maá rí, nájnūhun cásáha sava tēe un jéē cájejnúhún nde de máá de. Tāca tēe ún chi cáacunéé de jeē cájeni ni de jeē cújéhnú ga de vésú jnáhan de, te tu cásáha de cuenta ndese cúni Yaā Dios jeē caca de.

13 Te ruhū jijnáhan ri, chi cutéyí nde ri maá cūhva-ni jniñu jeē ni jéhe Yaā Dios nuū rī, te ma yáha ga rī. Máá Yaā Dios ni tee cūhva yá ndésaa cúu jeē sáha ri, te máá yá ni jéhe jnūhun jeē ni jínū rī nuū rohó ñáyuu ñuu Corinto.

14 Jeē yúcuan ná ni jinūcoo ri nuū rō jeē xīhna ñūhún te nasūu jéē ni yáha ri nuū cūhva jniñu ní jéhe ya nuū rī. Chi xīhna gā maá rí ni jinūcoo nuū rō ni canacani ri jnūhun vāha Cristo.

15 Te tu cácutéyí rí siquī jniñu ní casáha inga tēe, nájñūhun jeē jniñu máá rí cúu. Chi sa suhva cáñuhun ni rī jeē cuehē gā candíje ró, te súcuan te cuu sáha ri cuehē gā jniñu ya mēhñu ró, te níni máá cūhva jeē ni jéhe ya nuū rī.

16 Yūcuán na te cácutéyí rí scuité núu ga rī jnūhun jnáma ya yohó núu tāca gá ñuu yúcu ndé yúcuan gá. Te súcuan te ma quívi nduu rī cutéyí rí nuū jeē jé ni canacani inga tēe jnūhun.

17 Te núu ndé tēe cúní de cutéyí de, na cutéyí de siquī jeē sáha máá Jítóho yō, nasūu siquī jéē sáha máá de.

18 Chi nasūu tēe jeē jejnūhún máá cúu jeē quéndōo yíñūhún, chi sa suhva tēe jeē jejnūhún máá yá.

Jeē cahán Pablo siquī tēe cánacani jnūhun stáhú

11

1 Cone cáhnu ni rō jijnáhan ró jeē cahán rī jecu jnūhun modo nájñūhun cácahān ñáyuu canéé. Núu súcuan te cáhnu coo ni rō víi.

2 Chi cúcuñí rí jehē rō jijnáhan ró, nájñūhun cúcuñí Yaā Dios. Chi cácuu ró nájñūhun ñn sūchi sáhí íyó ndoo, te ni sáha ri jeē quijnáhan ró jíin Cristo, nájñūhun quijnáhan ñn sūchi sáhí jíin máñūhún-ni yíi.

3 Te yúhú rí sanaa te cuāha ro jnūhun stáhú táca tēe un róhó, te siáá rō jnūhun jeē chiñūhún ndáá rō Cristo nde jíin ini jíin ánuá rō. Chi suni súcuan ni sáha Satanás jíin Eva, chi ni quívi ini ñn coō, te ni stahú un ña jíin jnūhun ndíchí stáhú.

4 Chi núu quíjicoo tēe nuū rō jeē tu cánacani ndaā de jnūhun Jesús nájñūhun ni canacani ri nuū rō, te va yōhyo vāha cájetáhú nde ró de. Te suni súcuan vāha

cájetáhú nde ró núu inga espíritu jíin núu inga jnūhun jeē tu quijnáhan jíin Espíritu jíin jnūhun jeē ní cacandíje ró jéē jnáma ya rohó.

5 Te tāca tēe cácahān jeē apóstol cujéhnu ga cácuu, tú cuíti jeē cujéhnu ga nde de nuū rī.

6 Chi vēsú tu níhín vāha nde ri modo cahān rī, te jécūhun vāha ni rī. Chi jíin ndíhi jniñu ni casáha ri mēhñu ró ni castéén cají rí nuū rō jeē súcuan cúu.

7 Tu ní jíicán rī xūhun núu rō siquī jeē ní nacani ri jnūhun jnáma ya yohó. Te súcuan ni cotecu ndahú rí návāha quendōo vāha ga maá ró jíin jnūhun ya. ¿Te va cuēchi ni sáha ri jeē ni sáha ri súcuan, chí naún?

8 Chi sava ga grupo ñáyuu cácahān jeē ni quihin ri xūhun jéē ní cajéhe i nuū rī, návāha súcuan-ni nacani ri jnūhun ya nuū rō jijnáhan ró.

9 Te ná ni condee rī jíin ró te ni ndíhi xūhun rí, te tu ní jíicán cuíti rī nuū ní ñn ró. Chi hermano jeē ní quijicoo ichi Macedonia ni cajéhe de nuū rī jeē cúmanī. Te jeē súcuan tu ní stáhān rī rohó, te ni ma sáha cuíti rī.

10 Te nájñūhun cúcáhnu vāha ni rī jeē jíin rī jnūhun ndaā Cristo, suni súcuan jíin rī jeē ma quihin ri xūhún nuū ni ñn ñáyuu ní ndáñúú Acaya, návāha ma cási i jeē cúsi ni rī jeē súcuan-ni nácani ri jnūhun ya.

11 ¿Te á siquī jeē tú manī rī jíin ró cúu jeē cahán rī súcuan, jéni ni rō, chí naún? Tuú chi máá Yaā Dios jíin yā jeē maní rī jíin ró jijnáhan ró.

12 Te sáha ri ná-ni sáha ri, chi ma quihin ri xūhun ró, návāha casi rī nuū jeē casatéyí tēe un máá de jeē cácahān de jeē inuú casáha de jniñu ya jíin rí.

13 Te tēe ún chi nasūú apóstol ndaā cácuu de, chi máni máá jnūhun stáhú cácahān de, te casáha de máá de jeē cácuu de apóstol Cristo.

14 Te tu náa ni yō jíto yó jéē casáha de súcuan, chi je jíin yō jeē suni Satanás násama máá te stáhú jéē sáha máá nájñūhun ñn ndajéhé Yaā Dios jeē jíca jíin luz yā.

15 Te jeē yúcuan suni tu náa ni yō jíto yó jéē tēe cájejniñu nuū Satanás, casáha de máá de jeē tēe ndaā cácuu de. Te ñn quívi te nanihín de siquī jniñu néé casáha de.

Jnūndóho ni ndoho Pablo siquī jeē cúu de apóstol

¹⁶ Inga jínu cahán rī jín ró jeē ni ìn ró ma cáni ni rō jeē tée cánéé cúu ri. Te núu súcuan cájeni ni rō, te va cuatáhú nde ró jéē cahán rī nájnūhun tée cánéé, návāha suni cuu cutéyí nde ri jecu nájnūhun cásáha téē ún.

¹⁷ Jeē cahán rī vijna chi nasūu jéē ní ndacu máá Jítóho yō cúu, chi sa nájnūhun téē cánéé cahán rī jeē cutéyí nde ri.

¹⁸ Chi cuehē de cásatéyí de máá de modo jeē iyó ini ñayíví, te suni súcuan na satéyí nde ri maá rí núu súcuan.

¹⁹ Te va téē cáhīyo cájí xínī cácuu nde ró, te jeē yúcuan cúu vāha ni nde ró cuatáhú ró ìn téē cánéé núu súcuan.

²⁰ Chi va vāha-ni cájendeyí ni rō nuū téē un jéē casáfuerza de róhó cuajníñu ró núu de, chí cásáha de jeē ndundáhú ró, chí cáquende de ndajníñu ró, chí cásájéhu de máá de nuū rō, chí ndé cácatu de nuū rō.

²¹ Te vēsú cúcanu nde ri cahán rī, te na cahán rī jeē tu ní cūndeyí ni nde ri satéyí rí maá rí nájnūhun casáha téē ún.

Te vijna te núu iyó sava téē chūndeyí ni de satéyí de máá de, te va suni chundeyí ni nde máá rí núu súcuan. Te va cahán rī nájnūhun cahán ìn téē cánéé.

²² Núu cácutéyí de jeē téē hebreo cácuu de, te suni súcuan ruhū. Núu téē Israel cácuu de, te suni ruhū. Núu yucūn Abraham cácuu de, te suni ruhū.

²³ Núu téē cájejniñu nuū jnúhun Cristo cácuu de, te víhyá gā ruhū. Te va cahán rī nájnūhun téē cánéé jéē cutéyí rí súcuan. Chi ni caa ga ni sájniñu ri vēsú maá de jínáhan de, te ni caa ga ni cacani i ruhū, te cuehē gā jínu ni ine ri vecāa, te suni cuehē gā jínu ni cacani ñayuu cahni i ruhū.

²⁴ Te jnáhan ri hebreo, uhūn jínu ni cacani xeēn de ruhū jín cuarta ñi, ìn cūhva jeē jé yajni cuu rí sáha.

²⁵ Unī jínu ni cacani de ruhū jín yujnu xí, te ìn jínu ni cajēhe de yuū xínī rī. Unī jínu ni quēe barco jeē ní jica ri siquī jnúhun ya. Te ìn jecuāa jín ìn ndiáca ni yosō candá rí nuū cunú ndute mar.

²⁶ Cuehē jínu ni ndoho ri ni jica ri ichi, te ni cācu ri nuū táca yúte, te ni cācu ri nuū táca ñácuīhná. Ni cācu ri nuū ñayuu nación rī jín

nuū ñayuu ñuu jícá. Ni cācu ri cháha chúcuan ná ni iyo ri ñuu jín rancho jín mar. Ni cācu ri nuū táca jnáhan ri jeē tu iyó ndáa.

²⁷ Ni sájniñu nīhin ri te yí ní ndoho ri. Cuehē jínu ni jehni rī maá rí māhná. Ni jī rī sōco, ni jichī rī ndute. Cuehē jínu ni iyo ndite ni rī, ni cuijnu rī, ni cumanī sahna ri

²⁸ Te siquī táca jéē yáha chi iyó gá. Chi ndiquivī ndóho ri jeē nácani ndasí ni rī jehē táca grupo ñayuu cácadíje.

²⁹ Núu ìn ñayuu tu fuerza ini i, te suni ndóho ri jehē i. Te núu ìn ñayuu quíví i cuēchi sáha jnáhan i, te ndóho ri jnúhun cúcanu jín jnúhun náxeēn ni.

³⁰ Núu súcuan te núu cánuú cutéyí nde ri, te va cutéyí rí siquī táca jéē steén jeē tú na fuerza ini rī.

³¹ Te Yaā Dios, Yaā cúu Tátá maá Jítóho yō Jesucristo, jíní yā jeē cahán ndaā rī. Te ní cáni na cahán ñayuu jeē vāha ndasí Yaā cúu ya.

³² Ná ni iyo ri ñuu Damasco, te gobernador jeē ndácu jniñu ndañúu jeē jnī rey Aretas, ni jeni de soldado ni cacondito táca yéhyí jeē ní condúu ndihyú ñuu ún, chi jñi de ruhū quihīn rī vecāa ni cuni de núu.

³³ Te ni quíví ri chīji ìn jīca, te ñayuu cácadíje ni cascúun i ruhū ventana ìn vehe jeē néne jicā jeē ndihyú ñuu ún. Te súcuan ni cācu ri nuū téē ún.

Jeē ní jito ndijin Pablo jeē ni stúu ya nuū de

12

¹ Te tu níhín jniñu jeē cutéyí rí. Te vāha ga na cástūhun rí nuū rō siquī jeē ní jito ri jeē ni stúu maá Jítóho yō nuū rī te ni steén ndijin yā nuū rī.

² Jíní rī ìn téē cándíje Cristo, te je ni cuu uxí cuūn cuiyā jeē ní sáha ya jeē ní caa téē un ní jehēn de nde andíví úní. Te tu jíní rī núu ni jehēn rī jín yiquí cúñu rī, chí ní jehēn anuá-ni ri. Máá Yaā Dios cúu jeē jíní.

³ Te jíní rī jeē ní ndonehen ya ruhū. Te á ní jehēn rī jín yiquí cúñu rī, chí ní ndōo, tu jíní rī, chi máá-ni Yaā Dios cúu jeē jíní.

⁴ Chi ni sáha ya jeē ní caa ri ni jehēn rī nde jardín andíví. Te yūcuan ní jini sōho ri táca jnúhun sáhí ndasí jéē ma cúu castūhun yóhó ñayuu.

⁵ Te siquī jeē ni sāha ya súcuan jíin rí cúu jeē cutéyí rí, te ma cutéyí rí siquī ndese cúu máa rí. Chi cutéyí rí máni jeē tú na fuerza ini rí.

⁶ Te núu cúní rí cutéyí rí siquī maá rí nuú, te nasūu jéē canéé rí núu sāha ri súcuan núu, chi ndaā cúu jeē iyó jeē cutéyí rí. Te ni ma sāha ri, chi tu cúní rí jeē cani ni ñayuu jeē cujéhnú ga rí vésú jeē ní jito i chí jéē ní jini i jnūhun rí.

⁷ Te tu cúní yā jeē yáha ri cutéyí rí siquī jeē ni stéén ndijin yā jniñu jéhnú ndasí un núu rí, te jeē yúcuan ni quiji ñn jnūndóho jeē ndiquín ruhū te stóho ruhū. Te ñn jeē ni jéhe ya jnūhun ni tají Satanás cúu, ñn jeē stóho ruhū, návāha ma yáha ri cutéyí rí.

⁸ Te unī jínu ni cahān ndahú rí jíin máa Jítoho yō jeē na téjiyo ya quihín.

⁹ Te ni cahān yā jíin rí: Tuú chi tu cúmanī jeē cundáhú ni rí rohó. Chi ñayuu jeē tú na fuerza ini, sāha ri jeē nducuehē gā fuerza maá rí ini i, ni achí yā. Núu súcuan te cúsiñ ni rí jeē tú na fuerza ini rí, chi súcuan te nducuehē gā fuerza Cristo ini rí.

¹⁰ Jeē yúcuan cúu jeē cúsiñ ni rí jeē tú na fuerza rí, jíin jéē cácahān ndevāha ñayuu jíin rí, jíin jéē cúmanī nuū rí, jíin jéē cájito xeēn i ruhū, jíin jéē ndóho ri jnūndóho siquī Cristo. Chi jeē tú na fuerza maá rí, yúcuan sāha jeē nihín rí fuerza maá yá.

Jeē nácani ni Pablo siquī ñayuu cácaandíje ñuu Corinto

¹¹ Te va tēe cánéé cúu ri jeē ni sátéyí nde ri maá rí. Te siquī jeē tu cácaandíje ró ruhū, jeē yúcuan ní sátéyí rí maá rí. Chi cánuú jéē máa ró cuajnúhún ró ruhū nuú. Chi vésú tú jniñu ri jeē maá rí, te va tu núu cuiti nde ri nuū tāca tēe un jéē cácahān rō jeē apóstol cujéhnú cácuu de.

¹² Chi mēñu ró ní sāha ri tācá jniñu jeē steén jeē cúu ndije ri apóstol. Chi jíin cuéhē paciencia ni sāha ri tācá jniñu jéhnú jeē steén poder Yaā Dios, jíin tāca jniñu jeē nahán ní canaa ni rō ni cajito ró.

¹³ Te tu ní sāha ri jeē núu ga cácuu ró núu tāca gá grupo ñayuu cácaandíje, chi máa ñn-ni jeē tu ní stáhān rí rohó jéē cuáha ro jéē jíni ñúhún rí. Cone cáhnu ni rō núu súcuan ni sāha nde ri falta nuū rō víi.

¹⁴ Te vijna je íyó túhva ri jecondēhe rí rohó vuelta unī. Te suni tú na vé cacán rí nuū rō, chi nasūu ndajniñu ró cúu jeē cuní rí, chi sa suhva jeē quendōo vāha ró jíin jnūhun ya. Chi nájnūhun sēhe ri cácuu ró, te sēhe chi tu cánuú caya i jeē cúu tátá i, chi sa tátá cánuú cuāha de jeē quéndōo vāha sēhe de.

¹⁵ Jeē yúcuan cúsiñ ni rí stíhi ri jeē névāha ri, te nde stíhi ri fuerza maá rí, návāha sāha ri jeē quéndōo vāha ánuá rō jijnáhan ró. Te manī gā coo ri jíin ró, vésú sanaa te jecu-ni cáhiyo manī rō jíin rí.

¹⁶ Te íyó jecu rō cácahān jeē vésú tú na vé ni jícan rí nuū rō, te tēe stáhú cúu ri, chi ni nducú rí modo ndichí nihín rí xūhun ró, cácahān rō.

¹⁷ ¿A táca tēe ní tají rí nuū rō, á ñn máa de ni stahú de róho jéē nihín de xūhun ró cuu máa rí, chí naún? Tú cuiti.

¹⁸ Ni cahān ndahú rí jíin Tito jeē jecondēhé de róho, te ni tají rí ñn hermano ni jeē jíin de. ¿Te chí ní stahú Tito rohó ní quihin de xūhun núu rō jeē cuu máa de, chí naún? Tuú chi ñnuú-ni cásaaha ndíndúú rí, te ñn-ni ánuá ndíndúú rí.

¹⁹ ¿Sanaa te cájeni ni rō jeē cahán rí jnūhun yáha návāha quendōo vāha ri jíin ró, chí naún? Nasūu súcuan cúu, chi Yaā Dios jíni yā jeē cahán rí maá-ni jnūhun jeē cuní Cristo. Te ndíhi jeē cahán rí chi ndúcú rí jeē ije ró jíin jnūhun ya, ñánī mánī.

²⁰ Chi yúhú rí jeē núu na jéé rí, te sanaa te cuni rí jeē tu cásaaha ró jniñu nújnahan ni rí. Te máa ró jijnáhan ró, suni ma nújnahan ni rō ruhū. Chi sanaa te cátejnahán ró, cácuuésún ni rō, cáquití ni rō, cáсандúxí ró, cásjnúhún ró, cácahān rō siquī jnahán ró, cácutéyí ró, cájica néé ró.

²¹ Te yúhú rí jeē núu na jéé tucu ri te cuāha Yaā Dios jnūhun canu nuū rí jeē súcuan cásaaha ró. Te sanaa te cucuíhyá ni rí núu íyó cuéhē rō jeē ní casáha cuéchi ichí yátá, te tu nácani ni rō stóo ró jniñu jnéhén jniñu jíca jnéni jíin jniñu néé ndasí ní casáha ró.

Saludo jíin jnūhun cástūhun Pablo jeē sándíhi

13

¹ Yāha cúu vuelta unī jeē jécondēhe rí rohó. Te sándaā yō jniñu nájñuhun cáhán tutu: Jíin jnúhun jeē cahán uū chí únī testigo te cundaā tācá jniñu, áchí.

² Te vijna jeē íne jícá rí te cáhán tucu ri nájñuhun ni cahān rī ná ni ine ri jíin ró. Cáhán rī nuū ñáyuu ni casáha cuēchi un jíin núu ndíhi ró, jeē núu na jéé tucu ri te ma cóo vītá ni rī jíin ró.

³ Te yūcuán cuu prueba jeē cánducú ró, suu núu jendaá jeē cahán rī jíin fuerza Cristo. Chi Cristo tu cúmanī fuerza yā jeē sándaā yā jíin ró, chi stéén yā poder yā mēhñu ró.

⁴ Te vēsú tu ní stéén yā fuerza yā ná ni jihī yā jicā cruz, te vijna chi técu yā jíin poder Yaā Dios. Te nájñuhun ni ndoho máá yá, suni sūcuan cándoho ri vijna jeē tu fuerza rī. Te vēsú sūcuan te jíin poder Yaā Dios cátecu rī jíin yá jeē cuajníñu ri nuū rō jeē siquí jnúhun ya.

⁵ Coto ndee rō maá ró núu cáhīn nīhin ró jíin jnúhun cácandíje ró yá. Sáha vāha ro cuenta. ¿Te á tu cájini rō jeē ndeé Jesucristo ini anuá rō, te núu ndaā jeē ní cacandíje ndije ró?

⁶ Te ñúhun ni rī jeē suni cáccáhnu ni rō jeē maá rí cácandíje ndije ri.

⁷ Te cájicān tahu rī nuū Yaā Dios jeē ma sáha ró ni ññ jniñu néé. Te vēsú núu cuajnúhún ró jeē váha ndácu ri jniñu nuū rō, chí vēsú núu ma cuajnúhún ró, te tú na vé sáha, chí máni jeē na sáha ró jniñu ndaā cúu jeē cánducú rí.

⁸ Chi tu jési ri nuū jniñu ndaā, chi sa suhva scáca ri.

⁹ Núu sūcuan te cácusī ni rī núu tú na fuerza maá rí, te núu íyó fuerza maá ró. Te níni cácān tahu rī jeē na íje ga ni rō jijnáhan ró jíin jnúhun ya.

¹⁰ Te téé ri carta yáha nuū rō nde ná tu jeē rī, návāha núu na jéé rī te tuá jíni ñúhún cuxeēn rī nuū rō. Chi ni jēhe Jitoho yō jniñu ndíso ri yāha jéé sáha ri jeē íje ánuá rō jíin jnúhun ya, nasūu jéé snáa rī.

¹¹ Je ni cahān yō núu sūcuan hermano, te na cóo jeē váha jíin ró jijnáhan ró. Te na cóndihvī ni rō íje ró jíin jnúhun ya, te coo ndeyí ni rō. Te na cóo ínuú ni rō te coyūcu máni rō jíin jnáhan ró. Te Yaā ndíso jnúhun

ndeyí sī ni jíin jnúhun cúndáhú ni, coo ya jíin ró jijnáhan ró.

¹² Te jeē cahán rō jíin táca jnáhan ró, te yíñúhún techūhu ró ndaha i.

¹³ Sándeyí ni rō jijnáhan ró, áchí hermano cácandíje jeē cáyūcu yáha.

¹⁴ Te ñúhun ni rī jeē Jítoho yō Jesucristo na sáha ga yā jeē váha rōhó jijnáhan ró, te Yaā Dios cundáhú ni yā rohó, te Espíritu Santo condee cáhnu ya jíin ró. Sūcuan na cóo. Amén.

CARTA JEE NI TEE SAN PABLO APOSTOL NUU ÑAYUU GALACIA

¹ Máá rí cúu Pablo apóstol. Te nasūu ñáyuu ni jeni ruhū ni nasūu ñáyuu ni tájí rúhū jeē nácani ri jnūhun, chi sa suhva máá Jesucristo jiín Tátá yō Yaā Dios, Yaā ní nastécu Jesús mēhñu ndíyí.

² Te ruhū jiín táca hermano cáyūcu jiín rí yāhá, cátee ri carta yáha cuájeē nuū rohó ñáyuu cácandíje ní región Galacia.

³ Te cáñuhun ni rí jeē Tátá yō Yaā Dios jiín Jítóho yō Jesucristo, na sáha ga yā jeē vāha róhó, te sáha ya jeē coo ndeyí coo sī ni rō.

⁴ Chi Jesús ni socō yā maá yá jeē ni jihī yā jeē siquí cuéchi yó, návāha jnama ya yohó núu táca jéē neé íyó ñayívi yáha, chí súcuan ni nujnahan ni maá Tátá yō Yaā Dios.

⁵ Jeē yúcuan na cáhán yō jeē yóhoyo luu cújéhu ya ní cáni. Súcuan na cóo. Amén.

Siquí jeē tuá na inga jnūhun cācu ñayuu

⁶ Te náhán náā ni rí jító ri jeē yóhoyo yachī cánducú ró stóo ró Yaā Dios, Yaā ní cana róhó jéē quívi ró ndaha ya siquí jeē cundáhú ni Cristo yohó. Chi ni candiquín rō inga jnūhun jeē sīn cáhán.

⁷ Te tú cuítí na inga jnūhun jnama yóhó íyó. Te cáhíyo jecu ñayuu castáhán i róhó, te cácuni i nasama i jnūhun ndese jnáma Cristo yohó.

⁸ Te núu ñn ñayuu nacani inga jnūhun nuū rō ndese jnáma ya rohó, te núu tu quíjnáhan jiín jnúhun ni canacani ri nuū rō xihna gā, na jnáhnú ndetū ñayuu ún. Te vēsú maá rí chí ñn ndajéhé jeē quíji nde andívi nacani inga jnūhun núu, na jnáhnú ndetū.

⁹ Je ni cahán rí jiín ró, te suni súcuan cáhán tucu ri vijna: Na-ni tēe nacani inga jnūhun nuū rō, te núu tu quíjnáhan jiín jnúhun jeē ní cajetáhú ró, na jnáhnú ndetū tēe ún.

¹⁰ Te jeē cahán rí súcuan, ¿á ndúcú rí jeē cuajnúhún ñáyuu ruhū, chí Yaā Dios? ¿Chí ndúcú rí jeē cúsi ni ñayuu jiín rí, cájeni ni rō? Núu ndúcú gá rí jeē cúsi ni ñayuu jiín rí, te nasūu mozo Cristo cúu ri núu súcuan.

Ndese ni jinū Pablo cúu de apóstol

¹¹ Te cástūhun rí nuū rō, hermano jijnáhan ró, jéē jnúhun jnáma ya yohó jéē nácani ri, nasūu jéē ní jeni ni maá rí jiín ñáyuu cúu.

¹² Chi nasūu ñáyuu ni stéén nuū rí, ni nasūu ñáyuu ni sáha jeē ní cutūhva ri, chi sa suhva máá Jesucristo ni steén nuū rí.

¹³ Chi je ni cajini jnūhun ró ndese ni sáha ri nde saá, ná ni chiñúhún rí sahán jnáhan ri ñayuu hebreo. Te cájini rō jeē yóhoyo ni jito xeén rí ñayuu cácandíje nuū Yaā Dios, te ni condihvī ni rí snáā rí i núu.

¹⁴ Te vāha ga ni cutūhva ri sahán ún vēsú cuehē gā tēe nación rí jeē ní cajehnu jiín rí, chí ni condihvī gā ní rí siquí táca jéē ní cajequin jí rí.

¹⁵ Te vēsú súcuan te Yaā Dios je ni nacāji ya ruhū nde ná tu cacu ri, te ñn quívi te ni cusī ni yā ni cana ya ruhū jeē quívi ri ndaha ya, siquí jeē yóhoyo ni cundáhú ni yā ruhū.

¹⁶ Te ni steén yā Sēhe ya nuū rí, návāha nacani ri jnūhun ndese jnáma ya ñayuu táca nación jeē tu jíní jnūhun ya. Yūcuán na te tu ní cájnūhun rí ni ñn ñayuu,

¹⁷ ni tu ní jéhén rí ñuu Jerusalén nuū tēe cácuu apóstol xihna gā vēsú ruhū. Chi sa suhva ni jehēn-ni ri nde región Arabia, te saá te ni nuhūn tucu ri ñuu Damasco.

¹⁸ Yūcuán na te nde ni yāha unī cuiyā, te ni jehēn rí Jerusalén. Te ni jini jnáhan ri jiín Pedro, te ni condee rí jiín de xahūn-ni quívi.

¹⁹ Te tu ní jító ri nuū táca gá apóstol, chí máá ñn-ni nuū Jacobo ñani maá Jítóho yō.

²⁰ Jnūhun yáha jéē tēe ri cuajeē nuū rō, chí jíní Yaā Dios jeē ndaā cúu.

²¹ Yūcuán na te ni jehēn rí ní región Siria jiín Cilicia.

²² Te ñayuu cácandíje jeē yíhi ndaha Cristo, jeē cáyúcú región Judea, ná tu coto cuítí i nuū rí saá.

²³ Chi máni jnūhun-ni ni cajini i cácahán ñayuu: Tēe ni jito xeén yohó ndé saá, vijna chí nácani de jnūhun cándíje yó jéē ní nducú de snáā de nde saá, áchí i.

²⁴ Te ni cacahán i jeē yóhoyo cújéhu Yaā Dios jeē súcuan ni sáha ya jiín rí.

Jeē ní cajetáhú táca gá apóstol un Pablo

2

¹ Yūcuán na te nde nuū uxí cuūn cuiyā, te ni jehēn tucu ri Jerusalén jíin Bernabé, te suni ni jeca ri Tito ni jehēn de jíin rí.

² Te ni jehēn rī chi máá Yaā Dios ni steén yā jeē jíni ñúhún quíhīn rī. Te ni candutútú sīn nene tēe cácujuhnu nuū ñáyuu cá candíje ún. Te ni castūhun rí nuū de síquī jnúhun jnáma ya yohó jeē nácani ri nuū ñáyuu tācá nación tu jíni jnúhun ya. Te súcuan ni sáha ri návāha cuajnúhún de jniñu ri, te ma quéndōo cāhá jniñu sáha ri jíin jeē ni sáha ri.

³ Te ni tu ní cásáha fuerza de Tito, tēe ni jica jíin rí, jeē cóndee jnunī circuncidar de, vēsú nasūu tēe hebreo cúu de.

⁴ Te súcuan ni cundaā, vēsú ni quívicoo jecu tēe stáhú jeē sáha de jeē hermano cácuu de. Te tēe un ní quívicoo de návāha yuhu-ni coto de ndese ni ndulibre yō nuū ley circuncidar síquī jeē yíhi yó ndaha Cristo Jesús. Chi cácuuni de jeē squícu tucu yó ley un, nduu tucu yó mozo nuū ley un.

⁵ Te tu ní cájetáhú cuíti rī nuū tēe ún, chi cúní rī jeē quéndōo ñihin ró jíin náhan ró jíin jnúhun jnáma ya yohó.

⁶ Te máá tēe cácujuhnu nuū ñáyuu cá candíje ún, tuá na inga jniñu jeē ní cándacu de nuū rī. Te máá rí chi tu ní chíhi ri cuenta síquī jeē cácujuhnu de, chi suni Yaā Dios tu sáha ya cuenta, chi ñuú-ni cúu ndívii tēe nuū yā.

⁷ Chi sa suhva ni cajini de jeē jnúhun jnáma ya yohó, ndíso jniñu ri nacani ri nuū ñáyuu tācá nación jeē tu cásáha circuncidar, nájñuhun nácani Pedro jnúhun un núu ñáyuu hebreo jeē casáha circuncidar.

⁸ Chi Yaā Dios jeē ní tají Pedro jeē nácani de jnúhun nuū ñáyuu hebreo, suni máá yá ni tají rúhū jeē nácani ri jnúhun nuū ñáyuu tācá nación tu jíni jnúhun ya.

⁹ Jeē yúcuan, Jacobo jíin Pedro jíin Juan, ni cajini de jeē Yaā Dios ni jēhe ya jniñu luu yáha nuū rī. Te tēe un cácahān ñáyuu cá candíje jeē maá de cácujuhnu ga. Te ni cajni de ndaha ri jíin ndaha Bernabé, jeē ní castéén de jeē cáhīyo manī de jíin rí, jíin jeē ní cacundaā ni de jeē maá rí quingōo nacani jnúhun nuū ñáyuu tāca gá nación, te máá de jíin náhan de nuū ñáyuu hebreo.

¹⁰ Te máá ñn-ni jeē ní cajicān de cúu jeē cónahán rí chindéé ñáhán rí ñáyuu cándoho

ndáhú, te jniñu ún je ni condíhvī ni rī ni sáha rí.

Jeē ni cáhān Pablo nuū Pedro

¹¹ Te ná ni quiji Pedro ñuu Antioquía, te ni cahān cají rí nuū de, chi ni stívi de jniñu.

¹² Chi nde ná tu quecoo sava jnáhan de hebreo jeē ní tají Jacobo, te yéji de staā jíin ñáyuu jeē násūu hebreo cácuu. Yūcuán na te nuū ní quecoo tēe ún, te ni cusīn de jeē tuá yéji de jíin i, chi yúhú de jeē cúni tāca tēe un jeē tuá squícu de ley jnáhan de hebreo. Chi áchí ley jeē ma cúu cají de staā jíin ñáyuu jeē tu cásáha circuncidar.

¹³ Te sava ga tēe hebreo jeē cá candíje, suni ni cacujiyo de nuū i, nájñuhun ni sáha Pedro, chi cáyūhú de jeē cúni tēe ún. Te nde máá Bernabé ni cascáhán de ni cujiyo.

¹⁴ Yūcuán na te ni jini rī jeē ní canayūhú de cají de staā jíin ñáyuu ún, cúu jeē tuá jica de jíin modo jeē cahán jnúhun jnáma ya yohó. Te ni cahān rī nuū Pedro, jito jíinū tācá de: Róhó jeē cúu tēe nación yō hebreo, tuá squícu ró ley jnáhan yó hebreo, chi yéji ró jíin ñáyuu ún. ¿Te najehē safuerza ró i jeē squícu i ley jnáhan yo hebreo núu súcuan? ni achi rī.

Ñn-ni modo jnáma ya ñáyuu hebreo jíin táca gá nación

¹⁵ Te yohó chi cúu yó ñáyuu hebreo, te cácahān yō jeē násūu ñáyuu tāca gá nación casáha cuēchi cácuu yó.

¹⁶ Te vēsú súcuan te jíni yō jeē ní ñn yó tu quéndōo ndaā yō nuū Yaā Dios jeē squícu yó jniñu ndácu ley Moisés jenahán, chi máá jēe candíje yó jeē Jesucristo ndahva yā cuēchi yó. Jeē yúcuan suni máá yó ni candíje yó Jesucristo, návāha ndahva yā cuēchi yó síquī jeē candíje yó, nasūu jíin jeē nducú yó squícu yó ley un. Chi áchí tutu ñn: Ni ñn ñáyuu ma quéndōo ndaā i nuū Yaā Dios jíin jeē nducú i squícu i jniñu jeē ndácu ley, achí.

¹⁷ Te máá yó ñáyuu hebreo, núu cúní yō jeē ndahva Yaā Dios cuēchi yó síquī jeē ni jíhī Cristo jehē yō, suu cúu jeē jécūhun ni yō jeē suni ñáyuu casáha cuēchi cúu yó, nájñuhun tāca gá ñáyuu. Núu súcuan ¿te á cuēchi ni sáha yó jeē ni stóo yó ley jenahán ná ni candíje yó Cristo? Tú cuíti jeē súcuan.

18 Chi sa núu naquihin tucu yó ley jeē ni stóo yó un, te súcuan tée yó cuéchi siquī maá yó.

19 Chi ruhū, nájnūhun ni jihī rī ni sáha ley un, te jeē yúcuan má cúu ga ndacu jniñu nuū rī. Te súcuan te cuu cotecu rī jeē sáha ri jeē cuní Yaā Dios.

20 Chi nájnūhun je ni jihī rī jicā cruz jiín Cristo, te vijna chi tuá técu rī jeē maá rí, chi máa Cristo cúu jeē técu ini rī. Te jeē técu rī ini ñayīvi yáha vijna cúu jeē candíje ri jeē Sēhe Yaā Dios chindéé ñáhán yá ruhū. Chi ni cundáhú ni yā ruhū te ni socō yā maá yá jehē rī.

21 Núu súcuan te tu cúní rī casi rī nuū jnúhun jeē ndáhva Yaā Dios cuéchi yó siquī jeē yóhyo vāha ni yā jiín yó. Chi núu jeē quéndōo ndaā yō nuū yā jeē nducú yó squícu yó ley jenahán, yūcuán na te tu ndé jéjníñu jeē ni jíhī Cristo nuú.

Jnúhun ley jiín jnúhun cándíje

3

1 Rohó hermano ñuu Galacia, ¿naun tu cájecūhun ni rō? ¿Ndé tée ni saca núu xinī rō jeē tuá cájetáhú ró jnúhun ndaā? Chi ná ni canacani ri jnúhun ya nuū rō, te cájí ndasí ni cajecūhun ni rō jeē ni jíhī Jesucristo jicā cruz jehē rō.

2 ñn-ni jnúhun yáha cájnūhun rí rohó: ¿Ndese ni canihīn rō Espíritu Santo? ¿A jéé ní cacundeyí ró squícu ró jniñu ndácu ley Moisés? Tú cuiti, chi jeē ní cacandíje ró jnúhun jnáma ya rohó jéé ní cajini sōho ró.

3 ¿Ndese cúu jeē tu cájecūhun cuiti ni rō? Chi xīhna gā ni cacandíje ró jéé ni jíhī Cristo jeē jnama ya rohó, te ni canihīn rō Espíritu. Te vijna ¿á cájeni ni rō jeē stóo ró jnúhun ún te fuerza maá ró squícu ró ley un, te cācu ró naún?

4 Núu súcuan te tu ndé ní jéjníñu cuiti jeē ní castóho ñayuu rohó siquī jnúhun jnáma Cristo rohó, chi vijna cánducú ró squéndōo ró jnúhun ún. Nacā jeē váha te núu jeē tu ní castóo ró, chi sa cándíje ndije ró yá.

5 ¿Te na siquī cúu jeē jéhe Yaā Dios Espíritu yā nuū rō te sáha ya jniñu jéhnu mēhñu ró? Tu sáha ya siquī jeē cánducú ró squícu ró ley un, chi siquī jeē ní cacandíje ró jnúhun jnáma ya rohó jéé ní cajini sōho ró.

6 Abraham ni candíje de jeē sáha Yaā Dios jeē ni jéjñūhun ya, te jeē yúcuan ní ndahva yā cuéchi de.

7 Núu súcuan te na jécūhun ni rō jijnáhan ró jéé ñáyuu cándíje jeē sáha Yaā Dios jehē i, ndívi i yucūn Abraham siquī jeē súcuan cándíje i.

8 Chi nde jenahán je cáhán tutu iī jeē ñáyuu tēcá naciún tu jíni jnúhun Yaā Dios, ndahva yā cuéchi i núu candíje i ún. Te nde ná tu cuu tēca jéé yáha te je ni jejnūhun ya jnúhun vāha yáha nuū Abraham: Jeē rohó cúu jeē quendōo ndetū ñayuu tēcá naciún.

9 Núu súcuan te ñayuu cándíje, quéndōo ndetū i jíni Abraham, tée ni candíje jeē ni jéjñūhun ya.

10 Te sa jnahnū ndetū ñayuu jeē cánducú i quendōo ndaā i jeē jíni ley Moisés. Chi súcuan yósó núu tútu iī: Jnahnū ndetū tēca ñáyuu jeē tu squícu ndíhi cuiti jnúhun yósó núu tútu ley, achí.

11 Núu súcuan te cájí cúu jeē ni ñn ñayuu ma quéndōo ndaā i nuū Yaā Dios siquī jeē nducú i squícu i ley un. Chi cáhán tutu: Ñayuu jeē ní ndahva yā cuéchi i, técu i jeē candíje i jeē sáha ya jehē i, achí.

12 Te ley Moisés tu cáhán jeē cótecu yō ní cáni siquī jeē candíje yó, chi sa suhva cáhán: Núu ndé ñáyuu squícu jniñu yáha, te cotecu i sáha, achí.

13 Te Cristo ni jnama ya yohó núu jnúhun cáhán ley jeē jnahnú ndetū yō siquī cuéchi yó, chi máa yá ni ndoho siquī jnúhun jeē jnahnú ndetū yō. Chi yósó núu tútu iī: Tēca ñáyuu condita caa jicā yújnu, jnahnū ndetū i, achí.

14 Te Cristo Jesús ni jihī yā jicā yújnu cruz návāha quendōo ndetū ñayuu tēcá naciún sáha ya. Chi jnúhun jeē ni jéjñūhun ya quendōo ndetū Abraham, jinū nuū i. Te súcuan te núu candíje yó jeē ni sáha Yaā Dios jehē yō, te nihīn yō Espíritu jeē ni jéjñūhun ya quiji.

Siquī ley jiín siquī contrato jeē ni jéjñūhun ya

15 Hermano, na cáhán rī ñn jnúhun ndese cásáha ñayuu ñayīvi: Núu ñn tée sáha de ñn contrato chí ñn acta, te núu je ni cucutú ni sáha de firmar, te ma cúu ga najnanū, ni ma cúu jecosō gā.

16 Te suni súcuan ni sáha Yaā Dios ñn contrato jeē ni jéjnūhun ya nuū Abraham jíin yúcūn de jeē quíji. Te tu cáhán tutu ñ siquī cuehē yucūn de, chi sa cáhán siquī ñn-ni yucūn de, te suu cúu Cristo.

17 Núu súcuan te jnūhun jeē cahán rī yāha cúu jeē xīhna gā ni sáha Yaā Dios ñn contrato jíin Abraham, jeē quiji Cristo jnama ya yohó, te ni sácútu yá. Yūcuán na te ni yāha cuūn ciento ocō uxī cuiyā, te sáa te ni jēhe ya ley nuū Moisés. Te ley un jéē ní quee cueé gá, ma cúu nacanu contrato un, ni ma cúu casi nuū jnūhun jeē ni jéjnūhun ya jeē jnama ya yohó.

18 Chi núu jeē jíin ley Moisés jnama Yaā Dios ñayuu, yūcuán na te nasūu siquī contrato jeē ni jéjnūhun ya cúu. Chi sa suhva siquī maá jéē ni jéjnūhun Yaā Dios nuū Abraham cúu jeē ní jnama ya de.

19 Núu súcuan ¿te ndese jéjníñu ley Moisés? Jéjníñu chi ni jēhe ya un cueé gá návāha nastúu cuēchi i. Te ni ndacu jniñu maá-ni nde ná tu quiji Cristo, Yaā cúu yucūn jeē ni jéjnūhun Yaā Dios jeē quíji. Te nde ná ni jēhe Yaā Dios ley un núu ñayuu, te ni tají yá tǎcá ndajéhé yā ni cacastūhun núu Moisés, te Moisés ni nacachī nuū i.

20 Te sǎn cúu jnūhun jeē ni jéjnūhun ya nuū Abraham jeē quíji Cristo, chi máñúhún-ni ya ni jéjnūhun, te tu ní jíni ñúhún ni ñn jeē nacachī nuū Abraham.

Siquī ndese jéjníñu ley jenahán

21 Núu súcuan ¿te á cúní cahán jeē ley jeē ni jēhe Yaā Dios nuū Moisés, téjiyo jeē ni jéjnūhun ya ún? Tú cuíti jeē súcuan. Chi núu jeē ni jēhe Yaā Dios ñn ley jeē cótecu ñayuu ní cáni sáha, yūcuán na te quendōo ndaā i nuū yā siquī jeē squícu i jniñu ndácu ley un núu.

22 Te tuú chi yósó núu tútu ñ jeē ndihi ñayuu ñayíví, nájnūhun yǎndihyū i vecāa chi cáyihí i chíji cuēchi. Te súcuan cúu návāha tǎcá i jeē candíje i jeē ni jíhí Jesucristo jehē i, nihīn i maá jéē ni jéjnūhun ya nuū i siquī jeē candíje i ún.

23 Chi nde ná tu quee jnūhun candíje yó Cristo, te nájnūhun ni yǎndihyū yō ni sáha ley jenahán, návāha condetu yó quíví quiji Cristo, Yaā candíje yó.

24 Núu súcuan te ley ni cuu ñn jeē ndíto yóhó nájnūhun ñn mozo ndíto sūchi lúlí, te ni jejniñu nde quíví ní quiji Cristo, návāha candíje yó jéē ni jíhí yā jehē yō, te ndahva Yaā Dios cuēchi yó.

25 Te vijna jeē ní quee Cristo, Yaā candíje yó, te tuá yǎhi yó ndaha ley jeē cúu nájnūhun mozo ndíto yóhó.

26 Chi ndivii rō cácuu sēhe Yaā Dios siquī jeē ní cacandíje rō Cristo Jesús.

27 Chi tǎca rō jeē ní jendute rō siquī jeē ni quíví rō ndaha Cristo, ni sáha ya jeē ní nduu rō nájnūhun cúu maá yá.

28 Te vijna chi tuá cúu rō ni ñayuu hebreo ni ñayuu griego, ni mozo jeē ní jeen ñayuu, ni ñayuu sǎjniñu cuenta maá, ni tēe ni ñahan. Chi ñn na cúu rō núu yā jeē cáyihí rō ndaha Cristo Jesús.

29 Te núu cáyihí rō ndaha Cristo, núu súcuan te yucūn Abraham cácuu ndije rō, te nihīn rō maá táhū jeē ni jéjnūhun ya.

4

1 Jeē cahán rī jíin rō jíjnahan rō cúu jeē yáha: ñn sūchi chíí táhū, vésú maá i naquihín ndihi jeē névāha tátá i, te núu lúlí i chí inuú cúu i jíin mozo.

2 Chi yǎhi i ndaha tǎca jéē ndíto i jíin jéē ndíto ndajníñu i, nde quee quíví jeē ní jeni tátá i, te sáa te nihīn i.

3 Te suni súcuan yóhó, chi nde ná tu jecūhun ni yō siquī Cristo te ni cuu yó nájnūhun sūchi lúlí, te ni yǎhi yó chíji tǎcá costumbre jeē ní cajequin ñayuu ñayíví.

4 Te nde ná ni quee quíví jeē ní jeni Yaā Dios, te ni tají yá Sēhe ya, ni cacu ya chíji ñn ñahan, te ni cacu ya yucūn ñayuu nación hebreo jeē cáyihí chíji ley Moisés.

5 Súcuan ni cacu ya návāha jnama ya yohó jéē tuá quíhí yó chíji ley un, te návāha naquihin Yaā Dios yohó cuu yó sēhe ya.

6 Te siquī jeē cácuu rō sēhe ya, te ni tají Yaā Dios Espíritu Sēhe ya ni quíví ini anuá rō, te sáha ya jeē cácahán jee rō: Tátá maá ná.

7 Núu súcuan te tuá cácuu rō nájnūhun mozo, chi sēhe ya cácuu rō. Te jeē cácuu rō sēhe Yaā Dios, te suni nihīn rō maá táhū jeē ni jéjnūhun ya jeē jíin Cristo.

Jeē nácani ni Pablo siquī ñáyuu cácandíje

8 Chi nde saá, nde ná tu jecūhun ni rō ndese Yaā cúu Yaā Dios, te ni cacuu ró mozo nuū tāca jēē násūu yāā ndaā cúu.

9 Te vijna chi je cájini rō ndese Yaā cúu ya, te vāha ga na cáhán rī jeē maá yá je jíní yā rohó. Núu súcuan ¿te najehē cáconi rō nandió cóo ró nduu tucu ró mozo nuū tācá costumbre ñayuu ñayiví jēē tu níhín jnīñu cuiṭi?

10 Chi máni jeē cánēe iī rō quiṽi jín yóō jín vico jín cuiyā.

11 Te yúhú rí sanaa te tu ní jéjníñu cuiṭi jeē ní nacani ri jnūhun nuū rō.

12 Cáhán ndahú rí jín ró hermano, jeē na cáni ni rō nájnūhun jéni ni maá rí jeē tuá squícu ri costumbre ñayuu hebreo. Chi ruhū ni nasáha ri maá rí nájnūhun máá ró jeē tu ní cáyihí ró núu ley costumbre ñayuu hebreo. Te tú na vé ni cásáha ró jēē cucuíhyá ni rī nde saá.

13 Chi cájini rō ndese ni cuu ná ni nacani núu rí jnūhun nuū rō ndese jnáma ya yohó. Chi siquī jeē cuhú rī te ni jecuíñi rī ñuu rō ni nacani ri jnūhun.

14 Te vēsú jnūndóho ni cuu jeē ní cocuhū rī, te tu ní cásájēe ni rō nuū rī, ni tu ní cásquéhichí ni rō ruhū. Chi sa ni cajetáhú ró ruhū nájnūhun jeē cúu ri ñn ndajéhé Yaā Dios, chí nájnūhun jeē cúu ri maá Cristo Jesús.

15 Núu súcuan ¿te najehē cúu jeē tuá cácusñi ni rō jín rí vijna? Chi náhán rí jeē vāha ni casáha ró jēē ní cajnahuhū ni rō núu jeē cúu te tava rō tinūu vāha máá ró, cuāha ró nduu tinūu rí nuú.

16 Te vijna ¿á ní nduu ri enemigo rō siquī jeē cachí rí máni jnūhun ndaā nuū rō, chí naún?

17 Te cáhīyo tēe jeē cándihvī ni siquī rō jijnáhan ró, te nasūu jēē quéndōo vāha ánuá rō, chi sa jeē cáconi de nasásñn de róhó jín ruhū, návāha condihvī ni rō jeē cúu máá de.

18 Te iyó vāha jeē cándihvī ni de jehē rō, te núu jeē quéndōo vāha ánuá rō cúu núu. Chi níni jíní ñúhún sáha de jeē vāha róhó, vēsú núu íne ri jín ró chí núu tú ri íne.

19 Séhē máni jijnáhan ró, jeē siquí rohó cúu jeē inga jínu jnáhuhū ni rī, chí nájnūhun ñn ñahan scácu sēhe, súcuan ndóho ri jehē rō. Te suu cúu jeē jnáhuhū ni rī ndétu ri jeē na ndúndaā anuá rō ndacu ró Cristo.

20 Nacā jeē vāha núu jeē ndeé rí jín ró vijna ñúhún, návāha cuu cahán manī rī jín ró. Te tu cújnúní cuiṭi ni rī ndese ga cúu jeē cáni ni rī siquī rō.

Jnūhun yátá síquī Agar jín Sara

21 Róhó jijnáhan ró jēē cáconi rō quiḥi ró chíji ley Moisés, cachí nuū rī: ¿A tu ní cájini sōho ró ndese cáhán ley un?

22 Chi cáhán tutu iī jeē Abraham ni iyo uū sēhe yí de. Te ñn i cúu sēhe Agar, ñahan cúu mozo vehe de. Te inga i cúu sēhe ñahan iyó libre, suu ñasíhí de Sara jeē ní cuu ña ñahan numá.

23 Te sēhe ñahan cúu mozo, ni cacu i nájnūhun cácu tāca gá sūchi lúlí. Te sēhe ñahan cúu libre, ni cacu i máá síquī jeē súcuan ni jejnūhun Yaā Dios.

24 Te yāha cúu ñn jnūhun yátá, chi ndindúú ñahan un cúu ña nájnūhun ndindúú contrato jeē ní sáha Yaā Dios jín ñayuu. Máá ñahan nání Agar, cúu ña nájnūhun contrato ley jeē véji nde yucu Sinaí. Te ñayuu cáyihí chíji contrato ley, cácu i mozo nuū ley un.

25 Chi Agar cúu nájnūhun ley jeē ni jéhe Yaā Dios xiní yucu Sinaí jeē ñn nde Arabia. Te cúu ña nájnūhun Jerusalén, ñuu ñayuu hebreo, jeē iyó vijna, chí tāca sēhe ñuu Jerusalén, cácu i nájnūhun mozo nuū ley un.

26 Te Jerusalén jeē iyó andiví, chí sa suhva iyó libre nájnūhun Sara. Te yóhó ñayuu cácandíje, nájnūhun sēhe un cácu yó, chí iyó libre yó nuū contrato ley.

27 Chi suhva yósó núu tútu iī: Róhó jeē ní cuu ró ñahan numá jēē tú sēhe ró, na cúsní ni rō.

Róhó jēē tu ní jéhnde chíji ró jēē scácu ró, na cána jee ró jēē cúsní ni rō.

Chi coo cuehē gá sēhe róhó jēē ní cuu ró ñahan numá vēsú ñahan jeē jé ni scácu sēhe.

Achí tutu.

28 Hermano, sēhe Yaā Dios cácu yó, chí súcuan ni jejnūhun ya nuū yó, nájnūhun ni jejnūhun ya nuū Abraham jeē cacu sēhe de Isaac.

29 Te nde saá te inga sūchi ní cacu nájnūhun cácu tāca gá ñayuu, ni jito xeēn i Isaac, sūchi ní cacu ni sáha Espíritu. Te

nájnūhun ni īyo sáá, suni súcuan cájito xeēn ñayuu tāca séhe Yaā Dios nde vijna.

³⁰ ¿Te ndese cáhán tutu īi? Achí: Quenehen ró ñahan cúu mozo na quíhín ña jíin séhe ña. Chi séhe ñahan cúu mozo, ma nihín i tahū jíin séhe ñahan libre, achí yá jíin Abraham.

³¹ Núu súcuan hermano, tu cúu yó nájnūhun séhe ñahan cúu mozo, chi nájnūhun séhe ñahan libre cúu yó.

Na cuiñi nihin yó jíin jnúhun jeē ni sáha libre yohó

5

¹ Te Cristo ni sáha libre yā yohó jéē tuá yáhi yó chíji ley Moisés. Núu súcuan te cuiñi nihin ró jíin jnúhun jeē ni sáha libre yā yohó, te ma ndívicoo tucu ró cuu ró mozo nuū ley un.

² Sáha ró cuenta jijnáhan ró, chi ruhū Pablo cahán rī jíin ró jeē núu squícu ró ley circuncidar, yūcuán na te tu níhín jniñu cuiñi jeē ní candíje ró jéē ni jíhī Cristo jehē rō.

³ Te inga jínu cáhán nihin rī jíin táca téē cánducú cuu circuncidar, jeē núu súcuan te suni cánuú jéē squícu de ndívii cuiñi gā jnúhun cáhán ley Moisés.

⁴ Róhó jéē cánducú ró quendōo ndaā rō jeē squícu ró ley un, je ni casiáá rō Cristo núu súcuan. Je ni castóo ró jnúhun jeē ndahva yā cuēchi ró síquī jeē cundáhú ni Yaā Dios rohó.

⁵ Te máá yó chi cájica yó jíin Espíritu, te cándíje yó jéē ní ndahva yā cuēchi yó, te jeē yúcuan ñúhun ni yō jeē quendōo ndaā yō quivī cuiñi yó núu Yaā Dios.

⁶ Chi yóhó jéē cáyihī ndaha Cristo Jesús, vésú núu jeē cúu yó circuncidar chí tu cúu yó, tú na vé níhín jniñu. Jeē nihín jniñu cúu jeē candíje yó jeē sáha ya jehē yō. Te yūcuan sáha jeē cundáhú ni yō jnáhan yó.

⁷ Vāha ni cacandíje ró núu. ¿Te ndé ñn ni jesi jeē tuá cájetáhú ró jnúhun ndaā núu súcuan?

⁸ Jnúhun jeē ní cascáhan de róhó, chí tú vēji nuū máá Yaā ní cana róhó ní quivīcoo ró ndaha ya.

⁹ Te ma náā ni rō jeē téē cástáhú róhó, jnúhun cástéén de cúu nájnūhun levadura,

chi vésú jecu-ni levadura, te ndáa ndihi ñujen sáha.

¹⁰ Te cúcáhnū ni rī jeē máá Jítóho yō sáha ya jeē ma cándíje ró jíináhan ró inga jnúhun jeē sún cáhán. Te máá Yaā Dios cuāha ya castigo téē jeē sáca núu xinī rō, núu na-ni téē cúu de.

¹¹ Te ruhū, hermano, núu jeē nácani ga rī jnúhun ley circuncidar nde vijna, te jnáhan rī ñayuu hebreo ma cóto xeēn i ruhū nuū. Chi ma quiñi ni i jeē nácani rī jnúhun jeē ni jíhī Cristo jicā cruz, núu jeē súni nácani rī jnúhun circuncidar nuū.

¹² Te tāca téē jeē sáca núu xinī rō síquī jnúhun ún, vāha ga na cáhnde gā de máá de núu súcuan.

¹³ Chi máá ró jijnáhan ró hermano, ni cana ya rohó návāha coo libre rō nuū ley un. Te vésú iyó libre rō, te ma cáni ni rō jeē cúu quivīcoo ró táca cuēchi jeē cúu modo neé cúní máá ró, chí sa suhva na sáha ró máá ró mozo jeē chindéé ñáhán ró jnáhan ró síquī jeē cundáhú ni rō i.

¹⁴ Chi je ni squícu ró ndihi ley núu squícu ró ñn-ni jnúhun ndácu jniñu yáha: Cundáhú ni rō jnáhan ró nájnūhun cundáhú ni rō máá ró, achí.

¹⁵ Te núu máni jeē ndónnda xeēn rō síquī jnáhan ró jéē cuajnáhan ró, te coto ma snáā rō jniñu jeē ni sáha ya mēhñu ró jijnáhan ró.

Modo cuní ñayuu tu cándíje jíin modo sáha Espíritu

¹⁶ Súcuan cáhán rī jíin ró jijnáhan ró: Caca ró nájnūhun cúní máá Espíritu, te yūcuán na te ma sáha ga rō modo jeē cuní máá ró.

¹⁷ Chi táca jéē cuní máá yó, yūcuan jési nuū jeē cuní máá Espíritu. Te jeē cuní Espíritu, jési nuū modo neé jéē cuní máá yó. Te jeē ndíndúú yáha chí cájesi nuū jnáhan, te jeē yúcuan tu cúu sáha ró jniñu vāha jeē cuní rō sáha ró.

¹⁸ Te núu máá Espíritu steén nuū rō, núu súcuan te tuá cáyihī ró chíji ley jenahán.

¹⁹ Te iyó ndijin tācá jniñu cásáha ñayuu cájica jíin modo neé máá, te yāha cúu: Cásíquí ndéē jnáhan i, cásáha i jniñu jnéhén, cásáha neé ndasí i.

²⁰ Cáchiñúhún i ídolo, cásáha tásí i, cájito uhū jnáhan i, cájejnáhan i, cácuquíñi ni i. Te

yachī cáquitī ni i, te cándihvī ni i jeē cúu máa-ni i, te cátejnahān i cásásin i máa i.

²¹ Te cáccucésún ni i, cájehni i ndīyī, cánajīni i, cásáha i vico neé, jíin táca gá jeē súcuan. Te cáhān nīhin ri jíin ró, nájñūhun je ni cahān rī jíin ró saá, jeē ñáyuu casáha súcuan, ma nihín tahu i quīvīcoo i ñuu nuū ndácu Yaā Dios jniñu.

²² Te ñayuu jeē nduú i jíin Espiritu, tācá jniñu yáha sáha ya jíin i: Jeē cundáhú ni jnāhan, jeē cúsiñ ni, jeē iyó ndeyí sñ ni, jeē iyó paciencia, jeē maní ni, jeē váha ni, jeē squícu vāha,

²³ jeē tu sáha jeē cujéhnū, jíin jéē jési modo jeē cuní maá. Te tú na ley cacān cuēchi siquī rō núu sáha ró táca jniñu yáha.

²⁴ Te ñayuu cáyihī ndaha Cristo, nájñūhun je ni cajehni i modo neé máa i jicā cruz, nde jíin táca jéē ndíyo neé ni i te cútīndí i.

²⁵ Te jeē súcuan ni jēhe máa Espiritu in vida jeé núu yō, te suni na cáca yó jíin modo steén Espiritu.

²⁶ Te ma sandúxí yó jéē squití ni yō jnāhan yó, te ni ma cucuésún ni yō siquī jnāhan yó.

Jñūhun jeē chindéé ñáhán yó jnāhan yó

6

¹ Hermano, núu in jnāhan ró ni sáha cuēchi, te rōhó jéē cájica jíin Espiritu, na náchuhun ichí ró i. Te jíin jñūhun vītá cahān rō jíin i, te suni condito ró máa ró jeē ma cacān ini rō sáha ró táca cuēchi.

² Te chindéé ñáhán ró jnāhan ró núu na vé cúu jeē ndóho i, chí súcuan cúu jeē squícu ró ley Cristo.

³ Chí núu in ñayuu jéni ni i jeē ñáyuu teyí cúu i, vēsú nasūu súcuan cúu, te stáhú i máa i núu súcuan.

⁴ Te tācá in in ró na cóto ndee rō ndese cáa jniñu sáha ró. Te núu vāha sáha ró, yūcuán na te cuu cusñ ni rō jíin jéē sáha máa ró, te tu níni jéē scāni jnāhan ró máa ró jíin jnāhan ró.

⁵ Chí tācá in in yó cánuú squícu yó jíin jniñu ní jéhe ya nuū maá yó.

⁶ Te rōhó jéē cascuáha jñūhun vāha ya, na chindéé ñáhán ró tēe cástéén nuū rō jíin táca jéē váha cánevāha ró.

⁷ Ma stívī ró cani ni rō jeē cuu sáha ró cuēchi. Chí ma cúu sácata rō nuū Yaā Dios

cani ni rō jeē tu sáha ya cuenta. Chí tāca núu ndese sáha ñayuu, suu yūcuán nanihīn i.

⁸ Chí ñayuu jeē sáha i jeē cuní modo neé máa i, nihīn i jeē jnahnú ndetū i sáha modo jeē cuní maá i ún. Te ñayuu jeē sáha jeē cuní maá Espiritu, chí nihīn i jeē cótecu i nñí cáni andívī sáha Espiritu.

⁹ Te ma cuíta yó jeē sáha yó jniñu váha núu súcuan, chí jeē quée maá quívī te nanihīn yō, te núu ma cuíta yó.

¹⁰ Núu súcuan te tāca jínu jeē cúu sáha yó, te na sáha vāha yó jíin táca ñáyuu, te hermano yō jeē cácan dije cúu jeē cánuú gá.

Saludo jíin jñūhun cástūhun Pablo jeē sándīhí

¹¹ Condēhe ró jeē náhnū letra tēe ri cuajeē nuū rō jijnāhan ró, chí ndaha máa rí tēe ri yāhá.

¹² Te tēe jeē casáfuerza de rōhó cuu ró circuncidar, cásáha de siquī jeē cácuñi de cuajñūhún ñáyuu de. Te cásáha de návāha ma cóto xeēn ñayuu de jeē cáncani de jñūhun jeē ni jíhī Cristo jehē yō.

¹³ Te ni máa de jeē casáha de circuncidar, suni tu squícu vāha de ndihī ga ley jenahán. Te cácuñi de jeē cuu ró circuncidar, návāha cuu sátéyí de máa de núu quihin ró jñúnī circuncidar sáha de.

¹⁴ Te ruhū tu cuní rī sátéyí rí maá rí siquī ní in jeē yúcuan, chí máa in-ni siquī jeē ní jíhī Jitoho yō Jesucristo jicā cruz. Chí siquī yūcuán cúu nájñūhun ni jíhī rī, chí ni siaá rī tāca jéē iyó ini ñayívī, te suni nájñūhun in ndīyī cúu ri nuū ñayívī.

¹⁵ Chí núu yñhī yó ndaha Cristo Jesus, te tu níhín jniñu núu cúu yó circuncidar chí tuú. Chí jeē níhín jniñu cúu jeē ní nasájeé yá anuá yō.

¹⁶ Te ñūhun ni rī jeē tāca ró jeē jíca ró jíin modo yáha, na sáha ga yā jeē coo ndeyí coo sñ ni rō, te cundáhú ni yā rohó. Te suni ñūhun ni rī jeē súcuan sáha ya jíin táca gá i jeē cúu ndije i ñayuu cácan dije Yaā Dios.

¹⁷ Te vijna jíin nñí gá cuahān yō, cuní rī jeē ma stáhān gā ni in ñayuu ruhū. Chí yiquí cúñu rī ndíso seña jeē ní tújī rī ni ndoho ri jeē cúu ri mozo maá Jitoho yō Jesús.

¹⁸ Hermano, ñūhun ni rī jeē na sáha ga Jitoho yō Jesucristo jeē váha rōhó jíjnāhan ró. Súcuan na cóo. Amén.

CARTA JEE NI TEE APOSTOL SAN PABLO NUU ÑAYUU ÑUU EFESO

¹ Máá rí cúu Pablo, apóstol Jesucristo, chi súcuan ni nujnahan ni Yaā Dios ni tají yá ruhū. Te téé ri carta yáha cuájeē nuū rohó ñáyuu ñuu Efeso, jeē cácuu ró ñáyuu maá yá jeē cácañdije ró Cristo Jesús.

² Te ñúhun ni rí jeē Tatá yō Yaā Dios jíin Jítóho yō Jesucristo, na sáha ga yā jeē váha röhó, te sáha ya jeē coo ndeyí coo sī ni rō.

Jeē sáha Cristo jeē quéndōo váha ánuá yō

³ Na cáhán yō jeē yóhyo cújéhnū Yaā Dios, Yaā cúu Tátá Jítóho yō Jesucristo. Chi ni jēhe ya táca jéē váha íyó andiví jéē quéndōo váha ánuá yō, chi yíhi yó ndaha Cristo.

⁴ Chi nde ná tu jecōo ñayiví te ni nacāji ya yohó jéē quíví yó ndaha Cristo, návāha coo ndoo ánuá yō te caca ndaā yō nuū yā.

⁵ Je ni cundáhú ni yā yohó nde saá, te ni tana ya yohó jéē náquihin séhe ya yohó. Te jíin Jesucristo ni sáha ya súcuan, chi ni nujnahan ni yā sáha ya.

⁶ Te jeē yúcuan níni na cáhán yō jeē yóhyo cújéhnū ya, chi yóhyo váha ni sáha ya yohó jíin táca jéē váha ni yā, siquī jeē yíhi yó ndaha Cristo, Sēhe ya jeē maní yā jíin.

⁷ Te siquī jeē yóhyo váha ni yā jíin yó, te Sēhe ya un ní jnama ya yohó jéē ni jíhī yā jehē yō, te ni ine cáhnu ni yā nuū cuéchi yó.

⁸ Te ni steén yā jeē cundáhú ndasí ni yā yohó, te ni sáha ya jeē jécūhun ni yō te cundíchí yó jíin jnúhun ya.

⁹ Te ni sáha ya jeē cuni yō ñn jnúhun ya jeē ní yisáhí, jeē tu ní sáha ya jeē cuni ñayuu jenahán. Chi súcuan ni tee ni yā nde saá, te nujnahan ni yā sáha ya.

¹⁰ Te yáha cúu jnúhun ún: Nde na queé tiempo te sáha ya jeē ndíhi jeē yúcu andiví jíin jéē yúcu ñayiví, ñnuú-ni nduu, quihi ndaha Cristo.

¹¹ Te siquī jeē yíhi yó ndaha Cristo, te nihīn yō tahū yō, chi je ni nacāji Yaā Dios yohó nde saá. Chi súcuan ni tee ni maá yá, chi sáha ya táca-ni jeē jé ni cundaā ni yā jeē nujnahan ni yā sáha ya.

¹² Súcuan ni sáha ya návāha máá rí jeē xíhna gā ni cacandije ri Cristo, caca ndaā rí te súcuan sájéhnū ri yā jeē yóhyo luu cújéhnū ya.

¹³ Te suni máá ró jijnáhan ró, ni cajini ró jnúhun ndaā jnúhun váha jeē jnáma ya rohó, te ni cacandije ró Cristo. Te ni canihīn rō Espíritu Santo jeē ni jéjnūhun ya jeē cuáha ya. Te ndéé Espíritu yā ún ini anuá yō, te cúu ya nájnūhun sello jeē steén jeē cúu yó séhe Yaā Dios.

¹⁴ Te sáha ya jeē jiní ndije yó jéē cucuéé gá te cuáha Yaā Dios tahū yō, nde na sínu ya jniñu jeē jnáma ya ñayuu yā. Te quiví ún cahān yō jeē cújéhnū ya, chi yóhyo luu cújéhnū ya.

Jeē jicán tahú Pablo jehē ñáyuu cácañdije

¹⁵ Te ruhū ni jini jnúhun ri ndese cácañdije ró jéē ni sáha Jítóho yō Jesús jehē rō, jíin ndese cácañdáhú ni rō ndíhi ñayuu cáyihī ndaha Yaā Dios.

¹⁶ Te jeē yúcuan tu jécuiñí rí jeē nácuatáhú rí jehē rō, te jeē jicán tahú rí te tu náā ni rí cacān tahú rí jehē rō.

¹⁷ Chi jicán tahú rí jeē na sáha Yaā Dios jeē jécūhun váha ni rō te ndundíchí ró jíin jnúhun ya, te cuni gā rō ndese Yaā cúu ya. Chi máá yá cúu Yaā Dios Jítóho yō Jesucristo, te cúu ya Tatá yō jeē lúu ndasí cújéhnū.

¹⁸ Te jicán tahú rí jeē na sándijin gā yā nuū jeē níjnūní rō, návāha jécūhun ni rō ndese cáca ndíhi jeē cáñuhun ni rō nihīn rō siquī jeē ní cana ya rohó. Te jécūhun ni rō ndese cúca cácuu ró jíin táca jnúhun jéhnū luu ndíso jnúhun ya jeē cúu ñayuu maá yá.

¹⁹ Te jicán tahú rí jeē na jécūhun ni rō ndese yóhyo jéhnū poder yā jeē sájniñu ya ini anuá yohó jéē cúu yó ñáyuu cácañdije. Chi tu ndíhi cuíti poder yā.

²⁰ Te suu poder un cúu jeē ni steén yā ná ni sáha ya ñn jniñu jéhnū ga jeē ní nastécu yā Cristo mēhñu ndíyí te ni scúcōo ya lado váha ya nde andiví.

²¹ Te ni jeni ya Cristo siquī táca jéē cújéhnū, jíin jéē ndíso jniñu, jíin jéē jnñi poder, jíin jéē ndácu jniñu, jíin siquī táca jeē cácahān ñayuu jeē cújéhnū, cúu tiempo yáha, cúu tiempo quiji.

²² Te ni jēhe ya jeē cujéhnú Cristo síquī ndivii. Te ni sáha ya jeē cúnuú yá cujéhnú ya nuū ñáyuu cá candíje.

²³ Te ñáyuu cá candíje un cá cuu i nájñuhun yíquī cúñu ya, chí ñn na cúu i jíin yá te ñúhun chitú yá ini anuá i, chí Yaā jeē ñúhun chitú ñí cá hnu-ni cúu ya.

Ni cá cu yó síquī jeē ní cundáhú ni yā yohó

2

¹ Te ni sáha ya jeē cotecu rō ñí cáni jíin Cristo. Chí je ni cacuu ró nájñuhun ndíyī nuū yā, ni sáha cuēchi ró jíin jniñu néé ní casáha ró.

² Chí ni cajica ró jíin jniñu yúcuán nde saá, ná ni cacondiquīn rō jniñu ñáyuu ñayívi, ná ni cajetáhú ró núu jexeén jeē ndácu jniñu nuū táca táchī xeén, te jíca nuū tachí. Te suu cúu jeē scánda ini ñáyuu ñihni ni nuū Yaā Dios.

³ Te máá rí jijnáhan ri, suni súcuán ni cajica ri, chí ni casáha ri jniñu néé jéé cuní máá rí, jíin táca jéé jicán yíquī cúñu rí, jíin jéé cájeni néé ni rí nde saá. Jeē yúcuán suni ni cacuu ri ñáyuu jeē ñihñ castigo xeén jeē cuáha ya nuú, chí ñnuú-ni ni casáha ri nájñuhun casáha máá i.

⁴ Te Yaā Dios chí yōhyo cuehē ni cundáhú ni yā yohó, te vāha ndasí ni yā jíin yó.

⁵ Te náa cúu yó nájñuhun ndíyī nuū yā ni sáha cuēchi yó, te ni nastécu yā yohó jéé cótecu yō ñí cáni jíin Cristo. Chí síquī jeē yóhyo vāha ni yā cúu jeē ní jnama ya yohó.

⁶ Te ni nastécu yā yohó jéé cótecu ñnuú yó jíin Cristo Jesús, te scúcōo ya yohó jíin yá nde andiví.

⁷ Súcuán ni sáha ya návāha ñí gá tiempo jeē quíji, te stéén yā ndese yōhyo manī yā jíin yó, jíin ndese vāha ni yā jíin yó jeē síquī Cristo Jesús.

⁸ Chí síquī jeē yóhyo manī yā jíin ró cúu jeē ní jnama ya rohó, chí ni cacandíje ró jéé sáha ya jehē rō. Te nasūu síquī jeē ní casáha máá ró cúu, chí tahū jeē ní jéhe ya nuū rō cúu.

⁹ Chí tú na jniñu vāha ní casáha yó jéé jnáma ya yohó, te jeē yúcuán ni ñn yó ma cúu sátéyí yó máá yó.

¹⁰ Chí cúu yó ñn jniñu luu jeē ní nasáha máá yá, chí ni nasáha ya yohó jéé cundúu yó jíin Cristo Jesús, návāha sáha yó táca

jniñu vāha jeē jéé ní sátúhva Yaā Dios jeē sáha yó.

Jeē sáha Cristo jeē ndívi yó núu jnúhun manī Yaā Dios jíin yó

¹¹ Núu súcuán te na núcūhun ni rō ndese ñáyuu ni cacuu ró ndé saá. Chí tu ní cá cuu ró ñáyuu hebreo, chí sa suhva ni cacuu ró ñáyuu táca nación jeē tu jíin jnúhun ya. Te ñáyuu hebreo jeē casáha circuncidar yíquī cúñu, ni cacahān i jeē cá cuu ró ñáyuu tu sáha circuncidar.

¹² Na núcūhun ni rō jeē ndé saá tu ní cáhñin ró jíin Cristo, te ni cacuu ró ñáyuu ñuu jicá núu nación Israel. Te tu ní cájini rō táca jnúhun contrato jeē ní jéjñuhun Yaā Dios. Te tu ní íne Yaā Dios jíin ró ñayívi yáha, te tú na vé jeē vāha ní cáñuhun ni rō jeé cóo.

¹³ Te vijna chí ni ndívicoo ró núu Yaā Dios jeē tu ní cájini rō jnúhun ya nde saá, chí ni quívicoo ró ndaha Cristo síquī jeē ní jíin yā jehē rō.

¹⁴ Chí Cristo cúu Yaā sáha jeē ndúmanī jnáhan yó. Chí ni sáha ya jeē ñáyuu hebreo jíin ñáyuu táca gá nación, ni nduu yó ñn na nuū yā. Chí ni sáha ya jeē tuá jíto uhū jnáhan yó, te suu cúu nájñuhun jeē ní jenu ya ñn jeē ndihyú sava mēñu yó jeé sásñn yohó.

¹⁵ Chí ni socō yā máá yá ni jíin yā, te súcuán ni ndahva yā ley jenahán jíin jnúhun ndácu jniñu jíin jéé tajnúni ndíso máá. Chí ley un ní sásñn ñáyuu hebreo jíin táca nación jeē tu ní jíin i ley un. Te ni nasquíjnan ya ndíhi yó jéé ní nduu yó ñn na nación jeé, yíhi yó ndaha ya. Te súcuán ni sáha ya jeē ní ndumanī jnáhan yó.

¹⁶ Te jíin jéé ni jíin yā jicá cruz, te ni snáa yā jnúhun cájito uhū jnáhan ñáyuu hebreo jíin táca gá nación. Te ni sáha ya jeē ndívicoo yó núu jnúhun manī Yaā Dios jíin yó, te ni nduu yó ñn na ñáyuu máá yá.

¹⁷ Chí ni quíji Cristo ni nacani ya jnúhun vāha nuū táca ñáyuu jeē na ndívi i nuū jnúhun manī yā jíin i, cúu rōhó ñáyuu tu ní cájini jnúhun ya, te suni ñáyuu jnáhan ri hebreo jeé cájini jnúhun ya.

¹⁸ Te vijna te síquī jeē ní jíin Cristo, te ndíhi yó, cúu ñáyuu hebreo chí ñáyuu táca gá nación, cuu quívicoo yó núu Tatá yō Yaā Dios, te ñn-ni Espíritu yā sáha.

19 Núu súcuan te tuá cúu ró nájñūhun ñayuu ñuu jicá ni ñayuu tatú, chi ñn na ni nduu ró jíin ñáyuu ñuu maá yá. Te jñáhan ñayuu vehe Yaā Dios cácuu ró.

20 Te cácuu ró nájñūhun ñn ñn parte ñn vehe cáhnu jeē cúvāha siquī cimientu, te cimientu un cúu jñūhun Cristo jeē ní canacani tēcá apóstol jíin tée ni canacani jñūhun ya jenahán. Te máá Jesucristo cúu nájñūhun yuū cánuú gá jeē yítuu vehe.

21 Te ní vehe cúvāha vāha siquī maá yá, cúsucún cuáhān, cúu ñn templo iī jeē ndeé maá Jítóho yō.

22 Te suu cúu máá ró jijnáhan ró, chi ndúú ró jíin Cristo, te inuú-ni sáma ya rohó jíin táca ñáyuu cácanđije, cácuu ró nájñūhun ñn ñn yuū templo. Te suu cúu jeē ndeé Espiritu Yaā Dios ini rō nájñūhun ini ñn templo.

Jeē ndíso jñíñu Pablo nácani de jñūhun nuū ñáyuu tu jíin jñūhun Yaā Dios

3

1 Te jeē yúcuan ruhū Pablo, jícán tahu rī nuū yā. Te íne ri vecāa siquī jeē ní nacani ri jñūhun Cristo Jesús nuū rohó ñáyuu tēcá nación jeē tu ní jíin jñūhun ya nuū.

2 Te jíin rī jeē ní cajini ró jñūhun ndese yōhyo vāha ni sáha Yaā Dios jíin rí, chi ni jēhe ya jñíñu nuū rī jeē nácani ri jñūhun vāha ya nuū rō.

3 Te jñūhun ya jeē ní yisāhí, ni nastúu ya nuū rī, nájñūhun je ni tee ri jecu siquī un núu rō.

4 Te núu na cáhu ró te cuu jecūhun ni rō jeē ní jini vāha ri jñūhun Cristo jeē ní yisāhí un.

5 Te tu ní steén yā jñūhun sāhí un núu ní ñn ñayuu táca cuiyā ní quiji ichi yátá. Te vijna cúu jeē steén ndijin yā jíin Espiritu yā nuū tēcá apóstol jeē ní jeni ndoo ya, jíin núu tée canacani jñūhun ya.

6 Te súcuan cáhān jñūhun ní yisāhí un: Ñayuu táca gá nación, ñn cáhnu-ni nihīn i tahu i jíin ñáyuu hebreo, chi ni cacandije i jñūhun jeē jñáma ya i. Te inuú-ni ni nduu ndihí i, te ñn cáhnu-ni quéndōo ndetū anuá i sáha Cristo, nájñūhun ni jeññūhun Yaā Dios.

7 Te jeē siquī jñūhun yáha cúu jeē ní jeni ya ruhū jeē nácani ri jñūhun nuū rō. Chi ni cutahū rī jñíñu luu yáha jeē ni jēhe ya nuū rī. Te jíin poder yā ni sáha ya un jíin rí.

8 Te ruhū chi cúu ri tēe núu ga nuū tāca ñáyuu núu ga jeē yíhi ndaha ya. Te vēsú súcuan te nuū maá rí ni jēhe ya jñíñu luu yáha jēe nácani ri jñūhun vāha ya nuū ñáyuu tēcá nación jeē tu jíin, ndese yōhyo cúcá yó ndihí jeē ndíso jñūhun Cristo, jeē ma cánda cuiñi yō jecūhun ni yō.

9 Chi ni jeni ya ruhū jeē steén cají rí jeē suni máá i jnama ya i. Te yúcuan cúu jñūhun Yaā Dios jeē ni yisāhi ndé jenahán ndasí, chi máá yá ni sáha ndihí-ni.

10 Te súcuan ni sáha ya jíin ñáyuu, návāha vijna te táca jēe cácujeñnu jíin jēe ndíso jñíñu nuū sucún, na cúni ndese ndíchí ndasí Yaā Dios. Chi ndíchí ndasí ni sáha ya jíin ñáyuu cácanđije.

11 Chi súcuan ni tee ni yā nde ní cáni, te ni sáha ya jeē Jítóho yō Cristo Jesús ni squícu ya ún.

12 Te siquī jeē ni sáha Cristo, te vijna te jíin ndije yó jēe cúu quívi yó cáhān yō jíin Yaā Dios siquī jeē candije yó Cristo.

13 Núu súcuan te cáhān ndahú rí jíin ró jeē ma cucuíhyá ni rō siquī jñūndóho jeē ndóho ri jehē rō. Chi suu sáha jeē quéndōo ndetū anuá rō jijnáhan ró.

Cristo yōhyo cúndáhú ni yā yohó

14 Te jeē yúcuan cúu jeē jécuiñi yítí rí nuū maá Yaā cúu Tátá Jítóho yō Jesucristo.

15 Te máá yá cúu Tátá nuū ndihí ñayuu yā jeē yúcu andívi jíin ñáyívi.

16 Te jícán tahu rī jeē jíin poder yā jeē cujeñnu ndasí yá, na sáha ya jeē íje vāha ni rō jíin jñūhun ya, te coo fuerza ini anuá rō, sáha Espiritu yā.

17 Te jícán rī jeē candije nihin ró Cristo, návāha condee yā ini anuá rō, te jñi vāha ró jñūhun jeē cundáhú ni yā rohó, te cuiñi nihin ró jíin.

18 Te súcuan te cuu jecūhun vāha ni rō jíin táca ñáyuu candije, ndese cáa jñūhun cúndáhú ni Cristo yohó. Chi yōhyo jité, cáni, cúnú, súcún jñūhun ún, chi yōhyo cuehe sáha.

19 Te jícán rī jeē na cúni vāha ró ndese cúndáhú ni yā yohó, vēsú tu cúu cuiñi jecūhun ni yō ndihí ndihí. Te súcuan te cundúú ró jíin Yaā Dios jeē cunuú yá ini anuá rō.

²⁰ Núu súcuan te na cáhán yō jeē yóhoyo luu cújéhnú ya, chí máá yá cúu Yaā iyó poder jeē sáha ya jeē váha ndasí gá vésú ndíhi jeē jicán yō chí jéē jéni ni yō. Te sáha ya un jíin poder yā jeē sájniñu ini anuá yō.

²¹ Te na cáhán yō jeē yóhoyo luu cújéhnú ya jeē siquí jeē ni sáha ya jehē ñayuu cá candíje jíin jéē siquí Cristo Jesús. Te súcuan na cóo nde ní cáni cuiti tiempo jeē quíji. Amén.

Inuú-ni cácuu ñayuu cá candíje sáha Espíritu

4

¹ Te ruhū jeē íne ri vecāa siquí jnúhun maá Jítóho yō, cáhán ndahú rí jíin ró jeē na cáca ndaā rō nájnūhun cánuú caca ró jéē cácuu ró ñáyuu ni cana ya.

² Te níni na cóo suchí ni rō, te coo vītá ni rō. Te na cóo paciencia rō, te cuandeyí ni rō jíin jnáhan ró jéē cundáhú ni rō i.

³ Te na cóndihvī ni rō coyūcu mánī inuú ró, sáha máá Espíritu nuū véji jnúhun manī ni.

⁴ Chí ñn-ni cácuu ñayuu maá yá, te íyó ñn-ni Espíritu, te inuú cáñūhun ni yō jeē cóo jeē váha siquí jeē ní cana ya yohó.

⁵ Te íyó ñn-ni Jítóho yō, jíin ñn-ni jnúhun cándíje yó, jíin ñn-ni jnúhun jéndute yó.

⁶ Te íyó ñn-ni Yaā Dios jeē cúu Tátá yō jijnáhan yó. Te máá yá cujéhnú siquí ndíhi yó, te sájniñu ya jíin ndíhi yó, te ndéé yá ini ndíhi yó.

⁷ Te tēcá ñn ñn yó ní cacutahū yō sñn sñn jniñu sáha yó, núu ndese ni tana Cristo cūhva tahū un núu yō.

⁸ Jeē yúcuan cáhán tutu iī:

Ná ni ndaa ya cuanuhun yā andiví, te ni stutú yá cuehē jeē yíndihyū, cuahān yā jíin.

Te ni saja ya tahū nuū tēcá ñáyuu.

⁹ Te jeē cahán tutu jeē ní ndaa ya, suni cúní cahān jeē xīhna gā nde andiví ni cuun ya nde nuū cunú gá ñayvī yáha.

¹⁰ Te Yaā ní cuun, suni máá yá cúu jeē ní ndaa nde nuū sucún gá andiví, návāha cūhun chitú yá ní cáhnu-ni.

¹¹ Te ni tana ya sñn sñn jniñu sáha ñayuu. Chí ni jeni ya sava ñayuu cuu apóstol, te sava ga nacani jnúhun ya, te sava ga scándíje ñayuu jnúhun jeē jnáma ya i, te sava

ga coo pastor condito ñayuu cá candíje, te sava ga steén.

¹² Súcuan ni jeni ya ñayuu maá yá jeē cuajniñu i nuū yā, návāha cuehnu ga ñayuu Cristo jíin jnúhun ya.

¹³ Te súcuan coo nde nduu inuú-ni ndíhi yó jíin jnúhun cándíje yó, te cuni vāha yó ndese Yaā cúu Sēhe Yaā Dios. Te súcuan ije vāha yó ndé na cúchitú yó jíin ndíhi jnúhun jeē ñúhun chitú ini Cristo.

¹⁴ Te súcuan te ma cóo ga yō nájnūhun sūchi lúli jéē yachī jéni yāha jéni yūcuán ni i, ni ma quívī nduu yō cháha chúcuan jíin sñn sñn jnúhun jeé cástéén tēe stáhú jéē yóhoyo ndito de squívī de yóhó nuū jnúhun stáhú.

¹⁵ Chí sa suhva na cóndiquīn yō jnúhun ndaā jíin jnúhun cúndáhú ni. Te súcuan cuehnu yó jíin tēcá jniñu cúní Cristo, Yaā cujéhnú nuū ñáyuu cácuu nájnūhun yiquí cúñu yā, chí ñn na cúu i jíin yá.

¹⁶ Te sáha ya jeē nduu inuú ni tēcá i jeē cáhije i cuahān i, chí cácuu i nájnūhun ñn na yiquí cúñu jíin yá. Te jéjníñu vāha tēcá ñn ñn i ndese ni nihīn jniñu i, návāha scuéhnu jnáhan te ije jijnáhan jíin jnúhun cúndáhú ni.

Jeē ndújeé yó sáha Cristo

¹⁷ Núu súcuan te yāha cúu jnúhun cáhán rī jíin ró, te jeē achí Jítóho yō cúu jeē cahán nihīn ri jíin ró: jeē ma cáca ga rō nájnūhun cájica sava ga ñayuu jeē tu jíní i ndese Yaā cúu Yaā Dios, chí cájica i jíin jnúhun jeē jéni sáa-ni máá i.

¹⁸ Te íyó nee nuū jeē níjnūnī i, te tu névāha i Espíritu jeē véji nuū Yaā Dios, chí tu jíní i jnúhun ya, siquí jeē níhni ni i.

¹⁹ Te tuá cúcanu i, chí ni quvīcoo i jíin jniñu néé ndasí, te ndíhvī ní i sáha i tēcá jniñu jnéhén.

²⁰ Te róhó jijnáhan ró, nasūu súcuan ní cáscuáha ró jnúhun Cristo,

²¹ te núu ndaā jeē ní cajini ró jnúhun ya jíin jéē ní cacutūhva ró jíin jnúhun ndaā Jesús.

²² Núu súcuan te na stóo ró tēcá jniñu ní casáha ró ichi yátá, ná ni casáha ró modo cuní maá ró jeē ní cujnéhén ánuá rō ni sáha jniñu néé stáhú jéē ní ndiyo ni rō.

²³ Te na ndújeé ánuá rō jíin jéē níjnūnī rō.

24 Te na cuáha ró jnúhun ndujeé ró, chi nasáha Yaā Dios rohó nájnūhun cúni maá yá jeē cáca ndaā rō jíin jniñu váha jniñu ndoo.

25 Núu súcuan te ma cahán gā rō jnúhun stáhú, te na cáhán ndaā rō jíin táca jnáhan ró, chi ñn-ni cácuu ndihí yó.

26 Núu vēji ñn jeē squití ni rohó, te ma quití neé ni rō. Te ma quití ni rō nde quee niāndii.

27 Ma cuáha ró jnúhun jeē sáha jexeén jeē quívi ró cuéchi.

28 Ñayuu ní sacuíhná, ma sacuíhná gá i, chi sa suhva na sájniñu i, te na cócuu i jíin jniñu váha, návaha nihín i jeē cuáha i nuū ñáyuu cúmanī nuū.

29 Ni ñn jnúhun néé ma cahán rō, chi sa suhva na cáhán rō jnúhun vāha jeē scuéhnu jnáhan jíin jnúhun ya, te sáha jeē quéndō vāha ñayuu jíni sōho.

30 Ma sáha ró cuéchi návaha ma cucuíhyá ni Espíritu Santo Yaā Dios. Chi Espíritu yā cúu nájnūhun sello jeē steén jeē cúu yó séhe Yaā Dios, nde quiji quívi jínu jniñu jeē jnáma ya rohó.

31 Te na siáá rō táca jnúhun cútucu ni, jíin jnúhun xeén ni, jíin jnúhun quití ni, jíin jnúhun cáhán ndevāha, jíin táca jnúhun néé.

32 Chi sa suhva na cóo vāha ni rō jíin jnáhan ró, te cundáhú ni rō i. Na cóne cáhnu ni rō nuū jnáhan ró, nájnūhun ni ine cáhnu ni Yaā Dios nuū rō siquī Cristo.

Ndese cánuú caca ndaā séhe Yaā Dios

5

1 Núu súcuan te na ndácu ró Yaā Dios, chi cácuu ró séhe ya jeē maní yá jíin.

2 Te níni cundáhú ni rō jnáhan ró, nájnūhun ni cundáhú ni Cristo yohó, te ni socō yā maá yá jehē yō, ni cuu ya nájnūhun ñn londe jeē jeén asñ nuū Yaā Dios jeē ni sócō yā maá yá.

3 Te vijna jeē cácuu ró séhe Yaā Dios, te ni ma sáha ró ni ma ndájnūhun ró siquī jnúhun jíca jnéni, ni táca jniñu jnéhén, ni jnúhun ndíyo ni ndajniñu.

4 Te ni ma cahán rō táca jnúhun sáha jeē cúcanu jnáhan, ni jnúhun cánéé íi, ni jnúhun jeē tu ndé jéjniñu cuítí. Chi táca un tu níhín jniñu. Chi sa suhva na nácuatáhú ró nuū Yaā Dios.

5 Chi je cájini rō jeē ní ñn ñayuu cájica jnéni, ni jeē sáha jniñu jnéhén, ni jeē ndíyo ni táca ndajniñu, ma nihín tahu i quívi i ndaha Cristo jíin Yaā Dios jeē ndacu ya jniñu nuū i. Chi táca jéé ndíyo ni i cúu nájnūhun ídolo i jeē cáchiñúhún i.

6 Te coto ró jéé ma stahú ni ñn i rohó jíin táca jnúhun cáhán saá ni i, chi siquī táca jnúhun néé yáha cúu jeē quíji castigo xeén Yaā Dios nuū táca ñáyuu níhni ni.

7 Ma quívi nduu rō jíin i núu súcuan.

8 Chi táca quívi saá ni coyūcu ró nájnūhun nuū néé, te vijna chi cáyūcu ró jíin luz maá Jítóho yō, cúu jeē cájecūhun ni rō siquī yā. Te na cáca ró nájnūhun cájica ñayuu jeē steén luz yā ini anuá i.

9 Chi jniñu sáha luz yā jíin yó cúu táca jniñu maní ni, jniñu ndaā, jíin jniñu váha.

10 Scuáha ró sáha ró táca jniñu jeē nújnahan ni maá Jítóho yō.

11 Te ma quívi nduu rō jíin táca jeē tu níhín jniñu jeē casáha ñayuu cáyūcu nájnūhun nuū néé. Chi sa suhva stéén rō nuū i jeē tú vāha casáha i.

12 Chi cúcanu yō cahán yō siquī jniñu casáha yuhu maá i.

13 Te luz yā sáha jeē nátūu táca jniñu néé casáha i. Te núu cuatáhú i luz yā te caca i jíin luz ún.

14 Jeē yúcuan cáhán tutu:

Rohó jeē cúhuun ni, jeē nájnūhun quíxi, natahū ni, te quenda ró méhñu ñáyuu jeē cácuu nájnūhun ndíyi.

Te Cristo steén yā luz yā ini anuá rō. Achí tutu.

15 Núu súcuan te coto vāha ró ndese caca yúcún ró. Te ma cáca ró nájnūhun cájica ñayuu canéé, chi caca ró nájnūhun cájica tēe ndíchi.

16 Ma snáa rō tiempo, chi condihvī ni rō jíin jniñu ya, chi íyó cuéhē cuéchi quívi yáha.

17 Núu súcuan te ma cóo néé xínī rō, chi sa suhva na jécūhun vāha ni rō na jniñu nújnahan ni maá Jítóho yō.

18 Te ma nájini ró, chi tiví ró sáha. Chi sa suhva na ndúcú ró jeē cúnuú Espíritu Santo ini anuá rō.

19 Te cahán rō jíin jnáhan ró jíin salmo jíin himno, yaa íi jeē cahán jnúhun ya. Te ini anuá rō cahán rō jíin yá jíin táca yaa, chi

yūcuan cūu jeē jíta ánuá rō nuū yā chíñúhún rō yā.

²⁰ Te níní nacuatáhú rō siquī tācá-ni nuū Tatá yō Yaā Dios te ndacunehen rō síhvi máá Jítóho yō Jesucristo.

Ndese squícu vāha ñayuu cá candíje nuū jnāhan i

²¹ Te cuatáhú rō nuū jnāhan rō síquī jeē cáhīyo yíñúhún rō nuū Cristo.

²² Róhó ñahan cácuu ñasihí, cuatáhú rō nuū yí rō, nájnūhun jétáhú rō nuū Jítóho yō.

²³ Chi yí cújéhnū nuū ñasihí, nájnūhun cújéhnū Cristo nuū yohó ñayuu cá candíje, jeē cácuu yó nájnūhun yiqui cúñu yā, chí ñn na cūu yó jíin yá. Te máá yá jnáma ya yohó.

²⁴ Chi nájnūhun ñayuu cá candíje cájetáhú i nuū Cristo, suni súcuan ñasihí cuatáhú ña ndíhi jeē cahán yí ña.

²⁵ Te róhó tée cácuu yí, cundáhú ni rō ñasihí rō, nájnūhun ni cundáhú ni Cristo yohó ñayuu cá candíje, te ni socō yā maá yá jehē yō.

²⁶ Súcuan ni sáha ya jeē cóo ndoo coo íi yō nuū yā, te ni nacate ya anuá yō jíin jnúhun ya jíin jéē ní jendute yó.

²⁷ Te yóhó ñayuu cá candíje chí cuiñi yó núu yā, te luu cújéhnū yó. Te ma cóndee cuēchi ánuá yō, ni jeē tú luu, ni ñn jeē súcuan, chí sa suhva coo ndoo coo íi yō nuū yā, te tú na vé cumaní gā.

²⁸ Te nájnūhun Cristo ni cundáhú ni yā ñayuu cá candíje, suni súcuan cánuú jéē cundáhú ni yí ñasihí de, nájnūhun cundáhú ni de máá de. Chí téē cundáhú ni de ñasihí de, máá de cundáhú ni de.

²⁹ Chí ni ñn téē tu jító uhū de máá de, chí sa suhva yéji de te ndíto yúcún de máá de. Te suni súcuan sáha Cristo jíin yóhó ñayuu cá candíje nuū yā.

³⁰ Chí cácuu yó nájnūhun yiqui cúñu yā, te ñn ñn yó cácuu nájnūhun ñn ñn parte yiqui cúñu yā.

³¹ Te suu cūu nájnūhun téē jeē stóo de tátá de náná de, te quijnāhan de jíin ñasihí de, te ñn na cūu ndíndúú de.

³² Yóhō jéhnū jnúhun sáhi yáha, te cáhán rī jeē ñayuu cá candíje suni súcuan quijnāhan i jíin Cristo.

³³ Te suni súcuan ná ñn ná ñn rō cundáhú ni rō ñasihí rō, nájnūhun cundáhú ni rō maá rō. Te ñasihí na cūu yíñúhún ña jíin yí ña.

6

¹ Te róhó séhe jíjnāhan rō, cuandije rō núu tatá rō nuū naná rō, chí yūcuan cūu jeē váha sáha rō jéē candíje rō Jítóho yō.

² Chí yāha cūu ñn jnāhan jeē uxí jnúhun ndácu jniñu jeē ni jéhe ya, te xīhna gā jnúhun yáha ndíso tahū: Coó yíñúhún rō nuū tatá rō nuū naná rō,

³ návāha quendōo ndetū rō, te nāhán cotecu rō ini ñayívi yáha. Achí.

⁴ Te róhó tátá jíjnāhan rō, ma squítí ni rō séhe rō, chí sa suhva scuéhnū rō i jíin jnúhun cuandije i, te stéén rō nuū i jeē candíje i máá Jítóho yō.

⁵ Te róhó mozo jíjnāhan rō, cuandije rō núu patrón rō ñayívi yáha, te coo yíñúhún rō te conso íyo rō núu de. Te na sájniñu ndaā sájniñu ndije rō, caní ni rō jeē nuū Cristo cájejniñu rō.

⁶ Ma sájniñu ndúxí rō jeē maá jéē coto de te cuajnúhún de róhó. Chí sa suhva sáha rō cuenta jeē mozo Cristo cácuu rō. Te sáha rō jéē nújnahan ni Yaā Dios nde jíin ini jíin ánuá rō.

⁷ Te na cúsiñi ni rō sájniñu rō, te na cáni ni rō jeē nuū maá Jítóho yō cájejniñu rō, nasūu núu ñayuu.

⁸ Chí je cájini rō jeē jniñu váha sáha ñn ñn rō, te nihín rō yáhu jniñu yúcuan núu maá Jítóho yō, vésú cūu rō mozo chí téē sájniñu máá.

⁹ Te róhó patrón jíjnāhan rō, suni súcuan sáha rō jíin mozo rō, te ma cahán xeēn rō jíin i. Chí na cócuhun ni rō jeē suni máá rō jíin máá i yíhi rō ndaha Jítóho yō, Yaā ndeé andívi. Te tu sáha ya cuenta ndese cūu ñn ñn ñayuu, chí inuú sáha ya jíin i.

Na cúcutú yó jíin táca fuerza Yaā Dios

¹⁰ Te íyó inga jnúhun, hermano jíjnāhan rō. Nducú rō jeē na cóo fuerza ini rō jíin fuerza máá Jítóho yō jeē nduú yá jíin rō, chí íyó téyí poder yā.

¹¹ Na cúcutú rō jíin táca fuerza Yaā Dios, návāha cuu cuiñi níhin rō jéē ma stahú jexeén róhó.

12 Chi nájnūhun jeē cájejnáhan yó jíin táca jeē neé. Te nasūu ñáyuu cúu jeē cájejnáhan yó jíin, chi sa suhva jíin táca táchī cájica nuū sucún. Te yūcuan cúu jeē cácujeñnu, jíin jeē cándiso jníñu, jíin jeē cándacu jniñu nuū ñáyuu ñayīvi yáha jeē nájnūhun cájica i nuū neé.

13 Núu súcuan te na cúcutú ró jíin ndihi fuerza Yaā Dios, návāha cuu cuiñi nihin ró quívi jító ndee jexeén rohó. Te súcuan coo túhva ró jíin táca ndihi jeē cuiñi nihin ró jíin.

14 Núu súcuan te cuiñi nihin ró jíin jnúhun ndaā jeē cúu nájnūhun jeē yíhi nihin sanchíi chíji ró. Te sácutú ró maá ró jíin jnúhun caca ndaā rō, te suu cúu nájnūhun jeē cúcutú soldado jíin sahma cáa jeē ndihyú de.

15 Te níni cotūhva ró nacani ró jnúhun ndeyí jnúhun sīi ni jeē véji nuū Yaā Dios. Te suu cúu nájnūhun jeē chíhi soldado ndijēn jehē de.

16 Te jeē cánuú gá cúu jeē candíje ró jeē iyó yá jíin ró. Te yūcuan cúu nájnūhun jeē túhva ró maá ró yatā ñn escudo. Chi jíin jnúhun cándíje ró un te cuu ndahva rō ndihi jeē tají maá jéxeén, jeē cúu nájnūhun nduva jeē cayú yáñuhūn punta.

17 Te cuiñi ró jíin jnúhun ni jnama ya rohó, jeē cúu nájnūhun ñn lélú cáa. Te cua-jníñu ró jnúhun jeē yosó núu tútu Yaā Dios jeē ni jéhe Espíritu Santo nuū rō. Chi yūcuan cúu nájnūhun jéjníñu soldado espada de.

18 Te níni cácan tahu rō nuū Yaā Dios síquī ndihi-ni, te cahān ndahú ró jíin yá jíin fuerza Espíritu. Núu súcuan te ndito na cóo ni rō, te ma jécuiñi rō jeē cacán tahu rō jehē tāca ñáyuu maá yá.

19 Te suni cahān rō jehē rī, návāha nihīn rī jnúhun cahān rī, te coo téyí ni rī nacani cájí rí jnúhun jeē jnáma ya yohó, suu jnúhun jeē ní yīsāhí un.

20 Chi ni tají yá ruhū jeē jíca ri nácani ri jnúhun ya ún, te jeē síquí un cúu jeē íne ri vecāa. Te na cácan tahu rō jeē coo téyí ni rī cahān rī jnúhun ya, nájnūhun cánuú cahān rī.

Saludo jeē sándihí

21 Tíquico cúu ñn hermano jeē maní yō jíin, te cúu de tēe síquicu vāha chíndéé ñájnañhan jíin rí nuū jníñu maá Jítóho yō. Te

maá de castūhún ndihi ndese cuahān jniñu ri te ndese iyó rí.

22 Jeē yūcuan ní tají rí de cuajeē de nuū rō, návāha cachi de ndese cáhīyo rī, te coo ndeyí ni rō jijnáhan ró sáha de.

23 Te ñúhun ni rī jeē Tatá yō Yaā Dios jíin Jítóho yō Jesucristo, na sáha ya jeē coo ndeyí coo sīi ni tāca rōhó jeē cácuu hermano, te coo maní gā rō jíin yá, te candíje vāha ró.

24 Te ñúhun ni rī jeē na sáha ga yā jeē vāha rōhó jijnáhan ró jeē maní ndije ró jíin Jítóho yō Jesucristo. Súcuan na cóo. Amén.

CARTA JEE NI TEE APOSTOL SAN PABLO NUU ÑAYUU NUU FILIPOS

¹ Máá rí cúu Pablo jíin Timoteo, mozo Jesucristo. Te cátee ri carta yáha cuájeē nuū tāca róhó hermano cáyūcú ñuu Filipos, jeē cácuu ró ñáyuu maá yá jeē cáyihí ró ndaha Cristo Jesús. Te suni cátee ri nuū tée cándiso jniñu cándito róhó, jíin núu tēe cájejniñu mēhñu ró.

² Te cáñuhun ni rī jeē Tatá yō Yaā Dios jíin Jítóho yō Jesucristo, na sáha ga yā jeē váha róhó, te sáha ya jeē coo ndeyí coo sī ni rō.

Jeē jicán tahu Pablo jehē ñáyuu cácañdije

³ Tāca jínu jeē núcūhun ni rī rohó jíjnáhan ró, te nácuatáhú rí nuū Yaā Dios.

⁴ Te náa jicán tahu rī, te níni cúsi ni rī jicán tahu rī jehē rō.

⁵ Chi ni chindéé ñájnáhan ró jíin rí jeē scáca yó jnúhun vāha ya, nde quiṽí ní ca-candije ró te nde vijna.

⁶ Te jíni ndije ri jeē maá Yaā ní squéjéé jniñu váha jíin ró, cocu ya jíin ndé quiṽí ndíji Jesucristo, te sínu ndihí ya.

⁷ Te íyó váha jeē súcuan jéni ni rī siquī tāca róhó, chi yōhyo manī rī jíin ró, te inuú-ni ni sáha ya jeē váha yóhó. Te súcuan cúu vēsú íne ri vecāa chí vēsú cuiñi ri nuū tāca tēe cújéhnu, cahān rī jehē jnúhun jeē jnáma ya yohó jéē jnúhun ndaā cúu.

⁸ Chi Yaā Dios jíni yā ndese yōhyo manī rī jíin ró jíjnáhan ró, nájnūhun yōhyo manī Jesucristo jíin yó.

⁹ Te jicán tahu rī jeē na cáa ga jeē cundáhú ni rō jnáhan ró, jíin jéē na jécūhun ga ni rō te cundichí ró jíin táca jnúhun ya.

¹⁰ Te súcuan te cuu nacāji ró táca jéē váha condiquīn rō, te caca ndaā rō, te ma cóo ni ñin cuēchi siquī rō quiṽí ndíji Cristo.

¹¹ Te súcuan te cayā cuehē jniñu váha jeē sáha Jesucristo jíin ró. Te sáha jeē coo yíñuhún ñáyuu jíin Yaā Dios te cahān i jeē yóhyo luu cújéhnu ya.

Jnúhun jeē técu nduú yó jíin Cristo

¹² Hermano, cúni rī jeē na cúcáhu ni rō jíjnáhan ró ndese ni sáha jnúndóho ni ndoho

ri. Chi ni sáha jeē ni jítē núu ga jnúhun jeē jnáma ya yohó.

¹³ Chi tācá soldado cáyūcú ini palacio, jíin táca gá ñayuu, cájini i jeē íne ri vecāa jeē siquī Cristo.

¹⁴ Te siquī jeē íne ri vecāa, jeē yúcuan cúu jeē vihyá gā nihín ndeyí ni cuehē tācá hermano cácañdije nuū Jítóho yō. Te cáhiyo téyí gá ni de nácani de jnúhun ya, te tu ndé ndínuu ni de.

¹⁵ Te ndaā chi sava tēe cánacani de jnúhun Cristo siquī jeē cuesún ni de jíin jéē nduxí de. Te sava ga de chi sa suhva cánacani de jnúhun ya siquī jeē váha ni de.

¹⁶ Sava de cánacani jnúhun Cristo siquī jeē nducú de jeē váha máa-ni de, te tú ndije de, chi cácuni de jeē nihín gā rī jnúndóho jeē íne ri vecāa.

¹⁷ Te sava ga de chi cánacani de jnúhun siquī jeē cundáhú ni de ruhū, chi cájini de jeē íne ri vecāa siquī jeē cahān rī jehē jnúhun jeē jnáma ya yohó.

¹⁸ Tú na vé sáha núu súcuan, chi tācá-ni modo cascuíté núu de jnúhun Cristo, vēsú núu ndije de chí tuú. Te yáha cúu jeē cúsi ni rī sáha.

Te suni cusī gā ni rī,

¹⁹ chí jíni rī jeē tāca jéē yáha sáha jeē váha ga coo jíin rí, chí cájicān tahu rō jehē rī, te Espíritu Jesucristo chindéé ñáhán yá ruhū.

²⁰ Chi ñúhun ni rī te cúu ndasí ni rī jeē ma sáha ri ni ñin jeē sáha jeē cucanu ri nuū yā. Chi sa suhva coo téyí ni rī cahān rī jnúhun ya, návāha ndujéhnu ga Cristo sáha máa rí vijna, nájnūhun je ni sáha ri ní véji ri, te vēsú na cótecu rī chí vēsú na cúu rī.

²¹ Chi jeē técu rī cúu jeē nduú rí jíin Cristo, te jeē cúu rī cúu jeē vihyá gā váha coo jíin rí.

²² Te núu cotecu gā rī, te cuu scáca ga rī jniñu máa Jítóho yō. Núu súcuan te tu cúcáhu ni rī ndé ñin cúu jeē váha ga, núu jeē cótecu rī chí jéē cúu rī.

²³ Chi mēhñú ndíndúú jnúhun yáha íne nihín ri. Chi ñin cúu jeē cúni rī quihín rī condee rī jíin Cristo, chí yúcuan cúu jeē vihyá gā váha coo jíin rí.

²⁴ Te suni cánuú gá jeē cótecu gā rī jeē siquī rohó jíjnáhan ró.

²⁵ Núu súcuan te íyó ndaā ni rī jeē quéndōo ri condee gā rī jíin ró, návāha stéén gā rī nuū

rō ndese caca vāha ga rō jiín yá, te cusī gā ni rō jiín jnúhun cá candíje ró.

²⁶ Núu súcuan te condee tucu ri jiín ró, te cusī teyí ni rō jeē siquí ruhū, sáha máa Cristo Jesús.

²⁷ Te máa ñn-ni jeē condihvī ni rō caca ndaā rō, nájnūhun cánuú caca ró síquī jeē cá candíje ró jnúhun Cristo. Yūcuán na te vēsú na jínú rī coto jnáhan yó, chí condee jíca rí, te nihīn rī jnúhun ro jéē cáhīn nīhin ró jiín jnúhun ya, te cáhīyo ñnuú ni rō, te ñnuú-ni cánducú ndeyí ró síquī jnúhun jeē cá candíje yó jéē jnáma ya yohó.

²⁸ Te ma yūhú cuiti rō sáha jeē cájito uhū rohó. Chi jeē jíto uhū i rohó, yūcuán stéén jeē jnahnú ndetū i, te suni stéén jeē cácu ánuá máa ró jijnáhan ró sáha Yaā Dios.

²⁹ Chi ni jēhe Cristo uū jeē váha nuū rō: nasūu máa ñn-ni jeē candíje ró yá, chi suni jeē na ndóho ró jéē síquí yā.

³⁰ Chi máa rí jiín rohó jijnáhan ró, nájnūhun jeē cájejnáhan yó jiín táca jéē neé. Chi ni cajito ró jéē súcuan ni sáha máa rí, te cánihīn rō jnúhun jeē sáha ga rī nde vijna.

Jeē ni sáha suchí yá maá yá te ni ndujéhu ya

2

¹ Núu súcuan te sáha Cristo jeē cáhīyo ndeyí ni rō, jiín jéē cúsi ni rō síquī jeē váha ni yā jiín ró. Te ndéé Espíritu yā jiín ró, te manī rō jiín jnáhan ró, te cájito ndáhú ró i.

² Núu súcuan te na cócu ga rō jiín táca jnúhun yáha, návāha cusī teyí ni rī. Te ñnuú-ni na cóo ni rō, te coyūcu manī rō, te ñnuú na cóo ánuá rō, te ñnuú cani ni rō.

³ Te ni ñn jniñu ma sáha ró jéē nducú ró jeē váha máa-ni ró, ni jeē satéyí ró maá ró. Chi sa suhva sáha suchí ró maá ró, te sáha ró cuenta jeē váha ga jnáhan ró vēsú maá ró.

⁴ Te ma cóndihvī ni rō maá-ni jniñu jeē quéndōo vāha máa-ni ró, chí suni na cóndihvī ni rō jniñu jeē quéndōo vāha jnáhan ró.

⁵ Te na cáni ni rō jijnáhan ró nájnūhun ni jeni ni Cristo Jesús.

⁶ Chi máa yá kujéhu ñnuú yá jiín Yaā Dios, te vēsú súcuan te tu ní jeni ni yā jeē kujéhu ñnuú yá jiín Yaā Dios.

⁷ Chi ni siaá yā jeē kujéhu ya, te ni nduu ya nájnūhun índāa mozo, te ni cacu ya ni nduu ya tēe.

⁸ Te ná ni nduu ñnuú yá jiín tēe, te ni sáha suchí yá maá yá. Te ni jendije ya nde jiín jnúhun jeē cúu yā, te nde jiín jnúhun canu jeē cúu yā jíca cruz.

⁹ Jeē yúcuan ní sáha Yaā Dios jeē yóhyo ni ndujéhu luu ya, te síhví yá kujéhu ndasí gá nuū táca gá síhví.

¹⁰ Te táca jéē cáhīn andiví jiín ñáyiví jiín chíji ñáyiví, núu na cúni i síhví Jesús te jecuñí yití i.

¹¹ Te cahān ndaā ndivii i jeē Jesucristo cúu máa Jítóho. Te súcuan stéén i jeē yóhyo kujéhu máa Tátá yā Yaā Dios.

Ñayuu cá candíje cúu i nájnūhun quimi jeē ndíndēe

¹² Núu súcuan hermano jijnáhan ró, nájnūhun níni ní cajendije ró jnúhun ni cahān rī ná ni condee rī jiín ró, suni súcuan víhyá gá cuandije ró vijna jeē ndeé jíca rí jiín ró. Te condihvī ni rō jeē caca ndaā rō jiín jnúhun ní jnama ya rohó, te caca yíñuhún ró conso iyo ró núu yā.

¹³ Chi Yaā Dios jícu ya jiín ró jeē cúu ni rō sáha ró jniñu váha, te chindéé ñáhán yá rohó jéē squícu ró jniñu nújnahan ni yā.

¹⁴ Ndihi jeē sáha ró, ma cahān sōo ró, ni ma tejnáhan ró,

¹⁵ návāha cuu ró séhe Yaā Dios jeē tú na cuēchi coo síquī rō te coo ndaā rō. Te caca ndoo ró méhñu ñayuu nīhni ni jeē casáha neé. Chi méhñu ñayuu un stéén rō jniñu váha ró, te súcuan cácuu ró nájnūhun quimi jeē ndíndēe núu neé ñáyiví.

¹⁶ Te stéén rō jnúhun ya nuū i jeē cótecu i ní cáni sáha. Te súcuan te cusī teyí ni rī quiví ndíji Cristo, chí cuni rī jeē tu ní jíca cáhá rí, ni tu ní sájniñu cáhá rí.

¹⁷ Te vēsú na cúu rī jeē socō rī maá rí nuū yā jeē síquí rohó, te yūcuán cúu jeē nducú rí scandíje ga rī rohó, návāha socō rō maá ró sáha ró jniñu váha jeē cá candíje ró yá. Jeē yúcuan cúsi ni rī, te cúni rī jeē suni cusī ni rō jiín rí jijnáhan ró.

¹⁸ Núu súcuan te na cúsi ni maá ró jiín rí, te ñnuú na cúsi ni yō jijnáhan yó.

Jnúhun Timoteo jiín Epafrdito

19 Te ñúhun ni rī jeē cuáha máá Jítóho yō Jesús jnūhun jeē tají yáchī rī Timoteo jeē de nuū rō, návāha ndusī ni rī núu na níhín rī jnūhun ndese cáhīyo ró.

20 Chi tuá na inga tēe íyó yáha jéē inuú jéni ni jíin rí, nájnūhun máá de jeē ndihví ndije ni de jehē rō.

21 Chi tācá de cánducú de jeē cúu máá de, te nasūu jéē cuní Cristo Jesús.

22 Te je cájini rō jeē tée vāha cúu Timoteo. Chi nájnūhun sēhe jíin tátá, súcuan ni jejniñu de jeē nácani de jnūhun vāha ya jíin rí.

23 Núu súcuan te ñúhun ni rī tají rí de jeē de nuū rō, te núu je ni cucáhnū ni rī ndese coo jíin rí.

24 Te jéni ndije ni rī jeē cuāha Jítóho yō jnūhun jeē suni máá rí jinū yachī rī nuū rō jijnáhan ró.

25 Te suni jéni ni rī jeē cánuú tají rí hermano yō Epafrodito jeē de, chi tēe sájniñu jíin rí siquī jnúhun ya cúu de te chindéé ñájnañan de jíin rí. Chi máá ró ni catajíró de jeē cuajniñu de nuū rī tāca jéē cúmanī nuū rī.

26 Chi yōhyo cúu ni de ndacoto tucu de nuū rō jijnáhan ró. Te ni cucuíhyá ndasí ni de, chi ni canihīn rō jnūhun jeē ní cocuhū de.

27 Chi jendaá ni cocuhū de, te je yajni cuu de núu. Te Yaā Dios ni cundáhú ni yā de, te nasūu máñúhún-ni de, chi suni ruhū, návāha tú caa ga cucuíhyá ni rī jehē de núu.

28 Jeē yúcuan cúu jeē ndihví gā ni rī tají rí de nuū rō, návāha ndusī ni rō jeē ndácoto tucu ró núu de. Te suni ruhū ma cucuíhyá ndasí gā ni rī.

29 Núu súcuan te na cúsi ni rō jeē nájinū de nuū rō, chi cúu de hermano yō jeē candíje de máá Jítóho yō. Te coo yíñúhún ró jíin táca tée índāa nájnūhun cáa de.

30 Chi jeē siquí jniñu Cristo cúu jeē jé yajni cuu de núu. Chi ni chundeyí ni de jeē cúu de siquí jeē chindéé ñáhán de ruhū jíin jniñu jeē tu ní íyo modo sáha máá ró jijnáhan ró.

Jnūhun jeē cáca ndaā vāha yó

3

1 Te vijna, hermano jijnáhan ró, na cúsi ni rō jíin máá Jítóho yō. Ruhū chi tu jnánini

ni rī jeē tée tucu rī jnūhun yáha núu rō, chi cuajniñu jeē quéndōo vāha ga rō.

2 Condito ró máá ró nuū tée cásáha jniñu néé, jeē cándāa ná cándāa ina. Chi cánducú de stújí de róhó jéē casáha de circuncidar, te tu cásáha de jniñu ndaā.

3 Te máá yó cácuu ñayuu ni cuu circuncidar ndije, chi cáchiñúhún yó nuū Yaā Dios nde jíin ini jíin ánuá yō, te cácusī ni yō jeē yíhí yó ndaha Cristo Jesús, te tu tēnuū yō jeē quéndōo ndaā yō jíin jniñu jeē sáha máá-ni yó.

4 Núu jeē súcuan cúu te ruhū chi suni cuu tenuū rī jniñu jeē sáha máá-ni ri nuú. Chi núu ndé tée jéni ni de jeē cuu tenuū de máá de, te ruhū chi víhyá gā cuu tenuū rī máá rí.

5 Chi ni casáha circuncidar ruhū nuū uná quívi ná ni cacu rī. Te yucūn Israel cúu rī, te suni jnáhan yucūn Benjamín, te ñn hebreo sēhe hebreo cúu rī. Te suni ni cuu rī tēe grupo fariseo jeē ni squícu rī tāca ley jnáhan ñuu rī hebreo.

6 Te ni jito xeēn rī ñayuu cá candíje, chi yōhyo ni condihví ni rī jeē ma sáma i modo ley jenahán. Te ni ñn tu ní cúu cahān jeē tu squícu rī ley un, chi ni squícu vāha rī.

7 Te tāca jéē ní tenuū rī ún, chi sáha rī cuenta jeē tu ndé níhín jniñu cuiti, chi vijna te ni candíje rī Cristo.

8 Te suni chíhi rī cuenta jeē vāha ga na náa ndihí jeē ní tenuū rī ún, chi vāha ndasí gā cúu jeē ni quívi rī ndaha máá Jítóho rī Cristo Jesús. Te jeē siquí máá yá te ni siaá rī ndihí ún, te sáha rī cuenta jeē nájnūhun yácá-ni cúu. Chi ni quívi rī ndaha Cristo,

9 te ndúú yá jíin rí. Te tuá nducú rí quendōo ndaā rī jeē jíin ley un, chi sa suhva Yaā Dios ni ndahva yā cuēchi rī jeē ní candíje rī Cristo. Chi súcuan squéndōo ndaā yā ñayuu cá candíje.

10 Te vijna te cúní rī jecūhun vāha ni rī ndese Yaā cúu ya. Te cúní rī jeē poder jeē ní natecu yā cone jíin rí. Te cúní rī ndoho rī jíin yá, te nde jinū rī ndoho rī nájnūhun ni ndoho máá yá jeē ni jíhī yā.

11 Chi yōhyo ñúhun ni rī natecu rī nájnūhun ni natecu yā.

Jeē nducú ndéyí Pablo sínu de carrera de

12 Te ná tu nihīn rī ndihí jeē ni cáhān rī ún, ni ná tu ije rī jíin. Te nducú ndéyí rí siquí

ún, chi ñúhun ni rī jeē nihín rī tācá un, chi jeē yúcuan cúu jeē ni nihín Cristo Jesús ruhū xīhna gā.

¹³ Hermano jijnáhan ró, tu sáha ri cuenta jeē jé ni nihín rī ndihí ún. Te íyó ñn jeē sáha ri, cúu jeē squéndōo ri tāca jéé ní cuu ichi yátá, te ndúcú ndeyí rí nihín rī tāca jéé iyó ichi núú.

¹⁴ Chi cúu un nájñuhun jeē jínu ri ñn car-rera cuahān rī nde jinū rī andiví, te nihín rī premio jeē cuáha Yaā Dios. Chi ni cana ya yohó jéé quihín yō nuū yā andiví siquī jeē yíhi yó ndaha Cristo Jesús.

¹⁵ Te tāca yó jeē jé ni ije vāha yó jíin jnúhun cándije yó, súcuan na cáni ni yō. Te núu ndé ñn ró sñn jéni ni rō, te Yaā Dios suni stéén yā nuū rō jeē násūu súcuan cúu.

¹⁶ Te jíni ñúhún cani ni yō te caca yó modo jeē quijnáhan jíin jéé jé ni nihín yō.

¹⁷ Hermano, na ndácu ró rúhū jijnáhan ró. Te condēhe váha ró ndese cájica ñayuu ndaā, chi cájica i nájñuhun ni castéén rī nuū rō.

¹⁸ Te je ni cuu tijni jínu ni cahān rī jíin ró, te nde ndahyú rī cahán tucu ri vijna, jeē iyó cuéhē ñayuu cájica i ñn modo jeē steén jeē jíto uhū i jnúhun jeē ni jíhi Cristo jicā cruz.

¹⁹ Te ñn quiví te jnahnū ndetū ñayuu ún. Chi máni jeē cáji vāha i cúu jeē cáchiñúhún i. Te sátéyí i máá i jíin jniñu néé jeē jéhe jnúhun canu. Te máni máá jéé iyó ini ñayiví cúu jeē ndihví ni i.

²⁰ Te máá yó chi ñayuu coyūcú andiví cúu yó, te cándetu yó jéé nde yūcuán ndiji Jítoho yō Jesucristo, Yaā jnáma yóhó.

²¹ Te máá yá nasama ya yiqui cúñu ndahú yó, návāha nduu yó nájñuhun cáa máá yá jeē lúu cújéhnua ya. Te súcuan sáha ya jíin poder yā jeē cujéhnua ya siquī ndihí-ni.

Níní na cúsñ ni yō jíin Jítoho yō

4

¹ Núu súcuan hermano jijnáhan ró, cuiñi ñihin ró jíin jnúhun máá Jítoho yō. Chi yōhyo manī rī jíin ró, te cúní rī jeē coto jnáhan yó, te cúsñ ni rī jíin ró, te nájñuhun premio rī cácuu ró.

² Te cáhán ndahú rí jíin róhó Evodia jíin Síntique jeē ñnuú na cóo ni rō, chi cácuu ró hermana jeē cácandije ró máá Jítoho yō.

³ Te suni cáhán ndahú rí jíin róhó, téé jeē ní chindéé ñájñahan vāha jíin rí, jeē na chindéé ñáhán ró hermana un, chi ni casájniñu ñihin ña jíin rí siquī jnúhun jeē jnáma ya yohó. Te suni súcuan ni sáha Clemente jíin sava ga ñayuu ni sájniñu jíin rí. Te ni jecosō sihví i nuū libro jeē yosó sihví ñayuu cotecu ní cáni.

⁴ Te níní na cúsñ ni rō jijnáhan ró jíin máá Jítoho yō. Te inga jínu cáhán rī jeē na cúsñ ni rō.

⁵ Sáha vāha ró jíin táca ñayuu, návāha cuni i jeē súcuan vāha ni rō. Chi máá Jítoho yō, yajni-ni cúu ya jíin ró.

⁶ Ma nácani ndasí ni rō siquī ni ñn. Chi sa cahān rō jíin Yaā Dios siquī tāca jéé nácani ni rō. Chi cacān tahú rō, te cahān ndahú ró, te suni nacuatáhú ró nuū yā.

⁷ Yūcuán na te sáha Yaā Dios jeē cóo ndeyí coo sñ ndasí ni rō, te súcuan coo jíin ró nde cūhva jeē ma jécūhun ni rō ndese cúu jeē sáha ya ún. Te condito vāha ya anuá rō jíin jéé níjnūnī rō, coo cuehē jnúhun ndeyí jnúhun sñ ni jíin ró, siquī jeē yíhi ró ndaha Cristo Jesús.

Jeē na cáni ni yō siquī tāca jéé vāha

⁸ Te ñn na jnúhun íyó, hermano jijnáhan ró. Na cáni ni rō siquī tāca jéé iyó ndaā, jíin jéé sáha yíñúhún, jíin táca jniñu sáha vāha, jíin jniñu íyó ndoo, jíin táca jéé iyó máni ni, jíin jéé lúu sáha. Te máni na núcūhun ni rō tāca jéé vāha jeē sáha jeē nácuatáhú ró nuū yā.

⁹ Tāca jéé ni stéén rī nuū rō, jeē ní cacutūhva ró núu rī, jíin jéé ní cajini ró ní cahān rī, jíin jéé ní cajito ró ni sáha ri, tāca yúcuan suni na sáha máá ró. Yūcuán na te máá Yaā jeē jéhe jnúhun ndeyí sñ ni, coo ya jíin ró.

Jeē ní casocō ñayuu Filipos nuū Pablo

¹⁰ Te yōhyo cúsñ ni rī sáha máá Jítoho yō, chi vijna te ni canucūhun tucu ni rō jeē chindéé ñáhán ró rúhū. Te nasūu jéé ní naa ni rō sáha ró súcuan, chi siquī jeē tu ní íyo modo.

¹¹ Te nasūu jéé cahān rī siquī jeē ndóho ndahú rí, chi je ni cutūhva ri cusñ ni rī jíin jéé névāha rí.

¹² Jíni rī cotecu ndahú rí, te jíni rī cotecu cucá rí. Chi ni cāan rī jíin táca-ni, núu jeē

ndutú chíji ri chí jéē ndóho ri sōco, núu jeē cónevāha cuehē rī chí jéē cúmanī nuū rī.

¹³ Ndihi-ni cúu sáha ri, chí máá Cristo jéhe ya fuerza ini rī.

¹⁴ Te vēsú súcuan te vāha ni casáha ró jéē ní chindéé ñáhán ró ruhū jíin jnúndóho jeē ndóho ri.

¹⁵ Te róhó ñáyuu ñuu Filipos, je cájini rō ndese ni cuu. Chí nde quivī ní quejéé rí nácani ri jnúhun jeē jnáma ya yohó, ná ni quenda ri Macedonia vēji ri, te ni casocō rō xūhun núu rī siquī jeē ní canihīn rō jnúhun ya ni nacani rī. Te ni ñn grupo ñayuu cácadíje tu ní sáha súcuan, chí máá-ni róhó jíjnáhan ró.

¹⁶ Te ná íne ri ñuu Tesalónica, te ni catají ró jecu jeē jíni ñúhún rí, ni jinū ñn uū jínu.

¹⁷ Te nasūu jéē nducú rí jeē cuáha ró núu rī, chí sa ndúcú rí jeē na cáyá gā jniñu váha ró, návāha cayā tahū rō nuū Yaā Dios.

¹⁸ Chí je ní nihīn rī ndihi jeē jíni ñúhún rí, te ndóo ga. Te íyó cuehē nuū rī, chí ní nihīn rī jeē ní catají ró vēji jíin Epafrodito. Te jeē ní catají ró cúu nájnúhun ñn ofrenda jeē asín jeén, ni casocō rō nuū Yaā Dios, te cúsiñ ni yā jíin.

¹⁹ Te Yaā Dios chí cuāha ya nuū rō tāca jéē cúmanī nuū rō, chí cúcá ndasí yá jíin tāca jéē váha jeē lúu íyó núu Cristo Jesús.

²⁰ Te na cáhán yō jeē yóhoyo luu cújéhnú Tátá yō Yaā Dios níí cáni. Amén.

Saludo jeē sándihí

²¹ Cachi rō nuū tāca ñáyuu maá yá jeē sándeyí ní i, áchí rí, chí cácadíje i Jesucristo. Te hermano yō cáyūcu jíin rí yáha, cácahān de jeē sándeyí ní rō jíjnáhan ró.

²² Te tāca ñáyuu maá yá jeē cáhīyo yáha, suni cácahān i jeē sándeyí ní rō. Te ñayuu cáyūcú vehe rey cújéhnú ñuu Roma yáha, máá i cácahān gā súcuan.

²³ Te ñúhun ní rī jeē maá Jítoho yō Jesucristo, na sáha ga yā jeē váha róhó jíjnáhan ró. Súcuan na cóo. Amén.

CARTA JEE NI TEE APOSTOL SAN PABLO NUU ÑAYUU ÑUU COLOSAS

¹ Máá rí cúu Pablo, apóstol Jesucristo, chi súcuan ni nujnahan ni Yaā Dios ni tají yá ruhū. Te jíin hermano yō Timoteo

² cátee ri carta yáha cuájeē nuū rohó ñáyuu ñuu Colosas, jeē cácuu ró ñáyuu maá yá jeē cácandíje vāha nuū Cristo. Te cáñuhun ni rī jeē Tatá yō Yaā Dios na sáha ga yā jeē vāha rōhó, te sáha ya jeē coo ndeyí coo sī ni rō.

Jeē jicán tahu Pablo jehē ñáyuu cácandíje

³ Te jeē cájicān tahu rī nuū Yaā Dios, Yaā cúu Tatá maá Jítoho yō Jesucristo, te níní cánacuatahú rí nuū yā jeē siquí rohó jíjnahan ró.

⁴ Chi ni cajini jnūhun ri ndese vāha cácandíje ró Cristo Jesús, jíin ndese cákundáhú ni rō tāca ñáyuu maá yá.

⁵ Chi cáñuhun ni rō nihīn rō jeē ñúhun vāha nde andiví cuu ró. Chi ná ni cajini ró jnūhun ndaā jeē jnama ya rohó, te ni caquejéé ró ñúhun ni rō.

⁶ Te jnūhun un jéē ní canacani nuū rō, chi ndúcuehē cuahān te níhīn jniñu ní cáhnu ñayiví. Te suni súcuan ni sáha jíin rōhó jíjnahan ró ndé quiví ní cajini ró te ni cjecūhun ni rō jeē ndaá cúu jeē yóhyo vāha ni Yaā Dios jíin ró.

⁷ Te jnūhun un cúu jeē ni stéén Epafras nuū rō, tēe sájniñu jíin rí jeē maní rī jíin. Chi cúu de tēe jéjníñu squícu vāha nuū Cristo jeē ndíto de rōhó.

⁸ Te máá de ni castūhun núu rī siquí rohó, ndese cákundáhú ni rō jnahan ró sáha máá yá.

⁹ Jeē yúcuan suni tu cájecuñī rī jeē cájicān tahu rī jehē rō, nde quiví ni níhīn rī jnūhun ún te nde vijna. Te cájicān rī nuū yā jeē na jécūhun vāha ni rō te coo ndíchí ró jíin jnūhun ya, sáha máá Espíritu, návāha cuni rō ndihī ndese nújnahan ni maá yá.

¹⁰ Te cájicān rī jeē caca ndaā rō nájnūhun cánuú caca ró jéē cácuu ró ñáyuu maá Jítoho yō. Te súcuan te sáha ró ndihī jeē nújnahan

ni yā, te nihīn jniñu ró jíin táca jniñu vāha, te jecūhun ga ni rō ndese Yaā cúu Yaā Dios.

¹¹ Te cájicān rī jeē cuáha ya fuerza ini rō, nájnūhun íyó fuerza maá yá jeē kujéhnu luu ya. Te súcuan te cuu cuandeyí ni rō jíin táca-ni jnūndóho, te cusī teyí ni rō.

¹² Te cuu nacuatáhú ró nuū Tatá yō, chi máá yá ni chihi fuerza yohó jéē in cáhnu-ni jíin táca ñáyuu maá yá nihīn yō tahū yō. Chi cájica yó jíin luz yā jeē yíhi yó ndaha ya.

¹³ Chi ni jnama ya yohó jéē ni yíhi yó ndaha máá jéē jniñ poder nuū néē, te ni squívi ya yohó ndaha Séhe ya jeē maní yā jíin, ndácu ya jniñu nuū yō.

¹⁴ Chi Séhe ya un ní jnama ya yohó jéē ni jíhi yā jehē yō, te ni ine cáhnu ni yā nuū cuéchi yó.

Jeē ni sáha Cristo jeē ní ndiví yó núu jnūhun maní Yaā Dios jíin yó

¹⁵ Yaā Dios jeē tu cúu coto yó, ni sáha ya jeē ní quiji Séhe ya, te súcuan ni jito yó máá yá. Te Séhe ya ún, je íyó yá nde ná tu jecōo táca jéē iyó.

¹⁶ Chi jíin Séhe ya ni sáha Yaā Dios ndihī jeē ni jécōo, ndihī jeē iyó andiví jíin jéē iyó ñayiví, jeē jini yō nuū jíin jéē tu jini yō nuū. Te suni ni sáha ya tācá ndajéhé jeē cándacu jniñu, jíin jéē cándiso jniñu, jíin jéē cácujuhnu, jíin jéē cájniñ poder. Jíin Cristo ni sáha Yaā Dios jeē ní jécōo ndihī, te jeē cúu Cristo cúu.

¹⁷ Te je íyó Cristo nde ná tu coo ndihī jeē iyó. Te ndaha máá yá yíhi vāha ndihī-ni.

¹⁸ Te máá yá cújéhnu nuū ñáyuu cácandíje, nájnūhun cújéhnu xinī nuū yiquí cúñu, chi nájnūhun yiquí cúñu yā cácuu í, cúu jeē in na cúu í jíin yá. Te máá yá sáha jeē cotecu i ní cáni, te xīhna gā maá yá ni natecu mēhñu ndíyí, návāha kujéhnu ya nuū tācá-ni.

¹⁹ Chi ni cusī ni Yaā Dios jeē ndihī ndese cúu máá yá, suni súcuan cúu Cristo.

²⁰ Te siquí jeē ni jíhi Cristo, te ni cusī ni Yaā Dios sáha ya jeē ndivícoo tācá-ni nuū jnūhun maní yā jíin, tāca jéē yúcu ñayiví jíin jéē yúcu andiví. Chi jíin jéē ni jíhi Cristo jicā cruz, te ni sáha Yaā Dios jeē ndivícoo tācá-ni nuū jnūhun maní yā jíin.

²¹ Te máá ró jíjnahan ró, chi sīn siquí ni cahīn ró nde saá, te ni cajito uhū rō yā ini anuá rō, chi máni jniñu néē ní casáha ró. Te

vijna chi je ni sáha Yaā Dios jeē ní ndīvicoo ró núū jnúhun manī yā jíin ró.

²² Súcuan ni sáha ya siquī jeē ni sócō Cristo maá yá ni jihī yā, návāha coo ndoo coo īi ró cuiñi ró núū yā, te ma cóo jnéhén ró, te tú na cuēchi coo siquī rō.

²³ Te súcuan sáha ya núu cuiñi nīhin ró jéē candíje vāha ró, te núu quendōo nīhin ró jíin jnúhun vāha jeē cáñuhun ni rō jeē jnáma ya rohó, te ma siaá cuiñi rō. Chi jnúhun un ní cajini ró, te ni jite núu ní cáhnu ñayīvī. Te ruhū Pablo suni jéjníñu ri jeē nácani ri jnúhun ún.

Jeē jejniñu Pablo siquī ñáyuu cá candíje

²⁴ Te vijna te cúsiñi ni rī jeē ndóho ri jehē rō jijnáhan ró. Chi jíin yiqui cúñu rī ndóho ri jeē cúmanī gā ndoho ri jíin Cristo jehē ñáyuu cá candíje, suu ñayuu cúu nájnūhun yiqui cúñu yā.

²⁵ Te cúu ri tēe jéjníñu siquī ñáyuu cá candíje, chi súcuan ni tejníñu Yaā Dios ruhū, návāha nacani ndīhi ri jnúhun ya nuū rō te quendōo vāha ró.

²⁶ Te nácani ri jnúhun ya jeē ní yisāhí, jeē tu ní cájini ñayuu nde jenahán ndasí te nde ní cáni vēji. Te vijna te je ni steén cají yá jnúhun un núū ñáyuu maá yá.

²⁷ Chi ni cusīñi ni yā jeē steén yā nuū i ndese cúcúca ndasí i jíin ndīhi jeē ndíso jnúhun sáhi yáha jéē lúu cújéhnu, te cuitē núu quihīn nuū tāca nación jeē tu jíin. Te jnúhun sáhi yáha cúu jeē ndeé Cristo ini anuá rō, ndúú yá jíin ró, te jeē yúcuan cáñuhun ni rō tāca jéē lúu jéhnu jeē coo.

²⁸ Te jnúhun Cristo un cúu jeē cánacani ri, te cástīhvī ni rī tāca ñáyuu, te cástéén rī jnúhun ya návāha jecūhun vāha ni i. Te súcuan te ije vāha ni ndīvii i jeē yfhi i ndaha Cristo Jesús.

²⁹ Te siquī yúcuan cúu jeē sájniñu ri, chi ndīhvī ni rī nácani ri jnúhun jíin tāca fuerza Cristo jeē chindéé ñájnañan ya jíin rí.

2

¹ Chi cúní rī jeē na jécūhun ni rō ndese yōhyo ndúcú ndéyí rí jehē rō, jíin jéhe ñayuu ñuu Laodicea, jíin ndé tāca ñáyuu jeē tu ní cájini cuiñi nuū rī.

² Chi cúní rī jeē coo ndeyí ni anuá i, te inuú-ni coyūcu mání i, te jecūhun ndīhi ni

i ndese yōhyo cúca i jíin jnúhun jeē candíje nīhin i. Chi cuni i ndese Yaā cúu Cristo, chi máá yá cúu jnúhun Yaā Dios jeē ni yisāhí un.

³ Te ini Cristo yisāhí tāca jnúhun jeē cucúca ró jíin, suu jnúhun ndíchí jíin jnúhun jécūhun ni.

⁴ Te jnúhun yáha cáhán rī jíin ró jijnáhan ró, návāha ma stahú ni ñin i rōhó jíin tāca jnúhun stahú jéē lúu cáhán.

⁵ Chi vésú ndeé jíca rí jíin ró, te ñúhun ni rī rohó, te cúsiñi ni rī jeē jiní rī ndese cájica ndaā rō te cá candíje nīhin ró Cristo.

⁶ Núu súcuan te nájnūhun ni cajetáhú ró jeē Jítóho rō cúu Jesucristo, suni súcuan na cáca ndaā rō jíin yá.

⁷ Te na jnái vāha jnúhun ya ini rō, te na ije vāha ró jíin jnúhun cá candíje ró yá, nájnūhun je ni cajini rō. Te níni nacuatáhú ró nuū Yaā Dios.

Jeē ndújeé yó sáha Cristo

⁸ Coto má cuāha ró jnúhun jeē stahú ni ñin ñayuu rohó jíin jnúhun ndíchí jéē tu jéjníñu, jíin jnúhun ndúxí stahú. Chi tu cá candíje i jnúhun Cristo, chi sa cá candíje i tāca jéē tajnúní ñayuu, modo jeē castéén ini ñayīvī yáha.

⁹ Chi ndīhi ndese cúu máá Yaā Dios, suni súcuan cúu Cristo.

¹⁰ Te ndīhi ndese cúu Cristo, suni súcuan cúu ró jijnáhan ró, chi cáyihí ró ndaha ya. Te máá yá cújéhnu nuū tāca jéē cújéhnu jíin jéē ndíso jníñu andīvī.

¹¹ Te siquī jeē cáyihí ró ndaha ya, suu cúu jeē nájnūhun ni cuu ró circuncidar. Te jeē súcuan ni sáha ya circuncidar rohó, chi nasūú ñin jnunī jeē yfhi yiqui cúñu rō cúu, chi sa suhva jeē ní sándoo ya tāca cuéchi ni casáha ró jíin modo neé máá ró. Chi súcuan cúu jeē sáha Cristo circuncidar rohó.

¹² Te jeē ní cajendute ró cúu nájnūhun jeē ní quindūji ró jíin Cristo, te suni nájnūhun jeē ní natecu rō jíin yá. Chi ni cacandíje ró jéē jíin poder Yaā Dios ni nastécu yā Cristo mēhñu ndíyí.

¹³ Chi ni cacuu ró nájnūhun ndíyí nuū yā siquī cuéchi ró, chi ná tu sáha ya circuncidar anuá rō nde saá. Te vijna te ni sáha Yaā Dios jeē cotecu rō ní cáni jíin Cristo, chi ni ine cáhnu ni yā nuū tāca cuéchi ró.

14 Te nájñūhun jeē iyó ñn acta jeē jicán cuēchi síquī yō jeē ni stívi yó ley yā. Te ni ndahva yā acta un, chi ni chunaa Cristo cuēchi yó jéē ni jíhi yā jicā cruz.

15 Chi ná ni jíhi yā jicā cruz, te ni quende yā ndihi poder tāca jéneé jéē cácujuhnu jíin jéē cájni poder. Te ni quende yā jeē tuá cujéhu, chi ni sāha ya jeē cuángoo nuū quíndihyū, te súcuan ni steén yā poder yā.

Na ndúcú yó jeē quéndōo vāha yó ndé andiví

16 Núu súcuan te ma cuatáhú ró núu cácahān ñayuu cuēchi síquī rō, síquī ñn jeē yéji rō chí síquī ñn jeē jíhi ró, chí jéē tu nées ñ rō quívi víco jíin quívi núcosō yoō jíin quívi ndétátú.

17 Chi tāca ley síquī un ní jejniñū máá ndé ná tu quiji Cristo. Te vijna te ni quiji ya te tuá jíni ññuhún táca ún.

18 Ma cuáha ro jnúhun jeē cási ni ñn ñayuu jeē nihín rō tahū rō. Chi cáchiñuhún i tācá ndajéhé yā, te cácahān i jeē súcuan cásáha suchí i máá i. Te cácahān i jeē cájini ndije i jeē iyó ndāa jñūhun cánacani i, te tuú. Te súcuan cásáha téyí sáa-ni i máá i, chí cájeni néé ni i.

19 Te tu cáhīn i jíin Cristo, Yaā cujéhu nuū ñáyuu cácuu nájñūhun yiquí cúñu yā chí ñn na cúu i jíin yá. Chi máá yá scuéhu ya i jíin jnúhun ya, te nduu ñnuú ni tācá i jeē cáhije i cuahān i, nájñūhun ni jeni ni Yaā Dios.

20 Núu súcuan te nájñūhun jeē je ni cajihí rō jíin Cristo, cúu jeē ní casiáá rō tāca jéē tajnúni jeē castéén ini ñayiví. Núu súcuan ¿te naun cásáha ga rō nájñūhun cásáha ñayuu ñayiví jéē jéndije ró táca jéē tajnúni i?

21 Chi cácahān i: Ma quehé ró ma cáji rō jeē yáha chí jéē yúcuan, ni ma jní ró, áhí i.

22 Te máni jeē tajnúni ñayuu jíin costum-bre máá i cúu te tu níhín jniñū jeē quéndōo ndāa ñayuu.

23 Te ndāa chí cájeni ni i jeē jnúhun ndíchí cúu ún, chí sāha jíin i jeē chíñuhún níhin i, jíin jéē sāha suchí i máá i, jíin jéē stóho i yiquí cúñu i. Te tu níhín jniñū cuiti jeē casi tācá jniñū néé jéē cuní i sāha i.

3

1 Núu súcuan te nájñūhun ni natecu Cristo, suni súcuan ni canatecu rō jeē ní cuu ró

nájñūhun ndíyi ni sāha cuēchi ró. Te na cóndihvi ni rō síquī tāca jéē iyó andiví núu ndeé Cristo lado váha Yaā Dios nuū cujéhu ya.

2 Te na cáni ni rō síquī tāca jéē iyó andiví, nasūu síquī jeē iyó ini ñayiví.

3 Chi nájñūhun je ni cajihí rō jíin Cristo, te vijna chí nájñūhun cátecu rō jíin yá andiví, chí cáyihí ró ini ndaha Yaā Dios.

4 Te quiví ndíji Cristo, Yaā sāha jeē cótecu yō ní cáni, yūcuán na te suni quendacoo ndijin maá ró jíin yá, te cujéhu luu ró jíin yá.

Ñayuu jíca jíin modo cuní maá, jíin ñáyuu ní ndujeé

5 Núu súcuan te casi rō tāca modo cuní maá ró jeē cáhīyo ró ini ñayiví yáha. Chí ma cáca jnéni ró, ma sāha ró jniñū jnéhén, ma ndíyo ni rō sāha ró táca jniñū néé, ma cutóo ró, ma ndíyo ni rō ndajniñū. Chí tācá ndajniñū jeē ndíyo ni yō cúu nájñūhun ídolo yō jeē chíñuhún yó.

6 Chí síquī tācá jniñū yáha cúu jeē cuāha Yaā Dios castigo xeén nuū ñáyuu níhni ni nuū yā.

7 Te suni jíin jniñū yáha ní cajica ró ndé saá, ná ni casáha ró súcuan.

8 Te vijna te na stóo ró táca jéē yáha: jeē quití ni, jeē xeén ni, jeē sāha jniñū néé, jeē cahán ndevāha nuū jnáhan, jíin jéē cahán tāca jnúhun tú vāha.

9 Ma stahú ró jnáhan ró, chí yúcuan cúu modo maá ró jeē ní cajica ró jíin ndé saá, te je ni castóo ró.

10 Te ni canduu ró ñáyuu jeé, cuandacu ró máá Yaā ni sāha róhó, te cuajecūhun vāha ni rō ndese Yaā cúu ya.

11 Te ñayuu ní ndujeé tuá cúu i ñayuu griego, ni ñayuu hebreo, ni ñayuu ni sāha circuncidar, ni ñayuu tu ní sāha circuncidar, ni ñayuu ñuu jicá, ni ñayuu yucú jeē ní indāa néé, ni mozo jeē ní jeen ñayuu, ni ñayuu sájniñū cuenta maá, chí ñnuú cúu ndihi i nuū yā. Chí Cristo cúu Jitoho ndihi i, te ndeé yá ini anuá ndihi i, ndúu yá jíin i.

12 Chí ni nacāji Yaā Dios rohó jíin náhan ró jeē cúu ró ñáyuu maá yá jeē maní yā jíin. Núu súcuan te níni cundáhú ni rō jnáhan ró, te coo vāha ni rō jíin jnáhan ró. Te coo suchí

ni rō, te coo vītá ni rō, te coo paciencia ni rō.

¹³ Cuandeyí ni rō jíin jnáhan ró, te cone cáhnu ni rō nuū i te núu na vé ni sáha i nuū rō. Chi nájnūhun ni ine cáhnu ni Cristo nuū rō, suni súcuan sáha máá ró.

¹⁴ Te jeē cánuú gá cúu jeē cundáhú ndasí ni rō jnáhan ró. Chi yūcuan sáha jeē ndúu inuú ni rō te íje vāha ni rō jíin jniñu vāha.

¹⁵ Te jnūhun coyūcu mánī na cúnuú ini anuá rō sáha Yaā Dios. Chi ni cana ya rohó jéē nduu ró in na ñayuu jéē cóyūcu mánī rō. Te nínī na nácuatáhú ró núu yā.

¹⁶ Te scuáha vāha ró jnúhun Cristo návāha cunuú jnúhun ún ini anuá rō. Te stéén rō nuū jnáhan ró, te stíhví ni rō i jíin táca jnúhun ndíchí yá. Te jíin salmo jíin himno, yaa íi jeē cahán jnūhun ya, na cáta luu ró jéē nácuatáhú ró ini anuá rō nuū Yaā Dios.

¹⁷ Te tǎcá jniñu sáha ró, núu jeē cahán rō chí jéē sáha ró cúu, ndihí na sáha ró jéē ndujéhnu síhví máá Jítóho yō Jesús, te nacuatáhú ró núu Tatá yō Yaā Dios sáha ya.

Ndese cánuú squícu ñayuu cácandíje nuū jnáhan i

¹⁸ Róhó ñahan cácuu ñasihí, cuatáhú ró nuū yíi ró, chí súcuan cánuú sáha ró síquí jeē candíje ró Jítóho yō.

¹⁹ Te róhó tée cácuu yíi, cundáhú ni rō ñasihí ró, te ma cútucu ni rō jíin ña.

²⁰ Róhó séhe jíin náhan ró, tǎcá-ni jniñu cuandíje ró núu tatá rō nuū naná rō, chí súcuan cúsiñ ni máá Jítóho yō.

²¹ Te róhó tátá jíin náhan ró, ma squítí ni rō séhe ró, návāha ma cucuíhyá ni i.

²² Róhó mozo jíin náhan ró, tǎcá-ni jniñu cuandíje ró núu patrón rō ñayívi yáha. Ma sájniñu ndúxí ró jeē máá jéē coto de te cuajnúhún de róhó. Chi na sájniñu ndaā sájniñu ndíje ró, te conso íyo ró núu Yaā Dios.

²³ Te tǎcá jniñu sáha ró, na cúsiñ ni rō sáha ró, te na cáni ni rō jeē nuū Jítóho yō cájejniñu ró, nasūu núu ñáyuu.

²⁴ Chi je cájini rō jeē máá Jítóho yō cuāha ya cuehē tahū cuu ró ní cáni. Chi nuū máá Cristo cájejniñu ró, chí máá yá cúu Jítóho rō.

²⁵ Te ñayuu casáha jniñu néé, chí sa suhva ndutahū i síquí jeē ni sáha i. Chi tu sáha Yaā

Dios cuenta ndese cúu in in ñayuu, chí inuú sáha ya jíin i.

4

¹ Róhó patrón jíin náhan ró, vāha ndaā na sáha ró jíin mozo rō. Te na núcūhun ni rō jeē suni íyó Jítóho máá ró, Yaā ndeé andívi.

² Te ndívi rō ma jécuiñi rō jeē jicán tahu rō, chí coo ndito ni rō jíin, te nacuatáhú ró núu Yaā Dios.

³ Te suni cacān tahu rō jehē rī jíin náhan rī, jeē na sáha Yaā Dios jeē cóo ga modo nacani rī jnūhun, návāha cuu cahān rī jnūhun Cristo jeē ní yisáhí, jeē tu ní cájini ñayuu jenahán. Te síquí jnúhun un cúu jeē ine rī vecāa.

⁴ Te cacān tahu rō jeē cuu cahān cají rī ndese cánuú cáhān rī.

⁵ Sáha yúcún vāha ró jíin ñáyuu tu cácandíje. Ma cúhuun ni rō síquí i, chí condíhví ni rō scandíje ró i.

⁶ Te mání cahān vāha ró jíin ñáyuu, te cahān rō jnūhun cuajniñu jeē quéndōo vāha i sáha. Te caní ni rō ndese vāha nastió cuíñí rō jnūhun nuū in in i.

Saludo jeē sándihí

⁷ Tíquico cúu in hermano jeē maní yō jíin, te tēe squícu vāha chindéé ñájnáhan jíin rí cúu de, te jéjniñu de jíin rí nuū máá Jítóho yō. Te máá de castūhún ndihí nuū rō ndese cuahān jniñu rī.

⁸ Jeē yúcuan ní tají rí de cuajeē de nuū rō jíin náhan ró, návāha cuni rō ndese cáhīyo rī jíin jniñu, te coo ndeyí ni rō sáha de.

⁹ Te suni cuajeē Onésimo jíin de, tēe cúu jnáhan máá ró jíin náhan ró. Te cúu de hermano jeē squícu vāha jeē maní yō jíin. Te ndíndúú de castūhun núu rō ndese cuahān tǎcá jniñu ichi cháha.

¹⁰ Sándeyí ni rō jíin náhan ró, áchí Aristarco, tēe íne jíin rí vecāa. Te suni súcuan cáhān Marcos, ñani primo Bernabé. Te je ni ndacu rī jniñu nuū rō síquí Marcos, te núu ni jecondéhé de róhó te sáha vāha ró jíin de.

¹¹ Te suni súcuan cáhān Jesús, tēe jeē suni nání Justo, jeē sándeyí ni rō. Te máá-ni de cácuu tēe hebreo cácandíje jeē chindéé ñáhán cánacani jnūhun jíin rí síquí ndese ndácu Yaā Dios jniñu. Te yōhyo ndeyí íyó ni rī casáha de.

¹² Sándeyí ni rō jijnáhan ró, áchí Epafras, tēe cúu jnáhan máá ró, te mozo Cristo cúu de. Te níni jícán tahu ndasí de jehē rō, jeē na cuíñi nīhin ró, te ije vāha ni rō jeē squícu vāha ró ndihí jniñu cúní Yaā Dios.

¹³ Chi cáhán ndaā rī jeē yóhyo ndíhví ni de jehē rō jijnáhan ró, jíin jéhē ñáyuu ñuu Laodicea jíin Hierápolis.

¹⁴ Lucas, tēe cúu médico jeē maní yō jíin, suni cáhán de jeē sándeyí ni rō, te suni súcuan cáhán Demas.

¹⁵ Cachi rō nuū tācá hermano ñuu Laodicea jeē sándeyí ni i, áchí rí. Te suni súcuan cahán rō jíin Ninfas, jíin táca ñáyuu cácadíje cándutútú vehe ña.

¹⁶ Te ná ni jīnu ni cacahu ró carta yáha, te suni tají ró na cáhu ñayuu cácadíje ñuu Laodicea. Te suni cahu máá ró carta jeē cuahán nuū ñáyuu Laodicea te ndiji nuū rō.

¹⁷ Te cachi rō nuū Arquipo jeē na ndúcú ndéyí de squícu de jniñu ní tee Jitoho yō siquí de, áchí rí.

¹⁸ Ruhū Pablo, yāhá-ni cúu jeē tée ri jíin ndaha máá rí, jeē sándeyí ni rō. Te nucūhun ni rō ruhū jeē íne ri vecāa. Te ñúhun ni rī jeē na sáha ga Yaā Dios jeē váha róhó jíjnáhan ró. Súcuan na cóo. Amén.

CARTA HN JEE NI TEE APOSTOL SAN PABLO NUU ÑAYUU NUU TESALONICA

¹ Máá rí cúu Pablo jiín Silvano jiín Timoteo, te cátee rí carta yáha cuájeē nuū rohó ñayuu cácanđije ñuu Tesalónica, jeē cáyihí ró ndaha Tátá yō Yaā Dios jiín Jítóho yō Jesucristo. Te cáñuhun ni rī jeē Tátá yō Yaā Dios jiín Jítóho yō Jesucristo, na sáha ga yā jeē váha róhó, te sáha ya jeē coo ndeyí coo sī rí rō jijnáhan ró.

Ñayuu Tesalónica cúu i ñn ejemplo vāha

² Níní cáncuatáhu rí nuū Yaā Dios jeē siquí rohó jijnáhan ró, te tu náā ni rī cacān tahu rī jehē rō jeē cájicān tahu rī.

³ Te níní ndácunehen rí rohó núū Tátá yō Yaā Dios, jeē váha casáha ró táca jniñu chi cácanđije ró, jiín jéē váha cájejniñu ró núū yā chi manī rō jiín yá, jiín jéē cájendeyí ni rō chi cáñuhun ni rō jeē coo jeē váha sáha Jítóho yō Jesucristo.

⁴ Chi manī Yaā Dios jiín ró jijnáhan ró hermano, te cájini rī jeē ní nacāji ya rohó.

⁵ Chi ná ni canacani rí jñuhun nuū rō jeē jnáma ya rohó, te nasūu jéē ni cáhān rī súcuan-ni, chi ni nacani rí jiín poder Espíritu Santo, te ni cacucáhnu vāha ni rī jeē jñuhun ndaā cúu. Te cájini rō ndese ni casáha vāha rí ná ni coyūcu rí jiín ró, chi ni nducú rí jeē quéndōo vāha ró.

⁶ Te róhó jijnáhan ró chi ni candacu ró ruhū, te suni ni candacu ró máá Jítóho yō. Chi ni cajetáhu ró jñuhun ya, te ni cacusī ni rō ni sáha Espíritu Santo, vēsú ni cajito ró cuehē jñundóho siquī ún.

⁷ Te súcuan cácuu ró ñn ejemplo nuū ndihí ñayuu cácanđije jeē cáyūcú región Macedonia jiín Acaya jiñā.

⁸ Chi jeē siquí rohó jijnáhan ró cúu jeē ní jite núu jñuhun Jítóho yō, te nasūu máni Macedonia jiín Acaya, chi suni ní cáhnu-ni ni jite núu jñuhun ndese cácanđije ró Yaā Dios. Te jeē yúcuan tuá jini ñuhún jeē nácani máá rí jñuhun nuū i.

⁹ Chi sa máá i cáncani ndese ni cajetáhu váha ró ruhū ná ni jecoo rí nuū rō, jiín ndese ni castóo ro ídolo te ni quivícoo ró ndaha Yaā Dios, Yaā ndaā Yaā técu, jeē cuajniñu ró núū yā.

¹⁰ Te cáncani i jeē cándetu ró jéē ichi ándiví ndiji Sēhe ya Jesús jeē ní nastécu yā. Te máá Jesús jnama ya yohó núū castigo xeēn jeē quíji.

Jniñu jeē ni sáha Pablo ñuu Tesalónica

2

¹ Chi cájini rō hermano, jeē tu ní jecoo cáhá-ni rí nuū rō.

² Te cájini rō jeē ní castóho i ruhū te ni cacahān ndevāha i nuū rī ini ñuu Filipos. Te vēsú súcuan te máá Yaā Dios ni chindéé ñáhán yá ruhū, ni sáha ya jeē ni íyo ndeyí ni rī, te ni jecoo rí ñuu rō ni canacani rí jñuhun jeē jnáma ya rohó. Súcuan ni casáha rí vēsú xeēn ni íyo jñundóho.

³ Te jñuhun ni canacani rí, nasūu jñuhun ni castíví rí cúu, ni nasūu jéē nihín rī siquí rō, ni nasūu jéē ní castáhu rí rohó.

⁴ Chi máá Yaā Dios ni jito ndee yā ruhū, te ni tejniñu ya ruhū jeē nácani rí jñuhun jeē jnáma ya rohó. Te jeē yúcuan cúu jeē cacahān rī. Te tu cacahān rī jñuhun jeē nújnahan ni ñayuu, chi sa jeē nújnahan ni Yaā Dios, chi máá yá jito ndee anuá rī.

⁵ Te cájini rō jeē tu ní cánducú rí cuajñuhún rí rohó ñn modo stahú, ni tu ní cacahān rī jeē cúsi ni rī jiín ró návāha nihín rī xuhun ró. Te jini Yaā Dios jeē súcuan cúu.

⁶ Te ni tu ní cánducú rí jeē cuajñuhún ró ruhū, ni jeē cuajñuhún inga ñayuu ruhū, vēsú súcuan cánuú coo núú, chi apóstol Cristo cácuu rí.

⁷ Chi sa suhva vīta ní cacahān rī jiín ró, nájnuhun sáha ñahan ndéca yiquín jéē yucún ndíto ña sēhe ña.

⁸ Te siquí jeē cácondáhu ndasí ni rí rohó, jeē yúcuan ní cacondihvī ni rí nacani rí jñuhun vāha Yaā Dios nuū rō. Te nasūu máá yúcuan-ni, chi suni nde vida rī cuāha rí jeē siquí rō nuú, chi yōhyo manī rī jiín ró.

⁹ Te cáncani ró hermano, jeē tú ni ñn ró ní stáhān rī jeē cacān rī nuū rō ná ni canacani rí jñuhun vāha Yaā Dios nuū rō. Chi ni canducú ndeyí rí ni casajniñu ndasí rí siquí jeē cótecu rī. Te nduú ñuú ni casajniñu rí.

10 Máá ró cájini rō, te suni Yaā Dios jiní yā ndese ndaā ndoo ni cajica ri nuū rohó ñáyuu cá candíje. Te ni ñn tu cúu cahān cuēchi siquī rī.

11 Te suni cájini rō ndese ni castíhvī ni rī ná ñn ná ñn ró, te ni cacahān rī jnūhun ndeyí ni jíin ró, nájnūhun sáha ñn tátá jíin séhe de.

12 Te ni cacahān ñhin ri jíin ró jeē na cáca ndaā rō nuū Yaā Dios nájnūhun cánuú caca ró. Chi ni cana ya rohó jēé quíngoo ró núū ndácu ya jniñu, nuū luu cujéhnú ró jíin yá.

13 Te jeē yúcuan ní ní nácuatáhú rí nuū Yaā Dios, chi ni cajetáhú ró jnūhun ya jeē ní canacani ri. Chi ni cajini rō jeē násūu jnūhun ñn tēe cúu, chi jnūhun Yaā Dios cúu. Te máá jéndaá jeē jnūhun un sájniñu ini anuá rohó ñáyuu cá candíje nde ndacu ró yá.

14 Hermano, ñayuu ñuu rō ni cajito xeēn i róhó, te súcuan ni candoho ró nájnūhun ni candoho ñayuu cá candíje cáyūcú región Judea jeē cáyihī ndaha Yaā Dios jíin Cristo Jesús. Chi nájnūhun ni candoho i ni sáha jnáhan i ñayuu hebreo, suni súcuan ni candoho ró.

15 Chi suu ñayuu hebreo ni cajehni de máá Jítoho yō Jesús, nájnūhun ni cajehni de táca tēe ñuu de jeē ní canacani jnūhun ya nde jenahán. Te suni nde ruhū jijnáhan ri ni cascúnu de. Te casáha de jniñu jeē tu nújnahan ni Yaā Dios, te cúu de contra siquī táca ñáyuu.

16 Chi jésicoo de jeē ma nácani ri jnūhun nuū ñáyuu táca nación jeē tu jíiní, návāha tú cācu i. Te súcuan sáha de jeē nducuehē gā cuēchi siquī de. Te vijna te yachī quiji quivī jeē cuāha Yaā Dios castigo xeēn nuū de.

Jeē cuní Pablo quicōndēhé tucu de ñayuu Tesalónica

17 Hermano, ni cacujiyo ri ñn núnúu-ni nuū rō jijnáhan ró. Te vésú tu cájito jnáhan yó, te ní ní cáñuhun ni rī rohó. Te yōhyo ni cacuu ni rī ndacoto ri nuū rō jijnáhan ró.

18 Te jeē yúcuan ní cajeni ni rī jecoo ri nuū rō nuú. Te ruhū Pablo, tíjni jínu ni nducú rí modo jeē rī, te Satanás ní jesi ichi ri jijnáhan ri.

19 Chi tuá na ñnga cáñuhun ni rī, te tuá na ñnga cácusī ni rī, chi suu máá ró jijnáhan ró. Te jeē siquī máá ró cúu jeē nihín rī premio

rī te cusī teyí ni rī cuiñi yó núu maá Jítoho yō Jesucristo quivī ndíji ya.

20 Suu jeē siquī rohó cúu jeē cácusī teyí ni rī.

3

1 Te jeē yúcuan tuá ni cáanda ri condetu ri nde nihín rī jnūhun ndese cáhīyo ró. Te ni casándaā rī jeē quéndōo máa-ni ri ñuu Atenas.

2 Te ni catajī rí hermano yō Timoteo, tēe jéjniñu jíin rí nuū Yaā Dios siquī jnūhun jeē jnáma Cristo yohó. Te ni jecondēhé de róhó návāha sáha de jeē cuiñi ñhin ró te coo ndeyí ni rō jíin jnūhun cá candíje ró.

3 Te ni jeē de návāha ma náyūhú ni ñn ró siquī táca jnūndóho jeē sáha ñayuu. Chi je cájini rō jeē súcuan cánuú ndoho yó.

4 Chi nde ná ni coyūcu rí jíin ró, te ni cacastūhun rí nuū rō jeē nihín nahín yó jnūndóho. Te je cájini rō jeē súcuan ni cuu, nájnūhun ni cacahān rī.

5 Te jeē yúcuan, náa tuá ni cánda ri condetu ri jeē nihín rī jnūhun ndese cáhīyo ró, te ni tají rí de ni jeē de, návāha cuni rī núu cá candíje nahín ró. Chi ni jeni ni rī á sanaa te jexeén jeē jíto ndee yohó ní cundeyí jíin ró, te naa cāhá-ni jniñu jeē ní casáha ri jíin ró.

6 Te vijna chi je ni ndee Timoteo nuū rī jijnáhan ri jeē ni jēe de ñuu rō Tesalónica. Te ni nacani de jeē cá candíje vāha ró, te cá cundáhú ni rō jnáhan ró. Te ni cachi de jeē cáñuhun ni rō ruhū, chi cáhīyo manī rō jíin rí. Te cá cuni rō ndacoto ró núu rī, nájnūhun cá cuni rī ndacoto ri nuū rō.

7 Te jeē yúcuan ní candusī ni rī siquī jeē cá candíje vāha ró, hermano, vésú xeēn iyó jnūndóho siquī rī.

8 Te vijna je ni cananihín ni rī, chi cáhīn ñhin ró jíin máá Jítoho yō.

9 Núu súcuan te tu jínu cuiñi nacuatáhú rí nuū Yaā Dios jeē siquī rohó jijnáhan ró. Chi jíto ya jeē cá cusī ndasí ni rī jeē súcuan cáhīyo ró.

10 Te nduú ñuú cájicān tahú ndasí rí jeē ndacoto tucu ri nuū rō, te stéén gā rī na-ni jnūhun cúmanī jecūhun ni rō siquī jnūhun cá candíje yó.

11 Te cáculi rī jeē maá Tátá yō Yaā Dios jíin Jítóho yō Jesucristo, na núne ya ichi jeē cuu jecoo tucu ri nuū rō.

12 Te na sáha máá Jítóho yō jeē cuehē ndasí gá cundáhú ni rō jnáhan ró jíin táca gá ñayuu, nájnūhun cáculdáhú ni rī rohó jíin náhan ró.

13 Te na sáha ya jeē íje ánuá rō jeē cuiñi nīhin ró, návāha coo ndoo ró jēe ma cóo cuēchi ró núu maá Tátá yō Yaā Dios, quivī ndíji Jítóho yō Jesucristo jíin táca ñáyuu yíhi ndaha ya.

Siquī jeē caca ndaā yō modo jeē cúsi ni yā

4

1 Te vijna hermano, íyó inga jnūhun jeē cáculhān ndahú rí jíin ró te cáculhān nīhin ri jíin ró, chí súculan cúni maá Jítóho yō Jesús. Je ni castéén rī nuū rō ndese cánuú caca ndaā rō návāha cusī ni Yaā Dios. Te cáculhān ndahú rí jíin ró jeē sa víhyá gā na cáca ró súculan.

2 Chi je cájini rō na jniñu ni candacu ri nuū rō jeē ní ndacu máá Jítóho yō Jesús.

3 Te cúni Yaā Dios jeē na cóo ndoo coo íi rō nuū yā, te ma cáca jnéni ró.

4 Te ná ñn ná ñn ró na cóndeca yíñuhún ró ñasihí máá ró, te súculan caca ndoo ró.

5 Te ma sáha ró jniñu néé jēe ndíyo ni rō jesihí, nájnūhun cáculhá ñayuu táca nación jeē tu cájini i jnūhun Yaā Dios.

6 Ni ñn ró ma sáha ró cuéchi jeē quénde rō ñasihí jnáhan ró. Chí máá Jítóho yō cuāha ya castigo xeēn nuū ñáyuu casáha táca jniñu súculan, nájnūhun je ni cacahān nīhin ri ni castūhun rí nuū rō.

7 Chí tu ní cána Yaā Dios yohó jēe sáha yō jniñu jnéhén, chí sa jeē caca ndoo yó.

8 Núu súculan te ñayuu jeē squéhichī jnūhun yáha, nasūu jnúhun ñn tēe squéhichī i, chí sa jnūhun Yaā Dios, Yaā ni jéhe Espírítu Santo nuū yō.

9 Te tu jíni ñuhún jēe tée ri nuū carta yáha jēe coo manī rō jíin táca hermano, chí je ni steén Yaā Dios nuū rō jeē coo manī rō jíin jnáhan ró.

10 Te je cáhīyo manī rō súculan jíin táca hermano cáyūcu ní cáhnu Macedonia jíñā. Te cáculhān ndahú rí jíin ró hermano, jeē sa víhyá gā na cóo manī rō jíin i.

11 Te na cóndihvī ni rō coyūcú nayúú ró, te ma cóndihvī ni rō síquī ndese cáculhá jnáhan ró, chí condihvī ni rō sáha ró jniñu máá ró, nájnūhun ni candacu ri nuū rō.

12 Súculan na sáha ró návāha ñayuu tu cáculdije, cuatáhú i róhó, te suni ma cúmanī jeē cotecu rō.

Siquī jeē ndíji Jítóho yō

13 Suni cáculi rī, hermano, jeē na jécūhun ni rō jíin náhan ró síquī ñáyuu cájihī, návāha ma cucuíhyá ni rō nájnūhun sava ga ñayuu jeē tu cáñuhun ni i jeē nátecu ndíyi.

14 Chí nájnūhun cáculdije yó jēe ni jíhī Jesús te ni natecu yā, suni súculan cáculdije yó jēe nastecu Yaā Dios táca ñáyuu ni cáculdije nuū Jesús te ni cájihī.

15 Jeē yúculan cáculstūhun rí ñn jnūhun jeē ní castūhun máá Jítóho yō nuū rī: Jeē yohó jēe cátecu gā quivī ndíji máá Jítóho yō, nasūu máá yó cosnúu jēe ndaa yó quíhīn yō. Chí xīhna gā ñayuu je ni cájihī ndaa i quíhīn i.

16 Chí máá Jítóho yō nuu ya quíji ya ichi ándiví, te cana jee ya jeē maá yá ndácu jniñu, te cana jee ndajéhé cujéhu ga, te cuecu trompeta Yaā Dios. Te xīhna gā natecu táca ndíyi jeē ní cacandije Cristo.

17 Yūculán na te yohó jeē cátecu gā yō quivī ndíji ya, suni ndonehen ya yohó jíin i, quíhīn yō mēhñu vícō. Te naquíjnáhan yó jíin máá Jítóho yō sava ándiví. Te súculan condee yō ní cáni jíin máá Jítóho yō.

18 Núu súculan te jíin jnúhun yáha cáculhān ndeyí ni rō jíin táca jnáhan ró.

5

1 Te tu jíni ñuhún jēe tée ri nuū carta yáha síquī cuiyā chí quívi jeē coo táca un, hermano.

2 Chí je cájini vāha ró jēe ñn sanaa ni yō te quee quivī ndíji máá Jítóho yō, nájnūhun ñn sanaa ni yō te quíji ñacuíhna jecuáā.

3 Chí ná-ni cáculhān ñayuu jeē nayúú-ni íin te tú na jnúndóho coo, te ná-ni cáculhān i súculan te ñn sanaa ni i te quíji jnúndóho síquī i jeē náā i, te ma cácu cuiñi i. Chí quíji quivī un nájnūhun ñn sanaa-ni te quéjéé jéhdē chíji ñn ñahan scácu sēhe.

4 Te róhó hermano, tu cáculu ró ñáyuu cájica nájnūhun nuū néé jeē ñn sanaa-ni

te quiji quivī un síquī rō nájñūhun quiji ñacuīhná.

⁵ Chi ndihī rō cácuu ñayuu jeē nájñūhun cájica rō nduú, chi stéén luz yā ini anuá rō. Chi tu cácuu yó nájñūhun ñayuu jeē tu jécūhun ni síquī Yaā Dios, jeē nájñūhun cájica i nuū néē.

⁶ Núu súcuan te ma cúhuun ni yō nájñūhun ñayuu cáquixī, chi sa ndito na cóo ni yō te coo cájí xínī yō.

⁷ Chi jecuáā cúu jeē cáquixī ñayuu, te suni jecuáā cúu jeē nájñi i.

⁸ Te máá yó chi nájñūhun jeē cájica yó nduú, te na cóo cájí xínī yō. Te na cúcutú yó jíin jnúhun cándíje nihin yó jíin jnúhun cúndáhú ni yō jnáhan yó, nájñūhun cúcutú soldado jíin sahma cáa. Te na cúcutú yó jíin jnúhun jeē cáñuhun ni yō jeē cācu yó, nájñūhun cúcutú soldado jeē ñúhun lélú cāa xínī de.

⁹ Chi Yaā Dios tu ní jéni ya yohó jéē cuáha ya castigo yohó, chi sa suhva jeē jnama ya yohó sáha máá Jítóho yō Jesucristo.

¹⁰ Te máá yá ni jihī yā jehē yō, návāha cotecu inuú yó jíin yá, vésú núu cotecu gā yō ñayivī yáha chí cúu yō.

¹¹ Núu súcuan te cahān rō jnúhun ndeyí ni jíin táca jnáhan rō, te scuéhnu jnáhan rō jíin jnúhun ya, nájñūhun je cásáha rō.

Jeē jéni ichí Pablo tācá hermano

¹² Te cácahān ndahú rí jíin rō hermano, jeē cuatáhú rō tēe cájejniñū cándito rōhó, jeē cácujeñnu de nuū rō jíin jniñū máá Jítóho yō, te cájeni ichí de rōhó.

¹³ Te coo yíñúhún ndasí rō nuū de, te coo manī rō jíin de síquī jniñū ya jeē casáha de. Te na cóyūcu manī rō jíin táca jnáhan rō.

¹⁴ Te suni cácahān ndahú rí jíin rō hermano, jeē na stíhvī ni rō ñayuu cájica cúxí. Te cahān rō jnúhun ndeyí ni jíin ñayuu jeē yachī ndínuu ni i. Te chindéé ñáhán rō ñayuu jeē tu fuerza ini. Te cuandeyí ni rō jíin ndihī ñayuu.

¹⁵ Te coto má nasáha ndevāha ro jíin ni ññ ñayuu te núu sáha ndevāha i jíin rō. Chi máni jeē váha nducú rō sáha rō jíin táca jnáhan rō jíin ndihī-ni ñayuu.

¹⁶ Níní na cóo sī ni rō jijnáhan rō.

¹⁷ Te níní na cácan tahú rō.

¹⁸ Te nacuatáhú rō jeē síquī tācá-ni. Chi súcuan cúní Yaā Dios jeē sáha rō jéē cácaandíje rō Cristo Jesús.

¹⁹ Te ma cási rō nuū jniñū jeē sáha Espíritu Santo jíin rō.

²⁰ Te ni ma cujéē ni rō nuū jnúhun cácahān tēe cánacani jnúhun Yaā Dios.

²¹ Chi coto ndee rō tāca jnúhun, te núu jeē váha cúu, te cuatáhú rō.

²² Te ma quivī nduu rō jíin ni ññ jniñū néé.

²³ Te máá Yaā Dios jeē jéhe jnúhun ndeyí sī ni, ñúhun ni rī jeē sáha ndihī ya jeē cóo ndoo coo i rō nuū yā. Te ñúhun ni rī jeē cóndito vāha ya anuá rō jíin jéē níjnūnī rō, jíin yiqui cúñu rō, návāha tú na cuēchi coo síquī rō quivī ndíji máá Jítóho yō Jesucristo.

²⁴ Chi Yaā jeē ní cana rōhó, sáha ya ndihī un jíin rō, chi squícu ya jeē ni jéjnūhun ya.

Saludo jíin bendición jeē sándíhí

²⁵ Hermano jijnáhan rō, cacān tahú rō jehē rī jijnáhan rī.

²⁶ Te núu na cáhán rō jíin táca hermano, te techūhu yíñúhún rō ndaha i.

²⁷ Te cáhán nihin ri jíin rō, chi súcuan cúní máá Jítóho yō, jeē na cáhu rō carta yáha núu tācá hermano.

²⁸ Te ñúhun ni rī jeē máá Jítóho yō Jesucristo na sáha ga yā jeē váha rōhó. Súcuan na cóo. Amén.

CARTA UU JEE NI TEE APOSTOL SAN PABLO NUU ÑAYUU ÑUU TESALONICA

¹ Máá rí cúu Pablo jiín Silvano jiín Timoteo, te cátee ri carta yáha cuájeē nuū rohó ñáyuu cávandíje ñuu Tesalónica, jeē cáyihí ró ndaha Tatá yō Yaā Dios jiín Jítóho yō Jesucristo.

² Te cáñuhun ni rī jeē Tatá yō Yaā Dios jiín Jítóho yō Jesucristo, na sáha ga yā jeē váha rōhó, te sáha ya jeē coo ndeyí coo siñ ni rō jijnáhan ró.

Jeē sándaā yā cuēchi quivī ndíji Cristo

³ Cánuú jéē niní nacuatáhu rí nuū Yaā Dios jeē siquī rohó jijnáhan ró hermano. Chi súcuan íyó váha, chi yōhyo váha cuahije ró jín jnūhun jeē cávandíje ró yá, te yōhyo cuanducuehē jeē cávandáhu ni rō táca jnáhan ró.

⁴ Te jeē yúcuan cúu jeē cácusī teyí ni rī canacani ri jnūhun ró nuū táca grupo ñayuu cávandíje nuū Yaā Dios. Chi váha cávandíje ró, te váha cájendeyí ni rō jeē cájito xeē ñayuu rohó jín jéē cándoho ró táca gá jnūndóho.

⁵ Te jín táca jéē yáha chíhi ya cuenta jeē cácuu ró ñáyuu váha jeē quívicoo ró ñuu nuū ndácu ya jniñu. Chi siquī ñuu un cúu jeē cándoho ró. Te jeē súcuan chíhi ya cuenta siquī rō, yáha stéén nuū yō jeē váha Yaā cúu ya.

⁶ Te suni íyó váha jeē nastóho ya ñayuu castóho rōhó.

⁷ Te quivī ndíji Jítóho yō Jesús, quivī un sáha Yaā Dios jeē ndétātu rōhó jéē cándoho, te suni ruhū jijnáhan ri. Chi jín yáñuhūn quiji Jesús ichi ándiví jín táca ndajéhé yā jeē ndíso poder.

⁸ Te cuáha ya castigo nuū ñáyuu jeē tu ní cájēhe i jnūhun cuni i ndese Yaā cúu Yaā Dios, te tu ní cájetáhu i jnūhun máá Jítóho yō Jesucristo jeē jnáma ya i.

⁹ Te ñayuu ún chi ndoho i ñí cáni, chi cujiyo i nuū máá Jítóho yō, te ma cúu quívicoo i nuū lúu ndasí cújēhnu ya jín poder yā.

¹⁰ Súcuan sáha ya quivī ndíji ya jeē lúu cújēhnu ya sáha ñayuu cávandíje jeē yíhi ndaha ya. Te nahán naa ni i coto i nuū yā. Te suni súcuan rōhó jijnáhan ró, chi ni cávandíje ró jnūhun jeē ní canacani ri nuū rō.

¹¹ Te jeē yúcuan cúu jeē niní cájicān tahu rī jehē rō, jeē na cúu ró ñáyuu váha jeē ní cana ya rohó. Te jín fuerza yā na sáha ya jín ró jeē siquī ró táca jniñu váha jeē ní catee ni rō sáha ró síquī jeē cávandíje ró.

¹² Te súcuan te cújēhnu máá Jítóho yō Jesucristo sáha ró, te suni cújēhnu máá ró jijnáhan ró sáha ya. Chi Yaā Dios yō jín Jítóho yō Jesucristo, súcuan cúu jeē sáha ya jeē váha yóhó.

Jnūhun siquī maá té sáha xeē cuēchi

2

¹ Vijna te cahān rī siquī jeē ndíji máá Jítóho yō Jesucristo jiín jéē ndutútú yó nuū yā. Cácahān ndahú rí jín ró jijnáhan ró hermano,

² jeē ma cuáha ró jnūhun sacā nuu cani ni rō, ni ma cunéé ni rō nuū cácahān ñayuu jeē jé ni quee quivī ndíji máá Jítóho yō. Ma candíje cuiti rō vésú nuū cahān i jeē ni níhīn i ñn jnūhun siquī un nuū Espíritu, chí ñn jnūhun jeē ni cáhān inga, chí núu cachi i jeē ruhú jijnáhan ri ni tají ñn carta jeē cahān súcuan.

³ Ma cuáha cuiti rō jnūhun jeē stahú ni ñn i rōhó. Chi nde ná tu quiji quivī ún te xihna gā ndunīhni ni cuehē ñayuu nuū yā, te quenda ndijin máá té sáha xeē cuēchi, te tēe jnáhnū ndetū cúu máá téé ún.

⁴ Chi tēe jító uhū Yaā Dios cúu de, te ndonda de contra siquī táca jéē casnání i yā i jín táca jeē cáchiñúhún i. Te xeē gā sáha de, chi nde cucōo de ini templo Yaā Dios jeē iyó Jerusalén, te cahān de jeē maá de cúu Yaā Dios.

⁵ ¿A cánahán ró jnūhun yáha? Chi súcuan ni cahān rī jín ró ná ni iyo ri jín ró.

⁶ Te je cájini rō ndé vé cúu jeē jési jeē ná tu quenda ndijin tēe ún, chi nde na quee quivī maá de.

⁷ Chi je jícu sāhi táca cuēchi xeē ini ñayiví, te vijna chí íyó jéé jési nuū, návaha ma cáa ndasí gá cuēchi, chí nde na cújiyo máá jéé jési nuū.

⁸ Te sáa te quenda ndijin maá tée xeēn ún. Te máá Jítóho yō Jesús cahni ya tēe un jíin táchī yuhu-ni ya, te jíin jēe ndíndēe yá ndiji ya te snáhnú ndetū yā de.

⁹ Te jeē quiji tēe xeēn ún chi máá Satanás sáha. Te quiji de jíin cuéhē poder, te sáha de táca jniñu jéhu jeē stahú de, jeē nahán naa ni ñayuu coto i.

¹⁰ Te jíin táca jniñu née te stahú ndasí de ñayuu jeē jnahnú ndetū, chi tu ní cúní i cuatáhú i jnūhun ndaā jeē cácu i núú.

¹¹ Te jeē yúcuan cuáha Yaā Dios jnūhun jeē cuatáhú i jnūhun jeē tú ndaā cuiti, te candíje i jnūhun stahú un.

¹² Te súcuan te jecondee cuēchi siquī ndihi i jeē tu ní cá candíje i jnūhun ndaā, chi sa jniñu née ni cacusī ni i jíin.

Ñayuu jeē ní nacāji ya jeē cācu i

¹³ Te cánuú jēe niní nacuatáhú rí jijnáhan ri nuū Yaā Dios jeē siquí rohó jēe cácuu ró hermano jeē maní Jítóho yō jíin. Chi nde ná ni jecōo ñayiví, te je ni nacāji Yaā Dios rohó jēe jnáma ya rohó. Chi sáha Espíritu yā jeē cáhiyo ndoo cáhiyo i rō nuū yā te cá candíje ró jnūhun ndaā.

¹⁴ Chi jeē yúcuan ní cana ya rohó jíin jnūhun jeē jnáma ya yohó jeē ní canacani ri, návāha quivícoo ró núú cujéhu luu ró jíin máá Jítóho yō Jesucristo.

¹⁵ Núú súcuan te cuiñi ñihin ró hermano, te conahán váha ró jnūhun jeē ní cacutūhva ró núú rī, núú jeē ní cacahān rī chí jēe ní tee ri nuū carta.

¹⁶ Máá Jítóho yō Jesucristo jíin Tátá yō Yaā Dios ni cundáhú ni yā yohó, te ni sáha ya jeē coo sī ni yō ñí cáni, jíin jēe ñūhun ni yō táca jēe váha jeē coo siquī jeē váha ni yā jíin yó.

¹⁷ Te na sáha ga yā jeē cóo ndeyí ni anuá rō jijnáhan ró, te na sáha ya jeē íje ró cáhān rō táca jnūhun váha ya, te sáha ró táca jniñu váha.

Jeē na cácan tahú i jehē de

3

¹ Te iyó inga jnūhun cánuú, hermano. Na cácan tahú rō jehē rī jijnáhan ri, návāha yachī cuitē núú jnūhun máá Jítóho yō, te cuatáhú váha ñayuu, nájnūhun ni cajetáhú máá ró.

² Te suni cacān tahú rō jeē na cácu ri nuū táca tée cása ha née jēe cátejnáhan jíin rí. Chi tú ndihi tēe cá candíje jnūhun ya.

³ Te máá Jítóho yō chi váha squícu ya jeē ni jéjnūhun ya, te sáha ya jeē íje ni táca ró jíin jnūhun ya, te coto ya rohó núú jeneé.

⁴ Te cá cucáhnu ni rī sáha máá Jítóho yō, jeē cócuu ró jíin jniñu jeē ní candacu ri nuū rō, te suni cocuu ga rō jíin.

⁵ Te ñūhun ni rī jeē maá Jítóho yō steén gā yā ndese coo maní gā rō jíin Yaā Dios nde jíin ini jíin ánuá rō, jíin jēe cuá ndeyí ni rō nájnūhun ni sáha Cristo.

Jeē cánuú sájniñu yó

⁶ Te cándacu ri jniñu nuū rō hermano, chi súcuan ni ndacu máá Jítóho yō Jesucristo, jeē na cújiyo ró núú táca hermano cájica cúxí te tu cájica váha de nájnūhun ni castéén rī nuū rō.

⁷ Chi je cájini rō ndese cánuú ndacu ró rúhū jijnáhan ri, chi tu ní cájica cúxí rí ná ni cahíyo ri jíin ró.

⁸ Ni tu ní cáyeji rī staā ni ñn ró súcuan-ni, chi ni cachunaa rī. Chi sa ni canducú ndeyí rí ni casájniñu téyí rí nduú ñuú, návāha ma stáhān rī ni ñn ró.

⁹ Te vēsú iyó derecho rī jeē cacán rī nuū rō nuú, te tu ní cájcān rī, chi súcuan ni casáha ri návāha cuu ri ñn ejemplo nuū rō ndese sáha ró jijnáhan ró.

¹⁰ Chi ná ni coyūcu rí jíin ró, te ni candacu ri jniñu yáha nuū rō: Núú ndé ñn ñayuu tu cúní i sájniñu i, te suni ma cáji i núú súcuan.

¹¹ Chi ni canihīn rī jnūhun jeē cájica cúxí sava ró, te tu casájniñu ró, chi yáha yúcuan-ni sáha ró.

¹² Te cándacu ri jniñu nuū rohó jēe casáha súcuan, te cástíhví ni rī rohó jeē na cóo nayúú ró te sájniñu ró, návāha ñihīn rō jeē cáji rō siquī jniñu sáha máá ró. Chi súcuan ndácu máá Jítóho yō Jesucristo jniñu.

¹³ Hermano, ma ndínuu ni rō jijnáhan ró sáha ró táca jniñu váha.

¹⁴ Te núú ndé ñn i tu jétáhú i jnūhun jeē cahán rī nuū carta yáha, te condēhe váha ro ndé-ni i cúu, te ma quijnáhan ga rō jíin i, návāha na cúcanu i te nacani ni i.

¹⁵ Te nasūu jēe cóto uhū rō i, chi sa cahān rō jíin i nájnūhun jíin ñani rō jeē na sájniñu váha i.

Bendición jeē sándihí

¹⁶ Te ñúhun ni rī jeē maá Jítóho yō, Yaā jeē jéhe jnūhun ndeyí sī ni, níni na sáha ya jeē coo ndeyí coo sī ni rō siquī tǎcá-ni, te coo ya jín ró jijnáhan ró.

¹⁷ Ruhū Pablo, yāhá-ni cúu jeē tée ri jín ndaha máá rí jeē cahán rī jeē sándeiyí ni rō jijnáhan ró. Te súcuan jéhe ri firma nuū tǎca carta rī, návāha cuni rō jeē carta maá rí cúu. Súcuan cáa letra rī.

¹⁸ Te ñúhun ni rī jeē maá Jítóho yō Jesu-cristo, na sáha ga yā jeē váha ró jijnáhan ró. Súcuan na cóo. Amén.

CARTA HN JEE NI TEE SAN PABLO APOSTOL NUU TIMOTEO

¹ Máá rí cúu Pablo, apóstol Jesucristo, chi Yaā Dios jeē jnáma yóhó, jíin Jítóho yō Jesucristo jeē ñúhun ni yō coto yó, ni catají yá ruhū jeē nácani ri jnúhun ya.

² Te tée ri carta yáha cuájeē nuū rō Timoteo, chi cúu ndije ró nájñuhun sēhe ri siquī jeē ni scándije ri rohó. Te ñúhun ni rī jeē Tatá yō Yaā Dios jíin Jítóho yō Jesucristo, na sáha ga yā jeē váha róhó, te cundáhú ni yā rohó, te sáha ya jeē coo ndeyí coo sī ni rō.

Jeē ma candije i tāca jnúhun stáhú

³ Ná ni quihin ri ichi jeē quihín rī Macedonia, te ni cahān ndahú rí jíin ró jeē quéndōo ró ñuu Efeso. Te suni súcuan cáhán rī jíin ró vijna, návāha cahān ñihin ró jíin sava ñayuu yúcuan jeē ma stéén i inga jnúhun jeē tú ndaā.

⁴ Te ma cuatáhú i tāca jnúhun jeē cúu máá cuento-ni, jíin jnúhun jeē cahán siquī ndese vēji yucūn tāca jíi yō. Chi tāca jéē yúcuan sáha jeē nahán cándajñuhún i siquī, te tu ndé jéjñíñu, te tu sáha jeē lje i squícu i nuū Yaā Dios siquī jnúhun cáncandije yó.

⁵ Te ndácu ri jniñu yáha chi cúní rī jeē na cundáhú ni i jnáhan i siquī jeē iyó ndoo iyó ndaā anuá i, te cáncandije ndije i ya.

⁶ Te sava ñayuu chi ni cajica yátá i, te ni cascuíta i jnúhun ya, ni quíivicoo i nuū tāca jnúhun jeē tu ndé jéjñíñu.

⁷ Chi cáncuni i cuu i maestro ley yā, te ni tu cájecūhun ni i na jnúhun cúu jeē cácahān i, jíin na vé cúu jeē castéén ñihin i.

⁸ Te jíin yō jeē iyó váha ley un, te núu jecūhun ni yō ndese jéjñíñu.

⁹ Chi cánuú sáha yó cuenta jeē tu ní jécōo ni ñn ley jeē siquī ñayuu ndaā, chi sa suhva siquī ñayuu jeē tu cájetáhú, jeē níhni ni, jeē casáha jniñu néé, jeē casáha cuēchi, jeē tu cáchiñúhún Yaā Dios ni tu cáncandije ley yā, jeē cájehni tatá jíin náná, jíin jéē cájehni ndíyi.

¹⁰ Te suni ni jecōo siquī ñayuu cájica jnéni, jíin tée casáha ndíyi jíin jnáhan yí, jíin ñayuu casacuíhná inga ñayuu, jíin ñayuu castáhú,

jíin ñáyuu cácahān ñihin jnúhun yáa. Te ni jecōo siquī tāca gá ñayuu jeē casáha jniñu tu quíjnáhan jíin jnúhun ya jeē steén ndaā váha.

¹¹ Te jnúhun ya un cúu jnúhun yōhyo jéhnú jeē jnáma Yaā Dios yohó. Te yōhyo ndetū Yaā cúu ya. Te ni tejníñu ya ruhū nácani ri jnúhun ya.

Jeē nácuatáhú Pablo siquī jeē ní cundáhú ni yā de

¹² Te nácuatáhú rí nuū Jítóho yō Jesucristo, Yaā ni jēhe fuerza ini rī, chi ni quihin ya ruhū ni sáha ya jeē cuu squícu rī, te ni tejníñu ya ruhū nácani ri jnúhun ya.

¹³ Te súcuan ni sáha ya jíin rí vésú ni cahān ndevāha ri siquī yā nde saá, te ni sáha ndevāha ri jíin ñáyuu cáncandije, te xeēn ni sáha ri. Te vésú súcuan te ni cundáhú ni yā ruhū, chi ná tu candije ri yā nde saá, te tu ní jécūhun ni rī na vé cúu jeē sáha ri.

¹⁴ Súcuan ni sáha Jítóho yō jeē váha ndasí jíin rí. Te ni sáha ya jeē candije ri jíin jéē cundáhú ni rī jnáhan ri siquī jeē ni quívi ri ndaha Cristo Jesús.

¹⁵ Te ndaā ndije cúu jnúhun yáha, te jeē cánuú candije ndíhi ñayuu cúu: jeē ní quiji Cristo Jesús ini ñayívi návāha jnama ya ñayuu iyó cuēchi. Te ruhū cúu téē jeē vihyá gā ni sáha cuēchi.

¹⁶ Te ni cundáhú ni Yaā Dios ruhū, návāha jíin ruhū jeē vihyá gā ni sáha cuēchi te stéén Jesucristo ndese yōhyo íne cáhnu ni yā. Te súcuan ni sáha ya jeē cúu ri ñn ejemplo nuū tāca ñáyuu candije ní cuáhān yō, návāha ñihin tahú i cotecu i ní cáni.

¹⁷ Núu súcuan te ní cáni na cáhán yíñúhún yó jeē yóhyo luu cújéhnú máá Yaā jeē cúu Rey siquī ndíhi, jeē técu ní cáni, jeē tu náa cuíti. Te tu cúu coto yó núu yā vijna, te máá ñn-ni ya iyó, te ndíchí yá. Amén.

¹⁸ Nájñuhun sēhe ri cúu ró Timoteo, te jniñu yáha téjñíñu ri rohó, jéē na ndúcú ndéyí ró siquī jniñu váha. Te na cáncandije váha ró, te na cóo ndaā anuá rō. Chi nde saá je ni cacahān táca hermano jíin jnúhun Yaā Dios jeē súcuan condiso jniñu ró.

¹⁹ Chi sava ñayuu tuá iyó ndaā anuá i nuū yā, te ni casnáa i jnúhun cáncandije i.

²⁰ Himeneo jíin Alejandro cúu uũ tēe ni casáha súcuan. Te je ni siaá rī de nuũ Satanás, jeē stóho ún de, návāha jíin jnúndóho ún te cutúhva de jeē ma cáhán ndevāha ga de siquī Yaā Dios.

Siquī ndese cacān tahu yō

2

¹ Núu súcuan te xīhna gā ndácu ri jeē cacán tahu rō jehē tāca ñáyuu. Te cahān ndahú ró jehē i, te cacān rō na-ni na vé jíni ñúhún i, te nacuatáhú ró nuũ yā jeē siquī i.

² Te cacān tahu rō jehē tāca tēe cácujeñhu jíin jēe ndácu jniñu, návāha sáha de jeē cuu coyūcu váha yó te tú na jnúndóho coo siquī yō, te cuu chiñúhún váha yó Yaā Dios te sáha yíñúhún yó jíin táca-ni.

³ Chi yāha cúu jeē váha jeē nújnahān ni Yaā Dios, Yaā jnáma yóhó.

⁴ Chi máá yá cuní yā jnama ya tāca ñáyuu te cuni i ndese íyó jnúhun ndaā yā.

⁵ Chi íyó ñn-ni Yaā Dios, te suni íyó ñn-ni Yaā jeē cahán jíin Yaā Dios jehē ñáyuu. Te Yaā un cúu máá Jesucristo jeē ní nduu tēe.

⁶ Te ni socō yā maá yá ni jihī yā jeē ní chunaa yā cuēchi ndihī yó. Te ná ni quiji máá quívī ún, te ni quejéé ní canacani jnúhun ún.

⁷ Te jeē siquī yúcuan ní jeni ya ruhū cúu ri apóstol jeē nácani ri jnúhun ya, návāha stéén rī nuũ ñáyuu tācá nación jeē tu jíni jnúhun ya, jeē na cándije i jnúhun ún te sáha i jniñu ndaā. Te siquī jeē candije ri Cristo te ndaā cúu jeē cahán rī.

⁸ Núu súcuan te cúní rī jeē ndihī-ni lugar na cacán tahu tāca tēe. Te na cóo ndoo ánuá de jeē ma quití ni de ni ma tejnáhan de.

⁹ Te suni súcuan tācá ñahan, na cási vāha ña máá ña nájnūhun cánuú, návāha ma cóo jnúhun canu. Te ma cóndihvī ni ña jeē sáha luu ndasí ña xinī ña, chí jēe cuhun ña siquī oro chí perla chí sahma váha ga.

¹⁰ Chi sa suhva na quéndōo luu ánuá ña jíin jniñu váha sáha ña, nájnūhun cánuú sáha ñahan ndoo ánuá jeē cájejniñu nuũ Yaā Dios.

¹¹ Te núu cáhīin ña jíin ñáyuu cascuáha jnúhun ya, te na cúní nahín ña te cuatáhú ña.

¹² Chi tu jéhe ri jnúhun jeē steén ñahan nuũ ñáyuu ndutútú, ni jeē ndácu ña jniñu nuũ tēe. Chi sa suhva na cúní nahín ña.

¹³ Chi xīhna gā Adán ni sáha ya, te sáa te ni sáha ya Eva.

¹⁴ Te tu ní stáhú jexeén Adán, chi sa suhva ni stahú un ñasihí de, te ni sáha ña cuēchi.

¹⁵ Te jeē scácu tācá ña sēhe te coo vāha ña, te núu na quéndōo ña jíin jnúhun cándije ña ya, jíin jēe cundáhú ni ña jnáhan ña, jíin jēe cóo ndoo ánuá ña, jíin jēe sáha yíñúhún ña.

Ndese cánuú coo tēe cándiso jniñu nuũ ñáyuu cáncandije

3

¹ Ndaā cúu jnúhun yáha: Núu ñn tēe cúní de condiso jniñu de condito de ñayuu cáncandije, te vāha jniñu ndúcú de sáha de.

² Núu súcuan te tēe ndíso jniñu nuũ ñáyuu cáncandije, cánuú jeē ma cóo ni ñn jeē nihín ñayuu cuēchi siquī de. Te na cóo ñn-ni ñasihí de, te cáji coo ni de, te ndito coo xinī de, te sáha yíñúhún de. Te cánuú jeē niní cuanúu de vehe nuũ ñáyuu cájica, te níní stéén vāha de jnúhun ya.

³ Te ma cúu de tēe nájiini, te ma tejnáhan de, te ma ndíyo ni de xūhún. Chi sa suhva coo vāha ni de, te coo vitá ni de, te ma cutóo ni de siquī xúhun.

⁴ Te cánuú jēe na ndácu vāha de jniñu ini vehe de, te sáha de jeē squícu vāha sēhe de te coo yíñúhún i nuũ de.

⁵ Chi núu ñn tēe tu jíni de ndacu vāha de jniñu ini vehe de, ¿te ndese cuu condiso jniñu de nuũ ñáyuu cáncandije nuũ Yaā Dios?

⁶ Núu súcuan te tēe ndíso jniñu nuũ ñáyuu cáncandije, ma cúu de tēe jeē saá ní candije, chí núu súcuan te sanaa te sándúxi de máá de, te ñnuú-ni cuēchi jecondée siquī de jíin jēe.

⁷ Te cánuú cuu de tēe jeē suni nde ñayuu tu cáncandije, cuajnúhún i de, návāha ma nihín i cuēchi siquī de, te ma cúndeyí jexeén jíin de.

Ndese cánuú coo tēe cájejniñu mēhñu ñáyuu cáncandije

⁸ Te suni súcuan tēe cájejniñu mēhñu ñáyuu cáncandije, cánuú jēe na cóo yíñúhún de, te na squícu de jíin jnúhun cáhán de. Te ma cúu de tēe nájiini, te ni ma ndíyo ni de xūhún.

⁹ Te na cuíñi nihín de jíin jnúhun cándije yó jēe ní yisāhi ndé jenahán, te na cóo ndoo anuá de.

10 Te cánuú jéē xíhna gā coto ndee rō de, te núu ni jini rō jeē tú na cuēchi de, yūcuán na te cuu cuajniñu de mēhñu ñáyuu cá candíje.

11 Te suni súcuan ñasihí de jíjnahan ña, cánuú coo yíñuhún ña, te ma sajnuhún ña, te cáji coo ni ña, te squícu vāha ña tācá-ni jniñu.

12 Te tēe cájejniñu mēhñu ñáyuu cá candíje, na cóo ñn-ni ñasihí de, te na ndácu vāha de jniñu nuū séhe de jíin nuū ñáyuu vehe de.

13 Chi tāca tēe cájejniñu vāha mēhñu ñáyuu cá candíje, chi vāha quéndōo yíñuhún de, te níhín de modo jeē cáji gá nácani de jnūhun Cristo Jesús jeē cá candíje yó.

Jnūhun sāhi yá jeē cá candíje yó

14 Te vēsú ñūhun ni rī cuajeē yachī rī coto jnāhan yó, te tēe ri jnūhun yāha cuajeē nuū rō,

15 návāha núu cucuéé rí, te je jíni rō ndese cánuú sáha vāha ñáyuu cácuu séhe Yaā Dios. Chi máá i cácuu ñáyuu cá candíje nuū Yaā Dios, Yaā técu. Te máá i cásáha jeē iyó cutú jnúhun ndaā, chi cáhīn nīhin i jíin.

16 Te jendaá ndije chi jéhnu ndasí cúu jnūhun yāha jeē cá candíje yó, jeē ní yisāhi ndé jenahán:

Yaā Dios ni steén yā maá yá, chi ni nduu ya tēe,
te Espíritu ni steén jeē iyó ndáā jniñu ni sáha ya,
te tācá ndajéhé andiví ní cajito jniñu ní sáha ya.

Te ni jité núu jnūhun ya nuū ñáyuu tācá nación,

te ni cacandíje ñáyuu ní ñáyiví núu yā,
te ni ndaa ya cuanuhun yā andiví.

Siquí ñáyuu cájica yátá nuū jnúhun cá candíje yó

4

1 Te cáji steén Espíritu Yaā Dios jeē quiví cuándihí te coo sava ñáyuu caca yátá i nuū jnúhun cá candíje yó. Te cuatáhú i tāca jéē cácahān jnūhun stáhú jíin jnúhun ní castéén tachī.

2 Chi cuni nahín i jnūhun cástéén tēe cástáhú-ni, jeē tu cácahān ndaā de. Chi tēe un ní cahije ndasí ni de jíin jnúhun stáhú, te tuá sáha jíin ánuá de jeē nácani ni de.

3 Te cahān de jeē cuēchi cúu jeē coo ñasihí tēe, te suni súcuan núu caji ñáyuu sava ndeyu. Te ndeyu ún chi ni sáha Yaā Dios jeē cúu ñáyuu cá candíje jeē jíin jnūhun ndaā, návāha caji i te nacuatáhú i nuū yā.

4 Chi ndihí jeē ni sáha Yaā Dios, iyó vāha, te ma squexícó yō ni ñn, chi sa nacuatáhú yó te caji yō.

5 Chi jíin jéē cáhu yó jnúhun Yaā Dios jíin jéē nácuatáhú yó nuū yā, te iyó ndoo ndihí-ni.

Tēe jéjniñu vāha nuū Jesucristo

6 Te núu steén rō jnūhun yāha núu tācá hermano, núu súcuan te cuu ró tēe jéjniñu vāha nuū Jesucristo, te ije ró jíin jnúhun vāha ya jeē candíje ró, chi ni cutūhva ró te ndíquin rō.

7 Te ma quiví nduu rō jíin tāca jnúhun jeē cúu cuento-ni jeē cájeni cāhá ni ñáyuu. Chi níni na scuáha ró ndese chiñuhún vāha ró Yaā Dios.

8 Chi jeē scuáha yó ejercicio jeē cóo ndacuí yiquí cúñu yō, jecu-ni níhín jniñu. Te jeē scuáha yó chiñuhún vāha yó yá, suu yūcuan cúu jeē vāha níhín jniñu siquí tācá-ni, jeē cúu vida yāha jíin vida quiji.

9 Te ndaā ndije cúu jnūhun yāha, te jeē cánuú candíje ndihí ñáyuu cúu.

10 Te jeē siquí yāha cúu jeē sājniñu nīhin yó siquí jnúhun ya te ndóho yó jéē cácahān ndevāha i nuū yō. Chi ñuhún ni yō jeē coto yó núu maá Yaā Dios, Yaā técu. Te máá yá cúu Yaā jnáma tāca ñáyuu, te ñáyuu cá candíje jnūhun cúndáhú ni yā i, máá i cúu jeē jnáma yā.

11 Tāca jnúhun yāha cánuú jéē ndacu ró núu i te steén rō.

12 Ma cuáha ro jnúhun jeē cujéē ni ni ñn i nuū rō siquí jeē suchí ró. Chi sa coo ró ñn ejemplo nuū ñáyuu cá candíje, jeē cúni i ndese vāha cáhán rō, ndese vāha sáha ró, ndese cúndáhú ni rō jnāhan ró, ndese cándíje ró, ndese iyó ndoo ánuá rō.

13 Te níni ndé ná tu jinū rī nuū rō, te condihví ni rō jeē cáhu ró tutu i nuū hermano cándutútú, jíin jéē stihví ni rō i, jíin jéē steén rō nuū i.

14 Ma cúhuun ni rō jíin táhū jeē ni jéhe Yaā Dios nuū rō jeē nácani ró jnúhun ya. Chi tāca tēe jéhnu cándiso jniñu nuū ñáyuu cá candíje, ni casóo de ndaha de xinī rō, te ni sáha Yaā

Dios jeē ní cacahān de jeē súcuan condiso jniñu ró.

¹⁵ Núu súcuan te cocuu ró jíin táca jniñu yáha, te condihví ni rō jíin, návāha cuni tāca ñáyuu jeē váha íje ró cuáhān rō jíin.

¹⁶ Coo cuidado rō jeē caca ndaā rō jíin jeē steén vāha ró jnúhun ya, te cuiñi nihin ró jíin ndihi. Chi núu súcuan sáha ró te quendōo vāha ánuá maá ró jíin ñáyuu chuhun ni jnúhun cáhān rō.

Ndese sáha vāha yó jíin ñáyuu cá candíje

5

¹ Ma cúxeēn rō nuū tāca tée jéhu, chi sa cahān vāha ró jíin de jeē ma stívi de, nájnūhun cáhān rō jíin tátá rō. Te tāca tée suchí, suni cahān vāha ró jíin de nájnūhun jíin ñani rō.

² Te suni súcuan cahān rō jíin táca ñahan jéhu, nájnūhun jíin náná rō. Te suni súcuan jíin táca ñahan súchí, nájnūhun jíin cuáha ró, te yíñúhún ndajnūhun ró jíin ña.

³ Te ñayuu cá candíje na cuáha i jeē jini ñúhún ñahan ni caquendōo ndáhú, te núu ni quendōo ndáhú ndije ña jeē tú na ñayuu condito ña.

⁴ Chi ñn ñahan ní quendōo ndáhú, núu íyó séhe ña chí séhe chání ña jeē jévāha, te na cóto máa i ña. Chi cánuú cutúhva i jeē xíhna gā nuū ñáyuu vehe i squícu i coto i. Te na nácoto i náná i tátá i squícu jeē ní cacondito ña i. Chi yāha cúu jniñu váha jeē nújnahān ni Yaā Dios.

⁵ Te ñn ñahan ní quendōo ndáhú ndije jeē máa ñn na ña, ñúhun ni ña jeē maá Yaā Dios condito ya ña, te tu jécuiñi ña jeē jicán tahu ña nduú ñuú.

⁶ Te sa suhva núu máni ndíhví ni ña squícu táca jéē cúsiñi ni maá-ni ña, yūcuán na te vésú técu ña, te nájnūhun je ni jihí ña.

⁷ Jniñu yáha ndacu ró núu ñáyuu, návāha ma cóo cuēchi squícu i.

⁸ Te núu ñn ñayuu tu ndíto i jnáhan vehe i, te víhyá gā ñayuu ini vehe i, núu súcuan te sáha i jniñu jeē tu quíjnahan jíin jnúhun cándíje yó, te cúu i ñn jeē neé gá vésú ñáyuu tu cá candíje.

⁹ Te ñahan viuda cuu quívi síhví ña nuū lista ñayuu jeē cáchindéé ñáhān ró jíin

xúhun, te núu je ni jínu ña uní xico cuiyā, te núu ni íyo ñn-ni yí ña.

¹⁰ Te suni cánuú jéē cuajnúhún ñáyuu ña jeē váha jniñu ni sáha ña, núu jeē ni scuéhu vāha ña sēhe ña, jíin jéē ní jēhe núu ña vehe nuū ñáyuu cájica, jíin jéē ní jejniñu ña nuū hermano cá candíje, jíin jéē ní chindéé ñáhān ña ñayuu cándoho jnúndóho, jíin jéē ni sáha ña táca gá jniñu váha.

¹¹ Te táca ñahan viuda jeē iyó suchí gá, chi ma soó ró síhví ña nuū lista. Chi sanaa te nducú ña jeē cúsiñi ni maá-ni ña, te ma cóndihví ni ña squícu Cristo, chi cuu ni ña condeca tucu ña tēe.

¹² Te súcuan jecondee cuēchi squícu ña, chi tu ní squícu ña jeē ni jéjnūhun ña ná ni jecosó síhví ña nuū lista.

¹³ Te suni caca cuu ña táca-ni vehe te quee cúxí ña. Te nasūu máni jeē cáca cúxí ña, chi suni squícu jeē sajnúhún ña, te quívi nduu ña cahān ña jnúhun jeē tu íyó váha jeē cáhān ña.

¹⁴ Jeē yúcuān cúní rí jeē táca ñahan viuda jeē iyó suchí, na nándāha ña, te scuéhu ña sēhe, te coto vāha ña vehe ña, návāha ñayuu cácuu contra ma cúu cahān i squícu ña.

¹⁵ Chi sava ñahan viuda je ní cajica yátá ña te sáha ña jniñu jeē cuní Satanás.

¹⁶ Te núu ñn tēe chí ñn ñahan cándíje, núu íyó ñahan viuda vehe i, te na cóto máa i ña. Te ma cóndee gasto ña squícu grupo ñayuu cá candíje, návāha cuu cuáha vāha i nuū ñahan viuda jeē tu ndé ñn coto ña.

¹⁷ Te táca tée jéhu cándito ñayuu cá candíje, na jécunaā doble yāhu de, te núu cándihví ni de cástéén de cánacani vāha de jnúhun ya.

¹⁸ Chi cúu nájnūhun cáhān tutu íi: Ma cánda stiquí caxín tí trigo, núu ma cuáha ró jéē cáji tí. Te suni cáhān: Tēe jeē sájniñu tátú, jíni ñúhún quiyāhu de, áchí.

¹⁹ Ma cuajnúhún ró te núu jéquin ñayuu cuēchi squícu ñn tēe jéhu cándito ñayuu cá candíje te núu tu íyó úu chí úní testigo.

²⁰ Te núu cá sáha ñayuu cuēchi, te cánuú cuxeēn rō nuū i, jíto jínúu ndihi ñayuu, návāha na cónso íyo sava ga i.

²¹ Te cáhān nihin ri jíin ró, jíto máa Yaā Dios jíin Jítoho yō Jesucristo jíin táca ndajéhé yā jeē ní nacáji ya: Squícu vāha ró jniñu yáha, te ma sáha ró cuenta ndese cúu

ñin ñin i, chi inuú-ni sándaā rō siquī ndihi-ni i.

²² Ma cáni yachī rō ñin tēe jeē condiso jniñu de nuū ñayuu cáncandije, chi xihna gā coto ndee rō de. Chi sanaa te stívi de, te cuēchi de suni condee siquī rō jín de. Te coto ró máá ró jeē ma quívi ró jín jniñu néé.

²³ Te siquī jeē núu-ni núu-ni cúhú chíji ró, te ma cóho ga rō máni ndute, chi suni coho ró jecu vino.

²⁴ Cuēchi sava ñayuu chi je íyó ndijin nde ná tu quívi i nuū cúndaā cuēchi i. Te cuēchi sava ga i chí cúcuéé te natūu nahín.

²⁵ Te suni súcuan tǎcá jniñu váha, chí íyó ndijin. Te vésú ná tu natūu jniñu váha ún, te ma cúu quisāhi ní cáni, chí natūu nahín.

6

¹ Tǎca ñayuu cácuu mozo, na cóo yíñúhún váha i nuū patrón i, návaha ma cahán neé ñayuu siquī Yaā Dios jín síquī jnūhun ya jeē castéén yō.

² Te mozo jeē yíhi nuū patrón cáncandije, ma cáni ni i jeē cūhva-ni sáha yíñúhún i nuū de siquī jeē hermano cáncandije cácuu de. Chi sa cuajniñu váha ga i nuū de, chí tēe cáncandije tēe manī i jín cúu tǎca tēe un jēe sájniñu i nuū. Jnūhun váha stéén rō te stíhví ní rō i.

Siquī jeē chíñúhún váha yó yá te cusī ni yō jín cūhva jeē névaha-ni yó

³ Te núu ndé tēe stéén de jnūhun tú ndaā jeē tu quíjnáhan jín jnūhun váha ndaā maá Jítoho yō Jesucristo, jín jnūhun ni steén Yaā Dios jeē cáncandije yó,

⁴ núu súcuan te máni tēe ndúxí tēe tu jécūhun cuiṭi ní cúu de. Chí cánéé xíní de, chí máni cúní de tejnáhan de siquī tǎca jnūhun stéén de. Te tǎcá un sáha jeē cáccuésún ní, jín jēe cátejnáhan, jín jēe cácahán ndeváha, jín jēe cájeni néé ní siquī jnáhan,

⁵ jín jēe máni cástáhán jnáhan. Súcuan cásaḥa tēe jeē ní ndunéé xíní, jeē tu cájini jnūhun ndaā. Te cájeni ni de jeē nihín de cuehē xūhun síquī jnūhun cáncandije de stéén de. Na cújiyo ró núu ñayuu cándaā súcuan.

⁶ Te jendaá jeē yóhyo váha quéndōo yó te núu chíñúhún váha yó yá, te núu cúsiḥ ní yō jín cūhva jeē névaha-ni yó.

⁷ Chí tú na vé ní cácu yó jín ñayívi yáha, ní tú na vé condiso yó quíhín yō jín núu na cúu yō.

⁸ Te núu íyó jēe cáji yō jeē cusúcún yó, te na cúsiḥ ní yō jín yúcuan-ni.

⁹ Chí ñayuu jeē cuní cucúcá, chí yachī quívi i cuēchi jeē jíto ndee jexeén i. Te quívi i jín cuehē jniñu cánéé jniñu stívi jēe ndíyo ní i. Te tǎcá un sáha jeē tívi ñayuu te jnahnū ndetū i.

¹⁰ Chí jeē ndíyo ní yō xūhún, yúcuan sáha jeē quejéé tǎca jniñu néé. Te sava ñayuu jeē ndíyo ní xūhún, ní castóo i jnūhun cáncandije i, te ní canihín i cuehē ndasí jnúndóho.

Jeē na ndúcú ndéyí yó siquī jnūhun cáncandije yó

¹¹ Te róhó chí tēe jéjníñu nuū Yaā Dios cúu ró, te cunu ró coto ró tǎca cuēchi yáha. Te condiquín rō jniñu ndaā, te chíñúhún váha ró Yaā Dios, te cáncandije váha ró, te cundáhú ní rō jnáhan ró, te cuandeyí ní rō, te coo víta ní rō.

¹² Te nducú ndéyí ró siquī jnūhun cáncandije yó yá. Te cuiñi níhin ró jín jnūhun jeē ní níhín tahu yō cotecu yō ní cáni. Chí jeē yúcuan cúu jeē ní cana ya rohó, te cáji ní cahán rō jeē váha cáncandije ró yá, jíto jínúu cuehē ñayuu.

¹³ Te cáhán níhin ri jín ró, jíto máá Yaā Dios, Yaā jeē sáha jeē técu tǎcá-ni, jín Jesucristo, Yaā jeē cáji ní cahán yā ní nacani ya jnūhun váha nuū Poncio Pilato.

¹⁴ Squícu váha ró jniñu ndácu ya nuū rō, te ma stívi ró sáha ró, návaha ma cahán ñayuu cuēchi siquī rō. Te súcuan sáha ró ní ndé quívi ndíji Jítoho yō Jesucristo.

¹⁵ Chí quíji ndijin yā maá quívi jeē ní jeni Yaā Dios. Te Yaā Dios chí máá ñin-ni ya cúu Yaā yóhyo ndetū, te jní ya ndíhi poder. Te cúu ya Rey nuū tǎca rey, jín Jítoho nuū tǎca jítoho.

¹⁶ Te máñúhún-ni ya cúu jeē iyó ní cáni. Te ndéé yá ñin lugar nuū ndí ndaxín, nuū ma cúu quívi yó. Te ní ñin ñayuu ñayívi yáha tu ní jíto cuiṭi i nuū yā, te ní ma cúu coto i nuū yā. Te ní cáni na cóo yíñúhún yó nuū yā, chí jní máá yá poder ní cáni. Amén.

¹⁷ Te cahán rō jín ñayuu cucá ndajniñu ñayívi yáha, jēe ma cúndúxí i. Te ma ténuū i xūhún i, chí yachī naa ún. Chí sa suhva na

ténuū i jeē coo vāha i sáha Yaā Dios, Yaā técu, chi máá yá jéhe cuehē yā tācá-ni jeē cúsh̄ ni yō jíin.

¹⁸ Te ndacu ró jniñu nuū i jeē na sáha vāha i, chi jeē sacúcá ndije i máá i cúu jeē sáha i tācá jniñu váha. Te na cúu i ñayuu vāha ni jeē cuáha i jeē cúu jnáhan i.

¹⁹ Te súcuan caya i cuehē jniñu váha jeē coo cúcá i nuū yā ní tiempo jeē quíji. Te nih̄in tahu i cotecu i ní cáni.

Jniñu sánd̄hi ndácu Pablo nuū Timoteo

²⁰ Te róhó Timoteo, condito ró táca jniñu ní chihi ya ndaha ró. Te ma quívi nduu rō jíin táca jnúhun cāhá-ni, cuenta ñaȳvi yáha, jíin táca jnúhun stáhú jéē cácahān i jeē jnúhun ndíchi ndáa cúu.

²¹ Chi sava ñayuu cándiqūin tāca jnúhun yáha, ni cajica yátá i ni castóo i jnúhun cácaadíje i ya.

Te ñúhun ni rī jeē Yaā Dios na sáha ga yā jeē váha róhó. Súcuan na cóo. Amén.

CARTA UU JEE NI TEE SAN PABLO APOSTOL NUU TIMOTEO

¹ Máá rí cúu Pablo, apóstol Jesucristo, chi súcuan ni nujnahan ni Yaā Dios ni tají yá ruhū jeē nácani ri jnūhun jeē ni jéjnūhun ya jeē cótecu yō ní cáni siquī jeē yíhi yó ndaha Cristo Jesús.

² Te téé ri carta yáha cuájeē nuū rō Timoteo, chi cúu ro nájnūhun sēhe ri jeē maní rī jíin. Te ñūhun ni rī jeē Tatá yō Yaā Dios jíin Jítóho yō Jesucristo, na sáha ga yā jeē váha róhó, te cundáhú ni yā rohó, te sáha ya jeē coo ndeyí coo sīi ni rō.

Jeē nácani de jnūhun Cristo

³ Níní tu náá ni rī cacān tahu rī jehē rō nuū Yaā Dios nduú ñuú, te nácuatáhú rí nuū yā jeē siquí rō. Chi nuū maá yá jejniñu ri, nájnūhun ni casáha táca jíi rī, te íyó ndoo ánuá rī nuū yā.

⁴ Te núcūhun ni rī jeē ni ndáhyū rō ná ni quenda ri cuahān rī. Te cúu ni rī ndacoto jnāhan yó, návāha cusīi ndasí ni rī.

⁵ Te núcūhun ni rī jeē váha ndije cándije ró Cristo, nájnūhun ni cándije náná jéhnú ró Loida, jíin náná rō Eunice xīhna gā. Te cúcāhnu ni rī jeē suni súcuan cándije máá ró vijna.

⁶ Te jeē yúcuan nástíhvī ni rī rohó jéé na cóndíhvī gā ni rō jíin táhū jeē ni jéhe Yaā Dios nuū rō jeē nácani ró jnūhun ya. Te tahu un ní nihīn rō ná ni tee ri ndaha ri xinī rō.

⁷ Chi Espíritu jeē ni jéhe Yaā Dios nuū yō, tu sáha jeē yūhu yó nacani yó jnūhun, chi sa sáha jeē iyó fuerza ini yō, jíin jéé cundáhú ni yō jnāhan yó, jíin jéé ndíto íyó xínī yō.

⁸ Núu súcuan te ma cúcanu rō nacani ndaā rō jnūhun máá Jítóho yō. Te suni ma cúcanu rō jeē siquí maá rí jeē íne ri vecāa siquí jnūhun ya. Chi sa cuāha ró jnūhun ndoho ró jíin rí siquí jeē cánacani yó jnūhun jnáma ya yohó, núu ndese ni jéhe Yaā Dios fuerza ini yō.

⁹ Chi ni jnama ya yohó, te ni cana ya yohó jéé coo ndoo ánuá yō cuajniñu yó núu yā. Te tu ní cána ya yohó siquí jeē váha ni sáha yó, chi siquí jeē ní tee ni maá yá jeē cundáhú ni

yā yohó jéé yíhi yó ndaha Cristo Jesús. Chi nde ná tu jecōo ñayīvī, te je cúndáhú ni yā yohó.

¹⁰ Te vijna jeē ní quenda ndijin Jesucristo, Yaā jnáma yóhó, te ni steén cají Yaā Dios jeē cundáhú ni yā yohó. Chi máá Cristo ni snáa yā poder cuehyī jéhnú yóhó, chi jíin jnūhun jnáma ya yohó ni steén cají yá nuū yō jeē cótecu yō ní cáni chi ma jnahnú ndetū yō.

¹¹ Te ni jeni Yaā Dios ruhū jeē nácani ri jnūhun ún, te ni tají yá ruhū cúu ri apóstol jeē steén rī nuū ñáyuu táca nación jeē tu jíin jnūhun ya.

¹² Te siquí un cúu jeē ndóho ri táca jnúndóho yáha íne ri vecāa. Te tu cúcanu rī, chi jíin rī ndese Yaā cúu Yaā cándije ri, te cúcāhnu ni rī jeē cúu coto ya jniñu jeē ní chihi ya ndaha ri nde vijna te nde quivī ndíji ya.

¹³ Te cuiñi nihin ró jíin táca jnūhun ya jeē steén ndaā, suu jnūhun jeē ní stéén rī nuū rō. Te caca ró jíin jnūhun cándije yó, te cundáhú ni rō jnāhan ró siquí jeē yíhi ró ndaha Cristo Jesús.

¹⁴ Te condito ró táca jniñu váha jeē ní chihi ya ndaha ró, sáha poder maá Espíritu Santo jeē ndeé ini yō.

¹⁵ Je jíin rō jeē táca ñáyuu cáyūcu Asia ni castóo i ruhū. Te uū i cúu Figelo jíin Hermógenes.

¹⁶ Te jíicán tahu rī jeē cundáhú ni Jítóho yō ñáyuu vehe Onesíforo, chi cuehē jíinu ni nanihīn ni rī ni sáha de, te tu ní cúcanu de siquí rī jeē ní ine ri vecāa.

¹⁷ Chi sa suhva ná ni quiji de ñuu Roma, te ni nanducú yúcún de ruhū nde ni nanihīn de ruhū.

¹⁸ Te jíicán tahu rī jeē maá Jítóho yō cundáhú ni yā de quivī ndíji ya. Te je jíin váha máá ró ndese yóhoyó ni chindéé ñáhán de ruhū ná ni cahīyo ri ñuu Efeso.

Jeē cúu yó nájnūhun soldado váha nuū Jesucristo

2

¹ Núu súcuan te róhó, séhē mánī, na cóo fuerza ni rō siquí jeē yíhi ró ndaha Cristo Jesús te sáha ya jeē váha róhó.

² Te tāca jnúhun jeē ní jini ró ní cahān rī, jító jínúū ñayuu cuehē, jnúhun ún na nástéén rō nuū tēe cásquícu vāha, návāha suni cuu stéén tucu máá de nuū sáva ga i.

³ Te róhó na cuándeýí ni rō coto ró jnúndóho, chi cúu ró nájñūhun ñn soldado vāha nuū Jesucristo.

⁴ Ni ñn soldado jeē ín nuū guerra, tu sájñéñu de máá de jíin jñiñu máá de, chi cánuú jeē sáha de máni máá jéē ndácu tēe ní tejñiñu de.

⁵ Te suni súcuan tēe cásiquí deporte, ma nihín de premio te núu tú condihvī ni de cosíquí vāha de máá modo chíjñiñu.

⁶ Te tēe sájñiñu ñihin ñuhun, máá de cúu jeē nihín xihna gā jeē cuáha itu.

⁷ Nacani ni rō siquī jeē cahán rī, te máá Jítoho yō sáha ya jeē jécūhun ni rō siquī ndihi.

⁸ Te cocuhun ndasí ni rō Jesucristo, Yaā ní quiji yucūn rey David, te ni natecu yā mēñu ndíyí, nájñūhun cáhán jnúhun jnáma ya yohó jéē nácani ri.

⁹ Te jeē siquí jnúhun un ndóho ri jnúndóho, te nde ní cajihni i ruhū íne ri vecāa nájñūhun ñn tēe ní sáha cuēchi xeēn. Te jnúhun Yaā Dios chi ma cúu cuhni i jeē ma cuité núu.

¹⁰ Núu súcuan te jéndeýí ni rī jító ri tāca jnúndóho yáha siquī jeē cundáhú ni rī ñayuu jeē ní nacāji ya, návāha suni cācu máá i jeē quívi i ndaha Cristo Jesús, te quihñ i nuū cujéhnu i ní cáni.

¹¹ Chi ndaā cahán jnúhun yáha: Núu vēsú na cúu yō jeē siquí yā, te suni cotecu yō jíin yá,

¹² te núu cuandeýí ni yō ndoho yó, te suni ndacu yó jñiñu jíin yá.

Te núu ma cuajnúhún yó yā, te suni ma cuajnúhún yá yohó.

¹³ Te vēsú tu squícu vāha yó, te máá yá chi máni squícu ya, chi tu cúu sáfalta yā, chi squícu ya jeē ní cahān yā.

Tēe sájñiñu squícu vāha jíin jnúhun ya

¹⁴ Jnúhun yáha na nástíhví ni rō ñayuu, te cahān ñihin ro jíin i, jító máá Jítoho yō, jeē ma téjñahan i siquī tāca jnúhun sáa-ni. Chi tu ndé jéjñiñu cuiti, chi sa stívi ñayuu jíin sōho.

¹⁵ Te nducú ndéýí ró jeē cuajnúhún Yaā Dios rohó, jéē cúu ró tēe sájñiñu squícu vāha jíin jnúhun ya, návāha ma cúcanu rō nuū yā siquī ní ñn, chi vāha nacani ró jnúhun ndaā yā.

¹⁶ Te ma quívi nduu rō jíin táca jnúhun sáa-ni ñayívi yáha, chi suu sáha jeē ndúcuehē gā jñiñu néé quívicoo ñayuu cácahān.

¹⁷ Te tāca jnúhun cástéén i chi cúu nájñūhun ñn ndíhyi xeēn jeē sacáhú gá cuahān. Te Himeneo jíin Fileto cúu uū tēe jeē casáha súcuan.

¹⁸ Chi tēe un ní cajica yátá de nuū jnúhun ndaā, te cácahān de jeē jé ni cuu ni canatecu ndíyí. Te súcuan cásaca nuu de xinī sava ñayuu cácañdije.

¹⁹ Te Yaā Dios ni jeni ya ñayuu maá yá, te íyó cutú ndaā i jeē ma cáca yátá i, nájñūhun yósó núu tútu íi: Je jíin Jítoho yō Yaā Dios tāca ñayuu jeē yíhi ndaha máá yá. Te suni cáhán: Tāca ñayuu jeē ndácunehen síhví Cristo, na cújiyo i nuū jñiñu néé, áchí.

²⁰ Te ini ñn vehe cáhnu íyó cuéhē cohō, nasūu máni cohō oro cohō plata, chi suni cohō yujnu cohō ñuhun. Te íyó jéé fino te íyó jéé corriente.

²¹ Te núu ñn ñayuu sándoo i máá i jeē quénda i nuū tācá jñiñu néé, te cuu i nájñūhun ñn cohō fino. Te coo ndoo coo íi i nuū Jítoho yō, te nihñ jñiñu i ndese cúní maá yá. Te coo tūhva i jeē sáha i tācá jñiñu vāha.

²² Núu súcuan te cunu ró coto ró táca jéé tú vāha jeē cándiyo ni tēe suchí. Te condiquñ rō jñiñu ndaā, jíin jnúhun cándije ró yá, jíin jnúhun cundáhú ni, jíin jnúhun coyūcu máni jíin jnáhan. Te súcuan sáha ró ndé jíin táca ñayuu ndoo ánuá jeē ndácunehen síhví máá Jítoho yō.

²³ Te ma quívi nduu rō jíin táca jnúhun cánéé íi jeē tu íyó cájí, chi je jíin rō jeē sáha jeē tejñahan ñayuu.

²⁴ Te mozo máá Jítoho yō, tú vāha jeē tejñahan de, chi sa suhva cánuú jéé coo vāha ni de jíin táca ñayuu. Te coo vāha ni de stéén de, te cuandeýí ni de jíin i.

²⁵ Te jíin jéé víta ni de te cani ichí de ñayuu ñihni ni. Chi sanaa te nacani ni i sáha Yaā Dios, te jécūhun ni i ndese íyó jnúhun ndaā.

²⁶ Te nducájí ni i te cācu i nuū jexeén jeē ní jñi ún i, chí ni cundeyí jíin i jeē sáha i jeē cuní maá.

Siqui ndese coo ñayuu sáha néé quiví cuándihí

3

¹ Te suni na jécūhun ni rō jeē quiví cuándihí te quee quiví coo jñūndóho.

² Chí coo ñayuu jeē chiñúhún máá, te ndiyo ni i xūhún, te sátéyí máá i, te sándúxí i máá i. Te cahān neé i siquí Yaā Dios, te cunīhni ni i nuū tatá i nuū naná i, te ma nácuatáhú i, te ma chiñúhún i Yaā Dios.

³ Te ma cóo maní i jíin jnáhan i ni ma cundáhú ni i. Te sájnúhún i, te ma cúu casi i tāca jéē ndíyo néé ni i, te yōhyo xeēn coo i, te quití ni i coto i tācá jñiñu váha.

⁴ Te suni nastúu i jnáhan i, te ma yūhú i sáha i cuēchi, te coo ndúxí ndasí i, te nducú i jeē cúsi ni maá-ni i, te ma nducú i quiví i nuū Yaā Dios.

⁵ Te sáha-ni i jeē chiñúhún i ya, te casi i nuū poder yā jeē ma sáma modo i.

Ma quiví nduu rō jíin ñayuu casáha súcuan.

⁶ Chí sava tēe ún quiví de vehe te stáhú de tācá ñahan cánéé jéē iyó ndasí cuéchi. Te yachí quiví coo ña jíin táca jnúhun tú ndaā jeē cúsi ni ña jíin.

⁷ Te vésú niní scuáha ña na-ni jñūhun, te tu cúu cuítí jecūhun ni ña jñūhun ndaā yā.

⁸ Te nájnūhun ni casáha tēe tásí Janes jíin Jambres jenahán, jeē ní canducú de casi de nuū Moisés, suni súcuan sáha tēe ún, chí nducú de casi de nuū jnúhun ndaā. Chí coo nee jeē níjnūní de, chí ma candíje ndije de jñūhun cándíje yó.

⁹ Te ma queé jñiñu sáha de, chí cuni tāca ñayuu jeē tēe cánéé xíní cácuu de, nájnūhun ni cajini ñayuu jeē ni íyo néé xíní ndíndúú tēe jeē ní nducú casi nuū Moisés.

Jñiñu sándihí ndácu Pablo nuū Timoteo

¹⁰ Te rōhó chí je ni cutūhva váha rō ndese stéen rī, ndese jíca ndaā rī, ndese tēe ni rī sáha ri, ndese cándíje ri yā, ndese néé ri paciencia, ndese cundáhú ni rī jnáhan ri, jíin ndese jéndeyí ni rī.

¹¹ Chí ni cajito xeēn ñayuu ruhū, te ni ndoho ri jñūndóho. Te jíin rō tāca jéē ní

ndoho ri ñuu Antioquía, ñuu Iconio, jíin ñuu Listra. Te jíin rō ndese ni cajito xeēn i ruhū. Te máá Jítóho yō ni jnama ya ruhū nuū ndihí ún.

¹² Chí ndaā cúu jeē tāca ñayuu jeē ndihví ni cuajniñu váha nuū Cristo Jesús, ndoho i jeē coto xeēn ñayuu i.

¹³ Te ñayuu casáha jñiñu néé jíin ñayuu castáhú, chí sa víhyá gā cocuu i jíin jñiñu néé, chí stáhú i ñayuu, te suni candíje máá i jñūhun stáhú.

¹⁴ Te rōhó chí sa cuiñi nihin rō jíin jéē ní cutūhva rō jíin jéē ní cucáhnu váha ni rō. Chí jíin rō ndese ñayuu cúu jeē ní castéén nuū rō.

¹⁵ Chí nde ná lulí rō, te je jíin rō ndese cáhán tutu íi jeē steén nuū rō ndese candíje rō jeē ni jíin Cristo Jesús jehē rō návāha cācu rō.

¹⁶ Te ní tutu íi cúu jñūhun jeē ni cáhān Yaā Dios, te váha níhín jñiñu jeē steén nuū yō, jeē cáhán nuū yō, jeē náchuhun ichí yóhó, jíin jéē scuéhnu yóhó jíin jñiñu ndaā,

¹⁷ návāha tēe cájejniñu nuū Yaā Dios, ije ni de te coo tūhva váha de sáha de tācá jñiñu váha.

4

¹ Te cáhán rī jíin rō, jíto Yaā Dios jíin Jítóho yō Jesucristo, Yaā quiji ndacu jñiñu, te sándaā yā jñiñu ñayuu cátecu jíin ñayuu ní cajihí.

² Cáhán nihin ri jeē na nácani rō jnúhun ya, te stíhví ni rō i candíje i. Te níní sáha rō súcuan núu núne i chí vésú tu núne i. Te sáha rō jéē na jécūhun ni i, te cahān rō nuū i, te caní ichí váha rō i, te jíin cuéhē paciencia steén rō nuū i.

³ Chí quee tiempo jeē ma cuájnúhún cuítí ñayuu jñūhun ya jeē steén ndaā váha, chí sa cuajnúhún i jñūhun cúsi ni maá i, te nducú i cuehē maestro jeē steén nuū i máni jñūhun jeē nújnahan ni i cuni nahín i.

⁴ Te cujiyo i nuū jnúhun ndaā, te condíhví ni i tāca jnúhun jeē maá cuento-ni cúu.

⁵ Te rōhó chí níní coo ndito ni rō, te cuandeyí ni rō jíin jñūndóho, te condíhví ni rō nacani rō jnúhun jnáma ya yohó, te squícu váha rō jíin jñiñu ya jeē sáha rō.

⁶ Te ruhū chí je ni socō rī maá rí jeē cúu rī, te je cuacuyajni quiví cuu rī.

⁷ Te je ni cundeyí rí jeē ní nducú ndéyí rí siquī jniñu váha, te je ni jīnu ni jica ri ñayīvi yáha, te tu ní siáá rī jnūhun cándíje ri yā.

⁸ Te vijna je íyó túhva premio jeē nihín rī siquī jeē ní jica ndaā rī. Chi Jitoho yō cuāha ya un núū rī maá quívī sándaā yā jniñu, chi maá yá cúu juez ndaā. Te nasūu núū maá ìin ruhū cuāha ya, chi suni cuāha ya nuū tāca ñáyuu jeē cúu ni i jeē ndíji ya chi manī i jīn yá.

Jeē cána Pablo quiji Timoteo nuū de

⁹ Nducú ndéyí ró quiji yachī rō nuū rī.

¹⁰ Chi Demas ni stóo de ruhū, chi ndíyo ni de ndajniñu ñayīvi yáha, te cuahān de ñuu Tesalónica. Te Crescente chi cuahān de Galacia, te Tito cuahān de Dalmacia.

¹¹ Te máá ìin na Lucas íne jīn rí. Te jeē quíji ró, te condeca ró Marcos quiji ró jīn de, chi vāha cuajniñu de jeē chindéé ñáhán de ruhū jīn jniñu ya.

¹² Tíquico ni tají rí de cuahān de ñuu Efeso.

¹³ Te jeē quíji ró, te condaha ró cotón jeē ni stóo ri vehe Carpo ñuu Troas. Te suni condaha ró tāca libro, te jeē cánuú gá cúu tācá tutu ní tee máá rí.

¹⁴ Alejandro, tēe cúu herrero, yōhyo xeēn ni sáha de jīn rí. Te máá Jítoho yō cuāha ya yāhu de jeē súcuan ní sáha de.

¹⁵ Te condito ró máá ró nuū de, chi yōhyo ni cuu de contra siquī jnūhun cástéén yó.

¹⁶ Te ná ni ine ri jeē xíhna ñúhún núū tāca tóhō, te tú ni ìin tēe ní índichi jīn rí, chi ndíhi de ni castóo de ruhū. Te ñúhun ni rī jeē Yaā Dios cone cáhnu ni yā nuū de.

¹⁷ Te vēsú súcuan te máá Jítoho yō ni chindéé ñáhán yá ruhū, te ni jēhe ya fuerza ini rī, te súcuan ni sínu ri ni nacani ndíhi ri jnūhun jnáma ya yohó, ni cajini nahín ñáyuu tācá nación tu jíní jnūhun ya. Súcuan ni jnama Jítoho yō ruhū nuū tāca tēe xeēn.

¹⁸ Te jnama ga yā ruhū nuū tācá jniñu néé, te condito ya ruhū nde quívī ri andíví núū ndácu ya jniñu. Te na cáhán yō jeē yóhyo luu cújéhnu ya ní cáni. Amén.

Saludo jīn bendición jeē sándíhí

¹⁹ Te cahān rō jeē sándeýí ni Prisca jīn Aquila, jīn ñáyuu vehe Onesíforo, achí rí.

²⁰ Erasto ni quendōo de ñuu Corinto. Te ni quendōo Trófimo ñuu Mileto, te cúhú de.

²¹ Te condíhvī ni rō quiji ró nde ná tu quejéé vico míjin. Sándeýí ni rō, achí Eubulo jīn Pudente jīn Lino jīn Claudia jīn táca gá hermano.

²² Te ñúhun ni rī jeē maá Jítoho yō Jesucristo na cóo ya jīn ró, te Yaā Dios sáha ga yā jeē váha róhó jijnáhan ró. Súcuan na cóo. Amén.

CARTA JEE NI TEE SAN PABLO APOSTOL NUU TITO

¹ Máá rí cúu Pablo, mozo Yaā Dios jíin apóstol Jesucristo, chi ni tají Yaā Dios ruhū jeē scándíje ri ñayuu ní nacāji ya, návāha jecūhun ni i jnūhun ndaā yā jeē candíje yó,

² te cocuhun ni i jeē cótecu i ní cáni. Chi nde ná tu jecōo ñayívi te ni jejnūhun Yaā Dios jeē cótecu yō, te íyó ndāā jnūhun ni cahān yā.

³ Te vijna jeē ní quee tiempo ni jeni ya, te stéén cají yá jnūhun ya nuū yō. Te ni tejníñu ya ruhū ni ndacu ya jniñu jeē nácani ri jnūhun ya ún. Chi Yaā jnáma yóhó cúu ya.

⁴ Te tée ri carta yáha cuájeē nuū rō Tito, chi nájnūhun sēhe ri cúu ndíje ró síquī jeē ínuú-ni cándíje yó yá. Te ñūhun ni rī jeē Tatá yō Yaā Dios jíin Jítoho yō Jesucristo, Yaā jnáma yóhó, na sáha ga yā jeē váha róhó, te cundáhú ni yā rohó, te sáha ya jeē coo ndeyí coo sī ni rō.

Jniñu ya jeē ni sáha Tito nde isla Creta

⁵ Te ni stóo ri rohó ndé isla Creta, návāha sándaā rō síquī jniñu jeē cúmani gā cundaā, te caní ró táca tée jéhnū condito ñayuu cáncandíje táca ñuu, nájnūhun ni ndacu ri jniñu nuū rō.

⁶ Te tēe jéhnū un cánuú jeē ma cóo ni ñn jeē nihín ñayuu cuēchi síquī de. Te cánuú coo ñn-ni ñasihí de. Te sēhe de cánuú cuu i sūchi cáncandíje jeē ma nihín ñayuu cuēchi síquī i jeē tu sáha vāha i chí jéē níhni ni i nuū de.

⁷ Chi tēe cácujehnū cáncandíje jniñu nuū ñayuu cáncandíje, cánuú caca ndaā de chí cáncandíje jniñu de síquī jniñu Yaā Dios. Te ma satéyí de máá de, ma quití yachí ni de, ma cúu de tēe nájiñi, ma cuajnáhan de, te ma ndíyo ni de xūhún.

⁸ Chi sa cánuú jéē niní cuāha núu de vehe nuū ñayuu cájica, te níní sáha de jniñu váha, te ndito coo xiní de, te coo de tēe ndaā, te coo ndoo ánuá de, te casi de modo jeē cuní máá de.

⁹ Te cánuú cuñi níhin de jíin jnúhun ndaā jeē ni scuáha de, návāha cuu stíhví ni de ñayuu jíin táca jnúhun ndaā vāha, te suni cuu

sáha de jeē jécūhun ni ñayuu cácuu contra, te casi i yuhu i.

¹⁰ Chi íyó cuéhē ñayuu níhni ni, te cástéén i inga modo jéni ni maá i jeē súcuan cácu ñayuu, te stáhú i ñayuu. Te jnáhan yó hebreo cúu jeē vihyá gā casáha súcuan.

¹¹ Te cánuú jéē casi rō yuhu táca tée ún, chi cástéén de jnūhun jeē tu íyó váha stéén de, chí cuní de nihín de xūhun síquī ún. Te súcuan sáca nuu de xiní ndíhi ñayuu táca vehe.

¹² Te ñn tēe isla Creta jeē nácani jnūhun, ni cahān de síquī jnáhan ñuu de: Jnáhan yó ñayuu Creta, chí máni ñayuu stáhú cácuu i, te nájnūhun quití xéén casáha i, te máni ndíhví ni i cají cuehē i, te cúxí i, áchí de.

¹³ Te ndaā cúu jnūhun ni cahān tēe ún. Jeē yúcuan na cúxeén rō nuū i, návāha ndaā vāha na cándíje i.

¹⁴ Te ma sáha i cuenta táca jnúhun ni catava jnáhan yó hebreo, jeē máá cuento-ni cúu, ni ma squícu i jniñu cáncacu tēe ni quendacoo nuū jnúhun ndaā.

¹⁵ Te ñayuu jeē ní ndundoo jeē níjnūní, máni modo iyó ndoo íyó váha jéni ni i jito i táca-ni. Te ñayuu tu cándíje jeē tu ní ndúndoo jeē níjnūní, máni jéni ni i ñn modo tú ndoo tú váha síquī táca jéē jito i. Chi nde jeē níjnūní i jíin ánuá i íyó jnéhén.

¹⁶ Te vésú cácahān i jeē jiní i Yaā Dios, te jíin jniñu casáha i te jiní yō jeē tú ndíje i. Chi ñayuu ndevāha ñayuu níhni ni cácuu i, te tu cúu sáha i ni ñn jniñu váha.

Jnūhun ya jeē steén ndaā vāha

2

¹ Te máá ró chí níní na cáhán rō táca jnúhun jeē quijnáhan jíin jnúhun ya jeē steén ndaā vāha.

² Te cahān rō jíin táca tée jéhnū jeē na cóo cájicá ni de, te sáha yíñúhún de, te ndito coo xiní de, te candíje níhin de jnūhun cundáhú ni yā de, te cundáhú ni de jnáhan de, te cuandeyí ni de.

³ Te suni súcuan táca ñahan jéhnū, na sáha yíñúhún ña, te ma sajnúhún ña, te ma nájiñi ña. Te na stéén ña táca jéē váha.

⁴ Te na stéén ña nuū táca ñahan súchí jéē coo maní ña jíin yñi ña jíin séhe ña.

⁵ Te ndito coo xinī ña, te coo ndoo ánuá ña, te coto vāha ña jniñu vehe ña, te coo vāha ni ña, te cuatáhú ña nuū yī ña, návāha ma cahán neé ñayuu siquī jnúhun Yaā Dios.

⁶ Te suni súcuan stíhvī ni rō tāca tée suchi jeē ndito na cóo xinī de.

⁷ Te róhó, cuu rō ñn ejemplo nuū de jeē sáha rō táca jniñu váha. Te jeē steén rō nuū de te ndaā steén rō te coo ndije ni rō.

⁸ Te ndaā vāha stéén rō, návāha ma cúu cahán ñayuu siquī. Te súcuan te cucanu ñayuu cácuu contra, chi ma cúu cahán i ni ñn cuēchi siquī rō.

⁹ Te cahán rō jíin ñayuu cácuu mozo jeē na cuatáhú i nuū patrón i, te na sáha i tāca jniñu jeē nújnahan ni de, te ma cahán maá i núu ndácu de jniñu nuū i.

¹⁰ Te ma sacuíhná i ndajniñu de, chi na cúu i ñayuu ndaā ndije, návāha jíin táca jniñu jeē sáha i, te cuni tāca ñayuu jeē yóhoyo luu cúu jnúhun jeē steén siquī Yaā Dios, Yaā jnáma yóhó.

¹¹ Chi vijna je ni steén Yaā Dios ndese sáha ya jeē váha ñayuu, chi cúní yā jnama ya ndihí ñayuu ñayíví.

¹² Te jnúhun jeē váha ni yā jíin yó, suu stéén nuū yō jeē na siáá yō jniñu neé jíin táca jéē ndíyo neé ni yō. Te ndito na cóo xinī yō ini ñayíví yáha, te caca ndaā yō, te chiñúhún váha yó Yaā Dios.

¹³ Te suni stéén nuū yō jeē cocuhun ni yō jeē quéndōo ndetū yō jeē quíji maá quíví jéhnú jeē quénda ndijin Yaā Dios, Yaā kujéhnú ndasí, suu Jesucristo, Yaā jnáma yóhó.

¹⁴ Chi ni socō yā maá yá jehē yō, návāha jnama ya yohó núu táca jniñu neé, te sándoo ndihí ya anuá yō jeē cuu yó ñayuu maá yá, te condíhvī ni yō sáha yó jniñu váha.

¹⁵ Tāca jnúhun yáha cánuú stéén rō, te stíhvī ni rō i, te cahán rō nuū i, chi súcuan ndíso jniñu rō. Te ma cuáha ro jnúhun jeē sajeé ni ni ñn i nuū rō.

Ndese cánuú sáha ñayuu cácandíje

3

¹ Te na nástíhvī ni rō i jeē cuatáhú váha i nuū tée cácujehnú jíin tée cándiso jniñu ñuu. Te na squícu i jniñu cándacu de, te coo ñamā ni i sáha i tāca jniñu váha.

² Te ma cahán neé i siquī ni ñn ñayuu, te coyūcu mání i jíin ñayuu, te coo vāha ni i, te coo víta ni i jíin ndihí ñayuu.

³ Chi máá yó suni ni cuu yó ñayuu canéé jeē tu jécūhun ni nde saá, te ni cacuníhni ni yō nuū Yaā Dios. Te ni cacandíje yó táca jnúhun tú ndaā, te ni cajejniñu sáa-ni yó núu táca jéē ní ndiyo neé ni yō jíin na-ni jniñu ni cusí ni yō. Te ni cajica yó jíin jniñu neé jíin jnúhun cuésún ni. Chi ni cajito uhū ñayuu yohó, te ni cajito uhū yō i.

⁴ Yūcuán na te Yaā Dios, Yaā jnáma yóhó, ní steén yā jeē váha ni yā te cúndáhú ni yā ndihí ñayuu ñayíví.

⁵ Te ni jnama ya yohó, te tú na jniñu váha ní cásáha yó jéē jnáma ya yohó, chi sa siquī jeē ní cundáhú ni yā yohó. Chi ni nacate ya anuá yō, te súcuan ni nacacu jeé yó, te ni ndujeé yó ni sáha ya jíin máá Espíritu Santo.

⁶ Te yóhoyo ni cunuú Espíritu Santo ini anuá yō, jeē ni sáha Yaā Dios jeē jíin Jesucristo, Yaā jnáma yóhó.

⁷ Te súcuan te ni ndahva yā cuēchi yó siquī jeē váha ni yā, te nihín tahu yō cotecu yō ní cáni, nájnúhun ñúhun ni yō.

⁸ Ndaā cúu jnúhun yáha, te cúní rī jeē niní cáhán níhin ro táca jnúhun yáha, návāha ñayuu cácandíje Yaā Dios, na cóndíhvī ni i cocuu i jíin jniñu váha. Chi íyó váha táca jéē yáha, te níhín jniñu jeē quéndōo vāha ánuá ndihí ñayuu.

⁹ Te ma quíví nduu rō jíin táca jnúhun canéé íi, jíin jnúhun siquī ndese véji táca jíi yō, jíin táca jnúhun sáha jeē cátejnhán i cácahán i jeē cánuú squícu yó ley Moisés. Chi máni jnúhun cáhá-ni jeē tu níhín jniñu cúu.

¹⁰ Te núu íyó ñayuu jeē sáha jeē ndusín ini ñayuu cácandíje, te cahán rō nuū i ñn uū jínu, te núu ma chúhun ni i, te quenehen rō i.

¹¹ Chi jíiní rō jeē ñn ñayuu sáha súcuan, stíví ndasí i chi jíin i jeē tú vāha sáha i, te jeē yúcuán jéconde cuēchi siquī i.

Jeē cána Pablo quiji Tito nuū de

¹² Te jeē tají rí Artemas chí Tíquico cuajeé de, yūcuán na te nducú ndéyí ró quiji ró núu rī ñuu Nicópolis, chi je ni cundaā ni rī jeē yúcuán condee rī tiempo mījin.

¹³ Te condihvī ni rō chindéé ñáhán ró Zenas, tēe cúu abogado, te suni súcuan Apolos. Chi cuāha ró jeē jíni ñúhún de jeē quíngoo ga de ichi nuū quihín de. Te coto ró jeē ma cúmanī ni ñn nuū de.

¹⁴ Te ñayuu cáhīn jíin yó, cánuú cutūhva i sáha i tācá jniñu váha, te chindéé ñáhán i ñayuu cúmanī nuū, návāha ma cótecu saá-ni i.

Saludo jíin bendición jeē sándihí

¹⁵ Tāca ñáyuu cáyūcu jíin rí yáha, cácahān i jeē sándeyí ni rō. Te cahān rō jeē achí rí jeē sándeyí ni ñayuu jíin jeē maní yō jíin síquī jeē cácaandíje yó. Te ñúhun ni rī jeē na sáha ga Yaā Dios jeē váha róhó jíin náhan ró. Súcuan na cóo. Amén.

CARTA JEE NI TEE SAN PABLO APOSTOL NUU FILEMON

¹ Máá rí cúu Pablo, te íne ri vecāa jeē siquí jnúhun Cristo Jesús. Te jíin hermano yō Timoteo cátee ri carta yáha cuájeē nuū rō Filemón. Chi cúu ró tée jeē cáhīyo manī rī jíin, chi chéndéé ñájnáhan ró jíin rí siquí jníñu Yaā Dios.

² Te suni cátee ri carta yáha nuū ñáyuu cácdíje cándutútú ini vehe ró, te suni nuū hermana yō Apia, jíin núu Arquipo, tēe chéndéé ñájnáhan jíin yó siquí jníñu cánducú ndeyí yó jíin.

³ Te cáñuhun ni rī jeē Tatá yō Yaā Dios jíin Jítoho yō Jesucristo, na sáha ga yā jeē váha rōhó jíjnáhan ró, te sáha ya jeē coo ndeyí coo sī ni rō.

Tēe cúndáhú ni te cándíje vāha cúu Filemón

⁴ Te jeē jícán tahú rī nuū Yaā Dios te tu náā ni rī cacān tahú rī jehē rō, te níni nácuatáhú rí nuū yā jeē siquí rō.

⁵ Chi níhín rī jnúhun jeē váha cándíje ró jnúhun cúndáhú ni Jítoho yō Jesús rohó, te cúndáhú ni rō tāca ñáyuu yíhi ndaha Yaā Dios.

⁶ Te jícán tahú rī jeē ñáyuu ni cacandíje siquí jeē candíje máá ró, na jécūhun vāha ga ni i siquí tāca jéē váha jeē sáha ya yohó jeē jíin Cristo Jesús.

⁷ Chi cúsi ndasí ni rī te íyó ndeyí ni rī, hermano, siquí jeē cundáhú ni rō ñayuu cácdíje. Chi máá ró ni sáha jeē ní ndusi ni i.

Jeē jícán Pablo ñn favor jehē Onésimo

⁸ Núu súcuan te cáhán ndahú rí jíin ró, vésú cuu ndacu ri nuū rō ndese cánuú sáha ró, chi cúu ri apóstol Cristo.

⁹ Te tuú chi sa cáhán ndahú rí jíin ró siquí jeē cáhīyo manī yō. Te cundáhú ni rō ruhū sáha ró jéē cuní ruhū Pablo, chi je jéhu ri, te íne ri vecāa jeē siquí jnúhun Cristo Jesús.

¹⁰ Te cáhán ndahú rí jíin ró jehē mozo rō Onésimo jeē ní jeen ró te ni jinu. Te vijna te cúu i nájnūhun sēhe ri, chi ni scándíje ri i ini vecāa yāhá.

¹¹ Te nde saá chi tu ní cúu i mozo squícu nuū rō, chi ni jinu i. Te nde vijna chi vāha cuajníñu i nuū rō jíin núu rī.

¹² Te nátají rí i najeē i nuū rō. Núu súcuan te cahān vāha ró jíin i, te sáha ró cuenta jeē nájnūhun máá rí ni najinū, chi yōhyo manī rī jíin i.

¹³ Te cusī ni rī núu jeē na cúu quendōo i jíin rí yāhá, návāha cuajníñu i nuū rī lugar maá ró níni jéē íne ri vecāa jeē siquí jnúhun vāha ya.

¹⁴ Te tu ní cúní rī sáha ri súcuan, chi nde cuāha máá ró jnúhun. Chi nasūu jéē safuerza rī rohó, chi jeē váha ni rō te sáha ró favor jíin rí, nájnūhun cúsi ni maá ró.

¹⁵ Chi sanaa te jeē siquí yáha cúu jeē ní jinu i ni cujiyo i nuū rō jecu-ni tiempo, suu návāha ví quendōo i jíin ró sáha Yaā Dios.

¹⁶ Te vijna tuá cúu i ñn mozo jeē ní jeen ró, chi ni nduu i ñn jeē váha ga, suu ñn hermano jeē maní rō jíin. Te ruhū chi yōhyo manī rī jíin i, te nagā ni cuu máá ró jeē ma cóo manī rō jíin i. Te nasūu jéē maní rō jíin ñn tēe súcuan-ni, chi siquí jeē cúu i ñn hermano jeē candíje nuū Jítoho yō.

¹⁷ Te núu sáha ró cuenta jeē ruhū cúu jnáhan ró cándíje, núu súcuan te cahān vāha ró jíin i jeē jinú i nuū rō, nájnūhun jeē ruhū cahān rō jíin.

¹⁸ Núu na-ni falta ni sáha i nuū rō, chí núu táu i nuū rō, te cacān rō chunaa máá rí.

¹⁹ Ruhū Pablo, jíin ndaha máá rí tée ri yāha jéē máá rí nachunaa. Súcuan cáhán rī vésú cuu cahān rī jeē sa máá ró táu nuū rī sáha ró jéē cúsi ni rī siquí jeē ni scándíje ri rohó te ni cācu ánuá rō.

²⁰ Núu súcuan, hermano, sáha ró favor yáha jíin rí siquí jeē candíje ró Jítoho yō. Sáha ró jéē ndusi ni rī, siquí jeē cúu ró hermano candíje Cristo.

²¹ Te tée ri yáha núu rō, chi cúcáhu vāha ni rī jeē cuatáhú ró, te nde vihyá gā sáha ró vésú jeē ni jícán rī.

²² Te suni jícán rī jeē sátūhva ró núu cóndee rī, chi ñúhun ni rī jeē quenda ri yāhá te jeē rī nuū rō sáha Yaā Dios siquí jeē cájicān tahú rō jehē rī.

Saludo jíin bendición jeē sándíhí

²³ Epafras, tēe íne jíín rí vecāa jeē siquí jnúhun Cristo Jesús, cáhán de jeē sándeyí ni rō.

²⁴ Te suni súcuan cácahān Marcos, jíín Aristarco, jíín Demas, jíín Lucas, tēe cáchindéé ñájnáhan jíín rí siquí jníñu ya.

²⁵ Te ñúhun ni rí jeē Jítóho yō Jesucristo na sáha ga yā jeē váha róhó jíjnáhan ró. Súcuan na cóo. Amén.

CARTA JEE CUAHAN NUU ÑAYUU HEBREO

Jeē ní tají Yaā Dios Séhe ya ni nacani ya jnūhun

¹ Tijni jínu te tijni modo ni cahān Yaā Dios jíin táca jíi yō nde jenahán, chi ni tají yá tēe ni canacani jnūhun ya.

² Te vijna te tiempo cuándihí yāha ní tají yá maá Séhe ya ni nacani ya jnūhun nuū yō. Te jíin Séhe ya ni sáha ya ñayīví jíin táca gá, te ndivii jeē iyó ní chihí ya ndaha Séhe ya.

³ Te Séhe ya yōhyo luu cújéhnū ya, nájnūhun luu cújéhnū maá yá. Te ndihí ndese cúu maá yá, suni súcuan cúu Séhe ya. Te jíin poder jnūhun ni cahān Séhe ya te iyó cutú ndihí-ni. Te ni sándoo ya yohó táca cuéchi yó, te sáa te ni cucōo ya lado váha mesa maá Yaā cújéhnū nde andiví.

Jeē cújéhnū ga Séhe Yaā Dios vēsú tāca ndajéhé yā

⁴ Te ni ndujéhnū ndasí gá Séhe ya vēsú tāca ndajéhé andiví, chi ni nihín yā tahū jeē ndíso ya jniñu jéhnū ndasí gá vēsú jniñu cándiso ndajéhé.

⁵ Chi súcuan ni cahān Yaā Dios jíin Séhe ya, te nasūu jíin ndajéhé yā: Máa ró cúu Séhe ri, te vijna te ni sajehnū ri rohó jéē cúu ri Tatá rō.

Te suni ni cahān yā jnūhun Séhe ya, te nasūu jnúhun ndajéhé yā:

Máa rí cúu Tatá nuū Séhe ri, te máa i cúu Séhe nuū rī.

⁶ Te suni ná ni tají yá Séhe ya cújéhnū, ni quiji ini ñayīví yāha, te ni cahān yā: Ndhí ndajéhé rī na chíñúhún i Séhe ri.

⁷ Te ni cahān tucu ya jnūhun ndajéhé yā: Nájnūhun quée tachī, súcuan cájica ndajéhé rī sáha ri, te tāca un jéē cájejniñū nuū rī, nájnūhun yáñuhūn cácuu.

⁸ Te jnūhun Séhe ya chi sa suhva cáhán yā: Máa ró cúu Yaā Dios, te ndacu ró jniñu ní cáni,

te jniñu ndácu ró, máni jniñu ndaā cúu.

⁹ Cúsī ni rō jíin jniñu váha, te jító uhū rō jniñu néé.

Jeē yúcuān ruhū, Yaā Dios maá ró, ni sáha ri jeē yóhyo ga cúsi ni rō vēsú tāca gá jeē iyó andiví.

¹⁰ Te suni cáhán yā:

Máa ró cúu Jitoho, te nde xīhna ñúhún ni sáha ró jéē ni jécōo ñayīví.

Te andiví chi suni jeē ni sáha ró cúu.

¹¹ Te tāca un chi naa, te máa ró chi ní cáni iyó ró.

Te tāca un chi cutúhú nájnūhun cutúhú ñn sahma,

¹² te nacaquin jnahnū rō te nasama ró jíjnáhan.

Te máa ró chi ma sáma cuiti rō, te quiví cótecu rō ma ndíhi cuiti.

¹³ Te súcuan ni cahān tucu yā jíin Séhe ya, te nasūu jíin ndajéhé yā:

Cucōo ró lado váha ri nuū cújéhnū ró, te na sáha ri jeē quende rō poder tāca jéē cájito uhū rohó.

Achí yá.

¹⁴ Te tāca ndajéhé yā chi mozo-ni cácuu, te tají yá cuangoo jeē chindéé ñáhan ñayuu jeē nihín tahū jeē jnama ya.

Jeē ma cúhuun ni yō jíin jnúhun jnáma ya yohó

2

¹ Núu súcuan te cánuú jéē váha ga chuhun ni yō tāca jnúhun ya jeē ní cajini yó, chi núu tuú te sanaa te scuíta yó.

² Chi nde jenahán ní jejniñū ya ndajéhé yā ni cacastūhun jnúhun ya, te ni cajini ñayuu jeē iyó ndáa. Te ñayuu nīhni ni jíin ñayuu tu ní cájendetū jnūhun ún, vetū-ni ni canihín i castigo.

³ Te núu súcuan ni cuu, te yóhó, ¿ndese cácu yó núu ma chúhun ni yō jnūhun cánuú gá jeē jnáma ya yohó? Chi xīhna gá maá Jitoho yō ni nacani ya jnūhun yāha, te sáa te tēe jeē ní cajini nahín ni canacani ndaā tucu maá de nuū yō.

⁴ Te Yaā Dios suni ni chindéé ñáhan yá de jeē ní canacani de jnūhun ya. Chi ni sáha ya jíin de jeē ní casáha de sín sín jniñu jéhnū jeē nahán náa ni yō jító yó poder yā. Te suni ni jēhe ya Espíritu Santo yā nuū ñn ñn yó, ndese ni nujnahan ni maá yá sáha yó.

Jeē ní nduu Jesús jnáhan ñayuu

5 Te Yaā Dios nasūu nūū ndajéhé yā ni jéhe ya jnūhun jeē condiso jniñu siquī ñayivi jéē quíji, chi sa suhva nuū Séhe ya Cristo ni jéhe ya. Te siquī ñayivi un cúu jeē cahán rī yāhá.

6 Chi suhva yósó nūū tútu jeē ni cáhān David jíin yá:

¿Na vé cúu ñayuu jeē ñūhun ni ní i?

Te ndíhví ni ní siquī i, te máá ñayuu cúu i.

7 Chi jecu-ni tiempo ni sáha ní jeē nūu i nuū tācá ndajéhé ní.

Yūcuán na te sajéhnū ní i te squéndōo yíñúhún ní i,

te caní ní i jeē ndacu i jniñu nuū tāca jéē ni sáha ní.

8 Te ndíhi jeē iyó chi sáha ní jéē cujéhnū i siquī.

Achí tutu. Te jeē ni sáha Yaā Dios jeē cujéhnū i siquī ndíhi, nūu súcuan te ma quéndōo ni ñin jeē ma cujéhnū i siquī. Te vésú súcuan te vijna te ná tu coto yó jéē cujéhnū i siquī ndíhi jeē iyó.

9 Te jeē jíin yō vijna cúu Jesús, Yaā jeē ní nduu nūu jecu-ni tiempo nuū tācá ndajéhé yā. Chi ni ndoho ya jeē ni jíhí yā jehē yō, te jeē yúcuán ní ndujéhnū luu tucu ya, te ndíhi cáhíyo yíñúhún nūū yā. Chi jeē váha ni Yaā Dios jíin yó, jeē yúcuán ní jíhí Jesús jehē yō.

10 Te ndíhi jeē iyó chi cuenta Yaā Dios cúu, chi máá yá ni sáha. Te suni ndéca ya cuehē ndasí séhe ya jeē quihín i andívi nūū luu cujéhnū i jíin yá. Te váha níhín jniñu jeē ni jéhe ya jnūndóho nuū Jesús, chi jeē ní ndoho ya súcuan te cuu condeca váha ya ñayuu ní jnama ya.

11 Chi Jesús jeē ni sándoo ya i te máá i jeē ní candundoo i, chi ñin-ni Tátá i jíin yá. Te jeē yúcuán tu cúcanu Jesús jeē cahán yā hermano yā jíin i, vésú ndasí nūu i.

12 Chi yósó nūū tútu jeē ni cáhān yā jíin Tátá yā:

Cachí na jnúhun ní nūū tācá hermano na, te mēhñu nūū cándutútú i cata ná ndese cujéhnū ní.

13 Te suni cáhān yā nájnūhun cácahān hermano yā:

Ruhū chi cándíje ri yā.

Te cáhān tucu yā:

Yāha íne ri jíin táca gá séhe Yaā Dios jeē ni jéhe ya nuū rī.

Achí Jesús.

14 Te nájnūhun cácacu ñayuu jeē cúu i yiqui cúñu, suni súcuan ni cacu Jesús, návāha cuu yā jehē yō. Te súcuan ni snāá yā poder jexeén jeē squívi ñayuu nuū cuéchi te jíhí i.

15 Te ni cacu ya súcuan návāha cuu quenehen ya tāca ñayuu chíji jnūhun jeē yuhú i cuu i. Chi ní vida i ndóho i sáha ún.

16 Te jendaá tu ní quíji ya jeē chindéé ñáhán yá tācá ndajéhé yā, chi sa suhva jeē chindéé ñáhán yá ñayuu cácañíje jeē ní nduu yucūn Abraham.

17 Jeē yúcuán ní jíin ñúhún nduu ñnuú yá jíin táca hermano yā, návāha cuu ya sutū cujéhnū jeē squícu váha ya tācá jniñu jehē i nuū Yaā Dios. Chi ni cundáhú ni yā i, te ni ndahva yā cuéchi i jeē ni sócō yā maá yá jehē i.

18 Chi suni máá yá ni ndoho ya jeē ní jito ndee jnūndóho ya, te jeē yúcuán cuu chindéé ñáhán yá ñayuu jeē jíto ndee jnūndóho i.

Cujéhnū ga Jesús vésú Moisés

3

1 Hermano, ni cana Yaā Dios rohó, te cácuu ró ñayuu ndoo máá yá. Nūu súcuan te na nácani váha ni rō siquī Cristo Jesús, Yaā cúu apóstol jeē ní tejniñu Yaā Dios, te suni cúu ya sutū cujéhnū siquī jnúhun cácañíje yó.

2 Chi ni squícu váha ya nuū Yaā Dios, Yaā ní tee jniñu un siquī yā, nájnūhun ni squícu váha Moisés nuū ñayuu jeē ni cáhān Yaā Dios jeē cácuu i ñayuu vehe ya.

3 Chi cujéhnū ndasí gá Jesús vésú Moisés, nájnūhun cujéhnū ndasí gá tēe sáha vehe nasūu máá vehe.

4 Chi tācá vehe íyó tēe ni sáha. Te máá Yaā Dios cúu jeē ni sáha tāca jéē iyó.

5 Te Moisés ni squícu váha de jíin jniñu jeē ní cuu de mozo ni condito de ñayuu vehe Yaā Dios. Te ni castúhún de siquī tāca jnúhun jeē steén yā tiempo quíji.

6 Te Cristo chí sa cúu ya maá Séhe jeē ndácu jniñu nuū ñayuu vehe Tátá yā, te váha squícu ya jeē ni jéjnūhun ya nuū i. Te suni máá yó cácuu ñayuu vehe ya, te nūu na cuñi níhin yó jíin jnúhun cándíje yó ndé quiví sándíhí, te nūu cúsi ni yō jeē ñúhún ni yō tāca jéē váha jeē coo.

Jnūhun jeē ndetātu ñáyuu Yaā Dios

⁷ Nūu súcuan te na chūhun ni yō jeē cahán Espíritu Santo nuū tútu i:

Vijna te nūu cuni sōho ró jéē cahán Yaā Dios,

⁸ te ma cúnihni ni rō nájñūhun ni cacunihni ni ñayuu jenahán.

Chi tu ní cájendetū i nuū yā ná ni cajica i nuū ñūhun téhé.

⁹ Chi yūcuan ní casáha jíí rō jniñu jeē ni quítī ni rī, achí yá,

vēsú ni cajito i tācá jniñu ni sáha ri uū xico cuiyā.

¹⁰ Jeē yúcuan ní quítī ni rī jíín ñáyuu tiempo un.

Te ni cahán rī jeē máni jeē castóo i ichi ndaā, chí tu cácuni i condiquin i jñūhun ri.

¹¹ Te jeē yúcuan ní quítī ni rī, te ni cahán teyí rí

jeē ma quívicoo cuítī i nuū ndetátú i sáha ri. Achí yá.

¹² Nūu súcuan hermano, coto má conéé ánuá ni ñn ró jéē cáca yátá ró jeē tuá candíje ró Yaā Dios, Yaā técu.

¹³ Chi sa suhva tāca quívī na sthví jnáhan ni rō, ní ní gá iyó tiempo, návāha ma cúnihni ni ñn ró te stáhú róhó sáha ró cuéchi.

¹⁴ Te nūu na cuíñi ñihin yó ndé quívī sándihí jíín jñūhun jeē ní quejéé yó jíín, yūcuán na te cuu yó jnáhan Cristo.

¹⁵ Chi cáhán tutu: Vijna te nūu cuni sōho ró jéē cahán Yaā

Dios, te ma cúnihni ni rō nájñūhun ni cunihni ni ñayuu jenahán.

Achí.

¹⁶ ¿Te ndé-ni cúu ñayuu jeē ní jini jñūhun ya te ni cunihni ni? Suu ndihí ñayuu jeē ni scácu Moisés jeē ní quendacoo Egipto.

¹⁷ ¿Te ndé-ni cúu ñayuu jeē ni quítī ni yā nuū uū xico cuiyā? Suu ñayuu jeē ní casáha cuéchi, te ni cajihí i nuū ñūhun téhé.

¹⁸ ¿Te ndé-ni i cúu jeē ni cáhán teyí yá jeē ma quívicoo cuítī i nuū ndetátú i sáha ya? Suu máá ñáyuu jeē tu ní cájendetū nuū yā.

¹⁹ Nūu súcuan te jíín yō jeē tu ní cúu quívicoo i nuū ndetátú i, siquī jeē tu ní cácandíje i ya.

4

¹ Te ní ní íyó gá jñūhun jeē ni jéjñūhun ya jeē quívicoo ñayuu nuū ndetátú i sáha ya, te na cónso íyo yó jéē ma stívi yó, návāha tú coo jíín sava ró jéē ma nihín rō quívī ró.

² Chi suni máá yó ni cajini sōho yó jñūhun jeē jnáma ya yohó, nájñūhun ñayuu jenahán un. Te nuū maá i tu ní jéjñíñu jñūhun ni cajini i ún, siquī jeē tu ní cácandíje i.

³ Te yóhó jéē cácandíje, máá yó cúu jeē quívicoo yó nūu ndetātu yó. Te siquī ñáyuu tu cácandíje ni cahán yā suhva:

Jeē yúcuan ní quítī ni rī, te ni cahán teyí rí jeē ma quívicoo cuítī i nuū ndetátú i sáha ri. Te súcuan ni cahán yā vēsú je íyó túhva nuū ndetátú i nde ná ni jecōo ñayíví.

⁴ Chi súcuan yósó jñūhun nuū tútu i siquī quívī uxá:

Ni sínu Yaā Dios tāca jéē ni sáha ya, te ni ndetātu yá quívī uxá.

⁵ Te suni nuū tútu un yósó tucu:

Ma quívicoo cuítī i nuū ndetátú i sáha ri.

Achí yá.

⁶ Nūu súcuan te sava ñayuu chí quívicoo nahín i nuū ndetátú i. Te ñayuu jenahán jéē ní cajini jñūhun jeē jnáma ya i, tu ní quívicoo i siquī jeē tu ní cájendetū i nuū yā.

⁷ Jeē yúcuan ní jeni tucu ya inga quívī jeē quívicoo ñayuu, te quívī un cúu vijna. Chí ná ni yāha cuehē tiempo jeē ni cáhán yā jíín ñáyuu jenahán, te yósó nūu tútu jeē ni sáha ya jeē suni ni cahán David suhva:

Vijna te nūu cuni sōho ró jéē cahán yā,

te ma cúnihni ni rō nūu súcuan.

Achí tutu.

⁸ Te nde jenahán ní squívī Josué ñayuu Israel un ñuu nuū ndetátú i. Te tu ní cúu squívī de i nuū ndetātu ánuá i sáha ya. Chí nūu súcuan te ma cahán gā Yaā Dios jíín táca ñáyuu jeē vijna cúu quívī jeē quívicoo i nuū ndetátú i.

⁹ Nūu súcuan te íyó túhva nahín ñn nuū ndetātu ñáyuu Yaā Dios, nájñūhun ni ndetātu máá yá.

¹⁰ Chi ñayuu jeē quívicoo nuū ndetátú i jíín yá, chí ndetátú i jeē ní casájñiñu i, nájñūhun ni ndetátú Yaā Dios nuū jniñu ni sáha máá yá.

¹¹ Nūu súcuan te na ndúcú ndéyí yó quívī yó nūu ndetātu yó un, te ma sáha ni ñn yó cuéchi jeē ma cándíje yó, nájñūhun ni casáha i nde saá.

¹² Chí jñūhun Yaā Dios ndíto técu te íyó poder. Chí cúu nájñūhun ñn espada jeē xeén ndíndúú lado, chí nástúu cájí ndese íyó jéē níjñūní yó jíín ánuá yō, nájñūhun sáha

espada jeē jéhnde te nástúu nuū ñujnáhan yiqui jíin meque. Te jnūhun ya nástúu ndihi ndese jéni ni yō jíin ndese cúní yō sáha yó.

¹³ Te tu íyó ni ñin jeē yísahí jeē tu jíni maá Yaā jeē náquihin cuenta, chi ndihi-ni jíni vāha ya, te ndihi-ni túu ndijin nuū yā.

Jesús cúu sutū cujéhnu ga

¹⁴ Te cánevāha yó ñin sutū cujéhnu ga, te je ni ndaa ya ni ndívi ya nuū iyó Yaā Dios. Te Jesús Sēhe Yaā Dios cúu ya. Jeē yúcuan na cuíñi nihin yó jíin jnúhun jeē ní candíje yó.

¹⁵ Chi névāha yó ñin sutū cujéhnu jeē jíto ndáhú yóhó jeē tu fuerza yō squícu vāha yó. Chi nájnūhun ndóho yó jéē jíto ndee jexeén yohó, suni súcuan ni ndoho ya jeē ní jito ndee un yá, vēsú tú cuíti cuēchi ya.

¹⁶ Núu súcuan te ma yūhu yó, chi na quívi yó yuhu mesa yā, cúu jeē cacān tahu yō. Chi maní yā jíin yó, te cúndáhú ni yā yohó, te siquī jeē váha ni yā te chindéé ñáhán yá yohó táca jínu jeē jíni ñúhún yó.

5

¹ Chi táca sūtū jeē ní cujéhnu jenahán, ni nacāji Yaā Dios de mēhñu ñáyuu, te ni jeni ya de jeē cuíñi de nuū yā jehē ñayuu, te socō de ndajníñu jíin quití nuū yā jeē siquí cuēchi i.

² Te cuu cahān vītá de jíin ñáyuu tu jécūhun ni jíin ñáyuu castívi, chi máá de suni tú na fuerza ini de squícu vāha de.

³ Jeē yúcuan cúu jeē suni cánuú sócō de quití nuū yā jeē siquí cuēchi máá de, nasūu máá-ni jeē siquí cuēchi ñayuu.

⁴ Te ni ñin tēe tu cúu sájéhnu de máá de jeē cuu de sutū cujéhnu, chi sa máá Yaā Dios cúu jeē nacāji ya de, nájnūhun ni nacāji ya Aarón nde jenahán.

⁵ Te suni súcuan Cristo, tu ní sájéhnu ya maá yá jeē cuu ya sutū cujéhnu, chi sa Yaā Dios ni sáha, chi ni cahān yā jnūhun yáha: Máá ró cúu Sēhe ri, te vijna te ni sajeñnu ri rohó jéē cúu ri Tatá rō.

⁶ Te suni cáhán tucu ya nuū tútu i: Ní cáni cúu ró sūtū, nájnūhun sutū Melquisedec jenahán.

⁷ Te Cristo, ná ni condee ya ñayívi, te ni jicān tahu yā, te nde ni ndahyū yā te ni ndahyū cohó yá. Te ni cahān ndahú yá jíin Yaā Dios,

Yaā jeē cúu jnama ya jeē ma cúu yā nuú. Te siquī jeē yíñúhún ní chiñúhún yá Yaā Dios, te ni chindéé ñájnáhan Yaā Dios jíin yá nuū jnūndóho ún.

⁸ Chi vēsú Sēhe Yaā Dios cúu ya, te ni jendetū yā ni ndoho ya ini ñayívi, te súcuan ni jini yā ndese cúu jnūhun jéndetū.

⁹ Te ná ni cuu ni squícu ndihi ya jeē ní jendetū yā, te ni cucutú jnúhun jeē jnáma ya táca ñáyuu jéndetū nuū yā, te cotecu i ní cáni.

¹⁰ Chi ni jeni Yaā Dios yā jeē cúu ya sutū cujéhnu nájnūhun sutū Melquisedec.

Siquī jeē ma cáca yátá i

¹¹ Te íyó cuéhē jnūhun jeē castūhun rí siquī táca jéē yáha. Te yí cúu jeē jécūhun ni rō sáha ri, siquī jeē tu cáconi rō chuhun ni rō.

¹² Te je ni cunahán cácandíje ró, te jíni ñúhún jéē cúu ró tēe stéén nuú. Te tuú chi sa cájini ñúhún tucu máá ró tēe stéén nuū rō táca jnúhun Yaā Dios jeē tú yí cuíti. Chi sa ni canduu ró nájnūhun sūchi yíquín jéē jíni ñúhún caxin i, chi ná tu ije i caji i jeē ndáva. Súcuan cácuu ró chi ná tu ije ró jíin jnúhun yí gá.

¹³ Chi núu máni máá nájnūhun sūchi yíquín jéxin cácuu ró, núu súcuan te tu cúu jécūhun vāha ni rō jnūhun ndaā.

¹⁴ Te ñayuu jeē jé ni ije, chi cáyeji i jeē ndáva, cúu jeē ní cutūhva vāha i te je cúu nacāji i jeē váha jíin jéē neé.

6

¹ Núu súcuan te na yáha yó núu táca jnúhun Cristo jeē tú-ni yí, te na quíhín yō nuū jnúhun yí gá, návāha na ije vāha ni yō jíin jnúhun ya. Te ma ndejéé tucu yó jíin jnúhun jeē ni scuáha yó xíhna gā, suu jnūhun jeē nacani ni yō stóo yo cuéchi yó jéē cúu yō sáha, jíin jéē candíje yó Yaā Dios,

² jíin siquī jeē jéndute, jíin siquī jeē soó ndaha xiní ñáyuu, jíin siquī jeē nátecu ndívi, jíin siquī jeē jnahnú ndetū ñayuu ní cáni.

³ Núu súcuan te na yáha yó núu táca jéē yáha te quívi yó núu jnúhun yí gá, te núu cuáha Yaā Dios jnūhun.

⁴ Chi íyó ñáyuu jeē jé ni jécūhun ni i, te je ni jini i táca jéē jéhe Yaā Dios, te je ni quívi i nuū jnúhun stéén Espíritu Santo,

⁵ te suni je ni jini i jnūhun vāha Yaā Dios jíin ndese coo poder yā tiempo quiji.

⁶ Te ñayuu un núu caca yátá i, te ma cúu ga ndejéé jeé i jeé nácani ni i. Chi jeé cáca yátá i cúu nájnūhun jeé nácagni tucu i Sēhe Yaā Dios jicā cruz, te cájēhe i jnūhun canu yā cájito ñayuu.

⁷ Te ñayuu chi cácuu i nájnūhun ñuhun jeé cúun vāha saū nuū te ndóyo vāha. Te núu cánecoo jeé vāha caji tēe cásajniñu, yūcuán na te cúsi ni Yaā Dios jíin.

⁸ Te núu máni iñu yóquin jíin yucū sajnēñu cánecoo nuū, núu súcuan te tu jéjniñu cuiti, te squéndōo iñ yā, te iñ quivi te cayū. Súcuan jnahnū ndetū ñayuu cájica yátá.

Jeé ñuhun ni yō tāca jéé vāha jeé coo

⁹ Te máá ró jijnáhan ró hermano, vēsú cácahān rī súcuan jíin ró, te cácuahnu ni rī jeé cácuu ró ñayuu cuiñi ñihin, chi ñayuu ni jnama ya cácuu ró.

¹⁰ Te Yaā ndaā cúu Yaā Dios, te tu náa ni yā jniñu cásaha ró. Chi siquī jeé cáhiyo manī rō jíin yá te ni cacundáhú ni rō hermano rō cácañde, te ni cachindéé ñáhán ró i, te súcuan cásaha ró ndé vijna.

¹¹ Te cácuu rī jeé niní súcuan sáha ga ná iñ ná iñ ró ndé quivi sándihí, chi jeé sáha ró súcuan te nihin rō ndihí jeé cáñuhun ni rō.

¹² Te cácuu rī jeé ma cúhuun ni rō, chi sa ndacu ró ñayuu cácañde jeé jíin paciencia cándetu i, te jeé yúcuan nihin tahu i tāca jéé ni jéjnūhun ya.

¹³ Chi quivi jeé ni jéjnūhun Yaā Dios nuū Abraham, te ni ndacunehen ya maá yá jeé ni jéjnūhun téyí yá, chi tuá na inga ndacunehen ya jeé cujéhnu ga vēsú maá yá jeé cuu testigo yā.

¹⁴ Te ni cahān yā: Jendaá ndije jeé vāha ndasí sáha ri jíin ró, te sáha ri jeé nducuehē ndasí yúcūn rō, achí yá jíin Abraham.

¹⁵ Te jíin paciencia ni condetu de, te súcuan te ni nihin de jeé ní jejnūhun ya.

¹⁶ Te núu cáhān téyí ñayuu, te ndacunehen i síhví iñ jeé cujéhnu ga vēsú maá i. Te núu íyo iñ jnūhun jeé tu cácañde jnāhan, te núu iñ tēe cáhān téyí de jíin síhví Yaā Dios, yūcuán na te jécuiñi jeé cátejnahān.

¹⁷ Te suni súcuan Yaā Dios, chi ni jejnūhun téyí yá nuū ñayuu jeé cuāha ya tahu i. Chi ni

cuni yā jeé cucáhnu vāha ni i jeé ma nácani yátá ni yā siquī jeé ni jéjnūhun ya nuū i.

¹⁸ Chi ma nácani yátá cuiti ni yā siquī jnūhun jeé ni cáhān yā uū jínu, iñ jeé ni jéjnūhun ya, te inga jeé ni cáhān téyí tucu ya siquī suni jnūhun ún. Chi tu stáhú cuiti yā. Te jeé yúcuan máá yó jeé ní tūhva yó yá, chi yōhyo íyo ndeyí ni yō, te cáñuhun téyí ni yō jeé squícu ya jeé ni cáhān yā.

¹⁹ Te siquī jeé súcuan ñuhun ni yō, te suu sáha jeé quéndōo ñihin ánuá yō jíin jnūhun ya, te quéndōo ndaā ni yō, nájnūhun quéndōo ñihin barco jeé jnā gancho yuū. Te sáha jeé cúu quivi yó andivi núu íi gā, nájnūhun cuarto íi gā jeé ni íyo ichi yátá sahna ni ndita caa ini vehe íi jenahān.

²⁰ Te ini yūcuán chi xīhna gā Jesús ni quivi, návāha nune ya ichi quivicoo yó. Te jeé yúcuan ní cáni cúu ya sutū cujéhnu nájnūhun sutū Melquisedec.

Jeé cúu Jesús sutū nájnūhun Melquisedec

7

¹ Te máá Melquisedec ni cuu de rey ñuu Salem, te ni cuu de sutū nuū Yaā Dios, Yaā cujéhnu téyí. Te ni jejnahan de Abraham ná ni nandico Abraham jeé ní cundeyí de ni cajejnāhan de jíin tāca rey. Te ni jicān tahu de jehē Abraham.

² Te tāca úxī ndajniñu jeé ní quende Abraham nuū tāca rey un, ni jēhe de iñ iñ siquī un núu Melquisedec. Te síhví Melquisedec cuní cahān: rey jeé sáha jniñu ndaā. Te suni nání de rey Salem, te jnūhun Salem cuní cahān: jeé iyó ndeyí sí ni. Te jeé yúcuan suni nání de: rey jeé sáha jeé iyó ndeyí sí ni ñayuu.

³ Te tu cáhān tutu jnūhun tátá de ni náná de ni tāca jí de. Ni tu cáhān núu ni cacu de, ni núu ni jihí de. Chi cúu de nájnūhun Jesús, Sēhe Yaā Dios, chi ní cáni cúu de sutū.

⁴ Te condēhe jíjnāhan ró náa jéhnu ni cuu Melquisedec, chi jí jéhnu yó Abraham ni jēhe de iñ iñ siquī tāca jéé uxí nuū de siquī tāca jéé ní quende de nuū rey un.

⁵ Te jíni yō jeé tāca úxī ndajniñu ni canihin ñayuu, ni cajēhe i iñ iñ siquī un ní caquihin tēe cácuu sutū yucūn Leví, nájnūhun cáhān ley Moisés. Te ni caquihin de nuū ñayuu

cácuu jnáhan de, chi ñn-ni yucūn Abraham cácuu de jíin i.

6 Te Melquisedec nasūu yúcūn Leví cúu de, te vēsú súcuan te ni quihin de ñn ñn siquī tāca jēe uxí nuū Abraham. Te suni ni jicān tahu de jehē Abraham, vēsú cúu Abraham tēe jeē ni jéjnūhun ya nuū.

7 Te jíin vāha yó jēe tēe cújéhnū ga cúu jeē jicān tahu jehē tēe núu ga.

8 Te ñayīvi yāha chi tāca sūtū cáquihin de ñn ñn siquī tāca jēe uxí nuū ñáyuu, vēsú cácuu te tēe cájihī. Te Melquisedec suni ni quihin de, te máa de chi cáhán tutu ñi jeē técu de.

9 Te suni cuu cahān yō jeē Leví, tēe jeē ní quihin ñn ñn siquī tāca jēe uxí nuū ñáyuu, suni nájnūhun nuū máa de ni quihin Melquisedec ñn ñn siquī tāca jēe uxí. Chi jeē ni jēhe Abraham nuū Melquisedec, suu cúu nájnūhun jeē suni ni jēhe de jeē siquī Leví jíin ndihī ga yucūn de jeē quiji.

10 Chi yucūn Abraham cúu Leví, te vēsú ná tu cacu de quivī jeē ni jéjnahan Melquisedec Abraham, te nájnūhun jeē ni jēhe máa de cúu jeē ni jēhe Abraham.

11 Te yucūn Leví ni cane sūtū Aarón jíin tāca gá sūtū ní quiijicoo. Te ni castéén de ley yā nuū ñáyuu Israel jenahán. Te núu ní cúu sáha de jeē quendōo ndaā ñáyuu jíin ley un núu, te tuá cánuu jeē núcuñī inga clase sūtū lugar Aarón jíin yúcūn de. Te inga clase sūtū cúu Cristo jeē cúu ya nájnūhun sūtū Melquisedec.

12 Te núu nucuñī inga clase sūtū, te suni cánuu sáma ley siquī yucūn de.

13 Núu súcuan te ni sáma ley un, chi cáhán tutu ñi jeē Jítóho yō Jesús cúu inga clase sūtū ún, te ni cacu ya chíji inga yucūn. Te yucūn ní quiji ya ún, tú ni ñn ní cúu sūtū.

14 Chi jíin vāha yó jēe chíji yucūn Judá ni cacu Jítóho yō. Te yucūn ún chi tu ní cáhán cuiti Moisés jeē cáneco sūtū.

15 Te cáji cúu jeē ní nucuñī Cristo jeē cúu ya inga clase sūtū nájnūhun sūtū Melquisedec.

16 Te tu cúu ya sūtū jeē ní cacu chíji yucūn Leví nájnūhun cáhán ley jenahán. Chi cúu ya sūtū siquī jeē ndíso ya poder cotecu yā ní cáni te ma cúu cuiti yā.

17 Chi súcuan ni cahān Yaā Dios jnūhun ya:

Ní cáni cúu ró sūtū,

nájñūhun sūtū Melquisedec.

18 Núu súcuan te jniñu jeē ní ndacu ley jenahán siquī sūtū, chi ní naa vijna, chi tu ní níhín jniñu quendōo ní cáni.

19 Chi ley Moisés tu ní sáha jeē quendōo ndaā ñáyuu. Te ni nihín yō ñn jnūhun vāha ga jeē ñūhun ni yō jeē ndáhva Cristo cuēchi yó, te súcuan ni cuyajni yó núu Yaā Dios.

20 Te jíin jēe ni cáhán teyí Yaā Dios te cúu Jesús sūtū.

21 Chi tāca gá tēe ún, nasūu jíin jnūhun jeē ni cáhán teyí yá ní cúu de sūtū. Te Jesús chi ni cahān teyí Yaā Dios jeē cuu ya sūtū, chi súcuan cáhán tutu:

Ni cahān teyí máa Jítóho yō Yaā Dios, te ma nácani yátá ni yā:

Ní cáni cúu ró sūtū,

nájñūhun sūtū Melquisedec.

Achí yá.

22 Núu súcuan te jíin Jesús ni cucutú ñn contrato vāha ga vēsú ley jenahán.

23 Te tāca gá sūtū ún, chi ní iyo cuehē de, chi siquī jeē cájihī de te tu ní cúu cuiñi de ní cáni.

24 Te Jesús chi cúu ya sūtū jeē cuiñi ní cáni, chi técu yā ní cáni.

25 Jeē yúcuan ndíso jniñu ya jnama ya ñáyuu quiijicoo nuū Yaā Dios, cotecu i ní cáni. Chi ní cáni técu yā te cáhán yā jehē i jíin Yaā Dios.

26 Núu súcuan te vāha ndasí sūtū cújéhnū cúu Jesús, jeē nájnūhun jíni ñūhún yó. Chi sūtū ñi cúu ya, te tú na cuēchi ya, te íyó ndoo ya, te tu cúu ya jnáhan ñáyuu casáha cuēchi, te cújéhnū téyí yá nde nuū sucún gá andiví.

27 Te máa yá tu jíni ñūhún sáha ya nájnūhun ni casáha sūtū cácujeñnu jenahán, jeē ndiquivī ni casocō de quitī siquī cuēchi máa de xihna gā, te sáa te siquī cuēchi ñáyuu. Chi ñn jínu-ni ni socō yā máa yá jehē yō, te ni cuu-ni.

28 Chi ni jeni ley Moisés tāca sūtū cújéhnū jeē tú na fuerza squícu vāha. Yūcuán na te cuéé gá te ni cahān teyí Yaā Dios. Te jíin jēe ni cáhán teyí yá, te ni jeni ya Sēhe ya jeē cúu ya sūtū cújéhnū, te sūtū ndaā sūtū vāha cúu ya ní cáni.

Jeē ndíso jniñu Cristo siquī ñn contrato jeé

8

¹ Núu súcuan te jñūhun cánuú gá jeē je ni cahān rī cúu yāhá: Névhā yó ñn sutū kujēhnu nájñūhun ni cahān rī, te ndéé yá lado váha mesa nuū ndácu jniñu máá Yaā kujēhnu nde andiví.

² Te vijna te cúu ya sutū nde andiví, jeē cúu ndije lugar iī jeē ni sáha máá Jítoho yō Yaā Dios, nasūu ñayuu. Chi tu cáa nájñūhun vehe iī jenahán jeē ní casáha ñayuu.

³ Te tāca sūtū kujēhnu ni jeconaā de jeē socó de ndajniñu jín quití nuū Yaā Dios. Núu súcuan te Jesucristo suni ni jini ñúhún jeē socó yā jeē cúu ya sutū.

⁴ Te núu ní íyo ga yā ini ñayiví, te ni ma quijnáhan jeē cúu ya sutū jín táca gá sutū, chi níni cásocō gā de quití nájñūhun cáhán ley Moisés.

⁵ Te jniñu casáha de, tu quijnáhan jín jéé iyó andiví. Chi cúu ñn muestra-ni jeē steén siquī andiví. Te cúu nájñūhun jeē ni cáhān Yaā Dios jín Moisés quiví ní quejéé de sáha de vehe iī jenahán: Coto vāha ró jéé sáha ró táca ndajniñu nájñūhun jito jeē ni steén rī nuū rō nde xiní yúcu, áchí Yaā Dios jín de.

⁶ Te vijna te sáha Cristo jniñu jéhnu ndasí gá vésú jeē casáha tāca sūtū ún, chi ndíso jniñu ya siquī contrato jeé jéé yóhyo vāha ga, chi ndíso jñūhun jéhnu ga jeē ni jéjñūhun Yaā Dios.

⁷ Chi contrato ley xīhna ñúhún, núu jeē ni sáha jeē quée vāha jniñu núú, te tuá cánuú jéé cóo contrato uū.

⁸ Chi ñayuu jenahán un jéé tu ní cáquendōo ndaā, suhva ni cahān Yaā Dios jín i, áchí tutu:

Quiji quiví jeē nasáha ri ñn contrato jeé jín ñayuu Israel jín ñayuu Judá, áchí Jítoho yō Yaā Dios.

⁹ Te ma cóo nájñūhun contrato jeē ni sáha ri jín jí i jenahán,

quiví jeē ní jñi ri ndaha de jijnáhan de, te ni quenehen ri de ini nación Egipto.

Chi tu ní cásquicu vāha de jín contrato ley rī.

Jeē yúcu tuá ni táñúhún rí de, áchí Yaā Dios.

¹⁰ Núu súcuan te suhva coo contrato jeé nasáha ri jín ñayuu Israel, nde na quíji quiví yúcu, áchí Jítoho yō Yaā Dios:

Sáha ri jeē jécūhun ley rī nuū jeē níjñúní i, te suni ini anuá i tee ri jñūhun ley rī.

Te cuu ri Yaā Dios maá i, te máá i cuu ñayuu maá rí.

¹¹ Te tuá jini ñúhún steén i nuū jnáhan i nuū ñáni i,

návāha cuni i ndese Yaā cúu Jítoho i.

Chi ndihí i cuni ndese Yaā cúu ri, nde ñayuu núu ga jín ndé ñayuu kujēhnu ga.

¹² Chi cone cáhnu ni rī nuū i jeē ní casáha i jniñu néé,

te ni ma núcūhun ga ni rī cuēchi ni casáha i. Achí Yaā Dios.

¹³ Te jeē ni cáhān yā jeē cuáha ya ñn contrato jeé cúu jeē ní cachi yā jeē tuá cuajniñu contrato xīhna ñúhún. Te ñn jeē ní cutúhú jéé tuá jejniñu, chi jíní yō jeē je yajni naa.

Vehe iī ñayiví yáha ní steén ndese cáa andiví

9

¹ Te ndaā chi contrato xīhna ñúhún ní ndacu jniñu ndese chiñúhún i ya, jín ndese coo ñn vehe iī ini ñayiví yáha.

² Te ni cuvāha vehe iī ún, te ni íyo uū cuarto. Te cuarto xīhna ñúhún jéé naní cuarto iī, ni ñn candelero oro jín mesa oro jín pan iī.

³ Te ni íyo sahna jeē ndíta caa jeē ndihyú inga cuarto jeē naní cuarto iī ndasí gá.

⁴ Te ini un ní íyo ñn altar oro nuū cayú sūje cūtú, jín yéjñū jeē ñúhún contrato ley, te máni oro cúu ní siquī yejñú. Te ini yejñú un íne ñn tijehēn oro jeē ñúhún maná jeē ní cuun andiví. Te suni íne vara Aarón jeē ní nane numa, jín tabla yuū jeē yosó jñūhun contrato ley.

⁵ Te siquī yejñú un ní cahīn ndindúú figura ndajéhé querubín jeē steén jeē íne Yaā Dios. Te ni sáha cuandahū siquī tapa yejñú nuū ni cóso yuyú níñi jeē ndáhva cuēchi. Te tu núne yó cáhān gā yō siquī tāca yúcu vijna.

⁶ Te ná ni jñu tācá un, te núu-ni núu-ni quívicoo sutū ini cuarto xīhna ñúhún jéé casáha de jniñu jeē cúu de sutū.

⁷ Te ini cuarto uū, chi tu cúu quívicoo na-ni sutū jín inga ñayuu, chi máñúhún-ni sutū kujēhnu ga cúu jeē quiví, te suni ñn-ni vuelta jeē cuiyá. Te suni ma cúu quiví de núu tú níñi quití jeē socó de nuū Yaā

Dios jeē siquī cuēchi máá de jín síquī cuēchi ñayuu.

⁸ Te jín yúcuan stéén Espíritu Santo nuū yō jeē ná ni Iyo ga cuarto i xīhna ñúhún ini ñayíví, te tu ní núne ichi jeē quíví ñayuu ini lugar i ndasí jeē cúu andíví.

⁹ Chi tāca yúcuan cúu jeē ni stéén ndese cúu tiempo vijna. Chi jeē ní casocō i ndajníñu jín quití nuū Yaā Dios, chi tu ní cúu cuítí sáha jeē quéndō ndoo ánuá ñayuu ní casocō ún.

¹⁰ Chi tācá un ní steén máni siquī yiqui cúñu yō, ndese caji yō, ndese coho yó, ndese ndundoo yó. Te ni jejníñu máá-ni nde ni quiji Cristo jín ñn modo vāha ga.

¹¹ Chi vijna je ni quiji Cristo, te cúu ya sutū cujéñu ga jeē ndíso jníñu ya siquī tāca jēé vāha jeē ní quiji vijna. Te cúu ya sutū ini lugar i nde andíví jēé cujéñu ga te vāha ga vēsú cuarto i jenhán. Te nasūu jēé ní casáha ñayuu cúu, chi nasūu cuenta ñayíví yáha cúu.

¹² Te jeē ni quíví ya ini lugar i ndasí gá nde andíví, te nasūu jín níñi ndixúhú ni níñi becerro, chi jín níñi maá yá ni quíví ya, ni socō yā ñn jínu-ni jeē ní cáni. Te súcuan ni jnama ya yohó jēé cótecu yō ní cáni.

¹³ Chi nde jenhán te níñi stíquī jín níñi ndixúhú jín yā becerro jeē ní cáyū nuū altar, ni cacosō yuyú de siquī ñáyuu jeē tu íyó ndoo ánuá i, te súcuan ni ndundoo i nuū yā.

¹⁴ Te núu ni nihīn jníñu níñi tācá quití ún, te nagā ni cuu níñi maá Cristo. Chi Yaā ndoo cúu ya, te ni socō yā maá yá nuū Yaā Dios, ni sáha Espíritu jeē íyó ní cáni. Te níñi yā nácate ánuá yō nuū jníñu néé jēé cúu yō sáha. Te súcuan te cuu cuajníñu yó núu Yaā Dios, Yaā técu.

¹⁵ Jeē yúcuan cúu jeē ndíso jníñu ya siquī ñn contrato jeé. Chi ni jihī yā, te súcuan ni quende yā cuēchi ni casáha ñayuu ná ni Iyo i chíji contrato xīhna ñúhún. Te ñayuu jeē cána Yaā Dios i quívicoo i ndaha ya, nihīn i tahū i jeē cóo ní cáni, nájnūhun ni jejnūhun ya.

¹⁶ Chi cúu nájnūhun núu sáha ñn tēe acta jeē cahán siquī tahū, te nde na cúu de te níhín jníñu.

¹⁷ Chi núu técu gā tēe ni sáha, te tu níhín jníñu. Te nde núu ni jihī de, te sáá te jéjníñu.

¹⁸ Te suni súcuan contrato xīhna ñúhún, suni ni jini ñúhún cucutú jín níñi quití ní jihī. Te contrato jeé chi ni cucutú jín níñi Cristo jeē ni jihī yā.

¹⁹ Chi ná ni cuu ni cachi Moisés tācá jniñu ndácu contrato ley un núu ndívii ñayuu, te ni quihin de níñi becerro jín níñi ndixúhú jín ndute, te jín ixi cácuéhé jín yúcū hisopo ni cosō yuyú de siquī libro ley jín síquī ndívii ñayuu.

²⁰ Te ni cahán de: Yāha cúu níñi jeē cúcutú contrato ley jeē ní sáha Yaā Dios jín yó, achí de.

²¹ Te suni níñi un ní cosō yuyú de nde maá vehe i jín tāca ndajníñu ni cajejníñu de jeé cáchiñúhún de ya.

²² Te je yajni ndihi ndajníñu, chi cáhán ley un jeé jini ñúhún ndundoo jín níñi. Te núu ma cáti níñi te ma cóne cáhnu ni yā nuū cuēchi núu.

Jeē ni sócō Cristo maá yá jeē quende yā cuēchi

²³ Núu súcuan te tācá ndajníñu un jēé cácuu muestra tāca jēé íyó andíví, ni jini ñúhún ndundoo jín níñi quití. Te tāca máá jēé íyó andíví, chi ni jini ñúhún ndundoo jín níñi Cristo jeē yóhoyo vāha ga.

²⁴ Te Cristo chi tu ní quíví ya ini lugar i jeē ní casáha ñayuu, chi ñn muestra-ni ni cuu un jēé steén ndese íyó lugar i ndije nde andíví. Chi máá andíví ní quíví ya, te vijna íne ya nuū Yaā Dios jeē cahán yā jehē yō.

²⁵ Te máá sūtū cujéñu ga quíví de tāca cuíyā ini cuarto i gā jeē socó de níñi quití. Te Cristo tu ní sócō yā maá yá cuehē jínu, chi ñn jínu-ni.

²⁶ Chi núu jeē súcuan te cánuú jēé cuehē jínu ndoho ya nde ná ni jecō ñayíví te nde vijna núu. Te tuú chi sa tiempo cuándihi yāhá ni quenda ndijin yā ñn jínu-ni jeē ní cáni, ni socō yā maá yá jeē ní quende yā cuēchi.

²⁷ Te nájnūhun ni cundaā jeē cúu tāca ñáyuu ñn jínu-ni, yūcuán na te sándaā Yaā Dios jniñu i,

²⁸ suni súcuan Cristo ni jihī yā ñn jínu-ni jeē ni sócō yā maá yá jeē ní quende yā cuēchi cuehē ñayuu. Yūcuán na te ndiji ya inga jínu, te nasūu jēé socó tucu ya maá yá jeē quende yā cuēchi, chi sa suhva jeē jnáma ya ñayuu jeē cándetu i jeē ndíji ya.

10

1 Chi ley Moisés ni cuu ñin muestra-ni tāca jéē váha jeē ní quiji jíin Cristo, ñin jeē steén-ni ndese coo máá jéē váha. Jeē yúcuan tu cúu cuiñi sáha ley un jéē quéndōo ndaā ñayuu jeē quíjicoo i nuū Yaā Dios jeē cásocō i quiñi nuū cuiyá nuū cuiyá.

2 Chi núu ní cúu sáha ley un jéē quéndōo ndaā i, te jecuiñi jeē cásocō i quiñi núú. Chi núu ní cúu, te ñin jíinu-ni te je ni quendōo ndoo ánuá ñayuu cásocō ún, te ma yūhu gá anuá i jeē ni sáha i cuēchi núú.

3 Te tuú chi jeē cásocō i quiñi ún táca cuiyá, sa sáha jeē núcūhun ni i cuēchi i.

4 Chi niñi stíquī jíin níñi ndixúhú, ma cúu cuiñi quende cuēchi.

5 Jeē yúcuan ná ni quiji Cristo ini ñayiví, te ni cahān yā jíin Yaā Dios: Jeē jéñi i quiñi jíin jéē jéhe i ofrenda nuū ní, chi tu ní núnahan ni ní.

Te ni sátūhva ní yíqui cúñu maá ná jeē socó na.

6 Te tu ní cúsiñi ni ni jéē jéñmu i quiñi te sócō i ti jeē ndúndoo cuēchi i núú.

7 Yūcuán na te ni cahān ná: Yáha véji ná jéē squícu ná jniñu jeē núnahan ni ní, Tátā Yaā Dios.

Chi súcuan je yósó jnúhun na nuū tútu. Achí Jesús.

8 Xihna gā ni cahān yā jeē tu ní núnahan ni Yaā Dios te tu ní cúsiñi ni yā jeē jéñi i quiñi te jéhe i ofrenda, jíin jéē jéñmu i ti te sócō i ti jeē ndúndoo cuēchi i núú, nájñūhun ndácu ley jenahán jniñu.

9 Te ni cahān gā yā: Yáha véji ná jéē squícu ná jniñu jeē núnahan ni ní, Tátā Yaā Dios. Te jeē ni cahān yā súcuan, te ni sáha ya jeē jecuiñi jeē cásocō i quiñi, chi ni socō yā maá yá.

10 Te ni sáha Yaā Dios jeē iyó ndoo iyó íi yō nuū yā siquī jeē ni sáha Jesucristo jeē núnahan ni Yaā Dios, suu jeē ni sócō yā yíqui cúñu yā ñin jíinu-ni jeē ní cāni.

11 Te tāca sūtū ún ndiquiví ni cahān de ni cajejniñu de nuū yā, te cuehē jíinu cájehni de suu quiñi jeē socó socó de. Te tācá un chi ma cúu cuiñi quende cuēchi.

12 Te Cristo chi ñin jíinu-ni jeē ní cāni ni socō yā maá yá jeē siquí cuéchi yó. Te sáá te ni cucōo ya lado váha Yaā Dios nuū cujéñu ya.

13 Te yúcuan ndétu ya vijna nde quiñi quiñi jeē quénde yā poder tāca jéē jíto uhū nuū yā.

14 Chi jeē ni sócō yā maá yá ñin jíinu-ni, te ni sáha ya jeē ní cāni quendōo ndaā ñayuu ni sándoo ya.

15 Te máá Espíritu Santo suni cáji cáhán yā siquī jnúhun yáha, chi xihna gā cahán yā:

16 Suhva coo contrato jeē nasáha ri jíin i, nde na quiñi quiñi yúcuan, áchí Jítóho yō Yaā Dios:

Sáha ri jeē jécūhun ley rī ini anuá i, te suni nuū jeē níjnūní i tee ri jnúhun ley rī.

17 Yūcuán na te cáhán gā yā:

Ma núcūhun cuiñi gā ni rī tāca cuéchi jíin jniñu néé ní casáha i.

Achí yá.

18 Núu súcuan te núu je ni ine cáhnu ni yā nuū cuéchi yó, te tuá cánuú jéē socó gā yō jeē siquí cuéchi yó.

Jeē ní nune ichi quívi yó núu Yaā Dios

19 Jeē yúcuan hermano, ma ñin jeē cāni ni yō, chi cuu quiñi yó lugar íi ndasí ndé nuū iyó Yaā Dios, siquī jeē ní jeti niñi Jesucristo.

20 Chi ni nune ya ñin ichi jéē jéē cótecu yō ní cāni sáha ya. Chi ná ni jihí yā te ni tahndē sahma ndíta caa jeē ndihyú lugar íi ndasí gá ini vehe íi. Te súcuan ni steén Yaā Dios jeē nune quiñi yó lugar íi ndasí gá nuū iyó yá.

21 Te Jesús cúu sūtū cujéñu ndasí jeē ndító yóhó ñayuu cácuu sēhe Yaā Dios.

22 Núu súcuan te na quiñi coo yó núu Yaā Dios, te na cóo ndije ndaā anuá yō, te na cándije nihin yó jéē iyó ndaā ndihí jnúhun ya. Chi jíin níñi Cristo ni ndundoo ánuá yō nuū tāca cuéchi ni casáha yó, nájñūhun ni ndundoo yó núu yā jeē ní jendute yó jíin ndute.

23 Te na cuiñi nihin yó jíin jnúhun jeē cácahān yō jeē núnhun ni yō jeē sáha ya jeē váha jíin yó. Te ma cáca yátá yó, chi váha squícu máá Yaā Dios jeē ni jéjnūhun ya nuū yō.

24 Te na nácani ni yō ndese stíhví jnáhan ni yō jeē cundáhú gá ni yō jnáhan yó, jíin jéē sáha yó jniñu váha.

25 Te níni na ndútútú yó chiñúhún yó yā, te ma cúhuun ni yō nájñūhun casáha sava i, chi sa víhyá gā na stíhví jnáhan ni yō, chi je cájini yō jeē cuácuyajni quiñi ndíji ya.

²⁶ Te núu je ni jecūhun ni yō te ni jetáhú yó jnūhun ndaā, te núu máni sáha sáha-ni yó cuéchi, núu súcuan te tuá na inga iyó jéē cúu siquī cuéchi yó.

²⁷ Chi sa quéndōo máni ga jnūhun xeēn siquī yō jeē quiiji quivī juicio te quiiji yáñuhūn xeēn jeē cayū ñayuu jeē cájito uhū i ya.

²⁸ Ñayuu squéhichī ley Moisés, te núu uū chí únī ñayuu cahán cuéchi siquī i, te cuu nahín i, te tuá na jnūhun cundáhú ni iyó.

²⁹ Te nagā ni cuu jeē ma ndóho xeēn gā ñayuu jeē squéhichī i máá Séhe Yaā Dios, chí nájñuhun jeē jeñú níhnu i siquī yā. Te sáha i jeē tu ndé jéjñíñu niñī yā jeē ní jeti siquī contrato jeē ndúndoo i nuū yā nuú. Te súcuan sáha ndevāha i nuū maá Espíritu Yaā Dios jeē sáha jeē váha yóhó.

³⁰ Chi je jíni yō jeē ni cáhān maá yá: Máá rí sáha jeē ndutahū i siquī cuéchi i, máá rí cuāha castigo i, áchí Jítóho yō. Te suni cáhān: Máá Jítóho yō sándaā yā siquī cuéchi ñayuu yā.

³¹ Núu súcuan te xeēn ndasí cúu jeē quivī ñayuu ini ndaha Yaā Dios, Yaā técu, jeē ndútahū i siquī cuéchi i.

³² Te na núcūhun ni rō ndese ni cuu ichi yátá, nde náa sá ní quejéé ró caca ró jíin luz yā, te ni cajendeyí ni rō ni candoho ró tijni jñúndóho xeēn.

³³ Chi sava ró ní cacahān neé i nuū rō te ni castóho i róhó ní cajito ñayuu. Te sava ga rō ni cajēhe ró jnúhun cuiñī ró jíin ñáyuu ni candoho súcuan.

³⁴ Chi ni cacundáhú ni rō ñayuu ní cahīin vecāa jeē siquī yā, te ni cacusiñī ni rō vésú ni caquende ñayuu ndajñíñu ró. Chi ni casáha ró cuenta jeē ndé andiví cánevāha ró ññ tahū jeē váha ndasí gá jeē coo ní cáni.

³⁵ Núu súcuan te ma siaá rō jnūhun jeē ní candíje ndije ró jéē váha ni yā, chí cuehē ndasí táhū nihīn rō siquī ún.

³⁶ Chi cánuú jéē cuándeyí ni rō návāha sáha ró jéē núnjahan ni Yaā Dios, te nihīn rō jeē ni jéjñūhun ya.

³⁷ Chi cáhān tutu iñ: ññ núnúu-ni te ndee Yaā ndiji, te ma cucuéé yá.

³⁸ Te ñayuu jeē ní ndahva rī cuéchi i, cotecu i jeē candíje i jeē sáha ri jehē i.

Te núu na cáca yátá i, te ma cúsiñī ni rī jíin i.

Achí Yaā Dios.

³⁹ Te yóhó tu cácuu yó jnáhan ñayuu cájica yátá jeē jnahnú ndetū i. Chi sa cácandíje yó jéē nihín tahū yō cotecu anuá yō.

Siquī jnūhun cándíje

11

¹ Te jeē candíje yó, suu cúu jeē cúndaā ndije ni yō jeē nihín yō táca jéē ñúhun ni yō, jíin jéē jíni váha yó jéē iyó ndije táca jéē tu cájito yó núu vijna.

² Te ñayuu jenahán chí ni jejnúhún yá i siquī jeē súcuan ni cacandíje nihín i.

³ Siquī jeē candíje yó cúu jeē jécūhun ni yō jeē ni sáha Yaā Dios ñayiví jíin jnúhun ni cahān-ni ya. Te jíin poder Yaā Dios jeē tu jíto yó núu, ni jecōo táca jéē jíto yó núu.

⁴ Ni candíje Abel jeē sáha ya jehē de, te jeē yúcuan ní socō de jeē váha ga nuū Yaā Dios vésú Caín. Te jeē yúcuan ní jejnúhún yá jeē iyó ndáa de, chí ni jetáhú yá jeē ní sócō de quiti nuū yā. Te vésú ni jihī de, te cáhān gā ejemplo de jíin yó nde vijna, chí ni candíje ndaā de.

⁵ Ni candíje Enoc jeē sáha ya jehē de, te jeē yúcuan ní naquihin ya de cuahān de andiví, te tu ní jíhi de. Te tu ní cánanihīn ñayuu de, chí ni ndoñúhún-ni de ni sáha ya. Te áchí tutu jeē nde ná tu naquihin ya de te ni cusīñ ni yā jíin táca jéē ni sáha de.

⁶ Te núu tu cándíje yó jéē sáha ya jehē yō, te tú na modo cusīñ ni Yaā Dios jíin yó. Chí ñayuu jeē cuní quivícoo ndaha ya, cánuú jéē candíje ndaā i jeē iyó yá jíin jéē cuáha ya tahū nuū ñáyuu jeē nducú i candíje i ya.

⁷ Te Noé ni candíje de jeē sáha Yaā Dios jehē de, ná ni castūhun yá nuū de jeē coo jñúndóho jeē ná tu coto de jeē coo. Te jeē yúcuan ní jendetū de ni sáha de barco cáhnu jeē naní arca, návāha cācu de jíin ní vehe de. Te jeē súcuan ni candíje de, te ni cane cuéchi siquī ñayuu jeē tu ní cándíje i ya. Te ni ndahva yā cuéchi de siquī jeē ní candíje de jeē sáha ya jehē de.

⁸ Te Abraham ni candíje de jeē sáha ya jehē de, te jeē yúcuan ní jetáhú de ná ni cahān yā jíin de jeē quihín de ññ lugar nuū cuáha ya cuu tahū de. Te ni quenda de cuahān de, vésú tu jíni de ndé nuū quihín de.

9 Ni candíje de jeē sāha ya jehē de, te jeē yúcuan ní condee tatú de nuū ñuhun jeē ni jéjnūhun ya jeē cuáha ya nuū de. Te ni condee de vehe ñi, te suni súcuan Isaac jíin Jacob, chi sēhe de ún suni inuú níhīn tahū i jíin de jeē ni jéjnūhun ya.

10 Chi ni ñuhun ni de condee de máá ñuu andiví jéē iyó cutú cimientó, te máá Yaā Dios ni jequin yā ni sama ya ñuu ún.

11 Te suni ni candíje máá Sara jeē sāha ya jehē ña, te jeē yúcuan ní nihīn ña fuerza jeē ní jecūhun sēhe ña. Chi nde ná ni yāha ndasí cuiyā ña, te ni cacu in sēhe yí ña, chi ni candíje ña jeē squícu Yaā Dios jeē ni jéjnūhun ya.

12 Te súcuan ni cuu jeē ni táhū cuehē ñayuu ni sāha in-ni Abraham, vésú je jéhnū ndasí de. Te yucūn de ni nducuehē ndasí, nájnūhun quimi andiví, jíin ñiti yumar, jeē ma cúu cuiti cahu yó.

13 Te tāca tée cándíje un, ní cajihī de. Te vésú tu ní cajito de jeē ni jéjnūhun ya, te ni cajini vāha de jeē cóo, te ni cacu in ni de jeē cóto de inga tiempo. Te súcuan ni cacahān de jeē ñayuu ñuu jicá ñayuu tatú cácuu de ini ñayivi yāha.

14 Te tāca tée jeē cahán súcuan, chi stéén cají de jeē nducú de in ñuu jeē cúu andiví núu cúu ñuu maá de.

15 Chi núu jeē cánacani ni de siquī ñúu nuū ní quendacoo de, te iyó modo jeē nándicó cóo de te núu jeē cácuu de núu.

16 Te tuú chi ni cacuu ndasí ni de coyūcú de inga ñuu vāha ga jeē cúu ñuu andiví. Jeē yúcuan tu cúcanu Yaā Dios jeē naní yá Yaā Dios de jíináhan de, chi je ni sátūhva ya in ñuu nuū cóyūcú de.

17 Ni candíje Abraham jeē sāha ya jehē de, te jeē yúcuan ní jehēn de jíin Isaac jeē socó de i, ná ni jito ndee ya de. Te ni iyo tūhva de jeē socó de sēhe de un jéē mañúhūn ni i nuū de, vésú ni nihīn de jnūhun jeē ni jéjnūhun ya suhva siquī i:

18 Isaac cúu tēe jeē squejéé rí yucūn rō quihīn, achí jnūhun ni jejnūhun ya.

19 Te ni sāha de cuenta jeē cúu nastécu Yaā Dios i. Te nájnūhun súcuan ni cuu, chi cuu cahān yō jeē nájnūhun ni jihī i te ni natecu i nuū de, chi ni jesi-ni ya jeē ma cáhni de i.

20 Ni candíje Isaac jeē sāha ya jehē de, te jeē yúcuan ní cahān de jeē vāha tahū nihīn sēhe de Jacob jíin Esaú tiempo quiji.

21 Te suni súcuan ni candíje Jacob, te jeē yúcuan, náa je yajni cuu de te ni cahān de jeē vāha tahū nihīn ndindúú sēhe yí José. Te yítuu de vara de, ni chiñúhūn de Yaā Dios.

22 Te suni súcuan ni candíje José, te jeē yúcuan, náa cuacuyajni cuu de, te ni cahān de jeē tāca yúcūn Israel, in quiví quenda-coo i nación Egipto. Te ni ndacu de jniñu jeē chindūji i yiqui de ñuu nuū quívicoo i.

23 Te ná ni cacu Moisés, te tátá i náná i ni cacandíje de jeē sāha ya jehē de, te jeē yúcuan ní cacondito sáhi de i uní yoō. Chi ni cajito de jeē lúu cáa i, te tu ní cáyūhú de siquī acta jeē ni sāha rey jeē na cúu tāca súchi yí.

24 Te suni súcuan ni candíje Moisés, te jeē yúcuan ná ni jehnu de te tuá ni jéhe de jnūhun cuu de sēhe ñahan cúu sēhe síhi rey Egipto.

25 Chi sa ni cuu ni de ndoho de jíin tāca jnáhan de ñayuu Yaā Dios, nasūu jéē cusī ni de jecu-ni tiempo jíin cuéchi.

26 Chi ni sāha de cuenta jeē núu cahān neé ñayuu siquī de jeē siquí Cristo, te yúcuan sāha jeē cucá ndasí gá de ndihī jeē ndiso jnūhun Yaā Dios, vésú jeē nihīn de ndihī ndajniñu cucá iyó nación Egipto. Chi ni ñuhun ni de jeē cuáha ya tahū de.

27 Te jeē súcuan ni candíje de, jeē yúcuan ní quenda de nación Egipto cuahān de. Te tu ní yúhú de jeē quití ni rey nuū de. Chi ni in nihīn de siquī jniñu sāha de, chi ni sāha de cuenta jeē je jito de nuū Yaā jeē tu cúu coto yó núu vijna.

28 Te jeē súcuan ni candíje de, te jeē yúcuan ní cahān de jeē na cáhni ñayuu londe pas-cua. Te ni ndacu de jniñu jeē na cóso yuyú i niñi tī yehyí i, návāha núu na quíji ndajéhé jeē cáhni yā tāca sēhe nuú ñayuu Egipto, te ma cáhni yā sēhe nuú ñayuu Israel.

29 Te siquī jeē ní cacandíje ñayuu Israel jeē sāha ya jehē i, te ni cayāha-ni i mēhñu Mar Rojo, chi ni nune ya te ni natūu-ni ñuhun íchi. Te suni súcuan ni cacuni tēe Egipto yāha de núu, te ni nandihyū-ni ndute siquī de ni cajihī de.

³⁰ Ni cacandíje soldado jeē sáha ya jehē de, te jeē yúcuan ní cotúú jeē ní condúú ndihyú ñuu Jericó, ná ni cajicó ndúú de uxā quiví.

³¹ Te Rahab, vēsú ñahan tíjni ni ni cuu ña, te ni candíje ña jeē sáha ya jehē ña. Te ni chindéé ñáhán ña tēe Israel jeē ní quijicoo ni condēhé yuhu ndese íyó ñuu ña. Te jeē yúcuan tu ní jíhí ña jíin ñáyuu níhni ni ñuu ña ún.

³² ¿Te ndé jnúhun ga cahān rī núu súcuan? Chi tuá na tiempo jeē nácani ga rī jnúhun Gedeón jíin Barac jíin Sansón jíin Jefe jíin David jíin Samuel jíin táca tēe ni canacani jnúhun ya nde jenahán.

³³ Ni cacandíje de jeē sáha ya jehē de jíinahan de, te jeē yúcuan ní cacundeyí de ni canajni de táca ñuu náhnu, te vāha ni candacu de jniñu nuū, te ni chindéé ñáhán yá de nájnūhun ni jejnūhun ya. Te nuū sava de ni jesi Yaā Dios yuhu ndícaha jeē tu ní cáyeji tī de.

³⁴ Te sava de tu ní cáyú de sáha ñuhūn jeē cayú xeēn. Te sava de ni cācu de jeē tu ní jíhí de jíin espada. Te sava de ni nanihīn ni de náa tuá fuerza de núú, te ndacuī teyí ní iyo de nuū guerra, te ni cacundeyí de siquī soldado táca ñuu jicá jēe jíto uhū ún de.

³⁵ Te sava ñahan ni natecu sēhe ña jeē ni jíhí i.

Te sava ga ñayuu chi sa suhva ni candoho xeēn i nde ni cajihí i. Te tu ní cájēhe i jnúhun jeē siaá i jnúhun ya te cācu i, chi ni catee ni i jeē natecu i coyūcu váha ga i andiví.

³⁶ Te sava ga i ni casacatā ñayuu nuū i, te ni cacani ñayuu i, te nde ni caconuhni cadena i ni cahīn i vecāa.

³⁷ Te ni cajēhe yuū xinī i, te ni cajehnde i jíin sierra, te ni cajito ndee i jíin jnúndóho, te ni cajehni i jíin espada. Ni cajica cuu i cháha chúcuan, te máa ñi lánchi máa ñi ndíxuhú ní cañuhun i. Ni candoho ndáhú i, ni cajito i jnúndóho, ni castóho ñayuu i.

³⁸ Vāha ndasí ñáyuu ni cacuu i jeē tú cuiti ñayuu ñayiví súcuan, te vēsú súcuan te ni casáha ñayuu jeē ní cajica cuu i nuū ñuhun téhé jíin chíji yucu, ni cahīn i yaū cava jíin yáú ñuhun.

³⁹ Te táca ñáyuu yáha, vēsú ni jejnūhún yá i jeē ní cacandíje níhni i jeē sáha ya jehē i, te tu ní cajito i nuū jeē ni jejnūhun ya.

⁴⁰ Chi ni sátūhva Yaā Dios ñi jniñu váha ga, te suu cúu jeē sáha Cristo jíin yó, návāha ñi cáhnu-ni níhni yó tahū yó jíin i, te jeē yúcuan cúu jeē ná tu níhni i ndihí tahū i.

Jeē na cócunuū yó nuū maá ñi-ni Jesús

12

¹ Te íyó cuéhē ndasí ñáyuu un jēe ní cacandíje níhni i jeē sáha ya jehē i, te nájnūhun ni jicó ndúú i yóhó, cástéén gā i nuū yó nde vijna jeē suni súcuan na candíje yó. Núu súcuan te suni máa yó, na téjiyo yó táca jēe sajnéñu jíin cuéchi jeē ni cáan yó jíin. Te na cuándeyí ni yó cunu yó jíin carrera jeē ni jēhe ya jeē cunu yó.

² Te na cócunuū vāha yó Jesús, Yaā jeē ni scándíje yóhó te sáha ya jeē íje vāha yó jíin jnúhun ya nde jinu ije yó. Chi máa yá ni jendeyí ni yá ni ndoho ya jicā cruz. Te vēsú jnúhun canu cúu jeē súcuan cuu yā, te tu ní sáha ya cuenta. Chi ni ñuhun ni yā jeē sa cusí ndasí ni yá ná ni cuu ni ndoho ya. Yūcuán na te ni cucōo ya lado váha mesa nuū ndácu Yaā Dios jniñu.

³ Te na nácani ni rō ndese ni jendeyí ni yá ni ndoho ya jeē ni sáha ndevāha ñayuu iyó cuéchi jíin yá. Te súcuan te ma cuíta ró ni ma ndínuu ni rō jíin jnúndóho.

⁴ Chi ni ná tu ndoho ró jēe ndé cuu rō jeē cánducú ndeyí ró snāā rō cuéchi.

⁵ Te sanaa te je ni canaa ni rō jnúhun cáhán tutu íi, jeē stihví ni Yaā Dios rohó jēe cácuu ró sēhe ya:

Séhē, ma quítí ni rō jeē snahnú Jitoho yó rohó,

te ni ma ndínuu ni rō núu cáhán yā nuū rō.

⁶ Chi Jitoho yó snahnú yā ñayuu jeē maní yā jíin,

te jēhe ya castigo táca jēe náquihin ya cuu sēhe ya.

Achí tutu.

⁷ Núu súcuan te na cuándeyí ni rō jeē snahnú Yaā Dios rohó, chi sáha ya jíin ró nájnūhun sáha tátá jíin sēhe. Chi tú na sēhe íyó jēe tu snahnú tátá i.

⁸ Te núu ma snahnú yā rohó, nájnūhun ndóho táca sēhe, núu súcuan te nájnūhun sēhe ndáhú cácuu ró, nasūu sēhe ndije ya.

⁹ Te tátá yó ñayiví yáha, suni ni snahnú de yóhó, te ni iyo yíñuhún yó jíin de. Te nagā

ni cuu jeē ma cuándetū yō nuū maá Tátá yō andiví jeē snahnú yā yohó, te cotecu yō ní cáni.

¹⁰ Te ndaā chi máá de ni casnáhnú de yóhó jecu-ni quiví, ndese ni cuu ni maá de. Te máá yá chi snáhnú yā yohó ñn modo jeē quéndōo vāha ga yō, návāha coo ndoo yó nájnūhun íyó ndoo máá yá.

¹¹ Te ndaā chi tu cácusñ ni yō maá hora jeē ndóho yó castigo, chi sa cúcuíhyá ni yō. Te cúcuéé gá te cuni yō jeē ní quendōo ndaā yō te coo ndeyí sñ ni yō jeē ni snáhnú yā yohó.

Siquí ñáyuu jeē casquéhichí i jnūhun cáhán Yaā Dios

¹² Núu súcuan te ma cóo ró nájnūhun tēe ni cuíta íi ndaha te quisí i xiní yití, chi sa ndacuí na sáha ró máá ró nuū jnúndóho.

¹³ Te sáha ró ichi ndóó caca ndaā rō, návāha nduvāha róhó jēe tu fuerza ini, jeē cácuu ró nájnūhun tēe chácua jeē tu cúu caca vāha.

¹⁴ Te na cóndihvī ni rō jeē condee manī rō jíin táca ñáyuu, jíin jēe cóo ndoo coo íi rō nuū yā. Chi ma cúu coto ni ñn ñayuu nuū maá jítoho yō te núu tu íyó ndoo i.

¹⁵ Te coto má cáca yátá ni ñn ró te scuíta ró jnúhun jeē sáha Yaā Dios jeē váha róhó, návāha tú cuu ró nájnūhun ñn yucū uvuá jeē stíví te sáha daño jíin cuéhē ñayuu.

¹⁶ Te ni ñn ró ma cáca jnéni. Te ni ma cóo jēe ni rō nuū Yaā Dios, nájnūhun ni íyo Esaú. Chi máá ñn cohō ndeyu ni jicān de nuū ñáni de, ni sama de jíin derecho de jeē cúu de sūchi núu, te súcuan ni xícó de derecho de.

¹⁷ Te cájini rō jeē cucuéé gá te ni cuni de jeē na cáhán tatá de jeē váha tahū nihīn de, te tu ní cúu, chi tuá ni táñúhún Yaā Dios de. Chi tu ní níhīn jníñu jeē ní nacani ni de, vésú ni nducú ndeyí de te nde ndahyú de.

¹⁸ Te róhó jíjnáhan ró tu ní quíjicoo ró núu íyo cúu, nájnūhun íyo ni cuu máá yucu nuū ni jéhe ya ley yā nuū ñáyuu Israel. Chi ni cane yáñuhūn yucu Sinaí, te nee lúchi jnúu jíto, te quée tachí xeén.

¹⁹ Te ni jecu trompeta, te ni cahān Yaā Dios. Te ñayuu jeē ní cajini sōho jeē cahán yā, ni cacahān ndahú i jeē ma cahán ga yā jíin i.

²⁰ Chi tu ní cúndeyí i jíin jnúhun jeē ní ndacu ya jniñu nuū i, chi ni cahān yā: Vésú

ñn quití-ni núu quiví ti yucu yáha, jíni ñúhún cuu tí jíin yūu chí jíin lanza, achí yá.

²¹ Te siquí jeē íyo ndasí cúu jeē cájito i ún, te ni cahān Moisés: Quisí i ruhū jeē yuhú rí, achí de.

²² Te vijna róhó jēe cácandíje, tu ní quíjicoo ró núu yucu yúcuan. Chi sa suhva nuū maá yucu Sion jíin núu maá ñuu Yaā Dios, Yaā técu, ni quívicoo ró. Te ñuu un cúu Jerusalén jeē iyó andiví, nuū cáhíyo tútú cuéhē ndasí mil ndajéhé cáchiñúhún Yaā Dios.

²³ Te ni quívicoo ró núu cáyūcu tútú ñáyuu cácandíje jeē cácuu sēhe Yaā Dios, jeē iyó lista i andiví. Te ni quívicoo ró núu Yaā Dios, Yaā sándaā jniñu ndihí ñayuu, jíin núu cáhíyo ánuá ñayuu vāha jeē jé ni squéndōo ndaā yā i.

²⁴ Te suni nuū maá Jesús, Yaā ndíso jniñu siquí contrato jeé ní quívicoo ró. Te yahu ndasí gá jniñu sáha niñí yā jeē ni jétí jeē ndáhva cuēchi yó, nasūu níñí Abel jeē ni jíicān cuēchi.

²⁵ Núu súcuan te coto má squéhichí rō jnūhun jeē cahán yā jíin ró jíjnáhan ró. Chi ñayuu jeē tu ní cájetáhú ná ni cahān yā jíin i ñayiví yáha, tu ní cácacu i. Te xeén gā ndoho yóhó te núu ma cuatáhú yó nuū yā jeē cahán yā nde ichi ándiví núu súcuan.

²⁶ Te nde saá ní quisí i ñayiví jēe ni cahān yā. Te vijna chi cáhán yā: ñn na jínu quisí rí ñayiví, te nasūu máá-ni ñayiví, chi suni táca jēe íin andiví, achí yá.

²⁷ Te jnūhun yáha jēe cahán, ñn na jínu, chi cúní cahān jeē téjiyo ya táca jēe tu íyó cutú, suu jeē ní cuvāha, návāha na quéndōo jeē cóo cutú ní cáni.

²⁸ Núu súcuan te cuāha Yaā Dios ñn ñuu nuū yō jeē cóo cutú ní cáni. Te jeē yúcuan, na nácuatáhú yó nuū yā, te na chíñúhún yó yā, te na cóo yíñúhún yó, návāha cusñ ni yā jíin yó.

²⁹ Chi Yaā Dios maá yó cúu nájnūhun ñn ñuhūn jeē snáā ndihí jeē neé.

Ndese sáha yó te cusñ ni Yaā Dios

13

¹ Ma jécuiñí rō jíjnáhan ró jēe cundáhú ni rō hermano rō cácandíje.

² Conahán ró jeē cánuú cuáha núu ró vehe nuū ñáyuu cájica. Chi íyó jínu jeē súcuan

ni cajēhe núu ñayuu vehe, te tu ní cájini i jeē nuū maá ndajéhé andiví ní cajēhe núu i vehe.

³ Te conahán ró chindéé ñáhán ró ñayuu cáhīn vecāa, chi sáha ró cuenta jeē nájnūhun cáhīn cáhnu ró jíin i vecāa. Te suni nacani ni rō jehē jnáhan ró jéē cándoho i sáha ñayuu, chi núu súcuan coo jíin máá ró te suni ndoho ró.

⁴ Coo yíñúhún ró síquī jnúhun quíjnáhan ñayuu, te ma cosíquí ndéē jnáhan ró. Chi máá Yaā Dios sándaā yā cuēchi ñayuu tijni ni jíin ñáyuu casíquí ndéē jnáhan.

⁵ Te ma ndíyo ni rō xūhún, chi na cóo sī ni rō jíin jéē cánevāha ró. Chi máá yá ni cahān: Ma siaá cuiti rī rohó, ni ma stóo cuiti rī rohó, áchí yá.

⁶ Núu súcuan te ma ñn jeē cáni ni yō, chi cuu cahān yō:

Máá Jítoho rī chindéé ñáhán yá ruhū,
te ma yūhu rí núu na vé cuní ñayuu sáha i jíin rí.

Achi yō.

⁷ Te na núcūhun ni rō tācá pastor rō, jeē ní castéén de jnūhun Yaā Dios nuū rō. Te sáha vāha ro cuenta ndese ni nihīn jniñu jeē ní casáha de, te na ndácu ró de jeē ní cacandíje de jeē sáha ya jehē de.

⁸ Te Jesucristo chi ñn-ni cáa ya ichi yátá jíin vijna jíin ní cáni.

⁹ Núu súcuan te ma cuáha ró jnúhun candíje ró táca jnúhun jeē sín cáhán jeē tu quíjnáhan jíin jnúhun máá yá. Chi íyó vāha jeē na íje ánuá yō sáha jnūhun jeē vāha ni yā jíin yó. Te tu jíni ñúhún yó jnūhun jeē tajnúni síquī jeē yéji yō, chi tu níhín jniñu cuiti jíin ñáyuu cáhīn jíin.

¹⁰ Te máá yó chi cánevāha yó ñn jeē ni sócō maá jéhē yō, cúu Cristo. Te táca sūtū jeē cásocō gā de modo jeē cahán ley jehān, tú na vé nihín de nuū yā jeē ni sócō yā máá yá.

¹¹ Te sūtū kujéhnū ga, ná ni sócō de niñī tācá quitī ini cuarto īī gā jeē síquí cuéchi, te yíquí cúñu tī ni cajehmu de ichi yátá ñuu.

¹² Te suni súcuan ni ndoho máá Jesús ichi yátá ñuu, návāha jíin níñī maá yá te sándoo ya ñayuu.

¹³ Núu súcuan te ma cóo inuú gā ni yō jíin ñáyuu tu cacandíje, chi nájnūhun quihīn yō

jíin yá ichi yátá ñuu, te na ndóho yó jíin yá jeē sácatā i.

¹⁴ Chi ñayīvi yáha tu íyó ñuu nuū coo yó ní cáni, chi sa cánducú yó máá ñuu nuū cóyūcu yó quivī quíji.

¹⁵ Núu súcuan te jeē jíin Jesucristo te níni na cáhán yō jeē yóhyo cújéhnū Yaā Dios, chi suu cúu nájnūhun ñn jeē sócō yō nuū yā, suu jeē nácuatáhú yó nuū yā.

¹⁶ Te ma náa ni rō sáha vāha ró núu jnáhan ró, te cuāha ró jéē cúmanī nuū i. Chi nájnūhun ñn jeē cásocō rō nuū Yaā Dios cúu táca jéē yáha, te cúsi ni yā jíin.

¹⁷ Te cuandíje ró núu tēe cácuu pastor rō, te cuandetū rō nuū de. Chi cándito de róhó jéē quéndōo vāha ánuá rō, chi cájini de jeē cánuú nacuāha de cuenta nuū yā. Te condihvi ni rō sáha vāha ró, návāha cusī ni de síquī rō te ma cucuíhyá ni de síquī rō. Chi núu tu súcuan te ma cóo jeē vāha jíin ró.

¹⁸ Te cacān tahú rō jehē rī jijnáhan rī. Chi vāha íyó ni anuá rī jeē tú na cuēchi rī. Chi cácuu rī caca yíñúhún rí jíin táca jniñu.

¹⁹ Te suni cáhán ndahú rí jíin ró jeē cacān tahū ndasí ró jehē maá rí, návāha cuāha ya jnūhun jeē yachī gā cuajeē tucu rī nuū rō.

Bendición jíin saludo jeē sándīhí

²⁰ Te máá Yaā jeē jéhe jnūhun ndeyí sī ni nuū yō, ni nastécu yā Jítoho yō Jesucristo mēhñu ndíyi. Te Jesús cúu pastor kujéhnū jeē ndíto ñayuu cácuu nájnūhun lanchi ya. Chi jíin níñī yā ni sácutú yá contrato jeé yá jeē coo ní cáni.

²¹ Te ñúhún ni rī jeē Yaā Dios na sáha ya jeē ije ni rō jijnáhan ró, návāha cuu sáha ró táca jniñu vāha ndese nújnahan ni yā. Te ñúhún ni rī jeē jíin fuerza Jesucristo jeē ndeé yá ini yō, na sáha Yaā Dios jeē cuu yó ñáyuu cúsi ni yā jíin. Te na cáhán yō jeē yóhyo luu cújéhnū ya ní cáni. Amén.

²² Hermano jijnáhan ró, cáhán ndahú rí jíin ró jeē cone cáhnu ni rō jeē stihvi ni rī rohó jíin jecu-ni jnūhun ni tee rī nuū carta yáha.

²³ Te cástūhun rí jeē hermano yō Timoteo, je ni quenda de vecāa. Te núu yachī quiiji de yáhá, te cuajecoo ndindúú rí nuū rō coto jnáhan yó.

²⁴ Te cahān rō jíin táca tēe cácuu pastor rō jíin táca hermano cacandíje jeē sándeyí ni

de, áchí rí. Te ñayuu Italia suni cácahān i jeē sándeýí ñi rō.

²⁵ Te ñúhun ni rī jeē na sáha ga Yaā Dios jeē váha rōhó jíjnáhan ró. Súcuan na cóo. Amén.

CARTA JEE NI TEE SANTIAGO NUU ÑAYUU CACANDIJE

¹ Máá rí cúu Santiago, mozo Yaā Dios jíin Jítoho yō Jesucristo. Te tée ri carta yáha cuájeē nuū rohó ñáyuu cácanđije jeē cácuu ró ndihúxí uū yucūn Israel, te ni cajitē núu ró ní ñáyíví. Sándeyí ni rō jijnáhan ró.

Yaā Dios sáha jeē jécūhun ni yō

² Ñánī mánī, na cúsi ndasí ni rō jijnáhan ró núu quiji tijni tāca jnúndóho siquí rō.

³ Chi cájini rō jeē núu jíto ndee jnúndóho rōhó núu cácanđije vāha ró, te yūcuan sáha jeē cútūhva ró cuándeyí ni rō.

⁴ Te na cuándeyí ni rō nde ije vāha ró jíin, návāha cuu sáha ró ndihi jniñu vāha, te ma cúmanī jeē squícu vāha ró núu yā.

⁵ Te núu ndé ñn ró cúmanī jecūhun ni rō caca ndíchí ró jíin jnúhun Yaā Dios, na cácan rō nuū yā, te sáha ya jeē jécūhun ni rō. Chi sáha ya ndihi jeē cájicān ñayuu, te tu cúxeēn yā nuū i jeē jicān i.

⁶ Te jeē jicān rō, te cánuú candíje ró jée sáha ya jeē jicān rō, te ma cáni siquí ni rō. Chi ñayuu jéni siquí ni, cúu i nájnūhun ndute mar jeē ndónđa jísó cóyo cuahān cháha chúcuan sáha tachī.

⁷ Ñayuu ún ma cáni ni i jeē sáha Jítoho yō jeē jicān i.

⁸ Chi ñayuu jeē jéni ñn jéni uū ni, chi máni násāma ni i jíin tāca jniñu cásáha i.

⁹ Tācá hermano ndahú, na cúsi ni de jeē sáha Yaā Dios jeē cujénu de.

¹⁰ Te hermano cucá, na cúsi ni de núu ni ndundáhú de. Chi tāca tée cucá, yachī naa jeē cucá de, nájnūhun náā ita yucū.

¹¹ Chi núu ni cane niāndii te cújihní, te íchí-ni yucū, te cóyo-ni ita, te náā-ni jeē lúu cáa. Te suni súcuan ndoho tāca tée cucá níni sá jícu de jíin jniñu de.

Siquí jeē jíto ndee jnúndóho yóhó

¹² Yōhyo ndetū tēe jeē jéndeyí ni de núu jíto ndee jnúndóho de. Chi núu je ni cundeyí de jíin, te nihīn de premio jeē cujénu de cotecu de ní cáni. Chi súcuan ni jējnūhun

Yaā Dios jeē cuáha ya nuū ñáyuu jeē maní jíin yá.

¹³ Núu ñn ñayuu jicān ini i jeē sáha i cuēchi, te ma cáni ni i jeē nuū Yaā Dios vēji jeē jicān sáha i cuēchi. Chi ni ñn ma cúu cuiti sáha jeē quívi Yaā Dios cuēchi, te ni máá yá tu squívi ya ni ñn ñayuu nuū cuéchi.

¹⁴ Chi sa suhva jeē ndíyo néé ni máá i, suu sáha jeē jicān ini i sáha i cuēchi, te scānda ini i chi stáhú un i.

¹⁵ Te jeē ndíyo néé ni i, yūcuan quéjée cuéchi. Te cuēchi ún, núu je ni cunihin, te sáha jeē jnahnú ndetū ñayuu.

¹⁶ Núu súcuan te ma stívi ró cani ni rō jijnáhan ró, ñánī mánī.

¹⁷ Tāca jée cútahū yō jeē vāha jeē lúu íyó, chi vēji nde andívi núu máá Yaā Dios, Yaā ni sáha tāca jée ndíndēe ín andívi. Te máá yá tu násāma cuiti ini yā nájnūhun násāma nduva jíin cuándahū.

¹⁸ Te ni sáha ya jeē cótecu yō ní cáni, chi ni candíje yó jnúhun ndaā yā. Te ni nduu yó nájnūhun sēhe nuú yá nuū tāca gá sēhe ya jeē quiji, chi súcuan ni nujnahan ni yā sáha ya.

Siquí ndese chiñúhún ndāā yō yā

¹⁹ Núu súcuan te tāca rōhó ñánī mánī, ñama na chúsohó ró jnúhun ya, te sa suhva ma cahán yachī rō, ni ma quití yachī ni rō.

²⁰ Chi ñayuu cáquití ni, tu sáha i jniñu ndaā jeē cuní Yaā Dios.

²¹ Núu súcuan te na siáá rō tācá jniñu jnéhén jíin jniñu néé jée ni cáyā jíin ró. Te na cóo vítá ni rō te cuatáhú ró jnúhun ya jeē ni quívi ini anuá rō. Chi jnúhun un ndíso poder jeē cācu ánuá rō.

²² Te na squícu ró jée steén jnúhun ún, te nasūu máá jée cúni sōho ró súcuan-ni, chi núu súcuan te cástáhú ró máá ró, chi tu níhín jniñu núu tu squícu ró.

²³ Chi tēe jeē jíni sōho de jnúhun ya súcuan-ni, te tu squícu de, cúu de nájnūhun ñn tēe jeē jíto de nuū espejo ndese cáa nuū de.

²⁴ Te jíto vāha de nuū de, te cuahān-ni de, te náā ni de ndese cáa nuū de.

²⁵ Te núu ñn tēe tu náā ni de jnúhun jíni sōho de, chi sa suhva chúhun vāha ni de jeē cahán máá ley ndaā Jesús jeē ni sáha libre yohó, te núu cuiñi níhin de jíin, te squícu de

jeē ndácu, yūcuán na te quéndōo ndetū de jíin jniñu váha jeē sáha de.

²⁶ Te núu ndé ñn ró jéni ni rō jeē chiñúhún váha ró Yaā Dios, te núu tu ndíto ró yáá ró, núu súcuan te stáhú ró maá ró, te tu ndé jéjníñu jeē chiñúhún ró yā.

²⁷ Ñayuu jeē chiñúhún ndoo chíñúhún ndáa i máá Tátá yō Yaā Dios, chi jniñu yáha sáha i: Chíndéé ñáhán i sūchi ní caquendōo ndáhú jíin ñahan ní caquendōo ndáhú, núu na-ni jñūndóho íyó. Te tu sájnéhén i ánuá i jíin jniñu neé íyó ñáyíví.

Ma cúhichī ni yō coto yó ñayuu ndahú

2

¹ Ñánī mánī, cácan díje ró Jítoho yō Jesu-cristo jeē kujénu luu ya. Núu súcuan te ma sáha ró cuenta ndese cúu ñn ñn ñayuu, chi inuú sáha ró jíin ndíhi i.

² Chi íyó jínu quívi ñn tēe ini vehe nuū cándutútú ró, te yíhi xehyu oro ndaha de, te ñúhun de sahma váha. Te suni íyó jínu quívi ñn tēe ndáhú, te ñúhun de sahma tahndé.

³ Te tú váha núu sáha yíñúhún ró jíin tēe ñúhun sahma váha, te cahán rō jíin de: Cucōo ní lugar váha yáhá. Te cahán rō jíin tēe ndáhú: Yūcuán cuiñi ní, chí yáha cucōo ní nuū ñúhun, achi rō.

⁴ Chi núu cásáha ró súcuan, te tu jéni váha ni rō siquī jnáhan ró, chi sñn sáha ró jíin tēe cúca jíin tēe ndáhú.

⁵ Ñánī mánī, chusóhó ró jñūhun cáhán rī: Yaā Dios ni nacāji ya ñayuu ndahú ini ñáyívi yáha jéē cóo cúca i jíin jñūhun cácan díje i ya, te nihīn i tahū i ñuu nuū ndácu ya jniñu. Chi ni jejnūhun ya cuāha ya un núu ñayuu jeē maní jíin yá.

⁶ Te máá ró chi sa suhva cájēhe ró jñūhun canu ñayuu ndahú. ¿Te á násūu tēe cúca cúu jeē castáhú róhó síquī jeē nihín de xūhun ró, te yachī jéquin de cuēchi siquī rō nuū tohó?

⁷ Te suni cácahán neé de siquī Cristo, te suu sñhví máá yá cúu jeē cánani ró cristiano.

⁸ Váha cásáha ró te núu cásquícu ndije ró máá jñūhun jénu ga jeē cahán ley, nájnūhun yósó núu tútu ñi: Cundáhú ni rō jnáhan ró nájnūhun cundáhú ni rō maá ró, achí.

⁹ Te núu sñn sáha ró jíin ñayuu cúca jíin ñáyuu ndahú, núu súcuan te cuēchi cásáha

ró, te jécondee cuēchi siquī rō jeē stívi ró ley Yaā Dios.

¹⁰ Chi núu ñn ñayuu stívi i ñn-ni jniñu ndácu ley, te vésú na squícu i ndíhi ga, te nájnūhun ni stívi i ndíhi ley, te ndíhi un jécondee cuēchi siquī i.

¹¹ Chi Yaā jeē ni cáhán jeē ma cósíquí ndéē jnáhan ró, suni ni cahán yā jeē ma cáhni rō ndíyi. Te vésú tu ní cásíquí ndéē jnáhan ró, te núu ni jehni rō ndíyi, núu súcuan te je ni stívi ndíhi ró ley.

¹² Te tāca jéē cahán rō jíin jéē sáha ró, chi sáha ró cuenta jeē sándaā yā ndíhi un jíin máá ley Jesús jeē ni sáha libre rohó.

¹³ Chi quívi sándaā yā jniñu, te ñayuu jeē tu ní cundáhú ni jnáhan, suni ma nihín i jñūhun cundáhú ní. Te ñayuu ni cundáhú ni jnáhan, cusñi ni i jeē ní ndahva yā cuēchi i máá quívi sándaā yā jniñu.

Tu jéjníñu jeē candíje yó núu tu squícu yó

¹⁴ Ñánī mánī, núu cáhán ñn tēe jeē candíje de jeē sáha ya jehē de, te núu tu sáha de jniñu váha, ¿te ndé jéjníñu jeē candíje de ún? ¿A cuu cācu ánuá de jíin jéē cahán-ni de jeē candíje de, te núu tu sáha de jniñu váha?

¹⁵ Te núu ñn hermano yō chí hermana yō, cúmanī sahma i jíin jéē cáji i tāca quívi,

¹⁶ te núu ñn ró cáhán jíin i: Cuandeyí ni rō, te cusúcún váha ró te caji váha ró, achi rō jíin i, te núu tu ní jéhe ro jéē jíni ñúhún i cotecu i, ¿te ndé jéjníñu jeē cahán rō súcuan?

¹⁷ Te suni súcuan cúu jeē núu áchí ró jeē candíje ró jeē sáha ya jehē rō, te núu tu sáha ró jniñu váha, núu súcuan te tu ndé jéjníñu cuíti jeē cahán-ni ró jéē candíje ró.

¹⁸ Te sanaa te cahán ñn ñayuu: Róhó chi cándíje ró jéē sáha ya jehē rō, te ruhū chi sáha rī jniñu váha. ¿Na jíin stéén rō jeē candíje ró jeē sáha ya jehē rō, te núu tú na jniñu váha sáha ró? Te ruhū chi sáha rī jniñu váha te súcuan stéén rī jeē candíje rī jeē sáha ya jehē rī.

¹⁹ Ndaā chi cándíje ró jeē iyó ñn-ni Yaā Dios. Te va íyó váha núu súcuan. Te tachī chi suni súcuan cácan díje, te cáquísi i jeē cáyūhú, chí tu cásáha jniñu váha.

²⁰ ¿Te naun tu jécūhun ni rō? ¿A tu jíni rō jeē núu tu sáha ró jniñu váha, te tu ndé jéjníñu cuíti jeē cahán rō jeē candíje ró?

21 Te jí yō Abraham, ni ndahva yā cuēchi de siquī jeē ni sāha de jniñu váha. Chi ni jetáhú de jeē ni cáhān yā jeē cahni de sēhe de Isaac socō de i nuū altar.

22 Te jécūhun ni rō jeē siquī jeē ní candíje de jeē sāha ya jeē ni jéjnūhun ya nuū de, jeē yúcuan ní jetáhú de jeē ni cáhān yā jeē socó de sēhe de. Te jeē ní jetáhú de, suu ni steén jeē candíje ndije de jeē sāha ya jeē ni jéjnūhun ya nuū de.

23 Te súcuan ni cundaā jnūhun cáhān tutu īi: Abraham ni candíje de jeē ni jéjnūhun ya nuū de, te jeē yúcuan ní ndahva yā cuēchi de, áchí tutu. Te ni conaní de amigo Yaā Dios.

24 Núu súcuan te je ni cajini rō jeē ndáhva Yaā Dios cuēchi ñayuu jeē casáha i jniñu váha siquī jeē cáncandíje i jeē sāha ya jehē i, te nasūu máá jéē cahán-ni i jeē candíje i.

25 Te suni súcuan Rahab, vēsú ñahan tíjni ni ni cuu ña xīhna gā, te ni ndahva yā cuēchi ña siquī jeē ni sāha ña jniñu váha. Chi ni jēhe núu ña vehe nuū tāca mozo ni tají Josué, te ni chuhichí ña de inga ichi, návāha cācu de nuū téē cánducú cahni de. Te jeē yúcuan ní ndahva Yaā Dios cuēchi ña.

26 Te ñin ñayuu núu tuá anuá i nuū yiqui cúñu i, te ndīyí cúu i. Te suni súcuan núu cáncandíje yó jeē sāha ya jehē yō, te núu tu sāha yó jniñu váha, te nájnūhun ndīyí cúu yó.

Jnūhun siquī yaá yó

3

1 Ñánī mánī, ma cáni ni cuehē rō cuu ró maestro steén jnūhun ya. Chi cajini rō jeē yóhó jéē steén jnūhun, cuehē gā cuēchi ndenehen ya siquī yō.

2 Chi ndīhi yó stívi cuéhē jniñu. Te núu ñin tēe cuu condito de yáá de jeē ma stívi de jíin ni ñin jeē cahán de, núu súcuan te yōhyo váha tēe cúu de, te suni cuu condito de ní gá de jeē ma stívi de.

3 Chi cúu nájnūhun jeē chíhi yó freno yuhu caballo, te súcuan snáhnú yō ní tī jeē quihín tī jíin yó ndé nuū cuní yō.

4 Te suni súcuan tāca barco, vēsú náhnu ndasí, te vēsú nīhin chúndahá táchī, te jíin ñin tímón lulí-ni te cuu scuícó téē scáca, te quihín de jíin ndé nuū cuní de.

5 Te suni súcuan cúu yáá yó, chi vēsú lulí-ni, te cuehē teyí sāha yó jíin. Te suni

jíni yō jeē ñin ñuhūn lulí cuu jniñi jeē cayú ñin yucu cáhnu ndasí.

6 Te suni súcuan yáá yó, chi sāha nájnūhun ñin ñuhūn, chi scuíquín cuehē teyí jniñu néé. Te yáá yó cúu ñin parte lulí yiqui cúñu yō, te sāha jeē quívi ní yó cuēchi. Te infierno cúu jeē scuíquín jnūhun néé jíin yáá yó, te yáá yó scuíquín cuehē jniñu néé ní tiempo jeē iyó yó ñin ñayívi.

7 Te ñayuu chi cuu snáhnú i tācá quití jíin saa jíin cóo jíin quití ñuhūn nuū mar, te je ni snáhnú i cuehē tī.

8 Te ni ñin ñayuu ma cúu condito i yáá i. Chi ñin jeē neé jéē ma cúu condito i cúu. Te nájnūhun yuhu cóo jeē ñuhūn chitú veneno jeē jéni, súcuan cúu yáá yó.

9 Jíin yáá yó chíñuhún yó Tatá yō Yaā Dios, te suni jíin yáá yó cahán ndevāha yo siquī ñayuu jeē ni sāha ya ánuá i nájnūhun iyó máá yá.

10 ñin-ni yuhu cáne jnūhun chíñuhún yó yá jíin jnūhun cáhān ndevāha yó. Ñánī mánī, tu iyó váha cuítí jeē súcuan.

11 ¿A ñin-ni tesōcó cáne ndute váha jíin ndute úvuá, chí naún?

12 Ñánī mánī, ¿á cuu cuun ndehē oliva xinī yújnu higo, te á cuu cuun ndehē higo xinī yoyúcú uva, chí naún? Te suni súcuan ñin tesōcó ma cúu cane ndute úhvuá jíin ndute váha.

Jnūhun ndíchí jéē véji nuū Yaā Dios

13 Te núu ndé ñin ró ndíchí te jécūhun vāha ni, núu súcuan te jíin jéē jíca ndaā rō steén rō jeē súcuan cúu ró. Te na cóo suchí ni rō modo jeē jéhe jnūhun ndíchí yá.

14 Te núu cáncucúésún teyí ni rō te ndúcú ró jéē cujéhnu máá ró, núu súcuan te ma cutéyí ró cani ni rō jeē ndíchí ró. Chi suu cúu jeē stahú ró, te cúu ró contra siquī jnūhun ndaā.

15 Chi ñayuu cáncāa súcuan, nasūu núu Yaā Dios véji jeē ndíchí i. Chi cuenta ñayívi, jíin cuenta anuá neé ñayuu, jíin cuenta maá jéxeén cúu.

16 Chi núu iyó ñayuu cucuésún ni jíin ñayuu nducú jéē cujéhnu máá, suni yūcuan iyó jnūhun sáca núu jíin táca jniñu néé.

17 Te jnūhun ndíchí jeē véji nuū Yaā Dios, núu ni sāha jeē ní ndundíchí ñayuu, yūcuán na te iyó ndoo ánuá i. Te suni yūcu manī i jíin jnáhan i, te vītá ni i, te tú nīhni ni i. Te

cúndáhú ni i jnáhan i, te sáha i jniñu váha. Te suni iyó ndáa i, te tu stáhú i.

¹⁸ Te ñayuu cáyūcu mánī jín jnáhan, jín jnúhun manī casáha i tǎcá jniñu ndaā, te nanihīn i jeē quéndōo ndaā i.

Jeē ma cutóo ni yō jeē iyó ini ñayīví

4

¹ ¿Te ndese quéjéé jéé cájejnáhan ró jín jéé cátejnáhan ró? Quéjéé síquī jeē cándiyo néé ni rō, te yōhyo scánda ini anuá rō.

² Chi cándiyo ni rō, te tu cánevāha ró, te suu sáha jeē cájehni rō ndīyī. Cándiyo ni rō jeē névāha jnáhan ró, te tu níhīn rō, te suu sáha jeē cátejnáhan ró te cájejnáhan ró. Te tu cánihīn rō jeē cuní rō, chi tu cájicān rō nuū Yaā Dios.

³ Te núu cájicān rō, te tu cánihīn rō, chi tu cájicān vāha ró, chi mánī jeē cusī ni maá ró cúu jeē cájicān rō nuū yā.

⁴ Ñayuu castóo Yaā Dios cácuu ró. ¿A tu cájini rō jeē núu cutóo ni rō jeē iyó ini ñayīví, yūcuan cúu jeē cájito uhū rō Yaā Dios? Chi ñayuu jeē cutóo ni jeē iyó ñayīví, ndúu i ñayuu jíto uhū nuū Yaā Dios.

⁵ Te tu cáhán saá-ni jnúhun yáha jéé yosó núu tútu īi: Máá Espíritu jeē ni jéhe Yaā Dios jeē ndeé ini yō, cúcuíñī ni yā jeē súcuan casáha yó, chi manī yā jín yó, achí.

⁶ Te jeē váha ni Yaā Dios, te jéhe ya fuerza ini yō jeē ma sáha yó súcuan. Chi cáhán tutu īi: Yaā Dios jési yā nuū ñayuu casáha téyī máá, te vāha ni yā chindéé ñáhán yá ñayuu casáha suchí máá, achí.

⁷ Núu súcuan te cuandetū rō nuū Yaā Dios. Te cuiñī níhin ró jéé ma cuatáhú ró jexeén, te cunu coto róhó jínáhan ró.

⁸ Manī gā coo ró jín Yaā Dios, te víhyá gā steén yā jeē maní yā jín ró. Róhó jéé casáha cuēchi, na sándoo ró máá ró, stóo ró cuéchi. Te róhó jéé cácuni rō coo manī rō jín Yaā Dios níni jéé cácuni rō cutóo ni rō jeē iyó ini ñayīví, na sándoo ró ánuá rō jeē tuá coo ró súcuan.

⁹ Na jnáhuhū ni rō, te cucuíhyá ni rō, te na ndáhyú rō síquī jeē iyó cuéchi ró. Te vésú ni cajecū rō, te vijna na ndáhyú cohó ró. Te vésú ni cacusī ni rō, te vijna na ndúcuíhyá ni rō.

¹⁰ Na sásuchí ró maá ró nuū Yaā Dios, te sájehnu ya rohó.

Ma cóndihvī ni yō síquī cuēchi jnáhan yó

¹¹ Hermano jijnáhan ró, ma cahán neé ró síquī jnáhan ró. Chi tēe jeē cahán neé síquī jnáhan, chí jéé ndihvī ni síquī cuéchi jnáhan, nájnūhun jeē síquī ley yā cahán neé de, chí tu squícu de ley jeē cundáhú ni yō jnáhan yó, te nájnūhun cáhán de jeē tu iyó ndáa ley yā. Te núu cáhán rō jeē tu iyó ndáa ley yā, núu súcuan te nasūu jéé squícu ró, chí sa jeē cahán rō síquī.

¹² Iyó ĩn-ni Yaā jeē ni jéhe ley, te máá-ni ya cúu jeē sándaā síquī cuéchi. Te jnama ya ñayuu cácandíje te snáhnú ndetū yā ñayuu tu cácandíje. Núu súcuan ¿te na jniñu ndíso ró jéé sándaā rō síquī jnáhan ró?

Tú vāha jeē satéyī yó maá yó

¹³ Vijna te cáhán rī jín róhó jéé cácahān: Vijna chí sájnē te quihīn yō ñuu yūcuan, te coyūcu yó ĩn cuiyā, te cuaan yó xíco yó, te níhīn yō síquī, achí ró.

¹⁴ Te tu jínī cuiñī rō ndese coo sajnē. ¿Chi na vé va víhí cúu vida rō? Cúu nájnūhun ĩn vicō nūhún jéé ĩn núnúu-ni núcūhun, te yūcuán na te ndéchí-ni cuahān.

¹⁵ Chi sa vāha ga na cáhán rō: Núu cuní maá jítoho yō te cotecu yō te sáha yó jéé yáha chí jéé yūcuan, achí rō.

¹⁶ Te sa suhva mánī cácutéyī ni rō cácahān rō. Te tú vāha jeē súcuan cácutéyī ni rō.

¹⁷ Te núu ĩn ñayuu jínī i sáha i jniñu váha, te núu tu sáha i, te cuēchi cúu núu súcuan.

Jnúhun cáhán nuū tēe cúcá

5

¹ Te cáhán rī jín táca róhó téé cúcá, jéé na ndáhyú rō te ndahyū cohó ró síquī jnúndóho jeē quíji nuū rō.

² Chi ndajníñu cúcá cánevāha ró, je téhyú. Te sahma váha ró, je téé tiquíxin.

³ Te oro jín plata cánevāha ró, chí je cáne xehyu. Te xehyu un steén jeē ní casáha ró jniñu stáhú jín xúhun ró. Te yūcuan cúu jeē ndúnīhin cuéchi síquī rō, nájnūhun ĩn ñuhūn jeē snáā yiqui cúñu rō. Chí ni cacaya cuehē rō ndajníñu váha quivī cuándihī yáha.

⁴ Te táca téé ni cajehnde trigo rō, tu ní cáchunaa vāha ró yáhu de. Te vijna cácana jee de nuū Yaā Dios, Yaā cúu Jítoho nuū tǎcá

ndajéhé andiví, jeē súcuan ni casáha ró. Te jíni sōho ya jeē cácana jee tēe ni cajehnde ún.

⁵ Cátecu vāha ndasí ró ini ñayiví yáha, te casáha ró táca jéē cácusí ni maá ró. Te cájito yúcún ró maá ró, te cúu ró nájñūhun quiiti néñu jeē ndétu quiiví cúu.

⁶ Te ni catee ró cuéchi siquī ñayuu ndaā, te nde ni cajehni rō i. Te tu ní cúu casi i jeē casáha ró.

Jeē na cóo paciencia ni yō te cacān tahu yō

⁷ Hermano, núu súcuan te coo paciencia ni rō condetu ró ndé quiiví ndíji máá Jítóho yō. Tēe sájñiñu ñuhun, cánuú coo paciencia ni de condetu de nde quiiji saū néhen jíin saū néñu isa, te sáa te nihīn de nunī váha jeē jéhe itu.

⁸ Te suni súcuan coo paciencia ni rō, te ndeyí coo ni rō condetu ró, chi cuacuyajni ndee maá Jítóho yō.

⁹ Te ma cahán sōo ró siquī jeē sáha jnáhan ró, hermano, návāha ma jécondee cuéchi siquī rō. Chi máá Yaā jeē sándaā cuéchi, je vajni ndíji ya.

¹⁰ Nánī mánī, conahan ró jíjnáhan ró ndese ni casáha tēe ni canacani jñūhun máá Jítóho yō nde jenahán, chi ni cacuu de ñn ejemplo nuū yō. Chi vésú ni candoho de, te ni íyo paciencia ni de.

¹¹ Te cáhán yō jeē ñayuu cájendeyí ni jíin jnúndóho, ndetū cúu i sáha Yaā Dios. Chi ni cajini ró jnúhun ndese ni jendeyí ni Job jíin jnúndóho, te suni cájini rō jeē yóhoyo vāha ga ni quendōo de ni sáha máá Jítóho yō ná ni yāha jnúndóho. Chi yóhoyo cúndáhú ni yā yohó, te vāha ndasí ni yā jíin yó.

¹² Nánī mánī, jeē cánuú gá cúu jeē ma cahán cāha ró sihví Yaā Dios jíin jnúhun cácahān teyí ró. Ma cahán rō verdad de Dios, Yaā ndeé andiví, ni ma cahán rō verdad de Dios, Yaā chíí ñayiví, te ni ñn ga jñūhun súcuan ma cahán teyí ró. Chi núu cahán rō jeē cuu, te súcuan-ni cahán rō. Te núu cahán rō jeē tuú, te súcuan-ni cahán rō, ma scáa gā rō cahán rō, návāha ma ndénehen Yaā Dios cuéchi siquī rō.

¹³ Te núu íyó ñn ró jéē ndóho jnúndóho, te na cacān tahu rō. Te núu íyó ñn ró jéē cúsiñ ni, te na cáta ró yaa jeē chíñúhún ró yá.

¹⁴ Te núu íyó ñn ró jéē cuhú, te na cána ró tēe jéhnū cándito ñayuu cácandíje. Te na cacān tahu de jehē ñayuu cuhú. Te jíin sihví máá Jítóho yō na chíhi de aceite i.

¹⁵ Te núu cácandíje de jeē sáha Jítóho yō jeē cájicān tahu de, yūcuán na te jnama ya ñayuu cuhú. Chi nasávāha ya i, te núu ni sáha i cuéchi, te cone cáhnu ni yā nuū i.

¹⁶ Núu súcuan te nacani ndaā rō cuéchi ró núu jnáhan ró, te cacān tahu rō jehē jnáhan ró návāha nduvāha ró jíjnáhan ró. Chi núu ñn tēe ndaā ndíhví ni de jíicān tahu de, te yóhoyo vāha níhín jñiñu, chí sáha ya jeē jíicān de.

¹⁷ Chi Elías, tēe ni nacani jñūhun Yaā Dios jenahán, suni ñn tēe jeē nájñūhun íyó máá yó ni cuu de. Te ni jíicān tahu ndasí de jeē ma cúun saū, te tu ní cúun saū unī cuiyā iñū yoō.

¹⁸ Yūcuán na te ni jíicān tahu tucu de, te ni cuun saū, te ni canecoo tucu tāca jéē jéhe ñuhun.

¹⁹ Nánī mánī, núu ñn ró ni stóo ichi ndaā, te núu inga rō nachuhichí ró jnáhan ró,

²⁰ núu súcuan te cuni rō jeē núu ni nachuhichí ró tēe ni quiiví cuéchi, te je ni jnama ró de jeē jnahnú ndetū de núú, te súcuan íyó jnúhun cáhnu ni nuū cuehē cuéchi de.

CARTA HN JEE NI TEE SAN PEDRO APOSTOL NUU ÑAYUU CACANDIJE

¹ Máá rí cúu Pedro, apóstol jeē ní taji Jesucristo, te tée ri carta yáha cuájeē nuū rohó ñáyyuu ní cajitē núu, te cáyūcu jíca ró ní Ponto, Galacia, Capadocia, Asia, jíin Bitinia.

² Te máá Tátá yō Yaā Dios ni nacāji ya rohó, chi súcuan ni tee ni yā nde ná tu jecōo ñayīví. Te jíin Espíritu Santo ni sáha ya jeē iyó ndoo iyó íi rō cájetáhú ró núu yā, te ni nacate ya anuá rō jíin níñi Jesucristo. Te ñúhun ni rí jeē na cáyá gā tāca jéē váha jeē sáha ya rohó, jíin jéē coo ndeyí coo sñ ni rō jíinánhan ró.

Jeē ñúhun ni yō tāca jéē váha jeē cóo andiví

³ Na cáhán yō jeē yóhyo cújéhnū Yaā Dios, Yaā cúu Tátá maá Jítoho yō Jesucristo. Chi ni cundáhú ndasí ni yā yohó, te ni sáha ya jeē ní nacacu jeē yó, siquī jeē ní natecu Jesucristo mēhñu ndíyi. Te jeē yúcuan níni cáñuhun ni yō tāca jéē váha jeē coo.

⁴ Chi nihīn rō tahū jeē ñúhun vāha ini andiví jeē cúu ró jíinánhan ró. Te tahū un má náā cuítí, ni ma tíví cuítí, ni ma ndíhi cuítí.

⁵ Chi cácandíje ró jéē sáha Yaā Dios jehē rō, te jeē yúcuan ndíto ya rohó jíin poder yā, návāha jnama ya rohó quíví sándihí, chi ni sándaā yā jeē súcuan coo.

⁶ Jeē yúcuan cácusñ ndasí ni rō, vēsú cájito ró cuéhē ndinuū jñundóho jecu-ni quíví.

⁷ Chi nájnūhun jeē stuhvá ñayuu oro jíin ñúhūn, jíto ndee í núu jeē váha cúu, suni súcuan cánuú coto ndee jñundóho rōhó núu cácandíje níhin ró chí tuú. Chi jeē cácandíje níhin ró, chí yahu ndasí gá cúu vēsú oro, ndajníñu jeē náā. Te yúcuan cúu jeē cua-jnúhún yá rohó, te sájéhnū ya rohó, te squéndōo yíñúhún yá rohó quíví quenda ndijin Jesucristo.

⁸ Te vēsú tu ní cájito ró núu yā, te cáhīyo manī ndasí ró jíin yá. Te cácandíje níhin ró yá vēsú tu cájito ró núu yā vijna. Te yóhyo luu cácusñ ndasí ni rō, chi nde tuá níhín cuítí yō jñuhun castūhun yó ndese cúsn ni yō.

⁹ Te nihīn tahú rō jeē cācu ánuá rō, chí jeē yúcuan cúu jeē cácandíje ró.

¹⁰ Te tée ni canacani jñuhun Yaā Dios nde jenahán, ni cananducú yúcún de ni caca-jñuhun váha de siquī jñuhun ndese jnama ya yohó. Te ni cacachi de ndese sáha Yaā Dios jeē váha rōhó jíinánhan ró.

¹¹ Chi nde ná tu coo, te ni steén Espíritu Cristo nuū de jíinánhan de ndese quiji jñundóho siquī Cristo jíin ndese luu ndujéhnū tucu ya jeē yáha jñundóho ún. Te ni cananducú yúcún de jeē na jécūhun ni de ndé quíví quiji Cristo te ndese coo tāca jéē ni cáhán maá Espíritu jeē ndeé ini de.

¹² Te ni steén Yaā Dios nuū de jeē násūu máá de coto jniñu jeē ní canacani de ún, chí sa máá yó cúu jeē cóto. Te vijna je ni cajini sōho máá ró jñuhun ún, chí tāca tée nácani jñuhun jnama ya yohó, ni canacani de nuū rō, ni sáha poder Espíritu Santo jeē ní quiji ichi andiví. Te jñuhun ún chí nde maá ndajéhé Yaā Dios cánanducú návāha na jécūhun ni.

Cúni yā jeē coo ndoo ánuá yō

¹³ Jeē yúcuan ndito na cóo xinī rō jíinánhan ró, te cájí coo ni rō. Te cocuhun ndasí ni rō jeē nihín rō tāca jéē váha jeē sáha Yaā Dios rohó quíví quenda ndijin Jesucristo.

¹⁴ Te na cúu ró séhe jeē cájetáhú váha. Te ma sáha ga rō tācá jniñu jeē ní cacusñ ni rō sáha ró nde ná tu jecūhun ni rō jñuhun Yaā Dios.

¹⁵ Chi sa suhva na cóo ndoo ánuá rō jíin táca jniñu cásáha ró, chí Yaā ní cana rōhó, Yaā iyó ndoo cúu ya.

¹⁶ Chi súcuan cáhán tutu íi: Na cóo ndoo ró jíinánhan ró, chí ruhū iyó ndoo ri, achí yá.

¹⁷ Te núu cácahán rō Tátá rō jíin Yaā Dios, núu súcuan te na cáca yíñúhún ró nuū yā tāca quíví jéē cájica ró ñayīví yáha. Chi máá yá sándaā siquī ndese ni casáha ññ yó, te tu sáha ya cuenta ndese cúu ññ yó, chí inuú sáha ya jíin ndihí yó.

¹⁸ Chi ni jnama ya rohó núu tācá costum-bre jeē ní cajequin jíi rō, jeē ní cajejniñu cāha ró núu. Te cájini vāha ró jéē yahu cúu jeē ní jnama ya rohó. Chí tu ní chúnaa yā jíin ndajníñu jeē náā, nájnūhun oro jíin plata,

19 chi sa suhva jíin níñi Cristo jeē yáhu ndasí gá cúu. Chi ni socō yā maá yá nájnūhun ñin londe, quití íyó váha íyó ndoo.

20 Chi jeē yúcuan ní jeni Yaā Dios maá Cristo nde ná tu jecōo ñayiví, te ni cane ndijin Cristo maá tiempo cuándihí yáha, návāha quendōo vāha ánuá rō jijnáhan rō.

21 Te jeē jíin Cristo te cácadíje rō Yaā Dios. Chi ni sáha Yaā Dios jeē ní natecu yā mēhñu ndíyí jíin jéē ní ndujéhu ya. Te jeē yúcuan cácadíje rō Yaā Dios, te cáñuhun ni rō coto rō yá.

22 Te vijna chi je ni candundoo ánuá rō, chi ni cajetáhú rō jnūhun ndaā ni sáha Espíritu jíin rō, návāha cundáhú ndije ni rō hermano cácadíje. Núu súcuan te na cúndáhú ndasí ni rō jnáhan rō nde jíin ini jíin ánuá rō.

23 Chi je ni canacacu jeé rō, te nasūu chíji yucūn ñayuu jeē cúu. Chi sa jnūhun Yaā Dios jeē ndító técu ní cáni ni sáha jeē ní nacacu rō.

24 Chi súcuan cáhán tutu i:
Nájnūhun yucū cúu ndihí tāca ñáyuu, chi jecu-ni quiví técu i.

Te nájnūhun ita yucū cúu jeē kujéhu i.
Chi íchí-ni yucū, te ndáhvá-ni ita.

25 Te jnūhun Jitoho yō Yaā Dios, sa quéndōo ní cáni.

Achí tutu. Te jnūhun un cúu máá jnūhun jnáma ya yohó jéē ní canacani ri nuū rō.

2

1 Núu súcuan te na siáá rō tācá jniñu néé, tāca jéē stahú, jéē tú ndije, jeē cucuésún ni, jíin jéē sajnúhún síquí jnáhan.

2 Te nájnūhun sūchí yíquín sá ní cacu jeē jéxin te jéhu, súcuan na cóndihví ni rō scuáha rō jnūhun ndaā yā, návāha cuehnu rō jíin te cācu ánuá rō.

3 Chi je cájini rō jeē yóhyo vāha ni maá Jitoho yō.

Cristo cúu nájnūhun yuū yítuu vehe

4 Núu súcuan te maní gā coo rō jijnáhan rō jíin Jitoho yō Cristo. Chi cácuu rō nájnūhun templo nuū ndeé Yaā Dios, chi ndeé yá ini anuá rō. Te Cristo cúu nájnūhun ñin yuū cánuú gá jeē yítuu yíquí templo, te sáha ya jeē cótecu rō ní cáni. Te ñayuu vésú ni casquéhichí i ya, te Yaā Dios chi

je ni nacāji ya Cristo chi cánuú ndasí yá, nájnūhun nacāji yó ñin yuū váha jeē quituu yíquí vehe.

5 Te máá rō chi cácuu rō nájnūhun ñin ñin yuū jeē cúvāha templo Yaā Dios, te cotecu rō ní cáni. Te na cuáha rō jnūhun jeē sama ya rohó jijnáhan rō jéē cúvāha templo yā, cúu jeē ndeé Espíritu yā ini anuá rō nájnūhun ini ñin templo. Te suni cúni Yaā Dios jeē cuu rō sūtū cáhīyo ndoo cájejniñu nuū yā. Chi síquí jeē ni sáha Jesucristo jehē rō, te na sócō rō maá rō jeē cuajniñu rō núu yā sáha rō táca jniñu váha jeē nújnahan ni Yaā Dios.

6 Chi súcuan cáhán tutu i:
Vijna te nde ñuu rī Sion jéquin rī ñin yuū jeē cánuú gá jeē quituu yíquí vehe,
chi ni nacāji ri yā nájnūhun ñin yuū váha jeē cánuú téyí.

Te ñayuu jeē candíje i ya, jnama nahín yá i.
Achí Yaā Dios, áchí tutu.

7 Te máá rō jeē cácadíje rō, chi yuū váha jeē cánuú téyí cúu ya nuū rō. Te nuū ñáyuu tu cácadíje chi tuú, chi sa cúndaā jeē cahán tutu i:

Máá yúu jeē ní casquéhichí tēe cásama vehe,
suu cúu yuū cánuú gá yítuu yíquí vehe.

8 Te suni cúndaā jnūhun jeē cahán tutu síquí ñayuu tu cácadíje:

Cúu ya nájnūhun ñin yuū jeē cácachihí i jehē i,
nájnūhun toto jeē cotúu i sáha.

Achí. Chi jeē cácachihí i jehē i cúu jeē casániñni ni i nuū jnūhun ya. Te je ni cundāā jeē jnahnú ndetū i síquí jeē cáacunñni ni i.

Jnūhun ñayuu maá Yaā Dios

9 Te máá rō cácuu ñayuu jeē ní nacāji Yaā Dios. Te suni cácuu rō sūtū cájejniñu nuū maá Yaā cúu Rey, te ñayuu cáhīyo ndoo, jíin ñáyuu maá yá cácuu rō. Súcuan ni sáha Yaā Dios rohó návāha nacani rō jnūhun ndese yóhyo jéhu jniñu sáha ya, chi máá yá ni cana rohó ná ni coyūcu rō nájnūhun nuū néé. Te ni squívicoo ya rohó núu luz yā jeē yóhyo vāha stéén yā ini anuá rō.

10 Chi nde saá te nasūu ñáyuu Yaā Dios cácuu rō, te vijna je ni nduu rō ñáyuu maá yá. Te nde saá chi ná tu cundáhú ni yā rohó, te vijna je cúndáhú ni yā rohó jijnáhan rō.

Jeē cuajniñu vāha yó núu Yaā Dios

11 Nánī mánī, ini ñayivī yáha cácuu ró nájnūhun ñayuu ñuu jicá jéē cájica cuu tátú. Núu súcuan te cáhán ndahú rí jíin ró jéē ma sáha ró táca jniñu jeē ndiyo néé ni rō jíin modo maá ró. Chi tācá un cájejnáhan jíin ró, ndúcú jéē jnahnū ndetū anuá rō.

12 Te ndaā na cáca ró méhñu ñáyuu tu jíin jnūhun Yaā Dios. Chi vēsú cácahān i síquī rō, nájnūhun cácahān i síquī ñáyuu casáha jniñu néé, te núu na cóto i jniñu vāha casáha ró, te quivī sándaā Yaā Dios jniñu te cahān i jeē yóhoyo cújéhnū ya.

13 Jeē síquí maá Jítoho yō te cuatáhú ró nuū tāca tóhō cándiso jniñu nuū ñáyuu. Cuatáhú ró nuū maá rey, chi tēe cújéhnū ga cúu de.

14 Te cuatáhú ró nuū tācá gobernador jeē ní jeni rey návāha stóho de ñayuu casáha jniñu néé te cuajnúhún de ñayuu casáha jniñu vāha.

15 Chi cúní Yaā Dios jeē sáha ró jniñu vāha, te jeē súcuan sáha ró te tāca ñáyuu canéé jéé tu cájecūhun ni, casi i yuhu i.

16 Te na cáca ndaā rō jeē cácuu ró ñáyuu ni nduu libre anuá, te nasūu jéé ní nduu libre rō jeē sáha ró jniñu néé. Chi sa cácuu ró mozo Yaā Dios, te cuajniñu vāha ró núu yā.

17 Coó respeto rō nuū tāca ñáyuu. Cundáhú ni rō hermano cácañéje. Conso iyo ró núu Yaā Dios. Coó yíñúhún ró nuū maá rey.

Jeē na ndóho yó jéhē jnáhan yó nájnūhun ni ndoho Cristo

18 Róhó jéé cácuu mozo, cuatáhú ró nuū patrón rō, te coo respeto rō nuū de. Te nasūu máa-ni nuū téé vāha ni jíin téé vītá ni, chi suni nuū téé xeēn ni.

19 Chi ñn jeē vāha cúu núu jéndeýí ni ñn tēe jeē stóho cāha ñáyuu de síquī jeē squícu de nuū Yaā Dios.

20 Chi núu cástóho i róhó jéé casáha ró cuéchi, te ni ñn ma cuajnúhún róhó núu jéndeýí ni rō jíin jeē ndóho ró. Te núu cástóho i róhó jéé casáha ró jniñu vāha, te núu jéndeýí ni rō jíin, yāha cúu jeē vāha jeē núnahan ni Yaā Dios.

21 Chi jeē yúcuan cúu jeē ní cana ya rohó jínáhan ró. Chi suni máa Cristo ni ndoho ya

jeē síquí rō, te súcuan ni cuu ya ñn ejemplo nuū rō jeē na ndóho ró jéhē jnáhan ró, te súcuan condiquīn rō ichi ya.

22 Te máa yá tú cuítí na cuēchi ní sáha ya, ni tú cuítí na jnūhun stáhú ní cáhán yā.

23 Ná ni cacahān neé i nuū yā, te tu ní nácahān neé yá. Te ná ni castóho i ya, te tu ní téjnáhan ya jíin i, chi sa ni chihi ya maá yá ndaha Yaā Dios, Yaā sándaā vāha síquī ndíhi ún.

24 Te ni condiso máa Cristo cuēchi yó jíin yíquí cúñu yā ná ni jihī yā jicā cruz, návāha quenda yó chíji cuēchi te caca ndaā yō. Chi ni tujī yā, te jeē yúcuan ní canduvāha ánuá rō.

25 Chi ni casana ró nájnūhun lanchi, te vijna je ni candicó ró ni ndívicoo ró núu Cristo, Yaā cúu pastor rō te ndíto vāha ya anuá rō.

Ndese cánuú coyūcu vāha yíi jíin ñasihí

3

1 Suni súcuan róhó ñasihí jíjnáhan ró, cuatáhú ró nuū yíi ró, návāha núu cúu de tēe tu cándíje jnūhun ya, te cuu scándíje ró de, jeē tuá níin jíin jéé cahán rō, chi máa jíin jéé casáha vāha ró.

2 Chi cuni de jeē cájica ndaā rō te cáhīyo respeto rō.

3 Te jeē casáha luu ró máa ró, chi nasūu máni máa ichi síquí rō sáha ró, jeē sáha luu ndasí ró xinī rō, chí jéé cūhun ró síquí oro chí sahma vāha ga.

4 Chi sa nducú ró jeē quéndōo luu ánuá rō, te coo luu ró ñn modo jeē ma náa cuítí, suu jeē cóo vītá ni rō te coo nahín ni rō. Chi yāha cúu jeē yahu ndasí gá nuū Yaā Dios.

5 Chi ñahan ní cahīyo ndoo ánuá nde jehán, suni súcuan ni casáha luu ña ánuá ña. Chi ni cañuhun ni ña Yaā Dios, te ni cajetáhú ña nuū yíi ña.

6 Te súcuan ni sáha Sara, chi ni jetáhú ña nuū yíi ña Abraham, te ni cahān yíñúhún ña jíin de. Te róhó jíjnáhan ró, núu sáha vāha ró te núu ma yūhu ró ni ñn, yūcuán na te coo ró nájnūhun ni iyo Sara.

7 Te suni súcuan róhó yíi, na cóo vītá ni rō jíin ñasihí ró. Te yíñúhún coo ró jíin ña, síquí jeē núu ga fuerza ña vēsú rohó, te suni síquí jeē ñnuú ní canihīn tahú rō cotecu rō ní cáni

siqui jeē váha ni Yaā Dios. Te súcuan sáha ró návāha tú casi nuū jnúhun jícán tahu ró.

Jnúhun ñayuu cándoho siquī jeē cájica ndaā

⁸ Núu súcuan te inuú na cáni ni rō jijnáhan ró, te cucuíhyá ni rō jeē ndóho jnáhan ró, te cundáhú ni rō i nájnūhun ñani rō. Te na cóo manī rō te canī suchí ni rō.

⁹ Núu cásáha neé ñayuu jíin ró, te ma nasáha neé ró jíin i. Te núu cácahān neé i nuū rō, te ma nácáhān neé ró núu i. Chi sa suhva cacān tahu ró jeē na quéndōo vāha i. Chi Yaā Dios ni cana ya rohó jéē suni súcuan quendōo vāha ró.

¹⁰ Chi súcuan cáhán tutu i:

Ñayuu cácu ni cotecu vāha te cusī ni tāca quíivī,

na cóto i yuhu i jeē ma cáhán neé i, te na cóto i jeē ma cáhán i jnúhun stáhú.

¹¹ Na cújiyo i nuū jniñu neé, te na sáha i jniñu váha.

Na ndúcú i coyūcu mánī i, te na cóndihvī ni i jíin.

¹² Chi máá Jítóho yō ndító ya ñayuu ndaā, te jíni nahín yá jeē cájicān tahu i.

Te ñayuu casáha jniñu neé, chi tu jétáhú yá i.

Achí tutu.

¹³ Te ni ñn ma sáha neé jíin ró te núu máni jniñu váha cándihvī ni rō sáha ró.

¹⁴ Te vésú núu ndóho ró síquī jeē cájica ndaā rō, te yōhyo ndetū cácu ró. Núu súcuan te ma yūhu ró coto ró i, ni ma cunéé ni rō.

¹⁵ Chi sa jíin ini jíin ánuá rō chiñúhún ró máá Jítóho yō Cristo. Te níni coo túhva ró nastió cuíñi vīta ró te cahān yíñúhún ró jíin ñayuu jeē castíchí rohó síquī tāca jéē cáñuhun ni rō.

¹⁶ Te caca ndaā rō jeē tú na cuēchi condee anuá rō, návāha ñayuu cácahān neé síquī rō, cucanu i jeē ni stáu yáhu i rohó jéē cájica ndaā rō chi cácañdije ró Cristo.

¹⁷ Chi núu cúní Yaā Dios te vāha ga jeē ndóho ró síquī jeē casáha ró jniñu váha vésú síquī núu sáha ró jniñu neé.

¹⁸ Chi máá Cristo suni ni ndoho ya, te ñn jínu-ni ni jihī yā jeē síquī cuēchi ndihī yó. Yaā vāha cúu ya, te ni ndoho ya jehē yohó ñayuu ní casáha jniñu neé, návāha quíivicoo yó núu Yaā Dios sáha ya. Chi ni jihī yiqui cúñu yā, te ánuá yā chi técu-ni ní cáni.

¹⁹ Te ná ni jihī yā te ni jehēn anuá yā ni nacani ya jnúhun nuū anuá ñayuu cáyindihyū.

²⁰ Chi nde jenahán tu ní cájetáhú i, ná ni iyo paciencia ni Yaā Dios te ni condetu ya níni sáha Noé barco jeē naní arca. Te jíin arca un ní cācu jecu-ni ñayuu, chi unā-ni i ni cācu nuū ndúte.

²¹ Te nájnūhun ni cacācu i nuū ndúte, súcuan cúu jeē jéndute yó vijna te cácu ánuá yō. Te jeē jéndute yó, nasūu jéē ndúndoo yiqui cúñu yō, chi sa jeē jicán yō nuū Yaā Dios jeē ndúndoo ánuá yō. Te súcuan te cācu yó, chi ni cundúú yó jíin Jesucristo nuū jnúhun ni natecu yā.

²² Te ni ndaa ya cuanuhun yā andiví, te ndéé yá ichi ndáváha Yaā Dios nuū cujénu ya. Te tācá ndajéhé andiví, jíin jéē cándacu jniñu, jíin jéē cájni poder, cájendetū nuū yā.

Jeē na cuájniñu yó jíin táhū jeē ni jéhe ya nuū yō

4

¹ Núu súcuan te nájnūhun ni ndoho Cristo jehē yō jíin yiqui cúñu yā, suni súcuan na táva ni maá ró ndoho ró. Chi ñayuu jeē ní ndoho jíin yiqui cúñu, tuá sáha i cuēchi.

² Núu súcuan te ní tiempo jeē cuahán gā rō, na sáha ró jniñu jeē cuní Yaā Dios, te ma sáha ga rō jniñu jeē ndíyo neé ni rō jíin modo maá ró.

³ Chi nde ní véji ró, te ni casáha ró cuéhē cuēchi jeē cánujnahan ni rō síquī jeē tu ní cájini rō jnúhun Yaā Dios. Te tiempo un máni máá jéē neé ni casáha ró, te ni candiyo ni rō tāca jéē neé, ni canajini ró, ni casáha ró vico neé, ni cajihí ndasí ró nuū vico ró, te ni cachiñúhún ró ídolo jeē ni cáhān Yaā Dios jeē ma chíñúhún yó.

⁴ Te cácu neé ni i jeē tuá cájica ró jíin i jeē sáha ró táca cuēchi xeēn jíin i. Te jeē yúcuan cúu jeē cácahān neé i síquī rō.

⁵ Te máá i chi ñn quíivī te nacūaha i cuenta nuū maá Yaā jeē iyó túhva ya sándaā yā jniñu ñayuu técu jíin ñayuu ní cajihī.

⁶ Chi jeē yúcuan suni ni quiji jnúhun vāha ya nuū tāca ndíyí ná ni cotecu i. Te ni cundaā síquī cuēchi ni casáha i ñayiví yáha, nájnūhun cundaā síquī ndihī ñayuu, návāha nacani ni i te cotecu anuá i ní cáni nájnūhun técu Yaā Dios.

7 Te je cuacuyajni quiv̄i jeē nāā tāca jēē iyó. Núu súcuan te ndito na cóo xinī rō jijnáhan rō, te condihv̄i ni rō cacān tahu rō.

8 Te jeē cánuú gá cúu jeē cundáhú ndasí ni rō jnáhan rō. Chi núu cundáhú ni yō jnáhan yó, te íyó jnúhun cáhnu ni nuū cuehē cuēchi.

9 Sáha vāha rō jíin ñáyuu jeē jinú i vehe rō, te ma cúxli ni rō.

10 Tāca rō cuajniñu rō núu jnáhan rō, núu ndese íyó máá táhū rō jeē ni jēhe Yaā Dios jeē cuajniñu rō núu yā. Te squícu vāha rō jíin táhū jeē sín sín ni jēhe ya nuū ñn ñn rō.

11 Núu tahu jeē nácani rō jnúhun cúu, te na cáhán rō nájnūhun jeē maá Yaā Dios cahán. Te núu tahu jeē chindéé ñáhán rō jnáhan rō cúu, te na sáha rō jíin fuerza jeē ni jēhe ya nuū rō, návāha jíin ndihi jeē casáha rō te cahán ñayuu jeē yóhoyo cújéhnu Yaā Dios siqūi jeē ni sáha ya jíin Jesucristo. Te na cáhán yō jeē luu cújéhnu Cristo te jn̄i ya poder ñí cáni. Amén.

Jeē ndóho yó síqūi jeē candíje yó Cristo

12 Ñánī mánī, núu vēji jnūndóho xeēn jeē coto ndee rohó, te ma cunéé ni rō caní ni rō jeē maá rō ni nihin jnūndóho xeēn gā.

13 Chi sa cus̄i ni rō jeē cándoho rō jecu jnūndóho jeē ní ndoho Cristo, návāha suni cus̄i ndasí ni rō quiv̄i quéndā ndijin yā jeē kujéhnu luu ya.

14 Te yóhoyo ndetū rō te núu cácahān neé i nuū rō siqūi jeē cácahān neé i Cristo. Chi máá Espíritu Yaā Dios jeē kujéhnu ndasí, ndéé yá ini rō. Máá i chi cácahān neé i siqūi yā, te máá rō chi cáchiñúhún rō yā.

15 Te núu ndoho rō, te na ndóho rō síqūi jeē cácahān neé i Cristo. Te ma ndóho rō síqūi táca cuéchi nájnūhun cándoho ñayuu jéhni nd̄iyi, ñayuu sacuíhná, ñayuu sáha jniñu neé, jíin ñáyuu quiv̄i nduu nuū jniñu jnáhan jeē tu cánuú quiv̄i nduu.

16 Te sa núu ñn rō ndóho siqūi jeē candíje rō Cristo, te ma cúcanu rō, chi sa nacuatáhú rō nuū Yaā Dios siqūi jeē cúu rō cristiano.

17 Chi je ni jinū quiv̄i jeē quejéé sándaā Yaā Dios cuēchi, te xihna gā ñayuu cácuu sēhe ya sándaā yā cuēchi. Te núu xihna gā cuēchi máá yó quejéé yá sándaā yā, núu súcuan te xeēn gā coo jeē ndénehen ya cuēchi siqūi ñáyuu jeē tu ní jétáhú jnúhun vāha ya.

18 Te núu yóhoyo yí cácu ñayuu vāha, núu súcuan çte ndese cácu ñayuu casáha jniñu neé jíin táca cuéchi?

19 Núu súcuan te róhó jēē cándoho siqūi jeē súcuan cúni Yaā Dios, ma jécuiñi rō sáha rō jniñu vāha, te na chíhi rō máá rō ndaha máá Yaā jeē ni sáha róhó, chi squícu ya jeē ni jéjnūhun ya.

Jeē jēhe de consejo ñayuu cácahān

5

1 Vijna te na cáhán rī jíin táca róhó téé jéhnu cándito ñayuu cácahān, chi suni téé jéhnu ndito ñayuu cácahān cúu máá rí. Te cúu ri testigo jeē ní jito ri ndese ni ndoho Cristo. Te suni ndujéhnu ri jíin rō sáha Cristo quiv̄i quéndā ndijin yā.

2 Na cóto yúcun rō ñayuu jeē ndeé jniñu rō condito rō, jeē cácuu i nájnūhun lanchi Yaā Dios. Te na cus̄i ni rō condito rō i, chi súcuan cúni Yaā Dios. Te nasūu síqūi jeē sáfuerza yā rohó, ni nasūu síqūi jeē nihin rō xūhún, chi sa siqūi jeē cuní rō cuajniñu rō.

3 Te nasūu jēē ndacu nihin rō jniñu nuū ñáyuu cándito rō, chi sa nducú rō cuu rō ñn ejemplo nuū i jeē cácuu i lanchi ya.

4 Yūcuán na te quiv̄i quéndā ndijin maá Yaā cúu Pastor kujéhnu nuū rohó téé cácuu pastor lanchi ya, te cuāha ya premio nuū rō jijnáhan rō jēē yóhoyo luu te ma nāā cuīti.

5 Te suni róhó táca téé suchí, na cuándetū rō nuū táca téé jéhnu jíinā. Te ndihi róhó ñáyuu cácahān, cuándetū rō nuū jnáhan rō, te cani suchí ni rō. Chi suhva cáhán tutu: Yaā Dios jés̄i yā nuū ñáyuu casáha téyí máá, te vāha ni yā chindéé ñáhán yá ñayuu casáha suchí máá.

Achí.

6 Núu súcuan te na cáni suchí ni rō, chi cáyih̄i rō ndaha Yaā Dios jeē jn̄i poder. Te sájéhnu ya rohó, na jínú maá quiv̄i.

7 Tāca jēē cácahān ndasí ni rō siqūi, chihi rō ndaha máá yá te máá yá coto, chi ndito ya rohó.

8 Te cáji na cóo xinī rō te ndito coo ni rō. Chi jexeén jeē jíto uhū rohó, jíca cuu ndúcú squiv̄i róhó jíjnáhan rō núu cuéchi. Te xeēn gā sáha vésú ndicaha jeē iyo ndáhyú.

9 Te cuiñi nihin rō jēē ma cúndeyí jexeén jíin rō, te nihin candíje rō jnúhun cundáhú ni yā rohó. Chi cájini rō jeē suni súcuan

cándoho hermano rō jeē cáyūcu ní cáhnu ñayīví.

¹⁰ Te núu ni jīnu jeē ndoho ró jecu-ni tiempo, te Yaā Dios chi sáha ya jeē ije vāha ni rō jīn jnúhun ya, jīn jéē cuíñi nīhin ró, te cuāha ya fuerza ini rō, te quendōo cutú ró ní cáni. Chi máá yá cúu jeē sáha tāca jéē vāha yóhó, te ni cana ya yohó jéē cujéhnu luu yó jīn yá ní cáni, siquī jeē nduú yó jīn Jesucristo.

¹¹ Te na cáhán yō jeē yóhyo luu cújéhnu ya te jñi ya poder ní cáni. Amén.

Saludo jeē sándhí

¹² Jíní rī jeē Silvano cúu ñn hermano jeē squícu vāha. Te máá de cuajeē nuū rō jīn carta yáha jéē ní tee rī jecu jnúhun. Te jīn yáha stíhví ni rī rohó, te cáhán rī jīn ró jeē ndaá cúu jeē tāca jéē vāha ni sáha Yaā Dios rohó, suu stéén nuū rō jeē cundáhú ndije ni yā rohó. Te na cuíñi nīhin ró jīn jnúhun yáha.

¹³ Ñayuu cá candíje jeē cáyūcú ñuu Babilonia, jeē ní nacāji ya i nájnūhun ni nacāji ya rohó, cácahān i jeē sándeyí ni rō. Te Marcos, tēe cúu nájnūhun sēhe rī, suni súcuan cáhán de.

¹⁴ Te núu na cáhán rō jīn jnáhan ró, te techūhu mánī rō ndaha i.

Te na cóo ndeyí coo sī ni ndihí ró jéē cáyihí ró ndaha Jesucristo. Súcuan na cóo. Amén.

CARTA UU JEE NI TEE SAN PEDRO APOSTOL NUU ÑAYUU CACANDIJE

¹ Máá rí cúu Simón Pedro, te cúu ri mozo Jesucristo, te cúu ri apóstol jeē ní taji yá. Te tée ri carta yáha cuájeē nuū rō jijnáhan rō, jeē ni sáha Yaā Dios jeē inuú-ni jín rí jijnáhan ri ni canihín rō jnūhun luu váha jeē cacandije yó yá. Chi Yaā ndaā cúu Yaā Dios, suu máá Jesucristo jeē jnáma yóhó.

² Te ñūhun ni rī jeē na sáha ga yā jeē váha ndasí róhó jín jé yóhyo coo ndeyí coo siñ ni rō siquī jeē cájecūhun váha ni rō ndese Yaā cúu Yaā Dios jín Jítóho yō Jesús.

Siquī ndese cánuú coo ñayuu cacandije

³ Te Yaā Dios, jín poder yā ni jēhe ya nuū yō tāca jéē sáha jeē cúu caca ndaā yō nuū yā jín jéē chiñúhún váha yó yá. Chi ni steén yā maá yá nuū yō, chi cúu ya Yaā jeē ní cana yóhó, siquī jeē yóhyo cújéhnu ya jín tāca jniñu jéhnu sáha ya.

⁴ Jeē yúcuan ní jejnūhun ya tāca jéē yóhyo jéhnu yóhyo váha sáha ya yohó, návāha jín tāca ún te nduu ró nájñūhun iyó máá yá, te cācu ró núu jniñu jeē cándiyo néé ni ñayuu casáha i ini ñayivi yáha.

⁵ Núu súcuan te na ndúcú ndeyí ró jín jnūhun yáha. Te jeē cacandije ró, te siquī ún na chísóo ró jeē caca ndaā rō. Te jeē cájica ndaā rō, te siquī ún chísóo ró jeē cóndihví ni rō jecūhun váha ni rō.

⁶ Te siquī ún chísóo ró jeē casi rō modo jeē cuní maá ró. Te siquī ún chísóo ró jnūhun cuandeyí ni rō, te siquī ún chísóo ró jeē chiñúhún váha ró Yaā Dios.

⁷ Te siquī ún chísóo ró jeē cóo manī rō jín jnáhan ró, te siquī ún chísóo ró jeē cundáhú ni rō jnáhan ró.

⁸ Chi núu cayā tācá jniñu yáha jín ró, te suu sáha jeē ma cótecu saá-ni ró, chi sa quee váha jniñu sáha ró, siquī jeē cájecūhun ni rō ndese Yaā cúu Jítóho yō Jesucristo.

⁹ Te ñayuu jeē tu casáha jniñu yáha, nájñūhun jeē cáhīyo cuáá i, chi tu jécūhun ni i jnūhun ya, te je ni naa ni i jeē ni sándoo ya i tāca cuéchi ni casáha i ichi yátá.

¹⁰ Jeē yúcuan na ndúcú ndeyí ró hermano, návāha coo seguro jeē ní cana ya rohó jín jéē ní nacāji ya rohó. Chi núu sáha ró táca jniñu yáha, te ma cáca yátá cuiti rō.

¹¹ Yūcuán na te nune váha ichi quiví ró ini ñuu maá Jítóho yō Jesucristo, Yaā jnáma yóhó, nuū ndácu ya jniñu ní cáni.

¹² Jeē yúcuan ma jécuiñí rī sáha ri jeē núcūhun ni rō tāca jnūhun yáha, vésú je cájini rō te cáhīn nīhin ró jín jnūhun ndaā jeē cacandije ró.

¹³ Chi jéni ni rī jeē iyó váha stíhví ni rī rohó vijna técu gā rī, návāha nucūhun ni rō.

¹⁴ Chi máá Jítóho yō Jesucristo ni castūhun yá nuū rī jeē tuá cotecu nahán rí ñayivi yáha.

¹⁵ Jeē yúcuan na ndúcú ndeyí gá rī stíhví ni rī rohó, návāha núu je ni jihí rī, te níni nucūhun ni rō tāca jnūhun yáha.

Jeē ní cajito de jeē kujéhnu Cristo

¹⁶ Ná ni castéén rī jnūhun máá Jítóho yō Jesucristo nuū rō, ndese ndiji ya jín poder yā, te tu ní cácahān rī ñn cuento-ni jeē ní catava ndichí ñayuu. Chi ná ni cahīyo ri jín yá xiní yúcu, te ni cajito jín núu rī jeē tucu ni nduu ya jeē ní nduluu jéhnu ya.

¹⁷ Chi ni cajini rī jeē Tatá yō Yaā Dios ni cahān yñúhún yá jín Jesús, te ni sajeñu ya Jesús. Chi ichi ándiví ní quiji jnūhun luu, ni cahān Yaā Dios: Yáha cúu Sēhe ri jeē maní ndasí rí jín, te cúsiñ ni rī jín, áchí yá.

¹⁸ Te ni cajini sōho ri jnūhun un jéē ni cáhān ichi ándiví, chi ni cahīn ri jín máá Jítóho yō xiní yúcu iñ ún.

¹⁹ Te súcuan cájini yō jeē iyó ndaā ndije tāca jnūhun ni catee tēe ni canacani jnūhun ya nde jenahán. Te váha jeē na chúhun ni rō jnūhun un jijnáhan ró, chi suu cúu nájñūhun ñn luz jeē cayú nuū néē, nde na cündijin quiví ndiji ya, te steén yā ini anuá rō nájñūhun jeē ndíndéé lucero.

²⁰ Te xīhna gā na jécūhun ni rō jeē ni ñn jnūhun cáhān tutu iñ, nasūu jéē súcuan-ni ni cajeni ni tēe cúu.

²¹ Chi tāca tée ndoo jeē ní canacani jnūhun ya nde jenahán, tu ní cácahān cuiti de jnūhun jeē cúu ni maá de. Chi sa suhva ni canacani de jnūhun Yaā Dios jeē ni stéén Espíritu Santo nuū de.

*Siquī tēe cástéén jnūhun stáhú
(Judas 4-13)*

2

¹ Te mēhñu ñáyuu Israel ún suni ni cahīyo tēe ni canacani jnūhun stáhú. Te suni súcuan coo tēe stéén jnūhun stáhú méhñu ró. Te squívi de jnūhun stáhú jéē tívi ñáyuu sáha. Te ni ma cuajnúhún de Jitoho yō jeē jnáma ya de, te súcuan sáha de jeē jnahnú ndetū yachī de.

² Te cuehē ñayuu condiquīn i modo neé jéē castéén de. Te sáha de jeē cahán neé ñáyuu siquī jnúhun vāha ya jeē cúu ichi ndaā.

³ Te siquī jeē cándiyo ni de xūhún, te quende de xūhun ró siquī jnúhun stáhú stéén de nuū rō. Te tu quíxín jnūndóho jnahnū ndetū de, chi nde jenahán je ndétu jnūhun ndonda ya siquī cuéchi de.

⁴ Chi tu ní íne cáhnu ni Yaā Dios nuū tācá ndajéhé yā jeē ní casáha cuéchi, chi sa ni jnaa yā infierno cáyindihiyū nuū néé, cánuhñi jíin cadena. Te ni chindihiyū yā nde quívi sándaā yā siquī.

⁵ Te suni tu ní íne cáhnu ni yā nuū ñáyuu jenahán, chi sa ni scúun ya saū xeén siquī ñáyuu ni casáha néé un. Te máá-ni Noé, tēe ni nacani jnūhun ndaā, ni scácu ya de jíin úxā gā ñayuu.

⁶ Te suni ni ndonda ya siquī cuéchi ñayuu ñuu Sodoma jíin ñuu Gomorra, te ni cayū ñuu i ni nduu máá yāā na. Te súcuan cúu i ñin ejemplo nuū tāca gā ñayuu sáha néé jéē quíji ga.

⁷ Te ni scácu ya Lot, chi tēe ndaā ni cuu de, te ni cucuíhyá ndasí ni de ni jito de jniñu néé ní casáha ñayuu neé un.

⁸ Chi tēe váha un ní condee de mēhñu ñáyuu ún, te ndiquívi ni nacani cuíhyá ni de jeē ní jini sōho de ni jito de tācá jniñu néé ní casáha i.

⁹ Núu súcuan te máá Jitoho yō chi jnáma ya ñayuu cáchiñúhún núu yā, te núu vēji jnūndóho siquī i. Te chindihiyū yā ñayuu casáha néé, návāha ndoho i castigo quívi sándaā yā cuéchi i.

¹⁰ Te víhyá gā stóho ya tēe casáha jniñu jnéhén jéē ndíyo néé ni de, te cácuu jéē ni de siquī jniñu ndácu máá Jitoho yō. Nihni ndasí ni de, te cáchundeyí ni de sáha de jeē cácuu

maá de, te tu cáyūhú de cahán ndevāha de siquī tāca jéē cácujuhnu nuū sucún.

¹¹ Te ni máá ndajéhé jeē cáhīn nuū Jitoho yō, vēsú cácujuhnu ga yā jíin fuerza jíin jniñu ndíso ya, te tu cácahán ndevāha ya siquī tāca jéē cácujuhnu ún.

¹² Te tēe ún chi cácuu de nájñūhun quiti yúcu jéē ni jéconā tī jíin modo sáha tī, te cátañu tī návāha nihīn ñayuu tī cahni i tī. Chi cácahán neé de siquī tāca jéē tu cájecūhun ni de. Te cuu de nájñūhun jíhí tācá quiti ún.

¹³ Te jeē ní castóho de ñayuu, suni súcuan nanihīn de ndoho de. Te cácusī ni de jíin tāca jéē cácajni ni de, te casáha de tācá jniñu jeē cándiyo néé ni de. Te cácuu de tēe quini jeē casáha jniñu cúcanu ñayuu. Te jeē cándutútú de jíin ró vico ró, te níni cácusī ni de jíin jniñu néé jniñu stáhú.

¹⁴ Te cándiyo ni de cájito de ñahan, te tu cájecuīñi de sáha de cuéchi. Te cástáhú de ñayuu tahya ni. Chi ni cacāan de jíin jnúhun ndíyo ni de tācá ndajniñu. Te tēe jnahnū ndetū cácuu de.

¹⁵ Te ni casana de, chi ni castóo de jnūhun jeē cúu ichi ndaā. Te ni candiquīn de modo Balaam, tēe ni nacani jnūhun nde jenahán, séhe Beor. Chi tēe un ní cusī ni de nihīn de xūhun siquī jnúhun néé jéē cahán de.

¹⁶ Te ñin burro ni cahán tī nájñūhun ñin ñayuu, vēsú quiti ñihín cúu tī. Te ni cahán tī nuū tēe ún, te súcuan ni jesi tī jeē ma quihín de cahán de tāca jnúhun néé stívi.

¹⁷ Te tāca tēe súcuan chi cácuu de nájñūhun tesōco íchi, nájñūhun vicō jeē stehí táchī. Te jnahnū ndetū de quívicoo de nuū néé nuū lúchi jnúu coyūcú de ní cáni.

¹⁸ Chi yōhyo casándúxí de máá de jíin jnúhun cácahán saá-ni de. Te cánducú de squívi tucu de sava ñayuu nuū jniñu néé jniñu ndíyo ni. Te súcuan cástáhú de ñayuu jeē sa ní quenda i ni cācu i nuū ñáyuu casáha jniñu néé.

¹⁹ Te cácahán de jeē cáhīyo libre i sáha i ndese-ni cúní maá i, te ni máá de tu cáhīyo libre de, chi cácuu de mozo nuū cuéchi, chi máni jniñu jnéhén casáha de. Chi tācá jniñu jeē cúndeyí jíin ñin tēe jeē sáha de, suu yūcuan ndúu de mozo nuū.

²⁰ Chi núu je ni cajini de ndese Yaā cúu máá Jitoho yō Jesucristo, Yaā jnáma yóhó, te núu súcuan ni quenda de ni cācu de

nuū jníñu jnéhén íyó ini ñayīví, te yūcuán na te núu ndívicoo tucu de nuū jníñu un jéē cúndeyí tucu jíin de, núu súcuan te néé gá quendōo de jeē sándihí vēsú jeē xīhna ñúhún.

²¹ Chi vāha ga núu jeē tu ní cájini de jnūhun ichi ndaā nuú, vēsú jeē ní cajini de, te stóo tucu de jniñu ndoo jeē ní ndacu ya nuū de.

²² Chi cúndaā jíin de nájnūhun cáhán ñn jnūhun jenahán: Ina ni nacaji tí jeē ní ndujen tí. Te quīnī ní ndundoo, ni nacuchi tucu tí ndehyū, achí.

Siquī jeē ndíji Jitoho yō

3

¹ Ñánī mánī, yāha cúu carta uū jeē tée ri nuū rō. Te jíin ndíndúu carta yāha cúni rī jeē nacani ni rō siquī ndihí jeē váha ndaā jeē jení ichí rí rohó.

² Te na núcūhun ni rō tāca jnúhun jeē ní canacani tēe ndoo Yaā Dios nde jenahán, jíin jniñu ní ndacu máá Jítoho yō, Yaā jnáma yóhó. Te suu cúu jeē ní castéén tēe cácuu apóstol nuū rō.

³ Te xīhna gā jnūhun yāha na jécūhun ni rō: Jeē nuū cuándihí quīvī te quijicoo tēe sácata siquī jnúhun ndaā yā, chí sáha de tācá jniñu néé jéē ndíyo ni maá de.

⁴ Te cahán de jíjnáhan de: ¿Najehē cúu jeē tu ndíji Cristo nájnūhun ni jejnūhun ya? Chí nde quīvī ní cajihí jíi yō te nde vijna, tu ndé sáma cui tí ndihí jeē iyó ndé ná ni jecōo ñayīví, achí de.

⁵ Chí tu cáconi de jecūhun ni de jeē ndé jenahán ní cuvāha andíví jíin jnúhun ni cahán Yaā Dios. Te ni ndacu ya jniñu jeē na cuvāha ñayīví jíin ndute, te mēhñú ndute ni nane ñuhun íchi.

⁶ Te suni jíin ndute ni naa ñayīví jenahán, chí ni ndaa ndute jeē ní cuun saū xeén.

⁷ Te suni súcuan jíin jnúhun ni cahán Yaā Dios ní sátūhva ya jeē cayú andíví jíin ñáyīví iyó vijna. Chí máá quīvī juicio te cayū ndihí, te jnahnū ndetū ñayuu ni casáha néé.

⁸ Te suni ma náa ni rō jnūhun yāha, ñánī mánī: Jeē nuū maá Jítoho yō chí ñn quīvī cúu nájnūhun mil cuiyā, te mil cuiyā cúu nájnūhun ñn quīvī-ni.

⁹ Chí nasūu jéē cucuée máá Jítoho yō siquī jnúhun ni jejnūhun ya, nájnūhun cájeni ni sava ñayuu. Chí sa suhva íyó paciencia ni yā nuū yō, chí tu cúni yā jeē jnahnú ndetū ni ñn yó, chí sa cúni yā jeē ndihí yó nacani ni yō stóo yó cuéchi yó.

¹⁰ Te quīvī ndíji máá Jítoho yō, ñn sanaa-ni te quee, nájnūhun ñn sanaa-ni te quee ñacuīhná jecuāā. Te quīvī ún chí ñhin ndasí andíví, te naa-ni. Te ndihí jeē iyó andíví chí naa sáha ñuhún. Te ñayīví jíin táca jéē iyó ini, ndihí cayū.

¹¹ Te núu súcuan naa tācá un, te cánuu ndasí jéē coo ndoo ánuá rō te chíñúhún váha ro yá jíjnáhan rō.

¹² Te condetu ró te condihvī ni rō jeē na quee yachí quīvī ndíji Yaā Dios. Te quīvī ún cayū andíví te naa-ni, te tāca jéē iyó chí ndute sáha yáñuhún.

¹³ Te máá yó chí cándetu yó andíví jéé jíin ñáyīví jéé, chí súcuan ni jejnūhun Yaā Dios. Te yūcuán chí máni jniñu ndaā jíin jniñu váha coo.

¹⁴ Núu súcuan, ñánī mánī, níní jéé cándetu ró jéé squícu tācá jniñu yāha, te na ndúcú ndeyí ró návāha quīvī ndíji ya te ñhin yā rohó jéé cáyūcu mánī rō, te coo ndoo ró jéé tú na cuéchi ró.

¹⁵ Te na jécūhun ni rō jeē siquī jeē iyó paciencia ni maá Jítoho yō, jeē yúcuan cácu yó. Chí hermano yō Pablo jeē maní yō jíin, suni súcuan ni tee de nuū rō, chí súcuan ni steén Yaā Dios jnūhun ndíchí yá nuū de.

¹⁶ Te cáhán de siquī jnúhun yāha núu tāca carta jeē ní tee de. Te nuū carta de un íyó jecu jnūhun jeē yí jécūhun ni yō. Te ñayuu tu jécūhun ni jíin ñayuu tu íje jíin jnúhun cándíje, cánasama i modo steén jnūhun yí un, nájnūhun násama i jeē cahán sava ga tutu íi. Te súcuan sáha í jeē jnahnú ndetū maá i.

¹⁷ Te róhó ñánī mánī, vijna te je ni cajini rō ndese coo tācá jniñu yāha. Núu súcuan te coto má condiquīn rō jnūhun stáhú cástéén ñayuu casáha néé. Chí núu tuú te snáa rō jnūhun cáhīin ñhin ró jíin.

¹⁸ Chí sa na cóndihvī gā ni rō cuni rō ndese Yaā cúu máá Jítoho yō Jesucristo, Yaā jnáma yóhó. Te na íje ga ni rō jíin jnúhun cúndáhú ni yā rohó. Te na cáhán yō jeē

yóhɔ luu cújéhnɔ yá nde vijna jíín nǎí cáni.
Súcuan na cóo. Amén.

CARTA HN JEE NI TEE SAN JUAN APOSTOL NUU ÑAYUU CACANDIJE

Jnūhun cotecu yō nī cáni

¹ Jnūhun cátee ri cuajeē nuū rō jijnáhan ró cúu jnūhun máá Yaā jeē je íyó ndé ná tu jecōo tāca jée iyó. Te ni cajini sōho ri jeē ni cáhān yā, te ni cajito jínūū rī yā, chi ni cajito vāha ri nuū yā, te ni cajni ri yā. Te máá yá cúu Jnūhun cotecu yō nī cáni.

² Chi Yaā yáha jée sáha ya jeē cótecu yō, ni quenda ndijin yā. Te cácahān rī jnūhun ya, chi ni cajito ri yā. Te cácastūhun rí nuū rō jijnáhan ró síquī Yaā cúu Jnūhun cotecu yō nī cáni, Yaā ni condee jín Tátá yō Yaā Dios, te ni quenda ndijin yā nuū rī jijnáhan ri.

³ Jeē ní cajito ri jín jée ní cajini sōho ri, yūcuan cúu jeē cácastūhun rí nuū rō, návāha coo inuú ni rō jín yó jijnáhan yó. Te jendaá chi cáhīyo inuú ni yō jín máá Tátá yō Yaā Dios jín Séhe ya Jesucristo.

⁴ Te jnūhun yáha cátee ri cuajeē nuū rō, návāha cusī teyí ni rō jijnáhan ró.

Yaā Dios cúu luz

⁵ Te yáha cúu jnūhun ni steén Jesucristo nuū rī, te vijna cácastūhun rí nuū rō: Yaā Dios cúu luz, chi yōhōyō ndaā yā, te tú cuiti na jniñu nées íyó jín yá.

⁶ Núu cácahān yō jeē cáhīyo inuú ni yō jín yá, te núu cájica yó návjñūhun nuū nées jeē sáha yó jniñu nées, núu súcuan te cástáhú yó, te nasūú jniñu ndaā casáha yó.

⁷ Te núu cájica yó jín luz yā jeē casáha yó jniñu ndaā, návjñūhun íyó máá yá jín luz yā jeē sáha ya jniñu ndaā, yūcuán na te cáhīyo inuú ni yō jín táca jnáhan yó. Te niñī maá Séhe ya Jesucristo sándoo yóhó núu ndihī cuēchi yó.

⁸ Núu cácahān yō jeē tú na cuēchi yó, te cástáhú yó máá yó jeē jéni ni yō súcuan, te tu ñūhun jnūhun ndaā ini yō.

⁹ Te núu nacani ndaā yō cuēchi yó núu yā, te cone cáhnu ni yā nuū cuēchi yó, te sándoo ya yohó ndihī jeē neé casáha yó. Chi jíní yó jeē Yaā vāha Yaā ndaā cúu ya.

¹⁰ Te núu cácahān yō jeē tú na cuēchi yó, te návjñūhun sáha yó jée Yaā stahú cúu ya, te tu cándíje ndije yó jnūhun ya.

Cristo cúu Yaā cahán jehē yō

2

¹ Tāca jnūhun yáha téé ri cuajeē nuū rohó jée cácuu ró návjñūhun sēhe ri, návāha ma sáha ró cuēchi jijnáhan ró. Te núu ndé ñn ró ní sáha cuēchi, te íyó máá Yaā cahán jehē yō nuū maá Tátá yō Yaā Dios. Jesucristo Yaā ndaā cúu ya.

² Te ni socō yā maá yá jeē ndahva yā cuēchi yó, te nasūu cuēchi máá-ni yó, chi suni cuēchi ñayuu nī ñáyīví.

³ Núu squícu yó jniñu ndácu Yaā Dios nuū yō, jín yúcuán cúcáhnu ni yō jeē jíní ndije yó ndese Yaā cúu ya.

⁴ Te núu cáhān ñn ñayuu: Ruhū chi jíní rī ndese Yaā cúu ya, te núu tu squícu i jniñu ndácu ya, núu súcuan te stáhú i, te tu cáhān i jnūhun ndaā.

⁵ Te sa ñayuu squícu jnūhun ya, je ni ije vāha ni i jeē maní i jín yá. Súcuan te cuni yō núu ndúú yó jín yá chí tuú.

⁶ Núu cáhān ñn ñayuu jeē nduú i jín yá, cánuú jée caca ndaā i návjñūhun ni jica Jesucristo.

Jniñu jée ndácu ya nuū yō

⁷ Hermano, nasūú ñn jniñu jée ndácu ri nuū rō jeē cahán rī jeē na cundáhú ni rō jnáhan ró. Chi jniñu jeē je cájini rō nde ná ni quejée ró cándíje ró cúu. Te jniñu yáha jeē ndácu ya, vēji nde jenahán, te suu cúu jnūhun ni cajini sōho ró ndé quivī ní quejée ró cándíje ró.

⁸ Te vēsú súcuan, te níní jniñu jée cúu, te jniñu ndaā cúu nuū Cristo jín núu maá ró jijnáhan ró. Chi je cuayāha jniñu nées jée iyó núu nées, te je steén maá luz ndaā ini anuá yō vijna.

⁹ Núu ñn ñayuu cahán i jeē jica i jín luz yā, te núu jító uhū i jnáhan i, ñayuu ún chi jica ga i návjñūhun nuū nées jín cuēchi.

¹⁰ Te ñayuu jeē cundáhú ni jnáhan, chi jica i jín luz yā, cúu jeē sáha i jniñu vāha. Te ni ñn ma cúu sáha jeē quivī i cuēchi.

¹¹ Te ñayuu jító uhū jnáhan, chí íyó i nuū nées, te jica i nuū nées. Te tu jíní i ndé chí

quíhín i, chi nuū néē un ní jesi jeē tu jécūhun ni i.

¹² Róhó jéē cácuu sēhe, téē ri jnūhun yáha cuájeē nuū rō, chi jeē siquí Jesucristo te ni ine cáhnu ni Yaā Dios nuū cuéchi rō.

¹³ Róhó tátá jijnáhan rō, suni téē ri nuū rō, chi cájini rō ndese Yaā cúu Yaā iyó ndé xihna ñúhún. Róhó téē suchí jijnáhan rō, suni téē ri nuū rō, chi ni cacundeyí rō jeē tu ní cúu squívi jexeén rohó cuéchi.

Róhó jéē cácuu sēhe, téē ri jnūhun yáha cuájeē nuū rō, chi cájini rō ndese Yaā cúu máá Tátá yō Yaā Dios.

¹⁴ Róhó tátá jijnáhan rō, suni téē ri nuū rō, chi cájini rō Yaā iyó ndé xihna ñúhún. Róhó téē suchí jijnáhan rō, suni téē ri nuū rō, chi cáhlin nihin rō, te cácandije rō jnúhun Yaā Dios, te ni cacundeyí rō siquí jexeén.

¹⁵ Ma cutóo ni rō siquí ñayívi, ni tāca jéē iyó ini ñayívi. Chi núu ndé ñayuu cutóo ni i siquí ñayívi, ñayuu ún tu iyó mánī i jín Tátá yō Yaā Dios.

¹⁶ Chi tāca jéē cúu cuenta ñayívi, nasūu ndé nuū Tátá yō Yaā Dios vēji, chi cuenta ñayívi cúu. Te yūcuan cúu tāca jéē cájni ni yō jeē cuní modo neé máá yó, jín jéē ndíyo ni yō jeē jíto yó núu, jín jéē sandúxí yó máá yó siquí ndajniñu névaha yó.

¹⁷ Te cuandihí ñayívi jín tāca jéē ndíyo neé ni yō. Te ñayuu casáha jeē cuní máá Yaā Dios, chi cotecu i ní cáni.

Jnūhun ndaā jín jnúhun stáhú

¹⁸ Róhó jéē cácuu nájnuhun sēhe ri, cáhán rī jín rō jeē cuandihí quiiví. Te je ni cajini jnūhun rō jéē quiji máá téē cuu contra siquí Cristo. Te nde vijna je ni canecoo cuehē téē jeē cácuu contra siquí Cristo. Te jeē yūcuan jín yō jeē cuándihí quiiví.

¹⁹ Mēhñu máá yó ni quendacoo de, te nasūu jnáhan yó cácandije cácuu de. Chi núu jeē jnáhan yó cácuu de, te quendōo de jín yó nuú. Te ni quenda de cuango de, návaha cuni cají yó jéē násūu jnáhan yó cácuu ndihí de.

²⁰ Te máá rō jijnáhan rō, chi Cristo ni jēhe ya Espíritu Santo, ndeé yá ini anuá rō, te jeē yūcuan cájini rō jnūhun ndaā.

²¹ Núu sūcuan te téē ri yāha cuájeē nuū rō, siquí jeē cájini rō jnūhun ndaā, nasūu siquí

jeē tu cájini rō. Te cájini rō jeē tú na jnūhun stáhú iyó nuū jnūhun ndaā.

²² ¿Ndé ñn cúu jeē cahán máni jnūhun stáhú? Suu téē jeē cahán jeē Jesús, tu cúu ndije ya Cristo, Yaā ní tají Yaā Dios. Yūcuan cúu téē jeē cúu contra siquí Cristo, chi tu jéjnuhún de máá Tátá yō Yaā Dios jín Séhe ya.

²³ Tāca ñayuu jeē tu jéjnuhún i Séhe ya, suni tu iyó máá Tátá jín i. Te ñayuu jeē jéjnuhún i Séhe ya, suni iyó máá Tátá jín i.

²⁴ Núu sūcuan te chuhun vāha ni rō máá jnúhun ni cajini sōho rō ndé jeē xihna ñúhún. Te núu ñúhun vāha ni rō jnūhun ní cajini sōho rō ndé jeē xihna ñúhún, yūcuan na te suni ndúú rō jín máá Tátá yō jín Séhe ya.

²⁵ Te yāha cúu jnūhun jeē ni jéjnuhun Jesucristo nuū yō: jeē cótecu yō ní cáni sáha ya.

²⁶ Jnūhun yáha ní tee ri nuū rō jeē cástūhun rí siquí ñayuu cánducú stáhú róhó.

²⁷ Te máá rō jijnáhan rō, chi ni jēhe Jesucristo Espíritu Santo, ndeé yá ini anuá rō. Te jeē yūcuan tu jín ñúhún jéē steén ni ñn ñayuu nuū rō ndé vé cúu jendaá, chi máá Espíritu cúu jeē steén ndihí nuū rō, te steén yā jnūhun ndaā, chi tu stáhú cuiti yā. Núu sūcuan te caca ndúú rō jín Cristo, nájnuhun steén Espíritu nuū rō.

²⁸ Séhē jijnáhan rō, vijna te na cáca ndúú rō jín Cristo, návaha núu na quenda ndijin yā, te ma yūhu yó, ni ma cúcanu yō nuū yā quiiví ndíji ya.

²⁹ Chi je cájini rō jeē Yaā ndaā cúu Jesucristo, te suni na jécūhun ni rō jeē tāca ñayuu casáha jniñu ndaā, sēhe Yaā Dios cácuu i.

Jnūhun ñayuu cácuu sēhe Yaā Dios

3

¹ Nacā jeē yóhyo ni cundáhú ni Tátá yō Yaā Dios yohó, chi ni nihín yō jnūhun cuu yó séhe ya, te suu cúu ndije yó. Jeē yūcuan, ñayuu ñayívi tu cájini i jeē cúu yó séhe ya, chi tu jín i ndese Yaā cúu máá yá.

² Nánī mánī, vijna te cúu yó séhe Yaā Dios, te ná tu cuni yō ndese coo yó ní cáni. Te je jín yō jeē quiiví quenda ndijin Jesucristo, te nduu yó nájnuhun iyó máá yá, chi coto yó núu yā ndese iyó yá.

³ Te tāca ñáyuu jeē súcuan ñúhun ni i, chi sándoo i ánuá i, nájñūhun íyó ndoo Jesucristo.

⁴ Te ñayuu casáha cuēchi, chi stívi i ley Yaā Dios. Chi núu sáha yó cuéchi, te stívi yó ley yā.

⁵ Te je cájini rō jeē ní quiji Jesucristo ini ñayívi návāha quende yā cuēchi yó. Te máá yá tú na cuēchi ya.

⁶ Te tāca ñáyuu jeē nduú i jíin yá, tu cájica i jíin cuéchi. Te tāca ñáyuu cájica jíin cuéchi, tu jíin i ya, ni tu jécūhun ni i ndese Yaā cúu ya.

⁷ Séhē jijnáhan ró, coto ró jéē ma stáhú ni ñin i róhó. Chi na jécūhun ni rō jeē ñáyuu casáha jniñu ndaā, máá i cácuu ñayuu ndaā, nájñūhun íyó ndaā maá yá.

⁸ Te ñayuu casáha cuēchi, máá i cácuu sēhe jexeén. Chi jexeén cúu jeē sáha cuēchi vēji nde jeē xíhna ñúhún. Jeē yúcuan ní quiji Séhe Yaā Dios, jeē snáa yā tācá jniñu nées sáha jexeén.

⁹ Ni ñin ñayuu jeē cúu sēhe Yaā Dios, tu jíca i jíin cuéchi, chi ni sáha Yaā Dios jeē ní nduu i nájñūhun íyó máá yá. Te ma cúu ga caca i jíin cuéchi, chi sēhe Yaā Dios cácuu i.

¹⁰ Súcuan cuni yō ndé ñin cúu sēhe Yaā Dios jíin séhe jexeén: Tāca ñáyuu jeē tu sáha jniñu ndaā, jíin jéē tu cundáhú ni jnáhan, nasūu séhe Yaā Dios cúu i.

Jeē na cundáhú ni yō jnáhan yó

¹¹ Yāha cúu jñūhun jeē ní cajini sōho ró ndé jeē xíhna ñúhún: jeē na cundáhú ni yō jnáhan yó.

¹² Te ma sáha yó nájñūhun ni sáha Caín, jeē ní cuu de sēhe jexeén, te ni jehni de ñani de. ¿Te najehē ni jehni de ñani de? Siquí jeē ñani de ni sáha jniñu ndaā te máni jniñu nées ní sáha máá de.

¹³ Hermano jijnáhan ró, ma cunée ni rō te núu ñayuu ñayívi cáquití ni i nuū rō.

¹⁴ Te máá yó chi siquí jeē cundáhú ni yō jnáhan yó, súcuan jíin yō jeē jé ni cācu yó jéē cótecu yō ní cáni. Te ñayuu jeē tu cundáhú ni jnáhan, íyó i jíin jñūhun jnahnū ndetū i.

¹⁵ Chi tāca ñáyuu quití ni nuū jnáhan, nájñūhun ñayuu jéhni ndíyi cúu i. Te cájini rō jeē ñáyuu jéhni ndíyi, ma nihín tahú i cótecu i ní cáni.

¹⁶ Jeē ni jíhī Cristo jehē yō, yūcuan cúu jeē steén cají ndese cúu jñūhun cundáhú ni. Te máá yó, chi suni súcuan jíin ñúhún cundáhú ni yō jnáhan yó vésú na cúu yō jehē i.

¹⁷ Te núu névāha yó jéē cótecu yō ñayívi, te núu jíin yō jeē cúmanī nuū jnáhan yó, te núu tú cundáhú ni yō i cuāha yó jéē jíin ñúhún i, núu súcuan ¿te á íyó máni yō jíin Yaā Dios, chi nañun?

¹⁸ Séhē jijnáhan ró, ma cundáhú ni yō jíin máá jñūhun cáhán-ni yó, chi sa suhva na cundáhú ndije ni yō nde jíin jniñu sáha yó.

Ndese cucáhnū ni yō jeē váha sáha yó núu Yaā Dios

¹⁹ Te súcuan cundaā ni yō jeē squícu yó jñūhun ndaā, te cucáhnū ni yō jeē váha sáha yó núu yā.

²⁰ Chi núu ánuá yō tú vāha sáha siquí jeē iyó cuéchi yó, te Yaā Dios chi cújéhnū ga yā vésú anuá yō, te jíin ndíhi ya tācá un.

²¹ Núu súcuan ñánī máni, núu vāha sáha ánuá yō siquí jeē tú na cuēchi yó, yūcuán na te cucáhnū ni yō jeē váha sáha yó núu Yaā Dios.

²² Te tāca jéē cacán yō nuū yā, te sáha ya jeē cahán yō, chi squícu yó jniñu ndácu ya te sáha yó jniñu jeē cúsi ni yā.

²³ Te yāha cúu jniñu ndácu ya: jeē na cándije yó jéē ni sáha Séhe ya Jesucristo jehē yō, jíin jéē na cundáhú ni yō jnáhan yó, nájñūhun ni ndacu ya jniñu nuū yō.

²⁴ Te tāca ñáyuu squícu jniñu ndácu Yaā Dios, ndúu i jíin yá, te ndéé yá ini anuá i. Te jíin máá Espíritu jeē ni jéhe ya jeē ndeé ini anuá yō, jíin yúcuan te jíin yō jeē ndeé Yaā Dios ini yō.

Jñūhun jeē véji nuū Espíritu jíin jñūhun cáhán contra Cristo

4

¹ Ñánī máni, ma cándije ró táca téé jéē cácahán de jeē jíin Espíritu Yaā Dios cánacani de jñūhun. Chi sa suhva coto ndee rō de, núu nde nuū Yaā Dios vēji jñūhun cácahán de, chí tuú. Chi ini ñayívi je ni canecoo cuehē téé cánacani jñūhun stáhú, te cácahán de jeē ndé nuū Yaā Dios vēji.

² Te súcuan nacuni rō ndé-ni i cúu jeē jíin Espíritu Yaā Dios cahán: tāca ñáyuu jeē cácahán ndaā jeē ní quiji Jesucristo, ni

nduu ya tēe, máá i cúu jeē jíin Espíritu Yaā Dios cácahān.

³ Te tāca ñáyuu jeē tu cájejnúhún jeē súcuan ni nduu ya tēe, máá i chí nasūu jíin Espíritu Yaā Dios cácahān i. Chí sa suhva cácuu i contra siquī Cristo. Te je ni cajini jnūhun ró jéē quijicoo ñayuu súcuan, te vijna je cáhīyo i ini ñayīví.

⁴ Séhē jijnáhan ró, máá ró cácuu sēhe Yaā Dios, te je ni cacundeyí ró siquī tēe cástáhú un. Chí jéhnú ga cúu poder maá Yaā jeē ndeé ini rō, vēsú poder maá jéē ndeé jíin ñáyuu ñayīví jéē castáhú.

⁵ Máá i cácuu cuenta ñayīví, te jeē yúcuan cácahān i jnūhun cuenta ñayīví. Te ñayuu cácuu cuenta ñayīví, cájini nahín i jnūhun ún.

⁶ Te máá yó chí sēhe Yaā Dios cácuu yó. Te ñayuu jeē cájini i ndese Yaā cúu Yaā Dios, máá i cájini nahín i jnūhun cácahān yō. Te ñayuu jeē násūu sēhe Yaā Dios cácuu, máá i tu cájini nahín i jnūhun cácahān yō. Te súcuan nacuni yō ndé-ni cúu jeē cahán jnūhun ndaā jíin ndé-ni cúu jeē cahán jnūhun stáhú.

Máni jnūhun cundáhú ni iyó jíin Yaā Dios

⁷ Nánī mánī, na cundáhú ni yō jnáhan yó, chí jnūhun cundáhú ni, nde nuū Yaā Dios vēji. Te tāca ñáyuu cundáhú ni jnáhan, chí sēhe Yaā Dios cúu i, te jíní i ndese Yaā cúu Yaā Dios.

⁸ Te ñayuu jeē tu cundáhú ni jnáhan, tu jíní i ndese Yaā cúu Yaā Dios, chí máni jnūhun cundáhú ni iyó jíin Yaā Dios.

⁹ Súcuan ni steén Yaā Dios ndese cundáhú ni yā yohó, chí ni tají yá Sēhe ya ni quiji ini ñayīví yáha, vēsú mañúhún-ni ya iyó, návāha cotecu yō ní cáni sáha ya.

¹⁰ Te yāha cúu jnūhun cundáhú ni: nasūu jéē xíhna maá yó ni íyo manī yō jíin Yaā Dios, chí sa suhva máá yá cúu jeē ní cundáhú ni yā yohó. Te ni tají yá Sēhe ya ni quiji, návāha socō yā maá yá jeē quende yā cuēchi yó.

¹¹ Nánī mánī, núu súcuan ni cundáhú ni Yaā Dios yohó, te suni súcuan cánuú jeē cundáhú ni yō jnáhan yó.

¹² Ni ñn ñayuu tu ní jító cuítí nuū Yaā Dios. Te núu cundáhú ni yō jnáhan yó, te ndeé Yaā Dios ini anuá yō, te je ni ije vāha ni yō jíin jnúhun cundáhú ni.

¹³ Te máá Espíritu Santo jeē ni jéhe ya jeē ndeé ini yō, máá yá steén jeē nduú yó jíin Yaā Dios, te ndeé Yaā Dios ini yō.

¹⁴ Te ni cajito ri te cácastūhun rí jeē maá Tátá yō ni tají yá Sēhe ya ni quiji návāha jnama ya ñayuu ñayīví.

¹⁵ Te núu ndé ñáyuu jejnúhún i jeē Séhe Yaā Dios cúu Jesús, te nduú i jíin Yaā Dios, te Yaā Dios ndeé yá ini i.

¹⁶ Te máá yó, je ni jini yō te ni candíje yó jéē cundáhú ni Yaā Dios yohó. Chí máni jnūhun cundáhú ni iyó jíin Yaā Dios. Te ñayuu cundáhú ni jnáhan, nduú i jíin Yaā Dios, te ndeé yá ini anuá i.

¹⁷ Te súcuan cúu jeē ije vāha ni yō jíin jnúhun cundáhú ni, návāha ma yūhu yó quiví sándaā yā jniñu yó. Chí nájñūhun cundáhú ni Cristo, suni súcuan cándaā máá yó ini ñayīví yáha.

¹⁸ Te núu manī yō jíin yá, te tu yúhú yó nuū yā. Chí núu ni ije yó jíin jnúhun manī yō jíin yá, te tú na siquī yuhú yó nuū yā. Chí jnūhun yúhú un cúu jeē yuhú yó ndoho yó castigo. Jeē yúcuan ñayuu cáyūhú chí ná tu ije vāha i jíin jnúhun manī i jíin yá.

¹⁹ Te yohó chí manī ndasí yó jíin Yaā Dios, chí xíhna gā maá yá ni cundáhú ni yā yohó.

²⁰ Te núu ñn ñayuu cahán i jeē maní i jíin Yaā Dios, te núu quiítí ni i nuū jnáhan i, núu súcuan te ñayuu stahú-ni cúu i. Chí núu ñn ñayuu tu íyó mánī i jíin jnáhan i jeē jító i nuū, te ni ma cúu coo maní i jíin Yaā Dios jeē tu jító i nuū yā.

²¹ Chí je ni ndacu ya jniñu yáha nuū yō: Ñayuu jeē maní i jíin Yaā Dios, suni na cóo maní i jíin jnáhan i.

Jeē cundeyí yó siquī jeneé íyó ini ñayīví

5

¹ Tāca ñáyuu jeē cácañdeé i jeē Jesús cúu Cristo, Yaā ní tají Yaā Dios, máá i cácuu sēhe Yaā Dios. Te ñayuu maní jíin Yaā cúu Tátá, suni cácañdeé ni i ñayuu cácuu sēhe ya.

² Súcuan jíní yō jeē cundáhú ni yō ñayuu cácuu sēhe ya, núu maní yō jíin yá te squícu yó jniñu ndácu ya.

³ Chí jeē squícu yó jniñu ndácu Yaā Dios cúu jeē maní yō jíin yá. Te jniñu ndácu ya chí tú vēyí.

⁴ Chi tāca ñáyuu cúu sēhe Yaā Dios, cúndeyí i síquī jeneé íyó ini ñayīví. Te jeē candíje yó jéē cundáhú ni yā yohó, yūcuan cúu fuerza jeē sáha jeē cúndeyí yó.

⁵ Máá-ni ñayuu jeē candíje jeē Jesús cúu Sēhe Yaā Dios, máá i cúu jeē cúndeyí síquī jeneé íyó ini ñayīví.

Jnūhun cáhán ndaā síquī Séhe Yaā Dios

⁶ Te jeē ní quiji Jesucristo ini ñayīví, chi ni jendute ya jíin ndute, te ni jeti ñiñī yā jeē ni jíhī yā jehē yō. Te nasūu máá ñn-ni jeē ní jendute ya jíin ndute, chi suni ni jeti ñiñī yā. Te máá Espíritu Yaā Dios cahán ndaā síquī yā, chi nuū máá Espíritu vēji jnūhun ndaā.

⁷ Chi ini andīví íyó únī jeē cácahān ndaā síquī jnūhun yáha: máá Yaā cúu Tátá, jíin Yaā cúu Jnūhun, jíin Espíritu Santo. Te ndīnúní yá, chi ñn-ni cúu ya.

⁸ Te ini ñayīví suni íyó únī jeē steén ndaā: máá Espíritu, jíin jéē ní jendute Jesús, jíin jéē ní jeti ñiñī yā. Te ndīnúní yáha, chi inuú-ni steén síquī yā.

⁹ Te cájetáhú yó jnūhun cácahān ndaā tēe, te jéhnu ga cúu jnūhun cáhán máá Yaā Dios. Te jnūhun ni cahān yā cúu jnūhun síquī Séhe ya.

¹⁰ Ñayuu cácaandíje jeē Séhe Yaā Dios cúu Jesús, je ni cacundaā ni i jnūhun yáha jeē ni cáhān Yaā Dios. Te ñayuu jeē tu cácaandíje jeē ni cáhān Yaā Dios, nájnūhun cásáha i jeē Yaā stahú cúu ya, chi tu cácaandíje i jnūhun ni cahān ndaā yā síquī Séhe ya.

¹¹ Te jnūhun ndaā un cúu jeē ni sáha ya jeē cótecu yō ñí cáni, te Séhe ya ndíso jnūhun cótecu yō.

¹² Ñayuu jeē iyó Séhe ya jíin i, je ni nihīn tahú i cótecu i. Te ñayuu jeē tu íyó Séhe ya jíin i, ma nihín tahú i cótecu i.

Jnūhun consejo jeē sándihí

¹³ Jnūhun yáha tēe ri nuū rohó ñáyuu cácaandíje Séhe Yaā Dios, návāha cucáhnu ni rō jeē ni níhīn tahú rō cótecu rō ñí cáni.

¹⁴ Te cúcáhnu ni yō Yaā Dios, chi jíin yō jeē núu na vé jíicán yō nuū yā jeē suni cúní máá yá, te jíin nahín yá jeē jíicán yō.

¹⁵ Te núu jíin yō jeē jíin nahín yá jeē jíicán yō, núu súcuan te suni jíin yō jeē sáha ya jeē jíicán yō.

¹⁶ Núu ñn ñayuu jíin i jeē sáha jnāhan i cuēchi jeē násūu cuéchi jeē jnahnú ndetū i cúu, te na cácan tahú i nuū Yaā Dios, te cuāha ya jnūhun cótecu jnāhan i, te núu nasūu cuéchi jeē sáha jeē jnahnú ndetū i cúu. Iyó cuéchi jeē jnahnú ndetū i sáha, te tu cáhán rī jeē cacán tahú rō jehē ñayuu sáha cuēchi súcuan.

¹⁷ Tācá jniñu néé cúu cuēchi, te íyó cuéchi jeē násūu jéē jnahnú ndetū i cúu.

¹⁸ Te jíin yō jeē tāca ñáyuu cácuu sēhe Yaā Dios, tu jíca i jíin cuéchi. Chi Yaā cúu Séhe Yaā Dios, ndíto vāha ya i. Te tú na vé cúu sáha jexeén jíin i.

¹⁹ Te jíin yō jeē séhe Yaā Dios cácuu yó. Te ñayuu ñí ñayīví yíhi i ndaha jexeén.

²⁰ Te suni jíin yō jeē ní quiji Séhe Yaā Dios, te ni sáha ya jeē jécūhun ni yō, návāha cuni yō ndese Yaā cúu máá Yaā ndaā. Te ndúú yó jíin Yaā ndaā, suu jíin máá Séhe ya Jesucristo. Máá yá cúu ndije Yaā ndaā, te máá yá sáha jeē cótecu yō ñí cáni.

²¹ Séhe jijnāhan ró, na cújiyo ró núu tāca jéē násūu Yaā ndaā cúu. Súcuan na cóo. Amén.

CARTA UU JEE NI TEE SAN JUAN APOSTOL

Jnūhun ndaā jín jnúhun cundáhú ni

¹ Máá ná cúu tēe jéhu ndíso jníñu, te tēe ná carta yáha cuájeē nuū ní jēe cúu ní hermana ni nacāji Yaā Dios, jín nuū séhe ní jijnáhan i. Te manī na jín ní jijnáhan ní sáha jnūhun ndaā yā, te nasūu máá-ni ná, chi suni tāca ñayuu jini jnūhun ndaā.

² Te manī na jín ní jijnáhan ní síquī jeē cácandíje yó jnúhun ndaā yā jeē iyó ini anuá yō, te coo jín yó ní cáni.

³ Te ñúhun ni na jēe Tatá yō Yaā Dios jín Séhe ya Jitoho yō Jesucristo, na sáha ga yā jeē váha níhín, te cundáhú ni yā nihín, te sáha ya jeē coo ndeyí coo sī ni ní, jín jnúhun ndaā jín jnúhun cundáhú ni.

⁴ Yōhyo ni cusī ni ná, chi ni jini na jēe sava sēhe ní cájica i jín jnúhun ndaā, nájñūhun ni ndacu máá Tatá yō Yaā Dios jniñu nuū yō.

⁵ Hermana, cáhán ndahú ná jín ní jeē na cundáhú ni yō jnáhan yó. Te jnūhun tēe ná yáha cuájeē nuū ní, nasūú ñn jniñu jéé sá ndacu ya cúu, chi jniñu ní ndacu ya nuū yō nde ná ni quejéé yó candíje yó cúu.

⁶ Te jeē cundáhú ni yō jnáhan yó cúu jeē caca yó nájñūhun ni ndacu ya jniñu nuū yō. Te jniñu ní ndacu ya cúu jeē caca ní jín jnúhun cundáhú ni, nájñūhun ni cajini sōho ní ndé ná ni quejéé ní candíje ní.

Siquī tēe cástáhú

⁷ Chi cuehē tēe cástáhú ni canecoo de ní ñáyiví, te tu cájejnúhún de jeē ní quiji Jesucristo ni nduu ya tēe. Te tēe tu cájejnúhún súcuan, cácuu de tēe stáhú, te cácuu de contra síquī Cristo.

⁸ Coto ní jēe ma snáā ni táhū síquī jniñu váha ni casáha ní, chi sa suhva jeē na níhín ni ndihi tahū ní.

⁹ Núu ndé ñayuu jniñu inga jnūhun, te tu quéndōo i jín jnúhun ni steén Cristo, núu súcuan te tu iyó Yaā Dios jín i. Te ñayuu quéndōo jín jnúhun ni steén Cristo, chi iyó Tatá yō jín i, te suni iyó Séhe ya jín i.

¹⁰ Te núu jinū ñn ñayuu vehe ní, te núu tu quíjnáhan jnūhun steén i jín jnúhun yáha, te

ma cuáha ní jnúhun condee i vehe ní, ni ma cahán ni jnúhun ndeyí ni jín i.

¹¹ Chi ñayuu cahán jnūhun ndeyí ni jín i, chíndéé ñájñáhan jín i síquī jniñu néé casáha i.

Jnūhun sandíhí

¹² Iyó cuehē gā jnūhun cahán na jín ní jijnáhan ní, te tu cúni na tee ná núu tútu jín tinta. Chi ñúhun ni na cuájeē ná coto jnáhan yó, te ndajnūhun yó, návaha cusī ndasí ni yō.

¹³ Tāca séhe cuhū ní, ñahan jeē suni ni nacāji ya, cácahán i jeē sándeeyí ni ní. Súcuan na cóo. Amén.

CARTA UNI JEE NI TEE SAN JUAN APOSTOL

Jeē jejnūhún de tēe nání Gayo

¹ Máá rí cúu tēe jéhnú ndíso jníñu, te tēe rí carta yáha cuájeē nuū rō, amigo Gayo, chi manī rī jín ró sáha jnūhun ndaā.

² Nánī mánī, jícán tahu rī jeē vāha na quihín tēcá jniñu sáha ró, jín jéē na cóo vāha ró, nájñuhun iyó vāha ánuá rō jín jnūhun ya.

³ Yōhyo ni cusī ni rī ná ni quecoo sava hermano te ni cacastūhún de nuū rī ndese vāha squícu ró táca jniñu ndaā, chi jíca ndaā rō.

⁴ Tuá na inga sáha jeē cúsi gā ni rī, chi máni jeē nihín rī jnūhun jeē cájica ndaā ñayuu cácuu nájñuhun sēhe rí siquī jeē ni scándíje rí i.

⁵ Nánī mánī, yōhyo vāha sáha ró jéē chindéē ñáhán ró tēcá hermano, te víhyá gā núu tēe ñuu jicá cácuu de.

⁶ Chi tēe un ní canacani de jnūhun nuū ñayuu cácuandíje yáhá, ndese cúndáhú ni rō de. Te jícán rī jeē chindéē ñáhán gá rō de, núu na vé jini ñúhún de jeē caca ga de ichi nuū quihín de, nájñuhun nújnahan ni Yaā Dios.

⁷ Chi tēe un ní quendacoo de cájica de siquī jniñu Jesucristo. Te tú na vé cáquihin de nuū ñayuu jeē tu jini jnūhun Yaā Dios.

⁸ Jeē yúcuan cánuú coto yó de, chindéē ñáhán yó de jeē cánacani de jnūhun ndaā.

Siquī jeē tú vāha sáha Diótrefes

⁹ Je ni tee rí ñn carta nuū ñayuu cácuandíje jñā. Te Diótrefes, tu jétáhú de jnūhun cáhán rī, siquī jeē cuní de kujéhnú máá de nuū i.

¹⁰ Jeē yúcuan, núu na jéē rī te cahán rī nuū de siquī jniñu sáha de, chi yōhyo sájnūhún de te cáhán de jnūhun stáhú síquī rī jijnáhan rí. Te nasūu máá yúcuan-ni sáha de, chi suni tu jétáhú de tēcá hermano jéngoo nuū de, te jési de jeē ma cuátáhú ñayuu nuū tēcá hermano un. Te ñayuu cájetáhú nuū hermano un, quénehen de i nuū cándutútú ñayuu cácuandíje.

¹¹ Nánī mánī, ma ndácu ró ñayuu casáha jniñu néé, chi sa suhva ñayuu casáha jniñu

váha. Chi sēhe Yaā Dios cácuu ñayuu casáha jniñu váha. Te ñayuu casáha jniñu néé, tu cájini i ndese Yaā cúu Yaā Dios.

Jeē cácahán i jeē vāha sáha Demetrio

¹² Tāca ñayuu chi cácahán i jeē vāha sáha Demetrio. Te jniñu ndaā jeē sáha de, stéén jeē tēe ndaā cúu de. Te suni súcuan cácahán maá rí, te cájini rō jeē iyó ndaā jnūhun cáhán rī.

Jnūhun sandíhí

¹³ Iyó cuéhē gā jnūhun cahán rī jín ró, te tu cúní rī tee rí jín tinta jín pluma.

¹⁴ Chi ñúhún ni rī cuajeē yachī rī coto jnáhan yó, te ndajnūhun yó.

¹⁵ Te ñúhún ni rī jeē na cóo ndeyí coo sī ni rō. Tēcá amigo yō yáha cácahán i jeē sándeyí ni rō. Te suni cahán rō jín ñn ñn amigo jñā jeē sándeyí ni i, áchí rí, te cocahán yō.

CARTA JEE NI TEE SAN JUDAS APOSTOL NUU ÑAYUU CACANDIJE

¹ Máá rí cúu Judas ñani Jacobo, te mozo Jesucristo cúu rí. Te tée rí carta yáha cuájee nuū rohó ñayuu jeē ní cana máá Tátá yō Yaā Dios, te ni sáha ya jeē iyó ndoo íyó íi rō nuū yā jeē cácuu ró ñayuu manī yā jíin. Te Jesucristo ndító vāha ya rohó jēē cáyihī ró ndaha ya.

² Te ñūhun ni rī jeē na cúndáhú gá ni yā rohó, te sáha ya jeē coo ndeyí coo sīi ni rō, te coo manī ndasí yá jíin ró, te na ndúcuehē gā tāca jēē yáha nuū rō.

*Siquī tēe cástéén jnūhun stáhú
(2 Pedro 2.1-17)*

³ Ñánī mánī, yōhyo ní cuu ni rī tee rí nuū rō siquī jnūhun ni jnama ya rohó jíin rúhū jijnáhan yó. Te ni jini rī jeē cánuú gá tee rí carta jeē stihví ni rī rohó návāha nducú ndeyí ró jeē ma cási ñayuu nuū jnūhun cácandíje yó. Te jnūhun ún chi je ni jēhe ya ñi jínu-ni nuū tāca ñayuu maá yá.

⁴ Chi sava tēe ni castáhú de rōhó ní quivícoo de mēhñu ró. Te tēe ún chi nde jenahán je cáhán tutu iī jeē jnahnú ndetū de siquī jniñu cása ha de. Cácuu de tēe ndevāha, chi cácahān de jeē vāha ni Yaā Dios, te jeē yúcuan vetū-ni sáha de jniñu néé, cácahān de. Te tu cájejnūhún ndije de Jitoho yō Jesucristo jíin Yaā Dios, jeē mañúhún-ni ya cujéhnū nuū yō.

⁵ Te vijna chi vēsú je cájini vāha ró, te cúní rī jeē na núcūhun ni rō ndese ni sáha máá Jitoho yō. Chi ni jnama ya ñayuu Israel jenahán, ni chindéé ñájnáhan ya i jeē ní jinu i ini ñuu tatú Egipto cuahān i. Te vēsú súcuan te cuéé gá te ni snāā yā sava i jeē tu ní cácandíje i.

⁶ Te suni nucūhun ni rō siquī ndajéhé yā jeē ní castóo jniñu ndíso, te ni castóo nuū ní ndeē andiví. Te Yaā Dios ni chindihyū yā jijnáhan, te cándetu nde quiji quiví cáhnu jeē sándaā yā jniñu. Te cánuhnī jíin cadena, cáyūcu ní cáni nuū cunú núu néé.

⁷ Te suni ni stóho ya ñayuu ñuu Sodoma jíin ñuu Gomorra jíin sava ga ñuu jeē ní iyo yajni, chi suni ni casáha néé i nájnūhun ni casáha tācá ndajéhé un ndé jenahán gá. Te máá i ni cajica jnéni i te ni casáha i tāca cuéchi néé ndasí. Te ni canihīn i castigo ñuhūn jeē cayú ní cáni, te súcuan cúu i ñi ejemplo nuū ndihī ñayuu.

⁸ Te tēe cástáhú jeē ní quivícoo mēhñu ró, vēsú cájini de jeē súcuan ni sáha ya, te cájeni cáhá ni de, te cása ha jnéhén de yiqui cúñu de, te cásquéhichī ni de tēe cándacu jniñu Jitoho yō, te cácahān ndevāha de siquī tāca jēē cácu jéhnū nuū sucún.

⁹ Te nasūu súcuan ní sáha ndajéhé Miguel, vēsú ndajéhé cujéhnū ga cúu ya. Chi tu ní cáhán ndevāha ya ni tu ní ndácunehen ya cuéchi siquī jexeén ná ni casásáhán jnáhan ya jíin jéxeén un jeē siquī yiqui cúñu Moisés ná ni jihī de. Chi suhva-ni ní cahān yā: Máá Yaā Dios, Yaā cúu Jitoho, cuxeén yā nuū rō, ni achi Miguel.

¹⁰ Te tēe cástáhú yáha chi cácahān neé de siquī tāca jēē tu cájecūhun ni de. Te tāca modo cánevāha de siquī jeē sá cáa de, nájnūhun quiñi yúcú jēē sá cáa ti, suu yúcuan sáha jeē jnahnú ndetū de.

¹¹ Nacā xeēn ndoho de núu súcuan, chi tu cájetáhú de Yaā Dios, nájnūhun jeē tu ní jétáhú Caín. Te siquī jeē cácu ni de nihīn de xūhún te cástéén de jnūhun stáhú, nájnūhun ni sáha Balaam. Te jnahnū ndetū de nájnūhun Coré, tēe ni jihī siquī jeē ní cunihni ni de.

¹² Tēe yáha núu cándutútú de jíin ró jeē cáyeji manī rō, te cása ha de jniñu cúcanu rō. Chi cáyeji cájihī sīi ni de, te tu cása ha de cuenta ndese caji inga ñayuu, chi máni máá de ndíhví ni de caji vāha de. Te cácuu de nájnūhun vicō íchi jēē stehí táchī. Te suni cácuu de nájnūhun yujnu jeē tu jēhe ndehē maá tiempo. Te cácuu de nájnūhun yujnu jeē ní quenda nde jíin yoho, te tú cuiñi gā na modo nane numa.

¹³ Te nájnūhun jeē jisó cóyo ndute mar te cáne tiñū, súcuan jícu de jíin jniñu néé jēē cúu jnūhun canu. Te cácuu de nájnūhun quimi jeē ní sana ichi. Te je íyó túhva nuū néé nuū lúchi jnúú coyúcú de ní cáni.

¹⁴ Te jeē ní yāha iñū yucūn Adán, te ni cacu Enoc, te ni nacani de jnūhun jeē ní

steén Yaā Dios nuū de siquī tāca tée yáha, áchí de: Máá Jítóho yō ni steén yā nuū rī jeē ñin quivī te quiji ya jíin cuéhē mil ñayuu maá yá.

¹⁵ Te sándaā yā jniñu tāca ñáyuu, te snáhnú ndetū yā tāca ñáyuu casáha néé. Chi máni jniñu néé cásáha i siquī jeē canéé máá i, te cácahān i cuehē jnūhun ndevāha siquī yā. Ni achi Enoc.

¹⁶ Tāca tée yáha máni cácahān sōo de, te cácahān de siquī ñayuu. Te máni jeē cúsiñ ni maá de cánducú de. Te cácahān de jeē tée téyí cácuu de, te cácahān yíñúhún de jíin ñáyuu návāha nihīn de jecu nuū i.

Jeē stihví ni Judas ñayuu cácañdije

¹⁷ Te máá ró jíināhan ró ñánī mánī, na núcūhun ni rō jnūhun jeē jé ni canacani tēe cácuu apóstol maá Jítóho yō Jesucristo.

¹⁸ Chi ni cacahān de: Nde nuū cuándihí quivī te quijicoo tēe sácatā siquī jnūhun ndaā yā, te sáha de tācá jniñu néé jéē ndíyo ni maá de. Súcuan ni cacastūhún apóstol.

¹⁹ Tēe un cúu jeē casásín ñayuu. Te máni cándihví ni de tāca jéē cutíndí ni maá de, chi tu ndéé Espíritu yā jíin de.

²⁰ Te máá ró ñánī mánī, na íje vāha ni rō jíin jnūhun ndoo ndasí jéē cácañdije ró. Te cacān tahu rō jíin fuerza Espíritu Santo.

²¹ Te quendōo nihin ró jíin jnūhun jeē cundáhú ni Yaā Dios rohó. Te condetu ró quivī jeē cótecu rō ñí cáni sáha máá Jítóho yō Jesucristo siquī jeē cundáhú ni yā rohó.

²² Te sava ñayuu jeē cájeni siquí ni, nducú ró modo scandije ró i.

²³ Te sava ga i chi nducú ndéyí ró jeē cácu i nuū cuéchi i, jeē nájnūhun stáa ró i nuū ñuhún. Te cundáhú ni rō i jnama ró i, te coto ró máá ró, te cuquini ni rō coto ró nde sahma i jeē ní cujnéhén jíin jniñu néé cásáha i.

Jnūhun cújéhnu Yaā Dios ñí cáni

²⁴ Te Yaā Dios chi máñúhún-ni máá yá cúu Yaā ndichí, Yaā jnama yóhó. Te íyó poder yā jeē coto ya rohó jéē ma quivī ró cuéchi, jíin jéē sáha ya jeē cuíñi ró núu ndíndēe yá, te quivī ún coo ndoo ró núu yā, te cusíñ ndasí ni rō sáha ya.

²⁵ Te na cáhán yō jeē yóhoyo luu cújéhnu ya siquī jeē ni sáha ya jíin Jítóho yō Jesucristo. Te na cáhán yō jeē cújéhnu téyí yá, te ndácu

ya jniñu jíin poder jeē ndíso ya nde jenahán ndasí jíin ndé vijna jíin ndé ñí cáni. Súcuan na cóo. Amén.

JNIÑU QUIJI JEE NI JITO NDIJIN SAN JUAN

Jeē ni stéén Jesucristo tācá jniñu quiji

¹ Jnūhun yáha cúu jeē ní cachi Yaā Dios nuū Jesucristo ndese coo tācá jniñu quiji, návāha nacastūhun yá nuū ñáyuu cácadíje jeē cácuu i mozo yā. Te stéén yā nuū i tācá jniñu jeē yachī coo. Te ni tají yá ndajéhé yā ni quiji ya ni steén ndijin yā jniñu un núu ruhū Juan jeē cúu ri mozo yā.

² Te máá rí cástūhun ndāā rī siquī tāca jēē ní jito ri ún, te nacani ndāā rī jnūhun Yaā Dios jiín jnúhun jeē ní cahān ndāā Jesucristo.

³ Yōhyo ndetū ñayuu cahu tutu yáha, te suni yōhyo ndetū ñayuu cuni nahín jeē cáhu ñayuu tāca jnúhun yáha jeē ní cachi Yaā Dios, te chuhun ni i. Chi je cuacuyajni quivī coo tācá jniñu yósó núu tútu yáha.

Jeē téé Juan carta nuū ndihúxá grupo ñayuu cácadíje

⁴ Máá rí cúu Juan, te téé ri jnūhun yáha cuájeē nuū rohó, ndihúxá grupo ñayuu cácadíje jeē cáyūcu Asia. Te ñúhun ni rī jeē máá Yaā Dios na sáha ga yā jeē váha rōhó jíjnahan ró, te sáha ya jeē coo ndeyí coo sī ni rō. Chi máá yá cúu Yaā iyó vijna, te ni iyo ya ní cáni, te coo ya ní cáni. Te ñúhun ni rī jeē suni súcuan sáha ndihúxá Espíritu jeē cáhīn ya yuhu mesa nuū ndácu Yaā Dios jniñu.

⁵ Te ñúhun ni rī jeē suni súcuan sáha Jesucristo, Yaā cahán ndāā tāca jnúhun. Te xīhna gā maá yá ni natecu mēhñu ndíyí. Te cújehnu ya nuū tāca rey jeē iyó ñayiví. Te máá yá cúndáhú ni yā yohó, te ni nacate ya yohó núu cuéchi yó jíin níñi yā.

⁶ Te ni sáha ya jeē ní nduu yó rey jíin sūtū cácejniñu nuū Tatá yā Yaā Dios. Te na cáhán yō jeē yóhyo luu cújehnu ya te jñi ya poder ní cáni. Amén.

⁷ Cuni sōho jíjnahan ró, chi ndiji Cristo jíin vícō. Te ndivii ñayuu coto i nuū yā, te nde jíin ñáyuu jeē ní castújí i ya. Te tāca raza ñayuu ní cáhnu ñayiví ndahyū i jeē tu ní cácadíje i ya. Súcuan nahín coo.

⁸ Suhva cáhán maá Jítoho yō, Yaā jñi ndihí poder: Máá rí cúu nájnūhun letra A xīhna ñúhún jíin letra Z jeē sándihí na, chi máá rí ni squejéé ndihí te máá rí sínu, áchí máá Yaā iyó vijna, te ni iyo ya ní cáni, te coo ya ní cáni.

Jeē ní jito Juan jeē cújehnu luu Cristo

⁹ Máá rí cúu hermano rō Juan jíjnahan ró. Te inuú-ni ndóho ri jnūndóho jíin ró siquī jeē cácadíje yó Jesucristo, te inuú-ni ndácu Yaā Dios jniñu nuū yō, te inuú-ni jéndeyí ni yō sáha Jesucristo. Te siquī jeē ní nacani ri jnūhun Yaā Dios jíin jēē ní cachi ndāā rī jnūhun Jesucristo, jeē yúcuan ní cajñi i ruhū cuenta preso, te ni cachune i ruhū isla jeē naní Patmos.

¹⁰ Te ñn domingo ni jito ndijin rī jeē ni stéén maá Espíritu Santo nuū rī. Te ni jini sōho ri ñn jeē cána jee níhin ichi yátá rī nájnūhun jeē tívi trompeta.

¹¹ Te ni cahān jíin rí:

Máá rí cúu nájnūhun letra A xīhna ñúhún jíin letra Z jeē sándihí na, chi máá rí cúu Yaā iyó ndé xīhna ñúhún te coo ri ní cáni. Te na téé ró núu ñn tutu tāca jēē cóto ró, te tají ró quihīn nuū ndihúxá grupo ñayuu cácadíje jeē cáyūcú i ní cáhnu Asia, suu ini ñuu Efeso, jíin ñuu Esmirna, Pérgamo, Tiatira, Sardis, Filadelfia, jíin Laodicea. Achí.

¹² Yūcuán na te ni ndicó cóto ri jeē cóto ri ndé ñn cúu jeē cahán jíin rí. Te ná ni ndicó cóto ri te ni jito ri uxā candelero oro.

¹³ Te mēhñú ndihúxá candelero un índichi máá Yaā ní nduu téé. Te ñúhun ya ñn sahma cáni jeē jinú nde nuū jehé yā. Te núhni ñn cinturón oro jicā yā.

¹⁴ Te ixi xíní yā chi yaa nájnūhun ixi lánchi, nájnūhun yuhvā volcán. Te tinūu ya ndíndēe nájnūhun yáñuhūn.

¹⁵ Te jehé yā xíñú jíto nájnūhun cāa cuaán jēē ni ndúhvā nuū horno. Te níhin ndasí cáhán yā, nájnūhun níhin cuehē yūte náhnu.

¹⁶ Te ndaváha ya jñi ya uxā quimi. Te yuhu ya quenda jeē cāa nájnūhun espada jeē xeén ndíndúú lado, te suu cúu jnūhun ya jeē niní sándaā yā siquī cuéchi. Te nuū yā cāa nájnūhun niándii jeē nándii ndaxín.

¹⁷ Te ná ni jito ri yā te ni cotúú rí nuū jehé yā nájnūhun jeē ní jíhī rī. Te ni soó yá ndaváha ya siquī rī, te ni cahān yā:

Ma yūhu ró. Máá rí cúu Yaā iyó ndé xīhna ñúhún te coo ri ní cáni.

¹⁸ Te Yaā técu cúu ri. Chi ni jihī rī te ni natecu rī, te vijna chi técu rī ní cáni. Te máá rí jnī poder síquī cuéhyī jéhni ñayuu jíin síquī lugar nuū cáyūcu ánuá ndīyī.

¹⁹ Núu súcuan te tee ró núu tútu tāca jéē ní jito ró, jeē cúu vijna jíin jéē cóo ichi núu.

²⁰ Te yāha cúu jnūhun sāhi síquī ndihúxá quīmi ní jito ró jnī ndaváha ri, jíin síquī ndihúxá candelero oro. Ndhúxá quīmi ún cúu nájnūhun ndihúxá jeē cácujeñu nuū ndihúxá grupo ñayuu cácujeñe. Te ndihúxá candelero cúu nájnūhun ndihúxá grupo ñayuu cácujeñe.

Jnūhun cuahān nuū ndihúxá grupo ñayuu cacandíje:

Jnūhun cuahān ñuu Efeso

2

¹ Tee ró jnūhun yáha na quíhín nuū jeē cujeñu nuū ñayuu cácujeñe ñuu Efeso: Súcuan cáhán ruhū, Yaā jeē jnī ndihúxá quīmi jíin ndaváha ri, te jíca cuu ri mēhñu ndihúxá candelero oro.

² Je jíin rī tācá jniñu váha cásáha ró, jeē cándihvī ní rō síquī jnūhun ri, jíin jéē cájendeyí ní rō. Te jíin rī jeē tu cájeñe ró jnūhun quívicoo ñayuu casáha néé méhñu ró. Te jíin rī jeē ní cajito ndee rō tēe cástáhú jeē cácahān de jeē cúu de apóstol, te ní cajini rō jeē tēe stáhú cácuu de.

³ Te ní cajendeyí ní rō ní candoho ró jnúndóho, te tu ní ndínuu ní rō jeē cácuu ndasí ró jíin jniñu ri.

⁴ Te vésú súcuan te íyó jecu jeē cahán rī nuū rō, chi tuá cáhīyo manī vāha ró jíin rī nájnūhun ní íyo manī rō jíin rí quívī jehé.

⁵ Núu súcuan te nucūhun ní rō ndese ní castóo ró jnūhun jeē ní íyo manī rō jíin rí, te nacani ní rō, te na sáha ró nájnūhun ní casáha ró ndé quívī ún. Te núu ma nacani ní rō, te yachī jeē rī te stáa ri candelero rō nuū ín, cúu jeē ma cuíñi ga rō jíin ñayuu cácujeñe.

⁶ Te vésú súcuan te íyó ñin jeē váha cásáha ró, chi tu cánujnahan cuíñi ní rō cájito ró jniñu néé cásáha ñayuu cándiquīn jnūhun jeē steén Nicolás. Te suni máá rí tu nújnahan cuíñi ní rī jito ri.

⁷ Ñayuu iyó sóho na chúsóhó i jeē cahán maá Espíritu Santo jíin táca grupo ñayuu cácujeñe. Tāca ñayuu jeē cúndeyí síquī jeneé, cuāha ri jnūhun caji i ndehē jeē cúun xinī yújnu jeē sáha jeē cótecu i ní cáni. Te yujnu un ín nuū jardín Yaā Dios nde andiví, áchí yá.

Jnūhun cuahān ñuu Esmirna

⁸ Te tee ró jnūhun yáha na quíhín nuū jeē cujeñu nuū ñayuu cácujeñe ñuu Esmirna: Súcuan cáhán ruhū, Yaā jeē iyó ndé xīhna ñúhún te coo ri ní cáni, te ní jihī rī te ni natecu rī.

⁹ Je jíin rī tācá jniñu váha cásáha ró, jíin jnúndóho cándoho ró, jíin jéē cándoho ndáhú ró. Te vésú súcuan te cúcá ró ndihī jeē ndíso jnūhun ri. Te jíin rī jeē cácahān neé ñayuu síquī rō jijnáhan ró. Ñayuu un cácahān i jeē ñayuu hebreo, ñayuu maá Yaā Dios cácuu i, te tuú chi cástáhú-ni i, chi sa ñayuu yñi ndaha Satanás cácuu i.

¹⁰ Te ma yūhú cuíñi rō tāca jéē ndoho ró. Chi jexeén je yajni sáha jeē quívicoo sava ró vecāa jeē cóto ndee rohó jijnáhan ró, te ndoho ró jnúndóho uxī quívī. Te na cuíñi nihin ró ndé cuu rō, te cuāha ri premio jeē cótecu rō ní cáni.

¹¹ Ñayuu iyó sóho na chúsóhó i jeē cahán maá Espíritu Santo jíin táca grupo ñayuu cácujeñe. Tāca ñayuu jeē cúndeyí síquī jeneé, ma nihín i jnúndóho jeē jnahnú ndetū i cuu i vuelta uū, achí yá.

Jnūhun cuahān ñuu Pérgamo

¹² Te tee ró jnūhun yáha na quíhín nuū jeē cujeñu nuū ñayuu cácujeñe ñuu Pérgamo: Súcuan cáhán ruhū, Yaā jeē névāha espada jeē xeén ndíndúú lado, te suu cúu jnūhun ri jeē sándaā rī síquī cuéchi.

¹³ Je jíin rī tācá jniñu váha cásáha ró, te jíin rī jeē cáyūcu ró méhñu ñayuu jeē ndácu Satanás jniñu nuū. Te vésú súcuan te cáhīn nihin ró jíin jnūhun ri, te tu ní cányūhu ró jeē cácujeñe ró ruhū, ní quívī ní jihī Antipas, tēe ní squícu vāha ní nacani ndaā jnūhun ri. Chi ñuu rō cáyūcu ñayuu cájeñiñu nuū Satanás, te ní cajehni i Antipas.

¹⁴ Te vésú súcuan te íyó jecu jeē cahán rī nuū rō jijnáhan ró. Chi méhñu róhó ñayuu ñuu Pérgamo iyó sava ñayuu cándiquīn jnūhun ní steén Balaam. Chi tēe un ní steén

de nuū Balac ndese squívi de ñayuu Israel cuēchi jeē cáji i jeē ni sócō nuū ídolo jíin jéē cosíquí ndéē jnáhan i.

¹⁵ Te suni íyó sava ñayuu mēhñu ró jeē cá candíje ga i jnūhun ni steén Nicolás, te jnūhun ún chi tu nújnahan cuíti ni rī.

¹⁶ Núu súcuan te nacani ni rō síquī cuéchi ró. Chi núu tuú te yachī jeē rī jíin espada jeē quénda yuhu rī, te suu cúu jnūhun rī jeē sándaā rī síquī cuéchi. Te jíin yúcuan te stóho rī ñayuu jeē candíje ga jnūhun néé un.

¹⁷ Ñayuu iyó sóho na chúsóhó i jnūhun jeē cahán maá Espíritu Santo jíin táca grupo ñayuu cá candíje. Tāca ñáyuu jeē cúndeyí síquī jeneé, scáji rī i maná jeē yísahí ichi ándívi. Te suni cuāha rī ñn yuū cuijín núu i, te nuū ún condee ñn síhví jéé, te ni ñn ñayuu ma cúní síhví un, chi máá-ni i jeē nihín. Achí yá.

Jnūhun cuahān ñuu Tiatira

¹⁸ Te tee ró jnúhun yáha na quíhín nuū jeē cujéhnū nuū ñáyuu cá candíje ñuu Tiatira: Súcuan cáhán ruhū, maá Séhe Yaā Dios jeē ndíndēe tñūu rí nájnūhun yáñuhūn. Te jehē rī xíñú jíto nájnūhun cāa cuaán jéē ni ndúhvā.

¹⁹ Je jíin rī tācá jniñu váha cásáha ró, chi cá cundáhú ni rō jnáhan ró, te cá candíje níhin ró ruhū, te cá jeníñu ró núu rī, te cá jendeyí ni rō. Te jíin rī jeē vihyá gā cásáha ró vijna vēsú nde quívi jehé.

²⁰ Te vēsú súcuan te íyó jecu jeē cahán rī nuū rō. Chi íyó ñn ñahan mēhñu ró jéē naní Jezabel, te cá jēhe ró jnúhun steén ña nuū rō. Te áchí ña jeē nácani ña jnūhun Yaā Dios. Te tuú chi jíin jnúhun steén ña te stáhú ña ñayuu cá candíje jeē cácuu i mozo rī. Te sáha ña jeē casíquí ndéē jnáhan i, jíin jéē cáyeji i jeē ni sócō nuū ídolo.

²¹ Te ni jēhe rī tiempo jeē na nácani ni ña, te tu cúní ña nacani ni ña stóo ña jeē casíquí ndéē ña.

²² Núu súcuan te na sáha rī jeē jécāva ña jíin cuéhyī. Te tāca ñáyuu casíquí ndéē jíin ña, suni cuāha rī jnūndóho xeēn nuū i, te núu ma nácani ni i stóo i jniñu néé nájnūhun sáha ña.

²³ Te sáha rī jeē cúu ñayuu jeē ni scándíje ña. Te súcuan cuni tāca grupo ñayuu cá candíje jeē maá rí cúu Yaā jíin ndíhi ndese

cáa jeē níjnūnī jíin ánuá ñayuu. Te cuāha rī yāhu ñn ñn ró núu ndese ni casáha ró.

²⁴ Te sava ga rō jeē cá yūcú ñuu Tiatira, jeē tu ní cá jetáhú jnūhun steén ñahan ún, ni tu ní cá jniñu ró jnúhun jeē cá cahán i jeē jnūhun sáhi gá Satanás cúu, jíin máá ró cahán rī jeē ma téé ga rī ñnga jniñu síquī rō.

²⁵ Chi máá-ni jeē na quéndōo níhin ró jíin jnúhun ndaā cá candíje ró, te quéndōo níhin ró jíin ndé quívi ndíji rī.

²⁶ Tāca ñáyuu jeē cúndeyí síquī jeneé, jíin jéē squícu váha jniñu cúní rī nde vijna te nde quívi sándíhí, sáha rī jeē cujéhnū i ndacu i jniñu nuū tācá nación,

²⁷ nájnūhun ni sáha Tátá rī jeē cujéhnū rī ndacu rī jniñu. Te ndacu níhin i jniñu nuū tācá nación. Te nájnūhun cúnun yúú i quísi tahú, súcuan squéhichí i ñayuu tu cá jendetū nuū rī.

²⁸ Te sáha rī jeē coto i ruhū jeē luu cujéhnū rī quenda ndíjin rī, nájnūhun jíto i lucero jeē cáne cúndíjin.

²⁹ Ñayuu iyó sóho na chúsóhó i jnūhun jeē cahán maá Espíritu Santo jíin táca grupo ñayuu cá candíje. Achí yá.

Jnūhun cuahān ñuu Sardis

3

¹ Te tee ró jnúhun yáha na quíhín nuū jeē cujéhnū nuū ñáyuu cá candíje ñuu Sardis: Súcuan cáhán ruhū, maá Yaā jeē névāha ndihúxá Espíritu Yaā Dios jíin ndihúxá quími. Je jíin rī tācá jniñu cásáha ró, te cá cahán ñayuu jeē cátecu rō, te nuū rī chí nájnūhun ndíyi cácuu ró.

² Na nátañu ni rō, te ndejéé níhin ró jíin jniñu jeē jecu na iyó te ndúcú naa. Chi je jíin rī jeē tu squícu váha váha ró núu Yaā Dios.

³ Te na núcūhun ni rō tāca jnúhun jeē ní castéén nuū rō. Te cuatáhú ró jnúhun ún te nacani ni rō síquī cuéchi ró. Chi núu tú natañu ni rō, te cuajeē rī nuū rō ñn sanaa-ni nájnūhun jeē ñn sanaa-ni te quíji ñacuíhna, te ma cúní rō na hora jinū rī nuū rō.

⁴ Te vēsú súcuan te íyó nahín jecu rō ñuu Sardis jeē tu ní cásáha ró cuéchi, jeē cúu nájnūhun jeē tu ní sájnehén ró sahma ró. Jeē yúcuan cuíjín yaa coo sahma ró caca ró jíin rí, chí ñayuu váha cácuu ró.

⁵ Chi tāca ñáyuu jeē cúndehyí síquī jeneé, cuāha ri sahma cuijín yaa cuhun i. Te ma ndáhva rī síhví i nuū libro jeē yosó síhví ñáyuu cotecu ní cáni. Te cuajnúhún rí i nuū Tatá rī jíin núu tāca ndajéhé yā.

⁶ Ñayuu iyó sóho na chúsóhó i jnúhun jeē cahán maá Espíritu Santo jíin táca grupo ñayuu cácanđije. Achí yá.

Jnúhun cuahān ñuu Filadelfia

⁷ Te tee ró jnúhun yáha na quíhín nuū jeē cujéhnú nuū ñáyuu cácanđije ñuu Filadelfia: Súcuán cáhán ruhū, Yaā ndoo Yaā ndaā, te névāha ri ndacáa rey David. Te máá rí núne jeē quíví ñayuu nuū ndácu ri jniñu, te ni ñn ma cúu casi, te máá rí jési, te ni ñn ma cúu nune.

⁸ Je jíin rī tāca jniñu váha cásáha ró. Te ni nune ri nájnúhun ñn yéhyí quívícoo ró, te ni ñn ma cúu casi. Chi vésú jecu-ni fuerza rō iyó, te ni cacandíje ró jnúhun ri, te tu cájesi rō yuhu ró jéē cácanđije ró rúhū.

⁹ Te iyó sava ñayuu yíhi ndaha Satanás, te cácahān i jeē ñáyuu hebreo, jíin ñáyuu maá Yaā Dios cácuu i, te tuú chi cástáhú-ni i. Núu súcuán te sáha ri jeē jécoo i nuū rō te jecuñi yití i nuū rō, te cuni i jeē maní rī jíin ró.

¹⁰ Te vāha ni casquícu ró jnúhun ní cahān rī jeē cuándeyí ni rō. Te jeē yúcuán jnama ri rohó quíví jeē quíji ñn jnúndóho xeēn síquī ñáyuu ní cáhnu ñayíví, jéē cóto ndee ún i jíjnáhan i.

¹¹ Te yachí ndiji ri. Núu súcuán te quendōo níhin ró jíin jnúhun cácanđije ró, návāha ni ñn ma quénde premio rō.

¹² Tāca ñáyuu jeē cúndehyí síquī jeneé, sáha ri jeē cuu i nájnúhun síhín yuū luu ini templo Yaā Dios maá rí. Te ma cújiyo i nuū ndeé yá un. Te tee ri síhví Yaā Dios maá rí jneē i, jíin síhví jéé máá rí, jíin síhví ñuu Yaā Dios maá rí. Te ñuu un cúu Jerusalén jeé, te cuun quíji ichi ándiví ndé nuū Yaā Dios maá rí.

¹³ Ñayuu iyó sóho na chúsóhó i jnúhun jeē cahán maá Espíritu Santo jíin táca grupo ñayuu cácanđije. Achí yá.

Jnúhun cuahān ñuu Laodicea

¹⁴ Te tee ró jnúhun yáha na quíhín nuū jeē cujéhnú nuū ñáyuu cácanđije ñuu Laodicea: Súcuán cáhán ruhū, maá Yaā cúu jnúhun ndaā, Yaā cúu testigo vāha jeē cahán ndaā.

Te máá rí ni sáha ndíhi jeē ni cáhān Yaā Dios jeē na jécōo.

¹⁵ Je jíin rī tāca jniñu cásáha ró. Te cácuu ró nájnúhun jeē tú míjin ni tú jihní, cúu jeē jecu-ni cácanđije ró jnúhun ri, te ni tu cájito uhū rō ni tu cándihví ni rō síquī. Te nacā jeē váha núu jeē míjin ró chí jéē jihní ró nuú.

¹⁶ Te tuú chi máá yívíxí-ni ró, chí ni tu cájito uhū rō ni tu cándihví ni rō síquī. Te jeē yúcuán squéhichí rī rohó nájnúhun ñn jeē tésíhi rí jeē séyūhu rí jeē tu nújnahan ni rī.

¹⁷ Te cácahān rō jeē cucá ró, te quendōo vāha ró, te tu cúmaní ni ñn nuū rō. Te tu cásáha ró cuenta jeē cuécá íi cándoho ró, te ndáhú ndasí ró, te cácuáá ró, te máá ñn lí rō. Te tāca jéé yáha cúní cahān jeē tu cácanđije vāha ró.

¹⁸ Núu súcuán te cáhán rī jíin ró jeē nuū rī cuaan ró oro jeē ni ndúhvā nuū ñuhún te ni nduu máá nene, te suu cúu jeē sáha ri jeē coo cúca ndije ró ndíhi jeē ndíso jnúhun ri. Te nuū rī cuaan ró sahma cuijín cuhun ró, návāha tú cucanu rō jeē maá ñn lí rō, cúu jeē quendōo ndaā rō sáha ri. Te cuaan ró tájnā nuū rī, quíví tinūu ró, návāha ndundi-jin tinūu ró, cúu jeē jecúhun ni rō jnúhun ri.

¹⁹ Tāca ñáyuu jeē cundáhú ni rī, chí cáhán rī nuū i te stóho ri i, návāha na chúhun ni i. Núu súcuán te na cóndihví ni rō jíjnáhan ró, te nacani ni rō jeē stóo ró cuéchi ró.

²⁰ Cuni sóho, chí ín ri yehyí ánuá rō te cáhán rī. Te núu ndé-ni rohó cuni sóho te nune ró yéhyí ánuá rō, te quíví ri caji rī staā jíin ró, te suni caji maá ró jíin rí. Te suu cúu jeē cóndee rī anuá rō.

²¹ Tāca ñáyuu jeē cúndehyí síquī jeneé, cuāha ri jnúhun conene i jíin rí nuū mesa nuū ndácu ri jniñu. Chi máá rí suni ni snáā rī poder jeneé, te ni cucōo ri jíin Tatá rī nuū mesa nuū ndácu ya jniñu.

²² Ñayuu iyó sóho na chúsóhó i jnúhun jeē cahán maá Espíritu Santo jíin táca grupo ñayuu cácanđije. Achí yá.

Tāca jéé cáyūcú andiví cáchiñúhún núu yā

4

¹ Yúcuán na te ni ndacoto ri, te ni jito ri jeē núne ñn yéhyí andiví, te máá Yaā jeē ni cáhán jíin rí jeē xíhna ñuhún, ni cahān

tucu jíin rí nájnūhun jeē tívi trompeta. Te ni cahān:

Caa quiji ró yáha, te na stéén rī nuū rō tācá jniñu jeē cóo ichi núú gā, achí yá.

² Te máá Espíritu Santo ni scóto-ni ya ruhū. Te ni jito ri jeē andiví íin ñn mesa nuū ndácu jniñu, te néne máá yá nuū mesa un.

³ Te máá yá jeē néne yūcuan cáa ya nájnūhun ndíndēé ñn yuū quiyi ndíi chí ñn yuū cuehé ndíi. Te ñn ticō vēhnde ní jicó ndúū yuhu mesa yā, te ndíndēe nájnūhun ñn yuū cuíi ndíi.

⁴ Te xiin mesa yā ni jito ri jeē ní jicó ndúū ocō cuñ gā mesa nuū ndácu jniñu. Te nuū mesa un néne ocō cuñ tēe jéhu cándiso jniñu. Te cáñuhun de sahna cuijín yaa, te xinī de cáñuhun corona oro.

⁵ Te nde nuū mesa nuū ndácu ya jniñu ndíndēé taja te ññin te cáhán taja. Te ichi núú mesa yā íin ndihúxá Espíritu Yaā Dios, jeē cáa nájnūhun uxā yiti náhnu jeē cayú ñuhūn.

⁶ Te ichi núú mesa yā ún suni íyó nájnūhun ñn mar jeē jito quiyi nájnūhun vidrio.

Te xiin mesa yā un ní jicó ndúū cuñ jeē técu. Te íyó cuéhē tinūu ní cáhnu ichi núú jíin ichi yátá un.

⁷ Te ñn jeē técu un cáa nájnūhun ndicaha. Te inga cáa nájnūhun stiquī. Te jeē uní chi néne nuū tēe. Te jeē cuñ chi cáa nájnūhun yaha chócó jéé jicó núú tachí.

⁸ Te ndicúún jeē técu un íyó íñū ndijēn jeē ñn ñn. Te máni máá tinūu cúu ní cáhnu nde jíin ní chíji ndijēn. Te nduú ñuú tu jécuiñi cuíti jeē cahán:

Yaā íi Yaā ndoo ndasí
cúu máá Jítoho yō Yaā Dios, Yaā jniñi ndihí
poder,

Yaā iyó vijna, te ni íyo yá ní cáni, te coo ya
ní cáni.

Achí.

⁹ Chi máni jeē cácahān ndicúún un jéé cujéhu ndasí máá Yaā jeē néne nuū mesa, Yaā jeē técu ní cáni cuíti. Te yíñuhún cácahān un jíin yá, te nácuatáhú núú yā.

¹⁰ Te tāca jínu jeē casáha súcuan, te ndihócó cuñ tēe jéhu cándiso jniñu, cájecuiñi yiti de nuū Yaā jeē técu ní cáni cuíti, cáchiñuhún de ya. Te cástaa de corona

de, cájequin de ichi núú jehé mesa yā. Te cácahān de:

¹¹ Jítoho ná te Yaā Dios na cúu ní.
Te vāha ndasí Yaā cúu ní jéé cácahān i jeē luu
cújéhu ní,

te cáhíyo yíñuhún i nuū ní, te jniñi ní ndihí
poder.

Chi máá ní ni sáha ndihí jeē iyó,
te siquī jeē súcuan ni cuu ní máá ní te ni
jecōo ndihí.

Achí de jíjnahan de.

Jeē ní nune Londe Yaā Dios tutu

5

¹ Yūcuán na te ni jito ri jeē Yaā néne mesa jeē ndácu jniñu, ndaváha ya jniñi ya ñn tutu cáni jeē ní tuu. Te yósó jnūhun ndíndúú lado tutu ún, te ndíhyú jíin úxā sello.

² Te ni jito ri ñn ndajéhé yā jeē ndiso poder, te ni cahān jee:

¿Ndé ñn cúu tēe vāha ndasí jeē cóndiso jniñu cahnde sello te nune tutu yáha? achí ndajéhé yā.

³ Te ni andiví ni ñayiví ni jeē iyó chíji ñayiví, tu ní íyo ni ñn jeē cóndiso jniñu nune tutu ún, ni jeē cóto nuū.

⁴ Te ni ndahyū ndasí rí, chi tu ní íyo ni ñn jeē cóndiso jniñu nune te cahu tutu ún, ni jeē cóto nuū.

⁵ Yūcuán na te ni cahān ñn tēe jéhu un jíin rí:

Ma ndahyú rō, chi íyó ñn Yaā ndiso jniñu jeē cahnde yā ndihúxá sello ndihyú tutu, te nune ya. Te máá yá chí íyó cuéhé poder yā, nájnūhun jeē iyó cuéhé fuerza ñn ndicaha. Te ni cacu ya chíji yucūn Judá, jeē cúu yucūn rey David. Te ni snáa yā poder tāca jéneé.

⁶ Yūcuán na te ni jito ri Yaā jeē cúu Londe Yaā Dios jeē ní cajehni i te ni natecu. Te Londe un íin ya nuū íin mesa Yaā Dios, mēhñú ndicúún jeē técu, jíin tēe jéhu cándiso jniñu. Te íyó úxā ndiqui jíin úxā tinūú Londe ún. Te tinūú un cúu ndihúxá Espíritu Yaā Dios jeē ní tají yá ni jengoo ní cáhnu ñayiví.

⁷ Te Londe un ní jequihin ya tutu jeē jniñi ndaváha Yaā jeē néne nuū mesa.

⁸ Te ná ni quihin ya tutu ún, te ndicúún jeē técu jíin ndihócó cuñ tēe jéhu cándiso jniñu, ni cajecuiñi yiti núú yā. Te ná ñn ná

in tē jēhnu un cándaha yaa jeē naní arpa, jíin cóhō cūu oro jeē ñúhun chitú súje cutú. Te sūje cutú un cūu máá táca jnúhun jeē cájicān tahú ñayuu yíhi ndaha Yaā Dios.

⁹ Te ni cajita de in yaa jeé, te suhva cáhán: Vāha ndasí Yaā cūu ní jēē quihin ní tutu te cahnde ni sello jeē ndihyú.

Chi ni cajehni i níhín, te jíin nāñī ni ní nacuaan ní ñayuu mēhñu táca raza, tācá yuhu, tācá ñuu, tācá nació, nāvāha cuu i ñayuu Yaā Dios.

¹⁰ Te ni sáha ní jēē cuu i rey jíin sūtū nuū Yaā Dios,

te ndacu i jniñu ini ñayīví. Achí de cájita de.

¹¹ Te ni jito ga rī, te ni jini sōho ri jeē cácahān cuehē ndajéhé yā jeē ní cajicó ndúū xiin mesa yā, jíin xiin ndicúun jeē técu, jíin xiin tē jēhnu cándiso jniñu. Te iyó cuéhē ndasí millón ndajéhé un.

¹² Te suhva ni cacahān jee ya: Vāha ndasí Yaā cūu Londe jeē ní cajehni i. Te jeē yúcuan jnī ya poder, te yōhyo cúcá yá, te yōhyo ndíchí yá, te ndíso ya cuehē fuerza, te cáhīyo yíñúhún ndihí nuū yā, te luu cújéhnu ya, te cácahān i jeē váha ndasí Yaā cūu ya. Achí.

¹³ Te suni ni jini sōho ri jeē cácahān ndihí jeē ni sáha Yaā Dios jeē iyó ini andiví jíin ini ñayīví jíin chíji ñayīví jíin ini mar. Te ndivii un ní cacahān:

Cúsī ni yō cáhán yō jeē yóhyo vāha Yaā cūu máá Yaā néne mesa nuū ndácu ya jniñu,

jíin Yaā cūu Londe Yaā Dios. Te na cóo yíñúhún yó núu yā, chí cújéhnu luu ya,

te jnī ya poder ní cáni cuiti. Achí.

¹⁴ Te ni cacahān ndicúun jeē técu: Súcuan na cóo, achí.

Te ndihócó cuūn tē jēhnu cándiso jniñu ni cajecuiñī yití de, te ni cachiñúhún de nuū Yaā jeē técu ní cáni cuiti.

Siquī ndihúxá sello

6

¹ Yūcuán na te ni jito ri jeē Yaā cūu Londe Yaā Dios, ni jehnde yā in jeē uxá sello

un. Te ni jini sōho ri jeē cáhán in jnáhan ndicúun jeē técu ún, nájñuhun cáhán taja:

Nehen te cuni rō.

² Te ni ndacoto ri, te ni jito ri in caballo cuijín. Te jeē yosó síquī tī un ndáhá in arco jeē stáva nduva. Te ni jecūhun in corona xinī. Te ni quenda ni jejnáhan, te ni cundeyí síquī ndihí.

³ Yūcuán na te Londe un ní jehnde yā sello uū. Te ni jini sōho ri jeē cáhán inga jnáhan ndicúun jeē técu:

Nehen te cuni rō.

⁴ Te ni quenda in caballo cuehé, te jeē yosó síquī tī ndíso jniñu jeē snāá jnúhun cáyūcu mánī ñayuu ñayīví, te quejéé i cahni jnáhan i. Te ni nihín ún in espada cáhnu.

⁵ Yūcuán na te Londe un ní jehnde yā sello unī. Te ni jini sōho ri jeē cáhán inga jnáhan ndicúun jeē técu:

Nehen te cuni rō.

Te ni ndacoto ri, te ni jito ri in caballo jnuú. Te jeē yosó síquī tī ndáhá in balanza jeē chícuāha, chí coo jnamā xeén.

⁶ Te mēhñú ndicúun jeē técu un ní jini sōho ri in jeē cáhán:

Máá in kilo-ni trigo nihín i jíin yáhu i jeē sájniñu i in quiví. Te núu cebada, te unī-ni kilo nihín i jíin yáhu i jeē sájniñu i in quiví. Te aceite jíin vino chí ma sáha ró jēé cúmanī. Achí.

⁷ Yūcuán na te Londe un ní jehnde yā sello cuūn. Te ni jini sōho ri jeē cáhán tucu inga jnáhan ndicúun jeē técu:

Nehen te cuni rō.

⁸ Te ni ndacoto ri, te ni jito ri in caballo cuaán yaa, te jeē yosó síquī tī cūu máá cuéhyī jéhni ñayuu. Te ichi yátá un ndíquín máá jnúhun jeē quiví ñayuu lugar nuū cáyūcu ánuá ndīyí. Te ndindúú un cándiso jniñu jeē ndóna síquī in jeē ndicúun parte ñayīví, te cuu sáha jeē cūu ñayuu jíin guerra, jíin jnámā, jíin cuéhyī xeén, jíin táca quití xeén jeē iyó ñayīví.

⁹ Yūcuán na te Londe un ní jehnde yā sello uhūn. Te chíji altar cáhnu ni jito ri anuá ñayuu jeē ní cacandíje jnúhun Yaā Dios te ni canacani ndaā i jnúhun ya, te síquī yūcuan ní cajehni ñayuu i.

¹⁰ Te ni cacana jee ánuá un:

Jitoho ná Yaā Dios, maá ní cūu Yaā ndoo te vāha squícu ní jēé ni jéjnūhun ní. ¿Te

nasaa ga tiempo coo te sándaā ni jéhē ná, te nacuaaha ní jéē ndútahū ñayuu ñayiví jéē ní cajehni sañá? áchí.

¹¹ Yūcuán na te ni jēhe ya sahma cuijín cuhun i jínáhan i, te ni cahān yā jín i jeē na ndétātú i jecu gā tiempo. Chi iyó gá hermano i jeē cájejniñu nuū yā, jeē suni jini ñúhún cuu i návāha jīnu número i, áchí yá.

¹² Yūcuán na te Londe un ní jehnde yā sello iñū. Te ni jito ri jeē ni jnáa ndasí. Te ni cujnúú níandii nájnūhun ñn sahma jnúú. Te ñí yóō ni nduu nájnūhun ññí.

¹³ Te quimi andiví ní ñingoyo nuū ñúhun nájnūhun ñingoyo ndehē yíhí yujnu higo sáha tachí ñihin.

¹⁴ Te andiví ní cujiyo cuahān nájnūhun jeē nátuu ñn tutu cáhnu. Te táca yucu jín táca isla ni cujiyo cuangoo inga lado.

¹⁵ Te táca rey ñayiví, jín jéē cácujeñu, jín jéē cucá, jín táca capitán, jín jéē cándiso poder, jín mozo jeē ní cajeen ñayuu, jín téé cásajniñu cuenta maá, ní cachisāhi maá ini yaū cava jín méhñu cava chíji yucu.

¹⁶ Te ni cacahān i jín yucu jín cava:

Ndicó cáva siquī rī, na quisāhi rí návāha tú coto maá Yaā néne mesa ndácu jniñu, jín Yaā cúu Londe jeē cuáha ya castigo xeēn ruhū.

¹⁷ Chi ni quee maá quiví cáhnu jeē cuáha ya castigo, ¿te ndé ñn canda condichi nuū yā? achí i jínáhan i.

Ñayuu táca yúcūn Israel jeē ní jécondee sello jneē

7

¹ Te ná ni cuu jniñu yáha, te ni jito ri cuūn ndajéhé yā jeē cáhīn ndicúún lado ñayiví. Te cájesi yā nuū ndicúún tachí, návāha ma quee nuū ñúhun ni nuū mar ni nuū ní ñn yujnu.

² Te suni ni jito ri inga ndajéhé yā, vēji ichi núū cáne niāndii. Te ndáhá yá sello Yaā Dios, Yaā técu. Te ni cahān jee ya jín ndicúún ndajéhé un jéē ndíso jniñu jeē sáha daño nuū ñúhun íchi jín núū mar:

³ Ma sáha ró daño nuū ñúhun ni nuū táca yujnu ni nuū mar, chí nde na téé yó sello jneē táca ñayuu cájejniñu nuū Yaā Dios yō.

⁴ Te ni jini sōho ri jeē achí jéē iyó ciento uū xico cuūn mil ñayuu jeē ní jécondee sello

jneē. Te ñayuu un cácuu táca yúcūn ñayuu Israel.

⁵ Te iyó úxī uū mil ñayuu cácuu yúcūn Judá jeē ní jécondee sello, jín úxī uū mil yúcūn Rubén, jín úxī uū mil yúcūn Gad,

⁶ jín úxī uū mil yúcūn Aser, jín úxī uū mil yúcūn Neftalí, jín úxī uū mil yúcūn Manasés,

⁷ jín úxī uū mil yúcūn Simeón, jín úxī uū mil yúcūn Leví, jín úxī uū mil yúcūn Isacar,

⁸ jín úxī uū mil yúcūn Zabulón, jín úxī uū mil yúcūn José, jín úxī uū mil yúcūn Benjamín. Ndihi yúcūn yáha cúu jeē ní jécondee sello.

Ñayuu cuehē jeē cáñuhun sahma cuijín

⁹ Te ná ni cuu jniñu yáha te ni ndacoto ri, te ni jito ri cuehē ndasí ñayuu. Te cúu i ñayuu táca nación jín táca raza jín táca yuhu jín táca ñuu. Te cáhīn i nuū mesa nuū ndácu Yaā Dios jniñu jín núū maá Yaā cúu Londe. Te siquī jeē cuehé ndasí i, te ni ñn ma cúu cahu nasaa i cúu. Te cáñuhun i sahma cuijín, te cándahá i ñuū.

¹⁰ Te ni cacana jee i:

Yaā Dios maá yó cúu jeē ní jnama yóhó, Yaā jeē néne nuū mesa jeē ndácu jniñu, jín Yaā cúu Londe Yaā Dios. Achí i jínáhan i.

¹¹ Te ndihi ndajéhé ni cajicó ndúū yā cáhīn ya xiin mesa Yaā Dios, jín xiin téé jéñu cándiso jniñu, jín xiin ndicúún jeē técu. Te ni cajecuiñí yití yá ni cachiñúhún yá Yaā Dios ichi núū mesa yā.

¹² Te ni cacahān yā:

Amén. Cúsī ni yō cahán yō jeē yóhyo vāha Yaā cúu Yaā Dios maá yó.

Te luu cújéñu ya te ndíchí yá.

Te na nácuatáhú yó nuū yā, te na cóo yíñúhún yó núū yā.

Chi jñí ya poder, te ndíso ya cuehē fuerza jeē ñí cáni cuiti. Amén.

Achí táca ndajéhé yā.

¹³ Yūcuán na te ni cahān ñn téé jéñu un jín rí:

¿Nde ñayuu cúu yáha jéē cáñuhun sahma cuijín, te ndé chí véjicoo i?

¹⁴ Te ni cahān rī jín de:

Maá ní cúu jeē jiní, Tátā.

Te ni cahān de jín rí:

Yāha cácuu ñayuu jeē ní cayāha i jeē ní cajito i jñundóho xeēn. Te ni canacate i sahma i jíin níñi maá Londe, te ni nduyaa vāha, cúu jeē ní ndundoo ánuá i ní sáha ya.

¹⁵ Jeē yúcuu cúu jeē cáhīn i nuū mesa nuū ndácu Yaā Dios jniñu, te cájejniñu i ini templo yā nduú ñuú. Te Yaā jeē néne nuū mesa, coto ya i jeē quéndōo vāha i nuū yā.

¹⁶ Te ma cúu gā i sōco, te ma jichí gā i ndute. Te ma cayú gā i nuū niāndii, ni ma ndóho ga i jeē jihní.

¹⁷ Chi máa Yaā cúu Londe jeē néne nuū mesa jeē ndácu jniñu, coto ya i nájnūhun jeē cúu i lanchi ya. Te condeca ya i quihīn yā jíin i nuū cáne ndute jeē cótecu i sáha. Te Yaā Dios nacuaa yā ndute núu i jíináhan i, te ma ndahyú gā i. Achí tée jéhnū ún.

Siqui sello uxā jíin cóhō cūu oro

8

¹ Te Londe un ní jehnde yā sello uxā jeē ndihyú tutu ún, te nayúú-ni ni iyo ini andiví nájnūhun sava hora.

² Te ni jito ri ndihúxá ndajéhé jeē cáhīn nuū Yaā Dios. Te ni cajēhe uxā trompeta nuū ndajéhé un.

³ Yūcuán na te ni quee inga ndajéhé, ndáhá yá ñn cohō cūu oro, te ni jecuiñi yā nuū altar. Te ni jēhe cuehē sūje cutú núu yā, návāha socō yā jíin jnúhun cájicān tahu ndihí ñayuu cácadíje Yaā Dios. Te ni socō yā nuū altar oro jeē índichi ichi núu mesa nuū ndácu Yaā Dios jniñu.

⁴ Te nuū cohō cūu jñi ndajéhé un ní cane ñuhmā sūje cutú, ni caa nuū Yaā Dios nde jíin jnúhun cájicān tahu ñayuu cácadíje Yaā Dios.

⁵ Yūcuán na te ni quihin ndajéhé un cóhō cúu un. Te ni scutú yá tīcua ñuhūn jeē cayú nuū altar. Te ni jete yā nde ini ñayiví. Te ni sáha jeē ní cáhān taja, te ni ñhīn, te ni ndindéé taja, te ni jñā.

Jnúhun siquī trompeta

⁶ Yūcuán na te ndihúxá ndajéhé jeē cándāhá ndihúxá trompeta, ni casátūhva ya jeē tiví yā.

⁷ Te ndajéhé ñn ni tiví yā trompeta. Te ni cuun ññi ini ñayiví jíin ñuhūn jeē ní sácā núu jíin níñi. Te ni cayū ñn jeē uní parte

ñayiví, jíin ñn jeē uní parte yujnu, jíin ñn jeē uní parte ite cuí.

⁸ Te ndajéhé uū ni tiví yā trompeta. Te ñn nájnūhun ñn yucu cáhnu jeē cayú ñuhūn ni ñingava cuahān nuū mar. Te ñn jeē uní parte mar ni nduu ññi.

⁹ Te ni jihí ñn jeē uní parte quití ñuhūn nuū mar. Te ni naa cuehē barco, chi ñn ñn jeē tāca úní ni naa.

¹⁰ Te ndajéhé uní ni tiví yā trompeta. Te ni ñingava ñn quimi cáhnu ichi ándiví, te cáyú nájnūhun cáyú ñn yiti cáhnu. Te ni ñingava siquī ñn ñn jeē tāca úní yūte jíin núu cáne ndute.

¹¹ Te quimi un nání quimi uvuā. Te ñn jeē uní parte ndute ni cuu uvuā. Te ni cajihí cuehē ñayuu ni sáha jeē ní cuu uvuā ndute ún.

¹² Te ndajéhé cuūn ni tiví yā trompeta. Te ñn jeē uní parte niāndii jíin yóo jíin quimi ni tiví. Te ni ndunee ñn jeē uní parte i, te tuá ni cündijin ñn jeē uní parte nduú jíin ñuú.

¹³ Te ni ndacoto ri, te ni jini sōho ri jeē cána jee ñn ndajéhé yā jeē ndáva cuahān sava andiví:

Nacā xeēn gā ndoho ñayuu cáyūcú ini ñayiví, chi je yajni cuecu uní gā trompeta jeē tiví uní gā ndajéhé, achí yá.

9

¹ Te ndajéhé uhūn ni tiví yā trompeta. Te ni jito ri jeē ichi ándiví ní ñingava ñn quimi nde ini ñayiví. Te nuū quimi un ní jēhe ndacáa jeē núne tūhnchi cúnú ndasí.

² Yūcuán na te ni nune un tūhnchi, te ni cane ñuhmā ni caa nájnūhun ñuhmā ñn ijñú cáhnu. Te ñuhmā un ní sáha jeē ní cunee niāndii jíin ññi núu tachí.

³ Te nuū ñuhmā un ní canecoo tīca ndicuéhyí, ni jité núu ti ññi cáhnu ñayiví. Te ni jēhe ya jnúhun jeē sáha ti nájnūhun cásáha tīshma xeēn jeē iyó ini ñayiví.

⁴ Te ni ndacu ya jniñu nuū tī jeē ma sáha ti daño ite jíin yúcū cuí jíin yujnu, chi máni ñayuu jeē tu ndéé sello Yaā Dios jneē i cúu jeē tuu ti.

⁵ Te tu ní jēhe ya jnúhun jeē cáhni tī ñayuu, chi máni jeē stóho ti i uhūn yoō. Te sáha ti jeē jetú i nájnūhun jeē jetú ñayuu jeē tūu tīshma i.

⁶ Te quivī ún nducú ndasí ñáyuu modo cuu i, te ma nihín i modo. Te vésú cuní i cuu i, te tú na modo cuu i.

⁷ Te tíca ndicuéhyí un cáa ti nájnūhun caballo jeē cáhīyo tūhva quingoo nuū cuájnáhan. Te xinī tī ñúhun nájnūhun corona oro. Te née ti nuū téé.

⁸ Te íyó ixí ti jeē cáa nájnūhun ixí xíní ñahan. Te jnūhun ti cáa nájnūhun jnūhun ndicaha.

⁹ Te ní tī ndihyú nájnūhun sahma cáa. Te níhin ndijēn tī nájnūhun níhin jeē cuángoo cuehē caballo nuū guerra cáñuhun ti carreta.

¹⁰ Te suhmā tī ndíso iñu nájnūhun tisuhma. Te jín súhmā tī cuu stóho ti ñayuu uhūn yoō.

¹¹ Te íyó ñn jeē kujēnu nuū tī, te suu cúu ndajéhé jexeén jeē ndíto tūhchi cúnú ndasí un. Te ndajéhé un yuhu hebreo naní Abadón, te yuhu griego naní Apolión, jeē cuní cahān maá jéé snāā.

¹² Je ni yāha ñn jnūndóho, te íyó úū gā jnūndóho jeē quíji.

¹³ Te ndajéhé iñū ni tiví yā trompeta. Te ni jini sōho ri ñn jnūhun jeē ni cáhān nde mēhñú ndicúún yiquí altar oro jeē ín nuū Yaā Dios.

¹⁴ Te ni cahān un jín ndajéhé iñū jeē ndahá trompeta:

Nandají ró ndicúún ndajéhé jeē nuhní yuhu yúte cáhnu jeē naní Eufrates, achí.

¹⁵ Te ni nandají ndicúún ndajéhé un, návāha cahni ñn jeē uní parte ñayuu ñayiví. Chi je cáhīyo tūhva ndajéhé un jeē siquí maá hora jín quiví jín yóō jín cuíyā jeē cóo súcuan.

¹⁶ Te ni jini sōho ri jeē achí jéé iyó úū ciento millón soldado jeē cáyoso caballo.

¹⁷ Te ni steén gā yā nuū rī, te ni jito ndijin rī táca caballo. Te téé cáyoso siquí tī cáñuhun de camisa cáa jeē cuehé, jeē ndeé, jín jéé cuaán. Te xiní caballo un cándāa nájnūhun xiní ndicaha. Te yuhu ti quénda ñuhūn jín ñúhmā jín azufre.

¹⁸ Te jín úní jeē quénda yuhu caballo un, te ni jihí ñn jeē uní parte ñayuu, suu jín ñúhūn jín ñúhmā jín azufre.

¹⁹ Chi yuhu ti jín súhmā tī iyó fuerza jeē cáhni tī ñayuu. Chi suhmā tī cándāa

nájñūhun coō, te íyó xíní, te jín yúcuan stóho ti ñayuu.

²⁰ Te sava ga ñayuu jeē tu ní jihí jín táca jnūndóho yāha, tu ní nacani ni i stóo i ídolo jeē ní casáha i. Te tu ní stóo i jeē cáchiñúhūn i táca táchī jín ídolo jeē ní cuvāha jín oro jín plata jín cáa cuaán jín yúū jín yujnu. Te táca un chi tu cúu coto, ni tu cúu cuní sōho, ni tu cúu caca.

²¹ Te ni tu ní canacani ni i stóo i jeē jéhi i ndīyí, jín jéé satásí i, jín jéé jíca jnéni i, jín jéé sacuíhná i.

Ndajéhé jeē ndahá libro lulí

10

¹ Te ni jito ri inga ndajéhé yā jeē ndíso poder, ni cuun ya ichi ándiví. Te ñúsúcun yá vicō, te xiní yā ñúhun ticō vēhndé. Te nuū yā ndíndēe nájnūhun niāndii, te síhin ya cáa nájnūhun uū síhīn jeē cáa ná cáa ñuhūn.

² Te ndahá yá ñn libro lulí jéé núne. Te ni jeni ya jehē váha ya nuū mar, te jehē jecó yá nuū ñúhun íchi.

³ Te ni cana jee téyí yá, nájnūhun jeē ndahyú ndicaha. Te ná ni cana jee ya, te ni cacahān uxā taja.

⁴ Te ná ni cacahān uxā taja, te je íyó tūhva ri jeē téé ri jnūhun un núú. Te ni jini sōho ri ñn jnūhun ichi ándiví jeē ni cáhān jín rí:

Chuvāha ró táca jnūhun jeē ní cacahān uxā taja ún, te ma steén rō, ni ma téé ró, achí.

⁵ Yūcuán na te ndajéhé jeē ní jito ri jeē ín nuū mar jín núū ñúhun, ni ndonehen ya ndaha váha ya ichi ándiví.

⁶ Te ni ndacunehen ya síhví máá Yaā jeé técu ní cáni, Yaā ni sáha ándiví jín ñáyiví jín mar jín táca ndíhi jeé iyó ini. Te jín síhví yá un ní cahān teyí ndajéhé:

Ma cucuéé gá jeé jínu ñayiví.

⁷ Chi núu na quéjéé ndajéhé uxā tiví yā trompeta, yūcuán na te squícu-ni Yaā Dios jnūhun sáhi yá, nájnūhun ni castūhun yá nuū táca mozo yā, téé ni canacani jnūhun ya nde jenahán, achí ndajéhé.

⁸ Yūcuán na te máá jéé ní jini sōho ri jeē ni cáhān ichi ándiví, ni cahān tucu jín rí:

Cuáhán te quihin ró libro lulí jéé núne jeē ndahá ndajéhé jeé ín nuū mar jín núū ñúhun, achí.

⁹ Te ni jehēn rī nuū ndajéhé un, te ni jicān rī jeē na cuáha ya libro lulí un núu rī. Te ni cahān yā:

Quihin te caji rō. Chi vixī sáha ini yuhu ró nájnūhun ndūxi, te chíji ró chi cuhiyá sáha, áchí yá.

¹⁰ Yūcuán na te ni quihin ri libro lulí jeē ndahá ndajéhé yā, te ni yeji rī. Te vixī ni sáha ini yuhu ri nájnūhun ndūxi. Te ná ni cuu ni yeji rī, te ni jītē iyá ni rī.

¹¹ Te ni cacahān jíin rí:

Cánuú jéē nacani tucu ró jnúhun Yaā Dios, ndese coo síquī ñayuu cuehē ñuu jíin cuéhē nación jeē sñn sñn yuhu, jíin síquī cuehē rey cándacu jniñu, áchí jíin rí.

Siquī uū testigo yā

11

¹ Yūcuán na te ni cajēhe ñn yujnu nuū rī, jeē cúu ñn cūhva jeē chícuāha. Te ni cacahān jíin rí:

Ndocuiñī te chicuāha ró templo cáhnu Yaā Dios jíin altar, te cahu ró nasaa ñayuu cúu jeē cáchiñúhún núu yā yūcuán.

² Te ma chícuāha ró patio yatā templo. Chi je ni jēhe ya nuū ñáyuu tācá ñuu jicá. Te coyūcú i ini ñuu ñi yāhá, te uū xico uū yoō cueñū i síquī ñuu.

³ Te tají rí uū testigo rī jeē nácani jnūhun ri mil uū ciento unī xico quivī. Te cuhun de sahma ndáyí jéē cácuaihyá ni de síquī cuéchi ñayuu, achí yá.

⁴ Te ndíndúú testigo un cúu nájnūhun ndíndúú yujnu olivo jíin ndíndúú candelero jeē ín nuū Yaā Dios, Yaā chíi ñayiví.

⁵ Te na-ni ñayuu núu nducú sáha ndevāha jíin ndíndúú testigo un, te quenda ñuhūn yuhu ndíndúú de, te cayū ndihí ñayuu cájito uhū i de. Te súcuan cuu tāca ñáyuu jeē nducú sáha ndevāha jíin de.

⁶ Te íyó poder ndíndúú testigo un jéē cási de jeē ma cúun saū ní tiempo jeē nácani de jnūhun ya. Te suni íyó poder de sáha de jeē nduu niñī tācá ndute. Te cuu stíví de ñayiví jíin ndínuū jnūndóho, núu nasaa jínu cácuni de.

⁷ Te ná ni jínu ni canacani de jnūhun ya, yūcuán na te quenda quití xéén jeē néne tūhnchi ún. Te cuajnáhan jíin ndíndúú de, te cundeyí jíin de, te cahni de.

⁸ Te ndīyí ún cava nuū yáhu ñuu cáhnu nuū ní cajehni i máá Jítóho yō jicā cruz. Te ñuu un cácahān yatá i jeē ñuu Sodoma jíin Egipto cúu, síquī jeē xeēn cuéchi íyó ñuu ún.

⁹ Te ñayuu tācá ñuu, tāca yúcūn, tācá yuhu, tācá nación, chi coto i jeē cáva ndíndúú ndíyí un únī quivī yosáva, te ma cuáha i jnūhun jeē quíndūji.

¹⁰ Te ñayuu ní cáhnu ñayiví cusí ni i jeē ní cajihí de, te sáha i vico, te cuāha i regalo nuū jnáhan i. Chi ndíndúú téé ni canacani jnūhun ya ún, ní casáha de jeē ní candoho ndasí ñayuu ñayiví.

¹¹ Te jeē yáha unī quivī yosáva ún, te Yaā Dios sáha ya jeē nastáa tachí de, te ndonda-ni de. Te yūhú ndasí ñáyuu coto i jeē ní canatecu de.

¹² Yūcuán na te cuni sōho de jeē cána jee ichi ándiví:

Caa ró quijicoo ró ndé yāhá, áchí.

Te ndaa de mēhñu vícō quingoo de andiví, cuni ñayuu cájito uhū i de.

¹³ Te máá hora un jnáa ndasí, te ndicó cáva naa ñn jeē uxí parte ñuu ún. Te jíin ñujnáa ún cuu uxā mil ñayuu. Te tāca gá ñayuu jeē ndóo, yūhú ndasí i, te cahān i jeē cujéhnu Yaā Dios jeē ndeé andiví.

¹⁴ Súcuan yāha jnūndóho uū, te yachí coo jnūndóho unī.

Siquī trompeta uxā

¹⁵ Te ndajéhé uxā ni tiví yā trompeta. Te ni jini sōho ri ni cacahān jee ichi ándiví. Te súcuan ni cacahān:

Tācá nación ñayiví je ni nuquihí ndaha máá Jítóho yō Yaā Dios jíin Cristo jeē ní tají yá.

Te ndacu ya jniñu ní cáni cuiti.

Achí.

¹⁶ Yūcuán na te ndihóco cuūn tēe jéhnu cándiso jniñu jeē cánene de mesa de ichi núu Yaā Dios, ni cajecuiñī yití de, ni cáchiñúhún de ya.

¹⁷ Te ni cacahān de:

Na cútahū na núu ní, Tātā Yaā Dios,

chi máá ní jñí ndihí poder,

te cúu ní Yaā íyó vijna, te ni íyo ní ní cáni, te coo ní ní cáni.

Te ni najnñí ní ndivíi jeē íyó,

te jíin poder ni ní quejéé ní ndácu ní jniñu nuū.

¹⁸ Ñayuu tācá nación ni caquití ni i síquī ní.

Te vijna chi ni quee quiv̄i jeē cuáha ní castigo i,
 jíin jéē sándaā ní jniñu tāca ndíyi.
 Te cuáha ni táhū nuū tāca mozo ni jéē ní canacani jnūhun ní,
 jíin núū tāca ñáyuu cájejniñu nuū ní, jíin ñáyuu cáchiñúhún núū ní,
 cúu ñayuu cácujuhnu jíin jéē tuú.
 Te vijna te snáhnú ndetū ni ñáyuu castívi ñayívi.
 Achí de jíináhan de.

¹⁹ Yūcuán na te ni nune templo Yaā Dios jeē iyó andiví. Te ni cajito ñayuu jeē yúcuán ine yejnū jeē ñúhun contrato yā. Te ni ndindéé taja, te níhin, te cáhán taja, te ni jnāa, te ni cuun xeēn ñiñí.

Jnūhun ñahan jíin cóo cáhnu

12

¹ Yūcuán na te ini andiví ní cane ñin jeē nahán náa ni yō jito yó: ñin ñahan jeē ñúhun ña niāndii nájnūhun sahna, te ín jehē ña siquī yoó, te ñúhun ñin corona xiní ña jeē ndeé uxī uū quimi.

² Te ñúhun sēhe ña. Te ni ndahyū cohó ña jeē ndóho ña jéhnde chíji ña jeē scácu ña i.

³ Yūcuán na te ini andiví ní cane tucu inga jeē náa ni yō jito yó: ñin coō cuehé cáhnu ndasí. Te iyó úxā xiní tí jíin úxī ndiqui tí. Te ndihúxá xiní tí ñúhun corona.

⁴ Te jíin súhmā tí ní stáa tí ñin jeē uní parte quimi jeē iyó andiví, te ni síngoo tí ini ñayívi. Te ni ine tí nuū ñahan jeē scácu sēhe ún, ndétu tí cocó tí sēhe ña jeē jé yajni cacu i.

⁵ Te ni scácu ña ñin sēhe yí, te sūchi un ní jeconaa jeē ndácu níhin i jniñu nuū ndívii nación. Yūcuán na te ni ndoñúhún sēhe yí ña ún, ni ndaa i cuahán i nde nuū ín mesa Yaā Dios nuū ndácu ya jniñu.

⁶ Te ñahan un ní jinu ña cuahán ña nde nuū ñúhun téhé núū iyó ñin lugar jeē ni sátūhva Yaā Dios. Te yūcuán condee ña nihín ña jeē cáji ña mil uū ciento uní xico quiv̄i.

⁷ Yūcuán na te ni cajejnáhan ini andiví. Chi ndajéhé jéhnu ga jeē naní Miguel jíin táca ndajéhé jeē cácu mozo nuū yā, ni cajejnáhan jíin cóo cáhnu. Te coō un jíin táca ndajéhé maá, ni cajejnáhan jíin yá.

⁸ Te tu ní cácuñdeyí tí, te tuá ní cúu coyūcu tí andiví.

⁹ Súcuán ni cuu jeē ní quenehen ya coō cáhnu un jéē iyó ndé jenahán ndasí. Te nání tí jexeén jíin Satanás, te maá tí cúu jeē stahú ndihí ñayuu ñayívi. Te ni scáne ya tí nde ini ñayívi jíin táca ndajéhé tí.

¹⁰ Yūcuán na te ni jini sōho ri ñin jnūhun jeē cahán jee ichi andiví:

Je ni quee quiv̄i jeē jínu jnama ya yohó, jíin jéē steén ndijin yā jeē jnái ya poder, jíin jéē ndácu ya jniñu, jíin jéē ndíso jniñu maá Cristo jeē ní tají yá. Chi je ni quenehen ya maá jéē cahán cuēchi siquī táca hermano yō. Chi nduú ñuú ni cahán cuēchi siquī i nuū Yaā Dios maá yó.

¹¹ Te ni cacundeyí i siquī Satanás un, ní sáha jnūhun jeē ni jíhí Yaā cúu Londe, jíin jéē ní cacahán ndaā i jnūhun Yaā Dios, jíin jéē tu ní cundáhú ni i maá i, chi ni jēhe i jnūhun candíje i vésú núu cuu i jeē siquí yā.

¹² Núu súcuán te na cúsiñ ndasí ní táca róhó jéē cáyūcú andiví. Te nacā xeēn ndoho táca róhó jéē cáyūcú ini ñayívi jíin núū mar. Chi ni cuun jexeén ni jinū nuū rō jijnáhan ró. Te quití xeēn ni, chi jíiní jeē tuá coo cuehé gā tiempo jeē stahú ñayuu. Achí.

¹³ Te ni jini coō cáhnu ún jéē ni scáne ya maá cuahán ini ñayívi, te ni jinu tí jíin ñahan ní scácu sēhe yí, jeē xeēn sáha tí jíin ña núu.

¹⁴ Te ni cajēhe uū ndijēn yaha chócó cáhnu nuū ñahan ún, návāha ndava ña quihín ña lugar ña nuū ñúhun téhé, te cácu ña nuū coō ún. Te yūcuán condee ña uní cuiyā yosáva, te nihín ña jeē cáji ña.

¹⁵ Te yuhu cóo un ní cane ndute nájnūhun ñin yūte cáhnu, cuahán yatā ña návāha jnení ña.

¹⁶ Te maá ñuhun chi ni chindéé ñahán ñahan ún, chi ni nune-ni, te ni nungoo yūte jeē ní cane yuhu cóo ún.

¹⁷ Yūcuán na te xeēn ni quití ni coō cáhnu ni jito tí ña. Te cuahán tí cuajnáhan tí jíin táca gá sēhe ña, suu ñayuu casquicu jniñu ndácu Yaā Dios te cácuñdeyí vāha i jnūhun Jesucristo.

Jnūhun siquī uū quití xéén

13

¹ Te ni indichi rí yumár. Te ni jito ri jeē ní cane ñin quití xéén ini mar. Te iyó úxā xiní tí

jiín úxī ndiqui tī. Te ndihúxí ndiqui tī ñúhun corona. Te ndihúxá xinī tī ndeé ñn síhví néé jéé quití ni Yaā Dios sáha.

² Te quití xéén jeē ní jito ri ún, cáa tī nájnūhun cuiñí, te ndaha tī cáa nájnūhun ndaha oso, te yuhu tī cáa nájnūhun yuhu ndícaha. Te nuū quití un ní jēhe coō cáhnu poder maá jíin mesa nuū ndácu máá jniñu. Te ni sáha jeē cujéhnu ndasí quití ún.

³ Te ni jito ri jeē ní tújī ñn xinī tī, jeē jé yajni cuu tī nuū. Te ni nduvāha tī jeē ní tújī tī. Te nahán ní naa ni ñayuu ñí cáhnu ñayívi ní jito i, te ni cajetáhú i nuū tī.

⁴ Te ni cachiñúhún i coō cáhnu siquī jeē ní sáha tī jeē cujéhnu ndasí quití xéén un, te suni ni cachiñúhún i quití xéén un. Te ni cacahān i:

Tú ni ñn jeē cujéhnu nájnūhun quití yáha, te tú ni ñn cundeyí cuajnáhan jíin tī, áchí i jíināhan i.

⁵ Te tu ní jési ya jeē cahān tī jeē quití téyí cúu tī, jíin jéé cahán ndevāha tī siquī yā. Te ni nihīn jniñu tī jeē ndácu tī jniñu uū xico uū yoō.

⁶ Te ni quejéé tī ni cahān ndevāha tī siquī Yaā Dios, jíin siquī síhví yá, jíin siquī nuū ndeé yá, jíin siquī tāca jéé iyó andiví.

⁷ Te tu ní jési ya jeē cuajnáhan tī jíin ñáyuu maá Yaā Dios, te cundeyí tī jíin i. Te suni ni nihīn jniñu tī jeē ndácu tī jniñu nuū ñáyuu tāca yúcūn, tāca ñuu, tāca yuhu, tāca nación.

⁸ Te ñayuu ñí cáhnu ñayívi jéé tu yósó síhví i nuū tútu, ni cachiñúhún i quití xéén un. Te Yaā cúu Londe jeē ní cajehni i, máá yá névāha tutu un jéé yosó síhví ñáyuu cotecu ñí cáni, te je yósó síhví i nde quiví ni jécō ñayívi.

⁹ Ñayuu iyó sóho na chúsóhó váha i jnūhun cahān rī yāhá.

¹⁰ Tāca ñáyuu jeē sáha jeē quívi jnáhan vecāa, suni vecāa cone máá i. Te tāca ñáyuu jeē jéhni jnáhan jíin espada, suni jíin espada cuu maá i. Núu súcuan te ñayuu maá Yaā Dios chí jíni ñúhún cuandeyí ni i jíin jnúndóho te ma jécuiñí i candíje i jnūhun cúndáhú ni yā i.

¹¹ Yūcuán na te ni jito ri inga quití xéén jeē ní cane chíji ñuhun. Te iyó úū ndiqui tī jeē cáa nájnūhun ndiqui lánchi. Te nájnūhun tachī coō cáhnu, súcuan tachī cahán tī.

¹² Te nájnūhun ndácu quití xéén xīhna ñúhún jniñu, suni súcuan ndácu quití uū ún jniñu, ín tī nuū quití xīhna ñúhún. Te quití uū sáha tī jeē chiñúhún tāca ñáyuu ñí cáhnu ñayívi nuū quití xīhna ñúhún, quití ní tújī jeé jé yajni cuu tī te ni nduvāha tī.

¹³ Te quití uū suni sáha tāca jniñu jéhnu jeé nahán náā ni yō jíto yó. Chí ni scúun tī ñuhún ichi andiví ní quiji ini ñayívi, ní cajito ñayuu.

¹⁴ Te ni stahú tī ñayuu ñayívi jíin tāca jniñu jéhnu jeé ni nihīn tī poder jeé sáha tī, jíto jíinúū quití xīhna ñúhún. Te ni ndacu tī jniñu jeé na sáha ñayuu imagen quití xīhna ñúhún, quití ní tújī jíin espada, jeé jé yajni cuu tī te ni nduvāha tī.

¹⁵ Te quití uū ni nihīn tī poder jeé chutáchí tī xijní imagen quití xīhna ñúhún, návāha cuu cahān, te cahni tāca ñáyuu jeé tu cájetáhú i chiñúhún i máá.

¹⁶ Te tāca ñáyuu cujéhnu jíin ñáyuu tu cujéhnu, tāca ñáyuu cucá jíin ñáyuu ndahú, tāca ñáyuu sájniñu cuenta maá jíin mozo jeé ní cajeen ñayuu, ni sáha tī jeé ní jécondee ñn jnuni ndavāha i chí jnéé i.

¹⁷ Te ni ñn ñayuu ma cúu cuaan i xícó i te núu tu ndíso i jnuni jeé cúu síhví tī chí jnúni número jeé cúu síhví tī.

¹⁸ Jnūhun ndíchí cúu jeé cahán rī yāhá: Tāca ñáyuu jécūhun vāha ni cuu tava i cuenta número quití xéén un, chí número un cúu síhví ñn tēe. Te número un cúu iñū ciento unī xico iñū.

Yaa jeé cájita 144,000 ñayuu

14

¹ Yūcuán na te ni ndacoto ri, te ni jito ri jeé ín máá Yaā cúu Londe xinī yucu Sión. Te cáhīn ciento uū xico cuūn mil ñayuu jíin yá. Te jneé i ndeé síhví máá yá jíin síhví Tátá yā Yaā Dios.

² Te ni jini sóho ri jeé ñhīn ndasí ichi andiví, nájnūhun jeé jíca cuehē yūte chí jéé cahán ñhīn taja. Te jeé ñhīn un sáha nájnūhun jeé cátee cuehē ñayuu yaa jeé naní arpa.

³ Te cáhīn i ichi núu mesa nuū ndácu Yaā Dios jniñu, jíin núu ndicúun jeé técu, jíin núu ndihócó cuūn tēe jéhnu cándiso jniñu. Te ni cajita i ñn yaa jeé. Te ni ñn ñayuu tu cúu cutūhva i yaa ún, chí máni máá ciento uū

xico cuūn mil ñayuu jeē ní jnama ya i ini ñayīví.

⁴ Te tāca tēe yáha cácuu jeē tu ní casáha cuēchi jíin ñahan casáha néé, chi tēe ndoo ánuá cácuu de. Te cándiquīn de Londe ndé-ni cúu-ni nuū cuahán yā. Chi ni jnama ya de ini ñayīví, te máá de cácuu tēe jeē xíhna gā ni cacandíje nuū Yaā Dios jíin núū Yaā cúu Londe.

⁵ Te tú cuiti na jnūhun stáhu cácahān de, chi tēe ndoo ánuá cácuu de, cáhīn de nuū mesa Yaā Dios.

Jnūhun jeē ní cacahān ndinúni ndajéhe yā

⁶ Yūcuán na te ni jito ri inga ndajéhe yā jeē ndáva cuahān sava andiví. Te ndíso ya jnūhun jeē jnama Yaā Dios ñayuu cotecu i ní cáni. Te ni nacani ya jnūhun un núū tāca ñayuu ní cáhnu ñayīví, nuū ñayuu tācá nación, tāca yúcūn, tācá yuhu, tācá ñuu.

⁷ Te ni cahān jee ya:

Conso iyo ró núū Yaā Dios, te na cáhān rō jeē yóhyo cújéhnu ya, chi je ni quee quiví jeē sándaā yā siquī rō ndese ni casáha ró. Te na chíñúhún ró yā, chi máá yá ni sáha andiví jíin ñayīví jíin mar jíin táca núū cáne ndute, áchí ndajéhe yā.

⁸ Yūcuán na te ndíquín inga ndajéhe yā vēji, te ni cahān yā:

Je ni naa iī ñuu teyí Babilonia. Chi ni sáha jeē ñayuu tācá nación casiquí ndéē i Yaā Dios jeē ní castóo i ya te cándiquīn i ídolo jíin táca jniñu néé, áchí ndajéhe uū.

⁹ Yūcuán na te ndíquín inga ndajéhe unī vēji, te ni cahān jee ya:

Xeēn coo siquī ñayuu cáchiñúhún quiti xéén jíin imagen tī, te jéhe i jnūhun condee jnunī tī jneē i chí ndaha i.

¹⁰ Chi nihīn i castigo xeēn siquī cuéchi ni casáha i, chi quitī ni Yaā Dios nuū i, te tuá cone cáhnu ni yā. Te ndoho i nuū cayú ñuhūn jíin azufre, coto tācá ndajéhe Yaā Dios jíin Yaā cúu Londe.

¹¹ Te ñuhmā nuū cándoho i cánda ní cáni cuiti. Te nduú ñuú tu ndétátú ñayuu cándoho ún jeē ní cáchiñúhún quiti xéén jíin imagen tī, jíin jéē ni jécondee jnunī sihví tí.

¹² Jeē yúcuan ñayuu maá Yaā Dios jeē casquícu i jniñu ndácu ya te cácañíje vāha i Jesús, cánuú jéē cuáñdeyí ni i. Achí ndajéhe unī.

¹³ Yūcuán na te ni jini sōho ri ñn jnūhun ichi ándiví jéē ni cáhān jíin rí:

Tee ró jnūhun jeē cahān rī jíin ró yāhá: Nacā jeē ndetū tāca ñayuu cácañíje Jitoho yō jeē cájihī vijna jíin ndé ní cuáhān yō. Jendaá chi ndetátú i jeē ní casáha i jniñu vāha, te jniñu i un má nāā chi sáha jeē quendōo vāha i ní cáni, áchí Espiritu.

Jeē ní nastútú yá ñayuu ñayīví

¹⁴ Yūcuán na te ni ndacoto ri, te ni jito ri ñn vicō cuijín. Te nuū vicó un néne Yaā ní nduu tēe. Te xinī yā ñuhūn corona oro, te ndáhá yá ñn hoz xeēn.

¹⁵ Te ni quenda inga ndajéhe yā ini templo, te ni cana jee, te cáhān jíin Yaā néne nuū vicó un:

Cahnde ni jíin hoz ní, te nastútú ní ñayuu ñayīví. Chi je ni quee quiví jeē nastútú ní i nájñuhun táhndé trigo jeē jé ni cuaan, áchí.

¹⁶ Yūcuán na te Yaā néne nuū vicó ni nastútú yá ñayuu vāha ini ñayīví, nájñuhun táhndé trigo jíin hoz.

¹⁷ Yūcuán na te ni quenda inga ndajéhe yā ini templo jeē iyó andiví, te suni ndáhá yá ñn hoz xeēn.

¹⁸ Te nde nuū altar ni quenda tucu inga ndajéhe, te ndíso jniñu ya siquī ñuhūn altar. Te ni cana jee ya, te cáhān yā jíin ndajéhe jeē ndahá hoz xeēn:

Cahnde rō jíin hoz xeēn rō, te nastútú ró ñayuu casáha néé ini ñayīví, nájñuhun jeē cájehnde i chutū ndehē uva jeē jé ni jichi, áchí.

¹⁹ Te ndajéhe un ní jehnde yā jíin hoz yā, te ni nastútú yá ñayuu casáha néé ini ñayīví, nájñuhun ndútútú ndéhē uva. Te ni jnaa ya i nuū nihín i castigo xeēn Yaā Dios, nájñuhun jnáa i ndehē uva nuū taxín.

²⁰ Te ni jéhe ya castigo i yatā ñuú, te ni jica níñi i nájñuhun ndūxi uva. Te ni ndaa ni jinū cūhva jeē sucún yuhu caballo, te ni jica cuahān nde unī ciento kilómetro.

Ndihúxá ndajéhe jíin ndihúxá jnūndóho jeē sándihí

15

¹ Te ni jito ri inga jniñu jéhnu ichi ándiví jéē nāā ní yō jito yó. Chi cáhīn uxā ndajéhe yā jeē cuāha ndihúxá jnūndóho sandihí na.

Te jeē jínu ndihúxá jnūndóho yáha, te jínu jeē cuáha Yaā Dios castigo xeēn síquī cuéchi.

² Te suni ni jito ri ñn jeē cáa nájñuhun mar, te cáa nájñuhun vidrio jeē ndíndēe nájñuhun ñuhūn. Te yumar un cáhīin ñayuu ni cacundeyí síquī quití xéén jíin imagen tí, jíin jeē tu ní cáquihin i jnunī número jeē cú síhví tí. Te cándāhá i yaa jeē naní arpa jeē ni jéhe Yaā Dios nuū i.

³ Te cájita i yaa jeē ní tava Moisés, tēe cúu mozo Yaā Dios, jíin yaa maá Yaā cúu Londe. Te súcuan cáhán yaa ún: Yóhoyo náā ni na cájito ná ndihí jniñu jéhu teyí jéē sáha ní,

Tátā Yaā Dios, chí jñí ní ndihí poder.
Te máni jniñu ndaā jniñu váha sáha ní,
jeē cúu ní Rey nuū tācá nación.

⁴ Tú ni ñn i iyó jeē ma cónso Iyo i nuū ní, Tátā Yaā Dios.

Te ndihí i cahán nahín i jeē yóhoyo cújéhu ní. Chí máñuhún ni máá ní cúu Yaā ndoo Yaā i.

Te quijicoo ñayuu tācá nación, chíñuhún i níhín,
chí je ni cajini i jeē ndaā vāha sáha ní táca jniñu.

Achí i cájita i.

⁵ Yūcuán na te ni ndacoto ri, te ni jito ri jeē ini andiví núne cuarto iñ ini templo nuū íne tabla yuū jeē yosó ley yā.

⁶ Te ini templo un ní quendacoo ndihúxá ndajéhé jeē cándiso jniñu síquī ndihúxá jnūndóho. Te cáñuhun ya sahma fino iyó ndoo te xíñú. Te núhni cinturón oro jicā yā.

⁷ Te ñn jnáhan ndicúún jeē técu ni jéhe ñn ñn cohō oro nuū ndihúxá ndajéhé un. Te ini cohō un ñuhun chitú castigo xeēn jeē ni jéhe Yaā Dios, Yaā técu ní cáni.

⁸ Te ni chitú ndí ñuhmā ini templo, te suu ni steén jeē yóhoyo cújéhu Yaā Dios jíin poder jñí ya. Te ni ñn tu ní cúu quívi ini templo, chí nde na ndihí ndihúxá jnūndóho jeē cuáha ndihúxá ndajéhé yā.

Síquī ndihúxá cohō jeē ñuhun castigo

16

¹ Yūcuán na te ini templo ni jini sōho ri ñn jñuhun cáhán jee jíin ndihúxá ndajéhé yā:

Cuangoo te catí ró síquī ñayívi ndihúxá cohō jeē ñuhun castigo xeēn jeē ni jéhe Yaā Dios, achí.

² Te cuahán ndajéhé ñn, te ni jeti ya cohō yā síquī ñayívi. Te tāca ñayuu jeē ndeé jnunī quití xéén un jíin jeē cáchiñuhún imagen tí, ni canecoo ndíhyi xeēn jeē jetú ndasí.

³ Te ndajéhé uū ni jeti ya cohō yā nuū mar, te ndute mar ni nduu nájñuhun niñí ndíyí. Te ni cajihí tācá quití jeē ñuhun ini mar.

⁴ Te ndajéhé unī ni jeti ya cohō yā ini tāca yúte jíin táca núu cáne ndute, te ni nduu niñí.

⁵ Te ni jini ri jeē cahán ndajéhé jeē ndiso jniñu síquī ndúte:

Tátā Yaā Dios, maá ní cúu Yaā ndoo Yaā iñ, Yaā iyó vijna, te ni Iyo ní ní cáni. Te ndaā sáha ní jeē súcuan ni ndonda ní síquī cuéchi i.

⁶ Chí ni casáha i jeē ní jeti niñí ñayuu ndoo ní jíin ñayuu ní canacani jñuhun ní. Te vijna chí ni sáha ní jéē cájihí i niñí, chí ñayuu casáha jniñu néé cácuu i, jeē cánuú ndoho i súcuan.

⁷ Te ni jini sōho ri jeē cahán inga nde nuū altar:

Tátā Yaā Dios, máá ní cúu jeē jñí ndihí poder. Te jniñu váha jniñu ndaā ni sáha ní jéē ní ndonda ní síquī cuéchi i. Achí.

⁸ Te ndajéhé cuūn ni jeti ya cohō yā síquī níandii, te ni jéhe Yaā Dios jñuhun jeē ndujíhni ndasí níandii návāha cayū ñayuu.

⁹ Te xeēn ndasí ní cayū tāca ñayuu. Te vēsú súcuan te tu ní canacani ni i stóo i cuéchi i, ni tu ní cácahán i jeē cújéhu Yaā Dios. Chí sa suhva ni cacahán ndevāha i síquī yā jeē ni jéhe ya tācá castigo yáha nuū i.

¹⁰ Te ndajéhé uhūn ni jeti ya cohō yā nuū mesa nuū ndácu quití xéén jniñu. Te ni cunee ní cáhnu nuū ndácu tí jniñu. Te cánacayíhi ñayuu yuhu i jeē cájetū ndasí i.

¹¹ Te vēsú súcuan te tu ní canacani ni i stóo i jniñu néé casáha i. Chí sa ni cacahán ndevāha i síquī Yaā Dios andiví síquī jeē cájetū ndasí i jíin ndíhyi xeēn cándoho i.

¹² Te ndajéhé iñū ni jeti ya cohō yā síquī yúte cáhnu jeē naní Eufrates. Te ni ichi ndihí ndute yúte ún, návāha nune ñn ichi jeē quíjicoo tāca rey ichi núu cáne niandii.

¹³ Te ni jito ri jeē ini yuhu coō cáhnu jíin ini yuhu quití xéén jíin ini yuhu máá téé nácani jñuhun stáhú ní canecoo unī tachí jeē cáa nájñuhun sáhvá.

14 Te tachī ún chi ndajéhé jexeén cácuu, te cásáha jniñu jéhu jeē náā ni ñayuu cájito i. Te ni quendacoo tachī un jéē nastútú táca rey ní cáhnu ñayiví, jéē cuajnáhan de síquī Yaā Dios quiví jeē ndíji ya. Te máá yá cúu jeē jnī ndihí poder.

15 Cuni sōho jíjnáhan ró, chi sanaa ni rō te ndiji ri, nájnūhun jeē ñn sanaa-ni te quíji ñacuñhá. Te nacā jeē ndetū ñayuu jeē ndito ni i, te ndito yúcún i sahma i, návāha ma cáca vichí lí i, cúu jeē tú na cuēchi coo síquī i jeē cucanu i nuū tāca ñayuu, achí yá.

16 Te ni canastútú táchī un táca rey, ni candutútú ñn lugar jeē yuhu hebreo naní Armagedón.

17 Te ndajéhé uxā ni jeti ya cohō yā nuū tachí. Te ini templo andiví jíjn núu mesa nuū ndácu ya jniñu, ni cane ñn jnūhun jeē ni cáhān jee:

Je ni jīnu, áchí.

18 Yūcuán na te ni ndindéé taja, te ñhin, te cáhān taja, te ni jnāa ndasí. Chi nde ní cáni jeē iyó ñayuu ñayiví, tu ní jnāa ñhin ndasí nájnūhun jeē ni jnāa ni jito ri.

19 Te máá ñuu cujéhu Jerusalén, ni cusñn ni nduu unī parte, te ní cáhnu ñayiví ni naa táca ñuu. Te ñuu teyí Babilonia, chi ni sáha nahín yá jeē ní ndutahū i castigo xeēn, chi ni quití ndasí ni yā síquī cuéchi i.

20 Te ni naa táca isla, te suni yucu tuá gā.

21 Te ichi ándiví ní cuun ñíñí náhnu síquī ñayuu, jeē véyi nde uū xico kilo. Te ni cacahān ndevāha ñayuu síquī Yaā Dios jeē ní cuun ndasí ñíñí, chi ñn jnūndóho xeēn ni cuu.

Jeē ndonda ya síquī ñuu neé Babilonia

17

1 Yūcuán na te ni quíji ñn jnáhan ndihúxá ndajéhé jeē ní candāhá ndihúxá cohō ún, te ni cahān yā jíjn rí:

Nehen, te na stéén rī nuū rō ndese coo castigo síquī maá ñahan jnéni jeē cúu ñuu cujéhu íne nuū iyó cuéhé ndute.

2 Chi táca rey ñayiví nájnūhun ni casíquí ndéé de jíjn ñahan ún, cúu jeē ní castóo de Yaā Dios te cándiquīn de jnūhun néé ní steén ña. Te ni sáha ña jeē ñayuu ní cáhnu ñayiví, nájnūhun nájni i te cásíquí ndéé i Yaā Dios

cúu jeē ní castóo i ya te cásáha ndasí i cuēchi. Achí ndajéhé yā.

3 Te ni sáha ga Espíritu Santo jeē ní jito ndijin rī, te ndajéhé yā un cuáhān yā jíjn rí nde nuū ñúhun téhé. Te ni jito ri ñn ñahan, yósó ña ñn quití xéén cacuéhé. Te ní cáhnu tí ndeé jnūhun néé jéē quití ni Yaā Dios sáha. Te iyó úxā xinī tí jíjn úxī ndiqui tí.

4 Te ñahan un ñúhun ña sahma ndihí jíjn sahma cuehé, te suni ñúhun ña síquī oro jíjn yūu luu jíjn perla jeē ndeé yahu. Te ndáhá ña ñn cohō oro jeē ñúhun chitú jíjn jniñu néé ndasí jíjn jniñu jnehén jéé jíca jnéni ña.

5 Te jneé ña ndeé ñn síhví jéé cúu ñn jnūhun sáhi, te suhva cáhān: Yāha cúu ñuu teyí Babilonia, jeē cúu nájnūhun náná táca jéé cájica jnéni jíjn jéé casáha néé ndasí ini ñayiví, áchí.

6 Yūcuán na te ni jini rī jeē ñahan un nájni ña jeē nájnūhun ní jihí ña ñíñí ñayuu maá Yaā Dios jíjn níñí ñayuu ni cajihí síquī jeē ní canacani ndaā i jnūhun Jesús. Te nahán ní naa ni rī ni jito rí ña.

7 Yūcuán na te ni cahān ndajéhé un jíjn rí:

¿Naun náā ni rō jíto ró? Na cástūhun rí nuū rō ndese cúni cahān jnūhun sáhi síquī ñahan un jíjn quití xéén yósó ña, jeē iyó úxā xinī tí jíjn úxī ndiqui tí.

8 Quití xéén jeē ní jito ró, chi ni cotecu tí, te vijna chi tuá tí. Te ndenda tucu tí ini túhchi cúnu, te yūcuán na te quihín tí nuū jnahnú ndetú tí. Te ñayuu cáyūcu ní cáhnu ñayiví, naa ni i coto i nuū quití un jéé ní cotecu tí te ni jihí tí, te natecu tucu tí. Te cácuu i ñayuu jeē tu yósó síhví i nuū tútu jeē yósó síhví ñayuu cotecu ní cáni jeē ní jécósó síhví i nde quiví ni jécóo ñayiví.

9 Tāca ñayuu jécūhun vāha ni, cuu tava i cuenta ndese cúu: Ndhúxá xinī tí cácuu nájnūhun uxā yucu nuū néne ñahan ún.

10 Te ndihúxá xinī tí suni cácuu nájnūhun uxā rey. Te uhūn rey un je ni naa jeē ndácu de jniñu, te ñn de ndácu jniñu vijna, te inga de chi ná tu quíji de. Te núu na quíji de te jecu-ni tiempo coo de.

11 Te quití xéén jeē ní cotecu te tuá iyó tí vijna, máá tí cuu rey unā. Te ñn jnáhan ndihúxá rey un cúu tí. Te suni quihín tí nuū jnahnú ndetú tí.

12 Te ndihúxí ndiqui jeē ní jito ró cúu nájnūhun uxī rey, te ná tu ndacu de jniñu jíjnáhan de. Te máá de jíin quiti xéén un, chi nihīn jniñu de cuu de rey jecu-ni tiempo.

13 Te ndihúxí rey un chi squíjnáhan de jnūhun, te nacuāha de poder de jíin jniñu ndíso de nuū quiti xéén un návāha ndacu ti jniñu.

14 Te cuajnáhan de jíin Yaā cúu Londe. Te Yaā cúu Londe quende yā poder de jíjnáhan de. Chi máá yá cúu Jitoho nuū tāca jítoho, te máá yá cúu Rey nuū tāca rey. Te ñayuu cáhīn jíin yá, chi ni nacāji Yaā Dios i te ni cana ya i, te cásquicu vāha i. Achí ndajéhé un.

15 Te ni cahān gā yā:

Cuehē ndute jeē ní jito ró núū néne ñahan jíca jnéni, suu cúu ñayuu cuehē tācá ñuu, tācá yuhu, tācá nación.

16 Te ndihúxí ndiqui jeē ní jito ró jéé névāha quiti xéén un, suu cácuu rey jeē coto uhū de ñahan jíca jnéni un. Te sáha de jeē quendōo ndáhú ña te quendōo vichí lí ña. Te caji de cūñu ña te cahmu de ña nuū ñuhún.

17 Chi Yaā Dios scānda ya ini de jeē na sáha de jniñu cúní yā. Te squíjnáhan de jnūhun jeē nacuāha de jniñu ndíso de nuū quiti xéén un, ndacu ti jniñu nde na squícu tāca jnūhun ni cahān Yaā Dios.

18 Te ñahan jeē ní jito ró cúu máá ñuu teyí jéé cujéhnū nuū tāca rey ñayīví. Achí ndajéhé un.

Siquí jeē naa ñuu Babilonia

18

1 Yūcuán na te ni jito ri jeē ní cuun inga ndajéhé yā ni quiji ichi ándiví. Te cújéhnū ndasí yá. Te jeē ndíndēe yá te ni ndíndēe núū ñayīví.

2 Te ni cana jee ya:

Je ni naa iñ ñuu teyí Babilonia. Te ni nduu vehe tāca táchī, nuū ñuhūn ndinuū tachī neé, jíin tāca téji, quiti quíni jeē tu nújnahan ni yō.

3 Chi ñuu un cúu nájnūhun ñn ñahan ndevāha, te ni sáha ña jeē ñayuu tācá nación, nájnūhun nájini i te cásiquí ndéē i Yaā Dios, cúu jeē ní castóo i ya te cásáha ndasí i cuechi. Te tāca rey ñayīví, nájnūhun ni casíquí ndéē de jíin ñahan ún jeē ní cajetáhú de jnūhun

neé ní steén ña. Te ñayuu ní ñayīví jéé cájeen cáxícó, ní cacucúca i jíin cuéhē jeneé jeē ní nevāha ña.

4 Yūcuán na te ni jini sōho ri inga jnūhun jeē ni cahān ichi ándiví:

Máá ró jeē cácuu ró ñayuu maá rí, quendacoo ró ini ñuu jíñā, návāha ma quívi nduu rō jíin tāca cuechi jeē sáha ña, te návāha ma ndóho ró jnúndóho xeēn jeē ndoho ña.

5 Chi ni cayā cuehē ndasí cuechi ña, nájnūhun ñn montón cáhnu ndasí jéé ní cusúcún ndé ándiví. Te vijna te nduxeēn Yaā Dios siquí cuechi ña.

6 Stóho ró ña nájnūhun ni sáha ña jeē ní ndoho sava ga ñayuu. Te nachunaa rō nuū ña doble jnúndóho jeē ni jéhe ña nuū inga ñayuu. Te sáha ró jeē nandicó cóo doble siquí ña vésú jeē ni sáha ña siquí inga ñayuu.

7 Te yōhyo ni satéyí ña máá ña, te cúca ndasí ní cotecu ña. Te suni jíin cúhva yúcuan nacuāha ró jéé ndóho xeēn ndasí ña. Chi jéni ni ña: Yāha néne ri ndácu ri jniñu, te tu cúu ri ñahan viuda, te ma quíji cuiti jnúndóho ndoho ri, achí ña.

8 Jeé yúcuan cúu jeē ñn quívi-ni te quiji cuehē jnúndóho siquí ña. Chi cuu ndíyí, te cucuíhyá ndasí ni ña, te coo jnamā, te cayū ña nuū ñuhún. Chi yōhyo íyó poder maá Jitoho yō Yaā Dios, Yaā ní ndonda siquí cuechi ña, achí.

9 Te tāca rey ñayīví jéé ní casíquí ndéē de jíin ña te ni cotecu cucá ndasí de jíin ña, ndahyū de te ndahyū cohó de coto de jeē cānda ñuhmā cayú ña.

10 Te cuiñi jíca de chi yūhú de coto de jeē súcuan ndoho ña castigo. Te cahān de jíjnáhan de:

Nacā jeē xeēn ndóho ró, ñuu cujéhnū Babilonia, chi yá-ni ñuu teyí ní cuu ró núú. Te vijna chi ñn núnú-ni te ni quee castigo jeē náā rō, achí de jíjnáhan de.

11 Te tāca téé ñayīví jéé cájeen cáxícó ñuu ún, ndahyū de te ndahyū cohó de jehē. Chi tuá ndé ñn cuaan ndajniñu cáxícó de.

12 Te ndajniñu cáxícó de un cúu oro, plata, yuū luu jíin perla jeē ndeé yahu, jíin sahma fino jíin sahma seda jeē ndihí jíin jéé cuehé. Te suni tācá yujnu jeē asñ jéen xicō, jíin tāca ndajniñu luu jeē ni sáha jíin marfil jíin

yujnu lúu jeē ndeé yahu jíin cáa cuaán jíin cáa hierro jíin yúu cuijín luu.

¹³ Te suni cáxícó de canela jíin táca jíhyo asín jíin súje cutú jíin súje uvuā jíin táca perfume jíin vino jíin aceite jíin harina fina jíin trigo. Te suni cáxícó de quití ndíso jíin lanchi jíin caballo jíin carreta, te nde ñayuu cáxícó de jeē sájniñu sáá-ni i.

¹⁴ Te cahān de jíin ñuu ún:

Ni cujiyo ndihí ndajniñu cúca jeē ní nu-jnahan ndasí ni rō. Te táca jéé lúu jeē váha jeē ní cotecu cucá ró, chi ni naa ndihí, te ma nánihín cuiñi gā rō, achi de jíjnáhan de.

¹⁵ Te táca téé ni cajeen ni caxíco ní cacucúca jéé síquí ndajniñu ñuu ún, chi cuiñi jíca de jeē yúhú de coto de castigo coo ñuu ún. Te ndahyū de te ndahyū cohó de.

¹⁶ Te cahān de jíjnáhan de:

Nacā jeē xeēn ndóho ñuu teyí yáha. Chi ni cuu nájnūhun in ñahan jeē ni ñūhun sahma fino, sahma ndihí jíin jéé cuehé. Te ni ñuhun ña síquí oro jíin yúu luu jíin perla jeē ndeé yahu.

¹⁷ Te vijna te in núnúu-ni te ni naa ndihí táca ndajniñu váha ún, achi de jíjnáhan de.

Te cuiñi jíca táca téé cáscaca barco, jíin ñayuu cuángoo nuū barco, jíin téé cásajniñu ini barco, jíin táca gá téé cásajniñu nuū mar.

¹⁸ Chi coto de ñuhmā jeē cayú ñuu ún, te cana jee de jíjnáhan de:

¿Ndé íne ga ñuu teyí jéé cujéhnun nájnūhun ni íyo ñuu yáha? achi de.

¹⁹ Te cosō de ticachā ñuhun xiní de jeé cacucuíhyá ni de. Te ndahyū de te ndahyū cohó de. Te cana jee de jíjnáhan de:

Nacā jeē xeēn ndóho ñuu teyí yáha. Chi jíin ndajniñu cúca jeē ni íyo ñuu un ní cacucúca táca ñayuu cánevāha barco cájica nuū mar. Te vijna te in núnúu-ni te ni naa ndihí-ni, achi de.

²⁰ Te na cúsiñi ni táca róhó jéé cáyūcú andiví, síquí jeē ní naa ñuu ún. Te na cúsiñi ni rohó, táca téé apóstol, jíin téé canacani jnūhun Yaā Dios, jíin ñayuu maá Yaā Dios. Chi ni sáha néé ñuu un síquí rō jíjnáhan ró, te jeé yúcuán ní ndonda Yaā Dios síquí, achi de.

²¹ Yūcuán na te in ndajéhé ndíso poder, ni quihín ya in yuū cáhnu nájnūhun in yōso cáhnu, te ni scáne ya ini mar. Te ni cahān yā:

Nájnūhun ni naa yōso yáha, suni súcuán naa Babilonia, ñuu cujéhnun téyí. Te ma núcoo cuiñi gā jeē cóto yó núu.

²² Te ni cahān yā jíin ñuu ún: Ini calle rō ma cúni sōho cuiñi gā ñayuu jeē scáta i yaa arpa jíin flauta jíin trompeta. Te suni ma cóo cuiñi gā ñayuu casáha táca ndajniñu. Te suni ma cúni sōho ga i jeē níhín táca molino rō.

²³ Te ni in lámpara ma sáha ga jeé cúndijin nuū rō. Te ni ma cúni sōho ga i vico jeé cácusí ni ñahan téé nándāha mēhñu ró. Te ñayuu ní cajeen ni caxíco nuū rō, ni cacujéhnun ndasí i ini ñayiví. Te ni stahú ró ñayuu táca nación jíin jniñu tasí jíin jniñu mágica. Achí ndajéhé un.

²⁴ Te ñuu un ní nihín castigo xeēn, chi síquí ñuu un ndeé cuéchi jeē ní jeti niñi táca téé ní canacani jnūhun Yaā Dios, jíin táca ñayuu maá yá, jíin táca gá ñayuu ní cajehni i ní cáhnu ñayiví.

19

¹ Te ná ni cuu táca jéé yáha, te ni jini sōho ri jeé cahán jee cuehé ndasí ñayuu ini andiví:

Yōhyo cújéhnun Yaā Dios. Chi Yaā Dios maá yó cúu jeē ní jnama yóhó.

Te máa yá cujéhnun ndasí, te máa yá jniñi ndihí poder.

² Te ndaā te váha sándaā yā táca jniñu, chi ni ndonda ya síquí cuéchi ñuu neé cújéhnun ún.

Chi ni stíví un ñayuu ní cáhnu ñayiví jíin jnūhun cásíquí ndeé Yaā Dios.

Te ni sáha ya jeé ní ndutahū ñuu un síquí jeé ní jehni táca mozo yā.

Achí i jíjnáhan i.

³ Te ni cacahān tucu i:

Yōhyo cújéhnun ya. Chi ní cáni canda ñuhmā ñuu un jéé cayú, achí.

⁴ Te ndihóco cuñi téé jéhnun cándiso jniñu, jíin ndicúun jeé técu, ni cajecuiñi yití de, te ni cachiñuhún de Yaā Dios, Yaā néne nuū mesa ndácu jniñu. Te ni cacahān:

Amén. Súcuán na cóo. Yōhyo cújéhnun ya.

⁵ Te nde nuū mesa nuū ndácu ya jniñu ni cahān in jnūhun:

Róhó jéé cájejniñu nuū Yaā Dios, jíin róhó jéé cándiso íyo nuū yā, jeé cacujéhnun jíin jéé tu cacujéhnun,

na cáhán rō jeē yóhoyo vāha Yaā cúu ya.
Achí.

Vico jeē nándāha Yaā cúu Londe

⁶Te ni jini sōho ri jeē cácahān ñayuu cuehē ndasí, te ñihin nájnūhun ñihin cuehē yūte, te nájnūhun jeē cahán ñihin taja. Te ni cacahān:

Yóhoyo cújéhnū ya. Chi Jitoho yō Yaā Dios,
Yaā jñí ndihi poder,
vijna te ndácu ñihin ya jniñu.

⁷Te na cúsiñi ni yō, te siñi ndasí na cóo ni yō, te na cáhán yō jeē yóhoyo cújéhnū ya. Chi ni quee quiví jeē nándāha máa Yaā cúu Londe.

Te je iyó túhva ñahan nándāha jíin yá, te suu cúu ñayuu maá Yaā Dios.

⁸Te ni ñihin ña jnūhun cūhun ña sahma fino jeē ndóo ndasí te xíñú.

Achí i jíināhan i. Te sahma fino un cúu táca jniñu ndaā jeē casáha ñayuu maá Yaā Dios.

⁹Te ni cahān ndajéhé yā jíin rí:

Tee rō jnūhun yáha: Nacā jeē ndetū táca ñayuu jeē ní cana ya quingoo vico nándāha Yaā cúu Londe.

Te ni cahān gā ndajéhé un jíin rí:

Tāca jnūhun yáha cúu jnūhun ndaā ni cahān Yaā Dios, achí yá.

¹⁰Te ni jecuiñí yití rí nuū jehé ndajéhé un jéē chiñúhún rí yā nuú. Te ni cahān yā jíin rí:

Ma sáha rō súcuan. Chi ruhū suni mozo Yaā Dios cúu ri, nájnūhun máa rō jíin táca hermano rō jeē cácañíje vāha jnūhun Jesús. Sa suhva nuū maá Yaā Dios chiñúhún rō. Achí yá.

Chi jnūhun siquí Jesús cúu jeē cácahān ndaā ñayuu cánacani jnūhun Yaā Dios.

Yaā yosó siquí caballo cuijín

¹¹Yūcuán na te ni jito ri jeē núne andiví. Te ni cane ñin caballo cuijín, te Yaā yosó siquí tī naní yá Yaā ndaā, Yaā squícu, chi squícu ya jeē ni jéjnūhun ya. Te ndaā sándaā yā jniñu te ndaā ndóna ya siquí táca jéneé.

¹²Te tinūu yá ndíndēe nájnūhun yáñuhūn. Te xiní yā ñūhun cuehē corona. Te yósó ñin síhví yá jeē maá-ni ya cúu jeē jíiní.

¹³Te ñūhun ya ñin sahma jeē ni ñúndaji nuū ñíñí, te naní yá Jnūhun Yaā Dios.

¹⁴Te táca ndajéhé yā jeē iyó andiví, cáyosō caballo cuijín, cándiquin yatā yā. Te cáñuhun sahma fino cuijín iyó ndoo.

¹⁵Te ini yuhu máa Yaā jeē yosó siquí caballo, quénda jeē cáca nájnūhun ñin espada xeēn. Te espada un cúu jnūhun ya jeē stóho ya ñayuu táca nación. Te ñihin ndacu ya jniñu nuū i. Te sándaā yā siquí cuéchi i nájnūhun jeē jeñú siquí ndehē uva cájexin. Te cuāha ya castigo xeēn ndoho i jeē quití ni yā siquí cuéchi i. Chi máa yá jñí ndihi poder.

¹⁶Te sahma ya jíin síhin ya yosó jnūhun yáha: Rey nuū táca rey jíin Jitoho nuū táca jítoho, áchí.

¹⁷Yūcuán na te ni jito ri ñin ndajéhé yā jeē ñin nuū níandii. Te ni cana jee ya xiní táca quití ndáva nuū tachí:

Ndutútú rō quijicoo rō cuxíni rō ñin vico cáhnu sáha Yaā Dios.

¹⁸Te caji rō cūñu táca rey jíin capitán jíin téé téyí, jíin cūñu táca caballo jíin téé ni cayosó siquí tī. Te suni caji rō cūñu táca gá ñayuu, cúu ñayuu casájniñu cuenta maá jíin mozo jeē ní cajeen ñayuu, cúu ñayuu cácujeñnu jíin ñayuu tu cácujeñnu. Achí ndajéhé yā.

¹⁹Yūcuán na te ni jito ri maá quití xéén jíin táca rey ñayiví jíin cuéhé soldado de. Te ni candutútú de jeē cuajnāhan de jíin máa Yaā yosó caballo jíin táca ndajéhé yā.

²⁰Te ni jñí ya quití xéén cuahān tī preso jíin téé ni nacani jnūhun stáhú jeē ní sáha táca jniñu jéñnu jeē ní jito jíinúu quití xéén. Chi jíin jniñu jéñnu un cúu jeē ní stáhú de táca ñayuu jeē ní cajēhe jnūhun condiso jnuní quití xéén, jíin jéé ní cachiñúhún imagen tī. Te quití xéén un jíin téé ni nacani jnūhun stáhú un, cátecu ndíndúú te ni scáne ya nuū laguna ñuhūn jeē cayú jíin azufre.

²¹Te jíin espada jeē cáca yuhu Yaā yosó caballo ni cajihí táca soldado quití xéén un. Te táca quití ndáva nuū tachí ni candutú chíji tī ni cayeji tī cūñu de jíināhan de.

Siquí mil cuiyā

20

¹Te ni jito ri jeē ní cuun ñin ndajéhé yā ichi andiví. Te ndáhá yá ndacáa jeē núne

tūhnchi cúnú ndasí. Te suni ndáhá yá ñn cadena cáhnu.

² Te ni jñi ya maá cóo cáhnu jeē iyó ndé jenahán ndasí, te nání tí jexeén jíin Satanás. Te ni jihni yá jeē conuhnī mil cuiyā.

³ Te ni scáne ya ini tūhnchi cúnú ndasí. Te ni jesi vāha ya, te ni sácutú yá yuyáú, návāha ma stahú gá un ñáyuu tǎcá nación, chi nde na jínu mil cuiyā. Te jeē yáha mil cuiyā ún, yūcuán na te cánuú jéē ndajī caca cuu jecu na tiempo.

⁴ Te ni jito ri tǎca mesa nuū ndácu jñiñu, te yūcuan cáyūcu tǎca ñáyuu jeē ní canihīn jñiñu i sándaā i jñiñu. Te suni ni jito ri anuá tǎca ñáyuu jeē ní cajehnde xinī i siquī jeē ní canacani i jñūhun Jesús jíin jñūhun Yaā Dios. Te tu ní cáchiñúhún i quiñi xéén jíin imagen tī, ni tu ní cájēhe i jñūhun jeē cóndee jñunī tī jneē i chí ndaha i. Te ni jito ri jeē ní natecu i te ni candacu i jñiñu jíin Cristo mil cuiyā.

⁵ Yáha cúu ndíyī jeē nátecu xīhna gā. Te tǎca gá ndíyī, tu ní cánatecu i, chí nde jeē jínu mil cuiyā.

⁶ Te nacā jeē ndetū tǎca ñáyuu ndoo ánuá jeē nátecu xīhna gā. Chi ma cúu cuiñi i vuelta uū. Te cuu i sutū nuū Yaā Dios jíin núu Cristo, te ndacu i jñiñu jíin yá mil cuiyā.

⁷ Te jeē jínu mil cuiyā ún, te ndajī Satanás te quenda nuū yíndihyū.

⁸ Te stáhú tucu ñayuu tǎcá nación ñí cáhnu ñayiví. Te stáhú ñayuu ñuu Gog jíin Magog. Te sáha jeē ndutútú tǎca soldado ñuu un jéē cuajnáhan de. Te coo cuehē ndasí de nájnūhun ñíñi yumar.

⁹ Te cuiñe núu de quingoo de ñí cáhnu ñayiví. Te cuiñe ndúu de ñuu nuū cáyūcu ñáyuu maá Yaā Dios, ñuu jeē maní yá jíin. Te Yaā Dios chí scúun ya ñuhūn ichi ándiví, te cayū ndihí de.

¹⁰ Te jexeén jeē ni stáhú tǎca ñáyuu ún, chí scáne ya quihīn nuū laguna ñuhūn jeē cayú jíin azufre. Te yūcuán chí xīhna gā ni scáne ya quiñi xéén jíin téé ni nacani jñūhun stáhú. Te yūcuán ndoho nduú ñuú ñí cáni cuiñi.

Jeē sándaā yá jñiñu nuū mesa cuijín

¹¹ Yūcuán na te ni jito ri ñn mesa cuijín cáhnu, te néne máá Yaā ndácu jñiñu. Te ñayiví jíin ándiví ni ndoñúhún cuáhān jeē ní jito ya nuū, chí tuá ni cúu quendōo nuū yā.

¹² Te ni jito ri tǎca ndíyī, jeē ní cujéhnu jíin jeē tu ní cujéhnu, cáhīn nuū Yaā Dios. Te ni sáha ya jeē núne tǎca libro, te suni ni nune inga libro jeē yosó síhví ñáyuu cotecu ñí cáni. Te ni sándaā yá siquī tǎca ndíyī ún, núu ndese jñiñu ni casáha i jíin ndese yosó núu tǎca libro un.

¹³ Te tǎca ndíyī jeē ní cajihī nuū mar, ni nanecoo. Te suni ni nanecoo tǎca ndíyī jeē ní cajihī i, jeē íne i máá lugar nuū cáyūcu ánuá ndíyī. Te ni sándaā yá siquī, núu ndese ni casáha ñn ñn i.

¹⁴ Yūcuán na te cuehyī jéñi ñayuu jíin lugar nuū cáyūcu ánuá ndíyī, ni snáā yá ni scáne ya cuango nuū laguna ñuhūn. Te jeē ndóho ñayuu nuū laguna ñuhūn, yūcuan cúu jeē cúu i vuelta uū.

¹⁵ Te yūcuan ní scáne ya tǎca ñáyuu ni casáha jñiñu néé jéé tu yosó síhví i nuū libro jeē yosó síhví ñáyuu cotecu ñí cáni.

Ándiví jéé jíin ñáyiví jéé

21

¹ Yūcuán na te ni jito ri ándiví jéé jíin ñáyiví jéé. Chí ándiví jíin ñáyiví xīhna ñúhún ni naa. Te suni tuá mar.

² Te ruhū Juan, ni jito ri ñuu iñ jeē cúu Jerusalén jeé. Te ñuu un ní cuun vēji ichi ándiví núu néne Yaā Dios. Te ñuu ún luu cáa nájnūhun ñn ñahan jeē ni sátūhva ña ni cucutú ña jeē nándaā ña jíin yñ ña.

³ Te ni jini sōho ri ñn jñūhun jeē ni cáhān jee ichi ándiví:

Condēhé, chí vijna te ndéé Yaā Dios mēhñu ñáyuu. Te condee yá jíin i jíjnāhan i, te cuu i ñayuu maá yá. Te máá yá condee yá jíin i jeē cúu ya Yaā Dios i.

⁴ Te nacuaa yá ndute tñnúu i jíjnāhan i. Te ma cúu gā ñayuu, ni ma ndahyú gā i, ni ma cucuíhyá gā ni i, ni ma jetú gā i. Chí je ni yáha tǎca jñúndóho jeē ni íyo, áchí.

⁵ Yūcuán na te ni cahān maá Yaā néne nuū mesa:

Condēhé, chí nasáha jeé rí tǎca jéé iyó, áchí yá.

Te suni ni cahān yā:

Tee ró jñūhun yáha. Chí tǎca jñūhun yáha cúu jñūhun jeē jiní ndije ró jéé ndaā cúu.

⁶ Te ni cahān gā yā:

Je ni jñu. Máá rí cúu nájnūhun letra A xīhna ñúhún jíin letra Z jeē sándēhí na, chí

maá rí ni squejéé ndihi te maá rí sínu. Te tāca ñáyuu cājichī, súcuan-ni cuāha ri coho i ndute cáne jeē cótecu i ní cáni.

⁷ Tāca ñáyuu jeē cúndeyí síquī jéneé, nihīn i ndihi jeē yáha cuu tahū i. Te cuu ri Yaā Dios i, te cuu i sēhe ri.

⁸ Te tāca ñáyuu jeē cáyūhú ndoho síquī jnúhun ri, jíin ñáyuu tu cācandíje, jíin ñáyuu casáha jniñu néé, jíin ñáyuu cājehni ndīyí, jíin ñáyuu cājica jnení, jíin ñáyuu casáha tási, jíin ñáyuu cáchiñúhún ídolo, jíin táca ñáyuu castáhú, ñayuu ún chi quívicoo i laguna ñuhūn jeē cayú jíin azufre. Te yūcuan cúu jeē cúu i vuelta uū.

Jerusalén jeé

⁹ Yūcuán na te ni quiji ñn jnáhan ndihúxá ndajéhé jeé ní candāhá ndihúxá cohō jeé ni ñúhun chitú ndihúxá jnūndóho sandíhí. Te ni cahān yā jíin rí:

Nehen, te na stéén rī nuū rō ñahan jeé nándāha ña cuu ña ñasihí Yaā cúu Londe, áhí yá.

¹⁰ Te ni sáha ga Espíritu Santo jeé ní jito ndijin rī, te ndajéhé un ní jeca ya ruhū cuahān yā jíin rí xinī ñn yucu cáhnu súcún. Te ni steén yā nuū rī maá ñuu iī cujéhnu jeé cúu Jerusalén, te ni cuun vēji nde andiví núu néne Yaā Dios.

¹¹ Te ndíndēé ndasí ñuu un nájnūhun ndíndēé Yaā Dios. Te xíñú nájnūhun xíñú ñn yuū luu jeé ndeé yahu ndasí, nájnūhun yuū cuijín jeé quiyí nájnūhun vidrio.

¹² Te yuhu ñúu un ní jicó ndúu ñn jeé cáhnu súcún ndihyú ñuu ún. Te íyó úxī uū yehyí. Te tāca yéhyí un ín ñn ndajéhé yā. Te tāca yéhyí un yósó síhví ndihúxí uū yucūn Israel.

¹³ Te lado nuū cáne niāndii iyó únī yehyí. Te lado norte suni íyó únī yehyí. Te lado sur suni íyó únī yehyí. Te lado nuū quée niāndii suni íyó únī yehyí.

¹⁴ Te íyó úxī uū yuū náhnu jeé cúu cimientu maá jéé ndihyú ñuu ún. Te tāca yúu un yósó síhví ndihúxí uū apóstol maá Yaā cúu Londe.

¹⁵ Te ndajéhé jeé ni cahān jíin rí, ndáhá yá ñn yujnu oro jeé chícuaāha yá ñuu un jíin táca yéhyí jíin maá jéé ndihyú ñuu ún.

¹⁶ Te ñuu ún chi ñn cūhva-ni cúu ndicúún lado. Chi jeé cáni jíin jéé jité, inuú-ni cúu. Te

ndajéhé un ní chícuaāha yá ñuu un jíin yujnu ún. Te néé uū mil uū ciento kilómetro jeé ñn ñn lado. Te inuú-ni cūhva jeé cáni, jeé súcún, jíin jéé jité.

¹⁷ Te suni ni chícuaāha yá maá jéé ndihyú ñuu ún, te néé unī xico cuūn metro jeé súcún. Te yūcuan cúu cūhva jejníñu ñayuu, jeé suni jéjníñu ndajéhé un.

¹⁸ Te maá jéé ndihyú ñuu un ní cuvāha jíin yúu cuijín quiyí. Te ñuu ún chi maá nene oro cúu, te cáa nájnūhun vidrio quiyí.

¹⁹ Te tāca yúu jeé cúu cimientu maá jéé ndihyú ñuu ún, ní cucutú jíin ndinuū yuū luu jeé ndeé yahu. Yuū ñn cúu yuū cuijín quiyí. Te jeé uú cúu yuū ndeé ndíí. Te jeé uní cúu yuū pinto. Te jeé cuún cúu yuū cuí ndíí.

²⁰ Te jeé uhún cúu yuū pinto jeé ñúhun raya. Te jeé iñú cúu yuū cuehé pinto. Te jeé uxá cúu yuū cuaán quiyí. Te jeé uná cúu yuū cuí ndeé. Te jeé ñn cúu yuū cuaán ndíí. Te jeé uxí cúu yuū cuí cuijín. Te jeé uxí ñn cúu yuū cuehé cuaán. Te jeé uxí uū cúu yuū ndihí ndíí.

²¹ Te ndihúxí uū yehyí un cácuu uxí uū perla jeé ndeé yahu. Te ñn ñn yéhyí cúu ñn ñn perla. Te maá nene oro cúu calle cáhnu ñuu ún, te quiyí nájnūhun vidrio.

²² Te tú na templo ni jito ri ini ñuu ún, chi ní cáhnu ñuu un ndeé maá Jítoho yō, Yaā jnī ndihi poder, jíin Yaā cúu Londe.

²³ Te ñuu ún tu jini ñúhún cundijin jíin luz niāndii jíin yóō. Chi jeé ndíndēe maá Yaā Dios cúu jeé cundijin ñuu ún. Te luz ñuu un cúu maá Yaā cúu Londe.

²⁴ Te ñayuu tācá nación ñayīvi jéé ní jnama ya, caca i jeé cundijin luz ñuu un núu i. Te tāca rey ñayīvi quijicoo de ñuu ún, quindecas de tācá ndajniñu jeé ndeé yahu jíin jéé cujéhnu de sáha.

²⁵ Te tāca yéhyí ñuu ún ma cóndihyū cuiti nduú, chi tú na jecuāa coo.

²⁶ Te ini ñuu ún quijicoo ñayuu tācá nación, quindecas i tācá ndajniñu jeé ndeé yahu jíin jéé cujéhnu i sáha.

²⁷ Te ma quívicoo cuiti ni ñn jeé jnehén. Ni ma quívicoo ñayuu casáha jniñu néé jíin jéé castáhú. Chi quívicoo máni maá ñáyuu jeé yosó síhví i nuū libro jeé yosó síhví ñáyuu cotecu ní cáni, jeé névāha Yaā cúu Londe.

22

¹ Yūcuán na te ndajéhé yā ni steén yā nuū rī ñn yūte íyó ndoo. Te ndute un sáha jeē cótecu yō ñí cáni. Te xíñú nájñūhun vidrio, te cáne nuū mesa nuū ndácu Yaā Dios jniñu jíin Yaā cúu Londe.

² Te jíca yūte ún sava mēhñu calle cáhnu ñuu ún. Te ndíndúú lado yuyúte un yáhi yujnu jeē cótecu yō ñí cáni sáha. Te yujnu un jéhe ndehē uxī uū jínu jeē ñn cuiyā, chi tāca yóo cúun ndehē. Te ndaha yúcú i cúu tajná jeē ndúvāha ñayuu tācá nación.

³ Te tācá-ni jeē ni cáhān yā jeē násūu jéé váha cúu, ma cóo ini ñuu ún. Te ini ñuu ún cuiñi máa mesa nuū ndácu Yaā Dios jniñu jíin Yaā cúu Londe. Te ñayuu cácandíje jeē cácuu i mozo yā, chiñúhún i ya.

⁴ Te coto i nuū yā, te condee síhví yá jneē i.

⁵ Te ma cóo ga jecuāā ñuu ún. Te ñayuu cáyūcu yúcuan tuá jíni ñúhún i jeē cúndijin lámpara nuū i, ni jeē cúndijin niāndii. Chi jeē ndíndēe máa Jítóho yō Yaā Dios cúu jeē cúndijin nuū i. Te ndacu i jniñu ñí cáni cuiñi.

Jeē cuácuyajni ndiji Cristo

⁶ Yūcuán na te ni cahān ndajéhé un jíin rí:

Tāca jnúhun yáha cúu jnúhun jeē jiní ndije ró jéé ndaā cúu. Te Jítóho yō Yaā Dios, máa yá sáha jíin téé cáncani jnúhun ya jeē jíin Espíritu yā cáncani de. Te suu máa yá ni tají yá ndajéhé yā návāha steén nuū ñáyuu cácuu mozo yā tācá jniñu jeē yachí coo.

⁷ Ndiji yachí rí, achí yá.

Te nacā jeē ndetū ñayuu chusóhó jnúhun Yaā Dios jeē yosó núu tútu yáha.

⁸ Te ruhū Juan, ni jini sōho ri tāca jnúhun yáha, te ni jito ri tācá jniñu yáha. Te ná ni jini sōho ri ni jito ri, yūcuán na te ni jecuiñi yití rí nuū jehé maá ndajéhé jeē ni steén tācá jniñu yáha núu rí, jeē chiñúhún rí yā nuú.

⁹ Te ni cahān ndajéhé un jíin rí:

Ma sáha ró súcuan. Chi ruhū suni mozo Yaā Dios cúu ri, nájñūhun máa ró jíin tāca hermano rō jeē cáncani jnúhun ya, jíin ndíhi ñayuu cájetáhú jnúhun yósó nuū tútu yáha. Sa suhva nuū maá Yaā Dios chiñúhún ró. Achí yá.

¹⁰ Te ni cahān gā ndajéhé un jíin rí:

Ma chísāhi ró táca jnúhun Yaā Dios jeē yosó núu tútu yáha, chi je cuácuyajni tiempo jeē cúndaā ndíhi.

¹¹ Te ñayuu casáha jniñu néé, na sáha ga máa i jniñu néé. Te ñayuu jnehén ánuá, na quéndōo máa i súcuan. Te sa ñayuu casáha jniñu ndaā, na sáha ga i jniñu ndaā. Te ñayuu cáhíyo ndoo ánuá, na cáca ndoo ga i súcuan. Achí ndajéhé un.

¹² Jendaá jeē ndiji yachí rí, achí Jesús. Te quiji ri jíin táhū cuāha ri nuū ñn ñn ñayuu, núu ndese jniñu ni casáha i.

¹³ Máa rí cúu nájñūhun letra A xíhna ñúhún jíin letra Z jeē sándíhí na, chi íyó rí nde xíhna ñúhún te coo ri ñí cáni.

¹⁴ Nacā jeē ndetū ñayuu jeē jéhe i jnúhun ndundoo ánuá i nájñūhun ndúndoo sahma. Chi cuu caji i ndehē yujnu jeē sáha jeē cótecu i ñí cáni, te cuu quívicoo i yéhyí ñuu íi ún.

¹⁵ Te ichi fuera ñuu ún cuiñi ñayuu tu cácandíje, jíin ñáyuu casáha tásí, jíin ñáyuu cájica jnéni, jíin ñáyuu cájehni ndíyi, jíin ñáyuu cáchiñúhún ídolo, jíin ñáyuu cácusí ni stahú jnáhan.

¹⁶ Máa rúhū Jesús, ni tají rí ndajéhé rí návāha castūhun yá tāca jnúhun yáha nuū tāca grupo ñayuu cácandíje. Te máa rí ni sáha jeē ni íyó rey David, te ni quiji ri nuū yucún David. Te cúu ri nájñūhun lucero ndíndēe cáne cúndijin. Achí yá.

¹⁷ Te máa Espíritu Santo jíin máa ñahan jeē nándāha jíin Yaā cúu Londe, cácahān:

Nehen, quívicoo ró ndaha ya, achí.

Te tāca ñáyuu jeē jíni sōho, suni na cáhān i:

Nehen, quívicoo ró ndaha ya.

Te tāca ñáyuu cájichí jeē cácuu i coho i, na quívicoo i ndaha ya, te súcuan-ni na cóho i ndute jeē cótecu i ñí cáni sáha.

¹⁸ Te tāca ñáyuu jíni sōho jnúhun Yaā Dios jeē yosó núu tútu yáha, cáhān nīhin ri jíin i: Núu ndé ñáyuu chisóo i nuū jnúhun cáhān tutu yáha, te Yaā Dios chisóo yá jnúndóho cáhān tutu yáha, ndoho i.

¹⁹ Te núu ndé ñáyuu quende i jecu jnúhun cáhān tutu yáha, te Yaā Dios quende yā tahū i jeē yosó núu libro jeē yosó síhví ñayuu cótecu ñí cáni, te ma nihín i tahū i ini ñuu íi ún. Te tutu yáha cúu jeē cahān síquī tācá un.

²⁰ Te Yaā jeē ni cáhān tāca jnúhun yáha, jícán tahu na jéē ndíji yachī ní.
suhva cáhān yā:

Jendaá jeē ndíji yachī rī, achí yá.

²¹ Te ñúhun ni rī jeē Jítoho yō Jesucristo na Amén. Súcuan na cóo. Jítoho ná Jesús, sáha ga yā jeē váha róhó jínáhan ró. Amén.